


Ălənžil n-Ŷisa
Ălmasex: Kitab
Ălmuqăddăs



Tamasheq: New Testament

Älənžil n-Ÿisa Älmasex: Kitab Älmuqäddäs
Tamasheq: New Testament

copyright © 2003 Wycliffe Bible Translators, Inc.

Language: (Tamasheq)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source files dated 29 Jan 2022
b95f369b-a236-5ca8-8cab-11f74279d73c

Contents

Mätti	1
Marqəs	60
Luqa	95
Exya	153
Ijitän n-inəmмуšal	195
Käl-Roma	249
1 Käl-Kurənta	276
2 Käl-Kurənta	302
Käl-Gälasya	319
Käl-İfäsus	329
Käl-Fəlibb	338
Käl-Kuləs	345
1 Käl-Täslonika	351
2 Käl-Täslonika	357
1 Timoti	360
2 Timoti	368
Titus	373
Fälyamon	376
Yäbranitän	378
Yaquub	397
1 Bətrus	403
2 Bətrus	411
1 Exya	415
2 Exya	421
3 Exya	422
Hudd	423
Tänäfalilt	425

Älönzil n-Ÿisa Älmasex wa iktäb Mätti

*Ättarex n-Ÿisa Älmasex
(Luqa 3:23-38)*

- 1 Ättarex n-ŸisaÄlmasex wa n-ahäya n-ännäbi Dawöd d-ahäya n-Ibrahim da:
- 2 Ikräš Ibrahim Isxaqq,
Isxaqq ikräš Yaqub,
Yaqub ikräš Yähuda d-ayötma-s wi iyyäðnen.
- 3 Yähuda önta, tökräš-as hänne-s Tamar, Faris d-Zira.
Ikräš Faris Xäšrun,
ikräš Xäšrun Aram,
- 4 ikräš Aram Aminädab,
ikräš Aminädab Nasun,
ikräš Nasun Sälmun.
- 5 Ikräš Sälmun d-hänne-s Rahab Boḡaz,
ikräš Boḡaz d-hänne-s Rutt Ÿubäyd,
Ÿubäyd önta, ikräš Yasa.
- 6 Yasa önta a oräwän ämänokal Dawöd.
Dawöd önta, ikräš d-hänne-s n-Urya Suläyman,
- 7 Suläyman önta ikräš Raxäbyäm,
Raxäbyäm ikräš Abya,
Abya ikräš Asaf,
- 8 Asaf, ikräš Yähušäffat,
Yähušäffat ikräš Yoram,
Yoram ikräš Uzya,
- 9 Uzya ikräš Yotam,
Yotam ikräš Axaz,
Axaz ikräš Ezekya,
- 10 Ezekya, ikräš Mänase,
Mänase ikräš Amon,
Amon ikräš Yozya,
- 11 Yozya ikräš Yäxunya d-ayötma-s wi iyyäðnen.
Äzzäman-wen-däḡ a däḡ-öttökfälän käl-Išrayil
s-äkall wa n-Babilun.
- 12 Darät atökfel-wen-däḡ ad-ikräš Yakonya Äššälat,
Äššälat ikräš Zurubabil,
- 13 Zurubabil ikräš Abihud,
Abihud, ikräš Ilyakim,
Ilyakim ikräš Yazur,
- 14 Yazur ikräš Ässäddiq,
Ässäddiq, ikräš Yahim,
Yahim ikräš Ÿelihud,
- 15 Ÿelihud ikräš Ÿelyazär,
Ÿelyazär, ikräš Mittän,
Mittän, ikräš Yaqub.
- 16 Yaqub-en-däḡ a äshäyāwän Yusöf wa n-ähalös n-Märyäma
ta toräwät Ÿisa wa s-itawänna Älmasex.

¹⁷ Ƴur-äzzäman wa n-Ibrahim tökköd äzzäman wa n-Dawəd, okäynät märawät ezzurəyaten d-əkkožät; Ƴur-äzzäman wa n-Dawəd tökköd äzzäman wa n-atəkfəl n-käl-Işrayil s-əkall wa n-Bäbilun, okäynät märawät ezzurəyaten d-əkkožät; Ƴur-äzzäman daƳ wa n-atəkfəl n-käl-Işrayil s-əkall wa n-Babilun tökköd äzzäman wa n-tiwit n-Älmasex, märawät ezzurəyaten d-əkkožät a okäyenen.

*Tiwit n-Ƴisa Älmasex
(Luqa 2:1-7)*

¹⁸ Enta da əmmək wa s-iwa Ƴisa Älmasex: ma-s Märyäma, ittar-tät ähaləs s-isəmet Yusəf mäšan dāƳ-a-wa itäjj MässinäƳ s-tärna n-Unfas Šäddijän, təkraš ənniyät härwa wär toher d-Yusəf isəftaƳ.

¹⁹ Yusəf-i n-anəmmutär-net, ähaləs n-ämaydal a ämoos, inhäy a-s tanfust-den-däƳ Ƴas, ässosäm, wär t-illa ere dāƳ-ija isälan ed wär-irha ad-tät-ikšəf. Təssəba n-a-wen-däƳ a fäl t-dd-ijjäs ənniyät n-ad-hin-izjär isälan-net dāƳ-ufär.

²⁰ Izinəzjum dāƳ-a-wen-däƳ a-s has-dd änfäläl änjälos n-Emäli dāƳ-täharjit, inn'-as: «Yusəf Ägg-Dawəd, wär täksudäd adubən n-Märyäma fäl-a-s ənniyät wa la, Unfas Šäddijän a-s əssəbab-net,

²¹ ad-təkrəš alyađ, təjəd-as isəm Ƴisa fäl-a-s ənta a madän-iƳləs tamətte-net dāƳ-ibäkkadän-net.»

²² A-wa iket-net ija i-ad-itbət a-wa innä ännäbi n-MässinäƳ iyyän a-s innä: «Innä Emäli:

²³ <Säjdät!

Ad-təkrəš tämawadət wärät təzzey meddən ənniyät, təkraš alyađ, iwär-t isəm Imanuwil».

Imanuwil, älmäƳna-net: MässinäƳ, izzäƳ-dd jere-näƳ.»

²⁴ Inkär-dd Yusəf dāƳ-eđəs, ämešäl a-wa has-innä änjälos n-Emäli, izzəzläy-dd Märyäma,

²⁵ mäšan wär dār-s oher isəftaƳ har təjrāw eƳäf-net, təkraš alyađ, äswär-t isəm Ƴisa.

2

Imusänän wi dd-fälnen ijəj, əmmaƳän i-Ƴisa

¹ Äzzäman wa d-ämoos Harudəs ämänokal n-teje ta n-Älyähudəyät ad-iwa Ƴisa dāƳ-taƳrəmt ta n-Bätlehäm häť teje-ten-däƳ. Äzzäman-en-däƳ daƳ ad-dd-osän imusänän dd-fälnen emäynäj, əkkan-dd Yärussälam,

² sastanän äddinät d-ämänokal n-käl-Älyähud wa s-iket iwa s-ənhäyän atär-net a-s dd-izjär s-emäynäj; əlläƳen-asän a-s ass ad-dd-jän i-ad-t-əƳbədän.

³ Isl' ämänokal Harudəs i-mäjräd-wen-däƳ Ƴas, iššəwwäš ənta d-käl-Yärussälam iket-däƳ-näsän.

⁴ Äsdāw-dd darät-a-wen e d t-illäm ämänokal n-käl-tikutawen d-älƳalim n-Ättäwrät, issəstän-tän d-edägg wa dāƳ-mad-iwəy Älmasex.

⁵ Ənnän-as: «Bätlehäm ta häť teje ta n-Älyähudəyät a dāƳ-mad-iwəy fäl-a-s iktab ännäbi iyyän a-s, inna MässinäƳ:

⁶ <Ya Bätlehäm, kämm-i häť teje ta n-Älyähudəyät, tidət, wär təkned təmƳäre jer-tiƳärmaten ti n-käl-Älyähud mäšan, kämm-i-däƳ ənđärrät ad-dd-mad-izjär ämänokal wa madän-izar i-tamətte-nin ta n-käl-Işrayil, isəssiƳəd-tät.> »

⁷ Islä Harudəs i-a-wen ɣas, ikkäs-dd imusänän-winnin s-takše, ad-tän-ikann asəstan d-əzzāman wa dāɣ-hasän-dd-änfaläl atär wa s-ənnän ənhayän-t.

⁸ Issəgl'-en ɗarät-a-wen, dāɣ-a-s hasän-inna: «Äkkät Bätlehäm, təkñəm asəstan d-alyaɗ, afäl t-təjrāwäm, əqqələt-ahi-dd, təjəm dāɣ-i isälan i-ad-t-äkkäɣ, ärkäɣäɣ-as näkk-dāɣ.»

⁹ Əslän i-a-wa inna, əglän. A əñɗärrän, atär-wənnin ənhäyän s-emäynäj-da-dāɣ, äzzar-asän har tanämhāla n-ehän wa iha alyaɗ.

¹⁰ Ənhäyän atär-en, əknän tedäwit.

¹¹ Əjjäšän ehän wa jənnəj-ənhäyän atär, ənhäyän alyaɗ d-ma-s Märyäma, ärkäɣän-as, ad-t-ɣabbädän. Orän ɗarät-a-wen tisətwar-näsän, əkkäsän-as-dd tibəddar n-oräɣ d-matälxer d-teldədt.†

¹² Əllan-t dihen-dāɣ a-s tän-issəlmäd Mässinäɣ dāɣ-täharjit s-udaɣnet i-ad-əqqələn Harudəs. Jän tabarät tiyyät säl ta dd-jän, əqqälän äkall-näsän.

Ajiwəɗ s-Mişra

¹³ Əglän imusänän ənnin ɣas, änfaläl-dd änjälos n-Emäli i-Yusəf dāɣ-täharjit, inn'-as: «Yusəf, ənkär, əɗkəl alyaɗ d-ma-s, jawəɗ s-äkall wa n-Mişra, təzzāɣäd dihen-dāɣ har ašäl wa d-hak mad-ännäɣ täddoobed ad-dd-təqqələd fäl-a-s alyaɗ-i, itammäɣ-as Harudəs i-ad-t-änɣ.»

¹⁴ Inkär, iɗkäl alyaɗ d-ma-s, ähona s-Mişra ehäɗ-wen-dāɣ,

¹⁵ izzäɣ dihen har äba Harudəs. Ij'-a-wen i-ad-itbət a-wa innä ännäbi iyyän a-s innä, innä Emäli:

«Əɣreɣ-dd Rure-ɣ i-ad-dd-izjär Mişra.»

Aratän wi issänɣa Harudəs

¹⁶ Ilmäd Harudəs a-s əssəswädän-t imusänän ed wär t-dd-olesän uɣəl ɣas, ikäf s-aɗkär. Omär älwäqq-wen-dāɣ s-ad-ämmätän ilyaɗän wi hänen Bätlehäm d-attayän-net t-əllanen daw-əssin iwətyan ed täqqän-ten-dāɣ a togdähät d-ta s-has-ənnän imusänän, änfalälän-asän-dd atär dāɣ-s.

¹⁷ Ämoos a-wen-dāɣ ijän a ässiitbätän a-wa innä ännäbi Yirmiya† a-s inna dāɣ-əlkəttab n-Mässinäɣ:

¹⁸ «Ij' emäsli n-tisnant dāɣ-aɣrəm wa n-Rama, ja tahāla d-tikälelen.

A-wa Rähila hallät ilyaɗän-net,
äbä-dd a tät-isəssisumän,
ed ilyaɗän-net, ämmun iket-dāɣ-näsän.»

Iqqäl-dd Yusəf äkall wa n-Işrayil

¹⁹ Äba Harudəs ɣas, änfaläl-dd änjälos n-Emäli i-Yusəf dāɣ-täharjit dāɣ-äkall wa n-Mişra, inn'-as:

²⁰ «Əɗkəl alyaɗ d-ma-s ämära, təqqələd äkall wa n-Işrayil ed äddinät wi s-kāla tattarän iji n-iman-net, äba-tän.»

²¹ Inkär Yusəf, iɗkäl alyaɗ d-ma-s, iqqäl äkall wa n-Işrayil.

²² Mäšan, islä a-s Erkilyas ägg Harudəs a ämnakälän dāɣ-edägg n-ti-s fäll-teje ta n-Älyähudəyät ɣas, igdäl-as əmməttəsu ad-tät-äkk i-ad-dāɣ-s izzäɣ. Änfaläl-as-dd Mässinäɣ dāɣ-täharjit, inn'-as ad-äkk teje ta n-Galila.

²³ Iwwäɗ-in teje-ten ɣas, izzäɣ dāɣ-taɣrəmt s-isəm-net Näşirät. Ija a-wen i-ad-itbət a-wa ənnän ännäbitän fäll-Ÿisa a-s ənnän:

«Ad-t-iwär isəm: U-Näşirät.»

† 2:11 2:11 Aɗutän-wi-dāɣ, itawänn'-asän dāɣ: Miri (myrrhe dāɣ-Təfränsit). † 2:17 2:17 A-wa ännäbi dd-äzzarän i-Ÿisa, äloläy dāɣ-isälan-net säɗisät timaɗ n-awätay dat-tiwit-net.

3

*Älxuṭbät wa ija Exya wa n-Enösselmäx
(Marqəs 1:1-8; Luqa 3:1-18; Exya 1:19-28)*

¹ Išilan-win-däx d-izzäx Ḡisa taḡrəmt ta n-Näširät, ad-issəntä Exya wa n-Enösselmäx ämašal-net, ijanna i-äddinät däx-tenere n-teje ta n-Älyähudəyät:

² «Utabät fäl-a-s Təmmənəya n-Mässinäx, tohäz-käwän-dd.»

³ A-wen-däx išlän Exya, a däx-ässewäl ännäbi Saya,[†] a-s innä:
«Ad-t-iməl ähaləs äsiḡären däx-tenere,

ijanna i-äddinät:

«Äknät tabarät i-Emäli,
səssiḡədät data-s ibaran-net.» »

⁴ A-s itäj a-wen-däx, ilsa Exya asälso iknan s-eläm n-amnəs warän amzadän, ijbas s-taməntəka n-eläm, iddar s-tašwält d-torawät.

⁵ Tisən-t-dd äddinät dd-falnen aḡrəm wa n-Yärussälam d-teje ta n-Älyähudəyät iket-net d-idäggan iket-näsän wi ohäznen ejänš wa n-Ḡurdəni,

⁶ ad-tilḡun ibäkkadän-näsän dat-tamətte, isalmaḡ-tän Exya däx-ejänš wa n-Ḡurdəni.

⁷ Ijräh-in Exya a-s tamətte ta t-dd-təkkät, han-tät äddinät äjjootnen la taggayt ta n-käl-faris d-ta n-käl-sadus ärhanen ad-tän-isəlmäx, innäd-dd sār-sän, inn'-asän: «Ya taššälən-i-däx! Wädden tənnäm təmsädäm! Ḥyya, a tärham ad-tətwəsəlmäḡäm i-ad-təfələm daw-äššäreḡa n-Mässinäx wa s-išwar fälla-wän dd-oḡa? Ləḡätät-ahi, mi käwän-issəlmädän s-a-wen?

⁸ Sətbətät tātubt-näwän s-timašalen ähuuskätnen,

⁹ wär täsfälläm fäll-tənna n-a-s əzzurəyät n-Ibrahim a tämoosäm ed afäl täqqäl s-isälan n-əzzurəyät ḡas, Mässinäx, äddoobät ad-isəmməskəl tihun-ti-däx hannäyäm, ixlək-dd däx-snät əzzurəyät i-Ibrahim.

¹⁰ Äjät ənniyät fäl-a-s emm n-tutäla äru d-insa fäll-ikewän n-ihəškan, e d t-illäm ahəšk wärän itirəw aratan iha älfäyda, ad-hin-ättänkäd, itwəjār-in däx-efew.

¹¹ Näkk, aman a däx-käwän-salmaḡäx i-ad-umas a-wen ašämöl n-tātubt-näwän mäšan, ilkam-ahi ähaləs hi-ijan mijraw wa-däx s-wär-änhəjjäx wäla-däx d-ad-əḡəsäx issal n-tifädelen-net, ənta, Unfas Šäddijän d-efew a däx-käwän-mad-isəlmäx,

¹² itṭaf tesäyt-net ta s-mad-hin-izuzzär allon-net, isədəw əttäḡam wa oläḡän däx-ejänd-net, irməs ahošär wa wär-ih' älfäyda, ijär-t-in däx-efew ähijäljälän härkuk.»

*Atwəsəlmäx n-Ḡisa däx-aman
(Marqəs 1:9-11; Luqa 3:21-22)*

¹³ Däx-a-wen-däx a dd-ifäl Ḡisa teje ta n-Galila, ikkä-dd Exya i-ad-t-isəlmäx däx-ejänš wa n-Ḡurdəni

¹⁴ mäšan, unjäy Exya s-a-wen, änn-ak, inn'-as: «Näkk a ämiḡatärän s-ad-hi-səlmäḡäd däx-aman, ḡas əndek e-d il' əmmək n-a-s käyy a hi-dd-itakkän i-a-wen?»

¹⁵ Inn'-as Ḡisa: «Ämära-däx, əḡbəl s-a-wen ed əmmək-wen-däx a-s mad-nämašäl a-wa oḡädän, irha Mässinäx.» Ij'-as Ḡisa mäjräd-wen-däx ḡas, issəlmäx-t Exya.

¹⁶ Ätwäsəlmäx Ḡisa, diha-däx dd-izjār aman, ad-dd-ämerän išənnawän däx-təssəba-net, inhäy Unfas Šäddijän n-Mässinäx har fälla-s dd-äzzubbät däx-ännuy n-tedäbert mällät.

¹⁷ Däx-tamäzäyyat-ten-däx ad-dd-ijmäḡ eməsli išənnawän, innän:

«A-wa Rure-ḡ wa əkneex tärha,
ənta a däx-äsriwän iman-in.»

[†] 3:3 3:3 A-wa ännäbi dd-äzzarän i-Ḡisa, äloläy däx-isälan-net əssayät timad n-awätay dat-tiwit-net.

4

Äžžurräb Iblis Үisa
(*Marqəs 1:12-13; Luqa 4:1-13*)

- ¹ Oҗäd Unfas ŠäddijänҮisa җarät-a-wen s-tenere i-ad-t-ižžurrəbət Iblis.
² Ija dihen əkkozät timərwen n-ehäđ d-ašäl, äžum, wär-ikša, wär-iswa. Šämad tokay täqqän-ten-däx, ad-älluz.
³ Älwäqq-wen-däx ad-t-ohäz Iblis-i n-älmužärrib, inn'-as:
 «Šämad käyy a-s Rure-s n-Mässinäx, änn i-tihun-ti-däx ad-umasnät tijəlwen!»
⁴ Inn'-as Үisa: «Iktab däx-mäjräd n-Mässinäx a-s:
 <Tämudre n-ägg-adəm, wär təmdä fäl tetäte җas, iddäret day s-e d t-illäm mäjräd dd-izjarän emm n-Mässinäx.> »
⁵ Iwwäy-t Iblis җarät-a-wen s-aҗrəm wa šäddijän n-Yärussälam, ij'-e fäll-afälla n-ehän n-ämudd wa mäqqärän, inn'-as:
⁶ «Šämad käyy a-s Rure-s n-Mässinäx, äyy iman-näk s-äkall ed iktab däx-mäjräd n-Mässinäx a-s:
 <Ad-sär-k dd-amär Mässinäx änjälosän-net əkbəlän-käy däx-ifassän-näsän i-ad-wär hak-rəssəl wäla-däx tähunt tiyyät җas.> »
⁷ Inn'-as Үisa: «Iktab day däx-mäjräd n-Mässinäx a-s:
 <Wär-e tarəməd Emäli-näk, Mässinäx.> »
⁸ Iwwäy-t day Iblis s-ađax iyyän iknan ađkul, issəkn'-e əddəwəlän n-äddunya iket-net d-älxurmät-näsän, inn'-as ämära:
⁹ «Hakkäx-käy a-wa-däx iket-net, afäl dat-i tärkäxäd, täxbädäd-ahi.»
¹⁰ Inn'-as Үisa: «Iblis, əjəj-ahi; iktab däx-mäjräd n-Mässinäx a-s:
 <Äxbəd Emäli-näk Mässinäx, ənta җas a fälla-k ilan älxidmät.> »
¹¹ Oyy'-e Iblis җarät-a-wen, osän-t-dd änjälosän ässaҗät-wen-däx, äxdämän-as.

Sänto n-ämašal n-Үisa däx-tayrəmt ta n-Qäfärnaxum
(*Marqəs 1:14-15; Luqa 4:14-15*)

- ¹² Islä Үisa atärməs n-Exya wa n-Enəsselmäx җas, ikkä teje ta n-Galila.
¹³ Izjār tayrəmt ta n-Näširät, iglä izzäx ta n-Qäfärnaxum, a-wen tayrəmt hat asälim n-əjäns wa n-Galila däx-attayän n-teje ta n-Zabilun d-ta n-Naftali;
¹⁴ ämoos a-wen a ässiitbätän mäjräd wa ija ännäbi Saya† a-s innä:
¹⁵ «Ya käl-Zabilun, ya käl-Naftali!
 Kāwāneđ-i hänen asälim d-əjäns wa n-Galila,
 Kāwāneđ-i hin-əllanen i-əjäns wa n-Үurdəni, säjdät!
 Kāwāneđ-i n-käl-teje ta n-Galila əzzäxän inəzzulam,† säjdät!
¹⁶ Tamətte ta häť tihay, ämläwläw-dd fälla-s ännur mäqqärän, äddinät day wi s-käla əzzäxän tihay ti hänen tamättant, ašäl-i, äzzubbät-dd fälla-sän ännur.»
¹⁷ Үur-dihen-däx ad-issənta Үisa ämašal-net, ixatğab, ijanna i-äddinät: «Utabät fäl-a-s Təmmənəya n-Mässinäx, tohäz-dd.»

† **4:14 4:14** A-wa ännäbi dd-äzzarän i-Үisa, äloläy däx-isälan-net əssayät timađ n-awätay dat-tiwit-net. † **4:15 4:15** – Үur-käl-Älyähud, ere wärän ämoos ägg-Älyähud s-alašäl mex ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyäđnen iket-näsän, ti n-inəzzulam. — Ašäl-i-däx, änäzzalim, äkäfär (ere wärän issen s-Mässinäx).

*Inəttulab n-Ŷisa wi äzzarnen
(Marqəs 1:16-20; Luqa 5:1-11)*

¹⁸ Irjaš Ŷisa ašäl iyyän däx-asälim n-ejänš wa n-Galila a-s inhäy əssin ayətmatän: Simyon wa s-itawänna Bətrus d-ənna-s Idris, təjjarän tätart-näsän däx-aman ed iməhhuuya n-imänan a ämoosän,

¹⁹ inn'-asän: «Elkəmät-ahi, ad-käwän-äjäx meddön sār-i dd-sadawnen äddinät i-ad-tän-äxləsäx.»

²⁰ Oyyän titarren-näsän älwäqq-wen-däx, əlkämän-as.

²¹ Illa-hin i-dihen, oläs dax Ŷisa ahänay n-əssin ayətmatän iyyäd: Yaquub d-ənna-s Exya, han turäft n-aman əntäneḍ d-abba-näsän Zäbdi, samäkrasän titarren-näsän; iyr'-en-dd s-iman-net əntäneḍ-däx.

²² Oyyän abba-näsän hakd turäft n-aman dihen-däx, əlkämän-as älwäqq-wen-däx.

*Äzozäy Ŷisa imarhinän däx-teje ta n-Galila
(Luqa 6:17-19)*

²³ Ällil Ŷisa teje ta n-Galila iket-net, isaḡra äddinät däx-ihänan n-äddin wi n-käl-Älyähud, ixattäb isälan n-Älənžil n-Təmmənəya n-Mässinäx, izizuy äddinät däx-turhənnawen-näsän d-älyibän-näsän.

²⁴ Intäj isəm-net däx-äkall iket-net har äwwäd Surya. Tamawayän-dd sār-s imarhinän d-inaxyabän d-iməlsän d-wi təjrāw tašäkärkärät d-inəbdan, izizuy-tän iket-däx-näsän.

²⁵ Däx-asikəl-net, təlkam-as tamətte täjjeet han äddinät dd-falnen teje ta n-Galila d-tidbi ti n-märawät; iyyäd, Yärussälam d-Älyähudəyät d-illa-hin i-Ŷurdəni sihen ad-dd-falän.

5

Älxuḡbät wa ija Ŷisa fäll-afälla n-taḡayt

¹ Inhäy Ŷisa əjut n-tamətte ta has-təlkämät ḡas, iwwän taḡayt tiyyät, äqqima, əkkän-t-dd inəttulab-net, äqqimän edes-has;

² idkäl məjrad, ad-tän-isaḡra, ijann'-asän:

*Tisundad
(Luqa 6:20-23)*

³ «Təndəḍ i-wi äzoḡnen iman-näsän dat-Mässinäx ed Təmmənəya n-Mässinäx ti-näsän.

⁴ Təndəḍ i-wi äsninnen däx-iman-näsän ed ad-ismaḍän ulhawän-näsän.

⁵ Təndəḍ i-wi äzednen ha tazidert ed ad-əkusən äkall.

⁶ Təndəḍ i-wi inaqḡ laḡ d-fad n-asəḡbat n-iqqud ed ad-äyyäwänän däx-a-wa s-tammäḡän.

⁷ Təndəḍ i-wi s-ha təhanint ulhawän-näsän ed ad-hasän-aḍən Mässinäx təhanint.

⁸ Təndəḍ i-wi s-šäddijän ulhawän-näsän ed ad-ənhəyän Mässinäx.

⁹ Təndəḍ i-wi n-käl-älyafyät ed ad-tän-iwār isəm: däḡḡ-Mässinäx.

¹⁰ Təndəḍ i-wi taməḍraynen däx-təssəba n-iqqud-näsän däx-erhet n-Mässinäx ed Təmmənəya n-Mässinäx, ti-näsän.

¹¹ Təndəḍ-awän e-d käwän-gaggärän äddinät,

tiḡəzzəbun-kāwān,
jannen fälla-wān s-bahu
e d t-illām a lābasān dāḡ-āddimmāt-in.

¹² Dāwātāt, talwəm dāḡ-iman-nāwān ed ad-ijat
marušāt-nāwān dāḡ-älžānnāt,
älḡizabāt-wen-dāḡ kāwān-sāknen āddināt ašāl-i-dāḡ,
a əssəknān i-ännābitān wi hawān-dd-āzzarnen.»

*Imumənan, tesəmt d-ännur a āmoosān i-āddunya
(Marqəs 9:50; Luqa 14:34-35)*

¹³ «Kāwāneḡ a-s tesəmt n-āddunya māšan, tesəmt, afāl tāt-təjmāḡ temḡe-net, ma s-tāt-e-isəsməm āwadəm? Ad-ābas t-illa a tənfa ar ad-hin-tāḡf, əfkəlfəkəlān-tāt āddināt.

¹⁴ Kāwāneḡ a-s ānnur n-āddunya. Aḡrəm ya iwarān afälla n-aḡaḡ wār mad-iffār;

¹⁵ āddināt, wār sārmišān tefātelt təzzar, əjən-tāt daw-ākoss, ānn-ak, āsaḡəf
āsikakān a fäll-tāt-e-siləyān i-ad-āsimälāwlāw ānnur-net ehān d-a-wa t-ihān iket-net.

¹⁶ A-wen-dāḡ a fāl, imləwləwet ānnur-nāwān kāwāneḡ-dāḡ, s-əmmək-en-dāḡ, dat-
āddināt i-ad-ənhəyān imārkedān-nāwān, səmḡārān Abba-nāwān-i ihān išənnawān.»

Alāmār wa āynayān d-wa ārəwān

¹⁷ Inn'-asān Ȳisa daḡ: «Wār teḡalāt nākk, oseḡ-dd i-ad-hin-əkkəsāḡ a-wa innā
alāmār wa n-ännābi Mosa d-a-wa ənnān ānnābitān wi iyyāḡḡnen, asətbat-net a-s dd-
oseḡ wādden anāxas-net.

¹⁸ Āsidätteḡ-awān a-s ad-iba išənnawān d-ākall, wār-āba wāla-dāḡ tahnəqqet wāla
tātbaqqet tiyyāt ḡas dāḡ-alāmār n-Māssināḡ a ikkās wār-itbet a-wa dāḡ-s ātwānnān
iket-net.

¹⁹ A-wen-dāḡ a fāl ere ānmāšrāyān i-alāmār wa dāḡ-sān ojarān təmməḡḡrit, meḡ
ittār ad-išənnəməšrəy āwadəm iyyān s-a-wen-dāḡ, āwadəm-en, ənta a madān-umas
wa ojarān iba n-təfārre dāḡ-Təmmənəya n-Māssināḡ māšan, ere itamašalān a-wa
innā alāmār, isalmad āddināt a-wa inna i-ad-t-āmašālān əntāneḡ-dāḡ, āwadəm-en,
ad-umas āmizār dāḡ-Təmmənəya n-Māssināḡ.

²⁰ Əkkasāḡ-kāwān dāḡ-taḡḡdārt n-a-s afāl wār-ojer iqqud-nāwān wa n-älḡulam n-
Āḡḡawrāt d-kāl-faris, xāram-awān uješ n-Təmmənəya n-Māssināḡ.»

*Aḡkār, iji n-iman, kəssən d-tenāšše
(Luqa 12:57-59)*

²¹ «Wādden, təslam a-s imḡarān-nāwān wi n-ibda, ātwānn'-asān, inna Māssināḡ:
<Wār jed iman ed ere ijān iman dāḡ, iwar-t uḡləm dat-Māssināḡ>,

²² māšan nākk, ənneḡ-awān a-s: ere ijjāš aḡkār fäll-āḡḡa-s dāḡ, iwar-t uḡləm,
ere innān i-āḡḡa-s: <Amāros>, ānihāḡḡa s-ad-āmawāy s-āššāreḡa wa māqqārān s-
itawānna Sinhidrin† i-ad-itwəšrāḡ; ere daḡ innān i-āḡḡa-s: <Təkšāfād>, ānihāḡḡa d-
ad-t-ākš efew wa n-žohānnāma.

²³ Afāl təkkeḡ ehān n-āmudd wa māqqārān, tāwwayād takute-nāk, afāl ālwāqq wa
d-sānsed takute-nāk fäll-tasəskārt ta n-tikutawen har dd-təkted a-s ikka hārāt jere-k
d-āḡḡa-k,

²⁴ wār ketād, āyy'-et dədi-dāḡ, əqqəl āḡḡa-k har hak-ānš təzzar, təjəḡ takute-nāk
i-Māssināḡ.

²⁵ Kunta irwas-kāy āwadəm, išk'-ak s-əlxəkum, uf'-ak ad-dār-s tənməknād šik
iket-di d-hin-tiwəḡām əlxəkum ed əlxəkum, afāl t-in-tāwwāḡām, ad-kāy-āj ere wa

† 5:22 5:22 A-wa älžāmaḡāt n-inušāmān d-imizārān n-kāl-Išrayil wa itirən āššāreḡa, əntāneḡ a-s ālqallitān,
osaḡān daḡ tamətte d-əlxəkum d-āddin.

käy-äsiwārān udlem dāḡ-ifassān n-āgg-āššāreḡa, āj'-ik āgg-āššāreḡa dāḡ-ifassān n-ālgomi, āj'-ik ālgomi dāḡ-takārmuṭ.

²⁶ Āsidätteḡ-ak a-s edāgg-en, afāl t-təjjāšād, wār t-dd-mad-təzjārād a təkkeḡ wār dd-təssəmdād timḡal n-har tāmma ta kāy-irwās.»

Isālan n-əzzəna

²⁷ «Wādden, təslam a-s ātiwānna: <Wār jed əzzəna>»

²⁸ nākk ənneḡ-awān a-s ere ijān dāḡ-tamāḡt wār-ādobān akāyad n-derhan, isālan əmdān, izn'-et dāḡ-uhl-net.

²⁹ Kāyy, kunta tiṭṭ-nāk ta n-aḡil a kāy-isifun abākkaḡ, kukkərət-tāt-dd, təjrəd-tāt-in fälla-k hārwa wār tāmešälād abākkaḡ-wen-dāḡ, ed uf'-ak, iji n-tiṭṭ təjjəšād ālzānnāt, uhən tətwejārād-in dāḡ-temse təmda taḡəssa-nāk.

³⁰ Kunta daḡ āfuss-nāk wa n-aḡil a kāy-isifun abākkaḡ, ənkəḡ-t, təjrəd-t-in fälla-k hārwa wār tāmešälād abākkaḡ-wen-dāḡ, ed uf'-ak, iji n-āfuss təjjəšād ālzānnāt, uhən təjjāšād temse təmda taḡəssa-nāk.»

Isālan n-aməzzi

(Mätti 19:9; Marḡəs 10:11-12; Luḡa 16:18)

³¹ «Təssanām a-s ātwānna: <Ere irhān azəmməzzi n-hānne-s, ākf'-et-tāt tākarḡe n-aməzzi təzzar>

³² māšan, nākk, ənneḡ-awān: ere āzmāzzāyān hānne-s s-wādden arāmas a tāt-ija tikər-as, ij'-et temāznit; ere daḡ wa ādobānān tamāḡt dd-tāmmiizzāyāt, izna.»

Isālan n-tihuḡawen s-bahu

³³ Ḍarāt-a-wen-dāḡ, inn'-asān: «Təslam a-s ātiwānna i-imḡarān-nāwān wi n-ibda: <Wār mad-tārḡəd tafleṭ, a-wa hāḡād s-Māssināḡ s-ad-t-tājəd, āj'-e>»

³⁴ māšan, nākk, ənneḡ-awān: wār heḡām fāw. Wār heḡām s-išənnawān ed əntāneḡ a-s tasāqqaymut n-təmmənukəla n-Māssināḡ,

³⁵ wāla s-ākall ed ənta a-s isəkkukal n-iḡarān-net wāla s-Yārussālam ed ənta a-s aḡrəm wa n-Māssināḡ-i n-āmānokāl māḡḡārān,

³⁶ wāla fäll-əḡāf-nāk ed wār tāddobed ad-səmlələḡ wāla ad-səkwələḡ wāla-dāḡ iyyān ḡas dāḡ-amḡadān-nāk.

³⁷ E-d kāwān-issəstān āwadəm d-hārāt, ānnāt-as: <Ēyya> i-tidət, tənnəm: <Ābo> i-bahu, a təssewāḡām fäll-a-wen-dāḡ, Iblis a dd-ifal.»

Ukəs n-əḡa d-ālxār

(Luḡa 6:29-30)

³⁸ Inn'-asān daḡ: «Təslam a-s ātiwānna: <Tiṭṭ a təzzalāt tiṭṭ, esen a itəzzalān esen>»

³⁹ māšan, nākk, ənneḡ-awān: əlḡənāt i-ere hawān-irhan a lābasān; afāl hak-istāḡ āwadəm fäll-tājomāst-nāk ta n-aḡil, səḡdəl-as daḡ ta iyyāḡāt.

⁴⁰ Afāl hak-iška āwadəm s-əlxəkum dāḡ-təssəba n-tanākābbat-nāk, āyy-as-in daḡ anākābba-nāk i-ad-wār-ija a-wen,

⁴¹ afāl kāy-āšhāššāl āgg-əlxəkum aḡkul n-āḡuk har əḡḡəkud n-kelumetār, awəy-as-t har əssin kelumetārān;

⁴² ere kāy-idālān, təkfeḡ-t, wār tənneḡād fäll-ere dāḡ-k ittarān āmarwas.»

Ārhāt āddināt

(Luḡa 6:27-28, 32-36)

⁴³ «Təslam a-s ātiwānna: <Ārh ānhārāj-nāk, təknešād ašānjo-nāk>

⁴⁴ māšan, nākk, ənneḡ-awān: ārhāt išənja-nāwān. [Ājāt ālhimmāt i-wi hawān-tajjānen terk tittar, ājāt a olaḡān i-wi dār-wān okāḡnen], āḡelāt Māssināḡ i-wi kāwān-samāḡḡaynen, tiḡəzzəbun-kāwān.

⁴⁵ Dihen, ad-itbət a-s aratan n-Abba-nāwān-i ihān išənnawān a tāmoosām; ənta, isajmaḍ-dd tāfukt-net fäll-äddināt wi läbasnen hakd wi olāḡnen, isasaway-dd akāsānet fäll-imaḡdalān hakd ināmāšrayān.

⁴⁶ Afäl wār tārhem ar imārhan-nāwān, ma kāwān-ibḡan d-äddināt wi iyyāḡnen, əndek marušāt-nāwān? Inarmasān n-tiwse-dāḡ, a-wen, tajjān-t.

⁴⁷ Afäl wār təjjəm isofan ar i-ayətma-wān, ma kāwān-izlayān d-äddināt wi iyyāḡnen? Wādden inəzzulam†-dāḡ, a-wen, tajjān-t.

⁴⁸ Umasāt äddināt əmdanen, wār iwer āḡib ed Abba-nāwān-i ihān išənnawān, imda, wār t-illa āḡib t-iwarān.»

6

Isālan n-tikutawen

¹ «Äjät ənniyāt, wār-itumaset iqqud-nāwān i-Mässināḡ a jam i-ad-kāwān-in-əjrāhān äddināt ed afäl a-wen-dāḡ a tajjām, wār mad-təkrəšām marušāt ḡur-Mässināḡ-i n-Abba-nāwān ihān išənnawān.

² E-d təkkatād, wār wetād təsinsäḡt data-k šund a-wa təjjān älmunafeyān dāḡ-ihānan n-äddin wi n-kāl-Älyāhud d-tišarriten i-ad-tān-aməlān äddināt; äsidätteḡ-awān a-s marušāt-nāsān, imdā-dd ḡur-təmmal-ten-dāḡ tān-tājjān äddināt.

³ A āniihājjan a-s, kāyy, e-d təkkatād, äj'-e dāḡ-ufār, wār-ilämmädet wāla-dāḡ äfuss-nāk wa n-tāšälje a-wa ikfa wa n-aḡil,

⁴ dihen, ad-tumas takute-nāk a ištārān, äkf'-ik Mässināḡ-i n-Abba-nāk ihannāyān wāla a-wa ištārān, timzäl n-emärked-nāk.»

Tamädilt n-Mässināḡ (Luḡa 11:2-4)

⁵ «E-d təddalām Mässināḡ, wār tolehām d-älmunafeyān-i s-e-d tumadān, təjraz-asān tebādde dāḡ-ihānan n-äddin wi n-kāl-Älyāhud d-ammas n-tišarriten i-ad-tān-in-əjrāhān äddināt. Äsidätteḡ-awān a-s marušāt-nāsān, imdā-dd ḡur-təmmal-ten-dāḡ tān-tājjān äddināt.

⁶ Käyy, e-d təddalād Mässināḡ, əjjəš ider n-ehān-nāk, təḡfələd-t-dd fäll-iman-nāk, tədləd Abba-nāk-i ättunkälān ed Abba-nāk-i ihannāyān wāla a-wa ijān dāḡ-atunkəl, ad-hak-äj erhet-nāk.

⁷ E-d təddalād Mässināḡ, wār təsjätād mäjrād wārān infa hārāt šund a-wa təjjān inəzzulam† -i ḡur-ija a-s asjət n-mäjrād-en-dāḡ a dd-madān-isəmmənnəḡ äfuss n-Mässināḡ, äkf'-en a-wa dāḡ-s əttārān.

⁸ Wār dār-sān tolehām, a-wa s-tämiḡatārām, issan-t Abba-nāwān iket-net hārwa wār dāḡ-s t-təttərām.»

Älmital n-tamädilt n-Mässināḡ

⁹ «E-d təddalām Mässināḡ, ännāt:
<Abba-nānāḡ-i ihān išənnawān,

¹⁰ səmḡārnet äddināt isəm-nāk wa šäddijān.

Taset-dd Təmmənəya-nāk,

äjjet erhet-nāk fäll-ārori n-äkall,

s-əmmək wa s-ija dāḡ-išənnawān.

† 5:47 5:47 — ḡur-kāl-Älyāhud, ere wārān ämoos ägg-Älyāhud s-alāšäl meḡ ere wārān ilkem i-äddin-nāsān, iket-net, änäzzalim a ämoos. A-wen-dāḡ a fäl tiwsaten ti iyyāḡnen iket-nāsān, ti n-inəzzulam. — Ašäl-i-dāḡ, änäzzalim, äkafār (ere wārān issen s-Mässināḡ). † 6:7 6:7 — ḡur-kāl-Älyāhud, ere wārān ämoos ägg-Älyāhud s-alāšäl meḡ ere wārān ilkem i-äddin-nāsān, iket-net, änäzzalim a ämoos. A-wen-dāḡ a fäl tiwsaten ti iyyāḡnen iket-nāsān, ti n-inəzzulam. — Ašäl-i-dāḡ, änäzzalim, äkafār (ere wārān issen s-Mässināḡ).

11 Äkf'-anäx isudar wi s-nämiḡatär ašäl-i-däx,

12 äns'-anäx udlemän-nänäx
s-əmmək wa s-nənašš i-inaḡlamän-nänäx.

13 Wār toyyed Iblis äžžurräbät-anäx

isiḡəw-anäx däx-abäkkad,

agəz-anäx däx-s,

[ed Təmmənəya, tärna hakd älxurmät, i-näk härkuk. Amin!]>

14 Afäl naššäm i-äddinät wi käwän-ḡallämnen, ad-hawän-in-äns' day Abba-näwän-i ihän išənnawän,

15 mäšan afäl wār nəššəm i-äddinät wi käwän-ḡallämnen, wār hawän-in-e-äns' day Mässinäx-i n-Abba-näwän ibäkkadän-näwän.»

Isälan n-äzum

16 «Ašäl wa d-tuzamäm i-ad-täxḡədäm Mässinäx, wār täsbänzäzäm šund a-wa täjjän älmunafəxän-i sawärnen tekenzart idmawän-näsän i-ad-səlmədän äddinät a-s äzumän; äsidätteḡ-awän a-s marušät-näsän, imdä-dd ḡur-təmmal-ten-däx tän-täjjän äddinät,

17 änn-ak, käyy, e-d täzumäd, ərḡəb-in, säḡəläd aḡutän

18 i-ad-wär-iləmməd äwadəm a-s täzumäd i-ad-täxḡədäd Mässinäx ed igdäh-ak a-wa däx s-Abba-näk-i ättunkälän, ihannäy a-wa ijän däx-atunkəl, ad-hak-äj erhet-näk.»

Isälan n-ärrəzäx wa n-tidət

(Luḡa 12:33-34)

19 «Wār təjmeräm ärrəzäx i-äddunya ed täddoobät tukmadt d-tenekt ad-t-täks', äddooben day imäkrädän ad-t-akrən.

20 Änn-ak, a-wa jammäräd, əjmär-t i-älzännät-i wār ha tukmadt wäla tenekt wäla imäkrädän t-ärzänen wäla-i t-okärnen.

21 Ädduuttät a-s inəzjam n-ulh n-äwadəm, wār təffilän edägg wa däx-itwär təla-net.»

Tihay d-ännur

(Luḡa 11:34-36)

22 «Tiḡ n-ägg-adəm a-s tefätelt n-taḡəssa-net, afäl tolaḡ tiḡ-näk, ad-hannäy taḡəssa-näk iket-net,

23 mäšan afäl ijraw härät tiḡtawen-näk, adiš taḡəssa-näk day, wār hönnəy härät. ḡas kunta käyy ännur wa hak-ämoosnät tiḡtawen-näk, iha tihay, adiš tidət-däx a-s, ad-käy-ärməsnät tihay ässuksädnen.»

Iba n-inəzjam

(Luḡa 16:13; 12:22-31)

24 «Wār t-illa äwadəm äddooben ad-ixdam i-əssin imälan: iyyät-i-däx, ad-akəd d-iyyän, ärh wa iyyädän meḡ day ikf'-iman-net i-iyyän, iksən wa iyyädän. Wār-äddoobät äwadəm ad-ixdam i-Mässinäx, ošal day ḡarät terše n-azrəf.

25 A-wen-däx a-fäl hawän-janney: wār käwän-järräwnet inəzjam n-a-wa mad-təksəm d-a-wa mad-təswəm d-a-wa mad-təlsəm; iman-näwän, ajän wädden ojärän tetäte? Äsexät n-taḡəssa-näwän day, wädden ojär isəlsa?

26 Səjrähät ḡas igḡad-wi əlläynen däx-älhəwa, wār tədumun, wār təjlobun, wār təggärän däx-ijändän mäšan, ässodär-tän Abba-näwän-i ihän išənnawän. Ajän wädden tufäm-tän s-a äjjeen!

27 İndek ḡas däx-wän wa äddooben s-inəzjam-net ad-isiwəd taḡrəst-net wäla s-a ogdähän d-emm n-asənnan?

28 Adiš, mafäl kăwăn-əjrawăn inəzjam n-a-wa mad-təlsəm? Săxret-kăwăn tăboyt n-işəkraş hărät, ənhəywät-tăt-ak, daggäl, wăr zətt, wăr zəmməy

29 məşan əsidättey-awăn a-s wäla əmănokal Suläyman hakd terşe-net iket-net, wăr kăla ojăr tăboyt-i-däx asəssihäx n-aşäl.

30 Yas kunta Mässinäx isalsa teyəşşe n-işəkraş s-aşäl-i-däx təbdaj, aşəkka ad-hin-tixar, tärx s-əmmək-wen-däx, əb' ättäma n-ad-wăr hawăn-izzəzmäy kăwăned? Təmmətkit ija immun-năwăn!

31 Wăr kăwăn-ğälläbnet inəzjam har dd-təqqələm jannem: <Ma mad-năks? Ma mad-nəsəw? Ma mad-näls?>

32 Inəzjam şund-win-däx, inəzzulam a däx-sän oşalnen, ɣälläbän-tän. Kăwăned, Abba-năwăn-i ihän işənnawăn, wăr t-illa a-s təmiḡatäräm s-wădden, issan-t.

33 Edgəzät s-tizarät däx-umäx n-Təmmənəya n-Mässinäx d-iqqud däx-isälan-net, dihen, ad-hawăn-in-isiwəđ Mässinäx a-wa iyyädän iket-net.

34 Wăr kăwăn-ğälläbnet inəzjam n-aşəkka ed hak aşäl d-a-wa äwwäy däx-inəzjam, hak aşäl-däx, təgdäh-as təmäḡatert-net.»

7

Wăr tozemäm əwadəm (Luqa 6:37-38, 41-42)

1 «Wăr tozemäm əwadəm i-ad-wăr kăwăn-itizəm əwadəm

2 fäl-a-s, a-wa s-tozämäm äddinät wi iyyädnen a-s kăwăn-e-azəmən kăwăned-däx; a-wa s-kätäm äddinät wi iyyädnen a-s kăwăn-e-əkətən əntäned-däx.

3 Mafäl hannäyäd tezəwt ta hăt tiḡt n-əñḡa-k, a-s ija a-wen, wăr hənnəyäd afäḡot wa ihän tiḡt ta-năk?

4 Meḡ daḡ, əndek əmmək wa s-mad-tənnəd i-əñḡa-k: <Äyy-ahi ad-əkkəsäx tezəwt däx-tiḡt-năk>, a-s ija a-wen, käyy iman-năk, iha afäḡot tiḡt ta-năk.

5 Älmunafəy yaden! Əkkəs-in afäḡot wa ihän tiḡt-năk təzzar, dihen, ad-tudabed ahänay, tudabed ukəs n-tezəwt ta hăt tiḡt n-əñḡa-k.

6 Əllan-t äddinät-i s-däx-a-wa täjjän, wăr-əzleyän d-iyyädän, wăr tän-təkfem a şäddijän ed hălän ad-kăwăn-dd-əqqələn, ađwən fälla-wän; iyyäd, wăr-əzleyän d-əlxənžärän, wăr daw-sän-in-jeäm tişxalen-năwăn ed ad-tänät-əfkəlfəkəlän.»

Ädəläät Mässinäx (Luqa 11:9-13; 6:31)

7 «Ädəläät Mässinäx, ad-kăwăn-əkf; əmmäḡät, ad-təjrəwäm; äxrät-t, ad-hawăn-əkawăn.

8 Ere idälän, ad-ikrəş, ere immäḡän ad-ijrəw; ere iyrän Mässinäx däx-təməḡatert t-tärmasät, ad-has-tät-ikkəs.

9 İndek däx-wän wa s-e-d däx-s ittär rure-s tajəlla ad-t-əkf təhənt?

10 Meḡ wa s-e-d t-idäl däx-emän, ad-t-əkf təşşält?

11 Yas, kunta kăwăned-i n-inälläbäsän, təssanäm isuf n-a-wa oläḡän i-aratän-năwăn, əb' ättäma n-ad-wăr kăwăn-ikfa Abba-năwăn-i ihän işənnawăn a-wa ufän, afäl t-däläm däx-s.

12 Tajjät i-äddinät a-wa s-tärhäm ad-hawăn-t-tajjän ed a-wen-däx a innä alämär wa n-ännäbi Mosa d-ännäbitän wi iyyädnen.»

Zäbo wa hərəwän d-wa kărruzän (Luqa 13:24)

13 «Əjjəşät təmudre ta n-tidət s-əmm wa kărruzän fäl-a-s ill'-ee zäbo hərəwän, olwan, ənta a tilal təşşəm n-äddinät məşan, ajilal-net, əlhəllak,

¹⁴ a-s ija a-wen, emm wa karruzän d-zäbo wa sädidän, wär-əjjətän äddinät wi sär-s tajjšnen mäšan, tämudre ta n-tidət a-s itixəd.»

Hak äwadəm d-imojjan-net
(Luqa 6:43-44)

¹⁵ «Ägəzät iman-näwän däx-ännäbitän wi n-bahu-i s-a-s käwän-dd-tisən, jan iman-näsän ikərwatän wär ih' äššar, a-s ija a-wen, tiḡəs ənsaynen a ämoosän.

¹⁶ Wär hawän-təmtəllənet, ad-tän-təzzəyäm s-timašalen-näsän. Ajän ewärwär, itiirəw-dd läxnäb? Meḡ ajän ajärof itiirəw-dd tehäyne?

¹⁷ Ahəšk olaḡän, ad-dd-arəw aratän olaḡnen mäšan erk ahəšk, wär dd-e-arəw a säl aratän läbasnen.

¹⁸ Ahəšk olaḡän, wär-itirəw aratän läbasnen, ahəšk daḡ läbasän, wär-e arəw aratän olaḡnen.

¹⁹ E d t-illäm ahəšk wärän itirəw aratän ih' älfäyda, ad-hin-ättänkäd, itwəjār-in däx-efew.

²⁰ Emmək-wen-däx daḡ a-s ännäbitän wi n-bahu, timašalen-näsän a-s tän-e-təzzəyäm.»

Äddinät wi yarränen isəm n-Emäli s-bahu
(Luqa 13:25-27)

²¹ «Wädden äddinät iket-näsän wi hi-jannänen: <Emäli, Emäli>, a he-əjjəšnen Təmmənəya n-Mässinäḡ. Təmmənəya n-Mässinäḡ, wär tät-e-ijjəš ar ere wa itamašalän erhet n-Abba-nin-i ihän išənnawän.

²² Ašäl wa ilkämän, ad-dd-əggədän äddinät äjjootnen, ənnən-ahi: <Emäli, Emäli! Wädden mäjräd wa däx-näloläy i-äddinät, käyy a t-ijän däx-imawän-nänäḡ? Wädden nəkkäs alšinän däx-äddinät s-isəm-näk? Wädden nəja tikunen äjjootnen s-isəm-näk?>

²³ Äddinät-en, ašäl-en, ad-hasän-ännäḡ s-afälla: <Näkk ya wär käwän-əzzeyäḡ, ajəjät-ahi, inämäšrayän a tämoosäm.> »

Isälan n-ihānan wi n-əssin
(Marqəs 1:22; Luqa 6:47-49)

²⁴ «Ere islän i-mäjräd-wa-däx s-iket t-jeḡ, ad-itamašal a-wa ənnəḡ, ad-aläh d-ähaləs ijarahän härät iḡäšän äkall har iwwäd tähünt i-ässas, idäy fälla-s ehän-net.

²⁵ Ij' akäsa, ärtäynät timḡəl d-anji fäll-ehän-en mäšan, wär-oḡa ed iday fäll-tähunt.

²⁶ Mäšan wa islän i-mäjräd-in, äqqima wär t-ämešäl, oläh d-ere irmas iba n-tayətəte idäyän ehän-net däx-tasənjit.

²⁷ Ij' akäsa, ärtäynät timḡəl d-anji fäll-ehän-en, oḡa, älhahäm-in s-iyyəät.»

²⁸ Iḡäs älxuḡbät-wen-däx ija ḡisa tamətəte, əqqälän-dd äddinät ḡas oran imawän

²⁹ fäll-əjjärüzät-i-däx hasän-ija a-wa isäḡra ed isäḡr'-en s-älxikmät n-ere issanän a-wa iha wädden šund äḡulam wi n-Äḡḡäwrät.

8

U-jəri wa äzozäy ḡisa
(Marqəs 1:40-45; Luqa 5:12-16)

¹ Ätrarä-dd ḡisa taḡayt ḡas, təlkäm-as tamətəte täjjeet.

² Däx-a-wen-däx ad-has-dd-ilkäd ähaləs ijraw jəri, irkäḡ data-s, inn'-as: «Äḡalim, afäl tärhəd a-wen-däx, täddoobed ad-hi-šəšdəjäd.»

³ Izzäl äfuss-net, idäs-t, inn'-as: «Ärheey-t, išdaj.» Šäddij däx-jəri älwäqq-wen-däx.

⁴ Inn'-as Ƴisa ɗarät-a-wen: «Wär jed isälan i-äwadəm wäl' iyyän n-a-s näkk a käy-äzozäyän, əgləw, səkən iman-näk i-u-tikutawen, tøjəd takute ta s-inna ännäbi Mosa dāḡ-isälan n-təšədje n-käl-jəri i-ad-umas a-wen tajuhe i-tamətte n-a-s təzzäyäd.»

*Änaxdim n-käbtän wa äzozäy Ƴisa
(Luqa 7:1-10)*

⁵ Ijjäš Ƴisa ɗarät-a-wen ayxəm wa n-Qäfärnaxum, ilkäɗ-as käbtän iyyän, ad-t-ilaqqäd, ijann'-as:

⁶ «Älḡalim, änaxdim-in insa ḡur-ehän, təbdan-t tizzurt d-tisnant.»

⁷ Inn'-as Ƴisa: «Ad-t-asäḡ, zuzöyäḡ-t.»

⁸ Äwwežäb-as käbtän, inn'-as: «Aha-aha älḡalim! Wär-änhäjjäḡ d-ad-tökkəd ehän-in, tøjješäd-t, änn ḡas täfert, ad-izzöy änaxdim-in

⁹ fäl-a-s näkk-i-hi, əllan-t imänokalän daw-t-əlleḡ, leḡ daḡ näkk əssärdusa daw-i t-əllanen; e-d ənnəḡ i-iyän: <Əgləw>, ad-igləw; e-d ənnəḡ i-wa iyyädän: <Ƴyyäw>, ad-hi-dd-ass. Akli-nin daḡ e-d has-ənnəḡ: <Äj a-wa>, ad-t-äj.»

¹⁰ Islä Ƴisa i-mäjräd-wen-däḡ ija käbtän ḡas, ijräz-as älxal-net; innäd-dd ɗarät-a-wen s-äddinät wi has-əlkammen, inn'-asän: «Äsidätteḡ-awän a-s, wäla dāḡ-äkall wa n-Işrayil, wär käla ənhäyäḡ ere s-ogdäh immun-net d-wa n-ähaləs-i-däḡ.

¹¹ Ässiilmädäḡ-käwän a-s ilkam ad-dd-asən äddinät äjjootnen, dd-falnen emäynäj d-ataram ənḡöymən d-Ibrahim d-Isxaqq d-Yaqub dāḡ-amäjaru wa madän-äj dāḡ-Təmmənöya n-Mässinäḡ.

¹² A-s ij'-a-wen, äddinät wi s-äniihäjja a-s əntäneɗ a ännufläynen dāḡ-Təmmənöya n-Mässinäḡ, ad-hin-ətwəjarän dāḡ-tihay ti n-ajäma, ad-hallän, žiməkärkižän isenän fäl tämujižt.»

¹³ Innä Ƴisa ɗarät-a-wen i-käbtän: «Əgləw, ijräw-ak Mässinäḡ a-wa s-tomänäd.» Izzäy änaxdim-net ässaḡät-wen-däḡ.

*Äzozäy Ƴisa taɗäggalt n-Bəṭrus d-imarhinän äjjootnen
(Marqəs 1:29-34; Luqa 4:38-39)*

¹⁴ Ifäl Ƴisa dihen, ikkä ehän wa n-Bəṭrus. A-s hin-iwwäd, tənsa taɗäggalt n-Bəṭrus, tärmas-tät tenäde.

¹⁵ Iɗäs afuss-net, tärza fälla-s tenäde, təbdäd, täsmäjarät-t.

(Marqəs 1:32-34; Luqa 4:40-41)

¹⁶ Toɗa täfukt ḡas, ämewäyän-dd sär-s iməlšan äjjootnen, innä täfert ḡas, əzzayän; äzozäy daḡ dihen e d t-illäm ere ärhinän.

¹⁷ Ijä a-wen i-ad-itbət a-wa innä ännäbi Saya† a-s innä: «Iɗkäl fälla-näḡ älyibän-nänäḡ, äzozäy-anäḡ dāḡ-turhənnawen-nänäḡ.»

*Kəssən n-iman
(Luqa 9:57-62)*

¹⁸ Inhäy Ƴisa aḡliḡəli wa t-dd-ja tamətte s-əjut ḡas, innä i-inəṭṭulab-net, ad-əjlöyän ejänš s-aşrut wa iyyädän.

¹⁹ İlkäɗ-as-dd älḡalim n-Äṭṭäwrät iyyän, inn'-as: «Älḡalim, e-s tökkəd-däḡ, əlkamäḡ-ak.»

²⁰ Inn'-as Ƴisa: «Ibäggan lan tihaliwen, igɗaɗ lan iskak mäšan, Ägg-ägg-adəm, wär ila wäla edägg dāḡ-issənsä eḡäf-net.»

²¹ Iggäd-dd ähaləs iyyän irhan alkum-has, inn'-as: «Älḡalim, äkf'-ahi turhajät n-ad-äḡläḡ əzkäḡ abba-nin, əqqələḡ-dd, əlkəmäḡ-ak.»

† 8:17 8:17 A-wa ännäbi dd-äzzarän i-Ƴisa, äloläy dāḡ-isälan-net əssayät timaɗ n-awätay dat-tiwit-net.

²² Inn'-as Ȳisa: «Ēlkəm-ahi, tøyed fälla-k inəmmuttan ad-əzkən inəmmuttan-nāsän.»

Issəbdād Ȳisa aḍu-i-dāx māqqārən fäll-ejānš
(Marqəs 4:35-41; Luqa 8:22-25)

²³ Ānmājjaš Ȳisa turāft n-aman d-inəttulab-net ḍarāt-a-wen,

²⁴ wār-āhojān a-s aḍu-i-dāx āšsoohen-da-dāx dd-inkārən, ad-tibhilibəhilnāt tināzzāmären i-turāft siha d-siha. A-s itājj a-wen-dāx, Ȳisa ənta, iṭtas.

²⁵ Ēssənkārən-t inəttulab-net dāx-eḍəs, ənnän-as: «Ālyalim, agəz-anāx, nəhlāk.»

²⁶ Inkār-dd, inn'-asän: «Ma kāwän-ässirmāxän? Təmmətkit ija immun-nāwän!» Ibdād ālwäqq-wen, āsmähād fäll-aḍu d-ejānš, sāmmeḍ-in a-wen-dāx iket-net.

²⁷ Ēqqälän-dd ḡas inəttulab oran imawän, jannen: «Uwwuww! Wa āwadəm s-wāla aḍu d-ejānš, sajadän-as, ma āmoos?»

Iməlsan wi n-əssin āzozāy Ȳisa
(Marqəs 5:1-20; Luqa 8:26-39)

²⁸ Āsjän Ȳisa d-inəttulab-net fäll-ašrut n-ejānš wa n-teje ta n-Gadara ḡas, əlkādän-as-dd əssin iməlsan əzzaḡnen tiḡənneren, janen tāllābäst-ta-dāx s-ābas t-illa ere ihälän ad-dd-āj tiṭṭ-ten-dāx hän.

²⁹ Ēnhāyän Ȳisa ḡas, āḡwätten alšinän, ad-jannen: «Ya Rure-s n-Mässināx, ma dāx-nāx tārhed? Ajän tissust-nānāx a-s dd-tosed iket-di dd-tiwəḍ tāqqän n-a-wen?»

³⁰ Dann tahrut n-əlxənžārən dāx-attayän n-dihen,

³¹ dälän alšinän Ȳisa, ənnän-as: «Kunta takkäsād-anāx dāx-ākall, suk-anāx tahrut ta n-əlxənžārən.»

³² Inn'-asän: «Āglāt!» Ēzjārən alšinän meddən-ənnin, əjjāšän əlxənžārən, ad-dd-titrəktərikän, wa-dāx n-afälla n-taḍaḡt, tiḍəwän dāx-ejānš, tattän-tän aman.

³³ Ošälän imədanän-nāsän s-aḡrəm, jän isälan n-a-wa ijän d-a-wa dd-išreyän fäll-iməlsan wi n-əssin i-āddināt.

³⁴ A əndārrän, aḡrəm iket-dāx-net da-dāx dd-izjārən s-Ȳisa, ənhāyän-t āddināt ḡas, ad-t-təddalän dāx-ad-ifəl ākall-nāsän.

9

Āzozāy Ȳisa anābdon iyyän
(Marqəs 2:1-12; Luqa 5:17-26)

¹ Ijjāš Ȳisa ḍarāt-a-wen turāft n-aman, ijlāy ejānš s-taḡrəmt ta-net.

² Diha-dāx hin-əwwāḍän a-s āddināt-da-dāx, āmisawāyän ānabdon insan fäll-asəftāx. Inhāy Ȳisa immun-nāsän ḡas, innä i-anābdon: «Alyaq-in, wār təkkesād āṭṭāma, ibākkaḍän-nāk, ātwänšän-ak.»

³ Diha-dāx d-innä a-wen-dāx, a dd-əggādän ālyulam n-Āṭṭāwrät, ad-jannen dāx-iman-nāsän: «Wa ənta, āskafār.»

⁴ Ilmād Ȳisa ḡur-iman-net a-wa ihän inəzjam-nāsän, a-wen-dāx a fäl hasän-inna: «Ma itajjän erk ənniyāt-wa-dāx dāx-ulhawän-nāwän?»

⁵ Ma ojārən tārāḡse jer-ad-tənnəd i-āwadəm: «Ātwänšän-ak ibākkaḍän-nāk», d-ad-has-tənnəd: «Ēbdəd, ərjəš?»

⁶ Ašäl-i, āssiilmādāx-kāwän a-s Āgg-āgg-adəm, ijraw fäll-ārori n-ākall turhajät n-tenāšše n-ibākkaḍän.» Innä Ȳisa ḍarāt-a-wen i-anābdon: «Ēbdəd, əḍkəl asəftāx-nāk, əqqəl ehän-nāk.»

⁷ Ibdād, iqqäl ehän-net.

⁸ Tärmāx tamətte ta tənḡayāt a-wa ijän, ad-tiimələn āddināt Mässināx-i ikfän dāgg-adəm tādabit togdāhät d-a-wa-dāx.

Iyrä-dd Yisa Mätti i-ad-umas änätṭalib-net
(Marqəs 2:13-17; Luqa 5:27-32)

⁹ Ifäl Yisa dihen ɗarät-a-wen, inhäy änarmas n-tiwse s-isəm-net Mätti äqqiima dāḡ-edägg n-älxidmät-net, iyr'-e, inn'-as: «Īlkəm-ahi»; ibdäd Mätti, ilkä-m-as.

¹⁰ Äsmäjarät Mätti Yisa s-ehän-net ɗarät-a-wen. Itaxäyma Yisa dāḡ-edägg wa n-imənsiwän a-s erk äddinät han inarmasän n-tiwse äjjootnen da-dāḡ, osän-dd, änyäymän ɗär-s ənta d-inəṭṭulab-net.

¹¹ Īnhäyän-t härät dāḡ-käl-faris t-əllanen dihen ɗas, ənnän i-inəṭṭulab-net: «Ma isaharän älɗalim-näwän imənsiwän d-inarmasän n-tiwse d-erk äddinät-wi-dāḡ?»

¹² Isl'-asän Yisa ɗas, innä: «Äddinät ässoxätnen, wär-ämyätärän s-läxtur; imarhinän a sār-s ämiyätärnen.»

¹³ Inn'-asän dāḡ: «Ma ämoos älmäḡna n-a-wa s-inna Mässināḡ dāḡ-mäjräd-net: <Ojār a-s ɗur-i la tāhanint idəm uhən tikutawen.> A-wen älmäḡna-net a-s, näkk, wär dd-ämešäläḡ s-äddinät wi ordänen iman-näsän iqqud, inäsbäkkadän a-s dd-ämešäläḡ i-ad-tän-äḡləsāḡ.»

Isälan n-äzum
(Marqəs 2:18-22; Luqa 5:33-39)

¹⁴ Osän-dd inəṭṭulab n-Exya Yisa ɗarät-a-wen, ənnän-as: «Mafäl näkkäned d-käl-faris nətuzam dehiyyän, a-s ija a-wen, inəṭṭulab wi-näk, wär tuzamän?»

¹⁵ Issäḡläy-tän Yisa tangalt dāḡ-hasän-inna: «Ajän käl-tuksest ilzam-tän äzum tän-äzižäkänzärän a ikka ämazlay ill'-e jere-sän? Īlkamän išilan-wi dāḡ-tän-mad-ifəl ämazlay, dihen, ad-əjrəwän s-äzum.

¹⁶ Wär t-illa ere itəggatän tikəst i-temälsit wäššärät s-taswədt n-tabdoḡt täynayät; afäl ija a-wen, ad-dd-tärkəb taswədt ta täynayät temälsit, täj amənd ojärän wənnin.

¹⁷ Äddinät, wär təjjən aman n-läḡnāb äynaynen, äxxiimmärnen dāḡ-ijdad; ere ijän a-wen har käfän aman-ənnin dāḡ-ijdad, ad-has-səbbuqqen ijdad-net, ifut dāḡ-läḡnāb hək-dāḡ dāḡ-ijdad. Aman n-läḡnāb äynaynen, äxxiimmärnen, iddidän äynaynen a dāḡ-tän-itajj äwadəm, dihen, wär-e ifut mäs-sän dāḡ-wi wäla wi.»

Isälan n-elle-s n-Žayrus d-tamädt ta dd-izajjār ašni
(Marqəs 5:21-43; Luqa 8:40-56)

¹⁸ Ämmiijräd Yisa i-tamətte dāḡ-isälan-win-dāḡ a-s a əndärrän-dāḡ, iyyän dāḡ-imännähädän n-taxrəmt-en-dāḡ da-dāḡ t-dd-osän, irkäḡ data-s, inn'-as: «Talyaḡt-in, iket tät-äba mäšan nidawet sār-s, sənsəd fälla-s äfuss-näk, ad-dd-təddär.»

¹⁹ Ibdäd Yisa, äddew ɗär-s ənta d-inəṭṭulab-net.

²⁰ Iгла har šik-dāḡ tamädt tiyyät lat märaw iwətyan d-əssin ijammäḡ-tät ašni da-dāḡ dd-mälät ɗara-s, ɗäs afär n-eräswäy-net

²¹ ed a-s täjj a-wen-dāḡ, janna dāḡ-iman-net: «Afäl ɗäsāḡ wäla-dāḡ eräswäy-net, ad-əzzəyāḡ.»

²² Innäḡ-dd sār-s Yisa, inhäy-tät, inn'-as: «Talyaḡt-in, wär təkkesäd äṭṭäma, äzozäy-käm immun-näm.» Təzzäy tamädt ässaḡät-wen-dāḡ.

²³ A-s hin-iwwäḡ Yisa d-inəṭṭulab-net ehän n-emännähäd, inhäy iməwatän n-tiḡnab ti n-uḡəf n-iba d-äddinät wi hasän-hallänen, äsikäläl a-wen-dāḡ iket-net, ja tākat dāḡ-išənnawän.

²⁴ Omär s-ad-əzjārän äddinät fälla-s ed inn'-asän: «Tarat, wär tät-äba, eḡəs ɗas a ja.» Jän-t tekäškäšt.

²⁵ Təzjār fälla-s tamətte ɗas, ijjäš ehän wa dāḡ-tənsa talyaḡt, irmäs-tät-dd s-äfuss, tənkar-dd.

²⁶ Īntäjän isälan n-a-wen-dāḡ dāḡ-teje-ten-dāḡ iket-net.

Imëddorçal wi n-əssin äzozäy Ƴisa

²⁷ Ašäl iyyän, irjaš Ƴisa a-s t-äxran əssin imëddorçal, äsiḡären, jannen-as: «Ya Ägg-Dawəd, adən-anäy tähanint!»

²⁸ Iwwäq-in Ƴisa ehän wa ikka, əjjäšan-t-dd fälla-s imëddorçal ənnin n-əssin ḡas, inn'-asän: «Ak tidət-däḡ a-s təflasäm a-s äddobəḡ ad-aräḡ tiṭṭawen-näwän?» Ənnän-as: «Älyalim, nəflas a-wen.»

²⁹ Iḡäs Ƴisa tiṭṭawen-näsän, inn'-asän: «Itwəjjet-awän a-wa dār-ogdäh immun-näwän.»

³⁰ Ameränät tiṭṭawen-näsän mäšan, ikna asəmmähəd däḡ-sän, inn'-asän: «He käwäned! Wār jem isälan n-a-wa ijän däḡ-äwadəm wäl' iyyän»,

³¹ mäšan, əzjārən ehän fälla-s ḡas, əffäyän isälan däḡ-äkall iket-net.

Isälan n-amälšon wa äzozäy Ƴisa

³² Diha-däḡ d-əglän imëddorçal, a-s amälšon iyyän s-ikras alšin wa t-ihän iləs-net da-däḡ sār-s dd-äwwäyän äddinät.

³³ Ikkäs däḡ-s Ƴisa alšin wa t-ihän, ad-itamäjrad. Təqqäl-dd tamətte ḡas tor' emm, janna: «Wār käla ätwänhäy šund a-wa-däḡ däḡ-äkall wa n-Išrayil.»

³⁴ Mäšan, käl-faris əntäned a jannen: «A-wa tärna n-Iblis-i n-ämänokal n-alšinän a-s itakkäs alšinän däḡ-äddinät.»

Təmyäre n-tähanint ta oḡän Ƴisa i-tamətte

³⁵ Ällil Ƴisa ḡarät-a-wen iḡärman d-tidbi iket-näsnät, isayra däḡ-ihänan n-äddin wi n-käl-Älyähud, ixattäb Älənžil wa n-Təmmənəya n-Mässinäḡ, izizuy äddinät däḡ-turhənnawen d-älḡibän.

³⁶ Inhäy Ƴisa tamətte ta täjjet has-təlkämät ḡas, täny'e tähanint-net; inhäy fälla-sän aləḡdeš d-ezārri, olähän-as ḡas d-tihatten wären la aməḡan.

³⁷ Innäḡ-dd s-inəṭṭulab-net, inn'-asän: «Ašəkrəš äggolät, əttäḡam ijjet mäšan, wār-əjjətän inaxdimän t-oläynen.

³⁸ Äḡelät məssi-s n-ašəkrəš i-ad-dd-išəmmişəl inaxdimän oläynen ašəkrəš-net.»

10*Ämašäl wa issäḡläf Ƴisa inəmmušal-net*

(Marḡəs 3:13-19; Luḡa 6:12-16)

¹ Iḡrā-dd Ƴisa ḡarät-a-wen inəṭṭulab-net wi n-märaw d-əssin, ikf'-en tärna n-ukəs n-alšinän däḡ-äddinät d-azuzi n-äddinät däḡ-turhənnawen d-älḡibän.

² Ismawän n-inəṭṭulab wi n-märaw d-əssin äsnäfrän da: Simyon wa s-itawänna Bəṭrus d-ənḡa-s Idris; Yaḡub wa n-ägg Zäbdi d-ənḡa-s Exya;

³ Fəlibb d-Bärtälamma; Tomi d-Mätti wa n-änarmas n-tiwse; Yäḡub ägg Älfa d-Tade;

⁴ Simyon wa n-Käna d-Yähudəs wa n-Isxaryut-i t-e-isəssäḡdärän.

Äšmašäl Ƴisa inəṭṭulab-net i-ad-äxṭəbän

(Marḡəs 6:7-13; Luḡa 9:1-6)

⁵ Əntäned-den-däḡ inəṭṭulab wi n-märaw d-əssin äšmašäl Ƴisa s-innä: «Wār təkem tiwsaten ti n-inəzzulam,† wār təjješäm ayḡrəm n-käl-Sämari;

⁶ wār təkem ar tamətte ta n-käl-Išrayil tässujjalät šund tihatten.

⁷ Däḡ-tekle-näwän, äxṭəbät i-äddinät a-s Təmmənəya n-Mässinäḡ, tohäz-dd.

† 10:5 10:5 — Ƴur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änəzzalim a ämoos. A-wen-däḡ a fäl tiwsaten ti iyyäḡnen iket-näsnät, ti n-inəzzulam. — Ašäl-i-däḡ, änəzzalim, äkafär (ere wärän issen s-Mässinäḡ).

⁸ Zuzəyät imarhinän, sənkaräm-dd inəmmuttan, šəşdəjäm äddinät wi ijrāw jəri, təkkesäm alšinän dəḡ-iməlsan; ännuxmət n-Mässinäḡ wa təjrāwäm bännan, äkfät-t i-äddinät bännan.

⁹ Wār tiwəyät orāḡ, wāla azrəf, wāla totəyya dəḡ-färtəmatän-nāwän,

¹⁰ wār tiwəyät šäkkəš, wāla anākəbba sāl wa təlsäm, wāla tifadəlen sāl ti sālām, wāla tāborit ed, wār t-ih' äššäk a-wen, hak ənaxdim-dəḡ, ärhuj-as älxaqq n-tide-net.

¹¹ Aḡrəm d-tadəbayt təjjäšäm-dəḡ, səstənät d-ere wa s-äniihäjja ad-ḡur-s təzzubbem, təzzubbem ḡur-s har ašäl wa d-tässawäḡäm tekle.

¹² Ehän təjjäšäm-dəḡ, äjrät fälla-s ässälam;

¹³ afäl kəwän-äsbärräkän məssaw-s, sänsät fälla-sän älxer wa täwwayäm; kunta daḡ wār kəwän-äsbärräkän məssaw-s, äglät d-älxer-nāwän.

¹⁴ Ehän, wāla aḡrəm, tosäm-dəḡ, har wār kəwän-äsbärräkän məssaw-s, meḡ unjäyän s-asjed i-mäjräd-nāwän, əzjərät-t, täbbäkbäkäm idarän-nāwän i-ad-wār kəwän-iləttäḡ wāla äboqqal-net.

¹⁵ Äsidätteḡ-awän a-s ehän-en-dəḡ, meḡ aḡrəm-en-dəḡ, ašäl wa ilkämän, tojār tisanant ta t-madät-tärməs ta tärmäsät iḡərman wi n-Sodoma d-Gomora.»

Ilkam älyizabät

(Marqəs 13:9-13; Luqa 21:12-17)

¹⁶ Inn'-asän daḡ: «Ənhəywät, näkk da-dəḡ kəwän-äšimašälän i-ad-talähäm d-tihatten əllanen jer-tiḡəs; udayät i-iman-nāwän šund taššälen, ijješət-kəwän älḡafyät wa ihän tidäberen.

¹⁷ Ağəzät iman-nāwän dəḡ-dəgg-adəm; ad-kəwän-əjən dəḡ-ifassän n-əlxəkum, əjən dəḡ-wän tiwit dəḡ-ihänan n-äddin wi n-käl-Älyähud.

¹⁸ Dəḡ-təssəba n-isəm-in wa kəwän-iwarän, ad-hawän-aškən äddinät s-ḡəfärän d-imänokalän, tättärmäsäm-dd sār-sän, məšan ad-umas a-wen əssəbab fäl tämoosäm tjuhawen-in, təjəm isälan-in i-tiwsaten ti n-inəzzulam.

¹⁹ Afäl təttärmäsäm, wār täšəwwašät dəḡ-isälan n-a-wa mad-tənnəm d-əmmək wa s-tän mad-tənnəm, ed afäl täbokäm i-mäjräd, ad-kəwän-itwəkf a-wa mad-tənnəm,

²⁰ fäl-a-s wädden kəwäned a maden-ämmäjräd, Unfas wa n-Abba-nāwän a madän-ämmäjräd dəḡ-idəggan-nāwän.

²¹ Ad-isəttärməs əwadəm əḡḡa-s i-ad-ämmät, isəttärməs abba rure-s i-ad-ämmät, ännäbdädän aratan d-imärawän-näsän, əjən iman n-imärawän-näsän;

²² ad-där-wän akəḡän äddinät iket-näsän dəḡ-äddimmät n-isəm-in wa kəwän-iwarän məšan ere ibdädän s-äššahät dəḡ-immun-net, ad-iḡləs.

²³ Afäl kəwän-äqquzzäben äddinät dəḡ-aḡrəm iyyän, jawäḡät-asän s-iiyyän; äsidätteḡ-awän a-s, a-s dd-e-säḡləyäm iḡərman n-Işrayil iket-näsän, iqqal-dd Ägg-ägg-adəm.»

²⁴ «Wār t-illa änätḡalib ufan älḡalim-net wāla akli ufan məssi-s,

²⁵ igdäh ḡas i-änätḡalib, ad-ättiiläl älḡalim-net, ättiiläl daḡ akli məssi-s. Kunta äddinät wāla məssi-s n-ehän, jän-as isəm Abälzäbil, a-wen Iblis, äb' äḡḡama n-a-wa he-ənnən fäll-inalkimän-net; ad-fälla-sän ənnən a ojarän a-wa ənnän fäll-məssi-s n-ehän.»

Uksaḡät Mässinäḡ wädden dəgg-adəm

(Luqa 12:2-7)

²⁶ «Ənneḡ-awän: Dəgg-adəm, wār tän-täksuḡäm. Wār t-illa a ättunkälän s-wädden ad-dd-infiləl, wār t-illa a iffarän s-wädden ad-dd-iffukkär.

²⁷ A-wa hawän-janneḡ dəḡ-takše, ännät-t s-afälla dat-äddinät iket-näsän; a-wa hawän-äsmätäktäkəḡ, säqqəyyät-t fäll-afälla n-ihänan.

²⁸ Wār täksudām dāgg-adəm-i wāren äddoobāt ar tenäxe n-taxəssa, wār-äddoben tenäxe n-iman; änn-ak, uksaḍāt Wa äddoben ad-ihlök iman hakd taxəssa dāx-žohännäma.

²⁹ Yur-wän, wädden igdaḍ əssin, tämma ḡas a nazzän? Hakd a-wen-däx, wār-ilkem ad-dāx-sän oḍa iyyän, a ikkäs Abba-nāwän wār otes s-a-wen,

³⁰ wāla amzadän n-iḡāfawän-nāwän, äḍḍinän.

³¹ Wār tärmeyäm, tojāräm abrək n-igdaḍ älcim.»

(Luqa 12:8-9)

³² «Ere äsjähän dāgg-adəm a-s näkk a t-ilän, ad-səjjəyhäx näkk-däx Abba-nin-i ihän išənnawän a-s äwadəm-en, i-nin;

³³ ere daḡ wa hi-äkkuddälän dat-dāgg-adəm, ad-t-əkkuddäläx näkk-däx dat-Abba-nin-i ihän išənnawän.»

Täkoba wädden älxer

(Luqa 12:51-53; 14:26-27)

³⁴ Oläs daḡ, inn'-asän: «Wār teḡalät älxafyät ad-dd-äwwäyäh s-äkall, täkoba, wädden älxafyät a sār-s dd-äwwäyäh.

³⁵ Näkk, oseḡ-dd i-ad-ibḍəw ähaləs d-ti-s, təbḍəw talyaḍt d-ma-s, təbḍəw tamäḍt d-taḍäggalt-net,

³⁶ umasän käl-ehän n-äwadəm išənja-net.

³⁷ Ere hi-äsoofän ti-s meḡ ma-s, a-di, wār-änhäjja ad-umas änätḡalib-in, ere daḡ wa hi-äsoofän rure-s meḡ elle-s, wār-änhäjja ad-umas änätḡalib-in.

³⁸ Ere wa wārän äsdāw i-aḍkul n-tajəttewt-net ta n-tamättant, ilkəm-ahi, a-di, wār-änhäjja d-ad-umas änätḡalib-in.

³⁹ Ere wa wārän idgeḡ ar dāx-igguḡ n-iman-net dāx-äddunya-ta-dāx, ad-ifut dāx-älžännät, mäšan, wa irḍän äfota dāx-iman-net dāx-äddunya-ta-dāx, dāx-äddimmät-in, äwadəm-en, ad-iḡləs dāx-älaxärät.»

Hak äwadəm d-a-wa has-jän imojjan-net

(Marqəs 9:41)

⁴⁰ Inna daḡ: «Ere käwän-äsbärräkän, näkk a äsbärräk, wa hi-äsbärräkän, wa hi-dd-äšmašälän a äsbärräk.

⁴¹ Ere äsbärräkän ännäbi dāx-təssəba n-a-wa s-iqqäl ännäbi, əlkamän dāx-s imraš šund wi mad-ijrəw ännäbi; ere äsbärräkän ere oḡadän dat-Mässinäḡ dāx-təssəba n-iqqud-net, ilkam ad-ijrəw imraš šund wi mad-ijrəw ere oḡadän dat-Mässinäḡ.

⁴² Ere wa issəswän wāla-dāx alkas n-aman sāmmednen i-iyän dāx-inəḡḡulab dāx-təssəba n-a-wa s-ämoos änätḡalib-in, äsidätteḡ-awän a-s, wār t-e-ijmäḍ marušät n-emärked wa ämešäl.»

11

Isəstanän wi ija Exya wa n-Enəsselmäh dāx-isälan n-ḡisa

(Luqa 7:18-35)

¹ Issəmdä ḡisa asəmmətär n-inəḡḡulab-net wi n-māraw d-əssin ḡas, ifäl dihen, ad-isayra äddinät, ixatḡab dāx-iḡärman wi n-teje-ten-däx.

² Iha Exya takärmüt a-s islä ijitän n-Älmasex, äšmašäl sār-s härät dāx-inəḡḡulab-net

³ i-ad-has-t-dd-səstənän kunta ənta a-s Wa s-ätwännä ilkam ad-dd-ass meḡ ilkam ere säl ənta. Osän-t-dd inəḡḡulab-win-dāx, əlläḡen-as a-wa innä Exya.

⁴ Äwwežäb-asän ḡisa, inn'-asän: «Əqqəlät Exya, suḡəläm-as a-wa s-təsläm d-a-wa tənähäm;

⁵ ännät-as: iməddoryal hannäyän; inəbdan rajjäšan, wi ijrəw jəri tišdajän, imḡaj sallän; inəmmuttan nakkärän-dd; tiläqqiwen, sallänät i-Älənžil.

⁶ Təndəð i-ere wa dəχ-i wārən ij' äššäk.»

A-wa innä Yisa fäll-Exya wa n-Enəsselmäχ

⁷ Eglän meddən-winnin dd-ämešälnen χas, ädwännät Yisa i-tamətə dəχ-isälan n-Exya, inn'-asän: «Ak, a-s təzjäram s-tenere, ma tənähäm? Ak tezewt äsiwälawäl aðu a tənähäm? Äbo!

⁸ Adiš ma tökkäm i-ad-t-tənähäm? Ak ähaləs äsisahäχän ašäl a tənähäm? Eñhəywät-tän-ak äddinät wi sasahəχnen ašäl, ihānan n-imänokalän a əzzaχän?

⁹ Adiš ma tökkäm i-ad-t-tənähäm? Ak ännäbi a tənähäm? Tidət lab a-s ännäbi, ässiilmädäχ-käwän a-s ere ojärän tumast n-ännäbi a tənähäm.

¹⁰ Eñta-en-däχ a fäl innä əlkəttab n-Mässinäχ:

<Eñhöy! Äzizäräχ-ak anəmmašul-in wa he-iknən tabarät-näk.>

¹¹ Äsidätteχ-awän a-s wär torew tamädt ähaləs wär-ojer Exya wa n-Enəsselmäχ mäšan hakd-a-wen-däχ, wär t-illa ere t-wārən ojer dəχ-Təmmənəya n-Mässinäχ.

¹² Yur-ašäl wa dd-osa Exya har ašäl-i-däχ, ija amjär äšsoohen fäll-ujəš n-Təmmənəya n-Mässinäχ; amjär-en, wär dəχ-s ikärrəš ašäl ar äddinät wi əkfärnen

¹³ fäl-a-s, ännäbitän wi dd-äzzarnen i-Exya iket-näsän, hakd-däχ alämär wa n-ännäbi Mosa, äloläy a-wen-däχ iket-net dəχ-isälan n-Təmmənəya n-Mässinäχ hundäχ har ašäl-i-däχ n-äzzāman wa n-Exya wa n-Enəsselmäχ.

¹⁴ Kunta fäw ad-täqəbəläm s-a-wen-däχ, älleχəχ-awän a-s dəχ-ännäbitän, ənta a-s ännäbi Yəli wa s-ätwänna ilkam ad-dd-aləs uχəl.

¹⁵ Ämära, ere ilän timəzzujen s-islä-däχ, isäjdet!»

¹⁶ Oläs dəχ Yisa, inn'-asän: «Ak, mi dār-mad-sənnəfäqqäχ əzzurəyyät ta-däχ? Täñifäqqa χas d-älzəməχät n-aratän janen aχrəf dəχ-təfärre, jannen iyyäð i-wi iyyäðnen:

¹⁷ <Eñhöywät, käwəneð, wär lem asəfar; nəwät-awän taχänibt, tunjäyäm s-dällol! Nənzär-awän tiswal n-tisnant mäšan, wär təttefäm iba!>

¹⁸ Exya, äzzāman wa dd-osa, wär-itətt imənsiwän olaynen, wär-isəss aman n-läχnəb äxxiimmärnen, ənnän fälla-s äddinät: <Ih'-e alšin>

¹⁹ išräy-t-dd Ägg-ägg-adəm, ənta itihär dār-wän a-wa tättäm d-a-wa sässäm, χas tənnäm dəχ-s: <Wa ənta, insäy, iräf aman n-läχnəb wi äxxiimmärnen, inarmasän n-tiwse d-älfusaχ wi iyyäðnen a-s imidiwän-net.> Äsidätteχ-awän a-s:

<Särho wa dd-ifälän Mässinäχ, ijitän n-əwadəm a t-isatbatän.> »

*Ixärman wi fäll-äsmäqqa Yisa
(Luqa 10:13-15)*

²⁰ Äsmäqqa Yisa dərät-a-wen fäll-ixärman wi dəχ-ija tikunen äjjootnen mäšan, äsχärän-as ulhawän-näsän, unjäyän ätubän.

²¹ Inn'-asän: «Iməskay käl-Qorazin d-käl-Bätsäyda, älməššibät χas a fälla-wän maden-idəw ed ənnär ixärman wi n-Tir d-Säyda əzzäχän inəzzulam† a dəχ-jänät tikunen-ti-däχ jänen yur-wän, äru d-əlsän šakutän, əblənbulun dəχ-ezəd fäl təmyäre n-tätubt-näsän.

²² A-wen-däχ a fal hawän-janəχ a-s ašäl wa ilkämän, ad-käwän ijjəš äddäyyät ojärän wa ijjäšän ixärman wi n-Tir d-Säyda.

† 11:21 11:21 – Yur-käl-Älyähud, ere wārən ämoos ägg-Älyähud s-aläšäl meχ ere wārən ilkem i-äddin-näsän, iket-net, äñəzzalim a ämoos. A-wen-däχ a fäl tiwsaten ti iyyäðnen iket-näsnät, ti n-inəzzulam. — Ašäl-i-däχ, äñəzzalim, äkafär (ere wārən issen s-Mässinäχ).

²³ Kāwāneḍ-i-š əzzāḡnen aḡrəm wa n-Qāfārnaxum, ma täḡeläm? Tordam a-s aḡrəm-nāwān ad-itimḡar har awəḍ išənnawān? Xāram-awān! Änn-ak, ad-təhələm ider, wār kāwān-dd-e-tawāḡ a sāl temse ed tikunen ti jānen ḡur-wān, ənnar janāt dāḡ-aḡrəm wa n-Sodoma, āru d-ātubān imuzāḡān-net, äqqayəm aḡrəm-nāsān iday har ašāl-i-dāḡ.

²⁴ A-wen-dāḡ a fāl hawān-janneḡ, a-s ašāl wa ilkāmān, ad-kāwān-ijjəš äddäyyāt ojārān wa ijjäšān aḡrəm wa n-Sodoma.»

Älyibadāt n-Ḣisa i-Abba-net
(Luqa 10:21-22)

²⁵ Iḍkāl Ḣisa mäjrād, innä: «Abba, kāyy-i n-Emāli n-išənnawān d-äkall, timələḡ-kāy fāl-a-s härätān-wi-dāḡ, təffārät-tān i-iməssorha d-imusānān n-äddunya-ta-dāḡ māšan, täsnāfalälād-tān-dd wāla i-aratān.

²⁶ Tidət Abba, kāyy a tiimələḡ ed ädduuttāt a-s ənta-den-dāḡ erhet-nāk wa ähusken.»

Ämašal wa s-dd-osa Ḣisa d-täsonfat ta ihakk

²⁷ Innä Ḣisa i-äddināt ḍarāt-a-wen: «Wār t-illa a-s wädden ij'-e Abba-nin dāḡ-ifassān-in, wār t-illa ere hi-ijan muzəyāt imdan kunta wädden Abba, wār t-illa dāḡ ere ijan muzəyāt imdan i-Abba kunta wädden näkk-i n-Rure-s-i t-dd-ifälān d-ere wa s-ärheḡ ad-has-t-zuzəyāḡ.»

²⁸ Inn'-asān dāḡ: «Eyyāwāt iket-dāḡ-nāwān kāwāneḍ-i äsifägga äzuk wa tällinjem, ad-hawān-sunfāḡ,

²⁹ mašälät erhet wa-nin, təyyəm-ahi ad-kāwān-sāḡrāḡ ed näkk, äzeedāḡ, hahi-tazidert, wār hi-ihā äkkəbru; ənta-den-dāḡ a-wa hawān-ha täsonfat n-iman-nāwān, täḡləsäm.

³⁰ A-wa fälla-wān ärheḡ, wār-äzzay, amišəl n-erhet-in dāḡ, i fäsuusān.»

12

Isālan n-ašāl wa n-əssəbət-i n-täsonfat
(Marqəs 2:23-28; Luqa 6:1-5)

¹ Ašāl iyyān n-əssəbət-i n-ašāl wa n-täsonfat, iräs Ḣisa d-inəṭṭulab-net išəkraš n-älkäma. Eḡlan dāḡ-a-wen-dāḡ a-s älluzān inəṭṭulab, ad-nakkādān tiḡāḡānen n-älkäma, taffāzān tiblalen-nāsnāt.

² Enhāyān-tān härät dāḡ-kāl-faris ḡas, ənnān i-Ḣisa: «Enhəy, äḡtəl inəṭṭulab-nāk ed išl'-en a wārān itətwəjj dāḡ-ašāl wa n-əssəbət-i n-täsonfat.»

³ Inn'-asān: «Adiš kāwāneḍ wār täḡrem dāḡ-əlkəttab a-wa ij' ämänokal Dawəd ašāl wa d-älluz ənta d-ejhān-net?

⁴ Ätwānn'-anāḡ, ijjäš ənta d-ejhān-net ehān n-Mässinäḡ, ad-tattān tijəlwen-ti n-tikutawen s-innä alāmār wa n-ännābi Mosa, wār t-illa ere s-xälal tetäte-nāsnāt a sāl käl-tikutawen? Tijəlwen-tin-dāḡ, wār has-xälalnāt ənta wāla ejhān-net māšan, älluz ḡas, ikš'-enāt ənta d-meddən wi dār-äddew.

⁵ Ajān wār täḡrem dāḡ-alāmār a-s ašāl wa n-əssəbət-i n-täsonfat, käl-tikutawen wār hasān-āmoos anməšri i-a-wa innä alāmār afäl əxdämān dāḡ-ehān n-ämudd wa mäqqārān, ed əjrawān s-ad-ənməšrəyān i-fārəḍān wi ätiwāḡtāsnen i-ašāl wa n-əssəbət-i n-täsonfat.

⁶ Ässiilmädāḡ-kāwān a-s ehān n-ämudd wa mäqqārān, ill'-e jere-wān ere t-ojārān.

⁷ Xäxx, ənnar təssanām älmāḡna n-a-wa innä Mässinäḡ a-s innä: <Ojār a-s ḡur-i la tähanint idəm uhən tikutawen>, iket-di-š, wār səḍlimām bānnan inəṭṭulab-wi-dāḡ wāren əḡšed härät.

⁸ Ägg-ägg-adəm, a ännihädän dāḡ-a-wa s-ila ägg-adəm s-ad-t-äj d-a-wa s-wär ila s-ad-t-äj dāḡ-ašäl wa n-əssəbət-i n-täsonfat.»

*Äzozäy Ȳisa ähaləs s-äqqur äfuss-net dāḡ-ašäl wa n-əssəbət-i n-täsonfat
(Marqəs 3:1-6; Luqa 6:6-11)*

⁹ Ifäl Ȳisa dihen, ikk' ehän n-äddin wa n-käl-Älyähud.

¹⁰ Diha-dāḡ d-t-ijjäs a-s ähaləs iyyän da-dāḡ s-äqqur äfuss-net. Eggädän-dd äddinät iyyäd s-Ȳisa, ənnän-as: «Ak xälal meḡ xäram ad-izuzəy äwadəm iyyän dāḡ-ašäl wa n-əssəbət-i n-täsonfat?» Äsarü ḡas fäl t-əssədlämän a-s tammäḡän.

¹¹ Äwwežäb-asän Ȳisa, inn'-asän: «Endek dāḡ-wän wa s-afäl toḡa tehäle ta n-iiyyät ila dāḡ-anu dāḡ-ašäl wa n-əssəbət-i n-täsonfat, ad-dāḡ-s tät-äyy har akəy ašäl-en təzzar?»

¹² Uhən käwäneḡ, wär təjrehäm a-s ägg-adəm ufa arəzzej s-a äjjeen? Ässiilmädäḡ-käwän a-s wär t-illa a ässixrämän iji n-a olaxän dāḡ-ašäl wa n-əssəbət-i n-täsonfat.»

¹³ Innä Ȳisa ḡarät-a-wen i-ähaləs wa s-äqqur äfuss-net: «Ezzəl äfuss-näk.» Izzäl ähaləs äfuss-net, izzäy, oläh äfuss-net ässaḡät-wen-dāḡ d-äfuss-net wa iyyädän wär-ijrew härät.

¹⁴ Ezzärän käl-faris edägg-en ḡas, änmänhäyän jer-iman-näsän dāḡ-isälan n-əmmək wa s-mad-əjən iman-net. Ilmäd Ȳisa a-wa läbasän has-kittəwän ḡas, ifäl dihen, iglä.

Ȳisa a-s änämmašul n-Mässinäḡ wa s-ätwänna

¹⁵ Dāḡ-tekle-net, əlkämän-as-dd imarhinän äjjootnen, äzozäy-tän iket-dāḡ-näsän.

¹⁶ Härwa wär-ifel dihen-dāḡ, äsmätär-tän hullan d-ad-wär jen isälan n-ere wa ämoos i-äwadəm wäl' iyyän.

¹⁷ Ämoos a-wen inna a ässiitbätän a-wa innä ännäbi Saya† a-s innä, innä Mässinäḡ:

¹⁸ «Enta da änaxdim-in wa äsnäfränäḡ,

ənta a əkneḡ tärha,

ənta a dāḡ-äsriwän iman-in.

Ad-fälla-s sänsäḡ Unfas-in,

isəssiḡəd inəzzulam† dāḡ-iqqud i-Mässinäḡ.

¹⁹ Wär t-mad-ijjəs äjaḡ,

wär mad-isäqqəy bännan,

wär t-illa ere has-madän-isəll äsiḡäyya

dāḡ-tišarriten bännan.

²⁰ Wär mad-ärz wäla-dāḡ tezewt

a-wa-dāḡ has-ija iba n-äddäḡwa

Wär mad-isəmməkət wäla-dāḡ tefätelt,

ad-isəjär ättäma äddinät wi əbrärnen,

äj iqqud dāḡ-edägg iket-net.

²¹ Isəm-net a madän-isəjär inəzzulam ättäma.»

Tärna ta n-Ȳisa, wär toher härät d-ta n-Iblis

(Marqəs 3:20-30; Luqa 11:14-23; 12:10)

²² Äwwäyän-dd äddinät s-Ȳisa ḡarät-a-wen amälšon äsidärḡäl alšin wa t-ihän, ikras daḡ iləs-net; äzozäy-t, oläs ahänay, ad-itamäjräd.

† 12:17 12:17 A-wa ännäbi dd-äzzarän i-Ȳisa, äloläy dāḡ-isälan-net əssayät timaḡ n-awätay dat-tiwit-net.

† 12:18 12:18 – Ȳur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-dāḡ a fäl tiwsaten ti iyyädnen iket-näsnät, ti n-inəzzulam. — Ašäl-i-dāḡ, änäzzalim, äkafär (ere wärän issen s-Mässinäḡ).

²³ Ǝqqälän-dd äddinät ɣas oran imawän, äkuunän, jannen: «Ämmukkän ɔnta-i-däɣ a-s Ägg-Dawəd wa s-ätwänna!»

²⁴ Ǝslän käl-faris i-a-wen ɣas, ɔnnän: «A-wa Abälzäbil, Iblis wa n-ämänokal n-alšinän a t-ihan; ɔnta a t-ikfän tärna ta s-itakkäs alšinän däɣ-äddinät.»

²⁵ Ilmäd Ƴisa ɣur-iman-net a-wa zinəzjumän, inn'-asän: «E d t-illäm əddəwəl s-dd-əqqälän məssaw-s əknasän jer-iman-näsän, ad-t-iba, umas timšar; aɣrəm daɣ wäla ehän wa s-dd-əqqälän məssaw-s əknasän jer-iman-näsän, wär-e ähaj ibdad.

²⁶ Afäl dd-iqqäl Iblis isattäɣ iməššerəkän-net siha d-siha, iman-net ɣas a iknas; ere iknasän d-iman-net ya, wär t-illa əmmək s-ähoja ibdad.

²⁷ Kunta daɣ tənnäm näkk, tärna n-Abälzäbil wa n-ämänokal n-alšinän a-s tän-takkäsäɣ däɣ-äddinät, adiš, inəttulab wi-näwän, ma ämoos isəm wa s-tän-takkäsän däɣ-äddinät? Inəttulab-näwän-en-däɣ, a-s ilkam ad-äjjayhən fälla-wän, sədləmänkäwän,

²⁸ mäšan, kunta näkk, tärna n-Unfas n-Mässinäɣ a-s takkäsäɣ alšinän däɣ-äddinät, äniihäjjä a-s ässiilmäd-käwän a-wen a-s Təmmənəya n-Mässinäɣ, təll'-ee jere-wän.

²⁹ Wär t-illa ere ädooben uješ n-ehän n-ähaləs n-anäkfor, awəy ilalän n-ehän-net ar s-ad-t-ikrad təzzar; dihen, ad-udabät teräzze n-ehän, awəy a-wa t-ihän.

³⁰ Ere hi-wärän irha-däɣ, a-di, ašanjo-nin; ere daɣ wa hi-wärän itilal s-asdu, ašəmmähəš ɣas a t-išlan.»

Abäkkad wa s-wär t-təlla tenäšše-net amäɣlol

³¹ Inn'-asän daɣ: «Ässiilmädäɣ-käwän a-s abäkkad ämešäl ägg-adəm d-asəkkufär ija-däɣ, ädoobät Mässinäɣ ad-has-t-in-änš mäšan ere äskafärän däɣ-isälan n-Unfas Šäddijän-däɣ, wär-ilkem ad-has-in-ätiwänša.

³² Ere innän a läbasän fäll-Ägg-ägg-adəm-däɣ, ädoobät ad-ijrəw tenäšše n-a-wen mäšan, ere wa innän a läbasän däɣ-isälan n-Unfas Šäddijän, wär-ilkem ad-has-in-ätiwänša däɣ-äddunya wäla äläxärät.»

A-wa ijänna ägg-adəm a isalmadän s-a-wa ihän ulh-net (Luqa 6:43-45)

³³ Oläs daɣ, inn'-asän: «Ahəšk olaɣän, a-s mad-t-tasəd, aratän-net daɣ i olaɣnen; erk ahəšk daɣ, a-s t-mad-t-tasəd, aratän-net daɣ, i läbasnen; ahəšk, aratän-net a-s ititwəzzəy.

³⁴ Ya käwäned-i n-taššälən-i-däɣ! Käwäned-i n-inälläbäsän, əndek əmmək wa s-ädoobät ad-dd-izjār mäjräd olaɣän imawän-näwän? A-wa idkärän ulh n-ägg-adəm a dd-izajjārän emm-net.

³⁵ Äwadəm-wa oläɣän, milɣaw n-ulh-net a däɣ-dd-itakkäs a-wa oläɣän mäšan, enälläbäs ɔnta, tälläbäst n-ulh-net a däɣ-dd-itakkäs a-wa läbasän.

³⁶ Ässiilmädäɣ-käwän a-s ašäl wa ilkämän e-d t-təlläm taxxalt d-tašujəšt inna äwadəm, ad-tät-izəl dat-Mässinäɣ.

³⁷ Iyyät-i-däɣ, ad-käy-iɣləs mäjräd-näk, meɣ daɣ, mäjräd-näk iman-net, a käy-madän-isiḏəw, iwär-käy uḏlem.»

Irrum wa jän käl-faris i-Ƴisa (Marqəs 8:11-12; Luqa 11:29-32)

³⁸ Äwwežäbän-as iyyäd däɣ-älɣulam n-Ättäwrät d-käl-faris, ɔnnän-as: «Älɣalim, äj data-näɣ iji n-Mässinäɣ, nənhäy.»

³⁹ Äwwežäb-asän, inn'-asän: «Ǝzzurəyät-ta-däɣ n-tenälläbäst n-temäznit, wär täksuḏ Mässinäɣ; wär təmmäɣ ɣas ar ad-ətwəjjən ijitän n-Mässinäɣ data-s mäšan, təlmədət a-s wär-ilkem däɣ-s iji n-Mässinäɣ säl wa n-ännäbi Yunəs.

⁴⁰ Emmək-wa-däx s-käla ikkäs Yunəs kəraḍ išilan d-kəraḍ ihādan däx-täsa n-emän wa mäqqārān, əmmək-wen-däx daḡ a-s mad-ikkəs Ägg-ägg-adəm kəraḍ išilan d-kəraḍ ihādan däx-ider n-äkall.

⁴¹ Ašäl wa n-tebädde, ad-dd-ənkārān käl-ayrəm wa n-Nəniba, səḍləmān käl-əzzurəyāt-ta-däx, ed ašäl wa d-hasān-ixtāb ännābi Yunəs, ätubān. Säjdät! Ašäl-i-däx, ənhəywät-ak, ill'-ee jere-wān ere ojarān Yunəs, māšan hakd-a-wen-däx, tunjāyām s-ad-tutabām.

⁴² Ašäl wa n-tebädde, ad-dd-tənkār tāmānokalt ta s-käla täxkām däx-äkall wa n-ajus s-isəm-net Saba, täjjāyh fäll-käl-əzzāman-i-däx, səḍləm-tān däx-äššāreḡa ed, ənta təfāl-dd äkall ujəjan i-ad-səjəd i-iməjridān n-tayətte wi itäj jāmānokāl Sulāyman. Säjdät! Ašäl-i-däx, ənhəywät-ak, ill'-ee jere-wān ere ojarān ämānokāl Sulāyman, māšan hakd a-wen-däx, tunjāyām s-asjəd-has.»

Elhəllak wa ihān iba n-tätubt təmdat
(Luqa 11:24-26)

⁴³ Olās daḡ, inn'-asān: «E-d izjār alšin āwadəm, ad-äkk tinariwen i-ad-däx-snät immäx i-edägg däx-ässunfa māšan, ad-has-t-iba;

⁴⁴ afäl has-t-äba, ad-änn i-iman-net: «Näkk-i-däx, ma hi-idgazan, əqqələḡet ḡas ehān-in wa dd-fäläḡ.» Afäl dd-iqqäl edägg wa ifäl s-tizarät, ad-t-dd-ass wār t-ih' āwadəm, ifraḍ, ämmujnät.

⁴⁵ Igləw älwäqq-wen, awəy-dd əssa alšinān iyyäḍ t-ojārnen tālläbäst, əjjəšan āwadəm-ənnin-däx, əzzāḡān däx-s; umas a-s talḡa n-āwadəm-en ta tāzzarät, təššām i-ta təšräyāt.» Inn'-asān ḍarät-a-wen: «Ənta-den-däx a-wa ḍār-mad-taläh talḡa n-əzzurəyāt-ta-däx n-tenälläbäst.»

Anna d-ayətma n-Ḣisa
(Marḡəs 3:31-35; Luqa 8:19-21)

⁴⁶ Ämmiijräd Ḣisa i-tamətte dihen-däx a-s ma-s d-ayətma-s da-däx dd-əbdädnen dat-əmm n-ehān, äšmašälān-dd sār-s āwadəm i-ad-hasān-t-dd-iḡār.

⁴⁷ Osä-dd āwadəm-en Ḣisa, inn'-as: «Anna-näk d-ayətma-k, əbdadān-ak dat-əmm n-ehān, ārhan ahānay-näk.»

⁴⁸ Äwwežāb Ḣisa i-āwadəm-en, inn'-as: «Mi iqqalān anna-nin, mi iqqalān ayətma-ḡ?»

⁴⁹ Izzäl äfuss däx-tanāmhāla n-inəṭṭulab-net təzzar, innä: «Ənhəywät-tān-ak, anna-nin d-ayətma-ḡ!

⁵⁰ E d t-illām ere itamašalān erhet n-Abba-nin-i ihān išənnawān, ənta a-s āṇṇa-ḡ, ənta a-s wälätma-ḡ, ənta a-s ma-ḡ.»

13

¹ Izjār Ḣisa ašäl-wen-däx, ikk' asālim n-əjānš, äqqima.

² Täddew-dd sār-s tamətte täjjeet, ijjāš-as turāft n-aman, äqqima däx-s, täqqimā-dd tamətte ənta təbdad däx-asālim n-aman, täsijād-as.

³ Issäḡläy-tān tangalen äjjootnen. Ij'-asān tiyyät däx-hasān-innä:

Tangalt ta n-änäsdamu
(Marḡəs 4:1-9; Luqa 8:4-8)

⁴ «Käla izjār änäsdamu iyyān i-ad-iddumət ašəkrəš-net.

Älwäqq wa d-itidumut, oḍānät tiblalen tiyyäḍ däx-ābara, äkkukkären-tānät-dd igḍaḍ, əksān-tānät.

⁵ Oḍa ašār iyyān jer-tihun, äffoqqät-dd šik ed wār-intem däx-äkall,

⁶ täsmäqqät-dd täfukt jənnəj-s, təssäryxa isəffuqqa, äqQur-in a-di iket-net ed wär-əntemän ikewän-net dəx-härät.

⁷ Oða aşär iyyän dəx-tabəññənt, tədwäl-dd fälla-s tabəññənt, təzmäd-as.

⁸ Oða aşär wa iyyädän dəx-äkall olağan, ikräš aratan, ijä tiboläsen s-tiyyäd temede n-tablalt a tänät-iwarän, tiyyäd sädisät timərwen, tiyyäd kərədät timərwen.

⁹ Ere ilän timəzzujen s-islä-dəx, isäjdət!»

Äddälil n-tangalen

(Marqəs 4:10-12; Luqa 8:9-10)

¹⁰ Əssəstänän-t inəttulab-net dərät-a-wen d-äddälil wa fäl isaxlay äddinät tangalen.

¹¹ Äwwežäb-asän, inn'-asän: «Käwäned, təjrawäm turhajät n-ujreh n-əddäraj wa n-isälan n-Təmmənəya n-Mässinäx məšan, äddinät wi iyyädnen, wär jen a-wen.

¹² Äwadəm wa s-işwär ifhäm härät, ad has-iwwad musnät har isəssikəy məšan, wa s-wär t-illa a ijarah, wär t-in-ikka härät, änn-ak, ad-dəx-s ämahəy wäla a-wa əndərrän ittäf.

¹³ Ənta-den-dəx a-wa fäl sağläyəy äddinät tangalen i-ad-:

«Əswadän, wär hənniyän;

äsijädän, wär səllən;

wär t-illa dəx a jarrähän.» »

¹⁴ Ämoos a-wen a ässiitbätän a-wa fälla-sän inna ännäbi Saya† a-s innä, innä Mässinäx:

«Äddinät! Ad-salläm, wär jərrəhäm;

ad-təkyadäm, təsibäläləyäm, wär t-illa a hannäyäm.»

¹⁵ Ənta dəx a innän a-s, innä Mässinäx:

«Tamətəta-dəx, təsxär-ahi ulh-net;

təzməzzaj'-ahi iman-net,

təsdäryäl-ahi iman-net

i-ad-äbas hannay, äbas sall,

i-ad-wär jərräh härät

fäl iba n-tärha-i-dəx ja n-ad-sär-i dd-tənnäd,

tutab, zuzəyəx-tät.»

¹⁶ Inna Yisa dərät-a-wen i-inəttulab-net: «Təndəd-awän käwäned ed hannäynät tiṭṭawen-nəwän, sallänät dəx timəzzujen-nəwän.

¹⁷ Ässiilmädəx-kəwän a-s, äsdärhänän ännäbitän äjjootnen d-imaydalän ahänay n-a-wa hannäyäm məšan, wär t-əñheyän; äsdärhänän məsällät n-a-wa s-sälläm məšan, wär has-əslən.»

Älməyxa n-tangalt ta n-änäsdamu

(Marqəs 4:13-20; Luqa 8:11-15)

¹⁸ Säjdät äməra i-älməyxa n-tangalt ta n-änäsdamu:

¹⁹ «Äbara wa dəx-ođänät tiblalen, ənta a-s äddinät wi səllänen i-isälan n-Təmmənəya n-Mässinäx məšan, wär tän-jərrähän, as'-en-dd Iblis, ilbəy-dd dəx-ulhawän-näsän a-wa s-əslän.

²⁰ Tihun ti jer-ođänät tiblalen, əntänätəd a-s äddinät wi s-e-d isla iyyän dəx-sän i-məjräd n-Mässinäx, ad-ihliləy, iqbəl-t šik məšan,

²¹ wär t-itəyy ikräš ikewän dəx-ulh-net; ad-äj äzzäman əndərrän äkoyäd dəx-s, məšan afäl dd-tosa tissust meḡ osä-dd älxizabät dəx-təssəba n-məjräd n-Mässinäx, ad-hin-ibbuṭṭəl a-wa s-omän.

† 13:14 13:14 A-wa ännäbi dd-äzzarän i-Yisa, äloläy dəx-isälan-net əssayät timad n-awätay dat-tiwit-net.

²² Tabəŋŋənt ta jer-odänät tiblalen, ənta a-s äddinät wi s-e-d isla iyyän dəx-sän i-mäjräd n-Mässinäx, ad-has-izməd dəx-ulh-net s-tärha n-wälät-äddunya d-eyläl n-tärha n-ajmur-net, wär t-illa a sār-s dd-isaxsal.

²³ Äkall wa oläxän dəx-odänät tiblalen, ənta a-s äddinät wi s-e-d isla iyyän dəx-sän i-mäjräd n-Mässinäx, ad-t-ijrah, ijješ-as-t älfäyda. Tarəw-dd sār-s tiyyät tablalt temede n-tablalt, tarəw-dd sār-s tiyyät sädisät timərwen n-tablalt, tarəw-dd sār-s dəx tiyyät kərədät timərwen n-tablalt.»

Isälan n-əttäxam d-terk teyəšše

²⁴ Issäxläy-tän-dd Ÿisa dəx tangalt tiyyät dəx-hasän-innä: «Təmmənəya n-Mässinäx, tänifäqqa d-ähaləs iyyän infärän əttäxam oläxän dəx-ašəkrəš-net.

²⁵ Ija ehäq, əttaşän äddinät xas, osä-dd ämiksän iyyän ašəkrəš wa n-älkäma äddomät ähaləs-ənnin, infär dəx-s erk idommän, iglä.

²⁶ Äsfäqqät-dd ašəkrəš wa n-əttäxam wa oläxän, oräw, tədwäl-dd dəx terk teyəšše edes-has.

²⁷ Ənhäyän inaxdimän n-mässi-s n-ašəkrəš terk teyəšše ta dd-tədwälät xas, osän-t, ənnän-as: «Mässi-näx, ajän wädden käyy əttäxam oläxän xas a tənfaräd dəx-ašəkrəš-näk, əndek siha s-dd-ha terk teyəšše ta t-hät ämära?»

²⁸ Inn'-asän: «A-di imojjan n-ere hi wärän irha.» Ənnän-as inaxdimän-net: «Adiš, nəlbəyet-tät-in?»

²⁹ Inn'-asän: «Aha-aha! Wär jem a-di, ed afäl tətäräm ad-hin-təlbəyäm terk teyəšše, ham miši n-ad-hin-təlbəyäm dəx älkäma.

³⁰ Äyyät-tän ad-ədwlän issənän-essän har äzzäman wa n-amili n-išəkraš, dihen, ad-ännäx i-wi tiləynen išəkraš, ad-dd-əlbəyän terk teyəšše s-tizarät, əjən-tät tikärrad, təzzar, särxən-tät, sədwən-ahi-dd dərat-a-wen älkäma, əjən-t dəx-əjänd-in.» »

Təmmənəya n-Mässinäx, a əndärrän a-s sänta, timyar

(Marqəs 4:30-32; Luqa 13:18-19)

³¹ Issäxläy-tän-dd dəx dərat-a-wen tangalt tiyyät, inn'-asän: «Təmmənəya n-Mässinäx, toläh d-temätäwt äddomät äwadəm dəx-ašəkrəš-net.

³² Temätäwt-ten-dəx, ənta a tojərät təmmətkit dəx-idommän mäšan, tədwäl-dd, täqqäl ahəšk ojärän tiyəššawen n-ašəkrəš iket-näsnät har zattän igdəd iskak-näsän dəx-iləktan-net.»

(Luqa 13:20-21)

³³ Issäxläy-tän-dd tangalt tiyyät dəx, inn'-asän: «Təmmənəya n-Mässinäx, toläh d-takmättet n-täzza təssärtäy tamäqt d-kərəd ännäfäxatän n-əjel n-älkäma i-ad-ikəf iket-net.»

(Marqəs 4:33-34)

³⁴ Tangalen a dəx-issäyra Ÿisa isälan-wi-dəx iket-näsän, wär t-illa a inna i-tamətte s-wädden tangalen a dəx-hasän-t-inna.

³⁵ Ämoos a-wen a ässiitbätän a-wa innä ännäbi n-Mässinäx iyyän, innä Mässinäx: «Ad-säxlyäx äddinät tangalen, äjəx isälan s-ad-dd-täxläk äddunya-dəx, ättunkälän.»

Älmäyna n-tangalt ta n-əttäxam d-terk teyəšše

³⁶ Ifäl Ÿisa tamətte, ijjäš ehän xas, əkkän-t-dd inəttulab-net, əttärän dəx-s ad-hasän-arr tangalt ta n-terk teyəšše.

³⁷ Inn'-asän: «Ägg-ägg-adəm ənta, a äddomen əttäxam wa oläxän,

³⁸ äddunya a-s ašəkrəš-net; əttäxam wa oläxän a-s aratän n-Təmmənəya n-Mässinäx, terk teyəšše a-s aratän wi n-Iblis.

³⁹ Iblis a-s ämiksän wa äddomen terk teyšše däx-ašəkrəš, amili n-išekraš a-s sämdo n-äddunya, änjälosän a-s imalayän n-ašəkrəš.

⁴⁰ Emmək-wen-däx s-dd-tatälbay terk teyšše, tämmädkä, tətwejär-in däx-efew, emmək-wen-däx a he-ijən ašäl wa d-tamänd äddunya.

⁴¹ Ašäl-en, ad-išəmmişəl Ägg-ägg-adəm änjälosän-net i-ad-hin-aləmän däx-Təmmənəya-net äddinät wi šinməsrəynen imidiwän-näsän d-wi tamašalnen a läbasän, ədkəlän-tän,

⁴² əjrən-tän-in däx-tahəst-i däx-tän wär mad-išləw ar tahäla, žiməkärkižän isenän fäl tämujrižt.

⁴³ Ašäl-en, äddinät wi oğädnen dat-Mässinäx, ad-fälla-sän äj Mässinäx ännur-net, əjən asməxməx wa täjj täfukt däx-Təmmənəya n-Abba-näsän.

Ere ilän timəzzujen s-islä, isäjdət!»

Wär t-illa a-s wädden tojär-t Təmmənəya n-Mässinäx

⁴⁴ Inn'-asän Ƴisa daḡ: «Təmmənəya n-Mässinäx, toläh d-əjänd n-orəx inbalän däx-ašəkrəš iyyän. Təgla tanfust har ašäl wa d-fälla-s oḡa ähaləs iyyän. A-wa-däx has-ja tedäwit, ikn'-e ufär i-ad-wär sār-s iləmməd äwadəm wäl' iyyän. Iglä ḡarät-a-wen, ättužžär-in a-wa ila iket-net i-ad-udabät akäraš n-ašəkrəš-en-däx däx-inbal orəx-wənnin-däx.»

⁴⁵ Oläs daḡ, inn'-asän: «Təmmənəya n-Mässinäx, toläh d-u-mamäla itammäxän i-timəxwanen n-tilällaten,

⁴⁶ ijrāw tiyyät təknaḡ əlləllu ḡas iglä, ättužžär-in a-wa ila iket-net, iqqäl-dd, ižžəns'-et.»

⁴⁷ Inn'-asän daḡ: «Təmmənəya n-Mässinäx, toläh d-tätart jārən iməhhuyya n-imānan däx-əjäns i-ad-sār-s dd-ärməsän tulaten n-imānan äjjootnen,

⁴⁸ təḡnäy tätart ḡas, əntäšän-tät-dd s-asälim n-aman, ad-biḡḡun imānan s-iiyän-iiyän, hak iyyän d-əzzənəf-net. Jän wi əfrānnen däx-deketän-näsän, jārən-in fälla-sän wi hasän wär iha älfäyda.

⁴⁹ A-wen-däx daḡ a madän-äj ašäl wa d-tamänd äddunya, a dd-asən änjälosän, əbdəwän imaḡdalän d-inälläbasän,

⁵⁰ əjrən-in inälläbasän däx-tahəst ta-däx tän-wär mad-išləw ar tahäla, žiməkärkižän isenän fäl tämujrižt.»

⁵¹ Issəstän Ƴisa inəḡḡulab-net ḡarät-a-wen, inn'-asän: «Ak a-wa hawän-ənnəx, təjrahäm-t meḡ?» Ənnän-as: «Əyya, nəjrah-t.»

⁵² Inn'-asän: «E d t-illäm älxalim n-Äḡḡawrät iknan afāham n-a-wa ämoosän isälän n-Təmmənəya n-Mässinäx, irḡa sār-sän, ad-has-iwwaḡ musnät äynayän fäll-wa ärəwän ila, afäl ija a-wen, ad-aläh d-abba n-əxewən dd-itakkäsän härätän äynaynen d-i ärəwnen däx-ijändän-net.»

Äsyārän käl-Nəširät ulhawän-näsän i-Ƴisa (Marḡəs 6:1-6; Luḡa 4:16-30)

⁵³ Issəmda Ƴisa tənna n-tangalen-tin-däx ḡas, ifäl dihen,

⁵⁴ ikkä taḡrəmt ta däx-idwäl. Issäḡra dihen däx-əhän n-äddin wa n-käl-Älyähud, äkunän äddinät iket-näsän däx-a-wa isaḡra, əqqälän-dd ḡas oran imawän, jannen: «Wa, əndek siha s-t-dd-ha təḡyuləma-ta-däx d-tikunen ti itäjj?

⁵⁵ Ajän wädden a-wa rure-s n-mənizye wa-däx nəzzäy? Wädden ma-s, Märyäma? Ayətma-s: Yaḡub, Yusəf, Simyon d-Hudd?

⁵⁶ Ajän wädden šätma-s da-däx t-əllänen jere-näx? ḡas əndek siha s-t-dd-iha a-wa-däx itäjj iket-net?»

⁵⁷ Jän-as a-wen-däx s-t-əzzayän asəkor, unjäyän sār-s omānän. Inn'-asän: «Ännäbi, wär t-illa edäḡ s-wädden ätiwäsämḡär däx-s ar däx-äkall-net d-ḡur-käl-əhän-net.»

⁵⁸ Igdäl-as iba n-immun-näsän ad-ɣur-sän äj tikunen äjjootnen.

14

Tamättant n-Exya wa n-Enəsselmäɣ (Marqəs 6:14-29; Luqa 9:7-9)

¹ Äzzäman-en-däɣ ad-dd-iwwäd mawmaw n-Ŷisa Harudəs wa n-ämänokal n-teje ta n-Galila.

² Issäɣrä-dd käl-əlxəkum-net, inn'-asän: «Ähaləs-wa-hi s-sälläɣ, Exya wa n-Enəsselmäɣ dd-olasän tanäkra jer-inəmmuttan, a-wen-däɣ a t-ikfän tärna n-tikunen ti itamašal.»

³ Innä Harudəs a-wen fäl-a-s ənta iman-net a ästärmäsän Exya, ij'-e däɣ-tišəm təzzar ij'-e däɣ-takärmüt, däɣ-təssəba n-Harudəyät ta n-hänne-s n-ənɣa-s Fəlibb däɣ-s ohäɣ Harudəs.

⁴ Äzzäman-en-däɣ ad-äsmäqqa Exya fäll-Harudəs, inn'-as: «Wär hak-xälal ad-tärkəbäd hänne-s n-ənɣa-k.»

⁵ Ad-itammäɣ ya Harudəs i-äsaru fäl t-issänɣa mäšan, äksuɖ tamətte ed iket-net tössan a-s Exya, ännäbi a ämoos.

⁶ Təgla tanfust har ašäl wa n-isəkta n-tiwit n-ämänokal Harudəs. Ašäl-en, däɣ-äzzäho wa ijän, təggäd-dd elle-s n-Harudəyät, ad-dalläl dat-imäjarän wi-dd-osänen; ijräz a-wen i-ämänokal.

⁷ Däɣ-tedäwit-net, iɣr'-et-dd, ijjäš-as ärkäwäl n-ad-tät-äkf a-wa däɣ-s mad-təttär, a ämoos-däɣ.

⁸ Təglä talyaɖt, təttär äddäbara däɣ-ma-s, təntäj-tät-dd ma-s, tənn'-as, änn'-as: «Ärheəɣ däɣ-k eɣäf n-Exya insa däɣ-azäwa.» Təglä təmawaɖt, ja isälan däɣ-ämänokal.

⁹ Ənxäsän iman n-ämänokal mäšan, äbas äddoobät uɣəl s-a-wa inna, ed ihäd-as s-ad-tät-äkf a-wa däɣ-s mad-təttär, a ämoos-däɣ, dat-imäjarän-net. Omär ɖarät-a-wen s-ad-itwəjj a-wa tärha.

¹⁰ Issəglä äwadəm wa inakkäɖän iɣäfawän n-käl-takärmüt wi länen s-tamättant, inkäɖ-dd eɣäf n-Exya,

¹¹ äwwäy-t-dd insa däɣ-azäwa; ikf'-e i-talyaɖt, täwwäy-t talyaɖt i-ma-s.

¹² Osän-dd inəttulab n-Exya ɖarät-a-wen, əɖkälän tafəkka-net, əzkän-tät; əkkän Ŷisa, jän däɣ-s isälan.

Səmmos afdän n-ähaləs wi äsyäwän Ŷisa (Marqəs 6:30-44; Luqa 9:10-17; Exya 6:1-14)

¹³ Əjjäšän isälan n-iba n-Exya Ŷisa ɣas, ifäl teje-ten-däɣ däɣ-turäft n-aman, ikkä tenere n-iman-net mäšan, əslän-t äddinät ɣas, fälän-dd iɣärman, älliilän asälim n-əjäns, əlkamän-as.

¹⁴ Izjär-dd Ŷisa turäft n-aman, inhäy tamətte-ta-däɣ täjjet has-dd-təlkämät ɣas, täɣ'-e tähanint-net, ad-däɣ-sän izizuy wi n-inaxyabän.

¹⁵ Ja takkäšt ɣas, ohäzän-t-dd inəttulab-net, ənnän-as: «Älyalim, tenere a nəha, ij'-anäɣ ehäd, səfəl iman-näk tamətte, ad-täkk tidbi-ti ohäznen žänš-dd a təkša.»

¹⁶ Inn'-asän Ŷisa: «Wär ämɣatärän s-ad-əkkən edägg. Un, šäksät-tän käwäned iman-näwän.»

¹⁷ Ənnän-as: «Wär nəttəf ar səmmosät tijəlwen d-əssin imänen.»

¹⁸ Inn'-asän: «Awəyät-ahi-dd a-wa təttäfäm.»

¹⁹ Omär ɖarät-a-wen s-ad-äqqaymən äddinät fäll-teyəšše, iɖkäl tijəlwen ti n-səmmosät d-imänen wi n-əssin, äjozäy isənnawän, ämmoy i-Mässinäɣ; äfräsfäräs

tijelwen, änkädnäkäd imānan tēzzar, ikfä a-wen-däx iket-net i-inēttulab-net, āzunān-t jer-äddinät.

²⁰ Eḱšän iket-däx-näsän har öyyewānän, äsdāwän-dd a-wa dd-tējläš tamētte, osän-t iḱnäy māraw deketän d-əssin n-tijelwen d-imānan.

²¹ Səmmos afdän n-āwadəm däx-wär äḱḱinnät tiḱeḱen wāla aratan a ikšän ašäl-wen-däx.

Rājjoš n-Ḷisa fäll-aman

(Marqəs 6:45-52; Exya 6:15-21)

²² Izzəlzäm Ḷisa ḱarät-a-wen inēttulab-net ujəš n-turäft ta n-aman i-ad-has-izarän s-efäyy n-əjānš wa iyyäḱän, ad-isaglä ənta tamētte.

²³ Issəglä tamētte ḱas, iwwän taḱaxt tiyyät, ad-itēddal Mässinäx. A-s toḱa tāfukt, wär dd-äqqima däx-edägg-ənnin-däx, ar ənta ḱas.

²⁴ A-s ija a-wen, turäft n-aman ta däx-əglän inēttulab täsisägdäh ejānš māšan, inkär-dd fälla-sän aḱu äwwiḱwäxän turäft, bähhälnät-as tinäzzämären siha d-siha.

²⁵ Igl' ehäḱ ḱas, ilkäm-asän-dd irjaš fäll-aman.

²⁶ Ənhäyän-t inēttulab, ikk'-en-dd irjaš fäll-aman ḱas, ärmäxän, ad-jannen: «Os'-anäx ämättänkul iyyän», ad-naḱḱāwän iḱäran.

²⁷ Ässewäl-asän šik, inn'-asän: «Medḱən, änsət ənniyät-nāwän, näkk a-wa; wär tärməxäm.»

²⁸ Iggäd-dd Bəḱrus däx-a-wen-däx, innä i-Ḷisa: «ÄḶxalim, kunta käyy a-wa, amär s-ad-käy-in-äkkäx, näkk-däx, ärjašäx fäll-aman.»

²⁹ Inn'-as Ḷisa: «Əyyāw!» Izjār-dd Bəḱrus turäft n-aman, ikkä-dd Ḷisa irjaš fäll-aman.

³⁰ Inhäy Bəḱrus əşşuhu n-aḱu fäll-əjānš ḱas, irmäx, əqqälän-t aman alämaḱ älwäqq-wen-däx, ad-isaxärat, ijanna: «Ya ÄḶxalim! Agəz-ahi.»

³¹ Irmäs-t-dd Ḷisa s-äfuss, inn'-as: «Təmmətkit ija immun-näk, ma itajjän äššäk däx-ulh-näk.»

³² Əjjäšän-dd turäft fäll-inēttulab wi iyyäḱnen ḱas, ibḱäd aḱu.

³³ Ənhäyän wi äqqimänen däx-turäft a-wen ḱas, ärkäxän data-s, ənnän-as: «Tidət-däx a-s käyy a-s Rure-s n-Mässinäx.»

Äzozäy Ḷisa imarhinän däx-teje ta n-Žännäšarät

(Marqəs 6:53-56)

³⁴ Täsjän turäft n-āman-näsän älwäqq-wen-däx däx-teje ta n-Žännäšarät.

³⁵ Əzzäyän-t käl-axrəm-en ḱas, ošälän, jän isälan däx-attayän-en, ad-sär-s dd-tiwəyän äddinät e d t-illäm ere ärhiinän.

³⁶ Laqqädän käl-axrəm Ḷisa däx-ad-tän-äyy, ad-äḱəsän kud-däx afär n-eräs-wäy-net, ed ere t-iḱäsän-däx, ad-izzəy.

15

Alkum i-agna

(Marqəs 7:1-13)

¹ Osän-dd käl-faris iyyäḱ d-härät däx-älḱulam n-Äḱḱäwrät dd-falnen Yärussälam Ḷisa,

² ənnän-as: «Mafäl tinməšrəyän inēttulab-näk i-agna wa hanäx-dd-oyyän imārawän-nänäx? Tattän wär-ässerädän ifassän-näsän s-əmmək wa s-t-ifräd agna-nänäx.»

³ Äwwežäb-asän Ḷisa, inn'-asän: «Ad-kāwän-səstənäx: kāwänəḱ-š, mafäl tinməšrəyäm i-alämär wa n-Mässinäx, tajjäm agna-nāwän jənnəj-s?»

4 Wädden Mässinäx innä:

<Səmyār ti-k d-ma-k>
innä daḡ:

<Ere äbodārān ti-s meḡ ma-s, adiš, ämmätet.>

5 Təssanām s-a-wen-däḡ iket-net māšan, iyyäd däḡ-wän, saḡren äddinät a-s äddoobät äwadəm ad-änn i-ti-s d-ma-s: <A-wa s-äsidiārhanäḡ ad-kāwän-ədhələḡ sār-s, jeḡ-t takute i-Mässinäḡ.> Ija ḡur-wän a-s ere innän a-wen-däḡ i-imārawän-net, ad-ābas t-iwar älxaqq-nāsän.

6 Ēnhəywät ḡas a-wa kāwän-išlän: təsbätṭälām-in a-wa inna Mässinäḡ, jām a-wa hawän-inna agna-nāwän däḡ-edägg-net.

7 Älmunafəḡän yaden! Tidət a-wa fälla-wän innä ännäbi Saya† a-s innä, innä Mässinäḡ:

8 <Tamətte ta-hi, idlay-net ḡas

a-s hi-tässiimyār

ulh-net, ujəj-ahi;

9 Älḡibadät-wa hi-täjj d-tikutawen ti hi-täjj,

mäləyāḡna ḡas

ed a-wa säḡren fäll-ismawän n-Mässinäḡ,

wär ämoos ḡas ar färəḡän dd-äḡtasän i-iman-nāsän.> »

*A-wa isamāḡasän ägg-adəm
(Marḡəs 7:14-23)*

10 Iḡrā-dd ḡisa tamətte s-iman-net ḡarät-a-wen, inn'-as: «Säjdät, təjrahäm a-wa hawän-janney:

11 wädden a-wa itajjäšän emm n-ägg-adəm a t-isamāḡasän, a-wa dd-itəffalän ammas n-ulh-net ijänna s-emm-net a t-isamāḡasän dat-Mässinäḡ.»

12 Ohäzän-t-dd inəṭṭulab-net, ənnän-as: «Käyy ya, a-wa tənned, ikma käl-faris hullan.»

13 Inn'-asän ḡisa: «E d t-illām emäḡt s-wädden Abba-nin-i ihän išənnawän a t-äddomen, ilkam, ad-hin-ättälbäy.

14 Äyyät käl-faris d-iman-nāsän, olähän ḡas d-imalwayän däḡalnen; emədderyəl ya ilwayän amidi-net, ejaḡäl ḡas a əkkan issənän-essän däḡ-anu.»

15 Iggäd-dd Bəṭrus, inn'-as: «Fassär-anäḡ tangalt-ta-däḡ jed. »

16 Inn'-asän ḡisa: «ḡas kāwəneḡ-däḡ, wär t-illa a təjrahäm härwa?

17 Ajän wär təjrehäm a-s äsink esäk? A-wa isuk äwadəm emm-net, täsa-net ḡas a itakk, ijär-t-in ḡarät-a-wen däḡ-täkoyt

18 māšan, mäjräd wa dd-izajjārän emm n-äwadəm, ulh-net a dd-itəffal, ənta-den-däḡ a-wa t-isamāḡasän dat-Mässinäḡ

19 fäl-a-s ulh n-ägg-adəm, a dd-itəffal erk ənniyät, iji n-iman, əzzəna, iba n-täkrakidṭ, tikra, tajuhe n-bahu, təkkuḡərə.

20 Ēntäneḡ-den-däḡ härätän wi samāḡasnen äwadəm, wädden tetäte wär-ässeräd ifassän-net.»

*Äzozäy ḡisa elle-s n-tamäḡt tiyyät
(Marḡəs 7:24-30)*

21 Ifäl ḡisa edägg-en ənta d-inəṭṭulab-net ḡas, ikkä teje ta hän iḡärman wi n-Tir d-Säyda.

† 15:7 15:7 A-wa ännäbi dd-äzzarän i-ḡisa, äloläy däḡ-isälän-net əssayät timad n-awätay dat-tiwit-net.

²² Ill'-ee dihen-däx a-s šik-däx, tamädt tiyyät ila äkall wa n-Xäna da-däx t-dd-tosät, ad-t-laqqäd, saḡarat, jann'-as: «Älḡalim! Ya Ägg-Dawəd, aḡen-ahi tähanint; elle-ḡ tällubbäd, issəkn'-et alšin wa tät-ihän aḡäna.»

²³ Wär t-illa a has-inna ḡisa. Eḡḡädän-dd sär-s inəṭṭulab-net, ənnän-as: «Säfel-anäḡ tamädt-ta-däx, täḡḡäf-anäḡ, e-s nəkka-däx, täseḡärät ɗara-näḡ!»

²⁴ Inn'-asän ḡisa: «Näkk tamətte ta n-käl-Işrayil-i toolähät d-tihatten ässujjälneen a-s hi-dd äšmašäl Mässinäḡ. A-wa säl əntäneɗ, wär hi-sär-s-dd-äšmašäl.»

²⁵ Mäšan hakd a-wen-däx, təkk'-e-hi-dd tamädt, tärkäḡ data-s, tənn'-as: «Älḡalim, əkkəs-ahi tekäriɗt.»

²⁶ Äwweḡäb-as ḡisa, inn'-as: «Wär-änhäjja ad-dd-ikkəs äwadəm amənsi daw-aratän, ijär-t-in i-iyäɗan?»

²⁷ Tənn'-as tamädt: «Älḡalim, tidət mäšan, a-wen wär-ikkəs a-s afäl älwäqq wa d-itätt mässi-s n-ehän, äddooben iyyäɗan ad-äkkämen a-wa ititrəkkin.»

²⁸ Ja mäjräd-wen-däx ḡas, inn'-as ḡisa: «Tamädt! Immun-näm, tidət-däx a-s i mäqqärän; äjet a-wa təttäräd.» Təzzäy elle-s däḡ-tamäzäyyat-ten-däḡ.

Äzozäy ḡisa imarhinän äjjootnen

²⁹ Ifäl ḡisa teje-ten-däx ḡas, ikkä asälim n-əjäns wa n-Galila, iwwän dihen taɗayt tiyyät äqqima fälla-s.

³⁰ Ekkän-t-dd äddinät äjjootnen äwwaynen inəbdan d-iməddorḡal d-inaxyabän d-äddinät s-əkradän ilsawän-näsän d-imarhinän äjjootnen, əssənsän-tän daw-iɗarän-net; äzozäy-tän iket-däḡ-näsän.

³¹ Äkunän äddinät däḡ-a-wa ija ed hannäyän a-s, wi s-käla əkräsän ilsawän-näsän, tamäjrädän; inaxyabän, tazḡäyän; inəbdan, rajjäsän; iməddorḡal, hannäyän. Tənhäy tamətte a-wen ḡas, ad-t-timəl, janna: «Təmmal i-Emäli wa n-Işrayil.»

Äsyäwän ḡisa əkkoḡ afdän n-äwadəm (Marḡəs 8:1-10)

³² Ikkäs-dd ḡisa inəṭṭulab-net s-takše, inn'-asän: «Naqq'-ahi tähanint n-tamətte-i-däḡ; a ilan käraɗ išilan, təlkam-ahi, äbas əṭṭafän äddinät a əksän, wär-äddobəḡ ad-tän-säḡläḡ älluzän s-əmmək-wa-däḡ, ad-hasän-indär ad-hin-awəɗän ihänan-näsän fäl iba n-äššahät.»

³³ Ənnän-as inəṭṭulab-net: «Əndek diha d-mad-nəjrəw tijəlwen äššikkšänen tamətte jat əjut-wa-däḡ däḡ-tenere-ta-däḡ?»

³⁴ Inn'-asän: «Maniket tijəlwen təṭṭäfäm?» Ənnän-as: «Əssayät, nəṭṭaf ɗay härät n-imänen.»

³⁵ Äsḡäyma ḡisa tamətte iket-net,

³⁶ iɗkäl ɗarät-a-wen tijəlwen ti n-əssayät d-a-wa t-əkfan däḡ-imänen, ämmoy i-Mässinäḡ, äfräsfäräs annin-däḡ iket-net təzzar, ikf'-e i-inəṭṭulab i-ad-t-uḡanän jer-äddinät.

³⁷ Təkša tamətte ta təllät dihen-däḡ hundäḡ har təyyəwän iket-däḡ-net, äsdäwän-dd inəṭṭulab a-wa dd-əjläsän äddinät, osän-t iɗnay əssa deketän.

³⁸ Ekkəḡ afdän n-äwadəm däḡ-wär äɗdinnät tiɗeɗen d-aratän a ikšan ašäl-wen-däḡ.

³⁹ Issəḡlä ḡisa tamətte ɗarät-a-wen təzzar, ijjäš turäft n-aman, ikkä teje ta n-Magadan.

16

*Edäwänne wa ija ḡisa d-käl-äddin
(Marḡəs 8:11-13; Luḡa 12:54-56)*

¹ Ašäl iyyän, osän-dd härät dāḡ-käl-faris d-käl-sadus Ḳisa, jän-as asəstan dāḡ-otasän irrum-net, i-ad-əjrəwän əsarü fäl t-əssədlämän, ənnän-as: «Aj data-nāḡ iji n-Mässināḡ hanāḡ-issətbätän a-s tidət-dāḡ a-s Mässināḡ a kāy-dd-āšmašälän.»

² Äwwežäb-asän, inn'-asän: [«Ajän wädden e-d täbok täfukt i-əjäḍäl har tənḡäyäm a-s šäggaḡ, ad-tənnəm: <Ašəkka, wär-e iwət ajənnä.>

³ Afäl äffaw har tənḡäyäm ajənnä ikannä-dd, ad-tənnəm: <Ašäl-i, ad-iwət ajənnä, ənhəywät-ak, käwal-dd.> Käwäneḍ-i s-e-d təkyaḍäm išənnawän, ad-təlməḍäm a-wa dd-imälän, mafäl hawän-indar ad-tāḡrəm išmal n-äzzämanän wi jänen, təfhəməäm älmāḡna-näsän?]

⁴ Käl-əzzurəyät-ta-dāḡ, tenälläbäst n-temäznit, wär təmmāḡ ḡas ar i-ad-ətwəjjən ijitän n-Mässināḡ data-s mäšan, təlməḍet a-s wär dāḡ-s ilkem iji n-Mässināḡ säl wa n-ännäbi Yunəs.» Inn'-asän Ḳisa a-wen ḡas, ifäl-tän, iglä.

Təmmətkit n-immun n-inəṭṭulab (Marqəs 8:14-21)

⁵ Ijlāy Ḳisa ənta d-inəṭṭulab-net ejänš s-ašrut wa iyyäḍän. Əglan fäll-əjäns-en-dāḡ a-s dd-əktän inəṭṭulab-net a-s wär-əwweyän äzzad dāḡ-tijəlwen.

⁶ Əjlāyän ejänš ḡas, inn'-asän Ḳisa: «He käwäneḍ! Agəzät iman-nāwän dāḡ-täzza ta n-käl-faris d-käl-sadus.»

⁷ Inn'-asän Ḳisa a-wen ḡas, ad-tinmənnin jer-iman-näsän: «A-wa, a-wa dāḡ s-wär nəwwey tijəlwen a fäl hanāḡ-itajj mäjräd-wa-dāḡ.»

⁸ Ilmäḍ Ḳisa ḡur-iman-net a-wa dāḡ-zinəzjumän, inn'-asän: «Mafäl tinmənnim? <A-wa, a-wa dāḡ s-wär nəwwey tijəlwen a fäl hanāḡ-itajj mäjräd-wa-dāḡ>, təmmətkit ija immun-nāwän.

⁹ Adiš, käwäneḍ har ämära-dāḡ, wär t-illa a təjrahäm? Ajän tətəwäm-in səmmosät tijəlwen-ti täzunäm i-səmmos afdän n-ähaləs? Maniket deketän dd-täsdāwäm dāḡ-a-wa dd-təjläš tamətte?

¹⁰ Adiš tətəwäm-in əssayät tijəlwen-ti s-äsyāwänāḡ əkkoz afdän n-ähaləs, maniket deketän dd-təjläš tamətte?

¹¹ Ma hawän-igdalän ad-təfhəməäm a-s wädden tijəlwen a dāḡ-hawän-ässewälāḡ? A hawän-ənnəḡ: <Agəzät iman-nāwän dāḡ-täzza ta n-käl-faris d-käl-sadus.> »

¹² Inn'-asän Ḳisa a-wen ḡas, əfhämän a-s wädden isälan n-täzza ta n-tijəlwen a dāḡ-hasän-ässewäl, änn-ak, ämmijräd-asän dāḡ-isälan n-ad-agəzän iman-näsän dāḡ-a-wa säḡren käl-faris d-käl-sadus.

Tajuhe ta ija Bəṭrus dāḡ-isälan n-Ḳisa (Marqəs 8:27-30; Luqa 9:18-21)

¹³ Ikkä Ḳisa ḍarät-a-wen aḡrəm s-itawänna Qäyşära wa n-Fəlibb. Dihen-dāḡ ad-issəstän inəṭṭulab-net, inn'-asän: «Ma jannen äddinät, mi ämoos Ägg-ägg-adəm?»

¹⁴ Ənnän-as: «Iyyäḍ jannen: käyy a-s Exya wa n-Enəsselmāḡ; iyyäḍ jannen: käyy a-s ännäbi Ḳəli; iyyäḍ faw a jannen: käyy a-s ännäbi Yirmiya† meḡ iyyän dāḡ-ännäbitän dd-olasän uḡəl.»

¹⁵ Inn'-asän: «Käwäneḍ-š, ma tənnäm, mi ämoosäḡ?»

¹⁶ Iggäd-dd Bəṭrus, inn'-as: «Käyy a-s Älmasex wa n-Rure-s n-Mässināḡ-i iddärän.»

¹⁷ Inn'-as Ḳisa: «Simyon ägg Exya, tənḍəḍ-ak ed isälan wi s-iket tän-jed, wädden ad-dd-təkkasäd dāḡ-eḡäf-näk, Abba-nin-i hän išənnawän a hak-tän-dd-äsnäfalälän.

¹⁸ Näkk daḡ, ənnəḡ-ak: isəm-näk Bəṭrus,† ässiilmädāḡ-käy a-s fäll-tāhünt-ten-dāḡ, ad-mad-ädyäḡ älkänisät-in s-älaxärät wäla Iblis, wär fälla-s mad-ikrəš ašäl;

† 16:14 16:14 A-wa ännäbi dd-äzzarän i-Ḳisa, äloläy dāḡ-isälan-net säḍisät timaḍ n-awätay dat-tiwit-net.

† 16:18 16:18 Älmāḡna n-isəm-net dāḡ-Tälyunanit: Tähünt.

¹⁹ ad-käy-äkfäx isyar n-Təmmənəya n-Mässinäx, a təgdäläd fäll-äröri n-äkall, ad-itwəgdəl dāx-išənnawän, a täqbaläd fäll-äröri n-äkall, ad-itwəqbəl dāx-išənnawän.»

²⁰ Äsmähäd Yisa dərät-a-wen s-ässhät dāx-inəttulab-net i-ad-wär-ənnen i-äwadəm wäl' iyyän a-s ənta a-s Älmasex.

Issəlmäd Yisa inəttulab-net s-taməttant-net d-tanäkra-net
(Marqəs 8:31-9:1; Luqa 9:22-27)

²¹ Yur-ašäl-wen-dāx, ad-issəntä Yisa asəlmad n-inəttulab-net a-s ilzam-t ad-äkk Yärussäläm, inhəy dāx-s tersəmmawen äjjootnen jer-ifassän n-inušämän wi n-Işrayil d-imänokalän n-käl-tikutawen d-älxulam n-Ättäwrät; ad-əjön iman-net mäšan, ašäl wa s-kärađ dərät taməttant-net, ad-dd-inkär jer-inəmmuttan.

²² Ij'-asän Yisa mäjräd-wen-dāx ɣas, ikkäs-t-dd Bətrus s-takše, ad-itikləwləw fälla-s, ijann'-as: «Älxalim, ogəz-käy Mässinäx! A-wen ya, wär t-illa əmmək s-käy-irmäs.»

²³ Ikna Yisa akäyad dāx-Bətrus, inn'-as: «Šənkəš fäll-i Iblis-wa, käyy əssəbab n-anməšri a hi-təmoosäd ed inəzjam-näk, i n-dägg-adəm wädden i n-Mässinäx.»

Alkum i-Yisa Älmasex
(Marqəs 8:34-9:1; Luqa 9:23-27)

²⁴ Inna Yisa dərät-a-wen i-inəttulab-net: «Ere irhän alkum-hahi-dāx, adiš, iksənet iman-net, äjet fäll-taməttant šund ta n-tajəttewt təzzar, ilkəmet-ahi.

²⁵ Wa wärän itəttär ar əmmək s-ogəz iman-net dāx-äddunya-ta-dāx, ad-ifut dāx-älžännät mäšan, wa irđän äfota dāx-iman-net dāx-äddunya-ta-dāx, dāx-äddimmät-in, ad-ijjəš älzännät.

²⁶ Ma s-infa ägg-adəm ad-irbäx äddunya iket-dāx-net, a-s ija a-wen, äfota dāx-älaxärät? Ajän ma t-illan s-äddoobät äwadəm ad-t-äkf i-ad-sär-s ixləs iman-net dāx-temse?

²⁷ Ašäl wa dd-mad-iqqəl Ägg-ägg-adəm dāx-älxurmät n-Abba-net äddeew d-änjəlosän-net, ašäl-en, hak äwadəm d-a-wa has-jän imojjan-net.

²⁸ Ässiilmädäx-käwän a-s han-käwän äddinät əbdadnen diha-dāx, wär-e iba, wär-ənheyän Ägg-ägg-adəm ijjaš Təmmənəya-net.»

17

Tihusay n-älxurmät n-Yisa Älmasex
(Marqəs 9:2-13; Luqa 9:28-36)

¹ Sädis išilan dərät a-s inna a-wen-dāx, iyrä-dd Bətrus d-Yaqub d-Exya wa n-ənḡa-s n-Yaqub s-edes, ikka dār-sän tađaxt tiyyät šəjreet.

² Ellan-t dihen-dāx a-s ijjaš data-sän ini äynayän, ämmuttäy, äsmäxmäx idəm-net šund täfukt, jän-dd imälsan-net təmölle ta n-ännur äsimäxmäxän.

³ A əndärrän ännäbi Mosa d-ännäbi Yəli da-dāx hasän-dd-änfalälnen, falän-dd išənnawän, ad-tamäjrädän d-Yisa.

⁴ Iggäd-dd Bətrus, innä i-Yisa: «Älxalim, ufa ad-nəzzäx ɣas diha-dāx, kunta tärđed s-a-wen, ad-əkrəsäx kärađ ihəktan: wa-näkk, wa n-Mosa d-wa n-Yəli.»

⁵ Härwa-dāx ämmiijräd a-s, tejäräkt tiyyät täsimäxmäxät da-dāx tän-dd-təlsät s-tele-net, ijmäd-tät-dd eməsli innän:

«A-wa Rure-x wa əkneex tärha, ənta a dāx-äsriwän iman-in, säjdät-as!»

⁶ Eslän inəttulab i-eməsli-wen-dāx ɣas, hän-dd äbbunbəyän iket-dāx-näsän a-wa-dāx hasän-təja tärəmməxt.

⁷ Ikk'-en-dd Yisa, issənsä ifassän-net fälla-sän, inn'-asän: «Wär tərmexäm, ənkarät-dd.»

⁸ A-s dd-eḍkälän idmawän-näsän, wär t-illa ere hannäyän ar Үisa.

⁹ Ätrarän-dd taḍayt җas, inn'-asän Үisa: «Wär jem isälan n-a-wa hawän-dd-änfalälän ašäl-i-däx i-äwadəm wäl' iyyän, har ašäl wa dd-mad-inkär Ägg-ägg-adəm jer-inəmmuttan.»

¹⁰ Ҥssöstänän-t ḍarät-a-wen, ənnän-as: «Mafäl jannen älyulam n-Äṭṭäwrät a-s ännäbi Үəli a ilan s-ad-dd-ass təzzar, išrey-t-dd Älmasex?»

¹¹ Äwwežäb-asän, inn'-asän: «Tidət, ännäbi Үəli a ilan s-a-dd-ass, isəssiḡəd härät iket-net,

¹² mäšan, ässiilmädäx-käwän a-s ännäbi Үəli, äru dd-osa, äkkuddälän-t dägg-adəm, jän-as a-wa s-ärhän. A-wen-däx has-jän a-s ilkam daḡ, ad-t-əjən i-Ägg-ägg-adəm.»

¹³ Inn'-asän a-wen җas, əfhämän inəṭṭulab a-s Exya wa n-Enəsselmäx a-s hasän-iha ti-net.

*Äzozäy Үisa alyaq n-amälšon
(Marqəs 9:14-29; Luqa 9:37-43a)*

¹⁴ Älwäqq wa dd-iqqäl Үisa d-inəṭṭulab-net tamətte, ikk'-e-hi-dd ähaləs iyyän, irkäy data-s a t-ilaqqäd, ijann'-as:

¹⁵ «Älyalim, aḍən tähanint i-rure-ḡ, təjraw-t tašäkärkärät t-saknet aḡäna hullan. E-d t-tärmäs, ad-itidəw däx-efew, itidəw däx-aman dehiyyän.

¹⁶ Äwwäyäx-t-dd s-inəṭṭulab-näk mäšan, indär-asän ad-t-zuzəyän.»

¹⁷ Innäd-dd Үisa ḍarät-a-wen s-inəṭṭulab-net, inn'-asän: «Ya əzzurəyät-i-däx wärät tomen s-Mässinäx, tänimäšräy-as, hundäx har əmme əllex jere-wän, əšbaräx-käwän? Awəyät-ahi-dd alyaq.»

¹⁸ Os'-e-hi-dd alyaq, äsmähäd Үisa däx-alšin i-ad-t-izjär; izjär-t, izzäy ässaḡät-wen-däx.

¹⁹ Ҥkkäsän-dd inəṭṭulab ḍarät-a-wen Үisa s-ässaxät d-wär җur-s t-illa äwadəm s-takše, ənnän-as: «Alšin-wənnin-hi, mafäl hanäx-indär ad-t-nəkkəs däx-alyaq?»

²⁰ Inn'-asän: «Təmmətkit-i ija immun-näwän a hawän-igdälän s-a-wen; ənnar wadden a-wen, ässiilmädäx-käwän a-s afäl ogdäh immun-näwän d-temätäwt ta tojärät təmmətkit däx-idommän har tənnäm i-aḍax-wa-däx: <Haan däx-edägg wa hed, təddəkäd dihen>, ad-äj a-wa has-tənnäm; ad-äbas t-illa fäw a hawän-indarän. [

²¹ Alšin daḡ šund wa-hi, wär t-itəkkəs ar tamädilt n-Mässinäx d-äzum.]»

*Äsihe wa s-əssin d-itajj Үisa isälan n-tamättant-net d-tänäkra-net
(Marqəs 9:30-32; Luqa 9:43-45)*

²² Älwäqq wa dd-iqqäl Үisa d-inəṭṭulab-net teje ta n-Galila, inn'-asän: «Ägg-ägg-adəm, išwar ättermäs, ijješ ifassän n-ägg-adəm,

²³ ad-əjən iman-net mäšan, ašäl wa n-käraḍ, ad-dd-inkär jer-inəmmuttan.» Ҥnxäsän iman n-inəṭṭulab a-s hasän-innä a-wen-däx.

Isälan n-tiwse

²⁴ Ijjäš Үisa d-inəṭṭulab-net taḡrəmt ta n-Qäfärnaxum җas, osän-dd inarmasän n-tiwse n-ehän n-ämudd wa mäqqärän Bəṭrus, ənnän-as: «Ajän älyalim wa-näwän, wär-ihəkk tiwse ta n-ehän n-ämudd wa mäqqärän?»

²⁵ Inn'-asän Bəṭrus: «Ihakk'-et lab.» Ijjäš-dd Bəṭrus ehän fäll-Үisa җas, iššəšwär-as Үisa, issöstän-t, inn'-as: «Ma torded Simyon, mi ilan s-ad-itəzzal tiwse i-imänokalän n-äddunya: ak iməjarän meḡ käl-äkall a lanen s-ad-hasän-əzəlän tiwse?» Inn'-as Bəṭrus: «Iməjarän.»

²⁶ Inn'-as Үisa: «Adiš käl-äkall, wär tän-təlzem.

²⁷ Ämära, i-ad-wär näqqen iğafawän n-äddinät n-ehän n-ämudd wa mäqqārän rammäsnen tiwse, äkk ejänš, tərmešad-dd dāğ-s emän iyyän, tarəd emm-net, ad-dāğ-s tøjrewäd ärriyal n-azrəf, tökkəsät-t-dd, təzləd fälla-nāğ näkk d-käyy.»

18

Tārha n-mijraw

(Marqəs 9:33-37; Luqa 9:46-48)

¹ Ohäzän-dd inəttulab Ƴisa älwäqq-wen, ənnän-as: «Ma ämoos äwadəm wa ojārän dāğ-Təmmənəya n-Mässināğ?»

² Iğrā-dd Ƴisa ara əndärrän s-iman-net, ij'-e jere-sän,

³ inn'-asän: «Ässiilmädāğ-käwän a-s a tökkäsäm wär tutabäm, taləhəm d-aratän, xāram-awän ujəš n-Təmmənəya n-Mässināğ.

⁴ Ere wa äsräsän iman-net har aläh d-ara-wa-dāğ, ənta a-s wa ojārän dāğ-Təmmənəya n-Mässināğ;

⁵ ere dağ wa äsbälälän ara šund wa-dāğ, dāğ-äddimmät-in, näkk a äsbäläl.»

Wär jem a he-isiðəwän äwadəm dāğ-abäkkad

(Marqəs 9:42-48; Luqa 17:1-2)

⁶ «Aratän dağ wi sār-i omännen, ere hasän-ämoosän əssəbab n-tanməšrayt-dāğ, äwadəm-en, iššäm-as-in, ad-tətwäqqən təhünt ta mäqqārät s-itəzzad älkäma dāğ-err-net, itwəjar-in dāğ-ider n-əjärew wa səmmän, əksən-t aman.

⁷ Tamäskoyt äddunya dāğ-təssəba n-tinməšrayen ti dāğ-s tajjänen fäl-a-s, wär t-illa əmmək fäw s-mad-täqqayəm äddunya-ta-dāğ wär dāğ-s änmäšräyän äddinät, mäšan, amäskoy äwadəm wa madän-umas əssəbab n-tanməšrayt-ten-dāğ.

⁸ Käyy, kunta äfuss-näk meğ ađär-näk a käy-isifun abäkkad, adiš, ənkäd-t-in, tøjred-t-in fälla-k härwa wär tämešäläd abäkkad-wen-dāğ, ed uf'-ak, ad-təjjəšäd älzännät jeed äfuss, meğ ađär, uhən leed əssin ifassän-näk d-əssin idarän-näk, tətwejaräd-in dāğ-efew wa s-härkuk ahijäljäl;

⁹ kunta dağ tiğt-näk a käy-isifun abäkkad, adiš, kukkərət-tät-dd, tøjred-tät-in fälla-k härwa wär tämešäläd abäkkad-wen-dāğ, ed uf'-ak, ad-təjjəšäd älzännät jeed tiğt, uhən ad-leed sanatät tiğtawen, tətwejaräd-in dāğ-žohännäma, temse ta s-härkuk təhijäljäl.

¹⁰ He käwäned! Wär läkkähät wäl' iyyän dāğ-aratän-win-dāğ ed ijmad-t äššäk a-s əbdadän änjələsän-näsän hak ässağät dat-Abba-nin-i ihän išənnawän i-ad-tän wär-itəđdis härät. [

¹¹ Ägg-ägg-adəm, osä-dd i-ad-ixləs äddinät wi ässujälnen.]»

Isälan n-tehäle ta tässujälät

(Luqa 15:3-7)

¹² Inn'-asän Ƴisa darät-a-wen: «Ad-käwän-səstənāğ: ma tənnäm? Kunta ila äwadəm temede n-tehäle, har dāğ-snät tässujäl tiyyät, ma he-äj? Wädden ad-äyy ti n-təzzayät timərwen d-təzzayät əfradnät fäll-tidayen, isəssəjjəl ta hin-ođän?

¹³ Afäl-tät dd-ijrəw, ad-äj tedawit tojarät ta ija a-s ila ti n-təzzayät timərwen d-təzzayät wären ässujäl.

¹⁴ Emmək-wen-dāğ dağ a-s mad-äddawät Abba-nawän-i ihän išənnawän ed wär-irha fäw ad-iba wäl' iyyän ɣas dāğ-aratän-net.

Isälan n-tenäšše jer-imumənän dāğ-älkänisät

(Luqa 17:3)

¹⁵ Afäl käy-ıdlām äñña-k, äkk'-e, səlmədäd-t s-a-wa hak-iğšād jere-wän əssin-ewän ɣas. Afäl hak-äsjad, adiş jed-t dāɣ-tabarāt ta tolāɣāt, wār t-illa daɣ a ıdasän temıdt-nāwän

¹⁶ māşan, afäl unjäy s-asjed-hak, əqqəl-t-dd täddewäd d-āwadəm, meɣ əssin, dāɣ-təssəba n-ad-äjjayhän äddināt i-a-wa itawännen iket-net ed <Härāt iket-net, ufa ad-ıla sänatāt meɣ kərədāt tjuhawen.>

¹⁷ Afäl jed a-wen-dāɣ uhən-dāɣ har ämära-dāɣ, unjay s-asjed-hawän, sərrəwrəw-as s-älkänisät. Afäl has-təmməjräd älkänisät har unjäy s-asjed-has, umaset data-k şund änāzzalim n-amäjar, meɣ şund änarmas n-tiwse.

¹⁸ Äsidätteɣ-awän a-s a-wa təkrdäm fäll-ārori n-äkall-i-dāɣ, ad-itwəkrəd aşäl wa ilkämän, a-wa toräm daɣ fäll-ārori n-äkall-i-dāɣ, ad-amar daɣ aşäl wa ilkämän.

Tartit dāɣ-tamädilt n-Mässināɣ

¹⁹ Ässiilmädäɣ-kāwän daɣ a-s fäll-ārori n-äkall-i-dāɣ, edägg dāɣ-änmərđän əssin dāɣ-wän fäll-talɣa, a tämoos-dāɣ, har dälän Abba-nin-i ihän işənnawän, ad-äj a-wa dāɣ-s əttārän

²⁰ fäl-a-s edägg iket-net dāɣ-äzzimmäɣän əssin, meɣ kərəd inəttulab-in, dāɣ-äddimmāt n-isəm-in, əlley jere-sän.»

Tenäşşe d-iba-net

²¹ Ohäz-t-dd Bətrus älwäqq-wen, inn'-as: «Äɣalim! Har maniket ihändäggan d-hi-təwar tenäşşe i-äñña-ɣ hi-ıdallämän? Ak, ajän əgdähän əssa ihändäggan?»

²² Inn'-as ɣisa: «Äbo, wār-ənney har əssa ihändäggan, a hak-janneɣ, naşş'-as har əssayāt timərwen janen əssa inədfusän.»

²³ Issäɣläy-tän ɣisa tangalt, inn'-asän: «Təmmənəya n-Mässināɣ, tänifaqqa d-ämänokal dd-issäɣrän äddināt wi irwäs i-ad-has-siđenən a-wa tän-irwäs, əzəlän-as.

²⁴ Han isälan n-a-wen-dāɣ a-s dd-ittəlway änaxdim-net iyyän irwas azrəf-i-dāɣ äjjen.

²⁵ Māşan ma n-əmmək! Indär-as ad-izəl azrəf-wen-dāɣ ɣas, omär mäs-si-s s-ad-hin-änş ənta d-hänne-s d-aratän-net d-a-wa ıla dāɣ-ilalän iket-net i-ad-inmiwəđ ənta d-ehäre-net.

²⁶ Isl' änaxdim i-a-wen ɣas, oşäl s-mäs-si-s, irkäɣ dat-mäs-si-s, ad-t-ılaqqäd, ijann'-as: «Ya mäs-si-ɣ, əşbär fäll-i tene-ta-dāɣ, təkfed-ahi täqqän täynayāt i-ad-hak-əzələɣ ehäre-näk iket-dāɣ-net.»

²⁷ Tänyä tähanint-net mäs-si-s ɣas, äsdärfät, inş'-as-in a-wa t-irwäs iket-net.

²⁸ Māşan, diha-dāɣ dd-izjār änaxdim-ənnin-dāɣ fäll-mäs-si-s, ad-ämmoqqäs d-ıyyän dāɣ-imidiwän-net dār-ännixdäm irwas härāt n-azrəf, äkbättät-t s-täkorsäyt, oɣay-as, ijann'-as: «Zəl-ahi ehäre-in wa käy-ihän.»

²⁹ Irkäɣ-as amidi-net, ad-t-ılaqqäd, ijann'-as: «Şbär fäll-i, ad-hak-əzələɣ ehäre-näk.»

³⁰ Unjäy s-ad-has-isəjed, ilway-t, äswäj'-e dāɣ-takärmüt i-ad-tät-iha har has-izəl a-wa t-irwäs iket-net.

³¹ Ənhäyän inaxdimän wi iyyäđnen dār-ännixdäm a-wa ija amidi-näsän ɣas, əknän iman-näsän tissant, əglän, jän isälan n-a-wa ijän iket-net dāɣ mäs-si-sän.

³² Issäɣr'-e-hi-dd mäs-si-s, inn'-as: «Käyy änaxdim n-enälläbäs a tämoosäd! Ajän wädden tölädäd-ahi ɣas, oyyey-ak-in a-wa käy-ärwäsäɣ iket-net.

³³ Adiş, ma hak-ıgdälän, ad-tađenäd tähanint şund ta hak-ođänäɣ i-amidi-näk?»

³⁴ İjjäş-t ađkär hullan fäll-akli-net-wen-dāɣ, issäɣrā-dd gärditän-net i-ad-t-in-əjarän dāɣ-takärmüt, äqqayəm ihannäy dāɣ-s aɣäna har izəl a-wa t-irwäs has-in-oyya ihənnin iket-dāɣ-net.»

³⁵ Innä daɣ darāt-a-wen: «Əlmədät a-s şund a-wen-dāɣ a hawän-mad-äj Abba-nin-i ihän işənnawän, afäl wār tənəmənşim jer-ıman-nāwän s-ulh imdan.»

19

Aməzzi d-iba-net
(*Marqəs 10:1-12; Luqa 16:18*)

¹ Issəmdä Yisa tənna n-isälan-win-däx ças, ifäl teje ta n-Galila, ikkä tidbi ti hin-ellanen i-ejänš wa n-Çurdəni däx-teje ta n-Älyähudəyät;

² əlkämän-as-dd äddinät äjjootnen, äzozäy däx-sän wi ärhinnen.

³ Däx-a-wen-däx ad-dd-əbdädän käl-faris iyyäd data-s, orämän-t s-asəstan däx-innä a wärän itətwənn, ənnän-as: «Däx-a-wa innä alämär-nänäx, ak ajän xälal i-ähaləs, ad-izəmməzzəy hənne-s fäl-äsaru, a ämoos-däx?»

⁴ Äwwežäb-asän, inn'-asän: «Adiš kəwəneç wär täxrem däx-əlkəttab n-Mässinäx edägg wa däx-ätwänna a-s:

<S-tizarät a-s dd-ixläk Ämaxlak äddunya, ähaləs d-tamädt a dd-ixläk.> »

⁵ Inn'-asän daç:

« <Təssəba n-a-wen-däx a fäl mad-ifəl ähaləs ti-s d-ma-s, asäx d-hənne-s, umasän fäll-əssin-essän, tiyyät taçəssa.

⁶ Ad-äbas ämoosän əssin äddinät, ämoosän tiyyät taçəssa.>

A-wen-däx a fäl, a-wa osäx Mässinäx i-ad-umas iyyän härät, wär t-ibəddəwet ägg-adəm.»

⁷ Ənnän-as: «Adiš mafäl ijanna ännäbi Mosa a-s:

<Afäl irha ähaləs azəmməzzəy n-hənne-s, ilzam-t ad-tät-äkf təkarçe n-aməzzi təzzar, izəmməzzəy-tät?> »

⁸ Inn'-asän Yisa: «A-wa hawän-innä ännäbi Mosa, inn'-awän-t däx-təssəba n-təxart-i jän ulhawän-nəwän; ənnar wädden a-wen, s-tizarät a-s dd-täxläk äddunya, wädden a-wen a dd-äzzäbbät Mässinäx.

⁹ Ässiilmädäx-kəwän a-s ere hin-äzməzzäyän hənne-s a-s, ija a-wen, wädden tikra a has-təja, oläs adubən n-iiyyät, izna.»

¹⁰ Əggädän-dd inəttulab-net, ənnän-as: «Şamad a-wen-däx a ijan, adiš, ufa ças, äqqiima äwadəm wäla adubən.»

¹¹ Inn'-asän Yisa: «Wädden äddinät iket-näsän a äddobätnen ujreh n-mäjräd-wa-däx, wi ikfa Mässinäx turhajät-net ças, a t-jarrähnen.

¹² Tidət, wädden äddinät iket-näsän a əjrawnen turhajät-ten-däx n-ad-äqqaymən wär-ädobänän: iyyäd, a-s dd-əwän-däx, əjrawän s-a-wen; iyyäd, əgdälän-asän-t imidiwän-näsän-i tän-jänen imudäšan, əkkäsän-tän däx-meddən; iyyäd daç, unjäyän s-adubən däx-təssəba n-Təmmənəya n-Mässinäx.

Ere äddoben ujreh n-mäjräd-wa-däx, ijrähət-t.»

Ija Yisa älbäraka däx-aratän
(*Marqəs 10:13-16; Luqa 18:15-17*)

¹³ Ämmewäyän-dd çarät-a-wen aratän s-Yisa i-ad-tän-isəwär ifassän-net, ittär-asän däx-Mässinäx a däx-sän ijan älbäraka; ənhäyän inəttulab äddinät wi tän-dd-äwwäyən ças, äkläwləwän fälla-sän.

¹⁴ İxtäl-tän Yisa, inn'-asän: «Äyyät aratän ad-hi-dd-əkkən, wär tän-in-täwwəçäm fäll-i, fäl-a-s, Təmmənəya n-Mässinäx, äddinät wi dər-sän änifäqqänen a-s tät-ihakk.»

¹⁵ Äswär-tän ifassän-net çarät-a-wen, ija däx-sän älbäraka təzzar, ifäl edägg-en.

Äddunya meç əlaxärät
(*Marqəs 10:17-31; Luqa 18:18-30*)

¹⁶ Iгла Үиса һар шик-дӑҕ аһаләс ийяһ да-дӑҕ t-dd-ikkӑn, inn'-as: «Алҕалим, ма амоос емаркед ва s-leҕ s-ad-t-ӑjӑҕ i-ad-еjрәwӑҕ тӑмудре та тӑҕлӑлӑт?»

¹⁷ Inn'-as Үиса: «Mafӑl hi-sastanӑd d-emӑrked s-tӑddobed iji-net? Milҕaw, Mӑssinӑҕ ҕас а олаҕӑn. Амӑра, кунта тӑрһед ad-tеjрәwӑd тӑмудре тӑynayӑt, adiш, maшӑl alӑmӑrӑn n-Mӑssinӑҕ.»

¹⁸ Inn'-as амawaд: «Win-ш alӑmӑrӑn, ma амоосӑn?» Inn'-as Үиса: «Entӑned да: Wӑr jed iman, wӑr jed ӑzzәna, wӑr tokerӑd, wӑr тӑjjәyһӑd s-bahu,

¹⁹ sәmyҕӑr ti-k d-ma-k, тӑрһед anhӑraj-nӑk s-tӑrһa та jed i-iman-nӑk.»

²⁰ Innӑ амawaд-en i-Үиса: «Аҕdalӑҕ i-a-wen-dӑҕ iket-net; ma t-illan даҕ hin-оdanӑҕ?»

²¹ Inn'-as Үиса: «Kunta тӑрһед ad-dd-tәmdәwӑd s-iba n-ӑlҕib dat-Mӑssinӑҕ, ӑglәw, tuззӑr-in ehӑre-nӑk, тәkfәd-t i-tilӑqqiwen i-ad-tәkrәшӑd ӑrrәzӑҕ дӑҕ-ӑlзӑnnӑt; diһen, ӑqqәl-dd, ӑlkәm-ahi.»

²² Isl' амawaд i-a-wen-dӑҕ ҕас, әnxӑsӑn iman-net, inkӑr iglӑ ed a-wa ila дӑҕ-ehӑre, tikunen.

Tӑmudre та тӑҕлӑлӑт d-ӑrrәzӑҕ wa n-tidәt

²³ Innӑ Үиса дарӑt-a-wen i-inәтtulab-net: «Ӑsidӑtteҕ-awӑn a-s izzәwӑt ad-ijjәш ere irzayӑn Tәmmәnәya n-Mӑssinӑҕ.

²⁴ Ojӑr тӑrӑҕse та ija ad-ijjәш amnәs s-tiтт n-ӑnazmay uhәn, ad-ijjәш ere irzayӑn Tәmmәnәya n-Mӑssinӑҕ.»

²⁵ Eslӑn inәтtulab i-a-wen ҕас, ӑqqӑnӑn iyӑfawӑn-nӑsӑn, әnnӑn-as: «Adiш mi madӑn-iyләs?»

²⁶ Ikyӑd дӑҕ-sӑn Үиса, inn'-asӑn: «A-wen, wӑr t-ӑsmӑkkӑnӑn дӑgg-adәm, mӑшan Mӑssinӑҕ әnta, ӑddoobӑt-t ed wӑr t-illa a has-indarӑn.»

²⁷ Iggӑd-dd Bәtrus, inn'-as: «Nӑkkӑned-i-ш-i oyyӑnen a-wa nәla iket-net nәlkӑm-ak, әndek isӑlan-nӑnӑҕ, ma s-ilkam ad-t-nәjрәw?»

²⁸ Inn'-asӑn Үиса: «Ӑsidӑtteҕ-awӑn a-s aшӑl wa dd-mad-tәzzubbәt ӑddunya-ta тӑynayӑt-i дӑҕ-mad-ixkәm Ӑgg-ӑgg-adәm дӑҕ-ӑlxurmӑt-net fӑll-hӑrӑt iket-net, ad-tӑqqaymәm kӑwӑned-i hi-ӑlkӑmnen fӑll-mӑrawӑt tisӑqqima n-tәmmәnukәla d-sӑnatӑt, tәшrӑҕӑm tiwsaten ti n-mӑrawӑt d-sӑnatӑt n-Iшrayil.

²⁹ Ere oyyӑn ihӑnan-net d-ayәtma-s d-шӑtma-s d-ti-s d-ma-s d-mәddana-s d-iшәkraш-net дӑҕ-ӑddimmӑt-in, ilmәdet a-s ad-ijрәw a-wa hin-oyyӑ ija temedә n-anәdfus, ijrәw даҕ тӑмудре та тӑҕлӑлӑт.

³⁰ Ӑlwӑxla a-s а ӑjjeen дӑҕ-wi ӑzzarnen aшӑl-i-dӑҕ, ad-ijjәш ajilal, а ӑjjeen даҕ дӑҕ-wi hӑnen ajilal aшӑl-i-dӑҕ, ad-izar.»

20

Isӑlan n-mӑssi-s n-aшәkrәш d-inaxdimӑn-net

¹ Issӑҕlӑy-tӑn Үиса tangalt дарӑt-a-wen, inn'-asӑn: «Tәmmәnәya n-Mӑssinӑҕ, тӑnifӑqqa d-аһаләс ilan aшәkrәш-net; ӑffӑw-t ҕас, ifӑl ehӑn-net, immӑҕ i-inaxdimӑn issӑxdӑm aшәkrәш-net n-lӑҕnӑb.

² Ӑnmӑnnӑk dӑr-sӑn fӑll-timзӑl n-ӑrriyal n-azрәf i-aшӑl tәzzar, ӑssok'-en aшәkrәш-net i-ad-t-әxdәmӑn.

³ Ij' agdәlset ҕас, olӑs azӑjor, ijrӑw иyyӑd ӑqqimnen ӑdiwӑnnen wӑr-iшla hӑrӑt, idkӑl-tӑn;

⁴ әntӑned-dӑҕ, inn'-asӑn: «Ӑglӑt kӑwӑned-dӑҕ тӑxdәmӑm дӑҕ-aшәkrәш-in wa n-lӑҕnӑb, ad-kӑwӑn-ӑkfӑҕ ӑlxaqq n-tide-nӑwӑn»;

⁵ ӑglӑn, әxdӑmӑn. Tәjӑ tarӑhut ҕас, olӑs aдkul n-иyyӑd, olӑs даҕ iji n-a-wen s-tәzzar.

⁶ Təglä takkäşt ɣas, izjār daɣ, inhäy iyyäd əbdadnen wär tän-išla härät, inn'-asän: <Käwäneḍ ma s-təbdadäm ašäl iket-net, wär t-illa a käwän-išlan?>

⁷ Ğnän-as: <Wär t-illa ere hanäɣ-ikfan əššäɣəl.> Inn'-asän: <Äkkät käwäneḍ-däɣ ašəkrəš-in, təxdəmäm däɣ-s.>

⁸ Toḍä täfukt ɣas, issäɣrā-dd mässi-s n-ašəkrəš änaɣraf-net, inn'-as: <Ʒɣər-dd inaxdimän, təzləd-asän, sänt s-wi dd-əšräynen har təkkəd wi dd-əzzarnen.>

⁹ Ʒjrāwän wi dd-osänen šamad təgla takkäşt timɣal-näsän; hak iyyän ijraw ärriyal n-azrəf wa ämoosän timɣal n-ašäl.

¹⁰ Osän-dd ɗarät-a-wen wi dd-əzzarnen s-älxidmät ija ɣur-sän a-s, ad-ajärän inaxdimän-wi dd-əšräynen timɣal mäšan, əjrāwän əntäneḍ-däɣ ärriyal n-azrəf šund wa əjrāwän inaxdimän wi n-tišrayät däɣ-älxidmät.

¹¹ Ʒjrāwän timɣal-näsän ɣas, äbjänjänän fäll-mässi-s n-ašəkrəš, ad-has-jannen:

¹² <Ajän wädden inaxdimän-wi dd-əšräynen, iyyän n-ässaɣät ɣas a jän əxdamän, a-s ija a-wen näkkäneḍ, ašäl imdan a nəja nəxdam, siknənniwət-anäɣ täfukt. Ʒas əndek əmmək wa s-ila a-s ad-där-sän nagdäh timɣal?>

¹³ Innä mässi-s n-ašəkrəš i-iyän däɣ-sän: <Amidi-nin, wär-əkşey älxaqq-näk, wädden ärriyal n-azrəf a fäll-nənnäfhäm, əkfey-ak-t, ma tärhed daɣ?>

¹⁴ Ʒrməs ehäre-näk, təgləd. Ma däɣ-käy-ikma a-s äsisägdähäɣ-käy däɣ-azrəf-in käyy-i dd-əzzarän, tajjäḍ däɣ-i erk asäwaḍ, d-wa dd-išräyän?

¹⁵ Ajän wädden a-wa ehäre-nin s-äddoobey ad-has-äjäɣ a-wa s-ärhey. Ma däɣ-käy-ikma a-s olayäɣ? »

¹⁶ Innä Ʒisa ɗarät-a-wen: «Ʒlmədät a-s s-əmmək-wen-däɣ a-s äddinät wi hänen ajilal, ad-izarän mäšan, wi äzzarnen, ad-əjjəšan ajilal.»

*Äsihe wa s-käraḍ d-itajj Ʒisa isälan n-tamättant-net d-tanäkra-net
(Marqəs 10:32-34; Luqa 18:31-34)*

¹⁷ Älwäqq wa d-irmäs Ʒisa tamdujt ta n-Yärussälam, ikkäs-dd inəṭṭulab-net s-takşe, inn'-asän:

¹⁸ «Ʒnhəywät, näkkäneḍ-da-hi äjozäynen, nəkka Yärussälam-i-däɣ mad-ättärmäs Ägg-ägg-adəm i-ad-ijješ ifassän n-imänokalän n-käl-tikutawen d-älɣulam n-Äṭṭäwrät; ad-t-sidəwən däɣ-äššäreɣa-näsän, əxtəsän-as tamättant,

¹⁹ əjən-t däɣ-ifassän n-inəzzulam†-i t-maden-äj tekäškäşt, əjən däɣ-s tiwit s-ebärtäk, əsləbän-t fäll-tajəttewt i-ad-ämmät mäšan, ašäl wa n-käraḍ ɗarät tamättant-net, ad-dd-inkär jer-inəmmuttan.»

*A-wa təttär ma-s n-dägg-Zäbdi däɣ-Ʒisa
(Marqəs 10:35-45)*

²⁰ Däɣ-a-wen-däɣ, ad-dd-tosa hänne-s n-Zäbdi Ʒisa, ənta d-məddana-s wi n-əssin, tärkäɣ data-s, tənn'-as tärha a däɣ-s təttär härät iyyän.

²¹ Inn'-as Ʒisa: «Ma tärhed?» Tənn'-as: «Ʒessin ilyaḍän wi leey, əntäneḍ da, äj'-ahi ärkäwäl n-a-s ašäl wa dd-mad-täqqələḍ däɣ-Təmmənəya-näk, ad-säqqayməḍ iyyän daw-aɣil-näk, säqqayməḍ wa iyyaḍän daw-täšalje-näk.»

²² Äwwežäb-as Ʒisa, inn'-as: «Käwäneḍ, wär төssenäm a där-sästanäm. Ajän näkk, kara n-tisnant wa s-ilkam ad-t-äswäɣ, täddoobem tesäse-net?» Ğnän-as dägg-Zäbdi: «Näddoobät-t.»

²³ Inn'-asän Ʒisa: «Tidət lab a-s ad-tənhəyäm älyizabät šund wa mad-ənhəyäɣ mäšan, däɣ-isälan wi n-taximit daw-aɣil-in d-täšalje-nin, wädden näkk a ihakkän a-wen; Abba-nin a t-ihakkän i-wi s-t-äsmäjnät.»

† 20:19 20:19 — Ʒur-käl-Älyähud, ere wärän ämoos ägg-Älyähud s-aläšäl meɣ ere wärän ilkem i-äddin-näsän, iket-net, änäzzalim a ämoos. A-wen-däɣ a fäl tiwsaten ti iyyaḍnen iket-näsnät, ti n-inəzzulam. — Ašäl-i-däɣ, änäzzalim, äkafär (ere wärän issen s-Mässinäɣ).

Mijraw wa n-tidət

²⁴ Eslän inəṭṭulab wi iyyäḍnen n-märaw i-a-wen ɣas, ijjäš-tän älhäm fäll-ayətma-win-däɣ n-əssin.

²⁵ Iyr'-en-dd ʃisa iket-näsän s-iman-net, inn'-asän: «Təssanäm a-s imänokalän äxkämän fäll-käl-äkall-näsän s-əşşahät; käl-əlxəkum daɣ, wär lämmeḍän fäll-käl-äkall

²⁶ mäšan, käwäweḍ, wär jem a-wen; wa däɣ-wän irhän mijraw, umaset äanaxdim i-imidiwän-net,

²⁷ ere däɣ-wän irhän täzert, umaset akli n-imidiwän-net təzzar,

²⁸ s-əmmək wa s-Ägg-ägg-adəm, wär dd-ämesäl s-äddunya i-ad-has-əxdəmän äddinät, ämeşäl-dd sār-s i-ad-ixdəm ənta iman-net, äkf iman-net, ämmät i-ad-isəddärfət äddinät äjjootnen däɣ-ibäkkadän-näsän.»

*Iməddoryal wi n-əssin äzozäy ʃisa
(Marqəs 10:46-52; Luqa 18:35-43)*

²⁹ A-s dd-izjār ʃisa d-inəṭṭulab-net taɣrəmt ta n-Žärriko, təlkäm-as tamətte täjjeet.

³⁰ Iгла har a əndärrän, əssin iməddoryal da-däɣ, äqqiimän däɣ-asälim n-zäbo wa dd-ija. Eslän a-s ʃisa a okayän ɣas, ad-saɣären, jannen: «Ya Ägg-Dawəḍ, aḍən-anäɣ tähanint!»

³¹ ʃattäl-tän tamətte i-ad-hin-susəmän mäšan, äsɣären däɣ-işənnawän: «Ya Äɣalim, Ägg-Dawəḍ, aḍən-anäɣ tähanint!»

³² Isl'-asän ʃisa, ibdäd, iyr'-en-dd, inn'-asän: «Ma s-tärham ad-hawän-t-äjäɣ?»

³³ Ənnän-as: «Äɣalim, arr tiṭṭawen-nänäɣ i-ad-nənhöy.»

³⁴ Täny'e tähanint-näsän, iḍäs tiṭṭawen-näsän, ämeränät ässaɣät-wen-däɣ, oläsän ahänay; əlkämän-as ḍarät-a-wen.

21*Ujəš n-ʃisa i-aɣrəm wa n-Yäruşsalam
(Marqəs 11:1-11; Luqa 19:28-40; Exya 12:12-19)*

¹ Ohäz-in ʃisa d-inəṭṭulab-net Yäruşsalam, iha ämära taɣrəmt ta n-Bätfaži, edes i-taḍayt ta täsijätät ihəşkan wi n-əzzäytun, äşmaşäl əssin däɣ-inəṭṭulab-net,

² inn'-asän: «Äkkät tadäbayt ta n-data-wän, təjjaşäm-tät ɣas, ad-däɣ-s təjrəwäm teşəḍt təkrafät s-t-illa äza-net edes-has; arät-tät-dd, təlwəyäm-ahi-tät-dd ənta d-äza.

³ Ere hawän-innän härät, ännät-as: «Äɣalim a däɣ-sän ilan əşşäɣəl,» afäl has-tənnäm a-wen, ad-hawän-dd-äyy teşəḍt hakd d-äza-net.»

⁴ Ämoos a-wen a ässiitbätän a-wa innä ännäbi n-Mässinäɣ a-s innä:

⁵ «Ännät i-käl-Yäruşsalam:
Ənhəywät, ikk'-iwän-in ämänokal-näwän,
ikk'-iwän-in s-əmmək wärän inbej tiṭṭ,
eşəḍ ɣas a inay
ara n-teşəḍt ɣas a inay.»

⁶ Eglän inəṭṭulab, jän a-wa hasän-inna ʃisa;

⁷ wätän-as-dd teşəḍt d-äza-net, əstäjän-asän isəlsa-näsän təzzar, inäy ʃisa äza.

⁸ Ad-fattäɣ ya tamətte iket-net, isəlsa fäll-tabarät-ta ija, nakkädän-dd iyyäḍ ileḍleḍän däɣ-ihəşkan, säns'-en-tän däɣ-zäbo-wa ija i-asəmyar-net.

⁹ Täseɣärät tamətte-ta has-täzzarät hakd ta has-təlkämät, janna:
«Ozana!

Näkfet Mässinäɣ semɣar

däɣ-təssəba n-Ägg-Dawəḍ,

Ija Mässinäɣ älbäraka däɣ-wa dd-osän däɣ-isəm n-Emäli,

Imḡaret isəm n-Emäli dāḡ-iṣənnawān iket-dāḡ-nāsān!»

¹⁰ Ijjāš-dd ʔisa ʔarussālam ḡas, āmramār aḡrəm iket-dāḡ-net, hak āwadəm-dāḡ, ibdad, ijanna i-amidi-net: «Ma āmoos āwadəm-wa hanāḡ-dd-ijjāšān?»

¹¹ Ad-janna tamətta ta təlāmāt i-ʔisa: «A-wa ʔisa, ānnābi wa dd-ifālān Nāširāt ta n-Galila.»

*Iššəšdāj ʔisa ehān n-āmudd wa māqqārān
(Marḡəs 11:15-19; Luqa 19:45-48; Exya 2:13-22)*

¹² Ijjāš ʔisa ḡarāt-a-wen ehān n-āmudd wa māqqārān ihān ʔarussālam, ad-dāḡ-s isattāḡ ättužžar d-imāžānšān-nāsān, āsbārāḡwāl tisəskar ti n-kāl-amāhaš n-ižārfan, ijjar-in tisāqqima n-ättužžar n-tidāberen,

¹³ isattāḡ-tān, ijann'-asān: «Wādden iktab a-s, innā Māssināḡ:
<Ehān-in, ad-umas ehān n-tittar>;
māšan kāwāneḡ jām-t, tasəssihārt n-imākrāḡān.»

¹⁴ Iha ʔisa ehān n-āmudd-en-dāḡ a-s t-dd-osān iməddorḡal d-inəbdan, āzozāy-tān.

¹⁵ Ǝggādān aratān hanen ehān n-āmudd-en-dāḡ, ad-saḡāren, jannen:

«Ozana!

Nākfet Māssināḡ semḡar dāḡ-təssəba n-Āgg-Dawəd!»

Enhāyān imānokālān n-kāl-tikutawen d-ālḡulam n-Āṡṡāwrāt tikunen-ti s-iket tānāt-ija, əslān i-a-wa jannen aratān ḡas, ijjāš-tān ālhām fäll-ʔisa.

¹⁶ Ǝggādān-dd sār-s, ənnān-as: «Ajān kāyy, wār səlləd i-a-wa jannen aratān-wi-dāḡ?» Inn'-asān ʔisa: «Sallāḡ-asān.» Olās, inn'-asān: «Ajān wār tāḡrem a-wa innā Māssināḡ dāḡ-əlkəttab-net, a-s innā:

<Imawān n-aratān d-imārkāsān
ad-dd-zajjār təmmal i-Māssināḡ.> »

¹⁷ Ifāl ʔisa edāgg-en ḡas, odwa tadābayt ta n-Bitanya.

*Ahəšk wa ilyān ʔisa
(Marḡəs 11:12-14, 20-26)*

¹⁸ Āffāw, iqqāl ʔisa ʔarussālam dāḡ-a-s ālluz.

¹⁹ Dāḡ-tekle-net, inhāy ahəšk n-ašar iḡtan dāḡ-asālim n-zābo, ikk'-e-hi-dd māšan, wār fälla-s ijrew ar ifārkətān, wār t-hen aratān. Imməjrād i-ahəšk, inn'-as: «Ija Māssināḡ a-s wār-ilkem ad-torawād!» Āqqur-in ahəšk-en s-iyyāt ālwāqq-wen-dāḡ.

²⁰ Enhāyān inəṡṡulab a-wen ḡas, āqqānān iḡāfawān-nāsān ad-jannen: «Ēndek əmmək wa s-hin-āqqur ašar wa-dāḡ s-iyyāt?»

²¹ Inn'-asān ʔisa: «Āsidätteḡ-awān a-s afāl itbat immun-nāwān, wār t-illa āššāk t-ihan, ad-tudabem iji n-a-wa jeḡ i-ašar-wa-dāḡ, təḡləm fāw har afāl tənnām i-aḡay wa-dāḡ: <Tālbāy-dd dāḡ-edāgg wa hed, tāḡtəd dāḡ-əjärew wa səmmān dihen>, ad-āj a-wa tənnām.

²² A dāḡ-dālām Māssināḡ s-ulh omanān-dāḡ, ad-hawān-t-ākf.»

*Mājrad wa ija ʔisa d-imānokālān n-kāl-tikutawen dāḡ-ehān n-āmudd
(Marḡəs 11:27-33; Luqa 20:1-8)*

²³ Ijjāš ʔisa ehān n-āmudd wa māqqārān, isayra tamətta dihen a-s t-dd osān imānokālān n-kāl-tikutawen d-inušāmān n-Išrayil, ənnān-as: «Mi kāy-ikfān turhajāt n-amišəl n-tikunen-ti-dāḡ? Mi kāy-ikfān tārna-ta-dāḡ s-tājjād a-wa tājjād?»

²⁴ Āwwežāb-asān ʔisa, inn'-asān: «Ad-hawān-ājāḡ nākk-dāḡ asəstan iyyān, afāl hi-tāwwežābām, ad-hawān-āllāḡeḡ nākk-dāḡ ere wa hi-ikfān turhajāt ta s-tamašalāy a-wa tājjāḡ.»

²⁵ Inn'-asān: «Mi dd-āšmašālān Exya wa n-Enəsselmāḡ i-ad-isəlmāḡ äddināt dāḡ-aman? Ak Māssināḡ a t-dd-āšmašālān meḡ dāgg-adəm ḡas?» Inn'-asān a-wen ḡas,

əqqälän-dd, ämiiizäxän jer-iman-näsän, jannen: «Afäl has-nønna: «Mässinäx a t-dd-äšmašälän», ad-hanäx-änn: «Adiš, mafäl wär tomenäm s-a-wa hawän-innä.»

²⁶ Afäl has-nønna daḡ dāgg-adəm ḡas a t-dd-äšmašälnen, ad-fälla-näx tiḡəw tamətte-ta-däx ed təkkaš iket-net äššäk a-s Exya ännäbi n-Mässinäx a ämoos.»

²⁷ Ʒqqälän-t-dd, ənnän-as: «Wär nössen.» Inn'-asän Ʒisa: «Adiš näkk-däx, wär hawän-e-älläxəx ere wa hi-ikfän tärna ta s-täjjäx a-wa täjjäx.»

Aratän wi n-əssin

²⁸ Innä Ʒisa ḡarät-a-wen i-äddinät wi has-äsijädnen: «Ma tənnäm dāx-tanfust-ta-däx? Ätwänna, käla t-illa ähaləs ilan əssin aratän. Ašäl iyyän, iḡrā-dd dāx-sän wa iššämän, inn'-as: «Alyad-in, ašäl-i, äkk ašəkrəš wa n-läxnäb, täxdəmän dāx-s.»

²⁹ Inn'-as rure-s, wär-igla mäšan, a əndərrän ḡarät-a-wen, ämmujräz, ikk' ašəkrəš, ixdəm dāx-s.

³⁰ Iḡrā-dd daḡ wa s-əssin, inn'-as a ənnin-däx innä i-wa äzzarän. Inn'-as rure-s, igla mäšan, a-s dd-təšräy tanfust, wär-igla.

³¹ Ämära, əndek dāx-sän wa ämešälän erhet n-abba-net?» Ənnän-as äddinät: «Un, wa äzzarän.» Inn'-asän Ʒisa: «Äsidätteḡ-awän a-s käwäned-i hannäyäx, ad-hawän-izarän käl-tiwse d-tälkäxbaten uješ n-Təmmənəya n-Mässinäx.

³² Exya, a-s käwän-dd-osa, issəkn'-iwän tabarät ta n-iqqud mäšan, tunjäyäm tomänäm s-a-wa hawän-innä, a-s ija a-wen käl-tiwse d-tälkäxbaten, omänän sār-s; täjjihäm i-a-wen-däx iket-net mäšan, wär tätubäm, tamənäm s-a-wa hawän-innä.»

Inaxdimän wi n-inälläbäsän (Marḡəs 12:1-12; Luḡa 20:9-19)

³³ Issäḡläy Ʒisa tamətte tangalt tiyyät dāx-innä: «Säjdät! Käla t-illa ähaləs ilan təfärre-net, ij'-as afäraj, ija dāx-s ašəkrəš n-läxnäb, ija daḡ dāx-ašrut-net iyyän, edägg wa dāx-iḡimməw läxnäb, iday dāx-s edägg n-soro i-ämagaz-net; ifär-t ḡarät-a-wen i-inəsduma iyyäd təzzar, ikk' äkall iyyän.

³⁴ Täwwäd-dd täqqän n-amili n-ašəkrəš ḡas, äšmašäl-dd s-inəsduma inaxdimän-net, i-ad-has-dd-awəyän folät-net dāx-a-wa dd-oräw ašəkrəš;

³⁵ mäšan, änaxdim sār-sän dd-äšmašäl-däx, ad-t-ärməsän, ad-tithəkken meḡ jän iman-net meḡ t-əkfän sämmäjori n-tihun.

³⁶ Oläs-dd daḡ ašəmmišəl n-inaxdimän iyyäd sār-sän, issəlkäm-asän-dd daḡ i-äjootnen ojännen wi sār-sän äšmašäl s-tizarät; jän-asän a ənnin-däx jän i-wi hasän-dd-äzzarən.

³⁷ A-s təšräy tanfust, rure-s iman-net a sār-sän dd-äšmašäl ed, inna dāx-iman-net: «Ənta ya i n-rure-ḡ, änihäjja s-ad-t-səmxärän.»

³⁸ Mäšan, ənhäyän inəsduma rure-s wa dd-imalän ḡas, änmännän jer-iman-näsän: «Ənhəywät-ak, amäkkasu-net; əyyäwät, näjet iman-net i-ad-hanäx-dd-täqqəl təkasi-net.»

³⁹ Osä-dd ḡas, ərmäsän-t, əzjārän dār-s ašəkrəš, änxän-t kərəf.»

⁴⁰ Inn'-asän Ʒisa: «Ma tordam, wi-däx inaxdimän, ma hasän-mad-äj mässi-s n-ašəkrəš afäl tän-dd-osa, ənta iman-net?»

⁴¹ Ənnän-as äddinät: «Adiš, afäl dd-osa iməkkərukaḡ-wi-däx, wär hasän-e-aḡən tähanint, ad-tän-ilhəs iket-däx-näsän, aləs tefert n-ašəkrəš-net i-iyäd t-e-əkfenen folät-net afäl dd-äwwäd äzzäman wa n-amili n-ašəkrəš.»

⁴² Inn'-asän Ʒisa: «Adiš käwäned, käla wär täḡrem edägg wa innän dāx-əlkəttab n-Mässinäx a-s:

«Tähunt ta hin-järän älbännatän s-ənnän wär tənfa härät,

ənta a-s a-s təšräy tanfust,

tämoos tähunt ta tufät n-aymär hakkät äššahät ehän;

a-wen iket-net Mässinäx ad-t-ijän i-ad-umas

täqqän n-eḡāf dat-tiṭṭawen-nänäḡ. »

⁴³ Inn'-asän ʿİsa: «Janneḡ-awän ämära a-s däḡ-tössəba n-a-wen-däḡ a fäl, Təmmənəya n-Mässinäḡ, ad-däḡ-wän tättärmäs, tətwekf i-tamətte tiyyät madät-tämašäl a-wa hasän-tənnä däḡ-erhet n-Mässinäḡ.» [

⁴⁴ Tähunt-ta-hi, ere fälla-s oḡän, ad-ärräzräz; ere fäll-toḡa daḡ, ad-t-təlkəz.]

⁴⁵ ʿİslän imänokalän n-käl-tikutawen d-käl-faris i-tangalen-tin-däḡ tän-issäḡläy ʿİsa ḡas, əlmädän a-s əntäneḡ-en-däḡ a-s iha ti-näsän.

⁴⁶ ʿEttärän ad-t-ərməsän mäšan, äksuḡän tamətte ed, təkkas äššäk a-s ʿİsa, ännäbi a ämoos.

22

Isälan n-amäjaru wa mäqqārän (Luqa 14:15-24)

¹ Issäḡläy ʿİsa daḡ tamətte tangalen däḡ-isälan n-Təmmənəya n-Mässinäḡ, innä:

² «Təmmənəya ta n-Mässinäḡ, äddoobät äwadəm ad-tät-isənnəfäqq d-tanfust n-ämänokal isidubunän rure-s. Ašäl wa d-itäj a-wen, äsmäjarät-dd äddinät äjjootnen s-ehän-net.

³ Ämmujnät-dd härät iket-net ḡas, äšmašäl inaxdimän-net s-äddinät wi dd-iḡra s-aḡli ašäl-wen-däḡ; mäšan, unjäyän iket-däḡ-näsän s-ad-dd-asən.

⁴ Oläs sär-sän ašəmmişəl n-eklan säl winnin-däḡ äzzarnen, inn'-asän: «Äḡlät, ännät i-äddinät: täwwäḡäm-ahi, imənsiwän, ämmujnen, əssänḡäḡ-awän a-wa iddären iket-net jer-wa n-iwan hakd wa n-taḡsiwen; əyyäwät šik, käwäneḡ ḡas a-s iqqal aḡli ämära.»

⁵ Wär jen teḡäre ta tän-dd-ija härät, iḡlä hak iyyän däḡ-əššäḡəl-net: wa ikkän ašəkrəš-net, wa ikkän mamäla-net;

⁶ əḡḡädän-dd iyyäd fäw, ərməsän härät däḡ-inaxdimän wi dd-äšmašäl ämänokal, äsmäḡräyän iyyäd, jän iman n-iyyəḡ.

⁷ ʿEjjäšän isälan ämänokal ḡas, ijjäš-t älhäm, iḡrä-dd ejhän n-əssärdusa-net, issəḡl'en i-ad-əlhesän imäjjan n-iman-win-däḡ, səntəsän aḡrəm-näsän.

⁸ Innä ḡarät-a-wen i-inaxdimän-net iyyäd: «Imənsiwän wi n-aḡli, əskärän-dd, mäšan äddinät wi dd-äsmäjareḡ sär-sän, wär ḡär-sän änhäjjan,

⁹ äḡlät ämära, ilalät tišarriten n-aḡrəm ti däḡ-tažämḡäḡän äddinät, ere ḡär-tämmoqqäsäm-däḡ, səmməjorum-t-dd s-ehän-in.»

¹⁰ Ällilän inaxdimän tišarriten iket-däḡ-näsnät, äsdäwän-dd a-wa əjräwän däḡ-äddinät iket-net jer-wi n-erk äddinät hakd-däḡ wi n-iməssorha, iḡnäy ehän tamətte.

¹¹ Ijjäš-dd ämänokal fäll-tamətte i-ad-tät-isəbbärrək. Äzjäzza tamətte, ijräh-in a-s ih'-et ähaləs wärän ija isəlsa wi s-änihäjja s-ad-tän-äj ere ihan aḡli, wär-ässahäḡ ašäl.

¹² Issäḡr'-e-hi-dd, inn'-as: «Mändam! ʿEndek əmmək wa s-dd-təjjäšäd edäḡḡ-wa-däḡ a-s wär tässahäḡäd ašäl?» Wär t-illa a has-inna ähaləs-en.

¹³ Inna ämänokal i-inaxdimän-net iyyäd: «Ärməsät-t, təkrədäm iḡarän-net hakd ifassän-net, təjrəm-t-in däḡ-tihay ti n-ajäma i-ad-ihall, iziməkärkiḡ isenän fäl tämujriḡt.»

¹⁴ Tidət, ätwäḡrän-dd äddinät äjjootnen mäšan, wär əjjətän wi ənnəfrännen.»

Isälan n-tiwse i-ämänokal Qäyşär (Marqəs 12:13-17; Luqa 20:20-26)

¹⁵ Änmäkkäsän käl-faris s-takše ḡarät-a-wen, ad-tattärän əmmək s-äswännän ʿİsa a wärän itətwənn i-ad-t-səttärməsän.

¹⁶ Äšmašälän-dd sär-s härät däḡ-inəṭṭulab-näsän äddewnen d-iyyəḡ la taggayt ta n-käl-Harudəs; osän-t-dd, ənnän-as: «Äḡalim, nəssan a-s tidət ḡas a janned, wär

säxrid ar tabarät ta n-tuksəda n-Mässinäx, wär täkkuläd d-a-wa jannen äddinät, wär tän-täzmäzläyäd;

¹⁷ ämāra, läxät-anäx, dāx-a-wa hannäyäd: ak iwar-anäx ad-nəzəl tiwse i-ämānokāl wa mäqqārān Qäyşār mex?»

¹⁸ İlmäd Yisa xur-ıman-net erk ənniyät n-asəstan wa t-jän xas, inn'-asän: «Älmunafexän yaden! Mafäl hi-tižärrubum?»

¹⁹ İnn'-asän qarät-a-wen: «Säknät-ahi-dd ärriyāl n-azrəf wa s-təzzälām tiwse», əkfän-aş-t-dd.

²⁰ İnn'-asän: «Mi län ättäşwer d-isəm wa t-iwārān?»

²¹ Ənnän-as: «I n-ämānokāl Qäyşār.» İnn'-asän: «Adiš, suxələt i-ämānokāl wa mäqqārān a-wa fälla-wän ila, təkfəm dəx Mässinäx a-wa fälla-wän ila.»

²² İqqän älwižab-wen-däx tän-ikfa ixfawän n-äddinät. Fälän Yisa qarät-a-wen, əglän.

*Äwwežäb Yisa dāx-isälan n-tanäkra jer-inəmmuttan
(Marqəs 12:18-27; Luqa 20:27-40)*

²³ Aşäl-wen-däx iman-net ad-dd-əbdädän data-s äddinät la taggayt ta n-käl-sadus-i jannänen a-s wär təkem tanäkra jer-inəmmuttan, afäl äba äwadəm, əmdän isälan-net; əssəstänän-t,

²⁴ ənnän-as: «Älyalim, inn'-anäx ännäbi Mosa: <Afäl ädobän ähaləs, äba-t wär-oher ara d-hänne-s, idubənet-tät äñña-s i-ad-ikrəş əzzurəyät i-äñña-s wa äba, i-ad-wär hin-itiləm isəm n-wa äba fäll-äröri n-äkall.>

²⁵ Ämāra, əkkəs-anäx dāx-täqqän n-eşäf. Käla hanäx-hän əssa ayətma; ädobän dāx-sän wa n-amäqqar, äba-t wär ikreş ara. Täqqimä-dd hänne-s i-äñña-s wa has-ilkämän

²⁶ mäşan, äba-t ənta-däx wär-oherän ara, täqqimä-dd i-wa s-kärađ qarät-a-wen; təgla tanfust s-əmmək-wen-däx har wa n-əssa.

²⁷ Qarät iba-näsän iket-näsän, äba tamäđt ənta-däx.

²⁸ Nässistän-käy: aşäl wa n-tanäkra jer-inəmmuttan, əndek dāx-əssa ayətma-win-däx wa s-mad-tumas hänne-s ed, ənhayän-tät adubən iket-näsän?»

²⁹ İnn'-asän Yisa: «Tidət-däx a-s käwāneđ toşkam ed a-wa ənnän əlkəttabän hakd-däx a-wa dār-togdäh tärna n-Mässinäx, wär t-illa a dāx-s təfhamäm.

³⁰ Aşäl wa ilkämän, meddən hakd tideđen, ad-äbas tidubunän ed ad-taläh tämudre-näsän d-ta n-änjälösän wi hənən işənnawän.

³¹ Ämāra, dāx-isälan wi n-tanäkra n-inəmmuttan, ajän wär täxrem a-wa hawän-inna Mässinäx, a-s innä:

³² <Näkk a-s Mässinäx n-İbrahim d-İsxaqq d-Yaqub? A-wen, älmäxna-net a-s äddinät-win-däx, han älžännät, tiimələn Mässinäx; ənnär wär-ədderän, wär təjjən a-wen. Mässinäx, wädden inəmmuttan a-s ämoos Mässinäx, ämoos-t i-wi əddärnen.>

³³ İjräz a-wen-däx issäxra Yisa i-tamətte ta has-täsijädät.

*Alämär wa ufän
(Marqəs 12:28-34; Luqa 10:25-28)*

³⁴ Əslän käl-faris i-əmmək wa s-ässodäf Yisa käl-sadus imawän-näsän xas, əžžəmmäxän-dd əntäneđ-däx sār-s.

³⁵ İggäd-dd iyyän dāx-sän n-älyalim n-Ättäwrät, ija i-Yisa asəstan dāx-otas irrum-net.

³⁶ İnn'-as: «Älyalim, ma ämoos xur-Mässinäx alämär wa ojärän?»

³⁷ İnn'-as Yisa: «Alämär wa ojärän da:
<Ad-tärhəd Emäli-näk Mässinäx s-ulh-näk imda,
tärhəd-t s-ıman-näk əmdan,

tärhəd-t s-tayətə-näk iket-net.>

³⁸ Enta-den-däx alämär wa äzzarän däx-alämärän, ənta daḡ a ojarän däx-alämärän.

³⁹ Ill'-ee daḡ wa s-əssin wärän dār-s iḡley:

<Ad-tärhəd ənhāraj-näk s-əmmək wa s-tärhed iman-näk.>

⁴⁰ Alämärän-win-däx n-əssin a iṭṭafän a-wa innä alämär n-Mässinäḡ d-a-wa ənnän ännäbitän iket-net.»

Yisa Älmaseḡ, ojar tumast n-ahäya n-Dawəd

(Marqəs 12:35-37; Luqa 20:41-44)

⁴¹ Inhäy Yisa aḡəmmäḡ wa fälla-s dd-jän käl-faris ḡas, issəstän-tän, inn'-asän:

⁴² «Ak ma tordam, Älmaseḡ, mi iqqal? Mi s-əmoos Rure-s?» Ənnän-as: «Dawəd.»

⁴³ Inn'-asän Yisa: «Kunta Älmaseḡ rure-s n-Dawəd, adiṣ, mafäl has-ijanna Dawəd s-mäjräd ija Unfas Šaddijän däx-əmm-net: <Emäli?>

⁴⁴ Dawəd en-däḡ a imməjrädän s-tärna n-Unfas Šaddijän, innä:

<Inna Emäli Mässinäḡ i-Emäli-nin:

Əyyäw, ḡayəm daw-aḡil-in

har äjəḡ iṣənja-näk daw-iḡarän-näk.>

⁴⁵ ḡas kunta Dawəd iman-net iḡarr Älmaseḡ s-isəm <Emäli>, əndek əmmək wa s-äddoobät ad-umas rure-s?>

⁴⁶ Wār tän-ijjeṣ ere t-ikfan älwiḡab n-asəstan-wen-däḡ hasän-ija; ijräw däḡ-sän älḡafyät ḡur-ašäl-wen-däḡ, äbas t-illa-i däḡ-sän ihälän asəstan-net ḡarät-a-wen.

23

Issədläm Yisa älyulam n-Äṭṭäwrät d-käl-faris

(Marqəs 12:38-39; Luqa 11:43, 46; 20:45-46)

¹ İdkäl Yisa mäjräd ḡarät-a-wen, imməjräd i-tamətə d-inəṭṭulab-net, innä:

² «Älyulam n-Äṭṭäwrät d-käl-faris a iwar ättäfässir n-Äṭṭäwrät ta n-Mosa i-äddinät.

³ Tamašalät a-wa hawän-jännen iket-net, mäšan, he kəwəneḡ, wār tətəläläm ijitän-näsän fäl-a-s a-wa jännen, wār-oher härät d-a-wa tajjän.

⁴ Tajjän färəḡän n-Mässinäḡ äḡuk sawarän iḡerhan n-äddinät, šahäššälän-tän amišəl-näsän, a-s ija a-wen, wār tän-iha ad-hasän-ilalän s-agḡay-näsän wäla-däḡ s-əmm n-assəkäḡ.

⁵ A-wa tamašalän iket-net, i n-təssəba ḡas n-ad-tän-in-əjrähän äddinät, šalläjän ikətban ojaränen wi n-äddinät, tajjän isəlsa əhobätnen,

⁶ ärhan taḡimit däḡ-idəḡḡan wi ännufläyänen däḡ-imjora d-ihänen n-äddin wi n-käl-Älyähud,

⁷ ijrəz-asän ad-hasän-tajjän äddinät isofan däḡ-tiṣärriten, titwäḡrin s-isəm: <Älyalim, älyalim!>

⁸ Kəwəneḡ, wār jem a-wen, wār tərḡem titwäḡrim s-isəm: <Älyalim> ed Älyalim-nəwän, iyyän ḡas, kəwəneḡ, ayətmatän a təmoosäm.

⁹ Wār taḡrem əwadəm wäl' iyyän s-isəm <Abba> ed Abba iyyän ḡas a lam, a t-əmoosän, Abba-nəwän wa ihän iṣənnawän.

¹⁰ Wār tərḡem ḡarrän-kəwän äddinät s-isəm: <Ämänokal>, ed wār lem ar iyyän n-Ämänokal, a t-əmoosän: Älmaseḡ.

¹¹ Wa ojarän däḡ-wän, umaset akli n-imidiwän-net.

¹² Ere iḡkälän iman-net-däḡ, ad-irəs mäšan, wa äsräsän iman-net, ad-t-iḡkəl Mässinäḡ.»

Iməskay käl-faris d-älyulam n-Äṭṭäwrät

(Marqəs 12:40; Luqa 11:39-42, 44, 47-51; 20:47)

13 «Iməskay kăwăneḍ-i n-älɣulam n-Ätṭäwrät d-käl-faris, älmunafexän yaden! Ænhəywät ɣas, kăwăneḍ a ititəbbun Təmmənəya n-Mässinäɣ i-äddinät; älwäxla, a-s wär tät-təjjəšäm, äddinät daɣ wi ärhanen uješ-net, gaddäläm-asän s-a-wen.

[

14 Iməskay kăwăneḍ-i n-älɣulam n-Ätṭäwrät d-käl-faris, älmunafexän yaden! Kăwăneḍ a itihäɣän a-wa ihän ifassän n-tinuḍäfen, tadjäm imaddän šəjrootnen i-ad-kăwän-in-əjrähän äddinät, ilkam däɣ-wän äššäreɣa səmmän.]

15 Iməskay kăwăneḍ-i n-älɣulam n-Ätṭäwrät d-käl-faris, älmunafexän yaden! Wär t-illa edägg wär təkkəm fäll-äkall wäla fäll-aman i-ad-däɣ-s dd-təjrəwäm äwadəm iyyän ɣas jäm däɣ-äddin-năwän mäšan, igdäh-as ɣas ad-hawän-ilkəm i-ad-t-səmmuttəyäm, umas, u-žohännäma s-tojăr ämära təlläbäst ta ija ta jäm s-əssin ihändäggan.

16 Iməskay kăwăneḍ-i n-imalwayän däryalnen. Jannem: afäl ihäḍ äwadəm s-ehän n-ämudd wa mäqqärän, wär t-iwer ärkäwäl n-tahude-net mäšan, afäl ihäḍ s-oräɣ wa t-ihän, iwar-t ärkäwäl n-tahude ta ija.

17 Tidət-däɣ a-s irmas-kăwän iba n-tayette, däryaläm. Ajän, ehän n-ämudd wa mäqqärän, ma izlay d-oräɣ wa t-ihän? Wädden təšədje-ta-däɣ ija ehän n-ämudd, a dd-toräwät əlləllu wa ija oräɣ wa t-ihän?

18 Jannem daɣ: ere ihädän s-isəm n-edägg wa n-tikutawen, wär t-iwer ärkäwäl n-tahude-net mäšan, afäl ihäḍ s-takute-ta tənsät fäll-edägg-en, iwär-t ärkäwäl n-tahude ta ija.

19 Iməddorɣal yaden! Ajän wädden tihusay n-edägg wa n-tikutawen a äshäsken takute ta fälla-s isänsa äwadəm.

20 Tidət a-s ere wa ihädän s-isəm n-edägg wa n-tikutawen, ihäḍ daɣ s-a-wa fälla-s insän iket-net,

21 wa ihädän daɣ s-ehän n-ämudd wa mäqqärän, adiš, Mässinäɣ-i n-Mässi-s n-ehän-en a ihäḍ.

22 Wa ihädän s-išənnawän, wädden tasäqqimit ta fäll-äminakäl Mässinäɣ a-s ihäḍ, Mässinäɣ iman-net a ihäḍ.

23 Iməskay kăwăneḍ-i n-älɣulam n-Ätṭäwrät d-käl-faris, älmunafexän yaden! Hakkäm s-iqqud a-wa ämoosän tämukäst-năwän däɣ-wäla ənnäɣnaɣ d-äkamən d-tiyəššawen-ti iyyäḍnen mäšan, täsisändäräm däɣ-amišəl n-a-wa ifräḍ alämär däɣ-isälan n-älɣadalät n-ulh, d-tähänint, d-immun s-Mässinäɣ; härätän-win-däɣ a-s änihäjja a-s təssəntäm sär-sän, səlkəmäm-asän amišəl n-wi iyyäḍnen oläɣnen.

24 Imalwayän däryalnen a tämoosäm, šänšašäm a-wa sässäm i-ad-wär däɣ-s dd-itayiməy wäla ešš iyyän ɣas uhən-däɣ, a-wa hin-sitrəjjim däɣ-tisatten-năwän, ogdäh d-amnəs təmyäre.

25 Iməskay kăwăneḍ-i n-älɣulam n-Ätṭäwrät d-käl-faris, älmunafexän yaden! Kannäm ašəšdaj n-afälla n-karatän d-ikassän-năwän, a-s ija a-wen, ammas n-ulhawän-năwän, ixla; šašdajäm tiɣəswen-năwän, a-s ija a-wen, ammas n-ulhawän-năwän, wär-iḍney ar tikra d-əwwəli.

26 Ya käl-faris-i n-iməddorɣal, sirədät ammas n-karatän d-ikassän-năwän i-ad-išdajän təzzar, ad-saradäm afälla-näsän.

27 Iməskay kăwăneḍ-i n-älɣulam n-Ätṭäwrät d-käl-faris, älmunafexän yaden! Tolähäm ɣas d-tizəska wäššarnen s-äshäskät äwadəm afälla-näsnät, a-s ija a-wen, ammas-näsnät, wär t-iha ar iyäsän n-mäɣsoy d-märkähaw isamäḍasän.

28 Ænta-den-däɣ a-wa där-toolähäm; saknem äddinät älmät a-s täyḍaläm, a-s ija a-wen, ammas n-ulhawän-năwän, wär-iḍney ar təlmənuḍäɣa d-täxärme.

²⁹ Imeskay kăwāneḍ-i n-ālyulam n-Āṭṭāwrāt d-kāl-faris, ālmunafexān yaden! Kăwāneḍ a salmadnen āddināt s-idāggan wi dāx-əzkān ānnābitān, sahaskem ižəkwan wi n-imayḍalān wi n-ibda āba;

³⁰ išl'-iwān a-wen-dāx māšan, jannem: <Innār nəzzaḡ dāx-āzzāman n-abbatān-nānāx, wār dār-sān nətumas imājjan n-iman n-ānnābitān-wi s-əssānyālān ašni-nāsān.>

³¹ Jannen a-wen-dāx uhən-dāx wār hin-təjrehām a-s asətbat ḡas a tājām n-a-s, tāmoosām ihāyawān n-abbatān-nāwān-wi janen iman n-ānnābitān.

³² A-wa əssəntān abbatān-nāwān ḡas a hin-samdem.

³³ Taššālen a tāmoosām, wār təzleyām d-tanāxwāt. Lāxātāt-ahi ḡas əndek əmmək wa s-mad-tāxləsām dāx-žohānnāma?

³⁴ Dāx-təssəba n-a-wen-dāx a fāl sār-wān-in-āšimāšälāx hārāt dāx-ānnābitān d-iməssorha d-ālyulam n-Āṭṭāwrāt; ad-təjəm iman n-iyyāḍ, təšləbām iyyāḍ, təjəm tiwit s-ibārtākān dāx-iyyāḍ dāx-ihānan n-āddin-nāwān, tāqquzəbum iyyāḍ s-aḡrəm-aḡrəm

³⁵ i-ad-dāx-wān əḍmənān iman n-e d t-illām āmayḍal s-jam iman-net bānnan fäll-ārōri n-ākall-i-dāx, ḡur-ašni n-Xābālla wa n-āmayḍal āba hundāx har ašni n-Zākārya wa n-āgg Bārāyka-i s-ātwājjān iman-net jer-edāgg wa šāddijān ihān ehān n-āmudd wa māqqārān d-edāgg wa dāx-raqqānāt tikutawen.

³⁶ Āsidätteḡ-awān a-s āddināt-win-dāx āba, əḍmanān iman-nāsān dāx-kāl-əzzurəyāt-ta-dāx.»

Tahāla n-ḡisa fäll-Yārussālam

(Luqa 13:34-35)

³⁷ Innā ḡisa ḍarāt-a-wen: «Yārussālam, ya Yārussālam! Tamāskoyt kām-m-i tājjāt iman n-ānnābitān, hakkād sām-mājōri n-tihun inəmmušal wi sār-m dd-āšmašāl Māssināx, əndek ḡas a-wa-dāx wār jeḡ dāx-utār n-asdu n-imuzāxān-nām šund a-wa tājj tekāzzit i-ikārtān-net daw-tafriwen-net māšan, təssəndārām-ahi.

³⁸ Āmāra, ənhəywāt, isālan əmdān, ad-kāwān-āyy Māssināx d-iman-nāwān, umas ehān-nāwān timšar.

³⁹ Āssiilmādāx-kāwān, wār t-ih' āššāk a-wen, ābas ilkam ad-hi-tənhayām hundāx har ašāl wa d-mad-taləsām tənna n-a-s: <Naməlet wa dd-osān s-isəm n-Emāli!> »

24

Terāzze n-ehān n-āmudd wa māqqārān

(Marqəs 13:1-2; Luqa 21:5-6)

¹ Ālwāqq wa d-ifāl ḡisa ehān n-āmudd wa māqqārān, ohāzān-t-dd inəṭṭulab-net, āddoqqen-as tihusay n-akāros wa ija ehān n-āmudd wa māqqārān.

² Islā i-təmmal ta tājjān i-ehān-en ḡas, inn'-asān: «Wādden hannāyām tihusay n-ede-y-wa-dāx? Āsidätteḡ-awān a-s ilkam ašāl d-wār mad-dāx-s dd-tāqqayəm wāla-dāx tāhūnt tiyyāt warāt tamidit-net ed, ad-āttāxṭāx iket-dāx-net.»

Išmal n-sāmdo

(Marqəs 13:3-23; Luqa 21:7-24; 17:22-24)

³ Ikkā ḡisa ḍarāt-a-wen taḍayt ta tāssidwālāt ihəškan wi n-əzzāytun, āqqima. Ohāzān-t-dd inəṭṭulab-net, ənnān-as dāx-tenere n-iman-nāsān: «Ālyalim, lāxāt-anāx, hārātān-win-dāx s-tənned, əmme d-mad-əjən? Ēkkəs-anāx dāx-tayḍart n-išmal n-uḡəl-nāk d-tāməddawt n-āddunya.»

⁴ Āwwežāb-asān ḡisa, inn'-asān: «He kăwāneḍ, ājāt ənniyāt; wār kăwān-išāšket āwadəm wāl' iyyān

⁵ fäl-a-s, ad-kāwān-dd-asēn äddināt äjjootnen äwwaynen isēm-in, änn hak iyyän dāḡ-sān: <Nākk a-s Älmasex>, šiškēn s-a-wen-dāḡ äddināt äjjootnen.

⁶ Ad-təsləm i-isālan n-imjārān d-māhewəl n-imjārān, wār tāxwelām ed ilzam ad-āj a-wen māšan, sāmdo n-äddunya ənta, wār-ija hārwa.

⁷ Ad-təknəs tawset tamidit-net, iknəs əddəwəl amidi-net, āj laḡ, iškəḍkəḍ ākall dāḡ-idāggan äjjootnen,

⁸ sānto n-tāməddawt n-äddunya ḡas a-wa, olāh d-sānto n-tizzurt ta rāmmāsāt tamāḍt s-išwar təjraw eḡäf-net.

⁹ Ad-kāwān-äqqəzzəbun äddināt, əjən iman-nāwān kərəf, akəḍnāt dār-wān tiwsaten iket-dāḡ-nāsnāt, dāḡ-äddimmāt n-isēm-in wa kāwān-iwarān.

¹⁰ Ad-təjməḍ tuksəḍa n-Mässināḡ ulhawān n-i äjjootnen dāḡ-wān, tənmaxḍārām jer-iman-nāwān, tənməkyəḍām jer-iman-nāwān,

¹¹ asēn-dd ännābitān n-bahu äjjootnen, šənnəməšrəyān äddināt äjjootnen.

¹² Ad-āj iba n-iqqud təmḡäre ta-dāḡ fäl ad-tismaḍ tārha n-Mässināḡ dāḡ-ulhawān n-äddināt äjjootnen

¹³ māšan, ere wa ākoyādān dāḡ-alkum-hahi dāḡ-immun-net har ašāl wa d-imda a-wen-dāḡ iket-net, ad-iḡləs.

¹⁴ Ad-ətwəjjən isālan n-Älənžil n-Təmmənəya n-Mässināḡ i-tiwsaten n-äddunya iket-dāḡ-nāsnāt i-ad-əslənāt i-isālan-win-dāḡ təzzar, təmdəw äddunya.»

Erk äzzāmanān wi dd-malənen

¹⁵ Inna ʿİsa daḡ: «Afäl ašāl wa d-tənhäyām ānabxas wa n-eməkkärekaḍ s-innä ännābi Danyāl har dd-ijjāš edāgg wa šäddijān ihān ehān n-āmudd wa māqqārān ad-t-isamāḍas, [ašāl-en, āwadəm wa iḡarrān isālan-wi-dāḡ, ijrāhet älmāḡna-nāsān!]

¹⁶ Ašāl-en, wi hānen teje ta n-Älyāhudəyāt, jawāḍnet dāḡ-azzal s-ašrut wa n-iḍaḡān;

¹⁷ wi dd-ogāḡ ašāl-en əwarān afälla n-ihānan, wār dd-təzəbbutnet i-ad-əḍkəlān a hasān-ihan ammas n-ehān, jawāḍnet dāḡ-azzal.

¹⁸ Wi dd-ogāḡ ašāl-en han išəkraš, wār dd-täqqälnet ḍara-sān i-ad-əḍkəlān isəlsanāsān.

¹⁹ Timəskay tiḍeḍen ti mad-ijrəw ašāl-en-dāḡ lanāt ənniyāt meḡ siḍuḍnāt, ed ad-täzzāwāt talḡa-nāsnāt.

²⁰ Ettārāt dāḡ-Mässināḡ ad-wār itəmzəyyit ajiwəḍ-nāwān d-äzzāman wa n-akäsa meḡ tajrəst meḡ d-ašāl n-əssəbət-i n-tāsonfat.

²¹ Äzzāman-en, ad-tāj tissust tässuksäḍāt s-ad-dd-täxlāk äddunya-dāḡ, wār kāla ätiwānhäy šund ənta fäll-ārori n-ākall; ad-təmdəw äddunya daḡ, wār-ilkem ad-ija a dār-s olāhān.

²² Afäl wār-ifneḡ Mässināḡ dāḡ-täqqān n-tisnant ta hāt išilan-en-dāḡ, wār t-illa ere madān-iḡləs; māšan ad-išəkšəl Mässināḡ täqqān n-tizzurt-ten-dāḡ dāḡ-təssəba n-äddināt wi āsnāfrān i-əḡəllas.

²³ Dihen, afäl hawān-innä āwadəm: <Ənhəywāt-t-ak Älmasex, ənta da> meḡ: <Ənta den>, wār t-təflesām.

²⁴ Ad-dd-asēn älmasexān n-bahu d-ännābitān n-bahu, əjən ijitān d-hārātān ässuksäḍnen, šiškēn ənnār ämmukkān a-wen wāla äddināt wi āsnāfrān Mässināḡ.

²⁵ He kāwāneḍ, əkkasāḡ-kāwān dāḡ-tayḍärt hārwa wār jen hārātān-win-dāḡ.

²⁶ Ere hawān-innān: <Ənhəywāt, Älmasex wa n-Ämaḡlas, osä-dd, iha tenere-ta>, wār təkem dihen; meḡ daḡ afäl hawān-ätwānna: <Ih' ehān iyyän dihen>, wār t-təflesām.

²⁷ Ägg-ägg-adəm, ad-alāh ass-net d-essam-i s-e-d issām dāḡ-emäynāj, ad-itwənhəy asmāḡmāḡ-net dāḡ-atāram.

²⁸ Dihad t-təlla tamāḡsoyt, ad-itajj ellay.»

*Uxəl n-Ŷisa Ālmasex
(Marqəs 13:24-27; Luqa 21:25-28)*

²⁹ Āssewād Ŷisa fäll-a-wen, innä:
« <Təm̄da ɣas tisan̄t n-išilan-win-dāɣ,
ad-əlsənāt tihay tāfukt,
iba tēmölle n-ewār;
ətrəkken-dd etran,
ənhəynəhəyän iməşsuha wi hānen işənnawän.>

³⁰ Ālwāqq-wen-dāɣ, a dd-e-tənfiləl tamātart ta sālmadāt s-ass n-Āgg-āgg-adəm dāɣ-
işənnawän, ad-şorsənāt tiwsaten ti wārnen ārori n-ākall, ad-t-ənhəynāt, imal-dd,
inay tijäräken, təlcam-as tärna-net d-älxurmāt-net.

³¹ Dihen, ad-işəm̄mişəl ānjälosän-net i-ad-sähədän täsinsäɣt s-afälla, sədwən-dd sār-
s e d t-illām ere äsinäfrän Mässinäɣ dāɣ-e d t-təllām tamdujt, səntən dāɣ-aşrut iyyän,
səmdəwän-dd s-aşrut wa iyyädän.»

*Ājät ənniyät
(Marqəs 13:28-31; Luqa 21:29-33)*

³² «Səjrähät ɣas əmmək wa s-idaggäl aşar: wādden e-d t-tənhäyäm a-s dd-inşär
har lämmədän ifärketän-net, ad-tənnəm, os'-anāɣ äzzāman wa olāɣän;

³³ əmmək-wen-dāɣ dāɣ a-s afäl tənähäyäm išmal-wi-dāɣ s-hawän-ənnəɣ har jän,
adiş əlmədāt a-s Āgg-āgg-adəm, ohäz-dd uxəl-net, os'-iwän fāw.

³⁴ Āsidätteɣ-awän a-s wār-e takəy əzzurəyät-ta-dāɣ, wār jen härätän-win-dāɣ s-
hawän-ənnəɣ iket-dāɣ-näsän.

³⁵ Ojār täräɣse ija ad-ib' işənnawän d-ākall, uhən ad-iba tənna-nin.»

*Ŷaymät täsidāwäm i-ass n-Āgg-āgg-adəm
(Marqəs 13:32-37; Luqa 17:30, 34-36)*

³⁶ Innä Ŷisa dāɣ ɗarāt-a-wen: «Āmära, dāɣ-isälan n-aşäl d-ässäɣät wa d-mad-
əjən härätän-win-dāɣ, wār t-illa ere t-issanän; wār t-əssenän ānjälosän wi hānen
işənnawän wāla Āgg-āgg-adəm; Abba ɣas, a t-issanän.

³⁷ Ass n-Āgg-āgg-adəm, ad-aläh a-wa dāɣ-s-e-ijən d-a-wa ijän dāɣ-işilan wi n-
ännäbi Nox.

³⁸ Äzzāman wa n-Nox, dat-anji wa n-ɗuf, tayāwanän äddinät, sassän, tidubunän,
sidubunän har aşäl wa d-ijjäş Nox turäft n-aman ta mäqqärät s-has-innä Mässinäɣ
ad-tät-ikən.

³⁹ Wār t-illa a-s tän-ha tijya-net har fälla-sän dd-ođän aman wi n-anji wa n-ɗuf,
olām-tän-in iket-dāɣ-näsän. Şund a-wen-dāɣ ijän a madän-āj aşäl wa dd-mad-dd-ass
Āgg-āgg-adəm.

⁴⁰ Aşäl-en, ad-äddewän əssin meddən dāɣ-tenere, ämmäɗkäl iyyän, itwəyy-dd
iyyän,

⁴¹ ad-taddähnät sänatät tiɗeɗen dāɣ-iyän edägg, tammäɗkäl tiyyät, tətəwəyy-dd
tiyyät.

⁴² A-wen-dāɣ a fäl, Ŷaymät tokayäm ed wār təssenäm aşäl n-ass n-Emäli-nāwän.

⁴³ Wādden käwāneɗ iman-nāwän təssanäm a-s ənnär issan mässi-s n-ehän älwāqq
wa s-t-dd-itis emäkräɗ s-ehäd i-ad-ärz ehän-net, iket-di, wār-itəttəs i-ad-has-ärz
emäkräɗ ehän-net.

⁴⁴ A-wen-dāɣ a fäl, Ŷaymät täsidāwäm, täɣtafäm ed, Āgg-āgg-adəm, ad-dd-ass s-
ässäɣät d-wār fälla-s jem.

*Tangalt ta n-ānaxdim wa olāɣän d-wa n-enälläbäs
(Luqa 12:41-48)*

⁴⁵ Änaxdim wa n-ämaḡdal ijrähän härät, ənta a mad-isäḡləf mässi-s təla-net i-ad-ännihäd fäll-inaxdimän-net wi iyyädnen, isamänsaw-tän e-d ija älwäqq n-a-wen.

⁴⁶ Təndəđ i-änaxdim wa mad-ijrəw mässi-s äddunkät dāḡ-älxidmät wa dāḡ-t ija, älwäqq s-t-dd-osa-dāḡ.

⁴⁷ Äsidätteḡ-awän a-s änaxdim-en, ad-t-isäḡləf mässi-s təla-net iket-net,

⁴⁸ mäšan, erk änaxdim ənta, ad-änn dāḡ-iman-net: <Näkk, mässi-ḡ, ähoja-hin fäll-i, äbas dd-iqqal>.

⁴⁹ ad-iđannäy imidiwän-net wi iyyädnen tiwit, itatt, isass ənta d-imäswan n-əlxəmər,

⁵⁰ änaxdim-wen, ilkam ad-t-dd-iḡdär mässi-s dāḡ-ašäl d-ässayät d-wär fälla-s ija, ilməd s-erk əššäḡəl wa t-išlän a ija a-wa-dāḡ,

⁵¹ afäl t-dd-osa, ad-t-iqquzzəbət, isärtəy-t d-älmunafəḡän dāḡ-tihay ti n-ajäma wär-ihä ar tahäla d-ažəmmäkärkəz n-isenän fäl tämujrižt.»

25

Tangalt ta n-timawađen

¹ Ija ḡisa i-äddinät tangalt tiyyät daḡ dāḡ-hasän-innä: «Təmmənəya ta n-Mässināḡ, täñifäqqa d-märawät timawađen wären əzzey meddən əđkälñen tiftəl-näsnät s-ehäd i-ad-əlkədnät i-ämaḡlay s-edägg-wa-dāḡ itäjj azli.

² Səmmosät dāḡ-timawađen-tin-dāḡ, ijrəw-tänät iba n-tayətətte, səmmosät ti iyyädnen, timəssorha.

³ Älwäqq wa d-gilləwnät, əđkälñät ti ijrəw iba n-tayətətte tiftəl-näsnät mäšan, wär dāḡ-snät jenät aman n-käränzil hasnät-əgdähnen.

⁴ Ti n-timəssorha əntänätəđ, jänät aman dāḡ-butəlän s-edes, äwwäynät-tän.

⁵ Ad-simäqqulñät ya đarät a-wen i-ämaḡlay. Täqqälñät-as, täqqälñät-as har äldäšnät, ilḡad-tänät-in eđəs iket-näsnät.

⁶ Šämad igl' ehäd ad-ija eḡäri innän: <Ämaḡlay ya, iwwäd-dd, səlkəđät-as.>

⁷ Ənkärñät-dd timawađen iket-näsnät, əđkälñät tiftəl-näsnät.

⁸ Əggädñät-dd ti ijrəw iba n-tayətətte, ənnänät i-ti n-timəssorha: <Näkkänätəđ ya, tiftəl-nänāḡ, išwar ämmutñät, äkfəmät-anāḡ-dd härät n-aman.>

⁹ Ənnänät-asnät ti n-timəssorha: <A fäw, wär näddobät ed a-wa nətḡaf dāḡ-aman, wär hanāḡ-igdeh iket-nänāḡ, äkkəmät u-mamäla, žänšəmät-dd aman i-iman-näkmät.>

¹⁰ Əḡlänät i-ad-dd-žənšənät aman, osä-dd ämaḡlay đara-snät. Änmäjjäšnät dār-s ti n-timəssorha äsdäwnen i-a-wen, ammas n-ehän təzzar, ätḡubben ishar n-edägg.

¹¹ A əndärrän đarät-a-wen, əqqälñät-dd ti ijrəw iba n-tayətətte, ad-takäwkawnät ashär, jannenät: <Mändam, mändam! Arr-anāḡ-in emm n-ehän.>

¹² Mäšan, inn'-asnät mässi-s n-edägg: <Äḡafyät-näkmät, wär kämät-əzzeyäḡ.> »

¹³ Innä ḡisa đarät-a-wen i-inəḡḡulab-net: «A-wen-dāḡ a fäl, ḡaymät tokayäm ed wär təssenäm ašäl wäl' ässayät wa s-dd-mad-dd-ass Emäli.»

Tangalt ta n-isuf wi itäjj Mässināḡ (Luqa 19:11-27)

¹⁴ Oläs daḡ ḡisa, innä: «Təmmənəya n-Mässināḡ, täñifäqqa d-isälän n-ähaləs iyyän dd-ijjäs ənniyät n-asikəl, ässawäd tekle ḡas, issäḡrä-dd inaxdimän-net, ij' ehäre-net iket-net jer-ifassän-näsän i-ad-sär-s äxdəmän;

¹⁵ ikf'-iyyän səmmos ibəḡyan n-orāḡ, wa iyyädän, ikf'-e əssin ibəḡyan, wa s-kärađ, ikf'-e iyyän n-abläḡ; hak iyyän-dāḡ, ikf'-e s-a-wa dār-togdäh tardast-net təzzar, ässokäl.

16 Šik-däx a-s hin-ämmummälät wa n-səmmos ibəlxan, oräx-net, irbäx fälla-s səmmos ibəlxan iyyäd.

17 Wa n-əssin daḡ, ija šund a-wen-däx, irbäx fäll-wi-net, əssin iyyäd daḡ.

18 Wa n-iyyän n-abläx n-oräx, iglä, iḡäš-as anu, təzzar inbäl däx-s a-wa t-ikfa mässi-s.

19 Ähoja-hin mässi-sän däx-asikəl har ašäl wa dd-iqqäl; osä-dd ḡas, iḡrä-dd inaxdimän-net i-ad-has-əjən älmeḡan n-a-wa tän-issäxläf.

20 Os-e-hi-dd wa n-səmmos ibəlxan n-oräx, äwway daḡ səmmos ibəlxan wi dd-irbäx; inna i-mässi-s: <Mässi-ḡ, səmmos ibəlxan n-oräx wi hi-təssäxläfäd, əntäneḡ da, ärbäxäḡ-dd fälla-sän səmmos iyyäd.>

21 Inn'-as mässi-s: <Ehoyd! Änaxdim ifranän ha taflest a tämoosäd; šämad h'-ik taflest däx-a-wärän əjjət, adiš ad-käy-säxləfäḡ a äjjeen. Əyyäw ḡayəm edes-in, ad-nahär tedäwit ta jeḡ.>

22 Osä-dd ḡarät-a-wen wa n-əssin ibəlxan n-oräx, inna i-mässi-s: <Mässi-ḡ, əssin ibəlxan-wi hi-təssäxläfäd, ärbäxäḡ-dd fälla-sän əssin iyyäd.>

23 Inn'-as mässi-s: <Ehoyd! Änaxdim ifranän ha taflest a tämoosäd; šämad h'-ik taflest däx-a-wärän əjət, adiš ad-käy-säxləfäḡ a äjjeen. Əyyäw ḡayəm edes-in, ad-nahär tedäwit ta jeḡ.>

24 İsräy-dd wa n-iyyän n-abläx, innä i-mässi-s: <Mässi-ḡ, əssanäḡ a-s käyy emäššehi a tämoosäd, tiḡlubud a wär täddomed, tiləyəd ašəkrəš däx-wär tənferäd härät,

25 jeḡ-ak tuksəḡa-ta-däx fäl təḡled ḡas, əḡleḡ näkk-däx, jeḡ anu i-abläx n-oräx wa hi-təssäxläfäd, ənbäläḡ-t däx-s; ənta da, ərməs təla-näk.>

26 Inn'-as mässi-s: <Käyy wa-hi, erk änaxdim n-eməssendəd a tämoosäd! A-s təssänäd a-s tiḡlubəḡ a wär-äddomeḡ, tiləyəḡ ašəkrəš däx-wär ənferäḡ härät,

27 mafäl wär jed azrəf-in däx-bänk i-ad-ättälläḡäḡ härät fälla-s afäl dd-äqqäläḡ?>

28 Inna i-äddinät ḡarät-a-wen, ad-däx-s ahäḡän abläx n-oräx wa iṡṡäf, əkfən-t i-wa n-märaw ibəlxan.

29 Ässiilmädäḡ-käwän a-s äwadəm wa ilän härät ad-has-iwwaḡ, iḡat a-wa ila mäšan, wa wärän ila härät, ad-däx-s ättärmäs wäla a-wa iṡṡäf.

30 <Ämära, amälḡon wa-hi, ərməsät-t, təjrəm-t-in däx-tihay ti n-ajäma wär iha ar tahäla d-azəmmäkärkəz n-isenän fäl tämuḡriḡt.> »

Äššäreḡa wa n-tilkamät

31 Innä ḡisa daḡ: «Ašäl wa dd-mad-iqqəl Äḡḡ-äḡḡ-adəm däx-älxurmät-net äddew d-änjəlosän-net, ad-äqqayəm fäll-tasäqqaymut-net ta n-älxurmät i-ad-immukəl.

32 Ašäl-en, ad-dd-äqqaymənat data-s tiwsaten n-äddunya iket-däx-näsnät, iḡəmmäzläy äddinät s-əmmək wa s-iḡamäzläy aməḡan tahrut i-ad-ibḡəw tihatten d-išulay.

33 Dihen, ad-äj tihatten daw-aḡil-net, äḡ išulay daw-täšalje-net.

34 Tihatten ti t-əllänen daw-aḡil-net, ad-hasnät-änn ämänokal: <Əyyäwmät, käməteḡ-i n-timəssunḡad n-Abba-nin, uhənmät təmmənəya ta hakmät-äsmäjnät Abba a dd-täxläk äddunya.

35 Ašäl wa d-älluzäḡ, käməteḡ a hi-äswäyänän, a-s äffudäḡ, käməteḡ a hi-issəs-wän, a-s hakmät-ämjareḡ, täsbärräkmät-ahi,

36 a-s ḡäluläḡ, təssəlsämät-ahi, a-s ärhinäḡ, təssəfärmät-ahi, a-s heḡ takärmüt, jämət-ahi-dd äsafu.>

37 Afäl inn' ämänokal a-wen-däx, ad-has-ənnən imayḡdalän wi t-əllänen dihen: <Emäli, əmme d-käy-nənhäy tälluzäd, nəššəkš'-ik? Əmme d-käy-nənhäy täffudäd, nəssəs-w'-ik?>

38 Æmme hanäx-dd-tämjared har käy-näsbärräk? Æmme d-çaluläd har käy-nössölsa?

39 Æmme d-tärhinäd mex ömme d-töjjäšäd takärmüt har hak-in-nöja äsafu?>

40 Dihen, ad-hasän-änn ämänokal: <Äsidätteḡ-awän a-s hak ässaḡät d-jäm a-wen-däḡ i-yyän däḡ-ayötma-ḡ däḡ-äddunya, kud-däḡ wa öndärrän däḡ-sän, šund näkk a-s t-jäm.>

41 Ad-dd-innäḡ ämänokal ḡarät-a-wen s-wi wärnen täšälje-net, änn'-asän: <Käwäned imöḡan ilḡan Mässinäḡ a tämoosäm, äflät dat-i, äkkät temse ta täḡlälät tämmujnet i-Iblis d-änjälösän-net,

42 fäl-a-s käwäned, älluzäḡ data-wän, wär hi-tössökšäm; äffudäḡ, wär hi-tössöswäm;

43 ämjareḡ-awän, wär hi-täsbärräkäm; ḡaluläḡ, wär hi-tössölsäm; ärhinäḡ, öjjäšäḡ takärmüt mäšan, wär hi-dd-jem äsafu.>

44 Afäl hasän-inna ämänokal a-wen, ad-has-önnön öntäned: <Emäli, ömme käy-nönhäy tälluzäd? Æmme käy-nönhäy täffudäd, meḡ ḡaluläd, meḡ tämijared-anäḡ-dd, meḡ tärhinäd, meḡ hed takärmüt näqqim wär hak-nökna härät?>

45 Ad-hasän-änn ämänokal: <Äsidätteḡ-awän a-s ed wär jem a-wen i-yyän däḡ-ayötma-ḡ däḡ-äddunya, kud-däḡ wa öndärrän däḡ-sän, šund näkk a-s wär t-jem.>

46 Äywa, wi-hi öntäned, ad-hin-ötwöjärän däḡ-tisnant ta täḡlälät mäšan, imayḡalän öntäned, ad-öjjöšan tämudre ta täḡlälät.»

26

Utär n-asäydär n-Ḣisa

(Marḡes 14:1-2; Luḡa 22:1-2; Exya 11:45-53)

1 Ija Ḣisa mäjräd-wen-däḡ ḡas, innä i-inöḡtulab-net:

2 «Tössanäm a-s össin išilan a hin-äqqimänen i-ämudd wa n-Faška-i däḡ-mad-ättärmäs Ägg-ägg-adöm, itwöšlöp fäll-tajöttewt.»

3 Däḡ-isälan n-a-wen-däḡ a däḡ-dd-özžömmäḡän imänokalän n-käl-tikutawen d-inušämän n-Išrayil däḡ ehän n-Qayäf wa n-ämänokal n-käl-tikutawen.

4 Änmännäkän dihen fäll-ömmök wa s-mad-säḡḡärän Ḣisa, öjön iman-net däḡ-ufär

5 mäšan, önnän, wär-ufa ad-äj a-wen däḡ-ašäl wa n-ämudd i-ad-wär töjj tamḡerwayt däḡ-tamötte.

Tamäḡt ta tössäḡälät aḡutän fäll-Ḣisa

(Marḡes 14:3-9; Exya 12:1-8)

6 Ämjarät Ḣisa ašäl iyyän däḡ-taḡrömt ta n-Bitanya i-ehän n-ähälös s-isöm-net Simyon wa s-käla t-ijräw jeri.

7 Ill'-e ḡur-s dihen-däḡ, äsiḡämär däḡ-edägg wa n-imönsiwän, a-s t-dd-tosa tamäḡt täwwayät butöl n-aḡutän lanen älqim ad-tän-sanḡal fäll-eyäf n-Ḣisa.

8 Enhäyän inöḡtulab-net a-wen, wär hasän-ijreḡ, ähnäffen däḡ-iman-näsän ad-jannen: «Šäḡšad yaden!

9 Aḡutän-wi-däḡ, mafäl wär hin-önšön, umas älqim-näsän takute i-tiläqqiwen.»

10 Ilmäḡ Ḣisa a-wa kittöwän, inn'-asän: «Ma s-naxxäsäm iman n-tamäḡt-i-däḡ? Tihusay n-härät, töj'-ahi-t!

11 Tiläqqiwen ya, öllanät ḡur-wän härkuk, a-s ija a-wen, näkk, ilkam ad-käwän-äfläḡ.

12 Asanḡal wa fäll-i ja aḡutän-wi-däḡ, ašöšwar a dd-ja i-äddinät däḡ-isälan n-ämükön n-taḡössa-nin i-azökka.

13 Äsidätteḡ-awän a-s edägg däḡ-ätwäḡtäbän isälan n-Älönzil däḡ-äddunya-ta-däḡ, ad-däḡ-s ötwösuxälän isälan n-a-wa töja, i-ad-tät-kittöwän äddinät.»

Anu n-taydärt wa iḡāš Yahudəs
(*Marqəs 14:10-11; Luqa 22:3-6; Exya 12:1-8*)

¹⁴ Däḡ-a-wen-däḡ, a dd-iggäd Yahudəs Isxaryut wa n-iyyän däḡ-inəṭṭulab wi n-märaw d-əssin, ikk' imänokalän n-käl-tikutawen,

¹⁵ inn'-asän: «Ma hi-hakkäm afäl hawän-əssäḡdäräḡ Ḡisa?» Ässeḡänän-as kărăḡät timərwen n-ärriyal n-azrəf, əkfän-as-tän.

¹⁶ Ad-itammäḡ Yähudəs ḡur-älwäqq-wen-däḡ i-tašləlt s-hasän-t-ästärmäs.

Ämudd wa n-Faška
(*Marqəs 14:12-21; Luqa 22:7-14, 21-23; Exya 13:21-30; 1 Kur. 11:23-25*)

¹⁷ Ašäl wa äzzarän n-ämudd wa n-Faška, däḡ-tamäkšanät tijəlwen-ti wär ha täzḡa, ənnän inəṭṭulab i-Ḡisa: «Älyalim, əndek diha d-tärhed ad-nəsəssikəy imənsiwän n-ämudd wa n-Faška?»

¹⁸ Inn'-asän: «Əjjəšät ayrəm, təkkəm ehän n-mändam, tənnəm-as, inn'-ak älyalim: <täqqän-in, tohəz-dd; ad-səssikəyāḡ näkk d-inəṭṭulab-in ämudd wa n-Faška däḡ-ehän-näk.> »

¹⁹ Jän inəṭṭulab a-wa hasän-innä Ḡisa, əglän ad-siməjnun imənsiwän wi n-Faška.

²⁰ Ij' ehäḡ ḡas, äḡḡäyma Ḡisa d-inəṭṭulab wi n-märaw d-əssin däḡ-edägg wa n-imənsiwän.

Äsfäkkär-dd Ḡisa ämaydar-net

²¹ Tamänsawän dihen-däḡ a-s hasän-innä: «Äsidätteḡ-awän a-s iyyän däḡ-wän a hi-madän-isəssäḡdär.»

²² Ekmän-tän iman-näsän a-s hasän-innä a-wen-däḡ, ad-has-jannen s-iyyän-iyyän: «Älyalim, ajän näkk?»

²³ Äwwežäb-asän, inn'-asän Ḡisa: «Wa dār-i madän-imzəyyət iji n-äfuss däḡ-äkoss, ənta a hi-madän-isəssäḡdär.

²⁴ Tidət-däḡ a-s Ägg-ägg-adəm, ad-t-iba ed a-wen-däḡ a ənnän əlkəttabän n-Mässinäḡ däḡ-isəlan-net mäšan, amäskoy äwadəm wa t-madän-isəssäḡdär! Äwadəm-en, iššäm-as-in, ad-wär dd-ijješ äddunya.»

²⁵ Iggäd-dd Yähudəs wa t-madän-isəssäḡdär, innä ənta-däḡ: «Älfäqqi-nin, äwadəm wa s-jänned, adiš näkk?» Inn'-as Ḡisa: «Käyy iman-näk, tənned-tän.»

Tasäktot šäddijät
(*Marqəs 14:22-26; Luqa 22:15-20; 1 Kur. 11:23-25*)

²⁶ Tattän dihen-däḡ a-s idkäl Ḡisa tajəlla, ämmoy i-Mässinäḡ təzzar, irz'-et, äzun-tät jer-inəṭṭulab-net, inn'-asän: «Uhənät, äksät, a-wa taḡəssa-nin.»

²⁷ Idkäl-dd day kara han aman n-läḡnəb äxxiimmärnen, ämmoy i-Mässinäḡ təzzar, ikf'-asän-t, inn'-asän: «Uhənät, äswät iket-nəwän;

²⁸ a-wa ašni-nin wa ämoosän ärkəwäl n-tassayt ta täynayät d-Mässinäḡ. Ašni-nin, ad-inḡəl däḡ-təssəba n-tenäšše n-ibäkkadän i-äddinät äjjootnen.

²⁹ Ässiilmädäḡ-kəwän a-s, wär-ilkem ad-əswəḡ ad-dd-ijmadän ara n-läḡnəb hundäḡ har ašäl wa d-mad-aləsäḡ näkk d-kəwänəḡ tesəse-net, s-älxal äynayän däḡ-Təmmənəya ta n-Abba-nin.»

Ilkam ad-ikkuddəl Bəṭrus Ḡisa
(*Marqəs 14:27-31; Luqa 22:31-34; Exya 13:36-38*)

³⁰ Äwwäy Ḡisa d-inəṭṭulab-net isuhay n-təmmal n-Mässinäḡ dd-əzjarnen əlkəttab wa n-Äzzäbur, əglän ḡarät-a-wen, əkkän taḡayt ta tässidwälät ihəškan wi n-əzzäytun.

³¹ Ɖwwädän-in dihen ɣas, inn'-asän: «Xorəzzəma wa-hi madän-irməs, ad-dd-arəw akuddəl-nāwän hahi ehäd-i-däɣ, täjawädäm iket-däɣ-nāwän, təyyəm-ahi-dd näkk ɣas fäl-a-s iktab däɣ-əlkəttab a-s:

«Ad-əwətäɣ amädän, iba-t, ämmähäšnät tihatten iket-näsnät.» »

³² Inn'-asän daɣ: «Afäl dd-ənkäräɣ jer-inəmmuttan, ad-hawän-izaräɣ s-teje ta n-Galila.»

³³ Iggäd-dd Bətrus, innä i-Ƴisa: «Näkk iman-in, kud äjewädän imidiwän-in wi iyyädnen iket-näsän däɣ, wär mad-äjawädäɣ, äyyäɣ-käy, fäw!»

³⁴ Inn'-as Ƴisa: «Äsidätteɣ-ak a-s wär mad-äj ekäz käraɖ iɣoran ehäd-i-däɣ s-wädden täkkudäläd-ahi har käraɖ ihändäggan.»

³⁵ Inn'-as Bətrus: «Näkk ɣas, kud-däɣ tamättant a tihräɣ dār-k, wär käy-mad-əkkuddäläɣ.» Abäraj-wen-däɣ ija Bətrus, a jän daɣ inəttulab wi iyyädnen iket-däɣ-näsän.

*Ässaɣät wa ikkäs Ƴisa däɣ-ašəkrəš wa n-Žätsämmani
(Marqəs 14:32-34; Luqa 22:39-46)*

³⁶ Äddeew dār-sän Ƴisa ɖarät-a-wen s-ašəkrəš iyyän iknan asədwal n-ihəškan s-isəm-net Žätsämmani, əwwädän-in ɣas, inn'-asän: «Ƴaymät, täqqələm-ahi diha-däɣ, ad-ədäläɣ Mässinäɣ, əqqələɣ-kāwän-dd.»

³⁷ Iššənkäš-in fälla-sän, äddeew d-Bətrus d-məddana-s n-Zäbdi wi n-əssin; ɣur-ässaɣät-wen-däɣ, ad-t-əssəntän iman-net təkma, ixwäl.

³⁸ Innä i-inəttulab wi dār-äddeew: «Äɣɣan iman-in, äɣɣan har išwar hi-äba, wär hanäɣ-iläqqädət eɖəs.»

³⁹ Iššənkäš-in daɣ fälla-sän a əndärrän, irkäɣ, äsdäs timme-net äkall, ad-itəddal Mässinäɣ, ijanna: «Ya Abba-nin, kunta ämmukkän a-wen-däɣ, səssijə-ahi tisanant-ta-däɣ! Hakd a-wen-däɣ, äjet erhet wa-näk wädden wa-nin.»

⁴⁰ Iqqäl-dd Ƴisa inəttulab-net wi n-käraɖ, ogäz-tän-dd əttasän; issənkär Bətrus, inn'-as: «Ƴas käwänəɖ, indär-awän wäla-däɣ ad-där-i tahərəm iyyän n-ässaɣät ɣas däɣ-wär käwän-ilɣed eɖəs!

⁴¹ Ɖnkärät, əɖəlät Mässinäɣ i-ad-kāwän-agəz däɣ-tändärbaten n-Iblis; ägg-adəm, tidət-däɣ, a-s äsidärhän amišəl n-a äjjeen ähuusken mäšan, igdal-as iba n-äššahät n-tumast-net amišəl n-a-wa irha.»

⁴² Oläs-dd daɣ äsihe wa s-əssin, iššənkäš-in fälla-sän, ad-itəddal Mässinäɣ, ijanna: «Abba-nin, kunta wär t-illa fäw əmmək s-äɣläsəɣ däɣ-tisanant-ta-däɣ, adiš, äjet erhet-näk.»

⁴³ Oläs-tän uɣəl, ogäz-tän-dd, ij'-asän eɖəs aläɣad-wa-däɣ fäl hasän-indär wäla ad-arən tiŋtawen-näsän.

⁴⁴ Ifäl-tän daɣ äsihe wa s-käraɖ, idäl daɣ Mässinäɣ s-əmmək-wənnin-däɣ.

⁴⁵ Iglä, iqqäl-tän-dd, issənkär-tän, inn'-asän: «Ƴas käwänəɖ təttaşäm, sinfum härwa? Ɖnkärät-dd ämära, ässaɣät n-atärməs-in, ohäz-dd. Ägg-ägg-adəm, ad-itwäɣdär, ijješ ifassän n-inäsbäkkädän,

⁴⁶ ənkärät, äglät-anäɣ; os'-anäɣ wa hi-e-isəssäɣdärän.»

*Atärməs n-Ƴisa
(Marqəs 14:43-53; Luqa 22:47-53; Exya 18:2-11)*

⁴⁷ Wär-issəmdä Ƴisa tənna n-a-wen-däɣ a-s Ƴähudəs, wa n-iyyän däɣ-inəttulab-net wi n-märəw d-əssin da-däɣ, äsiläl tamətte täjjeet dd-äšimašälän imänokalän n-käl-tikutawen d-inušämän n-Išrayil; əšləjän iyyäd tikobawen, äwwayän iyyäd iboriyän.

⁴⁸ Tamətte-ten-däɣ, ij'-as Ƴähudəs wa n-ämäɣdar tamätart däɣ-has-inna: «Ähaləs wa s-hi-tənhäyäm har t-osäsəɣ däɣ-idmarän-in, ənta a-s Ƴisa, ärməsät-t.»

⁴⁹ Osä-dd Yāhudəs, oḡād iman-net s-Ŷisa, inn'-as: «Älfäqqi-nin, jey-ak äsafu!» Osäs-t däḡ-idmarän-net.

⁵⁰ Inn'-as Ŷisa: «Amidi-nin, äj ya a-wa s-dd-tosed». Toḡa tamötte fäll-Ŷisa älwäqq-wen-däḡ, tərmas-t.

⁵¹ Iggäd-dd iyyän däḡ-inəttulab-net, ilbäy-dd tākoba-net, ištäf-dd sār-s taməzzujt n-akli n-ämānokāl n-käl-tikutawen.

⁵² Iytäl-t Ŷisa, inn'-as: «Suḡəl tākoba-näk däḡ-titar-net; ere iknäsän s-tākoba, ad-ämmät s-tākoba.

⁵³ Äddoobey teḡäre n-Abba-nin ämära-däḡ, afäl t-äḡrey day, šik-däḡ a-s mad-sār-i dd-išəmmişəl märaw ajhanän n-änjälösän d-össin hi-ohäḡnen tinahäḡen

⁵⁴ mäšan afäl ija a-wen, əndek əmmək wa s-mad-itbat a-wa fäll-i ənnän ännäbitän däḡ-əlkəttabän n-Mässinäḡ.»

⁵⁵ Innä Ŷisa i-tamötte darät-a-wen: «Ajän näkk änaḡtaf a ämoosäḡ a-s hi-dd-takkäm d-tikobawen d-iboriyän i-ad-hi-tärməsäm? Wädden hannäyäm-ahi hak ašäl äqqimäḡ däḡ-ehän n-ämudd wa mäqqārän saḡrey, mafäl wär hi däḡ-s tərmesäm?

⁵⁶ Mäšan, əlmədät a-s a-wa ijän iket-net, ija i-ad-itbət a-wa ənnän ännäbitän däḡ-əlkəttabän.» Äjewädän inəttulab-net iket-näsän, oyyän-t-dd ənta ḡas jer-išənja-net.

Tebädde n-Ŷisa dat-äššäreḡa wa mäqqārän

(Marḡəs 14:53-65; Luḡa 22:54-55, 63-71; Exya 18:12-14, 19-24)

⁵⁷ Təlwäy tamötte ta tərmasät Ŷisa s-Qayäf wa n-ämānokāl n-käl-tikutawen-i s-a-s itäj a-wen-däḡ äžžimmäḡän ḡur-s älyulam n-Ättäwrät d-inušämän n-Işrayil.

⁵⁸ Tamötte-en, ij'-as-dd Bətrus alkum šejren har təjjäš ammas n-äḡalla n-ehän n-ämānokāl n-käl-tikutawen; osä-dd Bətrus, ijjäš ənta-däḡ, igla äqqima edes i-gärditän, ad-isimäqqul i-ajilal n-tanfust-ta-däḡ.

⁵⁹ Eggädän-dd imānokälän n-käl-tikutawen d-käl-Sinhidrin† wi tirənen äššäreḡa iket-näsän, ad-tammäḡän i-tajuhe n-bahu ənnän fäll-Ŷisa i-ad-t-sidəwän däḡ-äššäreḡa, sənnəhəjjən-t d-tamättant;

⁶⁰ ənnän fälla-s bahutän äjjootnen mäšan, wär tän-iha a ibdadän fäll-härät. Eggädän-dd əssin äddinät äjjəyhnən s-bahu,

⁶¹ ad-jannen: «Ähaləs-i-däḡ, näjjəyha a-s inna, äddoobät ad-änd ehän n-ämudd wa mäqqārän n-Mässinäḡ, idəy-dd iyyän äynayän däḡ-edägg-net däḡ-kärad išilan.»

⁶² Isl' ämānokāl n-käl-tikutawen i-a-wen ḡas, ihä-dd ibdad, imməjräd, innä i-Ŷisa: «Ma tənned däḡ-a-wa fälla-k itawännən? Mäjräd!»

⁶³ Wär t-illa a has-inna Ŷisa. Inn'-as ämānokāl n-käl-tikutawen älwäqq-wen: «Jaräḡ-käy s-idəm n-Mässinäḡ-i iddärän, läḡät-anäḡ kunta käyy a-s Älmasex wa n-Rure-s n-Mässinäḡ.»

⁶⁴ Inn'-as Ŷisa: «Käyy iman-näk, tənned-tän; ässiilmädäḡ-käy day a-s ḡur-ašäl-i-däḡ, ad-tənhəyäm Ägg-ägg-adəm, äqqiima daw-aḡil n-Wa ilän tärna iket-net, taləsəm-t day ahänay, iqqal-dd, ifal-dd išənnawän, inay tijäräken.»

⁶⁵ Isl' ämānokāl n-käl-tikutawen i-a-wen-däḡ ḡas, ijjäš-t älhäm, wa-däḡ fäl, irmäs err n-eräswey-net, äşḡarrawät-t fäll-iman-net, innä: «A-wa äskafär, wädden salläm-as a-s äskafär; ma nətajj i-tijuhawen day? Igdäh-anäḡ a-wa däḡ-inna meḡ ma tənnäm?»

⁶⁶ Ənnän-as: «Wa ənta, änihäjjä d-tamättant!»

⁶⁷ Ad-fälla-s situfän, dabbäḡän-as, ḡazzän däḡ-s iyyäd,

⁶⁸ jannen-as: «Eyaa Älmasex, luləy ya, təlläḡed-anäḡ mi hak-istäḡän?»

† 26:59 26:59 A-wa älzämaḡät n-inušämän d-imizärän n-käl-Işrayil wa itirən äššäreḡa, əntəneḡ a-s älcəllitän, oşəḡän day tamötte d-əlxəkum d-äddin.

*Akuddəl n-Bətrus i-Ŷisa Ālmasex**(Marqəs 14:66-72; Luqa 22:56-62; Exya 18:15-18, 25-27)*

⁶⁹ A-s itäj a-wen-däx, äqqiima Bətrus däx-təfərre n-ammās n-äxalla. Tos'-e-hidd tänaxdimt tiyyät, tənn'-as: «Käyy-i-däx hannäyäx, käla täddewäd d-Ŷisa wa n-Galilä?»

⁷⁰ Äkkuddäl Bətrus a-wen dat-äddinät iket-näsän, inn'-as: «Wär-əssenäx a däx-hitässewäläd.»

⁷¹ Innä Bətrus a-wen xas, äškataräš s-emm n-äxalla n-ehän, tənähäy-t day tänaxdimt tiyyät, ad-janna i-äddinät wi t-əllanen dihen: «Hannäyäm-t ähaləs-wadäx, käla äddew d-Ŷisa wa n-Näširät.»

⁷² Ad-itəhhađ Bətrus išənnawän d-äkall, ijanna: «Ähaləs-wadäx s-hi-jännem, wär t-əzzeyäx.»

⁷³ A əndärrän darät-a-wen, əkkän-t-dd äddinät əbdadnen däx-ammās n-äxalla-endäx, ənnän-as: «Ijmađ-t äššək a-s käyy-däx, iyyän däx-äddinät wi n-Ŷisa, temäsläxt-näk iman-net a täsdättet a-wen.»

⁷⁴ Ad-itähhađ Bətrus, ilaqqän iman-net siha d-siha, ijanna: «Ənneç-awän, ähaləs wa s-hi-jännem, wär t-əzzeyäx.» Diha-däx d-innä a-wen-däx, ad-iwät ekäz äxora.

⁷⁵ Iktä-dd Bətrus mäjräd wa s-käla has-t-ija Ŷisa, a-s has-inna: «Wär mad-iwət ekäz äxora ašäl-i-däx s-wädden täkkuddäläd-ahi har kärađ ihändäggan.» Izjār darät-a-wen, ad-ihall a-wa-däx has-ja tisanant.

27*Tebädde n-Ŷisa dat-Bilatəs**(Marqəs 15:1; Luqa 23:1-2; Exya 18:28-32)*

¹ Äffäw xas, əžžəmmäxän imänokalän n-käl-tikutawen d-inušämän n-Işrayil, ətəffän iyyän n-emm däx-isälan n-iji n-iman n-Ŷisa,

² ərmäsän-t, jän däx-s tišəm təzzar, əlwäyän-t s-Bilatəs wa n-gəfär.

*Imməntäl Yähudəs i-iman-net**(Ijitän 1:18-19)*

³ Inhäy Yähudəs-i t-issäxdärän a-s äššärexa n-tamättant a əxtäsän i-Ŷisa xas, ämmujrüz a-wa ija; ikk' imänokalän n-käl-tikutawen d-inušämän n-Işrayil, äsoxäl-asän kärađät timərwen n-ərriyal n-azrəf wi t-əkfan.

⁴ Os'-en-dd, inn'-asän, «Ofəç abäkkəđ, Ŷisa, wa jəç däx-ifassän-näwän, wär t-illa a ixsad.» Ənnän-as: «Un, ma näkkul? A-wen əššäxəl-näk.»

⁵ Irmäs Yähudəs azrəf-ənnin, ijär-asän-t-in däx-ehän n-ämudd wa mäqqärän təzzar, iglä, ässeläy ağan, ija tärsəm däx-err-net, imməntäl i-iman-net.

⁶ Əkkəmen-dd imänokalän n-käl-tikutawen azrəf wa hin-ijär mäšan, ənnän: «Wär hanäx-xälal iji n-azrəf-wa-däx fäll-wa n-ehän n-ämudd wa mäqqärän, ed ənta a-s ätwäjjän iman n-ähaləs.»

⁷ Əžžəmmäxän däx-isälan n-a-wa mad-əjən i-azrəf-en, ohärän emm, ənnän, ad-särs žänšən ašəkrəš n-ähaləs iyyän hin-ižanšen iləkkən, i-ad-umas edägg-en, tizəska i-iməjarän.

⁸ Däx-təssəba n-äddäbara-wen-däx a fäl har ašäl-i-däx, təfərre-ten-däx, iwär-tät isəm: «Ašəkrəš wa n-ašni.»

⁹ Amoos a-wen-däx jän a ässitbätän a-wa innä ännäbi Yirmiya,† a-s innä däx-əlkəttab-net:

«Ärmäsän kärađät timərwen n-ərriyal n-azrəf, äłqim-wen-däx a-s t-əđkəđän käl-Işrayil,

† 27:9 27:9 A-wa ännäbi dd-əzzarän i-Ŷisa, älöläy däx-isälan-net säđisät timəđ n-awätay dat-tiwit-net.

ənta-den-däx a-wa dār-ässagdahän älcim n-ägg-adəm,
 10 əžžənšan sār-s ašəkrəš wa n-i n-iləkkān
 s-əmmək wa s-hi-tān-innä Emäli.»

Ämewäy Ȳisa s-Bilatəs
(Marqəs 15:2-5; Luqa 23:3-5; Exya 18:33-38)

11 Älwäqq wa dd-ibdäd Ȳisa dat-Bilatəs wa n-gəfär, issəstän-t, inn'-as: «Ak, käyy a-s ämänokal n-käl-Älyähud meḡ?» Inn'-as Ȳisa: «Käyy iman-näk, tənned-tän.»

12 Eggädän-dd imänokalän n-käl-tikutawen d-inušämän n-Işrayil, ad-t-saḡlamän siha d-siha mäšan, wär t-illa a hasän-inna.

13 Innä gəfär i-Ȳisa: «Ajän käyy, wär səlləd i-tikunen ti fälla-k titwənninen?»

14 Wär t-təlla täfert dd-təzjarät emm n-Ȳisa, iqqän a-wen eyäf n-gəfär.

Bäryäbbas wa n-emäjj n-iman
(Marqəs 15:6-15; Luqa 23:13-25; Exya 18:39-19:16)

15 Äzzäman-en, hak ämudd n-Faška, äsiwäyy'-in gəfär u-takärmüt wa däx-s təttär tamətte.

16 A-s itäjj a-wen-däx, ih' ähaləs s-isəm-net Bäryäbbas takärmüt, isəm-net iyyän Ȳisa ənta-däx, wär t-illa ere s-wädden issan fäll-terwidəma-net.

17 Inhäy Bilatəs tamətte-ta dd-təžžəmmäḡät sār-s ḡas, inn'-asän: «Läḡätät-ahi, əndek jer-meddən-wi-däx n-əssin wa s-tärham a hawän-t-in-səwwəyyäḡ? Ma tässofäm Bäryäbbas meḡ Ȳisa wa s-itawänna Älmasex?»

18 Ij'-asän Bilatəs asəstan-wen-däx fäl-a-s issan a-s təḡḡäre n-tismiten-näsän ḡas a fäl ästärmäsän Ȳisa.

19 Äqqiima Bilatəs härwa däx-edägg wa däx-iḡattäs äššäreḡa a-s dd-täšmašäl hänne-s äwadəm sār-s i-ad-wär-isəmtətil iman-net d-iman n-ähaləs wärän iḡšed härät ed tənn'-as, əndähad, əgdälän-as imänäwnäwän n-ähaləs-en-däx edəs.

20 Eggädän imänokalän n-käl-tikutawen d-inušämän n-Işrayil, äšhäššälän tamətte i-ad-təttär däx-gəfär ad-hasän-dd-isəwwəy Bäryäbbas, ämmät Ȳisa.

21 Oläs daḡ gəfär, inn'-asän: «Əndek jer-meddən-wi-däx n-əssin wa s-tärham ad-hawän-t-in-səwwəyyäḡ?» Ənnän-as: «Bäryäbbas.»

22 Inn'-asän Bilatəs: «Ȳisa-š wa s-itawänna Älmasex, ma has-e-äjäḡ?» Ənnän-as iket-däx-näsän: «Itwəşləbet fäll-tajəttewt!»

23 Inn'-asän Bilatəs: «Mafäl, ma iḡšäd t-äsiinähäjjän d-tamättant?» Äşḡäyyän daḡ s-äşşahät: «Itwəşləbet fäll-tajəttewt.»

24 Inhäy Bilatəs a-s wär t-illa a infa mäjräd-net ed, təssəntä tamətte amdərway n-əššənju ḡas, idkäl-dd äkoss han aman, ässeräd ifassän-net dat-tamətte təzzar, inn'-asän: «Ähaləs-i-däx ya ämaḡdal, täjjihäm a-s wär däx-i əḡmənen iman-net; oyyeḡ jere-wän dār-s.»

25 Tənn'-as tamətte iket-net: «Əyya, nərḡa s-a-wen; əḡmənnət iman-net däx-näḡ näkkäneḡ d-ihäyawän-nänäḡ.»

26 Äswäyy'-asän-in Bilatəs Bäryäbbas, äswäjjä tiwit n-ebärtäk däx-Ȳisa təzzar, ikf'-asän-t i-ad-itwəşləb fäll-tajəttewt.

Jän əssärdusa Ȳisa tekäškäšt
(Marqəs 15:16-20; Exya 19:2-3)

27 Älwäyän əssärdusa wi n-gəfär Ȳisa s-ammās n-ehän wa n-gəfär, iḡläyḡäläy-t-dd dihen ejhän n-əssärdusa imdan,

28 əkkäsän däḡ-s isəlsa-net, əssəlsän-t anäkäbba šäggäḡän,

²⁹ jän-as älmät, korona, a-wen, takənbut šund ta n-imānokālän təzət dəḡ-isənnanän, jän älmät tāborit ta n-təmmənukəla dəḡ-äfuss-net wa n-aḡil, ad-rakkāḡän data-s, dazžän, jannen-as: «Ämänokal n-käl-Älyāhud, nəj'-ak gärdəbu!»

³⁰ Situfän fälla-s, tihāḡän dəḡ-s tāborit ta jän dəḡ-äfuss-net, təggatän-t sār-s fäll-eḡäf.

³¹ Əssəgdähän dəḡ-tekäškäšt ta tän-təšlät ḡas, əkkāsän-dd fälla-s anākābbawənnin šəggāḡän, əssoḡälän-as isəlsa-net təzzar, əglän dār-s i-ad-itwəšləb fäll-tajəttewt.

Atwəšləb n-Ḳisa fäll-tajəttewt

(Marḡəs 15:21-32; Luḡa 23:26-43; Exya 19:17-27)

³² Əglan dār-s a-s əmmoqqāsän d-āhaləs n-tadābayt ta n-Qərwan s-isəm-net Simyon; əšhāššälän-t alənji n-tajəttewt ta fäll-mad-itwəšləb Ḳisa.

³³ Əkkän d-Ḳisa edəgg s-itawānna: Gälgota, a-wen älmāḡna-net: «Edəgg wa n-akārkor.» Əwwādän-in edəgg-en ḡas,

³⁴ əssärtāyän əssärdusa asməd d-asāfar iyyän ifannāžän tisanant i-ad-has-t-səswən, māšan, əkrābbät-t ḡas, unjāy sār-s.

³⁵ Əšlābän-t əssärdusa fäll-tajəttewt ḡas, jän tisāḡeren i-ad-užanän isəlsa-net jer-iman-nāsän; əmoos a-wen a əssiitbätän a-wa s-kāla tän-innä ännābi iyyän a-s innä: «Äžunän isəlsa-nin jer-iman-nāsän jän tisāḡeren fäll-anākābba-nin.»

³⁶ Əssəmdän a-wen-dəḡ ḡas, əqqimän, jän ənniyät i-Ḳisa,

³⁷ əttəytāyän əllox jənnəj-s i-ad-əlmədän äddinät äddälil wa sār-s dd-orāwän tamättant. Əllox-en, iktab fälla-s:

«A-WA ḲISA WA N-ÄMÄNOKAL N-KÄL-ÄLYÄHUD».

³⁸ Ašäl-en, əmizäyyen əssin inaytafän atwəšləb d-Ḳisa; ätwəšləb iyyän daw-aḡil-net, ätwəšləb wa iyyādän daw-təšälje-net.

³⁹ Iqqäl Ḳisa tekäškäšt i-äddinät-wi tikəynen, gaggärän-t, siwliwilän iḡäfawän-nāsän,

⁴⁰ jannen-as: «Əyyaa, kāyy-i innän täddoobed teräzže n-ehän n-ämudd wa məqqārän taləsäd-t edey dəḡ-käraḡ išilan, əḡləs iman-nāk ya ämära! Kunta tidət-dəḡ a-s kāyy a-s Rure-s n-Mässināḡ, zubbət-dd tajəttewt!»

⁴¹ Ad-ḡazžän dəḡ-s dəḡ imānokālän n-käl-tikutawen d-älḡulam d-Äṭṭäwrät d-inušämän n-Işrayil, jannen:

⁴² «Wädden iḡlās äddinät wi iyyādnen, iḡləset ya iman-net ämära. Ikkəset-dd iman-net fäll-tajəttewt, dihen ad-nəfləs a-s ənta a-s ämänokal n-Işrayil;

⁴³ wädden oman s-Mässināḡ, iḡləset-t Mässināḡ ya ämära kunta ənta irh'-e, ed innä, ənta a-s Rure-s.»

⁴⁴ Əggädän-dd dəḡ inaytafän wi ätwəšləbnen edes-has, ad-t-gaggärän əntäneḡ-dəḡ s-əmmək-en-dəḡ.

Tamättant n-Ḳisa

(Marḡəs 15:33-41; Luḡa 23:44-49; Exya 19:28-30)

⁴⁵ Əlsänät tihay ārori n-əkall iket-dəḡ-net wa-dəḡ n-tarāhut hundəḡ har tezzar.

⁴⁶ Təjä tezzar ḡas, əşḡarät Ḳisa s-afälla, innä dəḡ-tawalt-net:

«Yälloy, Yälloy,
lama sərbəxtani?»

A-wen älmāḡna-net:

«Mässi-ḡ Mässināḡ, Mässi-ḡ Mässināḡ,
mafäl hi-təyyəd d-iman-in
dəḡ-tisanant-ta-dəḡ?»

47 Æslän-as äddinät øbdadnen dihen, wär-øfhemän a-wa ijänna ɣas, ad-jannen: «Säjdät-as, ännäbi Ƴøli a iɣarr!»

48 Ošäl-dd iyyän däɣ-sän älwäqq-wen-däɣ, issəlmäɣ täduft təttaalät fäll-äbøri däɣ-bønegär təzzar, ässok'-et-dd emm n-Ƴisa i-ad-tät-isuməm, infəw-t a-wen däɣ-fad

49 mäšan, ønnän-as imidiwän-net: «Æšlöy-as, äyy'-e ad-nønhøy kunta ad-t-dd-ass ännäbi Ƴøli, iɣləs-t.»

50 Äsɣärät Ƴisa daɣ s-äššahät, təzzar, øjmäðän-t iman.

51 Diha-däɣ d-ija a-wen a-s ärido wa ibðän edägg n-ämudd wa šäddijän d-wa iknän təššødje däɣ-ehän n-ämudd wa mäqqärän da-däɣ a-s iqqärrawät däɣ-ammas, wa-däɣ n-afälla-net har ider-net; äškäðkäd äkall, äššoren idaɣän;

52 ämeränät tizəska, ønkärän-dd inømmuttan n-imumənän äjjootnen

53 ðarät-tanäkra n-Ƴisa jer-inømmuttan. Äjjøyhän äddinät äjjootnen tän-ønhaynen a-s dd-øjjäšan aɣrəm wa šäddijän n-Yärussälam ðarät tanäkra-näsän jer-inømmuttan.

54 Inhäy käbtän iyyän n-käl-Roma d-əssärdusa wi jänen ønniyät i-Ƴisa a-wa ijän d-aškəðkəð wa ija äkall ɣas, ärmäɣän, ad-jannen: «Tidət-däɣ a-s ähaləs-i-däɣ, Rure-s n-Mässinäɣ.»

55 Èbdadnät daɣ tiðeden äjjootnen dihen, øswaðnät däɣ-ijøj däɣ-a-wa ijän iket-net. Tiðeden-tin-däɣ a-s käla ødhälnät Ƴisa, äddewnät ðär-s wa-däɣ n-a ifäl teje ta n-Galila har øntänäteð-da-däɣ;

56 h'-enät Märyäma ta n-Muläždaløyät d-Märyäma ta n-ma-s n-Yaqub d-Yusəf, h'-enät daɣ ma-s n-dägg-Zäbdi.

Azəkka n-Ƴisa

(Marqəs 15:42-47; Luqa 23:50-56; Exya 19:38-42)

57 Tokäy takkäšt ɣas, osä-dd ägg-ehäre iyyän la taɣrəmt ta n-Arimata n-anätta lib n-Ƴisa s-isəm-net Yusəf.

58 Ènta-en-däɣ a ikkän Bilatəs, ittär däɣ-s turhajät n-ad-dd-ikkəs tafəkka n-Ƴisa fäll-tajəttewt, ištär-tät; irð'-as Bilatəs s-a-wen.

59 Ikkäs-dd Yusəf tafəkka n-Ƴisa fäll-tajəttewt, ikn'-et, issəls'-et tefit

60 təzzar, issəns'-et däɣ-azəkka äynayän s-äru tiɣaš i-iman-net däɣ-esäwäl; äsɣäränɣarät-t-dd ðarät-a-wen tähunt mäqqoorät, ätəubbät sär-s emm n-azəkka təzzar, iglä.

61 A-s itäjj a-wen-däɣ, tøbdad Märyäma ta n-Muläždaløyät d-tanømmäɣrut-net ta iyyäðät, äqqimänät tissønen dat-azəkka-en-däɣ, hannäynät a-wa ijän iket-net.

62 Äba Ƴisa däɣ-ašäl wa n-dat-wa d-simøjnün käl-Älyähud i-ašäl wa n-əssəbət-i n-täsonfat. Ašäl wa ilkämän i-wen n-əssəbət wa n-täsonfat, økkän imänokalän n-käl-tikutawen d-käl-faris Bilatəs, ønnän-as:

63 «Ämänokal-nänäɣ, nəkittəw a-s äwadəm wa išinməšrøyän äddinät, a-s iddär, innä, afäl t-äba, kärað išilan ðarät-tamättant-net, ad-dd-inkär jer-inømmuttan.

64 Närha däɣ-k, ad-səwwøjjed ønniyät i-azəkka-net hundäɣ har akøyən kärað išilan-win-däɣ s-innä, dihen, wär mad-akrən inøttulab-net tafəkka-net, øffärän-tät təzzar, ønnən i-tamøtte a-s inkär-dd jer-inømmuttan. Afäl jän a-wen, ad-tajär tanməšrayt ta jän ta ija ønta iman-net.»

65 Inn'-asän Bilatəs: «Äjät a-wa s-tärhäm. Ènhøywät, härät däɣ-əssärdusa-dədi, səwwøjjem-tän ønniyät i-azəkka s-ømmək wa s-tärhäm.»

66 Èkkän azəkka, øssəbdädän data-s øssärdusa təzzar, øknän-t ätəabbu i-ad-wär-itødubut äwadəm wäl' iyyän arr-net.

28

Inkär-dd Yisa jer-inømmuttan
(Marqəs 16:1-11; Luqa 24:1-12; Exya 20:1-10)

¹ Täbboqqät tifawt n-ašäl wa n-čarät wa n-əssəbət-i n-täsonfat ɣas, təkka Märyäma ta n-Muläždaləyät azəkka täddeew d-Märyäma ta iyyädät n-tanəmmäɣrut-net.

² A əndärrän, äzzubbät-dd änjälos n-Emäli dd-ifalän išənnawän, äškädkäđ äkall s-äššahät, äşɣäraräd-in tähünt ta härät emm n-azəkka, äqqima fälla-s.

³ Änjälos-i-däɣ, äsimäɣmäɣ šund essam, jan isəlsa-net təmölle-i-däɣ mäqqärät.

⁴ Ija a-wen ɣas, jän əssärdusa wi jänen ənniyät i-azəkka tarəmmeyt-ta-däɣ fäl dd-hän äbbunbäyän šund ämmun.

⁵ Imməjräd änjälos i-tiđeden, inn'-asnät: «Wär tärmeɣmät; əssanəɣ a-s Yisa wa ätwäšläbän fäll-tajəttewt a-s tammäɣmät;

⁶ äbas t-illa diha, inkär-dd jer-inømmuttan s-əmmək wa s-tän-innä, əyyäwmät, ənhəymät edägg wa s-käla däɣ-s insa.

⁷ Šəwənkətmät ämära, təjəmət isälan n-tanäkra-net jer-inømmuttan i-inəttulab, tälläɣätmät-asän daɣ a-s äzzar-awän iket-näwän s-Galila ed dihen-däɣ ad-t-mad-tənhəyäm. Ənta-den-däɣ mäjräd wa s-dd-ämešäləɣ i-ad-hakmät-t-in-səssiwəđäɣ.»

⁸ Fälnät šik azəkka, tärtay-asnät tarəmmeyt d-təməɣäre n-tedäwit, ošälnät i-ad-əjənät jänät isälan däɣ-inəttulab-net.

⁹ Wär t-illa a hin-əjrahnät a-s hasnät-dd-ilkäđ Yisa iman-net, ij'-asnät əsafu. Ohäznät-t-dd, ärkäɣnät data-s, ad-timəllutnät i-idarän-net, ɣäbbädnat-t.

¹⁰ Inn'-asnät: «Wär tərmeɣmät, əqqəlmät ayətma-ɣ, tənnəmət-asän a-s, äzzarəɣ-asän s-teje ta n-Galila-i-däɣ hi-mad-ənhəyän.»

Utär n-akuddəl n-tanäkra n-Yisa jer-inømmuttan

¹¹ Härwa hanät zäbo, əglanät a-s əkkän əssärdusa wi jänen ənniyät i-azəkka aɣrəm, äwwayän isälan n-a-wa ijän iket-net i-imänokalän n-käl-tikutawen.

¹² Əslän imänokalän n-käl-tikutawen d-inušämän n-Işrayil i-isälan-win-däɣ ɣas, äñɣäymän fäl a-wen. Inkär älzämaɣät-näsän ɣas, əkfän azrəf äjjeen i-əssärdusa təzzar, ənnän-asän:

¹³ «Əre käwän-issəstänän, ännät-as: osän-anəɣ-dd inəttulab n-Yisa s-ehäđ, nəttas, okärän tafəkka-net, əglän där-s.»

¹⁴ Ənnän i-əssärdusa: «Afäl əjjäšän isälan gəfär, ad-t-nəsəsmäđ fälla-wän, täɣləsäm.»

¹⁵ Ärmäsän əssärdusa azrəf-näsän, əglän däɣ-əššäɣəl-näsän, jän a-wa hasän-ätwännän. Ämoos a-s isälan-win-däɣ a əfläsän käl-Älyähud har ašäl-i-däɣ.

Ämašal wa mäqqärän issäɣläf Yisa inəttulab-net
(Marqəs 16:14-18; Luqa 24:36-49; Exya 20:19-23; İjitän 1:6-8)

¹⁶ Əkkän inəttulab wi n-märaw d-iyyän tađayt ta hät teje ta n-Galila hasän-ija Yisa tasəssiheart, ogäzän-t-in fälla-s.

¹⁷ Ənhäyän-t ɣas, ärkäɣän-as, ad-t-ɣabbädän mäšan, hakd a-wen-däɣ, han-tän iyyäd däɣ-s janen äššäk.

¹⁸ Ohäz-dd Yisa älzämaɣät wa n-inəttulab-net, inn'-asän: «Wär t-illa jer-işənnawän d-äkall a-s wädden əjrawəɣ fälla-s tärna;

¹⁹ a-wen-däɣ a fäl ämära, äglät; äkkät tiwsaten n-äddunya iket-däɣ-näsnät, səttuləbäm däɣ-snät äddinät, səlmäɣäm-tän däɣ-aman s-isəm n-Abba d-Rure-s d-Unfas Šäddijän,

²⁰ säɣrəm-tän amišəl n-a-wa s-hawän-omärəɣ iket-net. Näkk-da, ad-där-wän äddewəɣ, ədhaləɣ-käwän hak ašäl har təmdəw äddunya.» Amin!

Älənžil n-Ŷisa Älmasex wa iktäb Marqəs

*Ämašal wa dd-ässawäd Exya wa n-Enəsselmäx
(Mätti 3:1-12; Luqa 3:1-17; Exya 1:19-23)*

¹ Sānto n-Älənžil n-ŶisaÄlmasex wa n-Rure-s n-Mässinäx da:

² Enta-en-däx a fäll-innä ännäbi Saya† däx-əlkəttab-net:

«Enhöy! Äzizäräx-ak, inna Mässinäx,
änämmašul-in wa he-iknən tabarät-näk.

³ Änämmašul-en, äseḡarät däx-tenere, ijanna:

«Äknät tabarät n-Mässinäx,
səssiḡədät ibaran-net.»

⁴ Emmək-wen-däx a-s dd-osä Exya wa n-Enəsselmäx, ixattäb, ijanna i-äddinät:
«Utabät, tət-wəsəlmäxäm däx-aman i-ad-təjrəwäm tenäšše n-ibäkkadän.»

⁵ Ijanna a-wen-däx, ad-sär-s dd-zajjārän äddinät äjjootnen dd-falnen teje ta
n-Älyähudəyät d-ayrəm wa n-Yärussälam, safäkkarän-dd a-wa ämešälän däx-
ibäkkadän dat-tamətte, isalmaḡ-tän däx-aman n-ejänš wa s-itawänna Ŷurdəni.

⁶ Ils' Exya emäls iknan s-eläm n-amnəs warän amzadän, ijbəs s-taməntəka n-eläm,
iddar s-tašwält d-torawät.

⁷ Ixattäb, ijanna i-tamətte: «Ad-hi-dd-išrəy-i hi-ojārän tärna, ij'-ahi tifut ta-däx s-
wār-änhäjjäx wäla-däx d-ad-əddunkux i-ad-aräx issal n-tifädelen-net.

⁸ Näkk, aman a däx-käwän-salmaḡäx, mäšan ənta, Unfas Šäddijän a däx-käwän-e-
isəlmäx.»

*Atwəsəlməx n-Ŷisa
(Mätti 3:13-17; Luqa 3:21-22)*

⁹ Išilan-win-däx a däx-dd-ifäl Ŷisa tayrəmt ta n-Näširät häte teje ta n-Galila, ikkä-dd
Exya, issəlmäx-t däx-aman n-ejänš wa n-Ŷurdəni.

¹⁰ Diha-däx dd-izjār aman, ad-inhäy išənnawän a-s dd-ämerän, äzzubbät-dd fälla-s
Unfas Šäddijän däx-ännux n-tedäbert mällät,

¹¹ ijmäd-dd emäsli išənnawän, innän:
«Käyy-i-däx a-s Rure-x wa əkneeḡ tärha,
käyy a däx-äsriwän iman-in.»

*Äžžurräb Iblis Ŷisa
(Mätti 4:1-11; Luqa 4:1-13)*

¹² Šik ḡarät-a-wen, oxäd Unfas n-Mässinäx Ŷisa s-tenere,

¹³ ijä däx-s əkkozät timərwen n-ašäl, itizärrub-t Iblis, irtay d-iwäḡsan, äxdamän-as
änjälosän.

*Sānto n-ämašal n-Ŷisa Älmasex
(Mätti 4:12-17; Luqa 4:14-15)*

¹⁴ Ittärmäs Exya wa n-Enəsselmäx ḡas, ikkä Ŷisa teje ta n-Galila, ad-däx-s ixattäb
isälan n-Älənžil n-Mässinäx.

¹⁵ Ijanna i-äddinät: «Täqqän täwwäd! Təmmənəya n-Mässinäx, tohäz-dd; utabät,
tamənäm s-isälan n-Älənžil.»

† 1:2 1:2 A-wa ännäbi dd-äzzarän i-Ŷisa, äloläy däx-isälan-net əssayät timäd n-awätay dat-tiwit-net.

*Inəttulab n-Ŷisa wi äzzarnen
(Mätti 4:18-22; Luqa 5:1-11)*

¹⁶ Älliil Ŷisa asälim n-əjänš wa n-Galila a-s inhäy Simyon d-änŋa-s Idris, tøjjarän titarren-näsän däx-aman ed iməhhuyya n-imānan a ämoosän.

¹⁷ Inn'-asän Ŷisa: «Əlkəmät-ahi, ad-kāwän-əjəx meddən sār-i dd-sadawnen äddinät i-ad-tän-əxləsəx.»

¹⁸ Oyyän titarren-näsän älwäqq-wen-däx, əlkämän-as.

¹⁹ Illa-hin i-dihen a əndärrän, inhäy Ŷisa dägğ-Zäbdi: Yaqub d-änŋa-s Exya, samäkrasän titarren däx-turäft-näsän ta n-aman,

²⁰ iyr'-en-dd ässağät-wen-däx. Oyyän abba-näsän Zäbdi däx-turäft ta n-aman ənta d-inaxdimän, əlkämän-as.

*Amälšon wa äzozäy Ŷisa däx-Qäfärnaxum
(Luqa 4:31-37)*

²¹ Əkkän tağrəmt ta n-Qäfärnaxum; ij'-en ašäl wa n-əssəbət-i n-täsonfat dihen ɣas, ikka Ŷisaehän n-äddin wa n-käl-Älyähud, ad-däx-s isayra tamətte.

²² Əqqälän-dd äddinät ɣas oran imawän fäl əjjäruzät-i-däx hasän-ija a-wa isəyra, ed isayr'-en s-älxikmät n-ere issanän a-wa iha wädden, šund älyulam wi n-Ättäwrät.

²³ Ehän n-äddin-en, ih'-ee ähaləs ih' alšin, inhäy Ŷisa ɣas, ad-isayärat, ijanna:

²⁴ «Ya Ŷisa wa n-Näširät, ma däx-nəx tärhed? Ajän ahälak-nänəx a-s dd-tosed? Əssanəx ere wa tämoosäd, käyy-i-däx a-s: Wa Šäddijän dd-äšmašäl Mässinəx.»

²⁵ Äsmähäd däx-s Ŷisa, inn'-as: «Əttəf emm-näk, təzjărăd ähaləs-i-däx!»

²⁶ Äššäkädkäd alšin ähaləs s-əşşahät, əşyärät däx-işənnawän təzzar, izjār-t.

²⁷ Issärməx a-wa ijän äddinät, əqqälän-dd hak iyyän isastan amidi-net, ijanna: «Ma ämoos a-wa? Ma tämoos teğäre-ta-hi täynayät, täşsohet? Wa ənta wäla alšinän e-d fälla-sän äsmähäd, ad-əjən a-wa inna.»

²⁸ Šik-däx a-s intäj isəm-net däx-teje ta n-Galila iket-däx-net.

*Äzozäy Ŷisa tađəggalt n-Simyon d-imarhinän äjjootnen
(Mätti 8:14-17; Luqa 4:38-41)*

²⁹ Izjār-dd Ŷisaehän n-äddin wa n-käl-Älyähud ɣas, äddew d-Yaqub d-Exya s-ehän wa n-Simyon d-Idris.

³⁰ A-s hin-əwwädän ehän, tässinsa tenäde tađəggalt n-Simyon. Əlläxen-as sār-s äddinät älwäqq-wen-däx.

³¹ Os'-e-t, irmäs-tät-dd s-äfuss, issəbdäd-tät, tərza fälla-s tenäde, təbdäd, ad-tän-simjurut.

³² Tođa täfukt ɣas, ämewäyän-dd imarhinän d-iməlšan iket-näsän,

³³ äddew-dd aɣrəm iket-net dat-əmm n-ehän-wen-däx iha.

³⁴ Äzozäy däx-sän i äjjootnen əjrawnät täkmoten wären oleh, ikkäs dağ alšinän äjjootnen däx-äddinät. Alšinän əntäned, wär tän-itəyy ämmijrädän ed əssanän ere wa ämoos.

*Ämašal n-Ŷisa s-teje ta n-Galila
(Luqa 4:42-44)*

³⁵ Eməğär n-ašäl wa iyyädän, härwa janät tihay, inkär Ŷisa, ikkä tenere n-iman-net, ad-itəddal Mässinəx.

³⁶ Kälä has-itamməx Simyon d-imidiwän-net

³⁷ har t-əjrəwän, ənnän-as: «Tamətte iket-net a hak-təmmağät.»

³⁸ Inn'-asän: «Näkket tidbi ti n-data-nəx i-ad-hasnät-əxtəbəx əntänätəd-däx, ed a-wen-däx a-s dd-ämešäləx.»

³⁹ Issäxläy-dd teje ta n-Galila iket-net, ixatṭāb dāḡ-ihānan n-āddin wi n-kāl-Ālyāhud, itakkās alšīnān dāḡ-āddināt.

Āzozäy Ȳisa āhaləs ijraw jəri
(Mätti 8:1-4; Luqa 5:12-16)

⁴⁰ Osä-dd āhaləs ijraw jəri Ȳisa, irkāḡ data-s, ad-t-ilaqqād, ijann'-as: «Afäl tārhed a-wen-dāḡ, täddobed ad-hi-šəšdējād.»

⁴¹ Tānḡ'-e tāhanint-net, izzāl āfuss-net, iḡās-t, inn'-as: «Ārheēḡ-t, išdaj.»

⁴² Izzāy dāḡ-jəri ālwāqq-wen-dāḡ, šāddij.

⁴³ Ikn'-e Ȳisa asəmmətār təzzar, issəgl'-e māšan,

⁴⁴ inn'-as: «Wār jed isālan i-āwadəm wāl' iyyān, əgləw, səkən iman-nāk i-utikutawen, tējəd takute ta s-innā alāmār wa n-Mosa dāḡ-isālan n-təšədje-nāk i-ad-āllāḡāt i-āddināt a-s təzzeyād.»

⁴⁵ Māšan, igl' āhaləs-ənnin-dāḡ ḡas, wār t-illa ere dār-āmmoqqās s-wādden ija dāḡ-s isālan, ābas āddobāt Ȳisa ad-ijjəš aḡrəm wāl' iyyān ar s-ufār. Āqqima dāḡ-tenere ad-sār-s dd-təffalān āddināt išrutān n-ākall iket-net.

2

Āzozäy Ȳisa āhaləs ibdanān
(Mätti 9:1-8; Luqa 5:17-26)

¹ Hārāt n-išilan ḡarāt-a-wen, olās-dd Ȳisa uḡəl n-Qāfārnaxum. Ȳslān āddināt a-s ih' ehān wa dāḡ-itizəbbut ḡas,

² əkkān-t-dd s-əjut har ābas t-illa edāgg wāla-dāḡ dat-əmm n-ehān.

³ Āmmiijrād-asān dihen-dāḡ a-s t-dd-osān əkkəz meddən āmisawāynen anābdon iyyān,

⁴ māšan, igdāl-asān əjut n-tamətte ad-t-sānsən dat-Ȳisa. Āḡlāyān, āwwānān afālla n-ehān, əkkāsān-in əjobān-wi əsiitāxnen ehān dāḡ-tanāmhāla n-edāgg wa dāḡ-ibdād Ȳisa, āstārarān-dd s-axābabu wa jān anābdon, insa fäll-asəftāḡ-net.

⁵ Inhāy Ȳisa immun-nāsān ḡas, innā i-anābdon: «Alyaq, ātwānšān-ak ibākkadān-nāk.»

⁶ Edāgg-en, han-t hārāt dāḡ-ālyulam n-Āṭṭāwrāt. Ȳslān i-a-wa inna ḡas, ābjānjānān,

⁷ ad-jannen: «Wa ma t-āsihālān mājrād-wa-dāḡ? Āskafār! Mi āddoben tenāšše n-ibākkadān sāl Māssināḡ?»

⁸ Ilmād Ȳisa ḡur-iman-net ālwāqq-wen-dāḡ a-wa dāḡ-zinəzjumān, inn'-asān: «Mafäl tajjāšān erk inəzjam šund-wi-dāḡ ulhawān-nāwān?»

⁹ Ma ojārān tārāḡse jer-ad-tənnəd i-anābdon: «Ātwānšān-ak ibākkadān-nāk,» d-ad-has-tənnəd: «Ēbdəd, əḡkəl asəftāḡ-nāk, ārjəš.»

¹⁰ Ašāl-i, āssiilmādāḡ-kāwān a-s Āgg-āgg-adəm, ijraw fäll-ārōri n-ākall turhajāt n-tenāšše n-ibākkadān.» Innā Ȳisa i-anābdon ḡarāt-a-wen:

¹¹ «Ēneḡ-ak, əbdəd, əḡkəl asəftāḡ-nāk, əḡḡəl ehān-nāk.»

¹² Ibdād, iḡkāl asəftāḡ-net āssaḡāt-wen-dāḡ, iglā hannāyān-t āddināt iket-dāḡ-nāsān. Āqqimān-dd ḡas, tof'-en tākunt n-a-wa ijān, tiimələn Māssināḡ, jannen: «A-wa ijān ašāl-i-dāḡ, wār kāla t-nənhāy.»

Iyrā-dd Ȳisa Lewi i-ad-umas ānāṭṭalib-net
(Mätti 9:9-13; Luqa 5:27-32)

¹³ Olās Ȳisa əzājor, ikk' asālim n-əjānš wa n-Galila, ad-t-dd-takkān āddināt ājjootnen, isaḡr'-en.

¹⁴ Iгла дӑҕ-a-wen-дӑҕ a-s inhӑy Lewi ӑgg Ӑlfa, ӑqqiima дӑҕ-edӑgg n-ӑlxidmӑt-net, ӑmoos ӑnarmas n-tiwse, inn'-as Үisa: «Ӑlkӑm-ahi!» Ibdӑd Lewi, ilkӑm-as.

¹⁵ Darӑt-a-wen, ӑsmӑjӑrӑt Lewi Үisa s-ehӑn-net. Itaxӑyma Үisa дӑҕ-edӑgg wa n-imӑnsiwӑn a-s erk ӑddinӑt han inarmasӑn n-tiwse ӑjjootnen has-ӑlkammen da-dӑҕ; osӑn-dd, ӑnӑymӑn dӑr-s ӑnta d-inӑtṭulab-net.

¹⁶ Ӑnhӑyӑn ӑlӑulam n-Ӑtṭӑwrӑt n-taggayt ta n-kӑl-faris a-s ohar Үisa d-erk ӑddinӑt d-inarmasӑn n-tiwse ґas, ӑnnӑn i-inӑtṭulab-net: «Mafӑl itihӑr ӑlӑalim-nӑwӑn imӑnsiwӑn d-inarmasӑn n-tiwse d-erk ӑddinӑt?»

¹⁷ Isl'-asӑn Үisa ґas, inn'-asӑn: «Ӑddinӑt ӑssoxӑtnen, wӑr-ӑmӑtӑrӑn s-lӑxtur; imarhinӑn a sӑr-s ӑmiӑtӑrnen. Nӑkk, wӑr dd-ӑmešӑlӑy s-ӑddinӑt-wi ordӑnen iman-nӑsӑn iqqud, inӑsbӑkkaṑӑn a-s dd-ӑmešӑlӑy.»

Isӑlan n-ӑzum

(Mӑtti 9:14-17; Luqa 5:33-39)

¹⁸ Ašӑl iyyӑn d-ӑzumӑn inӑtṭulab wi n-Exya d-kӑl-faris, osӑn-dd ӑddinӑt Үisa, ӑnnӑn-as: «Mafӑl inӑtṭulab wi n-Exya d-kӑl-faris tuzamӑn, a-s ija a-wen wi-nӑk ӑntӑneṑ, wӑr tuzamӑn?»

¹⁹ Inn'-asӑn Үisa: «Aжӑn kӑl-tuksest, ilzam-tӑn ӑzum a ikk' ӑmazlay ill'-e jere-sӑn? A ikk' ӑmazlay ill'-e jere-sӑn, wӑr tӑn-ilzem ad-uзamӑn.

²⁰ Ӑlkamӑn išilan wi tӑn-e-ifel, dihen, ad-ӑjrӑwӑn s-ӑzum.

²¹ Wӑr t-illa ere itӑggatӑn tikӑst i-temӑlsit wӑššӑrӑt s-taswӑṑt n-tabdoṑt tӑynayӑt. Afӑl ija a-wen, wӑr-e ӑhaj a-s dd-e-tӑsӑr taswӑṑt ta tӑynayӑt fӑll-temӑlsit ta wӑššӑrӑt, tӑjj amӑnd ojӑrӑn wӑnnin.

²² Wӑr t-illa daṑy ere itajjӑn aman n-lӑxnӑb ӑynaynen, ӑxxiimmӑrnen дӑҕ-ijdad. Ere ijӑn a-wen har kӑfӑn aman-ӑnnin дӑҕ-ijdad, ad-has-sӑbbugqen ijdad-net, ifut darӑt-a-wen дӑҕ-lӑxnӑb hakd-dӑҕ дӑҕ-ijdad. Aman n-lӑxnӑb ӑynaynen ӑxxiimmӑrnen, iddidӑn ӑynaynen a дӑҕ-tӑn-itajj ӑwadӑm.»

Isӑlan n-ašӑl wa n-ӑssӑbӑt-i n-tӑsonfat

(Mӑtti 12:1-8; Luqa 6:1-5)

²³ Ašӑl iyyӑn n-ӑssӑbӑt-i n-ašӑl wa n-tӑsonfat, irӑs Үisa d-inӑtṭulab-net išӑkraš n-ӑlkӑma ad-dӑҕ-sӑn dd-nakkӑṑӑn inӑtṭulab-net tiṑӑyӑnen n-ӑlkӑma.

²⁴ Ӑnhӑyӑn hӑrӑt дӑҕ-kӑl-faris a-wa tӑn-išlӑn ґas, ӑnnӑn-as: «Ӑnhӑy, ma isawӑjjen inӑtṭulab-nӑk a wӑrӑn-itӑtwӑjj дӑҕ-ašӑl wa n-ӑssӑbӑt-i n-tӑsonfat?»

²⁵ Inn'-asӑn Үisa: «Adiš kӑwӑneṑ, kӑla wӑr tӑṑrem дӑҕ-ӑlkӑttab a-wa ija Dawӑd a-s ӑmӑtӑr, ӑlluz ӑnta d-imidiwӑn-net.

²⁶ Ӑtwӑnn'-anӑṑ, ijjӑš ehӑn n-Mӑssinӑṑ дӑҕ-ӑzzӑman wa d-ӑmoos Ӑbyatӑr ӑmӑnokal n-kӑl-tikutawen, ikša дӑҕ-tijelwen-ti ӑmoosnen takute i-Mӑssinӑṑ, s-wӑr t-illa ere s-t-tӑlla tetӑte-nӑsnӑt a sӑl kӑl-tikutawen, ikfa дӑҕ-snӑt daṑy meddӑn wi dӑr-s ӑddewnen.»

²⁷ Inn'-asӑn daṑy: «Wӑdden ӑgg-adӑm a dd-ixlӑkӑn i-ӑssӑbӑt, ӑnn-ak, ӑssӑbӑt a dd-ixlӑkӑn i-tӑnoflayt n-ӑgg-adӑm.

²⁸ A-wen-дӑҕ a fӑl Ӑgg-ӑgg-adӑm, a ӑnnihӑṑӑn даҕ a-wa s-ila ӑgg-adӑm d-a-wa s-wӑr ila s-ad-t-ӑj, дӑҕ-ašӑl wa n-ӑssӑbӑt-i n-tӑsonfat.»

3

Ӑzozӑy Үisa ӑhalӑs s-ӑqqur ӑfuss-net

(Mӑtti 12:9-14; Luqa 6:6-11)

¹ Olӑs Үisa darӑt-a-wen uješ n-ehӑn n-ӑddin wa n-kӑl-Ӑlyӑhud. Ill'-e dihen ӑhalӑs s-ӑqqur ӑfuss-net.

² Jan-as käl-faris ənniyät, tassänän ihäl ad-t-izuzəy dəχ-aşäl n-älχibadät, əjrəwän ya əsarü s-t-əssədlämän.

³ Innä Yisa i-əhaləs wa s-əqqur əfuss-net: «Əyyäw, əbdəd dəχ-ammäs n-älžəməyät.»

⁴ Innä i-älžəməyät dərät-a-wen: «Ak a xälälän dəχ-aşäl wa n-əssəbət-i n-təsonfat iji n-emärked, meχ iji n-a läbasän, igguz n-iman, meχ iji n-iman?» Wär t-illa ere has-innan härät.

⁵ Issäxläy-tän-dd asəwəđ n-adkär irtayän d-tisnant fäl tössəba n-təχart-i jän ulhawän-näsän, innä dərät-a-wen i-əhaləs: «Əzzəl əfuss-nək». İzzäl əfuss-net, izzäy.

⁶ Əzjārän käl-faris edəgg-en χas, ənmänhäyän d-taggayt ta n-käl-Harudəs dəχ-isälan n-əmmək wa s-mad-əjən iman n-Yisa.

Əzozäy Yisa əddinät əjjootnen dəχ-tamətte

⁷ Əddew Yisa dərät-a-wen d-inəttulab-net s-asälim n-əjänš wa n-Galila, təddew-dd sār-s tamətte təjjeet dd-falät teje ta n-Galila d-ta n-Əlyähudəyät,

⁸ iyyəd falän-dd Yärussälam, iyyəd əkall wa n-Iduma d-əkall wa iwārän aşrut wa n-emäynäj n-əjänš wa n-Çurdəni d-iχərman wi n-Tir d-Säyda d-älžəməyät əjjeen dd-ikkan daw-məsällät n-härätän wi itäj.

⁹ Innä Yisa i-inəttulab-net əlwəqq-wen, ad-has-səmməjnun turäft n-aman ijjäš i-ad-wär t-təsnəkmäm tamətte

¹⁰ fäl-a-s əzozäy dəχ-sän i əjjootnen hundəχ har əməra-dəχ, əqqälän-dd əddinät hak iyyän itikəl amidi-net fäl tārha n-ad-t-ədəsən.

¹¹ Iməlsän əntəneđ, e-d t-ənhäyän, ad-ärkäχän data-s, saχären, jannen: «Käyy a-s Rure-s n-Mässinäy»

¹² məšan, ikann dəχ-sän asəmmähəd i-ad-wär-əlläχen ere wa əmoos.

Inəmmušal wi n-məraw d-əssin (Mätti 10:1-4; Luqa 6:12-16)

¹³ İwwän Yisa dərät-a-wen tədəxt, iχrä-dd s-iman-net inəttulab wi s-irha, əkkän-t-dd.

¹⁴ Əsnəfrän dəχ-sän məraw d-əssin wi s-irha i-ad-t-əllan χur-s, əswär-tän isəm inəmmušal wi n-inaxtabän n-Ələnžil,

¹⁵ ikf'-en dəχ tärna n-ukəs n-alšinän dəχ-əddinät.

¹⁶ Əntəneđ-da wi n-məraw d-əssin əsnəfrän: Simyon wa əswär isəm Bətrus;

¹⁷ Yaqub d-ənğa-s Exya, wi n-dəgg-Zəbdi s-ij' isəm Boyärnažəs, a-wen əlməχna-net: dəgg-ejjaj;

¹⁸ İdris d-Fəlibb d-Bärtälamma d-Mätti d-Tomi d-Yaqub wa n-əgg Əlfa d-Tade d-Simyon wa n-əşšažəχ

¹⁹ d-Yähudəs İsxaryut-i t-e-isəssəχdärän.

Torda n-käl-ehän n-Yisa (Mätti 12:22-37; Luqa 11:14-23; 12:10)

²⁰ İqqäl-dd Yisa ehän χas, oläs-dd fälla-s əlžəməyät tidawt har əbas ijraw ənta d-inəttulab-net wälə əlwəqq s-əssokän härät imawän-näsän.

²¹ Əslän käl-ehän-net i-a-wen χas, əkkän-t-dd i-ad-t-ärməsän fäl-a-s jannen: «A-wa, immar-t härät.»

Ehän s-əknaşän məssaw-s, wär-e əhəj

²² Əggädän əlyulam n-Əttäwrät wi dd-fälne n Yärussälam, ənnän: «A-wa Abälzäbil, İblis wa n-əmənokal n-alšinän a t-ihan, ənta a t-ikfän tärna ta s-itakkäs əlšinän dəχ-əddinät.»

²³ Ixr'-en-dd Yisa, issäxläy-tän tangalt dāḡ-hasän-inna: «Ēndek əmmək wa s-tordam a-s Iblis äddoobät, ad-dd-iqqəl isattāḡ Iblis?

²⁴ Afäl dd-əqqälän käl-iyyän n-əddəwəl əknasän jer-iman-näsän, əddəwəl-en, wär-e ähaj ibdad.

²⁵ Ehän daḡ s-dd-əqqälän mössaw-s əknasän jer-iman-näsän, ehän-en, wär-e ähaj ibdad.

²⁶ Afäl ibdäd Iblis i-iməššerəkän-net, ad-tän-ikannäs, wär-e ähaj ibdad, sämdo-net ḡas a ikka.

²⁷ Wär t-illa ere äddoben ujəš n-ehän n-ähaləs n-anäkfor, awəy ilalän-net ar s-ad-t-ikrad təzzar, dihen, ad-udabät ad-awəy a-wa ihän ehän-net.»

Abäkkad wa s-wär t-təlla tenäšše-net

²⁸ «Äsidätteḡ-awän a-s abäkkad of'-ägg-adəm d-asəkkufär ija-dāḡ, äddoobät Mässinäḡ ad-has-t-in-änš,

²⁹ mäšan äwadəm wa äskafärän dāḡ-isälan n-Unfas Šäddijän, wär-ilkem ad-has-in-ätiwänša, ed iwär-t uḡlem n-abäkkad iḡlalän.»

³⁰ Ij'-asän Yisa mäjräd-wa-dāḡ fäl a ənnin s-ənnän: «Ih'-e alšin.»

Anna d-ayətma-s n-Yisa wi n-tidət (Mätti 12:46-50; Luqa 8:19-21)

³¹ Osän-dd ayətma-s n-Yisa äddeewän d-ma-s, əbdädän dat-əmm n-ehän, äšmašälän-dd sär-s äwadəm i-ad-hasän-t-dd-iḡär.

³² A-s itäj a-wen-dāḡ, äqqiima Yisa jer-tamətte has-jat afäraj; ənnän-as äddinät: «Təbdad ma-k d-ayətma-k [d-šätma-k] dat-əmm n-ehän, sastanän där-k.»

³³ Inn'-asän: «Ēndek anna-nin d-ayətma-ḡ [d-šätma-ḡ]?»

³⁴ Issäxläy-dd tamətte ta täqqimät akäyad-net, innä: «Ēnhəywät anna-nin d-ayətma-ḡ, əntäned-da-dāḡ.

³⁵ E d t-illäm ere itamašälän erhet n-Mässinäḡ, ənta a-s äḡḡa-ḡ d-wälätma-ḡ d-ma-ḡ.»

4

Tangalt ta n-änäsdamu (Mätti 13:1-9; Luqa 8:4-8)

¹ Oläs Yisa daḡ asəḡär n-tamətte dāḡ-asälim n-ejänš wa n-Galila. Täddew-dd sär-s tamətte täjjeet, ijjäš-as turäft n-aman, äqqima dāḡ-s, täqqimä-dd tamətte ənta təbdad dāḡ-asälim n-aman, täsijäd-as.

² Issäḡra äddinät härätän äjjootnen s-tangalen. Dāḡ-a-wa tän-issäḡra, inn'-asän ašäl iyyän:

³ «Säjdät! Käla izjär änäsdamu iyyän i-ad-iddumət ašəkrəš-net.

⁴ Älwäqq wa d-itidumut, oḡänät tiblalen tiyyäd dāḡ-äbara, äkkukären-tänät-dd igdaḡ, əksän-tänät.

⁵ Oḡa ašär iyyän jer-tihun, äffoqqät-dd šik ed wär-intem dāḡ-äkall,

⁶ täsmäqqät-dd täfukt jənnəj-s, təssärḡa isəffuqqa, äqqur-in a-di iket-net ed wär-əntemän ikewän-net dāḡ-härät.

⁷ Oḡa ašär iyyän dāḡ-tabəḡḡənt, tədwäl-dd fälla-s tabəḡḡənt, təzmäd-as, iḡräy-in.

⁸ Oḡa ašär wa iyyädän dāḡ-äkall olayän, ikräš aratan; ijä tiboläsen s-tiyyäd kərədät timərwen n-tablalt a tänät-iwarän, tiyyäd sädisät timərwen, tiyyäd temede.»

⁹ Inn'-asän ḡarät-a-wen: «Ere ilän timəzzujen s-islä-dāḡ, isäjdet!»

Äddälil wa fäl isayra Yisa tamətte s-tangalen (Mätti 13:10-17; Luqa 8:9-10)

¹⁰ Izjār-dd Yisa älžämaḡät ḡas, əssəstānān-t inəṭṭulab-net wi n-māraw d-əssin, d-äddināt wi sār-s dd-saḡlaynen d-älmāḡna n-tangalen ti ija.

¹¹ Inn'-asān: «Kāwāneḡ, təjrawām turhajāt n-ujreh n-əddāraj wa ämoosān isālan n-Təmmənəya n-Mässināḡ māšan, äddināt wi iyyādnen n-ajāma, a-wa s-e-əslən iket-net, tangalen a dāḡ-has-e-əslən i-innin:

¹² <Ad-əswadān, wār hənneyän, äsijädän, wār səllən; i-ad-wār t-illa a jarrähän, i-uday ad-utabän s-Mässināḡ, əjrewän tenäšše.> »

Älmāḡna n-tangalt ta n-änäsdamu
(Mätti 13:18-23; Luqa 8:11-15)

¹³ Inn'-asān daḡ: «Ḥas ta-dāḡ tangalt, wār tät-təjrehäm? Adiš əndek əmmək wa s-mad-təjrahäm tangalen ti iyyādnen?

¹⁴ Änäsdamu, ənta a-s änaḡtab n-mäjräd n-Mässināḡ.

¹⁵ Äddināt iyyād, olähän d-äbara wa dāḡ-oḡänāt tiblalen. E-d əslän i-mäjräd n-Mässināḡ, šik a-s tän-dd-itis Iblis, isəttəw-asān-t-in.

¹⁶ Äddināt iyyād, olähän d-tihun-ti jer-oḡänāt tiblalen; e-d əslän i-mäjräd n-Mässināḡ, ad-əhləyləyän, äqbəlän-t šik

¹⁷ māšan, wār t-təyyən ikraš ikewän dāḡ-ulhawän-näsän, ad-əjən äzzāman əndärrän äkoyädän dāḡ-s māšan afäl dd-tosa tissust meḡ osä-dd älyizabät dāḡ-təssəba n-mäjräd n-Mässināḡ, ad-hin-əbbuṭṭəlän a-wa s-omānän.

¹⁸ Äddināt iyyād, əntāneḡ a-s tabəṇṇənt ta jer-oḡänāt tiblalen, ad-əslən i-mäjräd n-Mässināḡ

¹⁹ māšan, ad-has-əzmədän dāḡ-ulhawän-näsän s-tārha n-wälät-äddunya d-eyläl n-tārha n-ajmur-net d-derhanän iyyād äjjootnen, wār t-illa a sār-sän dd-isayḡsal.

²⁰ Äddināt wi iyyādnen, əntāneḡ a-s äkall wa oläḡän dāḡ-oḡänāt tiblalen. Əntāneḡ a-s e-d əslän i-mäjräd n-Mässināḡ, ad-t-äqbəlän, ijješ-asān-t älfäyda; tarəw-dd sār-sän tablalt tiyyät käraḡät timərwen n-tablalt, tiyyät säḡisät timərwen, tiyyät temede n-tablalt.»

Tangalt ta n-tefätelt
(Luqa 8:16-18)

²¹ Inn'-asān Yisa daḡ: «Äwadəm, wār-isärmis tefätelt təzzar, äj'-et daw-äkoss meḡ daw-tešejit, änn-ak, edägg iḡkalän a fäll-tät-e-isäns.

²² Wār t-illa a iffarän s-wädden ad-dd-infiləl, wār t-təlla takše s-wädden ad-dd-təffukkär.

²³ Ere dāḡ-wän ilän timəzzujen s-islä-dāḡ, isäjdet!

²⁴ Äjät ənniyät i-a-wa s-salläm fäl-a-s, a-wa dār-ogdäh asjed wa täjjäm i-Mässināḡ ad-där-mad-agdäh daḡ ajāraw-nāwän ḡur-s.

²⁵ Äwadəm wa s-išwār ifhäm härät, ad-has-iwwaḡ musnät har isəssikəy māšan, wa s-wār t-illa a ijrah, wār t-in-ikka härät, änn-ak, ad-dāḡ-s ämahāḡ wäla a-wa əndärrän itṭäf.»

Tangalt ta n-temättäwt
(Mätti 13:31-35; Luqa 13:18-19)

²⁶ Inn'-asān daḡ: «Sänto n-Təmmənəya n-Mässināḡ, oläh d-a-wa s-e-d äddomät äwadəm ašəkrəš-net,

²⁷ jer-itṭas wäla okay, jer-ehäḡ wäl' ašäl, ad-idaggäl ädomm dāḡ-ašəkrəš, itifäqqudd, dāḡ-a-s, wār təha tijya n-a-wen mässi-s ed,

²⁸ äkall a dd-madän-arəw d-iman-net teyöšše s-tizarät, ɖara-s teɣäxänt, təzjār-dd tejent n-älkäma teɣäxänt.

²⁹ Diha-däx d-mad-inhöy mässi-s n-ašəkrəš a-s inɟa älkäma, ad-dd-mad-iɖkəl älgori-net i-illuy-net.»

³⁰ Inn'-asän ɖarät-a-wen: «Ma dār-mad-nəsəsiläh sänto n-Təmmənəya n-Mässinäx? Endeɖ ɣas tangalt täsisäjrähät sänto-net?»

³¹ Sänto n-Təmmənəya n-Mässinäx, oläh d-temätäwt ta tojārät təmmətkit dāx-idommän. A-s tät-itidumut äwadəm, wär t-təlla temätäwt dāx-äddunya tät-tojārät təmmətkit,

³² mäšan, hakd a-wen-däx, afäl tät-äddomät äwadəm, ad-dd-täjɟ tadäwla-i-däx mäqqärät, tajär tiyöššawen iket-näsnät təššəjrət, təkrəš iləktan-i-däx mäqqornen har wäla-däx igɖad, kallän daw-tele-net.»

³³ Tangalen äjjootnen olähnen d-ti-däx, s-älxal äsisäjrähän a-s issäɣra ɣisa äddinät;

³⁴ wär t-illa a inna i-tamətte s-wädden tangalen a dāx-hasän-t-innä mäšan, e-d änmäjräw d-inəttulab-net dāx-edägg ištaran, ad-hasän-äffässär älmäɣna n-tangalen-tin-däx iket-näsnät.

Ässasäm ɣisa aɖu d-ejäns
(Mätti 8:23-27; Luqa 8:22-25)

³⁵ Toɖa täfukt ɣas, innä i-inəttulab-net: «Nəjləyet ejäns s-ašrut wa n-emäynäj.»

³⁶ Fälän tamətte, əglän dār-s inəttulab dāx-turäft n-aman ta dāx-äqqiima, äddewnät dār-sän dāx turfen n-aman tiyyäɖ.

³⁷ Əglan a-s dd-inkär aɖu-i-däx äšsoohen, ad-tibhilibəhilmät tinäzzämären i-turäft har išwar təɖnay aman.

³⁸ A-s itäjɟ a-wen, ässoomät ɣisa adäfor, ittas dāx-ajilal n-turäft n-aman. Əssənkärän-t inəttulab dāx-eɖəs, ənnän-as: «Älɣalim! Ajän wär käy-təssärmäx tamättant-nänäx?»

³⁹ Inkär-dd, äsmähäɖ fäll-aɖu, innä i-ejäns: «Ismad! Əzjəw!» Ibdäd-in aɖu, sämmeɖ-in a-wen-däx iket-net.

⁴⁰ Inn'-asän ɖarät-a-wen: «Ma-käwän ässiirmäɣän? Ma ija immun-näwän?»

⁴¹ Jän inəttulab tarəmməxt-ta-däx fäl dd-əqqälän ɣas, tinmənnin: «Ma ämoos äwadəm-wa-däx s-wäla aɖu d-ejäns, sajadän-as?»

5

Äzozäy ɣisa amälšon iyyän
(Mätti 8:28-34; Luqa 8:26-39)

¹ Əwwäɖän-in ašrut n-ejäns wa iyyäɖän, a-wen dāx-äkall wa n-Gadara.

² Diha-däx dd-izjār ɣisa turäft n-aman, ad-has-dd-ilkäɖ amälšon dd-izjarän tižəska.

³ Dihen-däx ad-izzaɣ, wär t-illa äwadəm äddoben akärad-net wäla-däx s-tišəm.

⁴ Akärad has-jän äddinät s-tifren hakd tišəm-däx, ad-tänät-dd-isäqqətəs, wär t-illa fäw ere äddoben a dāx-s ännähäɖ.

⁵ Ehäɖ d-ašäl iha tižəska, meɣ ošal fäll-iɖayän, inadɖäw iɣəran, išasar iman-net s-tihun.

⁶ Ojja ɣisa dāx-ijəɟ ɣas, ošal-dd sār-s, irkäɣ data-s,

⁷ iɖkäl emäslin-net, innä: «ɣisa, Rure-s n-Mässinäx wa iknän aɖkul, ma dāx-i tärhed? Fäl Mässinäx, wär hi-täqquzäbed.»

⁸ Alšin wa t-ihän a ijannen a-wen ed isamähäɖ ɣisa fälla-s i-ad-t-izjār.

⁹ Issəstän-t ɣisa, inn'-as: «Mi isəm-näk?» Inn'-as ähaləs: «Isəm-in: ejhän ed nəjjət.»

¹⁰ Ad-laqqäɖän alšinän wi t-hänen ɣisa i-ad-tän-wär-ikkəs dāx-äkall.

11 A-s itäjj a-wen-däx, idan ehäre n-əlxənžärän fäll-tasäja n-taḍaxt hat attayän-en-däx.

12 Ad-laqqädän alšinän Yisa, jannen-as: «Suk-anäx əlxənžärän i-ad-tän-nəjjəš.»

13 Ird'-asän s-a-wen. Əzjärän alšinän əhaləs, əjjäšän əlxənžärän, ad-dd-titrəktərikän a iwwädän əssin afdän n-əlxənžär, wa-däx n-afälla n-taḍaxt, tiḍəwän däx-ejäns, tattän-tän aman.

14 Ənhäyän imədanän n-əlxənžärän a-wa ijän xas, əjewädän. Ošälän, jän isälan däx-käl-ayrəm d-attayän-net. Ad-dd-tišəl tamətte, tiwnifit-dd a-wa ijän.

15 Osän-dd äddinät edəgg wa iha Yisa, ogäzän-dd amälšon wa s-käla t-ih' ejhän n-alšinän, əqqiima, ij' isəlsa, təh'-e daɣ tijya n-iman-net.

16 Jän däx-sän äddinät wi əjjəyhnen i-a-wa ijrəwän amälšon d-əlxənžärän isälan xas,

17 ad-təddälän Yisa d-ad-ifəl äkall-näsän.

18 Əlwäqq wa d-itajjəš Yisa turəft n-aman, ikk'-e-hi-dd əhaləs wa s-käla t-hän alšinän, ad-t-ilaqqäd d-ad-där-s idaw.

19 Wär has-irḍa Yisa s-a-wen, änn-ak, inn'-as: «Əgləw, əqqəl ehän-näk, diha t-əllän išəqqaxän-näk, təlləxed-asän təmḡäre n-a-wa hak-ija Eməli d-əmmək wa s-hak-oḍän təhanint.»

20 Iglä, ad-itajj isälan n-təmḡäre n-a-wa has-ija Yisa däx-teje ta jät isəm: «Ta n-məraw iḡərman». Ere has-islän-däx, ad-dd-iqqəl xas äkun däx-isälan-net.

*Isälan n-elle-s n-Žayrus d-tamədt ta dd-izajjər ašni
(Mätti 9:18-26; Luqa 8:40-56)*

21 Izjər Yisa ḍarət-a-wen s-asəlim n-ejäns wa iyyädän, diha-däx dd-əsjanän däx-asəlim n-aman, ad-sär-s dd-täddew tamətte täjjeet.

22 Os'-e-hi-dd dihen iyyän däx-əlfäqqitän n-ehän n-äddin wa n-käl-Əlyähud n-tayrəmt-en s-isəm-net Žayrus, inhäy Yisa xas, irkəx data-s,

23 ad-t-itəddal, ijann'-as: «Talyədt-in, təbok i-iba, nidawet sär-s, sənsəd fälla-s ifassän-näk, ad-təzzəy, təddär.»

24 Äddew dər-s Yisa, təlkam-as daɣ tamətte täjjeet t-təsinəkmämät.

25 Tamətte-en, h'-et tamədt ijamməd ašni a ilan məraw iwətyan d-əssin,

26 təkna ahənay n-aḡəna jer-ifassän n-ləxturtän, təsməlkəw-in a-wa təla iket-net məšan, wär t-illa fəw a-hin-ifnažän däx-turhəonna-net, änn-ak, tiwwədt xas ad-dd-tajj fälla-s.

27 Təsl' isälan n-Yisa xas, təjjəš-dd tamətte s-ḍarət, ḍəs erəswəy-net,

28 ed a-s täjj a-wen-däx, janna: «Wəla erəswəy-net, kud-t-ḍəsəx, ad-əzzəyəx.»

29 Diha-däx d-ḍəs erəswəy-net, ad-iktäl ašni wa tät-dd-izajjərän, tofräy əssaḡät-wen-däx däx-taḡəssa-net a-s təzzəy däx-tizzurt-net.

30 İlməd Yisa xur-iman-net, əlwäqq-wen-däx, fäl tərna ta t-dd-təjmədät, innəd-dd s-tamətte, innä: «Mi idəsän isəlsa-nin?»

31 Ənnän-as inəttulab-net: «Ajän wär hənnəyəd tamətte ta käy-təsinəkmämät a-s jänned: <Mi hi-idəsän?> »

32 İssəxləy-tän-dd akəyad-net i-ad-inhəy ta t-təḍəsət.

33 Tənhäy tamədt əlafu wa təjrəw xas, təkk'-e-hi-dd, təşikədkəḍ a-wa-däx has-ja tarəmməxt, toḍa data-s, tənn'-as tidət iket-net.

34 İnn'-as Yisa: «Talyədt, əzozəy-kəm immun-nəm, əgləw däx-əlxer, təzzəyəd däx-tizzurt-nəm.»

35 Əmmiijrəd Yisa hərwa a-s dd-osän äddinät dd-falnen eyewən n-əlfäqqi n-ehän wa n-äddin, ənnän-as: «Elle-k, əba-tät. Ma s-saləyyaxəd Əlxəlim daɣ?»

³⁶ Wār hin-ijreh Ƴisa a-wa jannen, innā i-ālfāqqi n-ehān wa n-āddin: «Wār tarmexād, amən Ƴas.»

³⁷ Igdāl Ƴisa i-āddināt iket-nāsān ad-dār-s idawān a-s teggādād Bəṭrus d-Yaqub d-Exya wa n-āṅṅa-s.

³⁸ A-s hin-əwwādān eyewən n-emännähād n-ehān wa n-āddin, wār hin-ogežān ar tamətte tədgazāt; āsikālāl, āššurša a-wen-dāḡ, dāḡ-išənnawān.

³⁹ Ijjāš-in fälla-sān, inn'-asān: «Ma kāwān-idgazān, hallām? Tarat, wār tāt-āba, eḏəs Ƴas a ja.»

⁴⁰ Jān-t tekāškāšt. Izzəzjār-tān iket-dāḡ-nāsān, wār dd-āqqima dihen ar d-ti-s d-ma-s n-talyaḏt, d-inəṭṭulab wi dār-dd-āddew. Ijjāš ḏarāt-a-wen edəgg wa dāḡ-tənsa talyaḏt,

⁴¹ irmās-tāt-dd s-āfuss, inn'-as: «*Talita kumi*», a-wen ālmāḡna-net: «Talyaḏt, ənnəḡ-am, ənkār-dd.»

⁴² Təbdād talyaḏt əssaḡāt-wen-dāḡ, tərjāš. Talyaḏt-en-dāḡ, la mārāw iwətyan d-əssin. Ʋqqālān-dd āddināt Ƴas oran imawān fāl tihusay n-a-wa-dāḡ ijān.

⁴³ Ikn'-en-dāḡ Ƴisa asəmmətār i-ad-wār jen isālan n-a-wa ijān dāḡ-āwadəm wāl' iyyān təzzar, inn'-asān ad-tāt-əkfən a təkša.

6

Iba n-immun n-kāl-tayrəmt ta n-Nāširāt (*Mätti 13:53-58; Luqa 4:16-30*)

¹ Ifāl Ƴisa dihen, āddew d-inəṭṭulab-net s-tayrəmt ta dāḡ-idwāl.

² Ašāl wa n-əssəbət-i n-tāsonfat, ijjāš ehān n-āddin wa n-kāl-Ālyāhud, ad-dāḡ-s isayra. Āsijādān-as āddināt əjjootnen ākuunnen dāḡ-a-wa ijanna, əqqālān-dd Ƴas oran imawān, jannen: «Āhaləs-wa-dāḡ, əndek siha s-t-dd-iha a-wa itājj? Mi t-ikfān təḡuləma d-tādabit n-iji n-tikunen ti itājj?

³ Ak a-wa, ajān wādden Ƴisa wa n-mənižye n-rure-s n-Māryāma n-āṅṅa-s n-Yaqub d-Yusəf d-Hudd d-Simyōn? Wādden šātma-s da-dāḡ əzzāḡnen jere-nāḡ.» Jān-as a-wen-dāḡ s-t-əzzayān asākor, unjāyān sār-s omānān.

⁴ Inn'-asān: «Ānnābi, wār t-ill' edəgg s-wādden ātiwāsāmḡār dāḡ-s, ar dāḡ-ākall-net, d-ḡur-imārāwān-net d-dāḡ-ehān-net.»

⁵ Igdāl-as a-wen-dāḡ, ad-ḡur-sān əj tikunen sāl hārāt dāḡ-imarhinān fäll-āssinsa ifassān-net, əzzāyān.

⁶ Tof'-e tākunt n-iba n-immun-nāsān. Issāḡlāy-dd ḏarāt-a-wen dāḡ-attayān n-tidbi-en-dāḡ, isayra āddināt.

Āšmašāl Ƴisa inəṭṭulab-net s-əssin-əssin (*Mätti 10:5-15; Luqa 9:1-6*)

⁷ Iḡrā-dd Ƴisa inəṭṭulab-net wi n-mārāw d-əssin ḏarāt-a-wen, āšmašāl-tān s-əssin-əssin dāḡ-a-s tān-ikfā tārna fäll-alšinān.

⁸ Āsmātār-tān, inn'-asān: «Wār təḏkelām dāḡ-asikəl-nāwān a sāl tāborit; wār tawweyām əzzad, wāla šākkoš, wāl' əzrəf,

⁹ asəsāt tifādelen-nāwān, wār jem əssin irəswāyān.»

¹⁰ Inn'-asān daḡ: «Ehān təjjāšām-dāḡ, təzzāḡām dāḡ-s har ašāl wa d-tāssawāḏām tekle.

¹¹ Edəgg tosām-dāḡ, wār kāwān-āsbārrākān məssaw-s, unjāyān s-asjəd-hawān, əzjārāt-t, tābbākbākām tifādelen-nāwān i-ad-wār tānāt-iləttāḡ wāla-dāḡ āboqqal-net. Ilkam, ad-ājāyḡ a-wen fälla-sān.»

¹² Eḡlān inəṭṭulab, ad-xatṭābān i-āddināt i-ad-utabān,

¹³ takkäsän daḡ alšinän äjjootnen dāḡ-äddinät, šawwäyan inəbdan s-əzzäyt, zizuyän-tän.

Tamättant n-Exya wa n-Enəsselmäḡ
(Mätti 14:1-12; Luqa 9:7-9)

¹⁴ Isl' ämänokal Harudəs mawmaw n-ḡisa ed ih' isəm-net imawän n-äddinät iket-näsän. Jannen iyyäd dāḡ-sän: «A-wa Exya wa n-Enəsselmäḡ a dd-inkärän jer-inəmmuttan, a-wen-dāḡ a t-ikfän tädabit n-tikunen-ti itamašal.»

¹⁵ Jannen iyyäd: «Äbo, a-di ännäbi ḡəli», jannen wi iyyäḡnen: «A-wa iyyän dāḡ-ännäbitän wi n-ibda.»

¹⁶ Islä Harudəs i-a-wen ḡas, innä ənta: «A-wa Exya wa s-əssəfräsäḡ eḡäf-net, ənta a dd-oläsän tanäkra jer-inəmmuttan.»

¹⁷ Äzzäman-en, Harudəs iman-net a omärän s-ad-ättärmäs Exya, ijješ tišəm, itwəjar-in dāḡ-takärmüt, dāḡ-təssəba n-Harudəyät ta n-hänne-s n-əḡḡa-s Fəlibb dāḡ-s ohäḡ Harudəs,

¹⁸ fäl-a-s innin, inn'-as Exya: «Wär hak-xälal, ad-tärkəbäd hənne-s n-əḡḡa-k.»

¹⁹ Təkšär ya Harudəyät Exya fäl a-wen-dāḡ, ad-tattär tamättant-net mäšan, wär hönney tašləlt s-ja a-wen.

²⁰ Äksuḡ daḡ Harudəs Exya ed, issan a-s ähaləs oḡadän n-eməšseddəj a ämoos, ogaz-t dāḡ-təssəba n-a-wen-dāḡ. E-d has-əsjad ämmiijräd, ad-t-əkmun iman-net kud-dāḡ, ijraz-as asjed-has.

²¹ Han a-wen-dāḡ a-s dd-tosa taməntelt ta s-taqqäl Harudəyät a ija a-wa-dāḡ. Ašäl d-tajjän iməšlan wi n-isəkta n-tiwit n-Harudəs, äsməjarät-dd Harudəs käl-əlxəkum-net d-kuməndatän n-əḡḡeskär-net d-imizärän n-teje ta n-Galila,

²² təjjäš-dd elle-s n-Harudəyät, ad-dalläl data-sän, ijraz a-wen i-Harudəs d-iməjarän-net. Iyrä-dd ämänokal talyaḡt, inn'-as: «Əttär dāḡ-i a-wa tärhed, ad-hamt-äkfäḡ.»

²³ Ad-has-itəhhaḡ s-ad-tät-äkf a-wa dāḡ-s təttär, kud-irha umas täzune n-äkall-net.

²⁴ Təzjar talyaḡt, tənna i-ma-s: «Ma dāḡ-s mad-əttäräḡ?» Tənn'-as ma-s: «Əttär dāḡ-s eḡäf n-Exya wa n-Enəsselmäḡ.»

²⁵ Täqqäl-dd ämänokal šik, tənn'-as: «Ärheḡ ad-hi-təkfəd ämära-dāḡ eḡäf n-Exya wa n-Enəsselmäḡ insa dāḡ-azäwa.»

²⁶ Ənxäsän iman n-ämänokal hullan mäšan, äbas äddoobät uḡəl s-a-wa inna, ed ihäd-as s-ad-tät-äkf a-wa dāḡ-s mad-təttär, a ämoos-dāḡ, dat-iməjarän-net, wär-irha daḡ ad-ärz dāḡ-tənna-net i-talyaḡt.

²⁷ Äšmašäl ässaḡät-wen-dāḡ əssärdasi dāḡ-wi jänen ənniyät i-ehän-net i-ad-dd-ifrəs eḡäf n-Exya. İkk' əssärdasi takärmüt ta ih' Exya, ifräs-dd eḡäf-net,

²⁸ iwwäy-t-dd insa dāḡ-azäwa, ikf'-e i-talyaḡt, təkf'-e talyaḡt i-ma-s.

²⁹ Əslän inəḡḡulab n-Exya tamättant-net ḡas, əḡlän, əḡkälän-dd tafəkka-net, əḡkän-t.

Uḡəl n-inəḡḡulab wi äšmašäl ḡisa
(Mätti 14:13-14; Luqa 9:10)

³⁰ Əqqälän-dd inəḡḡulab wi äšmašäl ḡisa, jän dāḡ-s isälan n-a-wa jän d-a-wa əssäḡrän iket-net.

³¹ Inn'-asän: «Näkket edäḡg n-iman-nänäḡ, sunfəm a əndärrän.» İj'-asän məjrad-wen-dāḡ, fäl-a-s igdäl-asän, əjut n-emerjaš n-äddinät wäla ässaḡät s-əssökän härät imawän-näsän.

³² Əjjäšän turäft n-aman, əkkän tenere n-iman-näsän.

³³ Ənhäyan-tän äddinät äjjootnen a-s əḡlän, əzzäyan-tän ḡas, fälän-dd iḡärman iket-näsän, ošälän-dd har hasän-əzzarän faw s-edäḡg wa əkkän.

³⁴ Izjār-dd Yisa turäft n-aman, inhäy əjut wa jän äddinät ɣas, täny'e tähanint-näsän ed, olähän ɣas d-tihatten wären la amädan, ad-tän-isaxra härätän äjjootnen.

Äsyäwän Yisa səmmos afdän n-ähaləs
(Mätti 14:15-21; Luqa 9:11-17; Exya 6:1-14)

³⁵ Toða täfukt ɣas, osän-t-dd inəttulab-net, ənnän-as: «Näkkäneḍ, edägg n-tenere a nəha, ij'-anäx ehäḍ;

³⁶ səgləw äddinät, ad-əkkən tidbi d-imäzzaɣän wi ohäznen, žənsən-dd a əksän.»

³⁷ Äwwežäb-asän Yisa, inn'-asän: «Un, äkfät-tän a əksän.» Ənnän-as: «Ajän a tärhed ad-näkk axrəm i-ad-dd-nəžänš tijəlwen n-sänatät timaḍ n-ərriyal n-azrəf i-ad-nəšäks tamətte-ta-däx?»

³⁸ Inn'-asän: «Əssənät-dd maniket tijəlwen läm.» Elmädän-dd, ənnän-as: «Səmmosät tijəlwen d-əssin imänan.»

³⁹ Omär-asän ḍarät-a-wen s-ad-əbḍəwän äddinät, säqqaymən-tän fäll-teyəšše ta dalet.

⁴⁰ Täqqima tamətte s-temeḍe-temeḍe n-äwadəm, səmmosät-səmmosät timərwen n-äwadəm.

⁴¹ İdkäl Yisa tijəlwen ti n-səmmosät d-imänan wi n-əssin, äjožäy išənnawän, ämmoy i-Mässinäx; äfräsfäräs tijəlwen, änkädnäkd imänan wi n-əssin təzzar, ikfä a-wen-däx iket-net i-inəttulab-net i-ad-t-užanän jer-äddinät iket-näsän.

⁴² Əksän iket-däx-näsän har əyyəwänän.

⁴³ Äsdäwän-dd inəttulab a-wa dd-əjläšan, osän-t idnäy märaw deketän d-əssin n-tijəlwen d-imänan.

⁴⁴ Səmmos afdän n-ähaləs a əksänen ašäl-wen-däx.

İrjäš Yisa fäll-aman
(Mätti 14:22-27; Exya 6:16-21)

⁴⁵ Äsraräd Yisa ḍarät-a-wen inəttulab-net s-ujəš n-turäft ta n-aman, izarän-as s-efäyy n-əjäns wa iyyädän, ebre n-taxrəmt ta n-Bätsäyda, ad-isagla ənta tamətte.

⁴⁶ Fäl-t tamətte ɣas, iwwän taḍaxt tiyyät, ad-itəddal Mässinäx.

⁴⁷ A-s ijä ehäḍ, təha turäft n-aman ta hän inəttulab ammas n-əjäns, a-s ija a-wen Yisa ənta, ih' asälim n-aman.

⁴⁸ Ojj'-en äsimäxatär-tän aḍu šamad igla ehäḍ, ikk'-en-dd irjaš fäll-aman har dəroy tän-okäy.

⁴⁹ Ənhäyän-t ikk'-en-dd irjaš fäll-aman ɣas, äxelän ämättänkul iyyän, ad-naḍḍäwän iḡaran.

⁵⁰ Hannäyän-t mäšan, indär-asän a t-əzzəyän a-wa-däx hasän-təja tarəmməxt. Ässewäl-asän šik, inn'-asän: «Əfləsät-ahi, näkk a-wa, wär tärmeɣäm.»

⁵¹ İjjäš-dd fälla-sän turäft n-aman ɣas, ibdəd aḍu. Ämoos-asän a-wa ijän täkunt-i-däx mäqqärät.

⁵² Indär-asän ujhə n-asjət wa ija i-tijəlwen fäl təxart-i-däx jän ulhawän-näsän.

Äzožäy Yisa imarhinän däx-teje ta n-Žännäšarät
(Mätti 14:34-36)

⁵³ İjläy Yisa d-inəttulab-net ejänš, äsjänän däx-äkall wa n-Žännäšarät.

⁵⁴ Diha-däx dd-əzjərän däx-turäft n-aman, ad-əzzäyän äddinät Yisa,

⁵⁵ ad-tišələn däx-äkall iket-net, tazäwen-dd sār-s imarhinän fäll-tišija s-edägg wa s-əslän ih'-e i-ad-tän-izuzəy.

⁵⁶ Edägg osa-däx, jer-iyərman, tidbi, wälä ässukän, ad-dd-awəyän äddinät imarhinän-näsän, tattärän ad-ədəsän kud-däx afär n-eräswey-net ed, ere tiḍäsän-däx, ad-izzəy.

7

Isälan n-alkum i-agnatän

¹ Ezzəmmäxän-dd käl-faris d-härät dəx-älxulam n-Ättäwrät dd-falnen Yärussälam s-ÿisa.

² Ejrähän-in dəx-a-wen-dəx a-s tattän iyyäd dəx-inəttulab-net, wär-ässerädän ifassän-näsän.

³ Iqqän a-wen ixfawän-näsän fäl-a-s käl-faris d-käl-Älyähud iket-näsän, ämoosän äddinät əlkammen i-älxadatän wi hasän-dd-oyyän imärawän-näsän: wär hasän-t-təlla tetäte ar s-ad-ässerädän ifassän-näsän har taxmärt təzzar.

⁴ Afäl əkkän əssuk har t-dd-fälän, wär hasän-t-təlla tetäte ar s-ad-ässerädän telämäkt-näsän iket-net. Lan dəx əlxadatän əjjootnen s-əlkamän səl wi-dəx: əşəsdaj n-ikassän d-iysas d-iyerän d-isəftax.

⁵ Əssəstänän käl-faris d-älxulam n-Ättäwrät ÿisa, ənnän-as: «Mafäl inəttulab wi-nək, wär-əlkemän i-agna wa hanəx-dd-oyyän imärawän-nənəx? Tattän wär-ässerädän ifassän-nəsän.»

⁶ Inn'-asän ÿisa: «Əlmunafəxän! Tidət-dəx a-wa fälla-wän innä ənnäbi Saya,† a-s innä, inna Məssinəx:

<Tamətəta-hi, idlay-net xas

a-s hi-təssiimyär

ulh-net, ujəj-ahi;

⁷ semxar wa hi-jän äddinät, məlayəxna ed

a-wa saxren dəgg-adəm fäll-i,

wär-əmoos xas ar fərədəän dd-əxtasän i-iman-nəsän.>

⁸ Əmmək-wen-dəx a-s, kəwəneḍ-dəx, təşləyäm i-alämär wa n-Məssinəx, tətəfäm əlxadät n-dəgg-adəm.»

⁹ Inn'-asän dəx: «Kəwəneḍ, jərəm-in alämär wa n-Məssinəx, jəm agna-nəwän dəx-edəgg-net.

¹⁰ Wədden, innä ənnäbi Mosa:

<Səmxär ti-k d-ma-k>,

innä dəx:

<Ere əbodärän ti-s mex ma-s, əmmätet.>

¹¹ Təssanəm s-a-wen-dəx iket-net məšan kəwəneḍ-da-dəx, iyyäd dəx-wän, saxren äddinät a-s, äddoobät əwadəm ad-änn i-abba-net d-anna-net: <A-wa s-əsidihrän ad-kəwän-ədhələx sər-s, jəx-t takute i-Məssinəx>,

¹² ija xur-wän a-s ere innän a-wen-dəx i-imärawän-net, ad-əbas t-iwar əlxəqq-nəsän.

¹³ A-wa səxrem d-a-əjjeen dər-s ənifəqqän a-s hin-təsbəttäläm a-wa inna Məssinəx, jəm a-wa hawän-inna agna-nəwän dəx-edəgg-net.»

¹⁴ Ixra-dd ÿisa tamətəta s-iman-net dəx, inn'-as: «Səjdät-ahi iket-dəx-nəwän, təjrähäm a-wa hawän-janney:

¹⁵ Wər t-illa a itajjəşän emm n-əgg-adəm äddooben asəmmədəs-net, a-wa dd-itəffälän ammas n-ulh-net ijänna s-əmm-net a t-isamədasän dat-Məssinəx.

[

¹⁶ Ere dəx-wän ilän timəzzujen s-islä-dəx, isəjdet.]]»

¹⁷ Ifäl ÿisa tamətəta xas, iqqäl ehän, əssəstänän-t inəttulab-net dihen d-əlməxna n-tangalt ta ija.

¹⁸ Inn'-asän: «Adiš kəwəneḍ har əməra-dəx, wər təjrehäm a-s əsink, esək? Ajän wər hənnəyäm a-s, wər t-illa a isuk əwadəm emm-net äddooben a t-isəmmədəs

¹⁹ fäl-a-s, a-wa dd-itəffälän ajəma, wər-itəkk ulh-net, təsa-net a itakk, izjər dərät-a-wen, əj'-e-hin dəx-təkoyt.» Əmmək-wen-dəx a-s isaxlal ÿisa imənsiwän iket-nəsän.

† 7:6 7:6 A-wa ənnäbi dd-əzzarän i-ÿisa, əloləy dəx-isälan-net əssayət timad n-awätay dat-tiwit-net.

²⁰ Inn'-asän day: «A-wa dd-itëffalän ulh n-ägg-adëm, a t-isamädasän dat-Mässinäx,
²¹ fäl-a-s ammas n-ulh n-ägg-adëm a dd-itëffal erk ënniyät wa n-abjënjën, iba n-täkrakıdt, tikra, iji n-iman,
²² əzzəna, täkkärdädt, tälläbäst, amsud, asəmmädəs n-iman, erk derhan, asəkkufär, əkkəbru, taxxalen.
²³ Əntäneđ-den-däx härätän wi samädasnen ägg-adëm, ed ammas n-ulh-net a dd-tëffalän.»

*Elle-s n-tamäjart ta äzozäy Yisa
 (Mätti 15:21-28)*

²⁴ Ifäl Yisa dihen, ikkä teje ta n-Tir. Iwwäđ-in xas, ijjäš ehän iyyän, fäl-a-s wär irha ad-fälla-s əlmədän äddinät mäšan, hakd-a-wen-däx, wär-işter ass-net.
²⁵ Şik-däx a-s t-təslä tamädt tiyyät s-ih' alşin elle-s, tək-k'e-hi-dd, tärkäx data-s.
²⁶ Tamädt-en, wär tät-len käl-Älyähud, ti n-teje ta n-Finisyä hät äkall wa n-Surya. Tos'-e-hi-dd xas, tättär däx-s ad-ikkəs alşin däx-elle-s mäšan,
²⁷ inn'-as Yisa: «Äyy aratan ad-äyyäwänän təzzar ed, wär-änhäjja ad-dd-ikkəs äwadəm amənsi daw-sän, ijär-t-in i-iyäđan.»
²⁸ Täwwežäb-as tamädt, tənn'-as: «Älyalim, tidət mäšan a-wen wär hin-ikkəs a-s iyyäđan, äddooben ad-tattän a-wa dd-sitrəkkin aratan.»
²⁹ Inn'-as Yisa: «Əgləw, däx-təssəba n-a-wa-däx tənneđ, a fäl, elle-m, izjär-tät alşin.»
³⁰ Täqqäl ehän-net, togäz-in elle-s, tənsa fäll-teşejit, izjar-tät alşin.

*Äzozäy Yisa ähaləs mäzzəjän s-ikras iləs-net
 (Mätti 15:29-31)*

³¹ Ifäl Yisa teje ta n-Tir, ikka ta n-Säyda, ihäl ebre n-ejänş wa n-Galila däx-a-s ijlay teje ta n-märaw ijarman.
³² Əwwäyän-dd sär-s äddinät ähaləs mäzzəjän s-ikras iləs-net ad-däx-s tattärän ad-fälla-s isäns ifassän-net.
³³ İrmäs-t-dd Yisa s-edes təzzar, ij' assəkäđ-net däx-timəzzujen-net, ijä däx s-assəkäđ-net emätäm-net fäll-iləs n-ähaləs,
³⁴ äjozäy işənnawän, ähnäffät təzzar, inn'-as: «Efata», a-wen älmäxna-net: «Marr.»
³⁵ Ämeränät timəzzujen-net hakd iləs-net, ad-itamäjrad.
³⁶ Äsmätär Yisa äddinät iket-näsän d-ad-wär jen isalan n-a-wen-däx i-äwadəm wäl' iyyän mäšan, a ikk' isamätar-tän, sawađän əntäneđ däx-tənna n-a-wa ijän.
³⁷ Ämoos Yisa i-äddinät täkunt-i-däx mäqqärät, əqqälän-dd xas jannen: «A-wa, a-wa itäj iket-net ifran, isasla imzaj, isamäjrad däx wi s-əkräsän ilsawän-näsän.»

8

*Äsyäwän Yisa əkkoz afdän n-ähaləs
 (Mätti 15:32-39)*

¹ Toläs-dd tamətte däx azəmmäx fäll-Yisa däx-işilan-win-däx. İnhäy a-s wär t-illa a təttaf təkşä xas, iğrä-dd inəttulab-net, inn'-asän:
² «Naqq'-ahi tähanint n-tamətte-i-däx; a ilan kärađ işilan, təlkam-ahi, äbas əttafan a əkşän;
³ afäl tän-əssəgläx s-ihänan-näsän, älluzän s-əmmək-wa-däx, ad-hasän-indär ad-tän-in-awəđän fäl iba n-äşşahät ed, han-tän-i dd-falnen ijəj.»
⁴ Ənnän-as inəttulab-net: «Mi äddooben däx-tenere-ta-däx ad-işäkş tamətte jat əjut-wa-däx?»
⁵ İssəstän-tän Yisa, inn'-asän: «Maniket tijəlwen təttafäm?» Ənnän-as: «Əssayät.»

⁶ Äŝyäyma Yisa tamette iket-net, idkäl tijelwen ti n-össayät, ämmoy i-Mässinäx, äfräsfaräs-tänät təzzar, ikf'-enät i-inəttulab i-ad-tänät-užanän jer-äddinät; äžunän-tänät.

⁷ Ekfän-t a-wa län däx-imānan, idkäl-t, ämmoy i-Mässinäx təzzar, ikf'-en i-inəttulab-net i-ad-tän-užanän jer-äddinät.

⁸ Təkša tamette ta t-təllät dihen-däx hundäx har təyyəwän. Äsdäwän-dd inəttulab a-wa dd-əjläšan äddinät, osän-t, idnay əssa deketän.

⁹ A iwwädän əkkož afdän n-āhaləs a ikšan ašäl-wen-däx. Təkša tamette ɣas, issəgl'-et Yisa; təglä.

¹⁰ Ijjäš ənta d-inəttulab-net turäft n-aman ässayät-wen-däx, əkkän tidbi ti hānen teje ta n-Dälmānuta.

*Irrum wa jän käl-faris i-Yisa
(Mätti 16:1-4; Luqa 12:54-56)*

¹¹ Osän-dd härät däx-käl-faris Yisa, ämɣännänän dār-s, tiirəmən-t, jannen-as: «Äj data-näx iji n-Mässinäx hanäx-issətbätän a-s tidət-däx a-s Mässinäx a käy-dd-äšməšälän.»

¹² Ähnäffät däx-iman-net, innä: «Mafäl tammäx əzzurəyät-ta-däx i-iji n-Mässinäx? Äsidätteɣ-awän a-s wār-ilkem ad-ija iji n-Mässinäx wäl' iyyän data-wän.»

¹³ Ifäl-tän ɗarät-a-wen, oläs ujəš n-turäft n-aman, ijläy ejänš s-efäyy wa iyyädän.

*Äsmäqqa Yisa fäll-təmmətkit n-immun n-inəttulab
(Mätti 16:5-12)*

¹⁴ Däx-tekle-ten-däx, əttəwän-in inəttulab ad-awəyän äzzad, wār-əwweyän däx-turäft n-aman ar tiyyät tajəlla.

¹⁵ Äsmätär-tän Yisa, inn'-asän: «He käwāneɗ! Agəžät iman-nāwän däx-täžža ta n-käl-faris d-Harudəš.»

¹⁶ Eslän inəttulab i-a-wen ɣas, ad-tinmännin jer-iman-näsän: «A-wa, a-wa-däx s-wār nəwwey tijelwen a fäl hanäx-itajj mäjräd-wa-däx.»

¹⁷ Ilmäd Yisa ɣur-iman-net a-wa tinmännin, inn'-asän: «Mafäl əkkan inəzjam-nāwän a-wa s-wār täwweyäm tijelwen? Ajän ulhawän-nāwän jan täɣart-ta-däx fäl äbas hannäyäm, äbas jarrähäm?»

¹⁸ Ma jänät tiṭṭawen-nāwän tənheyäm sār-snät, ma jänät timəzžujen-nāwän, təsləm sār-snät?

¹⁹ Ajän tətəwäm-in tijelwen ti n-səmmosät äžunäx i-səmmos afdän n-āhaləs, maniket deketän dd-täsdäwäm däx-a-wa dd-təjläš tamette?» Ənnän-as: «Māraw d-əssin.»

²⁰ Inn'-asän: «Älwäqq wa d-äžunäx əssayät tijelwen i-əkkož afdän n-āwadəm, maniket deketän əɗnaynen dd-təjläš tamette?» Ənnän-as: «Əssa.»

²¹ Inn'-asän: «Adiš, har ämära-däx, wār t-illa a təjrahäm?»

Äzozäy Yisa emədderɣəl iyyän däx-Bätsäyda

²² Iwwäd-in Yisa d-inəttulab-net taɣrəmt ta n-Bätsäyda ɣas, ittəlway-dd sār-s emədderɣəl iyyän, əttärän däx-s ad-t-idəs, izzəy.

²³ Irmäs-t Yisa s-äfuss, ilwäy-t hundäx har dār-s izjār tadəbayt təzzar, äswär tisutaf-net tiṭṭawen n-emədderɣəl, äswär-t ɗarät-a-wen ifassän-net, inn'-as: «Ak, hannäyäd härät meɣ?»

²⁴ Äsfänāwnāw emədderɣəl, innä: «Hannäyäx äddinät mäšan, olähän-ahi d-ihəškan ärjašnen.»

²⁵ Oläs Yisa asəwār n-ifassän-net tiṭṭawen-net ɣas, äsnäfläy ahānay, izzäy, oɣäd ahānay-net i-härät iket-net.

²⁶ Issəgl'-e Ƴisa, inn'-as: «Wär resäd wäla tadäbayt, aḡəd iman-näk ḡas s-ehän-näk.»

Tajuhe ta ija Bəṭrus dəḡ-isälan n-Ƴisa
(Mätti 16:13-20; Luqa 9:18-21)

²⁷ Izjār Ƴisa ḡarät-a-wen ənta d-inəṭṭulab-net, ikka dār-sän tidbi-ti hänen attayän n-aḡrəm wa s-itawänna Qäyşara wa n-Fəlibb. Əḡlan härwa a-s tən-issəstän Ƴisa, inn'-asän: «Ma jannen äddinät dəḡ-isälan-in? Ma jannen mi ämoosäḡ?»

²⁸ Äwwežäbän-as, ənnän-as: «Iyyäḡ jannen: käyy a-s Exya wa n-Enəsselmäḡ; iyyäḡ jannen: käyy a-s ännäbi Ƴəli; iyyäḡ fäw a jannen: käyy iyyän dəḡ-ännäbitän dd-olasän uḡəl.»

²⁹ Issəstän-tän daḡ, inn'-asän: «Käwänəḡ-ş, ma tənnäm, mi ämoosäḡ?» Äwwežäb-as Bəṭrus, inn'-as: «Käyy a-s Älmasex.»

³⁰ Äsmähäḡ dəḡ-sän Ƴisa ḡarät-a-wen, d-ad-wär jen isälan-win-däḡ i-äwadəm wäl' iyyän.

Äloläy Ƴisa dəḡ-isälan n-tamättant-net
(Mätti 16:21-23; Luqa 9:22)

³¹ Ƴur-dihen-däḡ ad-issəntä Ƴisa asəḡär n-inəṭṭulab-net n-a-s Äḡḡ-äḡḡ-adəm, ilzam-t ad-inhöy tersəmmawen äjjootnen, ənkärän-t inušämän wi n-Işrayil d-imänokalän n-käl-tikutawen d-älḡulam n-Äṭṭäwrät; ad-əjən iman-net mäšan, käraḡ išilan ḡarät tamättant-net, ad-dd-aləs tanäkra jer-inəmmuttan.

³² Ij'-asän Ƴisa mäjräd-wen-däḡ s-əmmək ilan ujreh; ikkäs-t-dd Bəṭrus s-takşe, äkläwläw fälla-s.

³³ Innäḡ-dd Ƴisa s-inəṭṭulab-net, iḡtäl Bəṭrus, inn'-as: «Şənkəş fäll-i, Iblis-wa! Käyy, inəzjam-näk, i n-däḡḡ-adəm, wädden i n-Mässinäḡ.»

Alkum i-Ƴisa Älmasex
(Mätti 16:24-28; Luqa 9:23-27)

³⁴ Iḡrä-dd Ƴisa ḡarät-a-wen tamətte d-inəṭṭulab-net s-iman-net, inn'-asän: «Ere irhän alkum-hahi-däḡ, adiş, iksənet iman-net, äjet fäll-tamättant şund ta n-tajəttewt təzzar, ilkömet-ahi.

³⁵ Ere wa wärän itəttär ar əmmək s-ogäz iman-net, dəḡ-äddunya-ta-däḡ, ad-ifut dəḡ-älžännät; mäšan, wa irḡän äfota dəḡ-iman-net, dəḡ-äddunya-ta-däḡ, dəḡ-äddimmät-in, d-äddimmät n-Älənžil, ad-iḡləs.

³⁶ Ma s-infa äḡḡ-adəm ad-irbäx äddunya iket-däḡ-net, a-s ija a-wen, äfota dəḡ-älaxärät?

³⁷ Ajän ma t-illan s-äddoobät äwadəm ad-t-äkf i-ad-sär-s iḡləs iman-net dəḡ-temse?

³⁸ Ere hi-äkrakəḡän, näkk d-mäjräd-in, dat-əzzurəyät-ta-däḡ n-temäznit tänmäşrəyät i-Mässinäḡ, ad-t-əkrukəḡäḡ näkk-däḡ-i n-Äḡḡ-äḡḡ-adəm, aşäl wa d-mad-dd-iqqəl dəḡ-älxurmät n-Abba-nin, äddew d-änjälosän wi n-iməşşeddəjan.»

9

Tihusay n-älxurmät n-Ƴisa Älmasex

¹ Inn'-asän Ƴisa ḡarät-a-wen: «Äsidätteḡ-awän a-s han-käwän äddinät əbdadnen diha-däḡ wär-e iba wär-ənheyän Təmmənəya n-Mässinäḡ tosa-dd s-əşşahät.»

(Mätti 17:1-13; Luqa 9:28-36)

² Sädis išilan ḡarät a-s inna a-wen-däḡ, iḡrä-dd Ƴisa Bəṭrus d-Yaqub d-Exya s-edes, ikka dār-sän taḡaṡt tiyyät təḡkalät təzzar, ijjäş dihen ini äynayän data-sän;

³ ämläwlawän-dd imälsan-net, jän-dd tēmölle s-käla wär-tätwänhäy fäll-ärori n-äkall.

⁴ Änfäläl-asän-dd dihen ännäbi Үөли d-ännäbi Mosa dd-falnen išənnawän, ad-tamäjrädän d-Үisa.

⁵ Iggäd-dd Bətrus, innä i-Үisa: «Älҗalim, ufa ad-nəzzäx җas diha-däx, ad-nəkrəs kərəđ ihəktan: wa-näk, wa n-Mosa d-wa n-Үөли.»

⁶ Wär-issen a ijänna a-wa-däx has-ja tarəmmeyt ənta d-imidiwän-net.

⁷ Təls'-en-dd tele n-tejäräkt tiyyät älwäqq-wen-däx, ifäl-dd emäslı išənnawän, innän:

«A-wa Rure-җ wa əkneey tärha, säjdät-as!»

⁸ A-s dd-oläsän inəttulab ađkul n-asəwad-näsän, šanäšlamän siha d-siha, wär t-illa ere hannäyän edes-hasän kunta wädden Үisa җas.

⁹ Älwäqq wa dd-titrurun tađaxt, äsmähäđ däx-sän Үisa i-ad-wär jen isälan n-a-wa ənhäyän i-əwadəm wäl' iyyän hundäx har ašäl wa dd-mad-inkär Ägg-əgg-adəm jer-inəmmuttan.

¹⁰ Äsjädän i-a-wa hasän-inna, ad-tinməsəstinän d-älmäxna n-tanäkra jer-inəmmuttan ed, iqqan a-wen iyäfawän-näsän.

¹¹ Essəstänän-t, ənnän-as: «Mafäl jannen älҗulam n-Ättäwrät a-s ännäbi Үөли a ilan s-a dd-ass təzzar, işrəy-t-dd Älmasex?»

¹² Inn'-asän: «Tidət, ännäbi Үөли a ilan s-a dd-ass isəssiḗəd härät iket-net; mäšan, mafäl iktab a-s Ägg-əgg-adəm, ilzam-t ad-inhöy tersəmmawen äjjootnen, səffätḗən däx-s dägg-adəm?»

¹³ Ässiilmädäx-käwän a-s ännäbi Үөли, äru dd-osa, mäšan äkkuddälän-t dägg-adəm, jän-as a-wa s-ärhän ed, a-wen-däx a ənnän əlkəttabän däx-isälan-net.»

*Äzozäy Үisa alyad n-amälšon
(Mätti 17:14-21; Luqa 9:37-43)*

¹⁴ Älwäqq wa dd-iqqäl Үisa d-inəttulab-net wi n-kərəđ, ogäzän-dd inəttulab-wi iyyäđnen, ämmiizäxän d-älҗulam n-Ättäwrät, täxlay-tän tamətte.

¹⁵ Tojja tamətte Үisa җas, tof'-et täkunt, tošäl sär-s, ad-has-tajjän isofan.

¹⁶ Inn'-asän: «Ma tämmizäxäm?»

¹⁷ Inn'-as ähaləs iyyän däx-tamətte: «Älҗalim, əlwäyäx-dd sär-k rure-җ ih' alšin ikrasän iləs-net;

¹⁸ edägg däx-t irmäs-däx, ad-t-äjjäđlät s-äkall, ad-isakəffaw, iziməkärkiḗ isenän, isaqqad; əttäräx däx-inəttulab-näk ad-däx-s t-əkkəsän mäšan, indär-asän.»

¹⁹ Äwwežäb-asän, inn'-asän: «Ya əzzurəyät-i-däx wärät tomen, hundäx har əmme əlley jere-wän, əşbaräx-käwän? Awəyät-ahi-dd alyad.» Äwwäyän-as t-dd.

²⁰ Diha-däx d-inhäy alšin Үisa, ad-ijjäđlät alyad s-äkall, ad-itišbärđil, isakəffaw.

²¹ Issəstän Үisa ti-s, inn'-as: «Əmme t-irmäs a-wa?» Inn'-as ähaləs: «Härwa mäđrəy,

²² dehiyyän fäw, itəjjar-t alšin däx-efew meḗ däx-aman i-ad-ämmät. Үas, kunta täddoobed härät däx-a-wa-däx, ađən-anäx təhanint, agəz-anäx.»

²³ Inn'-as Үisa: «Tənned: <kunta täddoobed!> Əlməd a-s wär t-illa a-s wädden räqqiis i-amumən.»

²⁴ İdkäl ti-s n-alyad emäslı-net älwäqq-wen-däx, innä: «Omanäx, agəz-ahi däx-iba n-immun.»

²⁵ Inhäy Yisa tamette toşal-dd sār-s ɣas, äsmähäḍ däɣ-alšin, inn'-as: «Alšin wa ikrāsän iləs n-alyaḍ-i-däɣ, äzimäzzäj-t; omaräɣ-käy s-ad-t-təzjāräd, wär-iläkkämet ad-t-dd-täqqaläd.»

²⁶ Äywättät alšin, ibbəkək alyad s-äşşahät təzzar, izjār-t; äktäyyät alyad har äyelän äddinät äba-t

²⁷ mäšan, irmäs-t-dd Yisa s-äfuss, issenkär-t-dd, ibdäd fäll-iman-net.

²⁸ Eqqälän ehän ɣas, əssəstänän inəttulab Yisa s-edes, ənnän-as: «Alšin-wənnin-hi, mafäl hanäɣ-indär ad-t-nəkkəs däɣ-alyad?»

²⁹ Inn'-asän: «Alšin şund-wa, wär t-ill' əmmək s-izjār ar s-tamädilt n-Mässinäɣ.»

Äsihe wa s-əssin d-itajj Yisa isälan n-tamättant-net d-tanäkra-net

(Mätti 17:22-23; Luqa 9:43-45)

³⁰ Fälän dihen ɣas, ällilän teje ta n-Galila mäšan, wär-irha Yisa ad-sār-s ilməd äwadəm

³¹ ed isayra inəttulab-net, ijann'-asän: «Ägg-ägg-adəm, ad-ättärmäs, ijješ ifassän n-dägg-adəm, əjən iman-net mäšan, kərəḍ išilan ḍarät tamättant-net, ad-dd-inkär jer-inəmmuttan.»

³² Wär-əjrehän mäjräd-wen-däɣ, h'-en daɣ tasäja n-ad t-səstənän d-älmäɣna-net.

Tārha n-mijraw

(Mätti 18:1-5; Luqa 9:46-48)

³³ Ewwädän-in Qäfärnaxum, əjjäşän ehän wa əkkän ɣas, issəstän Yisa inəttulab-net, inn'-asän: «Ma tämmizäɣäm däɣ-tabarät?»

³⁴ Wär t-illa a has-ənnan. Ij'-asän asəstan-wen-däɣ, fäl-a-s, däɣ-tekle-näsän, ämmiizäɣän jer-iman-näsän i-ad-əlmədän əndek däɣ-sän wa ojārän.

³⁵ Äqqima Yisa ɣas, iyrä-dd inəttulab-net wi n-märaw d-əssin s-iman-net, inn'-asän: «Wa däɣ-wän irhän täzert, iməlet daw-imidiwän-net, umaset-asän akli.»

³⁶ Irmäs ḍarät-a-wen ara iyyän, ij'-e jere-sän təzzar, idkäl-t däɣ-ifassän-net, inn'-asän:

³⁷ «Ere äsbälälän ara şund wa-däɣ, däɣ-təssəba-nin, näkk a äsbäläl; ere wa hi-äsbälälän, wädden näkk a äsbäläl, Wa hi-dd-äşmaşälän a äsbäläl.»

(Mätti 10:42; Luqa 9:49-50)

³⁸ Inn'-as änättalib wa s-isəm-net Exya: «Äɣalim, nənhay ähaləs itakkäsän alşinän däɣ-äddinät s-tärna n-isəm-näk, nənn'-as, wär-itoləset, ed wär dār-näɣ äddew.»

³⁹ Inn'-asän Yisa: «Wär has-t-təgdeläm, fäl-a-s, wär t-illa ere madän-äj iji n-Mässinäɣ s-tärna n-isəm-in aləs daɣ, a əndärrän ḍarät-a-wen, tiżmit-in.

⁴⁰ Ere wärän hanäɣ-iknes, a-di, amidi-nänäɣ.

⁴¹ Ere käwän-issəswän kara n-aman, däɣ-təssəba n-a-wa s-Älmaseɣ a käwän-ilän, äsidätteɣ-awän a-s ilkam, ad-ijrəw, älhäk n-emärked wa ija.»

Wär tumasät əssəbab n-tanməşrayt i-äwadəm

(Mätti 18:6-9; Luqa 17:1-2)

⁴² «Aratän wi sār-i omännen, ere ämoosän əssəbab n-tanməşrayt i-wäla iyyän däɣ-sän-däɣ, äwadəm-en, išşäm-as-in, ad-tətwäqqən tähunt ta mäqqarät s-itəzzad älkäma däɣ-err-net, itwəjār-in däɣ-ider n-əjərew wa səmmän härwa wär-ofa abäkkad-wen-däɣ.

⁴³ Käyy, kunta äfuss-näk a äbokän ad-hak-ässäbäb s-abäkkad, itidärrut-käy, ənkäd-t-in härwa wär tämeşäläd abäkkad-wen-däɣ ed uf'-ak, ad-jeed äfuss, təjjəşäd älzännät, uhən, ad-leed əssin ifassän, tətwəjāräd-in däɣ-efew wa n-žohännäma wärän itəməkit [

⁴⁴ d-tiwəkkawen ti wären təməttit s-härkuk əfradnät däɣ-tiɣəswen n-äddinät].

⁴⁵ Kunta daɣ adār-nāk a äbokän ad-käy-isidəw dāɣ-abäkkad, itidärrut-käy, ənkaḍ-t-in härwa wär tämešäläd abäkkad-wen-dāɣ, ed uf'-ak, ad-təjjəšäd älžännät, jeed adār, uhən ad-leed əssin idarän, tətwejärad-in dāɣ-efew wa n-žohännäma-i hänät [⁴⁶ tiwəkkawen ti wären təmöttit s-härkuk əfradnät dāɣ-tiɣəswen n-äddinät].

⁴⁷ Kunta daɣ tiṭṭ-nāk a äbokän ad-käy-sidəw dāɣ-abäkkad, tiḍärrut-käy, kukkərət-tät-dd härwa wär tämešäläd abäkkad-wen-dāɣ, ed uf'-ak, ad-təjjəšäd Təmmənəya n-Mässinäɣ jeed tiṭṭ, uhən ad-leed sänatät tiṭṭawen, tətwejärad-in dāɣ-efew wa n-žohännäma.

⁴⁸ Dihen, tiwəkkawen ti əfradnen dāɣ-tiɣəswen n-äddinät, əddarnät härkuk.

Tangalt ta n-tesəmt

(Mätti 5:13; Luqa 14:34-35)

⁴⁹ Ere ämešälän abäkkad, ad-ijjəš efew s-əmmək-wa-dāɣ s-tajjəš tesəmt imənsiwän i-ad-tän-təjjəš temde.

⁵⁰ Tesəmt, härät olayän mäšan, afäl tät-təjmad temde, ma tät-e-isəsməmän? Tumaset tämudre-näwän a ha tesəmt, tənhirəjam dāɣ-älɣafyät.»

10

Aməzzi d-iba-net

(Mätti 19:1-12; Luqa 16:18)

¹ Ifäl ʒisa dihen, ikkä teje ta n-Älyähudəyät d-illa-hin i-ejänš wa n-ʒurdəni, təlkäḍ-as-dd tamətte täjjeet, ad-isaxra daɣ äddinät, s-əmmək wa s-izzäy ad-t-äj.

² Osän-t-dd härät dāɣ-käl-faris, orämän-t s-asəstan iyyän i-ad-änn a wärän itətwənn, ənnän-as: «Dāɣ-a-wa innä alämär-nänäɣ, ak ajän xälal i-ähaləs ad-izəmməzzəy hənne-s?»

³ Inn'-asän ʒisa: «Ma dār-käwän-äsmätär ännäbi Mosa.»

⁴ Ənnän-as: «Ännäbi Mosa, ijraw i-ähaləs ad-äkf tākarde n-aməzzi i-hənne-s təzzar, izəmməzzəy-tät.»

⁵ Inn'-asän ʒisa: «Alämär wa hawän-iktäb ännäbi Mosa, iktäb-awän-t dāɣ-təssəba n-təɣart-i jän ulhawän-näwän,

⁶ ənnär wädden a-wen:

<S-tizarät a-s dd-ixläk Ämaxlak äddunya,
ähaləs d-tamäḍt a dd-ixläk,

⁷ təssəba n-a-wen-dāɣ a fäl mad-ifəl ähaləs ti-s d-ma-s,
irtəy d-hənne-s,

⁸ umasän fäll-əssin-essän tiyyät taɣəssa,
ad-äbas ämoosän əssin äddinät,
ämoosän tiyyät taɣəssa.>

⁹ ʒas, a-wa osäɣ Mässinäɣ, wär t-ibəḍḍəwet ägg-adəm.»

¹⁰ Iqqäl-dd ʒisa ehän ɣas, əssətänän-t inəṭṭulab-net d-älmäɣna n-a-wa innä.

¹¹ Inn'-asän: «Ere hin-äzməzzäyän hənne-s, oläs adubən n-iyyät, izna,

¹² tamäḍt daɣ təbḍät d-ähaləs-net, toläs adubən n-iyyän, təlmədet a-s, təzna ənta-dāɣ.»

Ija ʒisa älbäraka dāɣ-aratän

(Mätti 19:13-15; Luqa 18:15-17)

¹³ Elwäyän-dd äddinät aratan s-ʒisa i-ad-dāɣ-sän äj älbäraka, mäšan, äkläwläwän inəṭṭulab-net fäll-imalwayän-näsän.

¹⁴ Inhäy ʒisa a-wa tän-išlän ɣas, əkmän-t iman-net, inn'-asän: «Äyyät aratan ad-hi-dd-əkkən, wär tän-in-täwweɣäm fäll-i fäl-a-s, Təmmənəya n-Mässinäɣ, äddinät wi dār-sän äniḥəqqänen a-s tät-ihakk.

15 Āsidätteḡ-awān a-s ere wārān iqbēl Təmmənəya n-Māssināḡ s-əmmək wa s-tāt-mad-iqbēl ara, wār tāt-mad-ijjəš.»

16 Āsyāyma ɔarāt-a-wen arātān fäll-ifaddān-net, āswār-tān ifassān-net, ijā dāḡ-sān ālbāraka.

*Āddunya meḡ ālaxārāt?
(Mätti 19:16-22; Luqa 18:18-23)*

17 Ālwāḡḡ wa d-ābok ḡisa ad-ifəl edāḡḡ-en, ošāl-dd sār-s āhaləs iyyān, irkāḡ data-s, inn'-as: «Ālḡalim wa olāḡān, ma s-əley s-ad-t-ājāḡ i-ad-əkkusāḡ tāmudre ta tāḡlālāt?»

18 Inn'-as ḡisa: «Mafāl hi-janned wa olāḡān? Wār t-illa ere olaḡān sāl Māssināḡ,

19 wādden, təssanād alāmārān-net: Wār jed iman, wār jed əzzəna, wār tokerād, wār tājjəyhād s-bahu, wār təɔlemād āwadəm, səmḡār ti-k d-ma-k.»

20 Inn'-as āhaləs: «Ālḡalim, hārātān-win-dāḡ, āḡdalāḡ-asān hārwa āmoosāḡ ara.»

21 Ikn'-e ḡisa azəjjəzz, ijrāz-as, inn'-as: «Hārāt iyyān a hak-in-āba: əḡləw, tužžār-in a-wa leed, təkfəd-t i-tilāḡḡiwen i-ad-təkrəšād ārrəzāḡ dāḡ-ālžānnāt; dihen, əqqəl-dd, əlkəm-ahi.»

22 Isl' āhaləs i-mājrād-wen-dāḡ ḡas, innād, ənxasān iman-net, ed il' ehäre n-tikunen.

*Ārrəzāḡ wa n-tidət
(Mätti 19:23-30; Luqa 18:24-30)*

23 Issāḡlāy-dd ḡisa tamətə akāyad-net, innā i-inəṡṡulab-net: «Aḡwi ija i-wi ārzāḡnen ujəš n-Təmmənəya n-Māssināḡ.»

24 Inhāy a-s iqqan a-wen iḡāfawān n-inəṡṡulab-net ḡas, inn'-asān daḡ: «Ilyaɔān-in, aḡwi ija ujəš n-Təmmənəya n-Māssināḡ!

25 Ojār tārāḡse ta ija ad-ijjəš amnəs s-tiṡṡ n-ānazmay uhən, ad-ijjəš ere irzaḡān Təmmənəya n-Māssināḡ.»

26 Iknā mājrād-wen-dāḡ uḡən n-iḡāfawān-nāsān, ad-tinmənnin: «Adiš mi madān-iḡləs?»

27 Issəjrāh-tān ḡisa, inn'-asān: «A-wen, dāḡḡ-adəm wār t-āsmākkānān māšan Māssināḡ ənta, āddoobāt-t ed, wār t-illa a has-indarān.»

28 Inn'-as Bəṡrus ɔarāt-a-wen: «Ālḡalim, nākkāneɔ, wādden noyyā a-wa nəla iket-net, nəlām-ak.»

29 Inn'-asān ḡisa: «Āsidätteḡ-awān, a-s, wār t-illa ere madān-ifəl ehān-net d-ayətma-s d-šātma-s d-ma-s d-ti-s d-arātān-net d-ihārāwān-net dāḡ-āddimmāt-in, d-āddimmāt n-Ālənžil

30 s-wādden ad-ijrəw dāḡ-āzzāman-wa-dāḡ s-temeɔe n-anəɔfus ihānan, ayətma, šātma, matte, arātān d-ihārāwān āddewnen d-ālḡizabāt, ijrəw daḡ tāmudre tāḡlālāt dāḡ-tilkamāt.

31 A ājjeen dāḡ-wi āzzarnen ašāl-i-dāḡ, ad-ijjəš ajilal, a ājjeen dāḡ-wi hānen ajilal ašāl-i-dāḡ, ad-izar.»

*Āsihe wa s-kāraɔ d-itajj ḡisa isālan n-tamättant-net d-tanākra-net
(Mätti 20:17-19; Luqa 18:31-34)*

32 Ijjāš ḡisa ɔarāt-a-wen eḡāf n-tamətə, irmās tamdujt ta n-Yārussālam, āššiwwāšān inəṡṡulab-net, wār ozja ənniyāt n-wi has-əlkamnen. Ikkās-dd inəṡṡulab wi n-mārāw d-əssin s-takše, ad-hasān-itajj isālan n-a-wa t-madān-irməs,

³³ inn'-asän: «Ənhəywät, näkkäneḍ-da-hi əkkänen Yərussälam-i-däx mad-ättärmäs Ägg-əgg-adəm, ijjəş ifassän n-imänokalän n-käl-tikutawen d-älxulam n-Ättäwrät, ad-t-sidəwän däx-äşşərexa-näsän, äxtəsän-as tamättant təzzar, əjən-t jer-ifassän n-inəzzulam,†

³⁴ i-ad-t-əjən tekäškäšt, sutəfən fälla-s, əjən däx-s tiwit, əjən iman-net məšan, ašäl wa s-käraḍ ɗarät tamättant-net, ad-dd-inkär jer-inəmmuttan.»

A-wa əttärän dagg-Zäbdi däx-Ḡisa
(Mätti 20:20-28)

³⁵ Ohäzän-dd dagg-Zäbdi, Yaqub d-Exya Ḡisa, ənnän-as: «Älyalim, nərha ad-hanäx-təjəd a-wa däx-k mad-nəttär.»

³⁶ Inn'-asän: «Ma s-tərham ad-hawän-t-əjəx?»

³⁷ Ənnän-as: «Äkf'-anäx ad-əqqayəm iyyän däx-näx daw-axil-näk, əqqayəm wa iyyəḍän daw-təşälje-näk i-ad-numas wi sär-k oräknen däx-älxikmät, afäl dd-təqqäläd däx-älxurmät-näk.»

³⁸ Inn'-asän Ḡisa: «Käwäneḍ, wär tessenäm a dər-səstanäm. Ajän näkk, kara n-tisnant wa mad-əşwäx, täddobem tesäse-net, mex daḡ, ajän täddobem härät i-tamättant ta mad-əjəx?»

³⁹ Ənnän-as: «Näddoobät-t.» Inn'-asän Ḡisa: «Tidət lab a-s ad-təşwəm kara n-tisnant wa mad-əşwäx, təjəm tamättant ta mad-əjəx

⁴⁰ məšan, däx-isälän n-taximit daw-axil-in d-təşälje-nin, wädden näkk a ihakkän a-wen; Mässinäx a t-ihakkän i-wi s-t-itwär.»

Mijraw wa n-tidət
(Mätti 20:24-28; Luqa 22:24-27)

⁴¹ Əslän inəttulab wi n-märäw i-a-wen xas, ijjäş-tän älhäm fäll-Yaqub d-Exya.

⁴² Iyr'-en-dd Ḡisa iket-näsän s-iman-net, inn'-asän: «Təssanäm a-s imänokalän n-tiwsaten, äxkamän fälla-snät s-əşşahät; käl-əlxəkum daḡ, wär lämməḍän fäll-käl-əkall

⁴³ məšan, käwäneḍ, wär jem a-wen; wa däx-wän irhän mijraw, umaset akli n-imidiwän-net təzzar,

⁴⁴ ere däx-wän irhän daḡ täzert i-imidiwän-net, umaset akli-näsän təzzar.

⁴⁵ Ägg-əgg-adəm, wär dd-əmeşäl i-ad-has-əxdəmän äddinät, änn-ak, əmeşäl-dd i-ad-ixdəm ənta iman-net, äkf tämudre-net i-ad-isəddärfət äddinät əjjootnen.»

Emədderyəl wa əzozäy Ḡisa
(Mätti 20:29-34; Luqa 18:35-43)

⁴⁶ Əqlan har hin-əwwäḍän taxrəmt ta n-Žərriko. Älwäqq wa dd-izajjār Ḡisa d-inəttulab-net taxrəmt-ten-däx, təkam-asän tamətte täjjeet. Žəbo wa dd-jän, əqqiima emədderyəl s-isəm-net Bärtima ägg Tima däx-asälim-net, itattär takute däx-äddinät.

⁴⁷ Islä a-s Ḡisa wa n-Nəşirät a okayän xas, əşxärät, innä: «Ya Ḡisa wa n-Ägg Dawəd, aḍən-ahi tähanint!»

⁴⁸ Äxtälän-t äddinät i-ad-hin-isusəm məšan, əşxärät s-afälla: «Ya Ägg-Dawəd, aḍən-ahi tähanint.»

⁴⁹ İbdäd Ḡisa, innä: «Əlwəyät-ahi-t-dd.» Əlwayän-as-t-dd, jannen-as: «Əhəl iman-näk, iḡarr'-ik.»

⁵⁰ İjār-in emədderyəl abärnuş-net dihen, iggäd s-ıyyät, ikka Ḡisa.

† 10:33 10:33 – Ḡur-käl-Älyähud, ere wärän ämoos ägg-Älyähud s-aläşäl mex ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyəḍnen iket-näsnät, ti n-inəzzulam. — Ašäl-i-däx, änäzzalim, äkafär (ere wärän issen s-Mässinäx).

⁵¹ Os'-e-hi-dd xas, inn'-as Yisa: «Ma s-tärhed ad-hak-äjäx?» Inn'-as emødderxæl: «Älyalim, alösäxet ahänay.»

⁵² Inn'-as Yisa: «Egløw, äzozäy-käy immun-näk.» Oläs Bärtima ahänay älwäqq-wen-däx, ilkäm i-Yisa.

11

Ujəš n-Yisa i-axrəm wa n-Yärußälam

(Mätti 21:1-11; Luqa 19:28-40; Exya 12:12-19)

¹ Ohäz-in Yisa d-inøttulab-net Yärußälam, ih' ämära taxrømt ta n-Bätfaži, edes i-tađaxt ta täsijätät ihøskan wi n-øzzäytun. Yur-dihen-däx, ad-äšmašäl øssin däx-inøttulab-net,

² inn'-asän: «Äkkät tadäbayt ta n-data-wän, däx-ujəš-näwän-has, ad-tøjrøwäm äza ojayän s-käla wär t-iney äwadøm, arät-t-dd, tølwøyäm-t-dd.

³ Ere hawän-innän, mafäl t-tirøm, ännät-as: «Älyalim a däx-s ilan øššäxøl, ässimda dār-s xas, näsoxäl-awän-t-dd.» »

⁴ Eglän inøttulab wi n-øssin, øjräwän äza ojayän däx-täšarrit dat-emm n-ehän iyyän, orän-t-dd.

⁵ Innän-asän äddinät t-øllanen dihen: «Mafäl tirøm äza?»

⁶ Äsoxälän-asän a-wa hasän-inna Yisa, oyyän-tän, orän-t, øglän dār-s.

⁷ Elwäyän-dd äza i-Yisa, østäjän-as isølsa-näsän, inäy-t.

⁸ Ad-fattäx tøššøm n-äddinät isølsa-näsän fäll-tabarät, xattäsän-dd wi iyyäðnen ilødledän däx-ihøskan, fattäxän-tän fäll-tabarät,

⁹ äsiyären wi has-äzzarnen hakd wi has-ølkammen, jannen: «Ozana!

Näkfet Mässinäx semyar!

Ija Mässinäx älbāraka

däx-wa dd-osän däx-isøm n-Emäli,

¹⁰ irxäm Mässinäx Tømmønøya

ta s-ija ärkäwäl-net i-abba-nänäx Dawød.

Ozana i-Mässinäx wa iknän ađkul.»

¹¹ Iwwäð-in Yisa axrøm wa n-Yärußälam, ijjäš ehän n-ämudd wa mäqqārän, äzjäzz'-e iket-net; inhäy a-s ija fälla-s ehäð ønta d-inøttulab wi n-märaw d-øssin xas, ikkä dār-sän tadäbayt ta n-Bitanya.

Ašar wa ilyän Yisa

(Mätti 21:18-19)

¹² Äffäw, a-s dd-izjär tadäbayt ta n-Bitanya, älluz.

¹³ Ojja ahøšk s-isøm-net ašar inšarän, ikk'-e-hi-dd, itassän warän-t aratän mäšan, wär fälla-s ijrew ar ifärketän ed, wär-ija äzzäman n-tirwe-net.

¹⁴ Innä i-ašar: «Wär-issølkäm Mässinäx ad-torawäð har tønkar äddunya.» A-s innä a-wen-däx, sallän-as inøttulab-net.

Ikkäs Yisa käl-mamäla däx-ehän n-ämudd wa mäqqārän

(Mätti 21:12-17; Luqa 19:45-48; Exya 2:13-22)

¹⁵ Ewwäðän-in Yärußälam, ijjäš Yisa ehän n-ämudd wa mäqqārän, ad-däx-s isattäx ättužžar d-imäžänšan-näsän, isibräxwil tisøskar n-käl-amähaš n-izärfan d-tisäqqima n-ättužžar n-tidäberen.

¹⁶ Wär-oyy' äwadøm wäl' iyyän äwwayän a inazzän ättužžar-t däx-ehän n-ämudd wa mäqqārän.

¹⁷ Isayrä äddinät, ijann'-asän: «Ajän wädden iktab a-s, innä Mässinäx: «Ehän-in ad-umas ehän n-ämudd

i-tiwsaten iket-däx-näsnät, >
mäšan käwäneḏ, jām-t tajnut n-imäkrädän.»

¹⁸ Ʒslän imänokalän n-käl-tikutawen d-älyulam n-Ättäwrät i-a-wen ɣas, ad-tattärän əmmək s-jän iman-net mäšan, wär helän a-wen, fäl-a-s ämoos a-wa isäɣra, a itəḏḏasän ulhawän n-tamətte, ijraz-as iket-net.

¹⁹ Ij' alməz ɣas, izjār Ʒisa d-inəṭṭulab-net aɣrəm.

A-wa isadabat immun
(Mätti 21:20-22)

²⁰ Äffäw, əkkän-dd edes i-ašar-wənnin, ənhäyän-t äqqur har ikewän-net.

²¹ Iktä-dd Bəṭrus a-wa ijän ɣas, innä i-Ʒisa: «Älɣalim, ənhəy-t-ak ašar wa təlɣänäd, äqqur-in.»

²² Äwwežäb-asän Ʒisa, inn'-asän: «Amənät s-Mässinäɣ,

²³ äsidätteɣ-awän a-s ere däx-wän innän i-aḏaɣ-wa-däx: <Haan, təjrəd iman-näk däx-ejäns wa səmmän>, ija a-wen, däx-a-s, wär-ij' äššäk däx-ulh-net, iflas s-a-wa innä ad-äj, ad-ijrəw ɣur-Mässinäɣ a-wa däx-s ittär.

²⁴ A-wen-däx a fäl hawän-janney a-s, a däx-däläm Mässinäɣ-däx, däx-a-s təflasäm a-s ad-t-təjrəwäm, ad-hawän-t-äkf.

²⁵ E-d təbdädäm-däx i-ad-tədləm Mässinäɣ har dd-təktäm a-s iɣšad-awän äwadəm härät, änsät-as-in ed, afäl jām a-wen, ad-hawän-in-äns dəɣ Abba-näwän Mässinäɣ-i ihän isənnawän erk imojjan-näwän. [

²⁶ Afäl wär nəššəm i-äddinät, wär hawän-in-e-äns Abba-näwän Mässinäɣ-i ihän isənnawän ibäkkädän-näwän.]»

Äšmäšäkken imänokalän n-käl-tikutawen tärna n-Ʒisa
(Mätti 21:23-27; Luqa 20:1-8)

²⁷ Oläs-dd Ʒisa uɣəl n-Yärussälam ənta d-inəṭṭulab-net ɣas, issäɣläy-dd däx-ehän n-ämudd wa mäqqärän. Osän-t-dd imänokalän n-käl-tikutawen d-älyulam n-Ättäwrät d-inušämän n-Išrayil,

²⁸ ənnän-as: «Mi kay-ikfän turhajät n-amışəl n-tikunen-ti-däx? Mi käy-ikfän tärna-ta-däx s-täjjäd a-wa täjjäd?»

²⁹ Inn'-asän Ʒisa: «Ad-hawän-äjäɣ näkk-däx asəstan iyyän; wažäbät-ahi ɣas ad-hawän-älläɣey näkk-däx ere wa hi-ikfän turhajät ta s-tamašäläɣ a-wa täjjäɣ.

³⁰ Asəstan-in da: Mi dd-äšmašälän Exya wa n-Enəsselmäɣ i-ad-isəlmäɣ äddinät däx-aman? Ak Mässinäɣ meɣ dägg-adəm ɣas?»

³¹ Inn'-asän a-wen ɣas, əqqälän-dd ämmiizäɣän jer-iman-näsän, jannen: «Afäl has-nəna: <Mässinäɣ a t-dd-äšmašälän>, ad-hanäɣ-änn: <Adiš, mafäl wär tomenäm s-a-wa hawän-inna.>

³² Afäl has-nəna dəɣ dägg-adəm, aaa...» Wär helän tənna n-a-wen, ed äksuḏän, ad-fälla-sän tiḏəw tamətte-ta-däx ed təkkaas iket-net äššäk a-s, Exya, ännäbi n-Mässinäɣ s-tidət a ämoos.

³³ Ənnän-as: «Wär nəssen.» Inn'-asän: «Adiš, näkk-däx wär hawän-e-älläɣey ere wa hi-ikfän tärna ta s-täjjäɣ a-wa täjjäɣ.»

12

Isälan n-inaxdimän wi n-inälläbäsän
(Mätti 21:33-44; Luqa 20:9-18)

¹ Issäɣläy Ʒisa dəɣ tangalen tiyyäd tamətte. Ij'-asän tiyyät däx-hasän-innä: «Käla t-illa ähaləs äddomen ašəkrəs n-läɣnəb, ij'-as afəraj, ijä däx-s edägg wa däx-izimməw läɣnəb, idäy däx-s edägg n-soro i-ämagaz-net; ifär-t ḏarät-a-wen i-inəsduma iyyäd təzzar ikk' äkall iyyän.

² Iwwäd-dd äzzäman n-amili n-ašəkrəš ɣas, äšmašäl-dd äanaxdim-net s-inəsduma i-ad-has-dd-awəy ɣur-sän folät-net dəɣ-a-wa dd-oräw ašəkrəš.

³ Os'-en-dd äanaxdim, ärmäsän-t, tithəkkin-t har t-əksänän təzzar, əssəglän-t koräyräy.

⁴ Äšmašäl-dd sār-sän daɣ äanaxdim iyyän, äsfätäqqen eɣäf-net, äsmädräyän-t.

⁵ Oläs daɣ ašəmmişəl n-iyyän, ärmäsän-t ənta, äñɣän-t kərəf; issəlkäm-asän-dd-i äjjootnen, äsmädräyän aɣil-näsän, jän iman n-aɣil wa iyyädän.

⁶ Wār has-dd-äqqima ɗarät-a-wen ar ad-sār-sän dd-išəmmişəl rure-s ikna tārha ed inna dəɣ-iman-net: <Ənta ya šämad rure-ɣ, änihäjjä s-ad-t-səmɣärän>.

⁷ mäšan ənhäyän-t inəsduma imal-dd ɣas, änmännän: <Ənhəywät-ak, amäkkasunet; əyyäwät, närməset, näjet iman-net i-ad-tumas takəsit ti-nänäɣ>;

⁸ ärmäsän-t, äñɣän-t kərəf təzzar, jārän-t-in ɗarät ašəkrəš.»

⁹ Issəmdä Ƴisa tangalt ɣas, inn'-asän: «Ässiistänäɣ-käwän, ma mad-äj mässi-s n-ašəkrəš ämära? Ədmanäɣ-awän a-s ad-dd-ass ənta iman-net, ilhəs inəsduma-wi-däɣ təzzar, aləs tefert n-ašəkrəš-net i-iyyäd.»

¹⁰ Inn'-asän daɣ: «Ajän wār täɣrem dəɣ-əlkəttab n-Mässinäɣ a-s:

<Tähunt ta hin-jārän älbännatän s-ənnän wār tənfa härät,

ənta a-s a-s təšräy tanfust,

tämoos tähunt ta tufät n-aɣmār hakkät äššahät ehän;

¹¹ a-wen Emäli a t-ijän i-ad-umas

täkunt dat-tiṭṭawen-nänäɣ.> »

¹² Issəmdä Ƴisa tənna n-a-wen ɣas, ad-tattärän imänokalän n-käl-tikutawen d-älɣulam n-Äṭṭäwrät d-inušämän n-Işrayil əmmək s-t-ästärmäsän ed əssanän a-s əntänəḍ-en-däɣ a ässiixläy tangalt-ta-däɣ mäšan, wār helän a-wen fäl tuksəḍa-i jän i-tamətte; əšläyän-as, əglän.

Isälan n-tiwse i-Qäyşär wa n-ämänokal

(Mätti 22:15-22; Luqa 20:20-26)

¹³ Äšmašälän-dd sār-s ɗarät-a-wen härät dəɣ-käl-faris d-härät dəɣ-käl-Harudəs i-ad-has-əqqənän tändärbat, siḍəwən-t dəɣ-a inna wärän itətwinn.

¹⁴ Osän-t-dd, ənnän-as: «Älɣalim, nəssan a-s tidət ɣas a janned, wār täkkuläd dəɣ-a-wa jannen äddinät, wār tän-täzmäzläyäd, wār säɣrid daɣ ɣas ar tidət n-tabarät n-Mässinäɣ. Ämära, nässiistän-käy: ak iwar-anäɣ ad-nəzəl tiwse i-ämänokal Qäyşär meɣ? Näzlet-tät meɣ?»

¹⁵ Ilmäd Ƴisa ɣur-iman-net s-təlmənufäɣa ta t-təllät ɗarät asəstan-näsän, inn'-asän: «Mafäl hi-tižərrubum? Awəyät-ahi-dd ärriyal n-azrəf-näwän har t-ənhəyäɣ.»

¹⁶ Äwwäyän-as-t-dd, inn'-asän: «Mi ilän äṭṭäşwer d-isəm wa t-iwärän?» Ənnän-as: «I n-ämänokal Qäyşär.»

¹⁷ Inn'-asän: «Adiš, suɣəlät i-ämänokal wa mäqqārän a-wa fälla-wän ila, təkfəm daɣ Mässinäɣ a-wa fälla-wän ila.» Əqqälän-dd ɣas, tof'-en təkunt n-älwižab-wa-däɣ hasän-ija.

Äwwežäb Ƴisa dəɣ-isälan n-tanäkra jer-inəmmuttan

(Mätti 22:23-33; Luqa 20:27-40)

¹⁸ Osän-t-dd ɗarät-a-wen härät dəɣ-käl-sadus-i ɣur-ija a-s wār təlkem tanäkra n-inəmmuttan, əssəstänän-t, ənnän-as:

¹⁹ «Älɣalim, inn'-anäɣ ännäbi Mosa: <Afäl äba äñña-s n-äwadəm, oyyä-dd hänne-s dār-wär oher ara, idubənet-tät äñña-s i-ad-ikrəš əzzurəyät i-äñña-s wa äba i-ad-wär hin-itiləm isəm n-wa äba fäll-äröri n-äkall.>

²⁰ Ämära, äkkəs-anäx däx-täqqän n-eḡäf: käla t-əllan əssa ayətma; ädobän däx-sän wa n-amäqqar mäšan, äba-t wär-ikreš ara.

²¹ Oyyä-dd hänne-s, ädobän-tät wa s-əssin, äba-t ənta-däx wär dd-oyya ara, a-wen-däx daḡ a ija wa s-käraḡ;

²² äba-tän əssa-essän mäšan, wär tän-iha i dd-oyyan ara; äba daḡ tamäḡt dara-sän.

²³ Nässiistän-käy: ašäl wa n-tanäkra jer-inəmmuttan, əndek däx-sän wa s-e-tumas hänne-s ed, ənhayän-tät adubən əssa-essän?» »

²⁴ Inn'-asän Ƴisa: «Ənta-den-däx tasətbət n-išk wa jəm ed, a-wa ənnän əlkəttabän hakd-däx a-wa där-togdäh tärna n-Mässinäx, wär t-illa a däx-s təfhamäm.

²⁵ Ašäl wa dd-nakkärän inəmmuttan, meddən hakd tiḡeḡen, ad-äbas tidubunän ed ad-taläh tämudre-näsän d-ta n-änjälosän wi hənən išənnawän.

²⁶ Ämära, däx-isälan wi n-inəmmuttan d-tanäkra-näsän, ajän wär täḡrem däx-əlkəttab wa n-ännäbi Mosa a-wa has-innä Mässinäx ḡur-tabsäḡt ta tähjäljälät wär räqq? Wädden, inn'-as Mässinäx: <Näkk a-s Mässinäx n-Ibrahim d-Isxaqq d-Yaqub.>

²⁷ A-wen, älmäḡna-net a-s, äddinät-win-däx, han älzännät, tiimələn Mässinäx; ənnär wär-ədderän, wär təjjən a-wen. Mässinäx, wädden inəmmuttan a-s ämoos Mässinäx, ämoos-t i-wi əddärnen. Tidət-däx a-s toškam ed tənnäm wär təlkem tanäkra jer-inəmmuttan.»

*Alämär wa ufän
(Mätti 22:34-40)*

²⁸ Ohäz-dd iyyän däx-älḡulam n-Ätṡäwrät äsijädän i-edäwänne wa ija Ƴisa d-käl-sadus d-älwižab wa ähuusken hasän-ija, inn'-as: «Ma ämoos ḡur-Mässinäx alämär wa ojärän?»

²⁹ Inn'-as Ƴisa: «Ənta da wa ojärän:

<Ya İşrayil, səjəd!

Emäli-nänäx Mässinäx, ənta ḡas a-s Emäli.

³⁰ Ad-tärhəd Emäli-näk Mässinäx s-ulh-näk imda tärhəd-t s-iman-näk əmdan, d-tayətte-näk təmda d-äşşahät-näk iket-net.>

³¹ Wa s-əssin daḡ da:

<Ad-tärhəd änharäj-näk s-əmmək wa s-tərhed iman-näk.>

Wär t-illa alämär ojärän-win-däx.»

³² Inn' äḡalim n-Ätṡäwrät i-Ƴisa: «Äḡalim, tənned tidət:

Mässinäx iyyän, wär t-illa ar ənta.

³³ Iwar ägg-adəm ad-t-ärh s-ulh-net imda,

d-tayətte-net təmda d-äşşahät-net iket-net;

ärh daḡ änharäj-net s-əmmək wa s-irh' iman-net.

A-wen, wär t-təlla tasəbdärt wäla takute wär-ojer.»

³⁴ Inhäy Ƴisa iqqud n-älwižab-net ḡas, inn'-as: «Käyy, äbas tujəjad Təmmənəya n-Mässinäx.» Äbas t-illa ḡarät-a-wen ere ihälän asəstan-net.

*Ƴisa, ojär tumast n-ahäya n-Dawəd
(Mätti 22:41-46; Luqa 20:41-44)*

³⁵ İsaḡra Ƴisa däx-ehän n-ämudd wa mäqqärän, ijanna i-äddinät: «Ma isawännen äḡulam n-Ätṡäwrät a-s Älmasex, rure-s n-Dawəd?

³⁶ Wädden Dawəd iman-net a innän s-mäjräd ija Unfas Šäddijän däx-əmm-net a-s: <Emäli Mässinäx, innä i-Emäli-nin, əyyäw, ḡayəm daw-aḡil-in, hundäḡ har äjäḡ išənja-näk daw-iḡarän-näk.>

³⁷ ʃas šamad Dawəd iman-net iʃarr Älmasex s-isəm Emäli; əndek əmmək wa s-əddoobät ad-umas rure-s?»

Ijraz məjräd-wen-däx ija ʃisa i-tamətə ta täjjeet has-täsijädät.

Hewät!

(Mätti 23:1-36; Luqa 11:37-54; 20:45-47)

³⁸ Däx-a-wa isäxra, inn'-asän: «Agəzät iman-näwän däx-älxulam n-Ättäwrät, əjraznät-asän timukal däx-isəlsa əhobätnen, ijraz-asän ad-hasän-titwəjjin isofan däx-tišarriten,

³⁹ ärhan tisäqqima-ti ännufläyenen däx-ihänan n-äddin wi n-käl-Älyähud d-atwəsəməxar däx-imjora,

⁴⁰ tihäxän a-wa ihän ifassän n-tinuḍäfen, a-s ija a-wen, härkuk tumadän i-ad-tän-in-əjrahän äddinät; ilkam däx-sän äššärexa səmmän.»

Tänuḍäft ta tojärät imärrəzäxän ihuk

(Luqa 21:1-4)

⁴¹ Äqqiima ʃisa däx-ehän n-ämudd wa mäqqārän dat-əssəndoqq wa däx-titwəjjinät tikutawen, ikyad däx-əmmək wa s-däx-s säns tamətə azrəf. Təjjarän däx-s käl-ehäre azrəf äjjeen;

⁴² tosä-dd tänuḍäft läqqəwät, tästäräkkät däx-əssəndoqq sänatät tämmaten əbdanen.

⁴³ Ixra-dd ʃisa inəttulab-net s-iman-net, inn'-asän: «Äsidätteḡ-awän a-s tänuḍäft-ta-däx n-taläqqe, tojär äddinät iket-näsän ihuk,

⁴⁴ fäl-a-s iket-näsän, a-wa s-ässakäyän s-wär-ämḡatärän a əkfän, a-s ija a-wen ənta, a-wa tətṭäf i-tämudre-net iket-net a təkfa.»

13

Teräzze ta təlcamät däx-ehän n-ämudd wa mäqqārän

(Mätti 24:1-2; Luqa 21:5-6)

¹ Izjār-dd ʃisa ehän n-ämudd wa mäqqārän ʃas, inn'-as iyyän däx-inəttulab-net «Älyalim, ənhəy ʃas tihun-ti-däx əhuskätnen, tihusay n-ehän!»

² Inn'-as ʃisa: «Wädden hannäyäd-t ehän-wa-däx mäqqārän əhusken? Wär mad-däx-s dd-täqqayəm tähunt tiyyät warät tamidit-net, ad-ättäḡtäḡ iket-däx-net.»

Išmal n-täməddawt n-äddunya

(Mätti 24:3-35; Luqa 17:22-24; 21:7-24)

³ Äqqiima ʃisa qarät-a-wen fäll-taḍayt ta tässidwälät ihəşkan wi n-əzzäytun, ikyad däx-ehän n-ämudd wa mäqqārän, issəstän-t Bətrus d-Yaqub d-Exya d-Idris däx-takše,

⁴ ənnän-as: «Läḡät-anəḡ əmme d-mad-äj a-wa s-tənned? Əkkəs-anəḡ däx-tayḍärt n-išmal wi s-mad-nəlməd a-s sämdo n-härät iket-net, iwwäd-dd?»

⁵ Äwwežäb-asän ʃisa, inn'-asän: «He käwänəḍ, äjät ənniyät, wär käwän-iššəket äwadəm,

⁶ ad-dd-asən äddinät äjjootnen fäll-isəm-in, änn hak iyyän däx-sän: «Näkk a-s Älmasex», šiškən s-a-wen-däx äddinät äjjootnen.

⁷ Ad-təsləm i-isälan n-imjārän d-mähewəl n-imjārän, wär täxweläm ed ilzam ad-äj a-wen məşan, sämdo n-äddunya ənta, wär-ija härwa.

⁸ Ad-təknəs tawset tamidit-net, iknəs əddəwəl amidi-net, äj laz, iškəḍkəḍ äkall däx-idəgğan äjjootnen, sänto n-täməddawt n-äddunya ʃas a-wa, oläh d-sänto n-tizzurt n-tamäḍt jarräwät eḡäf-net.

⁹ Mășan, äjät ənniyät i-iman-năwăn: ad-hawăn-aškən äddinät s-əlxəkum, əjən dăx-wăn tiwit dăx-ihănan n-äddin wi n-kăl-Älyăhud; səbdədăn-kăwăn dat-gəfărăn d-imănokalan, dăx-äddimmät n-isəm-in wa kăwăn-iwarăn; umas a-wen əssəbab fäl tămoosăm tjuhawen-in data-săn,

¹⁰ i-ad-əslənät tiwsaten iket-dăx-năsnät i-isălan n-Ălənžil təzzar.

¹¹ Afäl kăwăn-ăstărmăsăn äddinät, wăr tăšăwwaşät dăx-isălan n-a-wa mad-tənnəm, äjät măjräd wa kăwăn-e-itwəkfən əssağät-wen-dăx ed wădden kăwănəđ a maden-ämmăjräd, Unfas Šăddijăn a he-ijən dăx-imawăn-năwăn a-wa s-lăm s-tənnanet.

¹² Išilan-en, ad-isəttărməs əwadəm əŋŋa-s i-ad-ämmät kərəf, isəttărməs abba rure-s, ənnăbdădăn aratan d-imărawăn-năsăn, əjən iman n-imărawăn-năsăn;

¹³ ad-dăr-wăn akəđăn äddinät iket-năsăn, dăx-äddimmät n-isəm-in wa kăwăn-iwarăn, məšan ere wa ihălăn iman-net, akoyăd dăx-alkum-hahi har ašäl wa d-imda a-wen-dăx iket-net, ad-işləs.

Erk äzzămanăn wi dd-malənen

¹⁴ Afäl tənăyăm ənabxas wa n-eməkkărekăd hăr äqqima dăx-edăgg wa s-wăr-ila s-ad-dăx-s äqqayəm, əwadəm wa iğarrăn isălan-wi-dăx, ijrăhet əlmăğna-năsăn! Wi irmăs a-wen-dăx əzzağăn teje ta n-Älyăhudəyät, jawăđnet dăx-azzal s-aşrut wa n-idağăn,

¹⁵ wa iwărăn afälla n-ehăn, wăr dd-itəzəbbutet i-ad-iđkəl a has-ihan ammas n-ehăn,

¹⁶ wa ihăn išəkraš, wăr dd-ităqqălet đara-s i-ad-iđkəl asălso-net.

¹⁷ Timəskay tiđeden-ti mad-ărməsăn išilan-win-dăx lanät ənniyät meş siđuđnät.

¹⁸ Əttărät dăx-Măssinăğ ad-wăr-itəmzəyyit ajiwəđ-năwăn d-äzzăman wa n-tajrəst

¹⁹ ed išilan-en-dăx, ad-äj əlğizabät əssuksăđăn s-ad-dd-ixlăk Măssinăğ äddunya-dăx, wăr kăla ätiwănhăy şund ənta fäll-ărori n-ăkall, ad-təmdəw äddunya dăğ, wăr-ilkem ad-ija a dăr-s olăhăn.

²⁰ Afäl wăr-ifneş Emăli dăx-tăqqăn n-tisnant ta hăt išilan-win-dăx, wăr-işəlləs wăl' ägg-adəm iyyăn ғas; məšan, ad-işəkşəl Măssinăğ tăqqăn n-tizşurt-ten-dăx, dăx-təssəba n-äddinät wi əsnăfrăn i-əlyəllas.

²¹ Äzzăman-en, afäl hawăn-inna əwadəm: <Ənhəywät-ak, Ălmaseş, ənta da!> meş <Ənhəywät-ak, ənta den!> wăr t-təflesăm.

²² Ad-dd-asən əlmaseşăn n-bahu d-ənnăbităn n-bahu, əjən ijităn əssuksăđnen d-tišuşab, şişkən ənnăr əmmukkăn a-wen wăla äddinät wi əsnăfrăn Măssinăğ.

²³ He kăwănəđ! Äjät ənniyät i-iman-năwăn, əkkasăğ-kăwăn dăx-tayđärt hărwa wăr jen hărătăn-win-dăx.»

Uşəl n-Ÿisa Ălmaseş

(Mătti 24:29-31; Luqa 21:25-28)

²⁴ «Đarät tisnant ta madät-tăj dăx-işilan-win-dăx, <ad-əlsənät tihay təfukt,

iba təmölle n-ewăr,

²⁵ ətrəkken-dd etran dăx-işənnawăn,

ənhəynəhəyăn iməşşuha wi hănen išənnawăn.>

²⁶ Əlwăqq-wen-dăx, ad-e-itwənhəy Ägg-ägg-adəm, imal-dd, inay tijărăken, təlcam-as tărna-net d-əlxurmät-net.

²⁷ Dihen, ad-işəmmişəl ənjălosăn-net, sədəwən-dd săr-s dăx-tisdas iket-năsnät e d t-illăm ere əsinăfrăn Măssinăğ dăx-e-d t-təllăm tamdujt fäll-ărori n-ăkall hakd-dăğ dăx-işənnawăn.»

Iji n-ənniyät

(Mătti 24:32-36; Luqa 21:29-33)

²⁸ «Səjrähät ɣas əmmək wa s-idaggäl ašar: wädden e-d t-tənhäyäm a-s dd-inšär har lämmədän ifärketän-net, ad-tənnəm, os'-anäɣ ewelän.

²⁹ Emmək-wen-däɣ daɣ a-s afäl tənhäyäm härätän-win-däɣ s-hawän-ənnex har əqqälän iji, adiš əlmədät a-s Ägg-ägg-adəm, ohäz-dd uɣəl-net, os'-iwän fäw.

³⁰ Äsidätteɣ-awän a-s, wär-e takəy əzzurəyät-ta-däɣ wär jen härätän-win-däɣ s-hawän-ənnex iket-däɣ-näsän.

³¹ Ojär täräɣse ija ad-ib' išənnawän d-äkall, uhən ad-iba tənna-nin.

ɣaymät täsidäwäm i-ass n-ɣisa Älmaseɣ

³² Däɣ-isälan n-ašäl meɣ ässaɣät wa däɣ-mad-əjən härätän-win-däɣ, wär t-illa ere t-issanän; wär t-əssenän ənjälosän wi hənən išənnawän wäla Ägg-ägg-adəm; Abba ɣas, a t-issanän.

³³ He käwäned! ɣaymät tokayäm ed wär təssenäm ässaɣät s-dd-e-ass.

Tangalt ta n-isuf wi itäj Mässinäɣ

³⁴ A-wa madän-äj, oläh d-ähäləs iɣarrän asikəl. Ässawäd tekke ɣas, issədman ehän-net däɣ-inaxdimän-net; äsmätär hak iyyän däɣ-sän d-a-wa s-ila s-ad-t-äj. Inna i-wa iɣläfän emm-n-ehän, äqqaymet okay.

³⁵ A-wen-däɣ a fäl, ɣaymät tokayäm ed, wär təssenäm ässaɣät s-dd-e-ass mässi-s-n-ehän, alməz meɣ tišrayät n-ehäd meɣ äɣora meɣ tifawt.

³⁶ Uksadät ad-dd-ass wär jem fäll-a-wen, iɣdär-käwän-dd təttaşäm.

³⁷ A-wa hawän-janney, janney-t daɣ i-äddinät iket-näsän, ɣaymät tokayäm.»

14

Anu n-taydärt wa kittəwän imänokalän i-ɣisa (Mätti 26:1-5; Luqa 22:1-2; Exya 11:45-53)

¹ Äqqiimän-in əssin išilan i-ämudd wa n-Faška-i däɣ-tamäksänät tijəlwen ti wär ha täzə. Tattärän imänokalän n-käl-tikutawen əmmək s-əssäɣdärän ɣisa, əjən iman-net mäšan,

² ənnän, wär-ufa ad-äj a-wen däɣ-ašäl wa n-ämudd, i-ad-wär təjj tamdərwayt däɣ-tamətə.

Tamädt ta təssänɣälät aɣutän fäll-ɣisa (Mätti 26:6-13; Exya 12:1-8)

³ Ašäl iyyän d-ämijarät ɣisa i-Simyon wa s-käla t-ijräw jəri izzäɣän tadəbayt ta n-Bitanya, itamänsaw dihen-däɣ, a-s t-dd-tosa tamädt täwwayät butəl iknan däɣ-tähunt mällät, han aɣutän lanen älqim wär-iqquer härät. Tosä-dd ɣas, tärza emm n-butəl wa täwwäy, ad-sänɣal aɣutän wi t-hənən fäll-əɣäf n-ɣisa.

⁴ Ənhäyän äddinät-wi dər-əniɣäyima a-wen, wär hasän-ijrez, ähnäffen däɣ-iman-näsän, ad-jannen: «Mafäl baxxäsän aɣutän-wi-däɣ,

⁵ wädden äddooben ad-hin-ənsən käradät timad n-ärriyal n-azrəf ämoosnen takute i-tiläqqiwen.» Oɣänän ya adkär i-tamädt-ten-däɣ.

⁶ Inn'-asän ɣisa: «Äkfät-tät älɣafyät, mafäl has-naxxäsäm iman? Tihusay n-härät təj'-ahi-t!

⁷ Tiläqqiwen ya, əllanät ɣur-wän härkuk, älwäqq s-tärhäm-däɣ, täddoobem ad-hasnät-təjəm älxer mäšan, näkk, ilkam ad-käwän-äfläɣ.

⁸ Tamädt-i-däɣ, tēja a-wa täddoobät, təššəswär-dd i-äddinät däɣ-isälan n-ərukən n-tafəkka-nin i-azəkka.

⁹ Äsidätteɣ-awän a-s edägg däɣ-ätwäxtäbän isälan n-Älənzil, däɣ-äddunya-ta-däɣ, ad-däɣ-s ətwəsuxəlän isälan n-a-wa ja i-ad-tät-kittəwän äddinät.»

Anu n-taydärt wa iḡāš Yahudəs
(*Mätti 26:14-16; Luqa 22:3-6*)

¹⁰ Inkär Yähudəs Isxaryut wa n-iyyän däḡ-inəṭṭulab wi n-märaw d-əssin, ikk' imänokalän n-käl-tikutawen i-ad-hasän-isäyḡär Ḳisa, ärməsän-t.

¹¹ Äsdäwen-tän isälan wi dd-iwwäy, jän-as ärkäwäl n-ad-t-əkfen azrəf. Ad-itammäḡ Yähudəs ḡur-älwäqq-wen-däḡ i-tašləlt s-hasän-t-ästärmäs.

Ämudd wa n-Faška
(*Mätti 26:17-30; Luqa 22:7-23; Exya 13:21-30; 1 Kur. 11:23-25*)

¹² Ašäl wa äzzarän n-ämudd däḡ-tamäkšanät tijəlwen-ti wär təha täzza, älwäqq wa d-ḡarräsän äddinät i-taḡsiwen ti n-Faška, ənnän inəṭṭulab i-Ḳisa: «Ändek diha d-tärhed ad-nəsəssikəy imənsiwän n-ämudd wa n-Faška?»

¹³ Äsmašäl əssin däḡ-sän s-aḡrəm, inn'-asän: «Əjjəšät aḡrəm, ad-där-wän im-muqqəs ähaləs äwwayän iddid n-aman, əlkəmät-as

¹⁴ s-ehän wa mad-ijjəš, tənnəm i-mässi-s n-ehän-en: «Inn'-ak älyalim, səkən-anäḡ edägg däḡ-ehän-näk wa däḡ-mad-səssikəyäḡ ämudd wa n-Faška näkk d-inəṭṭulab-in.»

¹⁵ Ad-käwän-isəkən soro n-ehän-net ih' ehän hərəwän, šaddijän däḡ-ämmuujnen isəftaḡ, dihen-däḡ ad-mad-nəsəssikəy ämudd.»

¹⁶ Əglän inəṭṭulab, əjjäšan aḡrəm, ənhäyän härätän s-əmmək-wa-däḡ s-hasän-tän-innä, ad-siməjnun imənsiwän wi n-Faška.

¹⁷ Ij' ehäd ḡas, osä-dd Ḳisa äddeew d-inəṭṭulab-net wi n-märaw d-əssin.

¹⁸ Tamänsawän dihen-däḡ a-s hasän-inna: «Äsidätteḡ-awän a-s iyyän däḡ-wän dər-i oharän ämära-däḡ a hi-madän-isəssäḡdär.»

¹⁹ Əkmän-tän iman-näsän a-s hasän-innä a-wen-däḡ, ad-has-jannen s-iyyän-iyyän: «Ajän näkk?»

²⁰ Inn'-asän: «Ənneḡ: iyyän däḡ-wän dər-i änimäjjan äfuss däḡ-äkoss a hi-madän-isəssäḡdär.

²¹ Tidət-däḡ a-s Ägg-ägg-adəm, ad-t-iba, ed a-wen-däḡ a ənnän əlkəttabän n-Mässinäḡ däḡ-isälan-net mäšan, amäskoy äwadəm wa t-madän-isəssäḡdär! Äwadəm-en, iššäm-as-in ad-wär dd-ijjəš äddunya fäw.»

Asəbdad tasäktot ta šaddijät

²² Tattän dihen-däḡ a-s idkäl Ḳisa tajəlla, ämmoy i-Mässinäḡ təzzar, äzun-asän-tät, inn'-asän: «Uhənät, a-wa taḡəssa-nin.»

²³ Idkäl ḡarät-a-wen kara han aman n-läḡnəb, äxxiimmärnen, ämmoy i-Mässinäḡ təzzar, ikf'-asän-t iket-däḡ-näsän, əswän däḡ-s.

²⁴ Inn'-asän: «A-wa ašni-nin wa ämoosän ärkäwäl n-tassaḡt ta täynayät d-Mässinäḡ, ašni-nin, ad-inḡəl däḡ-təssəba n-äddinät äjjootnen.

²⁵ Äsidätteḡ-awän a-s äbas ilkam ad-əswəḡ a dd-ijmaḡän ara n-läḡnəb hundäḡ har ašäl wa d-mad-äswäḡ wa äynayän däḡ-Təmmənəya n-Mässinäḡ.»

²⁶ Äwwäy Ḳisa d-inəṭṭulab-net isuhaḡ n-təmmal n-Mässinäḡ dd-əzjarnen əlkəttab wa n-Äzzäbur, əglän ḡarät-a-wen, əkkän taḡaḡt ta tässidwälät ihəškan wi n-əzzäytun.

Ilkam ad-ikkuddəl Bəṭrus Ḳisa
(*Mätti 26:31-35; Luqa 22:31-34; Exya 13:36-38*)

²⁷ Inn'-asän ḡarät-a-wen: «Ad-täqqələm ḡar'-i iket-däḡ-näwän ed iktab däḡ-əlkəttab n-Mässinäḡ a-s:

<Ad-əwətäḡ aməḡan, iba-t, ämmähašnät tihatten iket-näsnät.>

²⁸ Afäl dd-ənkäräx jer-inəmmuttan, ad-hawän-izaräx s-teje ta n-Galila.»

²⁹ Iggäd-dd Bətrus, inn'-as: «Kud-irha əkkuddəlän-käy imidiwän-in iket-näsän, näkk iman-in, wär käy-mad-əkkuddələx.»

³⁰ Inn'-as Yisa: «Äsidätteḡ-ak a-s ehäd-i-däx, a-s-e-äj ekäz əssin iḡoran, täkkuddäläd-ahi har käraḡ ihändäggan.»

³¹ Ibbäräd Bətrus, innä daḡ: «Näkk ḡas, kud-däx tamättant a tihräx där-k, wär käy-mad-əkkuddələx.» Abäraj-wen-däx ija Bətrus, a jän imidiwän-net.

Ässaḡät wa ikkäs Yisa däx-ašəkrəš wa n-Žätsämmani
(Mätti 26:36-46; Luqa 22:39-46)

³² Ädew där-sän Yisa ḡarät-a-wen s-ašəkrəš iyyän iknan asədwal n-ihəškan s-isəm-net Žätsämmani. Əwwädän-in ḡas, inn'-asän: «ḡaymät, täqqələm-ahi diha-däx har ədələx Mässinäx.»

³³ Iššənkäš-in fälla-sän, äddeew d-Bətrus d-Yaqub d-Exya; ḡur-ässaxät-wen-däx ad-t-əssəntän iman-net təkma, ixwäl.

³⁴ Inn'-asän: «Äryan iman-in, äryan har išwar hi-äba; wär təttesäm, ḡaymät ḡur-i, wär hanäx-iläqqädet eḡəs.»

³⁵ Iššənkäš-in daḡ fälla-sän a əndärrän, irkäx, ad-itəddal Mässinäx, ijanna: «Kunta ämmuukkän a-wen-däx, ajəjet-ahi ässaḡät-i-däx.»

³⁶ Innä daḡ däx-tittar-net: «Abba-nin, wär t-illa a-s wädden täddoobed-t, səssijəj-ahi tisanant-ta-däx, mäšan hakd a-wen-däx, əjet erhet wa-näk wädden wa-nin.»

³⁷ Iqqäl-tän-dd Yisa, ogäz-tän-dd əḡtasän, issənkär Bətrus, inn'-as: «Simyon, käyy təttaşäd? Adiš, indär-ak wälä-däx ad-təjəd ässaḡät iyyän tokayäd,

³⁸ äyyät fälla-wän eḡəs, ədələt Mässinäx i-ad-käwän-agəz däx-tändärbaten n-Iblis; ägg-adəm, tidət-däx a-s äsidärhän amišəl n-a äjjeen ähuusken mäšan, igdal-as iba n-äššahät n-tumast-net amišəl n-a-wa irha.»

³⁹ Oläs daḡ ašənkəš fälla-sän, ad-itəddal Mässinäx s-əmmək-wənnin-däx s-t-idäl s-tizarät.

⁴⁰ Oläs-tän-dd uḡəl, ogäz-tän-dd, ij'-asän eḡəs aläḡad wa-däx fäl hasän-indär wälä ad-arən tiḡtawen-näsän; issənkär-tän mäšan, äba-hasän a hasän-ənnän a-wa-däx hasän-ija, äzuk n-eḡəs.

⁴¹ Ifäl-tän, ij'-asän-dd uḡəl wa s-käraḡ, inn'-asän: «ḡas käwäneḡ təttaşäm, sinfum härwa? Igdäh-awän; ässaḡät wa d-ititwäḡdir Ägg-ägg-adəm, ijješ ifassän n-inäsbäkkadän, osä-dd.

⁴² Ənkärät, äḡlät-anäx, os'-iwän ämaydar-in.»

Atärməs n-Yisa
(Mätti 26:47-56; Luqa 22:47-53; Exya 18:2-11)

⁴³ Ämmiijräd härwa a-s dd-osa Yähudəs, iyyän däx-inəḡḡulab-net wi n-märaw d-əssin, äsiläl tamətte s-iiyyäd, əšləjän tikobawen, iyyäd äwwayän iboriyän; äšimašälän-tän imänokalän n-käl-tikutawen d-älḡulam n-Äḡḡawrät d-inušämän n-Işrayil.

⁴⁴ Tamətte-ten-däx, ij'-as Yähudəs wa n-ämaydar tamätart däx-has-inna: «Ähaləs wa s-hi-tənhäyäm har t-osäsäx däx-idmarän-in, ənta a-s Yisa, ärməsät-t, təḡləm där-s däx-a-s has-təknam iji n-ənniyät.»

⁴⁵ Osä-dd Yähudəs, oḡäd iman-net s-Yisa, inn'-as: «Älfäqqi!» Osäs-t däx-idmarän-net.

⁴⁶ Toḡa tamətte fäll-Yisa, tärmäs-t.

⁴⁷ Iggäd-dd iyyän däx-inəḡḡulab-net, ilbäy-dd təkoba-net, iwät sār-s akli n-ämänokal n-käl-tikutawen, ištäf-dd sār-s taməzəzujt-net.

⁴⁸ Inna Yisa i-tamette: «Ajän näkk änaɣtaf a ämoosäɣ a-s hi-dd-takkäm d-tikobawen d-iboriyan i-ad-hi-tärmesäm?»

⁴⁹ Wädden hak ašäl əlɛɣ-t jere-wän, saɣreɣ däɣ-ehän n-ämudd wa mäqqārän, mafäl wär hi däɣ-s tärmesäm? Elmədät a-s a-wa ijän ašäl-i-däɣ, ija i-ad-itbət a-wa ənnän əlkəttabän n-Mässinäɣ däɣ-isälan-in.»

⁵⁰ Äjewädän inəttulab iket-näsän, oyyän-dd Yisa ənta ɣas jer-išənja-net.

Ämawaɣ wa äjewädän

⁵¹ İlkäm-as-dd ämawaɣ iyyän wärän ilsa ar tasəjbəst lämmədät daw-wär t-illa härät, äkbätten-t-dd äddinät ɣas,

⁵² oyy'-asän-in tasəjbəst-net, ošäl wär ilsa tikəst.

Tebädde n-Yisa dat-äššäreɣa wa mäqqārän

(Mätti 26:57-68; Luqa 22:54-55, 63-71; Exya 18:12-14, 19-24)

⁵³ Ittəlwäy Yisa s-ämänokal n-käl-tikutawen-i s-a-s itäj a-wen-däɣ, äžžimmäɣän ɣur-s käl-tikutawen d-inušämän n-Işrayil d-älɣulam n-Ättäwrät.

⁵⁴ Tamette-en, ij'-as-dd Bətrus alkum šejren har təjjäš ammas n-äɣalla n-ehän n-ämänokal n-käl-tikutawen; osä-dd Bətrus, ijjäš ənta-däɣ, iglä äqqima edes i-gärditän, ad-itazzäh s-efew.

⁵⁵ A-s itäj a-wen-däɣ, tattärän imänokalän n-käl-tikutawen d-käl-Sinhidrin-i† tirənen äššäreɣa ere innän bahu fäll-Yisa, sidəwən-t däɣ-äššäreɣa, äɣtəsän-as taməttant mäšan, wär t-illa udlem fälla-s əjrawän.

⁵⁶ Eɣgädän-dd äddinät äjjootnen, ad-t-saɣlamän mäšan, indär-asän ad-ännäfhämän fäll-bahutän-näsän.

⁵⁷ Sawarän-t iyyäd bahu,

⁵⁸ jannen: «nəsall'-as a-s innä: <Näkk, ad-ärzäɣ ehän n-ämudd wa mäqqārän däyan ifassän n-dägg-adəm, səbdədäɣ-dd däɣ-käraɣ išilan i wär deyän ifassän n-ägg-adəm däɣ-edägg-net> »

⁵⁹ mäšan, wäla bahu-wen-däɣ, indär-asän ad-fälla-s ännäfhämän.

⁶⁰ Ihä-dd ämänokal n-käl-tikutawen ibdad däɣ-ammas n-älžämaɣät, innä i-Yisa: «Ma tənned däɣ-a-wa fälla-k itawannen? Mäjräd!»

⁶¹ Wär t-illa a has-inna Yisa. Issəstän-t ämänokal n-käl-tikutawen daɣ, inn'-as: «Ajän käyy a-s Älmaseɣ wa n-Rure-s n-Wa ibbəlälän.»

⁶² Inn'-as Yisa: «Ämoosäɣ-t; ässiilmädäɣ-käy daɣ a-s ɣur-ašäl-i-däɣ, ad-tənhəyäm Ägg-ägg-adəm, äqqiima daw-aɣil n-Wa ilän tärna iket-net, taləsəm-t daɣ ahänay, iqqal-dd, ifal-dd išənnawän, inay tijäräken.»

⁶³ Isl' ämänokal n-käl-tikutawen i-a-wen ɣas, ijjäš-t älhäm wa-däɣ fäl irmäs err n-erəswäy-net, äşərrawät-t fäll-iman-net, inna: «Ma nətajj i-tijuhawen daɣ?»

⁶⁴ Təsläm-as iket-nəwän a-s äskafär wädden; ma tənnäm däɣ-isälan-net?» Äswärän-t udlem iket-näsän, ənnän änihäjjä d-taməttant.

⁶⁵ Ad-fälla-s situfän, salsen ekäršäy idəm-net, sattäɣän-as, jannen-as: «Luləy ya!» Sattäɣän-as daɣ gärditän.

Akuddəl n-Bətrus i-Yisa

(Mätti 26:69-75; Luqa 22:56-62; Exya 18:15-18, 25-27)

⁶⁶ Äqqiima Bətrus däɣ-ammas n-äɣalla-en-däɣ a-s t-dd tosa tiyyät däɣ-tinaxdimen n-ämänokal n-käl-tikutawen;

⁶⁷ tənhäy-t izzah s-efew, täzjäzz'-e, tənn'-as: «Käyy-däɣ, käla täddewäd d-Yisa wa n-Näširät?»

† 14:55 14:55 A-wa älzämaɣät n-inušämän d-imizärän n-käl-Işrayil wa itirən äššäreɣa, əntəneɣ a-s älcəllitän, osəɣän daɣ tamette d-əlxəkum d-äddin.

⁶⁸ Äkkuddäl Bətrus a-wen, inn'-as: «Wär-əjrehäx, wär-əssenäx a dāx-hi-tässewäläd.» Izjār Bətrus ɖarät-a-wen, ikk' emm n-äxalla xas, iwät ekāz äxora.

⁶⁹ Tənhäy-t daɣ tənaxdimt tiyyät, ad-janna i-äddinät-wi t-əllanən dihen: «Hannäyäm-t ähaləs-wa-däx, iyyän däx-sän.»

⁷⁰ Oläs daɣ Bətrus akuddäl n-a-wen. A əndärrän ɖarät-a-wen, ənnän-as äddinät əbdadnen dihen: «Ijmaɖ-t äššäk a-s iyyän däx-sän a tämoosäd ed käyy-däx, Galila a käy-lät.»

⁷¹ Ad-hasän-itähhaɖ, ilaqqän iman-net siha d-siha, ijann'-asän: «Ähaləs wa s-hi-jännem, wär t-əzzeyäx.»

⁷² Diha-däx d-innä a-wen-däx ad-iwät ekāz äxora wa s-əssin. Iktä-dd Bətrus məjräd wa s-käla has-t-ija ʒisa a-s has-innä: «Wär mad-iwät ekāz əssin iɣoran wär tənneɖ har käraɖ ihändaggan, wär hi-təzzeyäd.» Izjār, ad-ihall.

15

Tebädde n-ʒisa dat-Bilatəs

(Mätti 27:1-2, 11-14; Luqa 23:1-5; Exya 18:28-38)

¹ Härwa emäxär ad-änmänhäyän käl-tikutawen d-inušämän n-Işrayil d-älɣulam n-Ätṭawrät d-käl-Sinhidrin-i† tirənen äššärexa; jän tişəm däx-ʒisa təzzar, əlwäyän-t s-Bilatəs.

² Inhäy-t Bilatəs xas, issəstän-t, inn'-as: «Ak, käyy a-s ämänokal n-käl-Älyähud meɣ?» Inn'-as ʒisa: «Käyy iman-näk, tənneɖ-tän.»

³ Ad-t-sawarän uɖlemän äjjootnen.

⁴ Issəstän-t Bilatəs daɣ, inn'-as: «Ənhəy xas a-wa fälla-k itawännen? Ma tənneɖ käyy iman-näk?»

⁵ Wär t-illa a has-inna ʒisa har iqqän asusəm-net eɣäf n-Bilatəs.

Bäryäbbas wa n-emäjj n-iman

(Mätti 15:31; Luqa 23:13-15; Exya 18:38-19:36)

⁶ Äzzäman-en, hak ämudd n-Faşka, äsiwäyy'-in gəfär u-takärmüt wa däx-s tətṭär tamətṭe.

⁷ A-s itäjj a-wen, ih' ähaləs s-isəm-net Bäryäbbas takärmüt ənta d-imidiwän-net s-käla dd-əssənkärän tamətṭe har jän iman n-äwadəm däx-a-wen-däx.

⁸ Tənkär tamətṭe iket-net ad-tattär däx-Bilatəs a-wa s-izzäy ad-hasän-t-äj.

⁹ Inn'-asän: «Ak ajän tärham ad-hawän-in-äyyäx ämänokal n-käl-Älyähud?»

¹⁰ Issan Bilatəs a-s təmyäre n-tismiten n-imänokalän n-käl-tikutawen a fäl ästärmäsän ʒisa.

¹¹ Əntäjän-dd tamətṭe s-Bilatəs i-ad-hasän-dd-isəwwəyy Bäryäbbas.

¹² Oläs daɣ Bilatəs, inn'-asän: «Ma s-tärham ad-t-äjäx i-wa s-itawänna ämänokal n-käl-Älyähud?»

¹³ Oläsän eɣäri, jannen: «Itwəşləbet fäll-tajəttewt.»

¹⁴ Inn'-asän Bilatəs: «Mafäl, ma iɣşäd t-äsiinähəjjän d-taməttant?» Äşxäyyän däx-işənnawän: «Itwəşləbet fäll-tajəttewt.»

¹⁵ Äsof Bilatəs alkum i-erhet-näsän, äswäyy'-asän-in Bäryäbbas, äswäjjä tiwit s-ebärtäk däx-ʒisa təzzar, ikf'-asän-t i-ad-itwəşləb.

Asəmməɖri wa jän əssärdusa i-ʒisa

(Mätti 27:27-31; Exya 19:2-3)

¹⁶ Əlwäyän əssärdusa wi n-gəfär ʒisa s-amməs n-ehän wa däx-iɣattäs äššärexa, iɣläyɣäläy-t-dd dihen ejhän n-əssärdusa imdan,

† 15:1 15:1 A-wa älzämayät n-inušämän d-imizärän n-käl-Işrayil wa itirən äššärexa, əntäneɖ a-s älcəllitan, oşaxän daɣ tamətṭe d-əlxəkum d-äddin.

17 əssəlsən-t anəkäbba šaggäxän, jän-as älmät, korona, a-wen, takənbut šund ta n-imänokalän, təzət dəx-isənnanän,

18 ad-has-tajjän isofan, jannen-as: «Ämänokal n-käl-Älyähud, nəj'-ak gärdəbu.»

19 Hakkän-t tiwit s-täborit fäll-eḫäf, situfän fälla-s, rakkäxän data-s, älmät ḡabbädän-t.

20 Əssəgdähän dəx-tekäškäšt ta tän-təslät ḡas, əkkäsän-dd fälla-s anəkabba-wənnin šaggäxän, əssoḡälän-as isəlsa-net təzzar, əzjārän dār-s aḡrəm s-edəḡg wa-dəḡ ila s-ad-dəḡ-s itwəşləb fäll-tajəttewt.

Atwəşləb n-Ḡisa

(Mätti 27:32-44; Luqa 23:26-43; Exya 19:17-27)

21 Əḡlan dār-s a-s ämmoqqäsän d-Simyon wa n-tadäbayt ta n-Qərwan n-abba n-Älxadə d-Rəffus, ifal-dd isəkraş; äşhäşşälän-t alənji n-tajəttewt ta fäll-mad-itwəşləb Ḡisa.

22 Äwwäyän Ḡisa s-edəḡg wa s-itawänna Gälgota, a-wen, älmäḡna-net: «Edəḡg wa n-akärkor.»

23 Əssärtäyän-as-dd dihen asməd d-asəfar iyyän ifannäzän tisanant dəx-taḡəssa n-äwadəm məšan, unjäy isw'-e.

24 Əşläbän-t əssärdusa fäll-tajəttewt ḡas, jän tisəḡeren i-ad-užanän isəlsa-net jer-iman-näsän, əlmədän əndek a-wa he-ikrəş hak iyyän dəx-sän.

25 Aḡdəlset a-s t-əşläbän fäll-tajəttewt, ḡur-ässayät wa s-təzza.

26 Əttəytäyän älləx jənnəj-s i-ad-əlmədän äddinät äddälil wa sār-s dd-oräwän taməttant; älləx-en, iktab fälla-s:

«A-WA ÄMÄNOKAL N-KÄL-ÄLYÄHUD».

27 Aşäl-en, ämizäyyen əssin inaytafän atwəşləb d-Ḡisa; ätwəşləb iyyän daw-aḡil-net, ätwəşləb wa iyyädän daw-täşälje-net.

28 A-wen-dəḡ jän i-Ḡisa a-s ənnän əlkəttabän n-Mässinäḡ ad-äj fäl-a-s, iktab a-s: «Ad-ıdan dəx-iməddəḡwa.»

29 İqqäl Ḡisa tekäškäšt i-äddinät-wi tikəynen, gaggärän-t, siwliwilän iḡäfawän-näsän, jannen-as: «Əyyaa, käyy wädden tənned täddobed teräzze n-ehän n-ämudd wa məqqārän, taləsäd-t edey dəx-käraḡ išilan,

30 əḡləs ya iman-näk ämära, təzzəbbud-dd tajəttewt!»

31 Jän-t dəḡ imänokalän n-käl-tikutawen d-älyulam n-Ättäwrät tekäškäšt, tinmənnin: «Ənta-i iyläsän äddinät wi iyyädnen, indar-as ämära ad-iḡləs iman-net.

32 Kunta ənta a-s Älmaseḡ wa n-ämänokal n-İşrayil, izzubbətet-dd tajəttewt, ad-t-nənhəy, namən sār-s.» Jän-t wi ätwəşləbnen edes-has tekäškäšt, ad-t-gaggärän əntəneḡ-dəḡ.

Iba n-Ḡisa

(Mätti 27:45-56; Luqa 23:44-49; Exya 19:28-30)

33 Əlsänät tihay ärori n-äkall iket-dəḡ-net wa-dəḡ n-tarähut hundəḡ har tezzar.

34 Təja tezzar ḡas, əşḡärät Ḡisa s-əşşahät, innä:

«Yälloy, Yälloy,
lama sərbəxtani?»

A-wen älmäḡna-net:

«Mässi-ḡ Mässinäḡ, Mässi-ḡ Mässinäḡ,

mafäl hi-tiyyəd d-iman-in

dəḡ-tisanant-ta-dəḡ?»

35 Əşlän-as äddinät əbdadnen dihen, wär-əfhemän a-wa ijänna ḡas, ad-jannen: «Säjdät-as, ännäbi Ḡəli a iḡarr.»

³⁶ Ošäl-dd sār-s iyyän dāḡ-sän, issəlmāḡ tādūft təttalet fäll-ābori dāḡ-bənegār, izzäl-as-tät i-ad-tät-isuməm, infəw-t a-wen dāḡ-fad, ihakk-as-tät dihen-dāḡ, ijanna: «Ad-nənhəy ya kunta ad-t-dd-ass ännäbi Ƴəli, izəzzubbət-t-dd tajəttewt.»

³⁷ Äşyärät Ƴisa s-äşşahät ɗarät-a-wen, əjmädän-t iman.

³⁸ Iqqärrawät älwäqq-wen-dāḡ ärido wa ibɗän dāḡ-ehän n-ämudd wa mäqqārän, edägg wa šäddijän d-edägg wa iknän təşədje dāḡ-ammās, wa-dāḡ n-afälla-net har ider-net.

³⁹ Inhäy kəbtän iyyän iswadän dāḡ-Ƴisa a-s t-ijmäɗ unfas a-wen ḡas, innä: «Tidət-dāḡ a-s ähaləs-i-dāḡ, Rure-s n-Mässinäḡ.»

⁴⁰ Əbdadnät daḡ dihen tiɗeden tiyyäɗ dāḡ-ijəj, əkyadnät dāḡ-a-wa ijän. Tiɗeden-en, h'-enät Märyäma ta n-Muläždaləyät, Märyäma ta n-ma-s n-Yaqub wa əndərrän d-Yusəf d-tiyyät s-isəm-net Sälma.

⁴¹ Əntänäteɗ-en-dāḡ ad-dd-äddewnen d-Ƴisa, wa-dāḡ n-Galila, ədhahnät-t s-a-wa ətṭäfnät har əntänäteɗ-da-dāḡ; əbdadnät daḡ edes-hasnät tiyyäɗ äjjootnen dd-äddewnen d-Ƴisa a-s dd-ikka Ƴäruşşalam.

Azəkka n-Ƴisa

(Mätti 27:57-61; Luqa 23:50-56; Exya 19:38-42)

⁴² Tokäy takkäşt n-aşäl wa n-əlžəmət, sadaw tamətte i-aşäl wa n-əssəbət-i n-täsonfat,

⁴³ osä-dd Yusəf wa n-Arimata, ähaləs ätiwäsämḡārän dāḡ-inušämän n-Işrayil, ijar ätṭäma n-a-s təlcam Təmmənəya n-Mässinäḡ. Ənta-en-dāḡ a ihälän tikawt n-Bilatəs, ittär dāḡ-s tafəkka n-Ƴisa.

⁴⁴ Tofa təkunt n-armuɗ n-taməttant n-Ƴisa Bilatəs, issäḡrā-dd kəbtän iyyän i-ad-t-isəstən d-a-s tädduuttät taməttant-net meḡ?

⁴⁵ Ijä dāḡ-s kəbtän-en isälan n-a-s äba-t ḡas, issärräx-as aɗkul n-tafəkka-net.

⁴⁶ Iglä Yusəf, izžənsä-dd tefit, ikkäs-dd tafəkka n-Ƴisa fäll-tajəttewt, ij'-et dāḡ-tefit təzzar, issəns'-et dāḡ-azəkka iḡaşän dāḡ-esawäl; äşyäränḡarät ɗarät-a-wen təhünt mäqqoorät, ätṭubbät sār-s emm n-azəkka.

⁴⁷ Təjjəyha Märyäma ta n-Muläždaləyät d-Märyäma ta n-ma-s n-Yusəf i-a-wen-dāḡ iket-net, əknänät asəbbuyən n-edägg wa dāḡ-iḡka Ƴisa təzzar, əglänät.

16

Tanäkra n-Ƴisa jer-inəmmuttan

(Mätti 28:1-10; Luqa 24:1-12; Exya 20:1-10)

¹ Okäy əssəbət-i n-aşäl wa n-täsonfat ḡas, təžžənşä-dd Märyäma ta n-Muläždaləyät d-Märyäma ta n-ma-s n-Yaqub d-Sälma əlḡənfārän i-ad-əşwəynät sār-sän tafəkka n-Ƴisa.

² Tifawt n-älxad-i n-aşäl wa äzzarän dāḡ-əssəboḡ, ḡur-ajmuɗ n-täfukt, əkkänät azəkka.

³ Əglänät, tinmənninät jer-iman-näsnät: «Näkkänäteɗ-i-dāḡ, mi hanāḡ-e-ikkəsən təhünt ta mäqqārät təhärät emm n-azəkka?»

⁴ Əwwäɗnät-in ḡas, əkyädnät, ənhäynät a-s təhünt-tənnin mäqqārät, təyiraräd-in.

⁵ Əjjäšnät ammas n-azəkka, ənhäynät ämawaɗ ilsan emäls mällän, äqqiima daw-aḡil-näsnät, tərtäy-asnät tarəmmeyt d-täqqän n-eḡäf.

⁶ Mäšan, inn'-asnät ämawaɗ: «Wär təqqännet iḡäfawän-näkmät, wär tərmeymät, Ƴisa wa n-Näşirät ätwäşläbän s-tammäḡmät, inkär-dd jer-inəmmuttan, äbas t-illa diha; ənhəymät edägg wa s-käla dāḡ-s insa.

⁷ Ämära, äkkəmät inəmmušal d-Bəṭrus, tənəmät-as a-s äzzar-awän iket-nawän s-Galila, dihen-dāḡ ad-mad-t-tənhəyäm s-əmmək wa-dāḡ s-käla hawän-tän-inna.»

⁸ Əzjarnät-dd azəkka ɣas, oşalnät, täşışäkădkăd-tänät tarəmməxt tärtayät d-täqqän n-eɣäf. Wăr t-illa ere s-ənnanät härät a-wa-dăɣ hasnät-ja tarəmməxt.

Anfiləl wa dd-ija Ƴisa i-Märyäma ta n-Mulăždaləyät
(Mätti 28:16-20; Luqa 24:13-49; Exya 20:11-23)

⁹ Aşäl wa n-älxad-i n-aşäl wa äzzarän dăɣ-əssəboɣ ad-dd-inkär Ƴisa jer-inəmmuttan. Änfaläl-dd s-tizarät i-Märyäma ta n-Mulăždaləyät-i dăɣ-ikkäs əssa alşinän,

¹⁰ təglä, təj'-isälan dăɣ-äddinät wi s-käla äddewän d-Ƴisa-i s-a-s itäj a-wen, ətəfän iba-net, äsniinän.

¹¹ Əslän a-s tənhay-t iddar məşan, unjäyän s-ad-tät-əfləsän.

Anfiləl n-Ƴisa i-əssin dăɣ-inalkimän-net
(Luqa 24:13-35)

¹² Issəkna Ƴisa iman-net ɗarät-a-wen i-əssin dăɣ-inalkimän-net əkkanen ejef. Änfaläl-asän-dd dăɣ-ini säl wənnin-dăɣ dd-änfaläl i-Märyäma.

¹³ İqqälän Yărussälam, jän isälan dăɣ-imidiwän-näsän wi iyyädnen məşan, wăr tän-əfləsän əntäneɗ-dăɣ.

Ämaşal wa issäyläf Ƴisa inəttulab-net
(Mätti 28:16-20; Luqa 24:36-49; Exya 20:19-23)

¹⁴ Änfaläl-dd Ƴisa ɗarät-a-wen i-inəttulab wi n-märaw d-iyyän dăɣ-älwäqq d-äžziimmäɣän, tamänsawän. Äkläwläw fälla-sän dăɣ-təssəba n-iba immun-näsän d-täɣart-ta jän ulhawän-näsän fäl-a-s, unjäyän əfläsän äddinät wi t-ənhäyenen, inkar-dd jer-inəmmuttan.

¹⁵ Inn'-asän: «Ämära, äglät, ilalät äddunya iket-net, täxtəbäm Älənžil i-e d t-illäm ägg-adəm.

¹⁶ Wa omänän, ätwäsälmaɣ dăɣ-aman, ad-iɣləs; wa äşɣarän ulh-net, ad-t-iwär uɗlem dat-Mässinäɣ.

¹⁷ Əntäneɗ-da härätän wi mad-ämaşälän wi maden-amən: ad-əkkəsän alşinän dăɣ-äddinät s-tärna n-isəm-in, ad-ämmäjradän awalän äynaynen,

¹⁸ ətəfän taşşälän dăɣ-ifassän-näsän, kud-əswän sunsəj-dăɣ, wăr hasän-e-iɣşəd härät, e-d äswärän ifassän-näsän imarhinän, ad-əzzəyän.»

İqqäl Ƴisa išənnawän-i dd-ifäl
(Luqa 24:50-53)

¹⁹ İj'-asän Ƴisa məjrad-wen-dăɣ ɣas, immədkäl s-işənnawän, igl' äqqima daw-aɣil n-Mässinäɣ.

²⁰ Əglän inəttulab ɗarät-a-wen, ad-xatəbän isälan dăɣ-idäggan iket-näsän. İdhal-tän Emäli, isidəttut məjrad-näsän s-ijitän n-Mässinäɣ wi tamaşälän. Amin!]

Älənžil n-Ŷisa Älmasex wa iktäb Luqa

Äšqjəš

¹ I-Täyofil wa əkney semyar:

Əttärän äddinät äjjootnen, ad-əktəbän s-älmäxna isälan wi jänen jere-näx,

² s-əmmək-wa-däx s-hanäx-tän-äsoxälän äddinät wi tän-ənhäynen s-tiṭṭawen-näsän s-tizarät, ija Mässinäx imawayän n-mäjräd-net.

³ A-wen-däx a fäl näkk-däx, ijjäš-ahi-dd ənniyät n-ad-əmmäxäx i-isälan-en-däx s-iyyan-iyyan xur-aləşäl-näsän, hundäx har ašäl-i-däx, i-ad-hak-hasän-in-äjäx akätab əsisäjrähän,

⁴ təkəssäd äššäk a-s texäre ta təjräwäd, tətbat.

Isälan wi ija änjälos däx-tiwit n-Exya

⁵ Äzzäman wa d-ämoos Harudəs ämänokal n-teje ta n-Älyähudəyät, ill'-e ähaləs iyyän däx-wi n-käl-tikutawen s-isəm-net Zäkärya, işxal däx-ehän n-ämudd wa mäqqärän däx-taggayt n-käl-tikutawen ta n-ihäyawän n-Abya, isəm n-hänne-s Elizäbät, tahäyawt n-Harun a tämoos.

⁶ Oxadän issənän-essän dat-Mässinäx, əṭṭafän s-älxaqq färəḍän d-alämärän n-Emäli,

⁷ mäšan wär len ara ed Elizäbät, täjjojra, täwwäḍ-tän-dd daḡ tušäre issənän-essän.

⁸ Ašäl iyyän dd-täqqäl tasəssäxlit taggayt n-käl-tikutawen ta iha Zäkärya, işl'-e əššəxəl-net dat-Mässinäx hundäx har fälla-s oḍänät tisəxeren,

⁹ ämoos a-wen älyadät n-käl-tikutawen n-a-s afäl oḍänät tisəxeren fäll-äwadəm, ənta a-madän-isəhhuh matälxer däx-ehän wa šəddijän n-Emäli.

¹⁰ Ašäl-en, isihəwhəw matälxer däx-ehän-en-däx, a-s itäjj a-wen-däx, älzämayät wa n-inaxbadän, itəddal Mässinäx dat-əmm n-ehän n-ämudd wa s-ijjäs Zäkärya ammas-net.

¹¹ A əndärrän, änfäläl-as-dd änjälos n-Emäli fäll-axil n-tasəskärt-ta fäll-tihuh matälxer.

¹² Inhäy Zäkärya änjälos xas, iggäd ənniyät, irmäx

¹³ mäšan, inn'-as änjälos: «Zäkärya! A-wa tətäräd däx-Mässinäx, ad-äj, hənne-k Elizäbät, ad-təkrəš ara, təjəd-as isəm: Exya.

¹⁴ Ad-hak-umas əssəbab n-tedäwit d-tisrawt, səddəwət daḡ tiwit-net äddinät äjjootnen.

¹⁵ Ad-umas ere ilan isəm xur-Emäli d-idəm xur-Mässinäx, wär mad-isəw aman n-läxnäb äxxiimmärnen wäl' asməd wäl' iyyän, ad-t-iḍnəy Unfas Šəddijän n-Mässinäx härwa iha täsa n-ma-s.

¹⁶ Ənta a dd-madän-isuxəl a äjjeen däx-käl-Işrayil Emäli-näsän, Mässinäx,

¹⁷ ilkəm-as s-ənniyät d-äşşahät wa n-ännäbi Ŷəli i-ad-dd-isuxəl ulhawän n-abbatän aratan-näsän, əkrəšan iməkkeḍḍəlän tayətta ta karrəšan äddinät lanen idəm dat-Mässinäx, isəbdəd tamətta täsidäwät i-ad-təlkəm i-Emäli.»

¹⁸ Innä Zäkärya qarät-a-wen i-änjälos: «Əndek a-wa s-mad-əlmədäy a-s a-wa hi-jänned tidət? Näkk, amyar wəşšärän a ämoosäx, hənne-x daḡ ti-wəşšärät.»

¹⁹ Inn'-as änjälos: «A-wa näkk Žibril-wa s-härkuk əbdädäy dat-Mässinäx, äšmašäl-ahi-dd sār-k i-ad-käy-dd-səssiwəḍäx isälan-wi-däx ähuskätnen.

²⁰ Ämära, šamad wär hi-təflesäd a-s hak-əmməjrädäx s-tizarät, ad-itwəṭṭəf emm-näk, ikrəs iləs-näk hundäx har ašäl wa d-mad-itbatän isälan-wi-däx hak-jəx.»

²¹ A-s itäj a-wen-däx, tamette täqqal i-Zäkärya, tof'-et täkunt n-a-wa t-in-išlän d-a-wa t-in-iṭṭafän.

²² Älwäqq wa dd-izjār, ittār ad-ämmäjräd i-äddinät mäšan, indār-as, əlmädän a-s härät a has-dd-änfalälän däx-ehän-en-däx, ad-hasän-isitufəy i-ad-tän-isəfhəm a-wa ijän.

²³ Issəmdä Zäkärya täqqän-net däx-əššəxəl ɣas, iqqäl ehän-net.

²⁴ Təkräš hänne-s ɖarät-a-wen ənniyät ɣas, ja səmmos orän təffār iman-net däx-ehän-net,

²⁵ janna: «Ənta da a-wa hi-ija Emäli-nin, ənta a däx-i dd-iswäḍän, ikkäs fäll-i täkrakiḍt ta ämoosəx jer-äddinät.»

Isälan-wi ija änjälos däx-tiwit n-Ÿisa Älmasex

²⁶ Təjjäš Elizäbät ewär-net wa s-sädis ɣas, äšmašäl Mässinäx änjälos-net Žibril s-taxrəmt tiyyät s-itawänna Näširät hat teje ta n-Galila,

²⁷ ässok'-e tämawaḍt wärät təzzey meddən s-isəm-net Märyäma, ittar ähaləs n-ahäya n-ämänokal Dawəd s-isəm-net Yusəf.

²⁸ Osä-dd änjälos Märyäma, inn'-as: «Əjeɣ-am äsafu kämm-i tənnəfränät ed, təkräšäd idəm ɣur-Emäli-näm.»

²⁹ Issärmäx-tät mäjräd-wen-däx, ad-tattār älmäxna n-manäwen-wa-däx.

³⁰ Inn'-as änjälos: «Märyäma, wär tärməxäd, äzzäbbät-dd Mässinäx ännuxmət-net fälla-m,

³¹ kämm da-däx, ad-təkrəšäd ənniyät, təkrəšäd ara, təjəd-as isəm Ÿisa.

³² Ad-ikrəš isəm, iwär-t isəm Rure-s n-Mässinäx wa iknän aḍkul, ad-äj Emäli Mässinäx əṭṭəbəl wa n-ämänokal Dawəd-i t-äshäyāwän däx-ifassän-net,

³³ ad-immukəl härkuk fäll-ehän wa n-ihäyāwän n-Yaqub, tiɣlal təmmənukəla.»

³⁴ Tənnä Märyäma ɖarät-a-wen i-änjälos: «Əndek əmmək wa s-e-äj a-wen ed näkk, wär-əzzeyäx meddən.»

³⁵ Inn'-as änjälos: «Ad-fälla-m dd-izzubbət Unfas Šaddijän, täls'-im tärna n-wa iknän aḍkul, a-wen-däx a fäl ara wa šaddijän dd-e-iwən, ad-t-iwär isəm Rure-s n-Mässinäx.

³⁶ Ara n-meddən-näm, Elizäbät, wädden ti-wäššärät mäšan, ad-təkrəš ara ənta-däx, ənta-i s-käla tämoos teməjjejrut, ha ämära ewär-net wa s-sädis

³⁷ ed, wär t-illa a-s wädden äddoobät-t Mässinäx.»

³⁸ Tənn'-as Märyäma: «Näkk, taklit n-Emäli, itwəjjet-ahi a-wa s-tənned.» Ifäl-tät änjälos ässaɣät-wen-däx, iglä.

Təkkä Märyäma Elizäbät

³⁹ Təkkä Märyäma išilan-win-däx taxrəmt tiyyät n-käl-Yähuda hat idaɣän.

⁴⁰ Täwwäḍ-in ehän wa n-Zäkärya, ad-tinməjj isofan d-Elizäbät.

⁴¹ Diha-däx d-has-təja Märyäma äsafu, ad-iggäd, iɣbär-tät alyaḍ wa ihän täsa-net, iḍnäy-tät Unfas Šaddijän älwäqq-wen-däx.

⁴² Təḍkäl Elizäbät eməsli-net, tənnä: «Təndəḍ-am kämm jer-tiḍəḍen, təndəḍ day i-ara wa ihän täsa-näm.

⁴³ Ənta näkk-i-däx, ma ämoosəx tis-ahi-dd anna n-Emäli-nin?

⁴⁴ Ijmaḍ-t äššäk a-s diha-däx d-əslänät timəzzujen-in i-äsafu-näm, ad-iggäd ara-wa ihän täsa-nin s-tedäwit.

⁴⁵ Təndəḍ-am kämm-i təfläsät a-s Emäli a ijän-däx, ilkam ɣas, ad-isətbət a-wa s-ijjäš ärkäwäl-net.»

Təmmal n-Märyäma i-Mässinäx

⁴⁶ Tənnä Märyäma:

«Timələn iman-in təmɣäre n-Emäli,

47 äddiwät ulh-in fäl tössəba
n-a-wa hi-ija Mässinäx-i n-Ämaḡlas-in.

48 Ikyäd-dd däḡ-təmmäḡrit n-taklit-net.

Ḡur-ašäl-i-däḡ, e d t-illäm
ere ilkamän fäll-ärori n-äkall,
ad-hi-änn: <Təndəḡ-am>

49 fäl-a-s, Wa ilän tärna, ij'-ahi a äjjeen, šäddiij isəm-net.

50 Tähanint-net tənsa fäll-əzzurəyatän
ti t-äksudnen däḡ-iwətyan iket-näsän.

51 Issəkna tärna n-äfuss-net,
äsmäḡräy s-äššahät-net äddinät wi iha əttəkəbru,

52 ikkäs-dd daw-käl-äššahät təmmənukəla-näsän,
issəfrär tilaqqiwen,

53 äsyawän iməlluza däḡ-a-wa äzedän,
äsyär ifassän n-käl-ehäre.

54 Idhäl käl-Išrayil-i n-eklan-net,
wär hin-ittef fälla-sän tähanint-net

55 ed, ämoos a-wen ärkəwäl iḡlalän
ijjaš i-imärəwän-nänäḡ wi n-ibda

s-əmmək wa s-t-ija i-Ibrahim d-ihäyawän-net.»

56 Təzzäḡ Märyäma ḡur-Elizäbät har tässakäy əḡḡəkud n-kərəḡ orän təzzar, täqqäl
ehän-net.

Tiwit n-Exya wa n-Enəsselmäy

57 Täwwäḡ-dd täqqän ta däḡ-jarrəw Elizäbät eḡäf-net, təkräš ara n-eyy.

58 Əslän änhärajän-net d-išäqqaḡän-net tihusay n-a-wa has-ija Emäli ḡas, ohärän
där-s tedäwit ta ja.

59 Ikräš ara əttam išilan ḡas, ämeläy, jän-as äddinät isəm Zäkärya i-ad-umas
anəmmäḡru n-ti-s

60 mäšan, tənn'-asän ma-s: «Äbo! Iwäret-t isəm Exya.»

61 Əḡḡädän-dd sär-s äddinät, ənnän-as: «Wär t-illa äwadəm däḡ-ihänan-nəwän
iwar isəm-wen-däḡ.»

62 Ästafäyän i-ti-s n-alyaḡ i-ad-änn ənta isəm wa s-irha ad-iwär rure-s.

63 Ästafäy-asän i-ad-t-dd-əkfən a fäll-iktäb, iktäb-asän fälla-s: «Isəm-net: Exya.»
Əqqälän-dd äddinät ḡas oran imawän.

64 Ämera iləs n-Zäkärya älwäqq-wen-däḡ, ad-itamäjrad, itiməl Mässinäḡ.

65 Tärmäs tüksəḡa n-Mässinäḡ äddinät-wi əzzäḡnen däḡ-attayän-en-däḡ d-käl-
iḡaḡän wi n-Älyähudəyät, ad-timsiḡulän isälan-wi-däḡ.

66 Əṯṯäfän äddinät iket-näsän wi əslänen a-wa ijän däḡ-ulhawän-näsän, äqqimän-
dd ḡas, jannen: «Ak ara-wa-däḡ, ma mad-umas?» Ara-i, äsiwär-t Mässinäḡ äfuss-net.

Äloläy Zäkärya s-tärna n-Unfas Šäddijän

67 Zäkärya-i n-ti-s n-alyaḡ, iḡkär-t Unfas Šäddijän, äloläy, inna:

68 «Təmmal i-Emäli-i n-Ämakraš n-Išrayil fäl-a-s,
ənta, ad-dd-iššärjäšän tamətte-net, äsdärf'-et.

69 Äsfäqqät-anäḡ-dd isək n-əlḡəllas däḡ-ehän n-akli-net Dawəd.

70 A-wen äru tän-inna Mässinäḡ
s-imawän n-ännäbitän-net wi n-iməššeddəjän.

71 Issəlmäd-anäḡ a-s ad-hanäḡ-agəz däḡ-išənja-nänäḡ,
ikkəs-anäḡ däḡ-ifassän n-imiksänän-nänäḡ iket-däḡ-näsän.

72 A-wen-däḡ a fäl oḡän tähanint

i-abbatän-nanäx wi n-ibda,
iktä-dd ärkawäl-net wa n-tassaxt šaddijän hasän-ijjäš.

⁷³ Ämoos a-wen tahuđe ija i-abba-nänäx Ibrahim

⁷⁴ a-s has-innä, ad-hanäx-agəz dəx-išənja-nänäx,
ad-nəzzax jere-sän mäšan, wär tän-näksuđ.

⁷⁵ A-wen ij'-e, i-ad-t-näxbəd hak ašäl dəx-təšədje
d-iqqud dəx-tuksəða-net.

⁷⁶ Käyy day i n-rure-x,
ad-käy-iwār isəm ännäbi n-Mässinäx wa iknän ađkul,
käyy a-madän-izar i-Emäli i-ad-təknəd ibaran-net,

⁷⁷ səlmədäd äddinät-net s-əlxəllas
wa t-illän xur-Mässinäx i-tenäšše n-ibäkkadän-näsän

⁷⁸ fäl-a-s, Mässinäx ođän-anäx tähanint.

Dəx-idəm n-ehäf n-ärräxmät-net,

ad-hanäx-dd-isəssiwəy Ämaxlas
olähän d-täfukt dd-təjammädät išənnawän

⁷⁹ i-ad-impləwləw ännur-net
fäll-äddinät wi äqqimänen dəx-tihay,

han tele ta n-tamättant,
i-ad-hanäx-išärjəš dəx-tabarät ta n-älxer.»

⁸⁰ Idaggäl Exya, tiwwađ tayətə-net, izzax tinariwen hundäx
har ašäl wa t-dd-äšmašäl Mässinäx s-käl-Işrayil.

2

Tiwit n-Ÿisa Älmasex (Mätti 1:18-25)

¹ Äzzäman wa d-äsiṭäbäl Qäyşär Ojärtän e d t-illäm ämänokal, omär s-ad-tidan
tamətə fäll-ärori n-äkall.

² Täđint-ten-dəx täzzarät, təja dəx-äzzäman wa d-ämoos Kirənyus gəfär n-teje ta
n-Surya.

³ Dəx-təssəba n-a-wen-dəx inn' ämänokal wa mäqqärän, a fäl hak äwadəm, iqqäl
tayrəmt-ta dəx-iwa i-ad-ıdan.

⁴ Ifäl-dd Yusəf tayrəmt ta n-Näşirät häť teje ta n-Galila, ikkä tayrəmt n-amxar-
net Dawəd ta s-itawänna Bätlehäm häť teje ta n-Älyähudəyät, ed ahäya n-Dawəd a
ämoos,

⁵ i-ad-ıdan ənta d-Märyäma ta n-tämutärt-net-i s-a-s itäjj a-wen-dəx, la ənniyät.

⁶ Han tayrəmt-ten-dəx, a-s dd-tosa täqqän ta dəx-jarräw Märyäma eḡäf-net.

⁷ Təjräw eḡäf-net, təkräš teḡäfädde-net, töttäl-t dəx-ikäršäyan, təssəns'-e dəx-
efäyd fäl-a-s, ehän wa n-imäjarän, äbas t-ihä edägg.

Anfiləl wa dd-ija änjälos i-imäđanän

⁸ Äkall-en, han-t imäđanän ässinbärnen irəzzejä-näsän dəx-isalwan illa-hin i-
axrəm sihen.

⁹ A əndärrän, ibdäd-dd änjälos n-Mässinäx data-sän, äsmäläwlaw-dd älxurmät
n-Emäli edägg wa hän, əknän-dəx tarəmməxt

¹⁰ mäšan, inn'-asän änjälos: «Wär tärmeḡäm, ənhəywät, äwwayäx-awän isälan
n-älxer maden-umas əssəbab n-tedäwit i-tamətə iket-dəx-net.

¹¹ Ašäl-i, iw'-awän Ämaxlas dəx-tayrəmt ta n-ämänokal Dawəd, ənta a-s Älmasex
n-Emäli.

¹² Ənta da a-wa s-t-mad-təzzəyäm: ad-tənhəyäm ara s-iket iwa, ittal dəx-ikäršäyan,
insa dəx-efäyd.»

13 Diha-däx d-issemdä änjälos tenna n-a-wen-däx, ad-dd-äddew abræk n-änjälosän timəlne Mässinäx, jannen:

14 «Təmmal i-Mässinäx däx-išənnawän, älxer ija fäll-ärori n-äkall i-äddinät-wi fäll-tənsa tärha-net.»

Tikawt n-imādanän i-Bätlehäm

15 Ǝqqälän änjälosän išənnawän ɣas, änmännän imādanän: «Adiš, näkket Bätlehäm i-ad-nənhəy a-wa ijän d-a-wa hanäx-issəlmäd Emäli.»

16 Äšwänken älwäqq-wen-däx, ogəzän-in dihen Märyäma d-Yusəf d-ara wa s-iket iwa, insa däx-efäyd.

17 Ǝnhäyän-t imādanän ɣas, ässoɣälän i-äddinät a-wa hasän-ätwännän fäll-ara wa əndärrän.

18 Äkunän äddinät iket-näsän wi əslänen i-a-wa ənnän imādanän

19 məšan, Märyäma-i n-ma-s n-alyaɖ, tətṭaf isälan-win-däx iket-näsän däx-iman-net, siməktəw-tän däx-ulh-net i-ad-təlməd älmäɣna-näsän.

20 Ǝqqälän imādanän ɖarät-a-wen, ad-samɣarän Mässinäx, tiimələn-t fäl təssəba n-a-wa əslän d-a-wa ənhäyän s-əmmək-wa-däx s-hasän-ätwänna.

21 Ikräš ara əttam išilan ɣas, ämeläy, jän-as isəm Ƴisa, isəm wa s-hasän-innä änjälos ad-has-t-əjən härwa wär-iwa.

Amiwi n-Ƴisa s-ehän n-ämudd wa mäqqärän

22 Däx-isälan n-a-wa tenna Ättäwrät ta n-Mosa, äddew Yusəf d-Märyäma s-ehän n-ämudd wa mäqqärän ihän Ƴärussälam i-ad-šəšdəjän iman-näsän, äwwäyän day ara i-ad-t-säɣləfän tärna n-Emäli

23 fäl-a-s, iktab däx-alämär n-Emäli a-s: «Alyaɖ n-eyy wa n-teɣäfädde, umaset eməššeddəj n-Mässinäx.»

24 Däx-isälan n-ašəšdəj n-iman-näsän, lan s-ad-əjən takute n-sänatät tidäberən däx-ti n-əroj meɣ day sänatät mällolnen däx-ti n-aɣrəm ed, a-wen-däx a iktabän däx-alämär n-Emäli.

Tittar ti ija Šämɣun wa wäššärän i-Ƴisa

25 A əndärrän ähaləs iyyän da-däx izzaxän Ƴärussälam s-isəm-net Šämɣun. A ija a-wa-däx, ijar ättäma n-əɣəllas wa s-inna Mässinäx i-Işrayil, ässinsa day Mässinäx Unfas Šäddijän fälla-s.

26 Äru d-has-dd-änfaläl Mässinäx däx-täharjit, ijjäš-as ärkäwäl s-tärna n-Unfas Šäddijän n-a-s wär mad-ämmät wär-inhey Älmasex n-Emäli.

27 Ašäl-en-däx, imhäl-t-dd Unfas Šäddijän s-ehän n-ämudd wa mäqqärän i-ad-imzəyyət d-imärawän n-Ƴisa älwäqq wa d-tajjän a-wa fälla-sän irha äɣadät däx-isälan wi n-ihuk-net i-Mässinäx.

28 Irmäs-t-dd Šämɣun däx-ifassän-näsän, ad-itiməl Mässinäx, ijanna:

29 «Emäli!

Ämära, ärməs unfas däx-akli-näk i-ad-igəl däx-älxer ed, a-wa s-has-tənned, ijä.

30 Äjjunfänät tiṭṭawen-in däx-əɣəllas-näk

31 wa dd-täsmäjned i-äddunya iket-däx-net.

32 Ǝɣəllas wa s-ənta a-s ännur i-inəzzulam† i-ad-hasän-dd-tənfilələd,

† 2:32 2:32 – Ƴur-käl-Älyähud, ere wärän ämoos ägg-Älyähud s-aläšäl meɣ ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyäɖnen iket-näsän, ti n-inəzzulam. — Ašäl-i-däx, änäzzalim, äkafär (ere wärän issen s-Mässinäx).

ämoos älxurmät-näk i-käl-Işrayil-i n-tamøtte-näk.»

³³ Iqqäl-dd ti-s d-ma-s ɣas tof'-en tākunt n-a-wa itawānnen fäll-alyaḍ-i-däḡ.

³⁴ Ittār Šāmɣun ɗarāt-a-wen a däḡ-sän ijän älbāraka təzzar, innä i-Märyäma-i n-ma-s: «Alyad-i, ənhəy, əsnäfrän-t Mässinäḡ i-ad-umas tebädde d-ejädäl i-käl-Işrayil, umas daḡ əssəbab n-tamɣənnant i-äddinät əjjootnen.

³⁵ Däḡ-təssəba-net, ad-dd-iffukkār a-wa ihän ulhawän n-äddinät əjjootnen. Kāmm daḡ, ad-ham-umas əssəbab n-uḡşad n-iman olähän d-tidij n-tākoba.»

Tajuhe n-Hännātu ta n-tännäbit

³⁶ Äzzāman-en, төll'-ee tännäbit təknaḥ tuşäre la tawset ta n-dägg-Aşir s-isəmet Hännātu wälät Fanwäl. Däḡ-təmmäḍrit-net, kälä tät-iḍäs adubən däḡ-təja əssa iwətyan,

³⁷ äb' ähaləs-net ɣas, täqqiimä-dd, wär toles adubən, la ämära-däḡ a iwwäḍän əttamät timərwen n-awätay d-əkkoz. A ija a-wen-däḡ, kälä wär fel ehän n-ämudd wa mäqqārän, ehäḍ d-aşäl ɣabbäd Mässinäḡ, täxdam-as, tuzam.

³⁸ Ässaḡät-wen-däḡ ad-dd-tosa ənta-däḡ, ad-tiiməl Mässinäḡ, tadj isälan n-Ḳisa i-äddinät iket-näsän wi järnen ätṭāma n-ad-dd-izəzzubbət Mässinäḡ tädarfit-net fäll-Yārussālam.

Təmmiwəḍa n-Ḳisa

³⁹ Əssəmdän imārawän n-Ḳisa a-wa fälla-sän ifräd alāmār n-Emäli ɣas, əqqälän taɣrəmt-näsän Nəşirät, däḡ-teje ta n-Galila.

⁴⁰ Idaggäl Ḳisa, itişuhut, itəggar-t sārho däḡ-isälan n-a-wa irha Mässinäḡ fäll-əgg-adəm, ikna daḡ fälla-s Mässinäḡ asəns n-ännuɣmät-net.

Ikräş Ḳisa mārāw iyətwan d-əssin

⁴¹ Hak awätay, əkkan imārawän n-Ḳisa Yārussālam i-ämudd wa n-Faşka.

⁴² Ikräş Ḳisa mārāw iwətyan d-əssin ɣas, äddewän dār-s ed, a-wen-däḡ, a innä älyadät n-ämudd.

⁴³ Ässakäyän ämudd dihen ɣas, əqqälän ihānan-näsän mäšan, äqqiima-hin Ḳisa ɗara-sän däḡ-Yārussālam. Wär t-oḍenän hundäḡ har hin-əjrähän a-s wär dār-sän äddew.

⁴⁴ Əjän aşäl imdan n-asikəl ija ɣur-sän a-s äddew d-iməssukal-wi iyyäḍnen dār-sän ohānnen tabarät, əjrähän-in a-s wär dār-sän äddew ɣas, əqqälän däḡ-adəriş-näsän, ad-has-tammäḡän ɣur-işäqqayän-näsän d-imuzäyän-näsän

⁴⁵ mäšan, äba-hasän-t hundäḡ har hin-əwwäḍän Yārussālam.

⁴⁶ Šāmad okayän kərəḍ išilan ad-t-əjrāwän äniḡäyma däḡ-ehän n-ämudd wa mäqqārän d-älɣulam n-Ätṭāwrät, äsijäd-asän tafässarän əlkəttabän n-Mässinäḡ, isastan-tän.

⁴⁷ Äkunän äddinät iket-däḡ-näsän wi sallänen i-a-wa ijänna däḡ-tayətte-net d-älwiḡabän-net.

⁴⁸ Älwäqq wa d-t-ənhäyän imārawän-net dihen, äqqänän iḡäfawän-näsän, tönn'-as ma-s: «Alyad-in, ma ämoos a-wa hanäḡ-jed? A ija a-wa-däḡ, nətammäḡ-ak näkk d-abba-näk ed näɣel asujjəl a jed.»

⁴⁹ Inn'-asän: «Mafäl hi-tammäḡäm, ajän wär tössenäm a-s leɣ s-ad-hi-əşləwän əşşäḡəlän n-Abba-nin däḡ-ehän-net?»

⁵⁰ Wär t-illa a əjrähän däḡ-a-wa hasän-innä.

⁵¹ Äddew dār-sän ɗarāt-a-wen s-Nəşirät, äqqim isajäd i-a-wa has-jannen. Təṭṭaf anna-net härätän-winnin-däḡ, wär tän-iha-i hin-tatäwa.

⁵² Idaggäl Ḳisa däḡ-eḡäs-net, itisārhut, ijraz i-Mässinäḡ hakd dägg-adəm.

3

*Älxuṭbät wa ija Exya wa n-Enəsselmäx
(Mätti 3:1-12; Marqəs 1:1-8; Exya 1:19-28)*

¹ Awätay wa s-māraw d-səmmos dāx-təmmənukəla n-Qäyşär Tibäryus, ämoos Bunəs Bilatəs gəfär n-teje ta n-Älyähudəyät, ämoos Harudəs ämänokal n-teje ta n-Galila, äñña-s Fəlibb äminakäl fäll-Taräkunit d-Ëyyadurəya, Lisanyas ənta äminakäl fäll-äkall wa n-Abila.

² Äzzāman-en, Hənnan d-Qayāf a äminakälnen fäll-käl-tikutawen. İşilan-win-dāx, ad-imməjräd Mässināx i-Exya ägg Zäkärya dāx-tenere.

³ İkk' Exya qarät-a-wen ikallän iket-näsän wi hənən attayän n-əjäns wa s-itawänna Yurdəni. İxaṭṭāb, ijanna i-äddinät: «Utabät, tətweşəlmäxäm dāx-aman i-ad-təjrəwäm tenäşşe n-ibäkkädän.»

⁴ A-wen-dāx işlän Exya, a iktabän dāx-əlkəttab wa n-ännäbi Saya† älwäqq wa d-inna dāx-s:

«Säjdät, ija emäsli iyyän ijannen:
<A-wa emäsli ässewälän dāx-tenere,
äknät tabarät n-Emäli,
səssiḡədät ibaran data-s.

⁵ İxəşran-wi ḡaşnen, ad-ənbəlän,
iḡaxän d-ijefän, ad-aləmən,
ibaran-wi äkränbäynen, ad-aḡədən,
tabaräten-ti ärbäxrabäxnen, ad-agdähñät,

⁶ e d t-illäm ägg-adəm,
ad-inhəy əlḡəllas wa dd-äzzäbbät Mässināx.> »

⁷ Osän-dd äddinät äjjootnen ärhanen ad-tän-isəlmäx Exya dāx aman, inn'-asän: «Ya taşşälən-i-dāx! Wädden tənnäm təmsädäm! Ëyya, a tärham ad-tətweşəlmäxäm i-ad-təfləm daw-äşşäreḡa n-Mässināx wa s-işwar fälla-wän dd-oḡa. Läḡätät-ahi, mi käwän-issəlmädän s-a-wen?

⁸ Sətbətäm tätubt-näwän s-imärkedän, təyyəm fälla-wän tənna n-a-s əzzurəyät n-Ibrahim a nämoos ed afäl täqqäl s-isälan n-əzzurəyät ḡas, äyyät-ahi ad-hawän-ännäx a-s: Mässināx, äddoobät ad-isəmməskəl tihun-ti-dāx hannäyäm, ixlək-dd dāx-sñät əzzurəyät i-Ibrahim.

⁹ Äjät ənniyät fäl-a-s emm n-tutäla äru d-insa fäll-ikewän n-ihəşkan, e d t-illäm ahəşk wärän itirəw aratan ih'-älfäyda, ad-hin-ättänkäḡ, itwəjār-in dāx-efew.»

¹⁰ Əssəstänän-t äddinät wi has-äsijädnen, ənnän-as: «Ma s-nəla s-ad-t-näj?»

¹¹ Äwwežāb-asän, inn'-asän: «Ere dāx-wän ilän əssin imälsan, äkfet iyyän i-wa wärän ila wäl' iyyän, wa ilän a ikša, äkfet ere wa t-wärän ila.»

¹² Osän-t-dd qarät-a-wen inarmasän n-tiwse i-ad-tän-isəlmäx dāx-aman, ənnän-as: «Älḡalim, ma s-nəla s-ad-t-näj?»

¹³ Inn'-asän: «Wär tətteräm dāx-äddinät ar a-wa s-omär əlxəkum.»

¹⁴ Əssəstänän-t əssärdusa, ənnän-as: «Näkkäneḡ-i-ş, ma hanäx-iwarän?» Inn'-asän: «Wär toheḡäm äwadəm, wär təssəḡlämäm äwadəm s-bahu, äjät ärramät dāx-timzäl-näwän.»

¹⁵ Äddinät iket-dāx-näsän wi əslänen i-a-wa ijanna Exya, jārän äṭṭäma, ad-tinməsəstinän kunta wädden ənta-i-dāx a-s Älmasex.

† 3:4 3:4 A-wa ännäbi dd-äzzarän i-Yisa, äloläy dāx-isälan-net əssayät timaḡ n-awätay dat-tiwit-net.

¹⁶ Äwwežäb-asän, inn'-asän: «Näkk, aman a däx-käwän-salmaḡäx mäšan, ilkam-ahi ähaləs hi-ijan mijraw wa-däx s-wär-änhäjjäx wäla-däx d-ad-äðesäx issal n-tifädelen-net, ənta ad-käwän-isəlmäx däx-Unfas Šaddijän d-efew i-ad-hin-istəb a-wa läbasän.

¹⁷ İtṭaf tesäyt-net ta s-hin-e-izzuzzär allon-net, isədəw allon wa oläxän, äj'-e däx-ejänd-net, irməs ahošär wa wärän infa härät, äj'-e däx-efew ähijäljälän härkuk.»

¹⁸ İkk' Exya dədi, itajj isälan n-älxer n-Älənžil-wi-däx, isamätar daḡ äddinät s-älmäxnatän äjjootnen.

¹⁹ Äzzäman-en-däx, ad-äsmähäð Exya fäll-ämänokal Harudəs Intibbas däx-isälan n-Härudəyyas ta n-hänne-s n-änṇa-s Fəlibb däx-s ohäx, illäxät-as daḡ ibäkkadän äjjootnen ämešäl səl wen-däx.

²⁰ Ässewäð Harudəs fäll-a-wen-däx iket-net iji n-Exya däx-takärmüt.

Atwəsəlməx n-Ḳisa däx-aman
(Mätti 3:13-17; Marqəs 1:9-11)

²¹ A-wen-däx iket-net, ija ḡarät a-s ässilmäx Exya äddinät äjjootnen d-Ḳisa iman-net däx-aman. Älwäqq wa d-ititwəsəlməx Ḳisa, itəddal Mässinäx dihen-däx a-s dd-ämerän isənnawän,

²² äzzubbät-dd fälla-s Unfas Šaddijän däx-ännux n-tedäbert mällät, ijmäð-dd eməsli isənnawän, innän:
«Käyy-i-däx a-s Rure-x wa əkneeḡ tärha,
käyy a däx-äsriwän iman-in.»

Äṭṭarex n-Ḳisa Älmasəx
(Mätti 1:1-17)

²³ İla Ḳisa əddəkuḡ n-käradät timərwen n-awätay a-s issənta ämašal-net, ija ḡur-äddinät iket-näsän wi t-hannäynen a-s rure-s n-Yusəf wa n-ägg Xali.

²⁴ Xali ənta, ägg Mätata, Mätata ägg Lewi,
Lewi ägg Mälki, Mälki ägg Yännay,
Yännay ägg Yusəf,

²⁵ Yusəf ägg Mətaşiyas, Mətaşiyas ägg Ḳämmosa,
Ḳämmosa ägg Nəxwama, Nəxwama ägg Xäšli,
Xäšli ägg Naggay,

²⁶ Naggay ägg Mätti, Mätti ägg Mətaşiyas,
Mətaşiyas ägg Šəmḡi, Šəmḡi ägg Yosäx,
Yosäx ägg Yoda,

²⁷ Yoda ägg Exya, Exya ägg Ḳisa,
Ḳisa ägg Žərrubabil, Žərrubabil ägg Äşşəlat,
Äşşəlat ägg Nəyri,

²⁸ Nəyri ägg Mälki, Mälki ägg Äddi,
Äddi ägg Kosäm, Kosäm ägg Älmädäm,
Älmädäm ägg Err,

²⁹ Err ägg Ḳisa, Ḳisa ägg Ḳəlyazär,
Ḳəlyazär ägg Yurim, Yurim ägg Mätata,
Mätata ägg Lewi,

³⁰ Lewi ägg Simyon, Simyon ägg Yähuda,
Yähuda ägg Yusəf, Yusəf ägg Yonäm,
Yonäm ägg İlyakim,

³¹ İlyakim ägg Mälaya, Mälaya ägg Mäyna,
Mäyna ägg Mätata, Mätata ägg Natan,

Natan ägg Dawəd,

³² Dawəd ägg Isaya, Isaya ägg Äxbäydi,
Äxbäydi ägg Boḡaz, Boḡaz ägg Sala,
Sala ägg Nasun,

³³ Nasun ägg Aminādab, Aminādab ägg Ädmin,
Ädmin ägg Arni, Arni ägg Xäšrun,
Xäšrun ägg Faris, Faris ägg Yähuda,
³⁴ Yähuda ägg Yaḡub, Yaḡub ägg Isxaqq,
Isxaqq ägg Ibrahim, Ibrahim ägg Taräxa,
Taräxa ägg Naxur,

³⁵ Naxur ägg Sarux, Sarux ägg Raggäw,
Raggäw ägg Faläx, Faläx ägg Ƴäbbir,
Ƴäbbir ägg Saläx,

³⁶ Saläx ägg Käynäm, Käynäm ägg Arfäḡšad,
Arfäḡšad ägg Säm, Säm ägg Nox,
Nox ägg Lamäx,

³⁷ Lamäx ägg Mätussaləm, Mätussaləm ägg Inuk,
Inuk ägg Yarät, Yarät ägg Mäxläläyil,
Mäxläläyil ägg Käynäm,

³⁸ Käynäm ägg Anuš, Anuš ägg Šetti,
Šetti ägg Adəm, Adəm ənta, Mässinäḡ a t-dd-ixläkän.

4

Ažurrəb wa ija Iblis i-ḡisa (Mätti 4:1-11; Marḡəs 1:12-13)

¹ A-s dd-ifäl ḡisa ejänš wa n-ḡurdəni, iḡkar Unfas Šäddijän s-aššahät. Unfas-en-däḡ a t-oḡädän s-tenere.

² Ijä dihen əkkoḡät timərwen n-ašäl itizärrub-t Iblis. Täqqän-ten-däḡ, ij'-et iket-net wär t-illa a ikkan emm-net təzzar, älluz.

³ Os'-e hi-dd Iblis, inn'-as:

«Šämad käyy a-s Rure-s n-Mässinäḡ, amär i-tähunt-ta-däḡ ad-tumas tajəlla.»

⁴ Äwwežäb-as ḡisa, inn'-as:

«Iktab däḡ-mäjräd n-Mässinäḡ:

<Tämudre n-ägg-adəm, wär təmda fäll-tetäte ḡas.> »

⁵ Iwwäy-t Iblis s-edägg iknan aḡkul, issəkn'-e däḡ-ešäfälli n-tiḡḡ, e d t-illäm əddəwəl iwarän ärori n-äkall,

⁶ inn'-as ämära:

«Ad-käy-äkfäḡ tärna d-təmyär fäll-əddəwəlän-wi-däḡ hannäyäd iket-näsän fäl-a-s i-nin, hakkäḡ-tän daḡ i-ere wa s-ärheḡ,

⁷ a-wen-däḡ a fäl, hakkäḡ-ak-tän iket-näsän afäl hi-täḡbädäd.»

⁸ Äwwežäb-as, inn'-as: «Iktab däḡ-mäjräd n-Mässinäḡ a-s:

<Emäli-näk Mässinäḡ a dat-e-tärkäḡäd, ənta ḡas a fälla-k ilan älḡibadät.> »

⁹ Iwwäy-t Iblis ḡarät-a-wen s-Yärussälam, issəbdäd-t fäll-afälla n-ehän n-ämudd wa mäqqärän təzzar, inn'-as:

«Šämad käyy a-s Rure-s n-Mässinäḡ, äyy iman-näk s-äkall ed, iktab däḡ-edägg iyyän däḡ-mäjräd n-Mässinäḡ a-s:

¹⁰ <Ad-dd-išəmmišəl ənjälosän-net i-ad-käy-əgəzən däḡ-äššar,

11 əkbəlän-käy dəx-ifassän-näsän
i-ad-wär hak-rässəl wäla-dəx təhünt tiyyät ɣas.> »

12 Inn'-as Ƴisa: «Iktab dəx-mäjräd n-Mässinäx a-s:
<Wär-e tarməd Emäli-näk Mässinäx.> »

13 Äzzurräbät-t İblis s-a-wa s-äddobät iket-net, indär-as ɣas, uję-t, ad-isimäqqul
i-ad-sär-s ijrəw taffawt tiyyät dəx.

Sänto n-älxidmät n-Ƴisa dəx-teje ta n-Galila
(Mätti 4:12-17; Marqəs 1:14-15)

14 İqqäl Ƴisa ɗarät-a-wen teje ta n-Galila, toɣad-t tärna n-Unfas Şäddijän dəx-a-wa
itäj, intäj isəm-net dəx-teje-ten-dəx iket-net.

15 İsaɣra äddinät dəx-ihänan n-äddin wi n-käl-Älyähud, ässiimɣärän-t äddinät
iket-näsän.

Täɣart n-ulh n-käl-Näşirät
(Mätti 13:53-58; Marqəs 6:1-6)

16 İfäl Ƴisa dihen, ikkə taɣrəmt ta n-Näşirät-i-dəx idwäl, ij'-e aşäl wa n-əssəbət-i
n-täsonfat, ikk' ehän n-äddin wa n-käl-Älyähud ed, a-wen-dəx a-s izzay ad-t-äj.

17 Təddälän äddinät Mässinäx dihen-dəx a-s ibdäd Ƴisa jere-sän, əkfän-t əlkəttab
wa n-ännäbi Saya† i-ad-hasän-dəx-s iɣär. İkkäs-in i-əlkəttab aɗh wa ija təzzar, or'-e
dəx-edägg wa dəx-iktäb:

18 «İnsa fäll-i Unfas n-Emäli,
äsnäfränän-ahi

i-ad-äjäx isälan n-Älənžil i-tiläqqiwen,
äşmaşäl-ahi-dd i-ad-äjäx isälan i-wi hänen tikärmuten,
əjrəwän iman-näsän,
zuzəyäx iməddoryal,

səddärfey äddinät-wi ätiwäkräşnen,

19 zəzzubbeɣ-dd awätay n-ännuxmät n-Emäli fäll-äröri n-äkall.»

20 İssəmdä Ƴisa teɣäre ɣas, iɣfäl əlkəttab, äsoɣäl-t i-änaxdim-wa ijän ənniyät i-
ehän wa n-äddin. İqqäl-dd, äqqima ɣas, äsbäläläxän dəx-s äddinät-wi hänen ehän
n-äddin-en-dəx iket-dəx-näsän.

21 İdkäl mäjräd, inn'-asän: «Mäjräd wa s-təsläm aşäl-i-dəx, itbät.»

22 Əqqälän-dd ɣas oran imawän, tof'-en təkunt n-tihusay n-iməjridän wi dd-
zajjärnen emm-net, ad-jannen: «Ak ajän a-wa wädden ägg-Yusəf wa-dəx nəzzäy?»

23 Inn'-asän Ƴisa: «Əssanäx a-s ad-hi-dd-səktəwäm ozz wa innän: <Läxtur, käyy-ak
səssəfär i-iman-näkk təzzar>, tənnəm-ahi: <Təmmaz jed dəx-äkall-näk a-wa s-nəsla
jed-t dəx-aɣrəm wa n-Qäfärnaxum.> »

24 Inn'-asän dəx: «Tidət-dəx a-s wär t-illa ännäbi ätiwäqbälän dəx-äkall-net.

25 Äsidätteɣ-awän a-s kälä t-əllänät tinuđafen äjjootnen dəx-İşrayil dəx-äzzäman
wa n-ännäbi Ƴəli. Äzzäman-en, oɣäy mäna i-äddinät, jän kərəđ iwətyan d-säđis
orän wär t-təlla teddamt n-ajənna watät äkall-en-dəx, ija laz s-kälä wär-ätwänhäy a
där-oläh fäll-äröri n-äkall.

26 İja a-wen iket-net mäşan, wär dd-äşmaşäl Mässinäx ännäbi Ƴəli ar s-tänuđaft
tiyyät ɣas dəx-snät təzzaɣät taɣrəmt ta n-Saräfta dəx-teje ta n-Säyda.

27 Darät Ƴəli dəx, osä-dd äzzäman wa n-ännäbi İlyas. Äzzäman-en, əllan-t äddinät
äjjootnen dəx-äkall wa n-İşrayil ijraw jəri mäşan, wär tän-ihä-i s-dd-äşimaşäl
Mässinäx İlyas a säl ähaləs iyyän n-amäjar il' äkall wa n-Surya s-isəm-net Näɣma
i-ad-t-işəşdəj.»

† 4:17 4:17 A-wa ännäbi dd-äzzarän i-Ƴisa, äloläy dəx-isälan-net əssayät timad n-awätay dat-tiwit-net.

²⁸ Eslän äddinät i-härätän-win-däx hasän-innä däx-ehän n-äddin xas, käfän a-wa-däx hasän-ija adkär-net,

²⁹ ämzäyzyän-t iket-näsän, əzzəwen-t hundäx har afälla n-aḍax wa fäll-idäy axrəm i-ad-t-in-səttərəkken, ämmät

³⁰ mäšan, ikka Yisa jere-sän, iglä.

*Äzozäy Yisa ähaləs n-amälšon
(Marqəs 1:21-28)*

³¹ Ätrarä-dd Yisa ḍarät-a-wen, ikka taxrəmt ta n-Qäfärnaxum hät teje ta n-Galila ad-isaxra dihen äddinät hak ašäl n-əssəbət-i n-täsonfat;

³² əqqälän-dd äddinät xas oran imawän fäll-əjjäruḗät-i-däx hasän-ija a-wa isäxra ed isaxr'-en s-älxikmät äšsohen.

³³ Ehän n-äddin-en, ih'-e ähaləs ih' alšin, inhäy Yisa xas, ad-isaxärat s-afälla, ijanna

³⁴ «Ya Yisa wa n-Näširät, ma däx-näx tärhed? Ajän ahälak-nänäx a-s dd-tosed? Ešsanäx ere wa tämoosäd, käyy-i-däx a-s: Wa Šäddijän dd-äšmašäl Mässinäx.»

³⁵ Äsmähäd däx-s Yisa, inn'-as «Eṯṯəf emm-näk, təzjäräd ähaləs-i-däx!» Ijjäḍlät alšin ähaləs jer-äddinät təzzar, izjär-t, wär t-illa a has-iḡšad.

³⁶ Eqqälän-dd äddinät xas oran imawän, tinmännin: «Ma ämoos mäjräd wa? Wa ənta wäl' alšinän e-d fälla-sän äsmähäd s-tärna-net, ad-əzjärän äddinät.»

³⁷ Intäj isəm n-Yisa ḍarät-a-wen-däx, wär t-illa edägg däx-teje-ten-däx s-wädden timsiḡulän däx-s isälan-net.

*Äzozäy Yisa taḍäggalt n-Bəṯrus d-imarhinän äjjootnen
(Mätti 8:14-17; Marqəs 1:29-39)*

³⁸ Izjär Yisa ehän wa n-äddin xas, ikka xur-Simyon. Ämzäyyät-in d-a-s tärməs tenäde täšsoohet taḍäggalt n-Simyon, əttärän däx-s äddinät ad-tät-izuzəy.

³⁹ Ibdäd-dd Yisa jənnəj-s, äsmähäd fäll-tenäde, tärza fälla-s. Tənkär-dd älwäqq-wen-däx, ad-tän-simjurut.

⁴⁰ Toḍa täfukt xas, ämewäyän-dd sār-s imarhinän s-hak iyyän d-turhənnə-net i-ad-tän-izuzəy, äswär hak iyyän ifassän-net, äzozäy-tän.

⁴¹ Zajjärän alšinän äddinät äjjootnen, saxären, jannen: «Käyy a-s Rure-s n-Mässinäx» mäšan, isamähäd fälla-sän, wär tän-itəyy ämmijrädän ed, əssanän a-s ənta a-s Älmasex.

⁴² Äffäw xas, ikka Yisa tenere n-iman-net mäšan tömmäx-as tamətte här t-təjräw, ad-tattärän äddinät əmmək s-t-əṯṯäfän edes-hasän i-ad-wär-ilkem ad-tän-ifal;

⁴³ inhäy tayətte-näsän xas, inn'-asän: «Iwar-ahi ad-äxtəbäx isälan n-älxer n-Təmmənəya n-Mässinäx i-iḡärman-wi iyyäḍnen əntänəḍ-däx ed a-wen-däx a-s dd-ämešäläx.»

⁴⁴ Ad-ixatṯäb ḍarät-a-wen däx-ihänan n-äddin wi n-käl-Älyähud n-teje ta n-Älyähudəyät.

5

*Inəṯṯulab n-Yisa wi äzzarnen
(Mätti 4:18-22; Marqəs 1:16-20)*

¹ Ašäl iyyän d-ibdad Yisa däx-asälim n-əjänš wa n-Žännäšarät, täḡläyḡäläy-t-dd tamətte täjjeet tärhat ad-səjəd i-mäjräd n-Mässinäx wa itäjj.

² Inhäy sänatät turfen n-aman ojaynen s-äqqiimän mössaw-snät däx-asälim n-aman, saradän titarren-näsän.

³ Ijjäš däx-snät ta n-Simyön, ittär däx-s ad-has-tät-in-imhөл hundäx har təfөл asälüm n-aman, äqqima däx-s, ad-isaxra tamətte.

⁴ Issəmdä məjräd xas, inna i-Simyön: «Səgləw turäft-näk hundäx har ammas n-aman, təjrəd käyy d-imidiwän-nak titarren-näwän.»

⁵ Inn'-as Simyön: «Älxalim, ehäd imdan a nəja nəşxal wär t-illa a nərmas məšan, fäl tənna-näk, ad-nəjər titarren-nänäx.»

⁶ Jän a-wa hasän-innä, ärmäsän-dd asäl-en-däx imänen-i-däx äjjootnen har dd-äqqäl-nät titarren-näsän, tössarnät.

⁷ Ad-talläfän i-imidiwän-näsän wi hānen turäft-ta iyyädät i-ad-dd-asələn, ilälän-asän. Osän-dd, ədnäyän turfen-näsän tissənen hundäx har-däx tilkəyyitnät.

⁸ Inhäy Simyön Bətrus a-wa ijän xas, irkäx dat-Ÿisa, inn'-as: «Emäli, ajəj-ahi fäl-a-s näkk anəsbäkkad a ämoosäx.»

⁹ Tärmäs tarəmmeyt-i-däx mäqqärät Simyön d-imidiwän-net fäl tössəba n-əjut n-imänen-i-däx ärmäsän.

¹⁰ Tākunt-ta tärmäsät Simyön, ənta dax a tärmäsät Yaqub d-Exya wi n-dägg-Zäbdi-i dār-ohār älxidmät. Innä Ÿisa i-Simyön dərät-a-wen: «Wär tärmeğäd, xur-asäl-i-däx, ad-tumasäd əwadəm sār-i dd-isadawän äddinät i-ad-tän-äxləsäx.»

¹¹ Äsoğälän-dd dərät-a-wen turfen-näsän asälüm n-aman, oyyän a-wa tän-işlän iket-net, əlkämän-as.

*Äzozäy Ÿisa ähaləs ijraw jəri
(Mätti 8:1-4; Marqəs 1:40-45)*

¹² Iha Ÿisa iyyän däx-iğərman a-s t-inhäy ähaləs ilsa jəri, ikk'-e-hi-dd, irkäx data-s, ad-t-ilaqqäd, ijann'-as: «Älxalim, afäl tärhed a-wen-däx, täddoobed ad-hi-şəşdəjad.»

¹³ Izzäl Ÿisa äfuss-net, idäs-t, inn'-as: «Ärheey a-wen, işdaj», ifäl-t jəri älwäqq-wen-däx.

¹⁴ Äsmätär-t Ÿisa, inn'-as: «Wär jed isälan i-əwadəm wäl' iyyän n-a-s näkk a käy-äzozäyän; änn-ak, əgləw, səkən iman-näk i-u-tikutawen, təjəd takute ta n-təşədje s-älmäxna wa s-tän-innä alämär wa n-ännäbi Mosa i-ad-hasän-umas a-wen tajuhe n-a-s təzzäyäd.»

¹⁵ Hak asäl tiwwad-dd terşe n-isəm i-Ÿisa, tidaw-dd sār-s tamətte täjjeet i-ad-səjed i-isälan n-Älənžil, təzzəy däx-turhənnawen-net.

¹⁶ Məšan Ÿisa ənta, äsoof edägg iştärän däx-ijraw s-tamädilt n-Mässinäx.

*Äzozäy Ÿisa ähaləs ibdanän
(Mätti 9:1-8; Marqəs 2:1-12)*

¹⁷ Ijraw Ÿisa xur-Emäli tärna täşşoohet ässitbät azuzi wa itäj i-äddinät. Asäl iyyän d-isaxra, äqqimän edes-has käl-faris d-älxulam n-Ättäwrät dd-falnen tidbi n-Galila d-Älyähudəyät d-Yärussalam.

¹⁸ A əndərrän meddən iyyäd-da-däx ämisawäyän anəbdon insan fäll-asəftäx. Ettärän a-wa däx-he-əjən ərəsän tamətte, sənsən-t dat-Ÿisa

¹⁹ məšan, äba-hasän älmäxna n-a-wen fäl əjut-i-däx ja tamətte. Äxläyän, äwwänän afälla n-ehän, sārän däx-assətax n-ehän edägg s-äddooben ad-sār-s dd-şujəşän anəbdon, ästärärän-t-dd dərät-a-wen har t-dd-əssənsän däx-ammas n-tamətte, dat-Ÿisa.

²⁰ Inhäy Ÿisa immun-näsän xas, innä: «Ähaləs, ätwänşän-ak ibäkkadän-näk.»

²¹ İslän älxulam n-Ättäwrät d-käl-faris i-a-wen xas, ad-jannen däx-iman-näsän: «Ma ämoos wa əwadəm isikuförän s-əmmək-wa-däx? Mi äddoben tenäşşe n-ibäkkadän säl Mässinäx?»

²² Ilmäd Ƴisa ƣur-iman-net a-wa ämiḡännänän ulhawän-näsän, inn'-asän: «Ma tämmizäḡäm däḡ-ulhawän-näwän?

²³ Ma ojarän täräḡse jer-ad-tənnəd i-äwadəm: <Ätwänsän-ak ibäkkadän-näk> d-ad-has-tənnəd: <Əbdəd, ärjəš.>

²⁴ Ašäl-i, ässiilmädäḡ-käwän a-s Ägg-ägg-adəm, ijraw fäll-ärori n-äkall turhajät n-tenäšše n-ibäkkadän.» Inna ɗarät-a-wen i-anäbdon: «Enneḡ-ak, əbdəd, əɗkəl asəftäḡ-näk, əqqəl ehän-näk.»

²⁵ Ibdäd anäbdon ässaḡät-wen-däḡ dat-äddinät iket-näsän, idkäl asəftäḡ-net, iqqäl ehän-net itiməl Mässinäḡ.

²⁶ Äqqiimän-dd äddinät ƣas tof'-en tākunt n-a-wa ijän, tiimlən Mässinäḡ. Təj'-asän tarəmməxt arāmas wa-däḡ fäl jannen: «Ašäl-i, iman-net, nənhäy härätän äqqannen eḡäf.»

*Iyrä-dd Ƴisa Mätti s-iman-net
(Mätti 9:9-13; Marqəs 2:13-17)*

²⁷ Ifäl Ƴisa edägg-en ƣas, inhäy ähaləs irammäsän tiwse s-isəm-net Lewi, äqqiima däḡ-edägg n-älxidmät-net, inn'-as: «Əlkəm-ahi.»

²⁸ Ibdäd Lewi, ibdä d-a-wa t-išlän iket-net, ilkäm-as.

²⁹ Äsmäjarät Lewi Ƴisa ɗarät-a-wen s-ehän-net. Itaxäyma Ƴisa däḡ-edägg wa n-imənsiwän a-s erk äddinät han inarmasän n-tiwse äjjootnen da-däḡ, osän-dd, änxäymän ɗär-s ənta d-inəṭṭulab-net.

³⁰ Ənhäyän käl-faris d-älḡulam n-Ättäwrät a-wen ƣas, ämjänjänän jer-iman-näsän ad-jannen i-inəṭṭulab-net: «Mafäl tattäm, sassäm, tihrəm ikassän d-inarmasän n-tiwse d-erk äddinät?»

³¹ Äwwežäb-asän, inn'-asän: «Äddinät ässoxätnen, wär-ämḡatärän s-läxtur, imarhinän a sär-s ämiḡatärnen;

³² näkk, wär dd-ämešäläḡ s-äddinät-wi ordänen iman-näsän iqqud, inäsbäkkadän a-s dd-ämešäläḡ i-ad-utabän.»

*Isälan n-äzum
(Mätti 9:14-17; Marqəs 2:18-22)*

³³ Ənnän-as ɗarät-a-wen: «Inəṭṭulab wi n-Exya hakd-däḡ käl-faris, härkuk tuzamän, tumadän mäšan, wi-näk əntäned, tattän, sassän.»

³⁴ Issäḡläy-tän tangalt däḡ-hasän-inna: «Käl-tuksest, wär tän-ilzem äzum a ikka ämazlay ill'-e ƣur-sän

³⁵ mäšan, ilkam ad-dd-ass äzzäman-wa tän-mad-ifəl ämazlay, äzzäman-en, ad-uzamän.»

³⁶ Ij'-asän Ƴisa tangalt tiyyät däḡ-hasän-innä: «Wär t-illa ere dd-isaxärrawen tikəst däḡ-eräswäy äynayän i-ad-sär-s isəmməkukəs i wäššärän ed, afäl ija a-wen, ad-dd-isäqqərriwət eräswäy wa äynayän bännan, ɗarät-a-wen daḡ, tabdoxt-ta täynayät, wär mad-taläh d-ta wäššärät ini.

³⁷ Wär t-illa daḡ ere itajjän aman n-läḡnəb äynaynen äxxiimmärnen däḡ-ijdad, ere ijän a-wen har kəfän aman ənnin äynaynen däḡ-ijdad, ad-has-səbbuqqen ijdad-net, ifut ɗarät-a-wen däḡ-aman hakd-däḡ däḡ-ijdad.

³⁸ Aman n-läḡnəb äynaynen äxxiimmärnen, iddidän äynaynen a däḡ-tän-itajj äwadəm.

³⁹ Äwadəm daḡ wa iswän aman n-läḡnəb s-äru d-äxximmärän, äbas äsidärhän tesäse n-wi äynaynen ed ad-änn: <Wi s-äru d-əxxəmärän a äzednen.> »

6

*Isälan n-əssəbət, ašäl wa n-täsonfat
(Mätti 12:1-8; Marqəs 2:23-28)*

¹ Ašäl iyyän n-əssəbət-i n-ašäl wa n-täsonfat, älliil Ƴisa išəkraš n-älkäma, əlkamän-as inəttulab-net, nakkädän tiḡäḡänen n-älkäma, tifəffərun-tänät jer-ifassän-näsän, taffäzän tiblalen-ti tänät-dd-zajjärnen.

² Əggädän-dd härät dāḡ-käl-faris tän-hannäyenen, ənnän-asän: «Mafäl tajjäm a wärän itətwəjj dāḡ-ašäl wa n-əssəbət-i n-täsonfat?»

³ Äwwežäb-asän Ƴisa, inn'-asän: «Adiš käwäneḡ, wär täḡrem dāḡ-əlkəttab a-wa ija Dawəd ašäl wa d-älluḡ ənta d-ejhän-net?»

⁴ Wädden ätwännä, ijjäš ehän n-Mässinäḡ, idkäl dāḡ-tijəlwen ti n-tikutawen s-wär t-illa ere s-xälal tetäte-näsnät sä käl-tikutawen mäšan, ənta, ikš'-enät, ikfä dāḡ-snät daḡ imidiwän-net wi dār-äddew.»

⁵ Inn'-asän Ƴisa dərat-a-wen: «Ägg-ägg-adəm a ännihädän dāḡ-a-wa s-ila ägg-adəm d-a-wa s-wär ila s-ad-t-äj dāḡ-ašäl wa n-əssəbət-i n-täsonfat.»

*Äzozäy Ƴisa ähaləs s-äqqur äfuss-net dāḡ-ašäl wa n-əssəbət-i n-täsonfat
(Mätti 12:9-14; Marqəs 3:1-6)*

⁶ Iqqäl-dd əssəbət-i n-ašäl wa n-täsonfat ḡas, ijjäš Ƴisa ehän n-äddin wa n-käl-Älyähud ad-dāḡ-s isayra. Ehän-en, ih'-e ähaləs s-äqqur äfuss-net wa n-aḡil.

⁷ Jan-as äḡulam n-Ättäwrät d-käl-faris ənniyät, tassänän ihäl ad-t-izuzəy dāḡ-ašäl wa n-əssəbət-i n-täsonfat meḡ i-ad-t-səḡləmän.

⁸ İlmäd Ƴisa ḡur-iman-net a-wa dāḡ-zinəzjumän, innä i-ähaləs wa s-äqqur äfuss-net: «Əyyäw, əbdəd dāḡ-amməs n-älžämaḡät.» İnkär-dd ähaləs, ibdäd diha s-has-innä.

⁹ Inn'-asän Ƴisa dərat-a-wen: «Ässiistänäḡ-käwän: Ak a xälälän dāḡ-ašäl wa n-əssəbət-i n-täsonfat iji n-emärked meḡ iji n-a läbasän, igguḡ n-iman meḡ iji n-iman?»

¹⁰ İssäḡläy-tän-dd Ƴisa asäwaḡ-net iket-dāḡ-näsän təzzar, innä i-ähaləs: «Əzzəl äfuss-näk.» İja a-wa has-innä, izzäy äfuss-net älwäqq-wen-dāḡ.

¹¹ İja a-wen ḡas, wäsän käl-äddin, änmänhäyän jer-iman-näsän dāḡ-isälan n-a-wa he-əjən i-Ƴisa.

*İnəmmušal wi n-märaw d-əssin
(Mätti 10:1-4; Marqəs 3:13-19)*

¹² İšilan-win-dāḡ ad-iwwän Ƴisa taḡayt, ikkäs dihen ehäd imdan, itəddal Mässinäḡ.

¹³ Äffäw ḡas, iḡrä-dd inəttulab-net, äsnäfrän dāḡ-sän märaw d-əssin, äswär-tän isəm inəmmušal.

¹⁴ Entäneḡ da inəttulab-wi äsnäfrän: Simyon wa s-ija isəm Bətrus d-ənḡa-s İdris; Yaquub d-Exya, Fəlibb d-Bärtälamma,

¹⁵ Mätti d-Tomi; Yaquub wa n-ägg Älfa d-Simyon wa s-itawänna äššažəḡ,

¹⁶ Hudd ägg Yaquub d-Yähudəs wa n-İsxaryut-i ämoosän ämaḡdar.

*Äzozäy Ƴisa äddinät äjjootnen
(Mätti 4:23-25)*

¹⁷ Äzzubbät-dd Ƴisa taḡayt dərat-a-wen ənta d-inəttulab-net, ätrarän-dd fäll-eḡäḡär dāḡ-təbdad tamətte täjjeet d-äddinät äjjootnen dd-falnen Älyähudəyät d-Yärussälam d-iḡärman wi n-Tir d-Säyda hänen asälim n-ejänš.

¹⁸ Äddinät-en-dāḡ, osän-dd iket-dāḡ-näsän i-ad-səjdən i-a-wa isayra, əzzəyän dāḡ-turhənnawen-näsän, əjrəwän dāḡ-sän wi hän alšinän iman-näsän.

¹⁹ Tattär taxlëkt-ten-däx iket-net ad-t-tödös ed zajjär-t-dd tärna tän-zizuyät iket-däx-näsän.

Tisundäq
(*Mätti 5:1-12*)

²⁰ Iswäd Yisa däx-inëttulab-net, innä:
«Tëndöq-awän käwäned-i
äzoznen iman-näwän dat-Mässinäx ed,
Tëmmənəya n-Mässinäx, ti-näwän.

²¹ Tëndöq-awän käwäned-i inäqq laž
aşäl-i-däx ed, ad-täyyäwänäm;
tëndöq-awän käwäned-i hallänen
aşäl-i-däx ed, ad-täddäwem.

²² Tëndöq-awän afäl där-wän okädän dägg-adəm,
afäl käwän-əkkäsän jer-iman-näsän;
afäl käwän-gaggärän;
afäl öttärän uşsad n-ismawän-näwän
däx-äddimmät n-Ägg-ägg-adəm.

²³ Däwätät, taləwəm däx-aşäl-wen-däx fäl-a-s ad-ijat marušät-näwän däx-älžännät; erk älخال-wen-däx hawän-han aşäl-i-däx, a əjjäşän abbatän-näsän i-ännäbitän.»

Isəmmäqq

²⁴ «Iməskay käwäned-i n-imärrəzäxän ed,
älxer-näwän, ih' ifassän-näwän.

²⁵ Iməskay käwäned-i n-imäyyäwänän n-aşäl-i-däx ed,
ad-tulazäm.
Iməskay käwäned-i dazžänen aşäl-i-däx ed,
ad-təttəfäm iba, təlhəm.

²⁶ Iməskay käwäned-i timələn äddinät ed, älخال-wen-däx a əjjäşän abbatän-näsän i-ännäbitän wi n-bahu n-ibda.»

Tärha n-iməksänän-nänäx
(*Mätti 5:38-48; 7:12*)

²⁷ «Käwäned-i hi-äsijädnen, ənneç-awän: Ärhät işənja-näwän, äjät a olayän i-äddinät-wi där-wän okädnen,

²⁸ äjät älhimmät i-wi hawän-ärhanen a läbasän, ädölät Mässinäx i-wi fälla-wän jannänen bahu.

²⁹ Afäl hak-istäx äwadəm fäll-täjomäst-näk tiyyät, səgdəl-as daç ta iyyädät; afäl irmäs äwadəm tanäkkäbbat-näk, äkf'-e daç anäkkäbba-näk.

³⁰ Ere käy-idälän-däx, äkf'-e; wär tötteräd däx-äwadəm ad-hak-isuxəl a-wa däx-k irmäs.

³¹ A-wa s-tärhäm, ad-hawän-t tajjän äddinät, äjät-asän-t käwäned-däx.

³² Afäl wär tärhem ar imärhan-näwän, əndek marušät-näwän? Wädden, inäsbäkkädän-däx, ärhan äddinät wi tän-ärhanen.

³³ Afäl wär tøjjem a olayän ar i-wi hawän-t-tajjänen, əndek irhuj-näwän? Wädden, wäl' inäsbäkkädän, a-wen, tajjän-t.

³⁴ Afäl daç wär səmərwisäm ar i-äddinät wi däx-tordäm timçal, əndek marušät wa s-mad-təjrəm ättäma-net? Wädden, inäsbäkkädän-däx, samärwasän i-imidiwän-näsän ed, ordan çur-sän azäbäna.

³⁵ Ärhät işənja-näwän, tajjät-asän a olayän; səmmərwəsät i-ere däx-wär jeräm ättäma n-timçal. Dihen, ad-ijat marušät-näwän, tumasäm aratan n-Mässinäx wa

iknan adkul ed, ənta, milyaw-net, wär sär-s izley wi wär ha tämayit hakd-däx wi n-inälläbäsän.

³⁶ Təjjəšet-käwän təmyäre n-təhanint ta häť Abba-näwän.

Wär säđlamät əwadəm

(Mätti 7:1-5)

³⁷ Afäl wär tənnem däx-əwadəm, wär mad-däx-wän änn əwadəm, afäl wär təssəđlämäm əwadəm, wär käwän-e-isəđləm əwadəm, naššät i-ad-təjrəwäm tenəšše.

³⁸ Äkfät, ad-təjrəwäm; ere wa ihakkän, ad-ijrəw a äjjeen däx-asəbbətär-net ed, ilkam ad-hanäx-ikət Mässinäx isuf-net s-əmmək wa s-nətəkkat isuf-nänäx i-əddinät.»

³⁹ Issäxläy-tän-dd Ƴisa tangalt däx-hasän-inna: «Ajän emədderxəl ädoobät ad-ilwəy emədderxəl? Wädden, ad-iđwən issənän-essän däx-anu?»

⁴⁰ Wär t-illa änätəliləb ojarän əlyalim-net məšan, änätəliləb iket-net iyradän, ad-aläh d-əlyalim-net.

⁴¹ Uhən käyy, mafäl hannäyäd tezewt ta häť tiť n-əñña-k, a-s ija a-wen, wär hənneyäd afəxot wa ihän tiť ta-näk?

⁴² Məx dağ, əndek əmmək wa s-mad-tənnəd i-əñña-k: «Äyy-ahi ad-hak-əkkəsəx tezewt däx-tiť-näk», a-s ija a-wen, käyy iman-näk, iha afəxot tiť ta-näk. Ämunafex! Əkkəs-in afəxot wa ihän tiť-näk təzzar i-ad-tudabed ahänay d-ukəs n-tezewt ta häť tiť n-əñña-k.»

A-wa ihan ulh a ijanna emm

(Mätti 7:17-20; 12:34-35)

⁴³ «Wär t-illa ahəšk olayän itirəwən aratan läbasnen, wär t-illa dağ erk ahəšk itirəwən aratan olaynen.

⁴⁴ Hak ahəšk-däx aratan-net a-s ititwəzziy. Wär mad-dd-təkkəsäd ara n-ašar fäll-ewärwär, wär mad-təkkəsäd dağ läxnəb fäll-tahəjjart.

⁴⁵ Əwadəm-wa oləxän, milyaw n-ulh-net a däx-dd-itakkäs a-wa oləxän məšan, enälläbäs ənta, təlläbäst n-ulh-net a däx-dd-itakkäs a-wa läbasän ed, a-wa iđkärän ulh n-əgg-adəm a däx-itaməjrad emm-net.»

Ässasän wi n-əssin

(Mätti 7:24-27)

⁴⁶ «Mafäl hi-jannem: «Emäli, Emäli!» a-s ija a-wen, wär təjjəm a-wa hawän-janney.

⁴⁷ Ere hi-dd-ikkän-däx, əsjäd i-məjräd-in, ad-itamašal a-wa ənney, ad-käwän-säknəx ere wa dər-oläh.

⁴⁸ Oläh d-əwadəm itəddayän ehän, iyəš əssas-net har iwwəd təhünt, idäy fälla-s. Ij' akäsa, ij' anji əşsoohen, inkäf i-taxəšamt siha d-siha məšan, wär tət-əsməramär ed, təkn' äntum däx-əkall

⁴⁹ məšan ere wa islän i-məjräd-in wär has-əsjäd, oläh d-ere idäyän ehän-net fäll-tasənjit wärät la əssas, osä-dd anji, inkäf i-ehän, immär-t-in s-iyyät, ij'-as tenəde təmdat.»

7

Äzozäy Ƴisa ənaxdim n-kəbtän iyyän

(Mätti 8:5-13)

¹ Issəsla Ƴisa isälan-win-däx i-tamətte ɣas, ijjäš aɣrəm wa n-Qäfərnaxum.

² Ill'-e dihen kəbtän ilan akli ikna tərha-i s-a-s itäj a-wen-däx ija turhonna ta-däx s-išwar hin-əssijja.

³ Islä kəbtän a-s dd-ijjaš Ƴisa əkall ɣas, əšmašal sär-s härät däx-inušämän n-käl-Əlyähud i-ad-däx-s əttärän ad-dd-ass, izuzəy akli-net.

⁴ Osän-dd käl-Älyähud Yisa, dälän-t dāḡ-ad-t-izuzøy, ənnän-as: «Ähaləs-i-dāḡ, äniihäjjä s-ad-has-tökkəsäd tekäriḡt,

⁵ irha tumast-nänāḡ hullan, ənta a hanāḡ-issəkräsän ehän n-äddin wa nəla.»

⁶ Äddew dār-sän Yisa. Wār-ujəj a-s has-dd-əlkädän imidiwän n-käbtän dd-äšimašäl, ənnän-as: Inn'-ak käbtän: «Älḡalim! Wār täsläyyäḡäd iman-näk fäl-a-s, wār-änhäjjäḡ d-ad-dd-təjjəšäd ehän-in,

⁷ a-wen-dāḡ daḡ a fäl wār-äsnähäjjäḡ iman-in d-ad-käy-in-äkkäḡ, änn tiyyät täfert, ad-izzøy äanaxdim-in.

⁸ Näkk, əllan-t imänokalän jənnəj-i, leḡ daḡ näkk əssärdusa daw-i t-əllanen, e-d ənnəḡ i-iyyən: <Egləw>, ad-igləw, e-d ənnəḡ i-wa iyyädän: <Eyyäw>, ad-hi-dd-ass; akli-nin daḡ, e-d has-ənnəḡ: <Äj a-wa>, ad-t-äj.»

⁹ Islä Yisa i-a-wen ḡas, ijrəz-as käbtän, innäd-dd s-äddinät wi has-əlkämnen, inn'-asän: «Äsidätteḡ-awän a-s wäla dāḡ-äkall wa n-Işrayil, wār kälä ənhäyāḡ ere s-ogdäh immun-net d-wa n-ähaləs-i-dāḡ.»

¹⁰ Eqqälän meddən-wi dd-ämešälnen, ogəzän-in akli wa s-kälä ärhin, izzay.

Issənkär-dd Yisa rure-s n-tänuḡäft tiyyät jer-inəmmuttan

¹¹ Äšäl wa n-ḡarät wen, äddew Yisa d-inəḡḡulab-net s-tayrəmt s-isəm-net Nayin, təlcam-asän daḡ tamətte täjjeet.

¹² Diha-dāḡ dd-əjjäšän ayxəm, ad-ämmoqqäsän d-äddinät äwwäḡnen härät äwwaynen enəmmettən s-tizəska; enəmmettən-en, alyad s-wār tēla ma-s ar ənta, ti-s daḡ wār-idder.

¹³ Ojjä Yisa taməḡt-ten-dāḡ, täny'-e tähanint-net, inn'-as: «Elyən Iblis.»

¹⁴ Ikkä-dd enəmmettən, idäs-t, əbdädän äddinät-wi t-ämisawäyinen, innä i-enəmmettən: «Ämawad, ənnəḡ-ak: ənkär!»

¹⁵ Äqqimä-dd enəmmettən ässaḡät-wen-dāḡ, ad-itamäjräd, äsoḡäl-t Yisa i-ma-s.

¹⁶ Ärmäḡän äddinät iket-näsän, ad-tiimələn Mässinäḡ, jannen: «Äšäl-i, änfäläl-dd ännäbi mäqqoorän jere-nāḡ, Mässinäḡ osä-dd tamətte-net i-ad-tät-iḡləs.»

¹⁷ Ämsayäl mäjräd-wen-dāḡ ätwännän fäll-Yisa dāḡ-Älyähudəyät d-attayän-net.

Isəstanän wi ija Exya wa n-Enəsselmäḡ dāḡ-isälan n-Yisa (Mätti 11:2-19)

¹⁸ Osän-dd inəḡḡulab n-Exya, jän dāḡ-s isälan n-a-wa ijän iket-dāḡ-net.

¹⁹ Ixrä-dd dāḡ-sän əssin, äšmašäl-tän s-älḡalim i-ad-t-səstənän kunta ənta a-s Wa s-ätwänna ilkam ad-dd-ass meḡ ilkam iyyän säl ənta.

²⁰ Osän-dd meddən, ənnän-as: «Exya wa n-Enəsselmäḡ a hanāḡ-dd-äšmašälän sār-k, inn'-anāḡ ad-käy-nəsəstən, <kunta käyy a-s Wa s-ätwänna ilkam ad-dd-tasəd meḡ ilkam ere säl käyy?> »

²¹ Ässaḡät-wen-dāḡ t-sastanän, äzozäy Yisa äddinät äjjootnen dāḡ-tizḡoren d-alšinän, ikfa daḡ iməddorḡal äjjootnen turhajät n-ahänay.

²² Äwwežäb i-meddən wi dd-äšmašäl Exya, inn'-asän: «Äqqəlät Exya, suḡəläm-as a-wa tənähäyäm d-a-wa təsläm, ännät-as: iməddorḡal hannäyän, inəbdan rajjäšän; wi ijraw jəri, tişdajän, imzaj, sallän; inəmmuttan nakkärän-dd; tiläqqiwen, sallänät i-Älənžil.

²³ Təndəḡ i-ere wa dāḡ-i wärän ij' äššäk.»

A-wa innä Yisa fäll-Exya wa n-Enəsselmäḡ

²⁴ Eglän inämmašälän n-Exya ḡas, ädwännät Yisa i-tamətte dāḡ-isälan n-Exya, inn'-asän: «Ak, a-s təzjāräm s-tenere, ma tənähäyäm? Ak tezewt äsiwälawäl aḡu a tənähäyäm? Äbo!

²⁵ Adiš ma tökkäm i-ad-t-tenhöyäm? Ak ähaləs äsisahäxän ašäl a tənähäyäm? Ænhöywät-tän-ak äddinät-wi sasahaχnen ašäl, əntänəḏ-den ännufläyenen däχ-ihānan-wi n-imānokälän.

²⁶ Adiš mi tökkäm i-ad-t-tenhöyäm? Ak ännäbi? Tidət lab a-s ännäbi, ässiilmädäχ-käwän a-s ere ojarän tumast n-ännäbi a tənähäyäm.

²⁷ Exya, ənta-en-däχ a fäl inna əlkəttab n-Mässinäχ:

<Ænhöy! Äzizäräχ-ak änəmmašul-in
wa he-iknən tabarät data-k.>

²⁸ Ässiilmädäχ-käwän a-s, wär t-illa ara n-tamäḏt ojarän Exya mäšan, hakd a-wen-däχ, wär t-illa ere t-wärän ojer däχ-Təmmənəya n-Mässinäχ.»

²⁹ Äddinät-wi has-əslänen iket-näsän hakd-däχ inarmasän n-tiwse ärḏän s-Təmmənəya n-Mässinäχ ed, äqbalän ad-tän-isəlmäχ Exya

³⁰ mäšan, käl-faris d-älχulam-i unjäyenen s-asəlmaχ-net, äsfatän iman-näsän däχ-a-wa ixtäs Mässinäχ.

³¹ Innä Ḡisa: «Ak, mi dār-mad-sənnəfäqqäχ käl-əzzurəyät-ta-däχ? Ak, mi dār-olähän?

³² Olähän χas d-aratän janen aχrəf däχ-təfärre, jannen iyyäḏ i-wi iyyäḏnen:

<Ænhöywät, käwəneḏ, wär lem asäfar;
nəwät-awän taχänibt, tunjäyäm s-dällol!
Nənzär-awän tiswal n-tisnant mäšan,
wär təlhem!>

³³ Exya wa n-Enəsselmäχ, äzzäman wa dd-osa, wär-itətt imənsiwän olayχnen, wär-isəss aman n-läχnəb äxxiimmärnen; tənnäm: <Ih'-e alšin>,

³⁴ isräy-t-dd Ägg-ägg-adəm, ənta itihar dār-wän a-wa tättäm d-a-wa sässäm, χas tənnäm däχ-s: <Wa ənta, insäy, iräf aman wi n-läχnəb äxxiimmärnen, amidi n-inarmasän n-tiwse d-älfusaχ wi iyyäḏnen.>

³⁵ Mäšan a-wen wär hin-ikkəs a-s:

<Särho wa dd-ifälän Mässinäχ,
ijitän n-aratän-net a t-isatbatän.> »

Təjrāw tamäḏt tiyyät tenäšše n-ibäkkadän-net

³⁶ Ämjarät-dd Ḡisa ašäl iyyän i-u-faris iyyän, ikk'-e-hi-dd, ad-tamənsawän.

³⁷ Təsla tamäḏt n-tanəsbäkkadət hat aχrəm-en-däχ a-s Ḡisa ämijarät i-u-faris-en χas, a əḏärrän, ənta da-däχ täwway butəl n-aḏutän.

³⁸ Tosä-dd, təjjäš fälla-sän ehän wa däχ-tamənsawän, təkka dihad äsiχämär Ḡisa, mäl daw-iḏarän-net, ad-hall. Hall har təssəbdäj iḏarän-net s-iməṭṭawän-net, ad-tän-timəs s-tišəkkaḏ-net, timəllut-asän, säχyal fälla-sän aḏutän.

³⁹ Inhäy u-faris wa dd-äsmäjaren Ḡisa a-wen χas, ad-ijanna däχ-iman-net: «Ænnär ämoos ähaləs-i-däχ ännäbi, ilməd a-s tamäḏt-ta-däχ t-təḏasät, tälkäxbat.»

⁴⁰ Inn'-as Ḡisa: «Simyon, ärheχ ad-hak-ännäχ härät iyyän.» Inn'-as Simyon: «Älχalim, äsijädäχ-ak, məjräd.»

⁴¹ Inn'-as Ḡisa: «Käla t-illa ähaləs irwasän əssin meddən: iyyän, irwas-t səmmosät timad n-ärriyal n-aζrəf, wa iyyäḏän, irwas-t, səmmosät timərwen n-ärriyal n-aζrəf.

⁴² Inhäy a-s wär tän-iha-i äddooben timzal n-ehäre-net, ma n-əmmək χas, inš'-asän-in a-wa tän-irwäs. Ässistänäχ-käy käyy Simyon: <Ændek däχ-sän wa has-madän-ikən tämayit?> »

⁴³ Inn'-as Simyon: «Ordeχ a-s wa s-hin-oyyä ämarwas wa ojarän.» Inn'-as Ḡisa: «Toχadäd.»

⁴⁴ Innäd-dd Ḡisa ḏarät-a-wen s-tamäḏt təzzar, innä i-Simyon: «Wädden hannäyäd tamäḏt-ta-däχ, əjjäšäχ-dd ehän-näk, wär hi-təkfəd aman s-ässerädäχ iḏarän-in mäšan ənta, təssəbdäj-tän s-iməṭṭawän-net, tomäs-tän s-tišəkkaḏ-net,

⁴⁵ älwäqq wa dd-osex ehän-näk, wär hi-dd-tөлkedäd, tasəsäd-ahi dāx-idmarän-näk mašan ənta, a dd-osex, timəllut i-ıdarän-in fäll-semxar-i-dāx hi-təja.

⁴⁶ Käyy daḡ, wär təşweyäd eḡäf-in, a-s ija a-wen ənta, ıdarän-in a təşwäy s-ađutän.

⁴⁷ Dāx-təssəba n-tärha-i-dāx mäqqarät hi-təssəkna, a-wa äjjen la dāx-ibäkkadän, ätiwänšan-as-in. Tidət-dāx a-s ere wa s-hin-ätwänša a əndärrän, tämayit-net daḡ ti-əndärrät.»

⁴⁸ Inna Ƴisa ɗarät-a-wen i-tamädt: «Ibäkkadän-am, ätiwänšanäm-in.»

⁴⁹ Əslän imäjarän i-a-wen-dāx ḡas, ad-jannen dāx-iman-näsän: «Ma ämoos äwadəm wa äddooben tenäšše n-ibäkkadän n-äddinät?»

⁵⁰ Innä Ƴisa i-tamädt ɗarät-a-wen: «Immun-näm a käm-iḡläsän, əḡləw dāx-älxer.»

8

Tideđen-ti n-timadhalen n-Ƴisa

¹ Älliil Ƴisa ɗarät-a-wen iḡärman d-tidbi äjjootnen, ixaṭṭab i-äddinät isälan n-älxer n-Təmmənəya n-Mässinäḡ, äddeewän ɗär-s inəṭṭulab-net wi n-märäw d-əssin

² d-härät dāx-tideđen s-tiyyäd, ikkas dāx-snät, alšinän d-tiyyäd äzozäy dāx-turhənnawen. Tiyyät dāx-snät, isəm-net Märyäma ta n-Muläzdaləyät, ikkas dāx-ənta əssa alšinän,

³ tiyyät isəm-net Təxya, ənta a-s hänne-s n-Šuza wa ixkämän fäll-inaxdimän n-ehän n-ämänokal n-äkall wa s-isəm-net Harudəs, tiyyät Suzänna d-timidiwen-net tiyyäd äjjootnen, iket-dāx-näsnät, ədhälät Ƴisa d-inəṭṭulab s-a-wa əṭṭäfnät.

Tangalt ta n-änäsdamu

(Mätti 13:1-9; Marqəs 4:1-9)

⁴ Täddeew-dd tamətte täjjeet s-wär t-illa aḡrəm wär dd-fel s-Ƴisa. Issäḡläy tamətte tangalt, inn'-asän: «Käla izjär änäsdamu iyyän i-ad-iddumət ašəkrəš-net.

⁵ Älwäqq wa d-itidumut, ođänät tiblalen tiyyäd dāx-äbara, äfkälfäkälän-tänät äddinät, äkkukkären-tänät-dd igdađ, əksän-tänät.

⁶ Ođa ašär iyyän jer-tihun, diha-dāx dd-äffoqqät, ad-hin-äqqur fäl iba n-abduj.

⁷ Ođa ašär iyyän dāx-tabəṇṇənt, tədwäl-dd fälla-s tabəṇṇənt, təzmäd-as.

⁸ Ašär wa iyyädän, ođa dāx-äkall olaḡän, idwäl-dd, ikräš aratän s-timađ.»

Ija mäjräd-wen-dāx ḡas, idkäl emäsli-net, innä: «Ere ilän timəzzujen s-islä-dāx, isäjdet.»

Äddälil wa fäl isayra Ƴisa s-tangalen

(Mätti 13:10-17; Marqəs 4:10-12)

⁹ Əssəstänän-t inəṭṭulab-net ɗarät-a-wen d-älmäḡna n-tangalt ta ija.

¹⁰ Inn'-asän: «Käwänəđ, təjrawäm turhajät n-ujreh n-əddäraj wa n-isälan n-Təmmənəya n-Mässinäḡ mašan, äddinät wi iyyädnen, wär jen a-wen.

‹Ad-əswađän, wär hənneyän;

sallän, wär jərrähän.» »

Älmäḡna n-tangalt ta n-änäsdamu

(Mätti 13:18-23; Marqəs 4:13-20)

¹¹ «Ämära, tangalt, älmäḡna-net da:

Tiblalen a-s mäjräd n-Mässinäḡ.

¹² Äbara wa dāx-ođänät tiblalen tiyyäd, ənta a-s äddinät-wi sallänen i-mäjräd n-Mässinäḡ, as'-en-dd Iblis, ilbəy-t-dd dāx-ulhawän-näsän i-ad-wär-omenän s-Mässinäḡ, iḡləs-tän.

¹³ Tihun ti jer-ođänät tiblalen tiyyäd, əntänəteđ a-s äddinät-wi s-e-d əslän i-mäjräd n-Mässinäḡ, ad-əhləyləyän, äqbəlän-t šik, mašan wär t-təyyən ikräš

ikewän däx-ulhawän-näsän, ad-əjən äzzäman əndärrän älmät ätubän, mäšan afäl ätwäžžurräben, ad-hin-əbbutlän a-wa s-omänän.

¹⁴ Tabəñənt ta däx-ođänät tiblalen tiyyäđ, ənta a-s äddinät wi s-e-d əslän i-mäjräd n-Mässinäx, ad-tän-äxləbän inəzjam n-tärha d-ajmur d-izəjraz n-wälät-äddunya, əzmədän-as, indär-asän ad-əhələn s-data däx-tuksəda-näsän i-Mässinäx.

¹⁵ Äkall wa oläxän däx-ođänät tiblalen tiyyäđ, oläh d-äddinät-wi s-e-d əslän i-mäjräd n-Mässinäx, ad-t-əknən uđəf s-särho däx-ulhawän-näsän, ad-hasän-t-ijjəš älfäyda äddewän d-akuyəd.»

Tefätelt

(Marqəs 4:21-25)

¹⁶ Inn'-asän Yisa dağ: «Wär t-illa ere isarmasän tefätelt təzzar, isəbbumbəy fälla-s äkoss meğ tət-ija daw-tešejit, änn-ak, asili a tət-itajj fäll-äsəđəf äsikakän i-ad-hannäyän äddinät wi dd-tajjäsən ehän ännur-net.

¹⁷ Wär t-illa a iffarän s-wädden ad-dd-infiləl, wär t-təlla dağ takše s-wädden ad-dd-təffukkär s-tarähut.

¹⁸ Äjät ənniyät i-əmmək wa s-sajadäm; äwadəm wa ifhämän härät, ad-has-iwwađ musnät har isəssikəy mäšan, wa s-wär t-illa a ijarah, wär t-in-ikka härät, änn-ak, ad-däx-s ämahäx wälä a-wa s-orda a-s ittaf-t.»

Anna d-ayətma n-Yisa wi n-tidət

(Mätti 12:46-50; Marqəs 3:31-35)

¹⁹ Tosä-dd anna n-Yisa d-ayətma-s mäšan, igdäl-asän əjut n-tamətte ad-t-ənhəyän.

²⁰ Ätwänn'-as: «Təbdad anna-näk d-ayətma-k dat-əmm n-ehän, ärhan ahänay-näk.»

²¹ Äwwežäb-asän, inn'-asän: «Anna-nin d-ayətma-x, äddinät-wi sajadnen i-mäjräd n-Mässinäx, tamašalän a-wa inna.»

Issəbdäd Yisa ađu fäll-ejəns

(Mätti 8:23-27; Marqəs 4:35-41)

²² Ijjäš Yisa ašäl iyyän turäft n-aman ənta d-inəttulab-net, inn'-asän: «Nəjləyet ejəns s-ašrut wa iyyäđän», əglän.

²³ Əglan fäll-aman-en-däx a-s hin-ittaş Yisa. A əndärrän, inkär-dd ađu-i-däx äşsoohen, ad-đakkär turäft aman, əjjäšan miši.

²⁴ Ohäzän-dd inəttulab Yisa, ad-t-sänkarän däx-eđəs, jannen-as: «Älyalim, Älyalim, nəhläk!» Inkär-dd Yisa, äsmähəđ fäll-ađu d-tinäzzämären ti äşsoohätnen, ibdäd a-wen-däx iket-net, sämmeđ-in.

²⁵ Inn'-asän Yisa: «Ma ija immun-nəwän.» Əqqälän-dd ças ärmaçän, oran imawän, tinmənnin: «Ma ämoos äwadəm-wa-däx s-e-d omär i-ađu d-aman ad-has-səjdən?»

Äzozäy Yisa äwadəm iha alšin

(Mätti 8:28-34; Marqəs 5:1-20)

²⁶ Äsjänän çarät-a-wen däx-äkall wa n-käl-Gadara äniməswäđän d-teje ta n-Galila.

²⁷ Diha-däx dd-izjär Yisa turäft n-aman, ad-has-dd-ilkäđ ähaləs n-ayrəm-en-däx han alšinän. A ilan äzzäman, wär-iləss tikəst, wär-il' edəgg n-iman-net, izzağ tizəska.

²⁸ Inhäy Yisa ças, äşxärät təzzar, irkäx data-s, inn'-as: «Ya Yisa wa n-Rure-s n-Mässinäx wa iknän ađkul, ma däx-i tärhed? Daläx-käy d-ad-wär hi-täqquzzäbed.»

²⁹ A-s ijänna a-wen-däx, isamähəđ Yisa fäll-alšin wa t-ihän, i-ad-t-izjär. Ähaləs-en, itajjäs-t alšin s-e-d t-ijjäs, akärad ad-t-tajjän äddinät s-tišəm d-tifren mäšan, isayätas-dd a-wen-däx iket-net, äzzäwät-t alšin s-tinariwen.

³⁰ Issəstän-t Ƴisa, inn'-as: «Mi isəm-näk?» Inn'-as amälšon: «Isəm-in ejhän», ed alšinän äjjootnen a t-hanen.

³¹ Ad-laqqädän alšinän-wi t-hänen Ƴisa i-ad-wär tän-ässoka anu wa wärän il' ider ihän älxärät.

³² İđan dihen ehäre n-əlxənžärän fäll-tasäja n-tađaxt, əlxädän alšinän Ƴisa i-ad-tän-äyy ad-əjjəšan əlxənžärän-en-däx, ird'-asän s-a-wen.

³³ Əzjārän alšinän ähaləs, əjjäšan əlxənžärän, ad-dd-titrəktərikän wa-däx n-afälla n-tađaxt, tidəwän däx-əjärew wa səmmän, tattän-tän aman.

³⁴ Ənhäyän iməđanän-näsän a-wa ijän xas, äjewəđän, jän isälan däx-käl-axrəm d-attayän-net.

³⁵ Osän-dd äddinät äwinafätnen a-wa ijän, ogäzän-dd ähaləs wa däx-ikkäs Ƴisa alšinän, äqqiima edes i-ıdarän n-Ƴisa, ijä isəlsa, h'-e dađ tija n-ıman-net; ärmäxän.

³⁶ Jän däx-sän äddinät wi äjjəyhnen i-a-wa ijän isälan n-əmmək wa s-dd-ıxläs amälšon däx-alšinän wi t-əzzäxnen.

³⁷ Mäšan, əjjäšan-tän isälan n-a-wa ijän xas, ad-tattärän käl-Gadara däx-Ƴisa ad-ifəl äkall-näsän fäll-tarəmməxt-i-däx jän. İjjäš Ƴisa turäft n-aman, iqqäl.

³⁸ İttär däx-s ähaləs wa däx-ikkäs alšinän ad-t-äyy ad-där-s idaw mäšan, inn'-as Ƴisa:

³⁹ «Əqqəl ehän-näk, təlläyed i-äddinät təmxäre n-a-wa hak-ija Mässinäx». İglä darät-a-wen, ad-ısanäfas däx-axrəm iket-net təmxäre n-a-wa has-ija Ƴisa.

*İsəlan n-elle-s n-Žayrus d-taməđt ta dd-izajjār ašni
(Mätti 9:18-26; Marqəs 5:21-43)*

⁴⁰ Älwäqq wa dd-iqqäl Ƴisa ašrut n-əjäns wa iyyəđän, təlkəđ-as-dd tamətte has-täqqalät.

⁴¹ A əndärrän ähaləs iyyän da-däx s-isəm-net Žayrus, ənta a-s älfäqqi n-ehän n-äddin wa n-käl-Älyähud n-taxrəmt-en; ırkäx dat-Ƴisa, ad-däx-s itattär ad-idawän s-ehän-net,

⁴² fäl-a-s itiba elle-s lat marəw iwətyan d-əssin s-ənta xas a ila. Äddeew dər-s s-ehän-net däx-a-s t-täxiläyyäläy tamətte siha hakd siha.

⁴³ Tamətte-en, h'-et taməđt izajjār ašni a ilan mərəw iwətyan d-əssin, wär t-illa läxtur wär tosa mäšan, äbä-dd i tät-äzozäyän.

⁴⁴ Təkkä-dd darät Ƴisa, däs afär n-eräswäy-net, iktäl ašni wa tät-dd-izajjārän älwäqq-wen-däx.

⁴⁵ İnnä Ƴisa: «Ma ämoos äwadəm wa hi-ıdäsän?» Wär t-illa ere innan härät. İggäd-dd Bətrus, inn'-as: «Älxalim, təsinäkmäm-käy tamətte täjjeet däx-ifäyyän iket-näsän.»

⁴⁶ İnn'-asän Ƴisa: «İdäs-ahi äwadəm iyyän fäl-a-s, ofrayäx i-tärna ta hi-dd-təjməđät.»

⁴⁷ Təlməd taməđt a-s täffukkär-dd xas, təkkä-dd Ƴisa təşikəđkəd, tärkäx data-s, təlläxät-as dat-äddinät iket-näsän äddälil wa fäl däs afär n-eräswäy-net d-əmmək wa s-təzzäy älwäqq-wen-däx.

⁴⁸ İnn'-as Ƴisa: «Talyađt-in, äzozäy-käm immun-näm, əgləw däx-älxer.»

⁴⁹ Ämmiijräd Ƴisa dihen-däx a-s dd-osa ähaləs dd-ifalän eyewən n-älfäqqi n-ehän wa n-äddin, inn'-as: «Elle-k, äba-tät, wär təsläyyäxäd älxalim dađ.»

⁵⁰ İslä Ƴisa i-isəlan wi dd-ässawəđ ähaləs-en xas, innä i-Žayrus: «Wär käy-ısärmaçet härät, amən xas, ad-təzzəy.»

⁵¹ İwwəd-in Ƴisa ehän n-Žayrus xas, igdäl i-äddinät ad-t-əjjəšan, wär-äddew ar d-Bətrus d-Exya d-Yaqub d-ti-s d-ma-s n-talyađt.

⁵² A-s itäjj a-wen-däx, täsikäläl tamötte iket-däx-net, hall iba n-talyaqt mäšan, inn'-asän Yisa: «Wär təlhem ed talyaqt, wär tät-äba, eḏes ɣas a ja.»

⁵³ Jän-t tekäškäšt ed əkkasän äššäk a-s äba-tät.

⁵⁴ Ijjäš Yisa edägg wa däx-tənsa talyaqt, irmäs-tät-dd s-äfuss, iyr'-et, inn'-as: «Talyaqt, ənkär-dd!»

⁵⁵ Eqqälän-tät-dd iman-net, təbdäd-dd s-iyyät, omär-tän d-ad-tät-əkfən a təkša.

⁵⁶ Eqqälän-dd imärawän-net ɣas tof'-en təkunt. Äsmätär-tän Yisa d-ad-wär jen isälan n-a-wa ijän däx-äwadəm wäl' iyyän.

9

Äšmašäl Yisa inəmmušal-net (Mätti 10:5-15; Marqəs 6:7-13)

¹ Iyrä-dd Yisa inəttulab-net wi n-märaw d-əssin, ikf'-en tärna d-älxikmät fäll-e d t-illäm alšin d-tädabit n-ad-zizuyän äddinät däx-turhənnawen-näsän,

² äšmašäl-tän ɗarät-a-wen i-ad-xaṭṭabän isälan n-Təmmənəya n-Mässinäx d-ad-zizuyän imarhinän,

³ inn'-asän: «Wär tiwəyät wäla a əndərrän däx-asikəl-näwän, wär tiwəyät tāborit, wäla šäkköš, wäla äzzad, wäla əzrəf; wär tiwəyät əssin irəswäyän.

⁴ Ehän təjjäšäm-däx har käwän-äsməjarät, ɣaymät däx-s har ašäl wa d-tässawəḏäm tekle.

⁵ Ayrəm təjjäšäm wär käwän däx-s äsbərrək äwadəm, əzjarät-t, təbbäkbäkäm iḏarän-näwän i-ad-wär käwän-iləttäx wäla äboqqal-net, ilkam ad-əjjäyh a-wen fälläsän.»

⁶ Eglän inəttulab, tadəbayt əmmärän-däx, ad-däx-s äxtəbän isälan n-älxer, zuzəyən däx-s imarhinän.

Iggäd ənniyät n-ämənokal Harudəs (Mätti 14:1-12; Marqəs 6:14-29)

⁷ Islä Harudəs-i ixkämän fäll-teje ta n-Galila a-wa itäjj Yisa d-inəttulab-net ɣas, iqqän eɣäf-net fäl-a-s, jannen äddinät iyyəd däx-isälan n-Yisa a-s ənta-i-däx a-s Exya wa n-Enəsselmäx dd-olasän tanäkra jer-inəmmuttan,

⁸ jannen iyyəd: «A-wa ännäbi Yəli dd-olasän uɣəl», jannen wi iyyədnen: «A-wa iyyän däx-ännäbitän wi n-ibda dd-olasän tanäkra jer-inəmmuttan.»

⁹ Harudəs ənta iman-net, innä: «Exya-š, ajän wädden näkk a dd-issəfräsän eɣäf-net, ma ämoos-š wa hi-dd-išreyän fäll-salläx ijitän-wi-däx?» Ad-itattär ya Harudəs əmmək s-inhäy Yisa.

Asyāwän Yisa səmmos afdän n-ähaləs (Mätti 14:13-21; Marqəs 6:30-44; Exya 6:1-14)

¹⁰ Eqqälän-dd inəmmušal, jän däx-Yisa isälan n-a-wa jän iket-net. Ikkäs-tän-dd s-takše, ikka ɗär-sän taɣrəmt ta n-Bätsäyda.

¹¹ Elmädän äddinät s-a-wen ɣas, əlkämän-as-dd. Ilkäd-asän-dd Yisa, ad-hasän-itajj isälan n-Təmmənəya n-Mässinäx, izizuy däx-sän wi n-imärhinän äḏḏirärnen s-a-wen.

¹² Ohäz-dd ejaḏäl n-täfukt ɣas, ohäzän-t-dd inəttulab-net wi n-märaw d-əssin, ənnän-as: «Səgləw tamötte ad-täkk tidbi-ti ohäznen d-imäzzaɣän i-ad-təmmäx i-edägg däx-tənsa d-i däx-təkša fäl-a-s, edägg n-tenere a nəha.»

¹³ Inn'-asän: «Un, šäksät-tän käwəneḏ iman-näwän.» Ənnän-as: «Wär nəṭtef ar səmmosät tijəlwen d-əssin imənan, afäl wädden ayrəm a nəkka, i-ad-dd-nəžänš a təkša tamötte jat əjut-wa-däx.»

14 Älzämaḡät-en-däḡ, ih'-e a iwwädän səmmos afdän n-ähaləs. Innä Ḣisa i-inəṭṭulab-net: «Säqqaymət äddinät, təbdəwäm-tän s-səmmosät-səmmosät timərwen n-äwadəm.»

15 Jän inəṭṭulab a-wa hasän-innä, äşḡäymän äddinät iket-näsän.

16 İdkäl Ḣisa ḡarät-a-wen tijəlwen ti n-səmmosät d-imänan wi n-əssin, äjoḡäy išənnawän, ämmoy i-Mässinäḡ, äfräsfäräs tijəlwen, änkädnäkäḡ imänan təzzar, ikfä a-wen-däḡ iket-net i-inəṭṭulab-net i-ad-t-uḡanän jer-äddinät.

17 Äksän iket-däḡ-näsän har əyyəwänän, äsdäwän-dd a-wa əjläšan, osän-t idnäy mərəw deketän d-əssin n-tijəlwen d-imänan.

Tajuhe ta ija Bəṭrus däḡ-isälan n-Ḣisa

(Mätti 16:13-19; Marḡəs 8:27-29)

18 Aşäl iyyän, itəddal Ḣisa Mässinäḡ, əllan-t ḡur-s inəṭṭulab-net, har šik-däḡ, inn'-asän: «Ma janna tamətte däḡ-isälan-in, ma janna, mi ämoosäḡ?»

19 Ənnän-as: «İyyäd jannen: käyy a-s Exya wa n-Enəsselmäḡ, iyyäd jannen: käyy a-s ännäbi Ḣəli, iyyäd fäw a jannen: käyy iyyän däḡ-ännäbitän wi n-ibda dd-olasän tanäkra jer-inəmmuttan.»

20 Inn'-asän: «Käwäneḡ-i-š, ma tənnäm, mi ämoosäḡ?» Äwwežäb-as Bəṭrus, inn'-as: «Käyy a-s Älmasex wa n-Mässinäḡ.»

Äloläy Ḣisa däḡ-isälan n-taməttant-net d-tanäkra-net

(Mätti 16:20-21; Marḡəs 8:30-31)

21 Äsmähäd däḡ-sän Ḣisa, omär-tän d-ad-wär jen isälan-win-däḡ i-äwadəm wäl' iyyän,

22 inn'-asän: «Ägg-ägg-adəm, ilzam-t ad-inhöy tersəmmawen äjjootnen, ənkärän-t inušämän wi n-İşrayil d-imänokalän n-käl-tikutawen d-älḡulam n-Äṭṭäwrät, əjən iman-net mäšan, aşäl wa s-käraḡ ḡarät taməttant-net, ad-dd-inkär jer-inəmmuttan.»

Alkum i-Ḣisa Älmasex

(Mätti 16:24-28; Marḡəs 8:34-9:1)

23 Inn'-asän iket-näsän ḡarät-a-wen: «Ere irhän alkum-hahi-däḡ, adiš, iksənet iman-net, äjet hak aşäl fäll-taməttant šund ta n-tajəttewt təzzar, ilkəmet-ahi.

24 Wa wärän itəttär ar əmmək s-ogäḡ iman-net däḡ-äddunya-ta-däḡ, ad-ifut däḡ-älžännät, mäšan, wa irḡän äfota däḡ-iman-net däḡ-äddunya-ta-däḡ, däḡ-äddimmät-in, ad-iḡləs.

25 Ma s-infa ägg-adəm ad-irbäx äddunya iket-däḡ-net, a-s ija a-wen, äššiiška iman-net, äfota däḡ-älaxärät?

26 Ere hi-äkkrakädän-däḡ näkk d-mäjräd-in, ad-t-əkrukəḡäḡ näkk-däḡ i n-Ägg-ägg-adəm aşäl wa d-mad-dd-äqqələḡ däḡ-älxurmät-in d-älxurmät n-Abba d-änjəlosän wi n-iməšseddəjän.

27 Äsidätteḡ-awän a-s han-käwän äddinät əbdadnen diha-däḡ wär-e iba wär-ənhəyän Təmmənəya n-Mässinäḡ.»

Tihusay n-älxurmät n-Ḣisa Älmasex

(Mätti 17:1-8; Marḡəs 9:2-8)

28 İḡḡəküḡ n-əttam išilan ḡarät a-s hasän-ija Ḣisa mäjräd-wənnin-däḡ, äddew d-Bəṭrus d-Exya d-Yaqub s-taḡəṭt tiyyät i-ad-idəl Mässinäḡ.

29 İtəddal Mässinäḡ dihen-däḡ a-s data-sän dd-ijjäš ini äynayän, iqqäl-dd emäls-net i mällän-mällän šund essam.

30 A əḡärrän, əssin meddən-da-däḡ dd-falnen išənnawän hasän-dd-änfalälnen, ad-tamäjrädän d-Ḣisa. Meddən-en-hi, iyyän ännäbi Mosa, wa iyyädän ännäbi Ḣəli.

³¹ Ānfalälän-as-dd dāx-ālxurmāt, əjān-as isālan n-əmmək wa s-mad-hin-isəssiwäd āmašal n-Mässināx s-tamättant-net, dāx-Yārussālam.

³² A-s itājj a-wen-dāx, ilxad eḍəs Bəṭrus d-imidiwän-net, ənkārān-dd xas, ənhāyän təmxāre n-ālxurmāt n-Ÿisa d-meddön wi n-əssin dār-ännibdäd.

³³ Ālwāqq wa d-igilləw Mosa d-Ÿəli, innä Bəṭrus i-Ÿisa: «Ālxalim, ufa ad-nəzzāx xas diha-dāx, nəkrəs kārəḍ ihəktan: wa-nāk, wa n-Mosa d-wa n-Ÿəli.» Wār-issen Bəṭrus a ijanna.

³⁴ Ijanna a-wen-dāx a-s tən-dd-təlsa tele n-tejārākt tiyyät, ārmāxān.

³⁵ Izjār-dd eməsli tejārākt-en innän:
«A-wa Rure-x wa n-iyyän əsnāfrānāx,
sājdāt-as!»

³⁶ A-s imda məjrād-ənnin-dāx, wār t-illa ere dd-əqqimän dihen-dāx a sāl Ÿisa. Āssosāmän inəṭṭulab fäll-a-wa ənhāyän dāx-išilan-win-dāx, wār t-illa ere dāx-jan isālan.

*Āzozāy Ÿisa alyaq təjraw tašākärkärät
(Mätti 17:14-18; Marqəs 9:14-27)*

³⁷ Ašäl wa ilkämän i-wen, ālwāqq wa dd-əzzubbāt Ÿisa d-inəṭṭulab-net taḍaxt, təlkād-as-dd tamətte täjjeet.

³⁸ A əndərrän āhaləs iyyän da-dāx, idkäl eməsli-net, innä: «Ālxalim, aḍən təhanint i-ara-nin s-ənta xas a lex.

³⁹ E-d t-irmäs alšin wa t-ihän-dāx, ad-isaxārat, itišbärḍil, isakāffaw, isiləbbuḍ-t, šārnaš dār-s ibiḍḍəw,

⁴⁰ əttārəx dāx-inəṭṭulab-nāk ad-dāx-s t-əkkəsän məšan, indār-asän.»

⁴¹ Āwwežəb-asän, inn'-asän: «Ya əzzurəyät-i-dāx wārət tomen s-Mässināx, tənimašrāy-as, hundāx har əmme əllex jere-wän, əşbarəx-kāwän?» Innä i-āhaləs ḍarāt-a-wen: «Awəy-ahi-dd rure-k.»

⁴² Ikka-dd alyaq Ÿisa a-s t-əssoda alšin, ad-itišbärḍil məšan, əsmähəḍ Ÿisa fäll-alšin, izzāy alyaq, əssoxäl-t i-ti-s.

*Āsihe wa s-əssin d-itājj Ÿisa isālan n-tamättant-net d-tānākra-net
(Mätti 17:22-23; Marqəs 9:30-32)*

⁴³ Ākunän əddināt iket-dāx-näsän fäl təssəba n-təmxāre n-ijitän n-Mässināx. Inhāy Ÿisa a-s ākunän dāx-a-wa itājj xas, innä i-inəṭṭulab-net:

⁴⁴ «Əjjəšnet isālan-wi-dāx timəzəzujen-nāwän: Āgg-əgg-adəm, išwar ättirmäs, ijješ ifassän n-dāgg-adəm.»

⁴⁵ Wār-əjrehän məjrād-wen-dāx hasän-ija, ättunkäl-asän əlməxna-net i-ad-wār t-järrähän hakd a-wen-dāx, əksuḍän ad-t-səstənän d-əlməxna-net.

*Mijraw wa n-tidət
(Mätti 18:1-5; Marqəs 9:33-37)*

⁴⁶ Tənkär ḍarāt-a-wen tamxənnant təşsoohet jer-inəṭṭulab i-ad-əlmədän əndek dāx-sän wa ojārən.

⁴⁷ Iyrä Ÿisa edəwänne n-ulhawän-näsän xas, idkäl-dd ara iyyän, ij'-e edes-has,

⁴⁸ inn'-asän: «Ere əsbälälän ara-wa-dāx, dāx-əddimmät-in, nākka a əsbäläl, ere wa hi-əsbälälän, wa hi-dd-əşmašälän a əsbäläl; wa dāx-wän əsräsän iman-net, ənta a-s wa ojārən.»

(Marqəs 9:38-40)

⁴⁹ Issəstän-t ənəṭṭalib-net Exya, inn'-as: «Ālxalim, nənhay əwadəm iyyän itakkəsän alšinän dāx-əddināt s-tārna n-isəm-nāk, nənn'-as, wār-itilset, ed wār hanəx-iha s-alkum-hak.»

⁵⁰ Inn'-as Ƴisa: «Wär has-t-tөгdeläm fäl-a-s ere wärän käwän-iknes-däx, a-di, amidi-näwän.»

Tikawt n-Ƴisa i-Yärussälam

⁵¹ Ohäzän-dd išilan-wi d-ila Ƴisa s-ad-t-iba, inkär-dd jer-inömmuttan, äkk isönnawän xas, tøjjäš-dd tärha n-tikawt n-Yärussälam önniyät-net s-ässhät.

⁵² Issöglä inämmašalän data-s, ässok'-en taxrömt tiyyät n-Sämari i-ad-has-öjröwän ehän däx-äzzubbät

⁵³ mäšan, unjäyän käl-taxrömt-ten-däx s-ad-hasän-imjurət, ed ija tamdujt ta n-Yärussälam.

⁵⁴ Inhäy Yaqub d-Exya a-wen xas, önnän-as: «Älxalim, wi hi-äddinät, äyy-anäx ad-fälla-sän dd-nözözzubbət efew tän-ilhäsan.»

⁵⁵ Innäq-dd sär-sän Ƴisa, äsnärxäm fälla-sän, inn'-asän: «Wär tössenäm a jännem,

⁵⁶ Ägg-ägg-adəm wär dd-osa i-ad-ilhəs äddinät, osä-dd i-ad-tän-iylös.» Okäyän qarät-a-wen s-taxrömt säl-ten.

Kössen n-iman däx-alkum i-Ƴisa

(Mätti 8:19-22)

⁵⁷ Eqlan däx-a-wen-däx a-s inn' ähalös iyyän i-Ƴisa: «E-s təkked-däx, ölkämäx-ak.»

⁵⁸ Inn'-as Ƴisa: «Ibäggan lan tihaliwen, igdađ lan iskak mäšan, Ägg-ägg-adəm, wär ila wäla edägg däx-issensa exäf-net.»

⁵⁹ Innä Ƴisa i-ähalös iyyän qarät-a-wen: «Elkəm-ahi.» Inn'-as wa: «Älxalim, äkf'-ahi turhajät n-ad-ägläx äzkäx abba-nin, äqqöläx-käy-dd, ölkämäx-ak.»

⁶⁰ Inn'-as Ƴisa: «Äyy inömmuttan ad-özken inömmuttan-näsän, käyy, öglöw äj i-äddinät isälan n-Tömmönöya n-Mässinäx.»

⁶¹ Inn'-as iyyän dağ: «Älxalim, ärheğ ad-hak-ölkämäx mäšan, äkf'-ahi turhajät n-ad-äjäx isönnäxlaf d-äddinät-in tözzar.»

⁶² Inn'-as Ƴisa: «Ere issöntän azzal wa n-älxidmät i-Mässinäx tözzar, ad-išanäšlam dara-s, a-di, wär-änhäjja d-Tömmönöya n-Mässinäx.»

10

Inöttulab wi n-össayät timөрwen d-össin äsmašäl Ƴisa

¹ Äsnäfrän älxalim Ƴisa qarät-a-wen, össayät timөрwen n-änättalib d-össin, äsmašäl-tän s-össin-össin i-ad-has-izarän s-idäggan wi s-ikittöw ad-tän-immär.

² Inn'-asän: «Ašökrəš äggölät, öttäxam ijjet mäšan, wär-öjjötän inaxdimän t-oläynen, ädelät mässi-s n-ašökrəš i-ad-dd-išömmišöl inaxdimän oläynen ašökrəš-net.

³ Säjdät! Äglät, äšimašäläx-käwän i-ad-talähäm d-ikөрwatän öllanen jer-tixös.

⁴ Wär tiwöyät äzrəf, wäla šakkoš, wäla tifädelen, wär käwän-šöllunet isofan däx-tabarät.

⁵ Ehän tøjjäšäm-däx, äjrät fälla-s ässälam s-tizarät.

⁶ Kunta ehän-en, izzağ-t ägg-älxer, ad-käwän-isöbbärrək, äns fälla-s älxer-näwän, kunta dağ wär t-ihä ägg-älxer, adiš, aköyät d-älxer-näwän.

⁷ Afäl tejräwäm ehän wa n-ägg-älxer, özzäxät däx-s, təkšəm, töswöm a-wa käwän-mad-äkf mässi-s fäl-a-s, hak änaxdim-däx, ärhuj-as älxäqq n-tide-net, udayät i-tikawt jer-ihänan.

⁸ Axrəm tosäm-däx, äsbärräkän-käwän mössaw-s, äksät a-wa s-käwän-mad-sömmöjurun,

⁹ zuzöyät imarhinän-näsän, tönnəm i-mössaw-s: <Tömmönöya n-Mässinäx, tohäz-käwän-dd>

¹⁰ māšan, aḡrəm tosām, wār kāwān-āsbārrākān mēssaw-s, ilalāt tišarriten-net, tēnnəm i-mēssaw-s:

¹¹ «Tājjəyhām a-s wāla-dāḡ āboqqal n-aḡrəm-nāwān wa iwārān idarān-nānāḡ, nābbikbāk-in māšan, əlmədāt a-s Tēmmənəya n-Māssināḡ, tohāz-dd.»

¹² «Enneḡ-awān a-s ašāl wa ilkāmān, ad-tajār tisanant ta madāt-tārməs aḡrəm-en-dāḡ, ta tārmāsāt aḡrəm wa n-Sodoma.»

Iḡərman wi fäll-āsmāqqa ʒisa
(Mätti 11:20-24)

¹³ «Iməskay käl-Qorazin, iməskay käl-Bātsāyda! Älmāššibāt ḡas a fälla-wān madān-idəw ed ənnār iḡərman wi n-Tir d-Sāyda əzzāḡān inəzzulam† a dāḡ-jānāt tikunen-ti-dāḡ jānen ḡur-wān, āru d-əlsān šakutān, əblənbulun dāḡ-ezəd fäl tēmyäre n-tātubt-nāsān.

¹⁴ A-wen-dāḡ a fäl ašāl wa ilkāmān, ad-kāwān ijješ äddäyyāt ojārān wa ijješān iḡərman wi n-Tir d-Sāyda.

¹⁵ Kāwāned-i-š-i əzzāḡnen aḡrəm wa n-Qāfārnaxum, ma tāḡelām? Tordam a-s ad-itimḡar aḡrəm-nāwān har awəd išənnawān? Xāram-awān! Änn-ak, ad-təhələm ider, wār kāwān-dd-e-awāḡ ar temse.»

¹⁶ Innā daḡ ʒisa i-inəṭṭulab-net: «Ere hawān-āsjadān, nākk a-s əsjād, wa kāwān-irfādān, nākk a irfād, ere daḡ wa hi-irfādān, wa hi-dd-āšmašālān a irfād.» Issəmdā ʒisa mājrad ḡas, issəglā inəṭṭulab-net i-ad-hin-səssiwədān āmašal-net.

Uḡəl n-inəṭṭulab wi n-əssayāt timərwen d-əssin

¹⁷ Əglān inəṭṭulab wi n-əssayāt timərwen d-əssin, a-s dd-əqqālān əknan dāḡ-tedāwit. Osān-dd ḡas, ənnān-as: «Äḡḡalim, wāl' alšinān, rakkāḡān-anāḡ e-d hasān-nāḡra isəm-nāk.»

¹⁸ Inn'-asān: «Hannāyāḡ Iblis har dd-ātrākkāt dāḡ-išənnawān šund essam.

¹⁹ Elmədāt a-s əkfəy-kāwān tārna fäll-taššālen d-tižerdəmen d-a-wa ila Iblis dāḡ-tārna iket-net, wār t-illa fāw a äddooben ad-hawān-iḡšəd härāt

²⁰ māšan, wār kāwān-isādāwatet a-wa s-data-wān rakkāḡān alšinān, änn-ak, isəddəwətet-kāwān a-wa s-əktābān ismawān-nāwān dāḡ-išənnawān.»

Tāmāyit n-ʒisa i-Abba-net
(Mätti 11:25-27; 13:16-17)

²¹ Täsədāwāt tārna n-Unfas Šaddijān ʒisa älwāqq-wen-dāḡ, innā: «Abba, kāyy-i n-Emāli n-išənnawān d-ākall, timələḡ-kāy fäl-a-s härātān-wi-dāḡ, təffārāt-tān i-iməssorha d-imusānān n-äddunya-ta-dāḡ māšan, täsnāfalälād-tān-dd wāla i-aratān. Tidət Abba, kāyy a timələḡ ed ädduuttāt a-s ənta-den-dāḡ erhet-nāk wa āhusken.

²² Wār t-illa a-s wādden ij'-e Abba-nin dāḡ-ifassān-in, wār t-illa ere hi-ijan muzəyāt imdan kunta wādden Abba, wār t-illa daḡ ere ijan muzəyāt imdan i-Abba kunta wādden nākk-i n-Rure-s-i t-dd-ifälān d-ere wa s-ärheḡ ad-has-t-zuzəyāḡ.»

²³ Innād-dd ʒisa darāt-a-wen s-inəṭṭulab-net, ikkās-tān-dd s-takše, inn'-asān: «Təndəḡ i-tiṭṭawen ti hannāyān a-wa hannāyām!

²⁴ Ässiilmädāḡ-kāwān a-s äsdārhanān ännābitān äjjootnen d-imānokālān ahānay n-a-wa hannāyām māšan, wār t-ənhəyān, äsdārhanān mäsällāt n-a-wa s-sallām māšan, wār has-əslen.»

Ujješ n-tāmudre ta tāḡlälāt
(Mätti 22:34-40; Marḡəs 12:28-31)

† 10:13 10:13 – ʒur-käl-Älyāhud, ere wārān āmoos ägg-Älyāhud s-alāšāl meḡ ere wārān ilkem i-äddin-nāsān, iket-net, änäzzalim a āmoos. A-wen-dāḡ a fäl tiwsaten ti iyyāḡnen iket-nāsnāt, ti n-inəzzulam. — Ašāl-i-dāḡ, änäzzalim, äkafār (ere wārān issen s-Māssināḡ).

²⁵ A ɛndərrän älyalim n-Ättäwrät iyyän da-däx dd-inkärän, ija i-ÿisa asəstan däx-otas irrum-net, inn'-as: «Älyalim, ma s-lex s-ad-t-äjäx i-ad-əkkusäx tämudre ta täylälät?»

²⁶ Inn'-as ÿisa: «Ma iktabän däx-Ättäwrät, ma däx-s täxred?»

²⁷ Inn'-as älyalim, iktab däx-s a-s:
«Ad-tärhəd Emäli-näk Mässinäx s-ulh-näk imda,
tärhəd-t s-iman-näk əmdan,
d-əşşahät-näk imda d-tayətte-näk təmda,
tärhəd day ənhäraj-näk s-əmmək wa s-tärhed iman-näk.»

²⁸ Inn'-as ÿisa: «Toxadäd, äj a-wen, ad-təddäräd.»

²⁹ Mäšan irha älyalim-en ad-ikrəş tidət xas, innä dax i-ÿisa: «Mi ämoosän ənhäraj-in?»

Tangalt ta n-u-Sämari

³⁰ Inn'-as ÿisa: «Käla dd-ätrara ähaləs iyyän ayxəm wa n-Yärussälam s-wa n-Žärriko, igla har fälla-s ođan inaxtafän, ohäxän a-wa ila, tithəkkın-t har äktäyyät təzzar, əşläyän-as.

³¹ Israd dihen-däx, a-s t-dd-immar u-tikutawen dd-ijan tabarät-ten-däx, inhäy-t mäšan, okäy-t şund wär t-ihənnəy;

³² immär-t-dd iyyän n-u-Lewi, okäy-t ənta-däx.

³³ Mäšan, immär-t-dd u-Sämari dd-ijan tabarät-ten-däx, inhäy-t xas, tänx'-e tähanint-net,

³⁴ os'-e-hi-dd, əsseräd ibuyəsän-net s-əzzäyt d-asməd n-läxnäb, ittäl-tän təzzar, əsnäy-t tasnit-net, äwwäy-t s-tähänzabbut, ittäf-as täməzzuxt d-tämudre.

³⁵ Äffäw-t xas, ikfä əssin ärriyälän n-azrəf ahänzabbu, inn'-as: «Taxälift-näk ähaləs-i-däx har dd-äqqələx, a fälla-s təbxäsäd-däx, afäl dd-äqqäläx, ad-hak-äzläx.»

³⁶ Innä ÿisa ɔarät-a-wen i-älyalim: «Əndek däx-äddinät-wi-däx n-kərađ wa s-torded a-s ənta a-s ənhäraj n-ähaləs-wa ođan dax-ifassän n-inaxtafän?»

³⁷ Inn'-as: «Wa has-ođänän tähanint.» Inn'-as ÿisa: «Adiš, əgləw käyy-däx, təjəd şund a-wen-däx.»

Märyäma d-Marta

³⁸ Ifäl ÿisa dihen äddeew d-inəttulab-net här dd-räsän taxrəmt tiyyät däx-tän-täsbärräk tamäđt s-isəm-net Marta,

³⁹ təla wälätma-s s-isəm-net, Märyäma. Täqqiima Märyäma xur-älyalim ÿisa, ad-sajad i-a-wa ijänna,

⁴⁰ a-s ija a-wen Marta ənta, tədgaz däx-imjora n-ÿisa. Tähoja xas, təjjäş-dd fälla-sän, tənn'-as: «Älyalim, ajän wär käy-ikma a-wa s-täqqiima wälätma-x wär hi-tilal s-əşşəxəl, änn'-as, ad-təbdəd tilal-ahi.»

⁴¹ Inn'-as ÿisa: «Marta, Marta! Tozaräd däx-a äjjeen wärän infa härät,

⁴² härät iyyän a ilan tənfa, wen ənta, täsnäfrän-t Märyäma, wär-ilkem dax ad-däx-s əmehäx.»

11

Abba-nänäx wa ihän isənnawän (Mätti 6:9-13; 7:7-11)

¹ Aşäl iyyän, itəddal ÿisa Mässinäx däx-edägg iyyän, issəmdä xas, inn'-as iyyän däx-inəttulab-net: «Älyalim, səlməd-anäx tamədilt n-Mässinäx şund a-wa ija Exya i-inəttulab-net.»

² Inn'-asän ɔarät-a-wen: «E-d təddaläm Mässinäx, ännät:

«Abba,
 səmɣärnet äddinät isəm-näk wa šäddijän,
 taset-dd Təmmənəya-näk,
³ äkf'-anäx hak ašäl isudar-nänäx,
⁴ änš-anäx ibäkkadän-nänäx ed näkkäneḍ-däx,
 nənašš i-wi hanäx-ḍallämnən,
 wär toyyed Iblis äžžurräbät-anäx,
 isiḍəw-anäx däx-abäkkad.» »

*Akuyəd däx-tamädilt n-Mässinäx
 (Mätti 7:7-11)*

⁵ Inn'-asän daḡ: «Təssanäm käwäneḍ iman-näwän a-s afäl däx-wän ila iyyän amidi har t-osa s-ammäs n-ehäḍ, inn'-as: «Amidi-nin, əffəd-ahi-dd käraḍät tijəlwen

⁶ fäl-a-s leḡ amidi-nin s-iket dd-osa ifal-dd asikəl, äzzubbät ɣur-i, wär-əley a t-əššəkšäx»,

⁷ təssanäm a-s wär has-mad-änn amidi-net: «Wär hi-täsɣäfäd, äbas äddobex tanäkra, ehän iɣfal ämära-däx, aratan daḡ ənsan.»

⁸ Älleɣeɣ-awän a-s kud-däx wär ibded i-ad-t-äkf a-wa däx-s ittär däx-idəm n-təmmidəwa ta n-jere-sän, ad-has-t-äkf fäl təssəba n-täkrakiḍt ta mad-has-umas a-wen afäl əslän äddinät i-täkunt ta ija.

⁹ Əneɣ-awän: ädälät Mässinäx, ad-käwän-äkf, əmmäɣät, ad-təjrəwäm; äɣrät-t, ad-hawän-äkawän.

¹⁰ Ere idälän, ad-ikrəš, ere immäɣän, ad-ijrəw; ere iɣrän Mässinäx däx-tämäɣatert t-tärmasät, ad-has-tät-ikkəs.

¹¹ Əndek abba däx-wän wa s-e-d t-idäl rure-s däx-emän, ad-t-äkf taššält?

¹² Meɣ əndek wa s-e-d t-idäl däx-tekakit, ad-t-äkf težerdəmt?

¹³ ɣas kunta käwäneḍ-i n-inälläbäsän, təssanäm isuf n-a-wa oläɣän i-aratan-näwän, äb'-ätṭäma n-ad-wär käwän-ikfa Abba-näwän-i ihän išənnawän Unfas Šäddijän, afäl t-däläm däx-s.»

*Tärna ta n-ɣisa, wär toher härät d-ta n-Iblis
 (Mätti 12:22-30; Marqəs 3:22-27)*

¹⁴ Ikkäs ɣisa darät-a-wen däx-ähaləs iyyän alšin has-igdalän mäjräd, izjār-t alšin, imməjräd ɣas, ämoos a-wen təkunt i-äddinät.

¹⁵ Ad-jannen iyyäḍ däx-sän: «A-wa tärna n-Abälzäbil, Iblis wa n-ämänokal n-alšinän a-s itakkäs alšinän däx-äddinät.»

¹⁶ Ettärän wi iyyäḍnen ad-t-arəmən, ənnän-as: «Äj data-näx iji n-Mässinäx hanäx-issətbätän a-s tidət-däx a-s, Mässinäx a käy-dd-äšmašälän.»

¹⁷ Ilmäḍ ɣisa ɣur-iman-net a-wa ihän ənniyät-näsän, inn'-asän: «E d t-illäm əddəwəl s-dd-əqqälän məssaw-s əknasän jer-iman-näsän, ad-t-iba; ehän daḡ wa s-dd-əqqälän məssaw-s əknasän jer-iman-näsän, ad-änd.

¹⁸ Afäl-dd iqqäl Iblis iknas iməššerəkän-net, əndek əmmək wa s-e-tähaj təmmənəya-net? Wädden tənnäm näkk, tärna ta n-Abälzäbil a-s takkäsäx alšinän däx-äddinät?

¹⁹ Kunta daḡ a-wa jännem tidət, adiš inəṭṭulab wi-näwän əntäneḍ, mi tän-ikfän tärna ta s-takkäsän alšinän däx-äddinät? Inəṭṭulab-näwän en-däx a-s ilkam ad-äjjayhən fälla-wän, səḍləmän-kawän.

²⁰ Mäšan, kunta näkk, tärna n-assəkäḍ n-Mässinäx a-s takkäsäx alšinän, adiš Təmmənəya n-Mässinäx, təll'-e jere-wän.

²¹ A ikk' ähaləs n-anäkfor ijbas fäll-təzoli-net, iɣlaf ehän-net, ad-ogaz ehäre-net

²² māšan, afäl fälla-s dd-oða ere t-ojārān āššahāt, ad-t-ārñ, ahāy dāy-s tāzoli-net ta fäll-āsifälla, uzan darāt-a-wen ehāre-net.

²³ Elmədāt a-s ere hi-wārān irha-dāy, a-di, ašānjo-nin; ere daγ wa hi-wārān itilal s-asdu, ašəmmāhəš γas a t-išlan.

A-wa ihān iba n-tātubt təmdat
(Mätti 12:43-45)

²⁴ E-d izjār alšin āwadəm, ad-ākk tinariwen i-ad-dāy-snāt immāy i-edāgg dāy-ässunfa, afäl has-t-āba, ad-ānn i-iman-net: <Nākk-i-dāy, ma hi-idgazan, āqqələyēt γas ehān-in wa dd-fälāy.>

²⁵ Afäl dd-iqqāl edāgg wa ifäl s-tizarāt, ad-t-dd-ass ifraḍ, āmmujnāt.

²⁶ Igləw ālwāqq-wen, awəy-dd əssa alšinān t-ojārñen tāllābāst, əjjəšān āwadəm-ənnin-dāy, əzzāyān dāy-s; umas a-s talγa n-āwadəm-en ta tāzzarāt, təššām i-ta təšrāyāt.>

²⁷ Ämmiijrād Ḡisa dihen-dāy a-s təḍkāl tamādt tiyyāt eməsli-net dāy-tamətte, tənn'-as: «Təndəḍ i-tāsa ta dd-təzjārād, təndəḍ i-ifāfan-wi tətṭādād.»

²⁸ Inn'-as Ḡisa: «Änn-ak, təndəḍ i-wi sajadnen i-mājrād n-Mässināy, tamašalān a-wa inna.»

Isətbat n-a-s Mässināy a dd-āšmašälān Ḡisa.
(Mätti 12:38-42; Marqəs 8:12)

²⁹ Inhāy Ḡisa a-s tidawān-dd sār-s äddināt γas, inn'-asān: «Əzzurəyāt-ta-dāy, tenällābāst, wār təmmāy γas ar ad-ətwəjjən ijitān n-Mässināy data-s māšan, təlmədet a-s wār dāy-s ilkem iji n-Mässināy sāl wa n-ännābi Yunəs.

³⁰ Emmək wa s-kāla sār-s āmoos Yunəs iji n-Mässināy i-kāl-Nəñiba a-s ija kārād išilan dāy-tāsa n-emān, əmmək-wen-dāy daγ a-s mad-umas Ägg-ägg-adəm iji n-Mässināy i-əzzurəyāt-ta-dāy.

³¹ Ašäl wa n-tebādde, ad-dd-tənkār təmānokalt ta s-kāla tāxkām fäll-ākall wa n-ajus s-isəm-net Saba, tājjayh fäll-kāl-āzzāman-i-dāy, səḍləm-tān ed, ənta fäl-dd diha dd-imda ākall i-ad-səjəd i-iməjridān n-sārho wi itājj āmānokal Sulāyman. Sājdāt! Ašäl-i-dāy, ənhəywāt-ak, ill'-e jere-wān ere ojārān āmānokal Sulāyman māšan hakd a-wen-dāy, tunjäyām s-asjəd-has.

³² Ašäl wa n-tebādde, ad-dd-ənkārān käl-aγrəm wa n-Nəñiba, səḍləmān käl-əzzurəyāt-ta-dāy ed ašäl wa d-hasān-ixṭāb ännābi Yunəs, ätubān. Sājdāt! Ašäl-i-dāy, ənhəywāt-ak, ill'-e jere-wān ere ojārān Yunəs māšan hakd a-wen-dāy, tunjäyām s-ad-tutabām.»

Tangalt ta n-tefätelt
(Mätti 5:15; 6:22-23)

³³ «Wār t-illa ere isarmasān tefätelt təzzar iffār-tāt meγ tāt-ija daw-ākoss, änn-ak, aswār a tāt-itajj edāgg iḍkalān i-ad-hannāyān äddināt wi dd-tajjāšnen ehān ännur-net.

³⁴ Tiṭṭ-nāk a-s tefätelt n-taγəssa-nāk. Afäl toolay tiṭṭ-nāk, adiš taγəssa-nāk, hannāy iket-net māšan, afäl wār toley tiṭṭ-nāk, taγəssa-nāk iket-net a ihan tihay.

³⁵ Ḡas he kāyy! Äj ənniyāt i-iman-nāk, wār-itumaset ännur-nāk tihay i-taγəssa-nāk.

³⁶ Afäl ha taγəssa-nāk iket-net ännur, wār tāt-iha fāw a ihan tihay, ad-tajjād ahānay wa tājjād afäl hed edāgg tāsimälāwlāw tefätelt.»

Iməskay käl-faris d-älyulam n-Äṭṭāwrāt
(Mätti 23:1-36; Marqəs 12:38-40; Luqa 20:45-47)

³⁷ Issəmdā Ḡisa mājrād γas, issəkl'-e u-faris iyyān γur-iman-net. Osä-dd Ḡisa ehān n-u-faris γas, ikk' edāgg wa dāy-əskarān imənsiwān, äsγāmār dāy-s.

³⁸ Äkun u-faris dāḡ-a-wa s-issənta ʃisa tetäte wār-ässeräd ifassän-net s-älxal wa n-käl-Älyähud.

³⁹ Inn'-as älyalim ʃisa: «Käwäneḡ-i n-käl-faris, šašdajäm afälla n-kara d-ikassän wi iyyäḡnen, a-s ija a-wen, ammas n-ulhawän-näwän, wār-iḡney ar tikra d-tälläbäst.

⁴⁰ Tidət-dāḡ a-s irmas-käwän iba n-tayətte! Ajän wädden wa dd-ijän afälla n-äkoss, ənta daḡ a dd-ijän ammas-net?

⁴¹ Äktät a-wa ihän karatän-näwän d-ikassän-näwän i-tiläqqiwen, dihen, ad-datawän išdaj härät iket-net.

⁴² Iməskay käwäneḡ-i n-käl-faris! Hakkäm s-iqqud a-wa ämoosän tämukäst-näwän dāḡ-ənnäḡnaḡ d-tiyəššawen-ti iyyäḡnen, a-s ija a-wen, təšlaläm-in fäll-a-wa ämoosän iqqud d-tärha n-Mässinäḡ, härätän-win-dāḡ a-s äniihäjja a-s təssəntäm sār-sän, səlkəmäm-asän amišəl n-wi iyyäḡnen oläḡnen.

⁴³ Iməskay käwäneḡ-i n-käl-faris! Tärham tisäqqima ti ännufläyten dāḡ-ihänen n-äddin wi n-käl-Älyähud, ijraz-awän ad-hawän-tajjän äddinät isofan dāḡ-tišarriten.

⁴⁴ Iməskay-näwän fäl-a-s, tolähäm ḡas d-tizəska fäll-irajjäš äwadəm wār-issen s-a-wen, səmməḡəsnät-t.»

⁴⁵ Inna iyyän dāḡ-älyulam n-Ättäwrät i-ʃisa: «Älyalim, käyy ya näkkäneḡ-dāḡ, jed-anäḡ erk mäjräd.»

⁴⁶ Inn'-as ʃisa: «Iməskay käwäneḡ-dāḡ älyulam n-Ättäwrät! Sawaräm äddinät äzük s-izzəwät aggay-net, a-s ija a-wen, wār käwän-ihä ad-hasän-tilaläm s-aggay-net wäla-dāḡ s-emm n-assəkäd.

⁴⁷ Iməskay käwäneḡ-i təqqašnen izəkwan ähuskätten i-ännäbitän wi äḡän abbatän-näwän.

⁴⁸ Emmək-wen-dāḡ a-s saknem a-s tärḡam s-a-wa jän ed əntäneḡ, äḡän-tän, käwäneḡ ḡäšäm izəkwan-näsän.

⁴⁹ A-wen-dāḡ a fäl inna Mässinäḡ dāḡ-təḡḡäre n-sārho-net:

<Ad-sär-sän-dd-šəmmišäläḡ ännäbitän

d-inəmmušal äjjootnen,

ad-əjən iman iyyäḡ dāḡ-sän,

äqquzzəbun wi iyyäḡnen.>

⁵⁰ Han iman n-ännäbitän wi äba ḡur-sänto n-äddunya har ašäl-i-dāḡ dāḡ-käl-əzzurəyät-ta-dāḡ,

⁵¹ issəntä-dd a-wen ḡur-iman wi n-Xäbälla-i äba s-tizarät fäll-äkall-i-dāḡ har iman wi n-Zäkärya wa n-ämänokal n-käl-tikutawen wa išräyän s-inḡäl ašni-net dāḡ-ehän n-ämudd wa mäqqārän, jer-edägg wa n-tikutawen d-edägg wa šäddijän. Tidət, ässiilmädäḡ-käwän a-s äddinät-win-dāḡ, əḡmanän iman-näsän iket-dāḡ-näsän dāḡ-käl-əzzurəyät-ta-dāḡ.

⁵² Iməskay käwäneḡ-i n-älyulam n-Ättäwrät! Təttafäm asäyar wa n-musnät mäšan, wār lömmədäm, äddinät daḡ wi ärhänen almud, tənkažäm-asän-t.»

⁵³ A-s ifäl ʃisa ehän-ənnin-dāḡ, samädadän älyulam d-käl-faris fälla-s, tajjän-as isəstanän äjjootnen

⁵⁴ dāḡ-otasän ad-t-səwwənnən a wärän oḡed, i-ad-əjrəwän äsarü s-t-əssəḡlämän.

12

He käwäneḡ təlmənuḡäḡa!

¹ Ḋarät-a-wen, täddew-dd tamətte-i-dāḡ täjjet s-ʃisa har dd-äqqimän äddinät tinmökukulän. Innä ʃisa i-inəttulab-net s-tizarät: «Äjät ənniyät i-täzza ta n-təlmənuḡäḡa n-käl-faris.

² Wār t-illa a ättunkälän s-wädden ad-dd-infiləl, wār t-illa a iffarän s-wädden ad-dd-iffukkär.

³ A-wen-däx a fäl, a tønnäm däx-takše-däx, ad-dd-iffukkär, a täsmätäktäkäm däx-ammās n-ihānan-nāwän-däx, ad-t-säqqöyən äddinät fäll-afälla n-ihānan-näsän.»

Uksadät Mässinäx wädden dägg-adəm
(Mätti 10:28-33, 19-20; 12:32)

⁴ «Kāwāneḍ-i n-imidiwän-in, ənneḡ-awän: wār täksuḍäm dägg-adəm-i wären äddobät ar tenäḡe n-taḡəssa-nāwän, wār t-illa a äddoben säl a-wen-däx.

⁵ Äyyät-ahi ad-hawän-älläḡeḡ ere wa s-təlam s-ad-t-tuksadäm: Uksadät Mässinäx-i inaqqän, ila daḡ ḍarät-a-wen tärna s-kāwän-in-ijär däx-žohännäma, tidət, ənta-en-däx a-s lam s-ad-t-tuksadäm!

⁶ Ḣur-wän, wädden təssanäm a-s iba n-təfärre n-tošəmba a fäl hin-nazzän səmmos däx-sän sänatät tammaten? Hakd a-wen-däx, wār tän-iha i hin-itatäwa Mässinäx,

⁷ wār tärmeḡäm, wäla amḗadän n-eḡäf-nāwän, äḍinän, tojāräm abrək n-igḍad älqim.

⁸ Älleḡeḡ-awän a-s ere äsjäyhän dägg-adəm a-s näkk a t-ilän, ad-äjjayhäx näkk-däx i n-Ägg-ägg-adəm dat-änjälosän n-Mässinäx a-s äwadəm-en, i-nin.

⁹ Ere daḡ wa hi-äkkuddälän dat-dägg-adəm, ad-t-əkkuddäläx näkk-däx dat-änjälosän n-Mässinäx.

¹⁰ Ere innän a läbasän däx-isälan n-Ägg-ägg-adəm-däx, äddobät ad-ijrəw tenäšše n-a-wen mäšan, äwadəm wa äskafärän däx-isälan n-Unfas Šäddijän, wār-ilkem ad-has-in-ätiwänša.

¹¹ Afäl tämewäyäm s-äššäreḡa däx-ihānan n-äddin wi n-käl-Älyähud, meḡ daḡ dat-käl-äššäreḡa d-əlxəkum, wār kāwän-itäšäwwašet əmmək wa s-mad-təhələm iman-nāwän wäla a-wa mad-tənnəm,

¹² afäl älwäqq wa d-tamäjrädäm, Unfas Šäddijän a kāwän-e-isäḡrən ässaḡät-wen-däx a-wa s-änihäjja s-ad-tän-tənnəm.»

Tärha n-härät sajraw härät

¹³ Ijanna Ḣisa a-wen-däx a-s dd-iggäd äwadəm iyyän däx-tamətte, inn'-as: «Älyalim, änn i-änḡa-ḡ a dār-i uḗan täkasit-nänäx.»

¹⁴ Inn'-as Ḣisa: «Ähaləs, mi hi-ijän älqalli-nāwän tuḗanäx-awän täkasit.»

¹⁵ Inna Ḣisa i-tamətte ḍarät-a-wen: «He kāwāneḍ! Agəzät iman-nāwän däx-tärha n-härät fäl-a-s, ägg-adəm, kud-ila härät-däx, wädden ärrəzäx-net a iḍmanän tämudre-net.»

¹⁶ Issäḡläy-tän tangalt, inn'-asän: «Käla t-illa ähaləs n-amärrəzäx ilan išəkraš has-dd-izajjār älfäyda mäqqoorän.

¹⁷ Inhäy a-s ibbäḡär hullan ḡas, iqqäl-dd ad-ijanna i-iman-net: <Näkk-i-däx, ma mad-äjäḡ, äbas leḡ edägg äwwayän əttäḡam-in?>

¹⁸ Ij' äddäbara i-iman-net, innä: <Ad-ärzäḡ ijändän-in, sädəyäḡ i tän-ojärnen, sädwäḡ däx-sän älkäma-nin d-a-wa leḡ iket-net,

¹⁹ dihen, ad-ännäḡ i-iman-in: Ya iman-in, sunfät, təkšəm, təzhəm däx-tänoflayt, itwar-awän ärrəzäḡ madän-äj iwətyan äjjootnen.>

²⁰ Diha-däx d-issəmḍa tənna n-a-wen, ad-has-innä Mässinäx: <Isəm n-enəbbeddəl, ad-käy-iba ehäḍ-i-däx, ḡas mi madän-ikus a-wa äjjen täsdäwäd?>

²¹ Šund a-wen-däx a madän-irməs ere ijmarän iman-net wār-ikəttəw Mässinäx.»

Iba n-ašəwwəš
(Mätti 6:19-21, 25-34)

²² Innä Ȳisa darät-a-wen i-inettulab-net: «A-wen-däx a fäl hawän-janneḡ: wär käwän-järräwnet inözjam n-a-wa mad-təksəm d-a-wa mad-təswəm d-a-wa mad-təlsəm.

²³ Iman-nāwän, ojārän tetäte; ässexät n-taḡəssa-nāwän daḡ, ojār isəlsa.

²⁴ Ekyədät ḡas däḡ-izuyaj, wär tədumun, wär tøjlubun, wär len timšiten wäla ijändän mäšan, ässodär-tän Mässinäḡ, tufäm-tän s-a äjjeen.

²⁵ Endeḡ ḡas däḡ-wän wa äddoben s-inözjam-net, ad-isiwəḡ taḡrəst-net wäla s-a ogdähän d-emm n-asənnan?

²⁶ Šāmad a ogdähän d-a-wen-däḡ təmmətkit wär t-täddobem, adiš ma däḡ-tozarām däḡ-a-wa säl a-wen?

²⁷ Ekyədät ḡas däḡ-tadāwla n-täboyt: wär zətt, wär zəmməy mäšan, wäl' ämänokal Sulāyman hakd terše-net iket-net, wär käla ojār täboyt-i-däḡ asəssiḡäḡ n-ašäl.

²⁸ Ȳas kunta Mässinäḡ isalsa teyəšše n-išəkraš s-ašäl-i-däḡ təbdaj, ašəkka ad-hin-tärḡ däḡ-efew s-əmmək-wen-däḡ, äb' ätṡāma n-ad-wär hawän-izṡəzmäy käwəneḡ. Təmmətkit ija immun-nāwän!

²⁹ Wär käwän-daggāznet inözjam n-a-wa mad-təksəm d-a-wa mad-təswəm.

³⁰ Härätän-win-däḡ, käl-äddunya a ḡallābän. Käwəneḡ, Abba-nāwän-i ihän isənnawän, wär t-illa a-s tämiḡatārām s-wädden, issan-t.

³¹ Emmäḡät s-tizarät i-Təmmənəya n-Mässinäḡ, dihen, ad-hawän-in-iwwaḡ a-wa iyyädän.

³² Tahrut-in ta əndärrät, wär tärmeḡäm fäl-a-s, irha Abba-nāwän, ad-äj Təmmənəya-net däḡ-ifassän-nāwän,

³³ tužžärät-in a-wa läm, təktəm-t i-tiläqqiwen, təjəm i-iman-nāwän azrəf iḡlalän d-ijändän s-wär-iḡəššəd a-wa däḡ-sän itwārän ed isənnawän, wär tän-hen imäkrädän wäla temedhe.

³⁴ Tidət-däḡ a-s inözjam n-ulh n-āwadəm, wär təffilän dihad itwär təla-net.»

Änaxdim wa oläyän d-wa läbasän

³⁵ «Ȳaymät tasidāwäm, təjbasäm, tässirḡäm tiftəl-nāwän.

³⁶ Alähät d-inaxdimän əqqalnen i-mässi-sän dd-ifalän azli s-tišrayät n-ehäd s-ad-dd-itis ḡas, oran-as emm n-ehän.

³⁷ Təndəḡ i-eklan-en-däḡ dd-mad-agəz mässi-sän okayän ässaḡät s-tän-dd-osa-däḡ. Äsidätteḡ-awän a-s afäl tän-dd-osa, ad-ijbəs ənta iman-net, isäqqaym'-en, isəmmənsəw-tän.

³⁸ Jer-iqqäl-dd s-tišrayät n-ehäd wäla s-emäḡär, təndəḡ i-inaxdimän-wi dd-mad-agəz okayän.

³⁹ Wädden käwəneḡ iman-nāwän təssanäm a-s ənnär issan mässi-s n-ehän ässaḡät wa s-t-dd-itis emäkräd s-ehäd i-ad-ärz ehän-net, iket-di, wär-itəttəs i-ad-has-ärz emäkräd ehän-net.

⁴⁰ Käwəneḡ-däḡ, ḡaymät täsidāwäm, täḡtafäm ed Ägg-ägg-adəm, ad-dd-ass s-ässaḡät d-wär fälla-s jem.»

(Mätti 24:45-51)

⁴¹ Iggäd-dd Bətrus, innä i-Ȳisa: «Äḡalim, näkkäneḡ ḡas a tässiḡläyäd tangalt-ta-däḡ meḡ nohar-tät d-äddinät-wi iyyädnen?»

⁴² Inn'-as äḡalim Ȳisa: «Endeḡ änaxdim wa n-ägg-ärkäwäl ijarahän härät? Ənta-en-däḡ a mad-isäḡləf mässi-s ehän-net i-ad-ituzan imənsiwän i-inaxdimän-wi iyyädnen.

⁴³ Təndəḡ i-akli wa dd-mad-agəz mässi-s äddunkät däḡ-älxidmät wa däḡ-t ija, älwäqq s-t-dd-osa-däḡ.

⁴⁴ Äsidätteḡ-awän a-s wen ənta, ad-t-isäḡləf mässi-s ehäre-net iket-net

⁴⁵ māšan, ānaxdim wa innān dāḡ-iman-net: «Nākk, māssi-ḡ āhoja-hin fäll-i», oḡa ḡarāt-a-wen dāḡ-inaxdimān d-tinaxdimen ti iyyāḡḡnen, ad-tān-itəgḡat, itatt, isass əlxəmār har t-ijmāḡ ənniyāt,

⁴⁶ ānaxdim-en, ilkam ad-t-dd-iḡḡār māssi-s dāḡ-ašāl d-āssaḡāt d-wār fälla-s ija, ilməd s-erk əššāḡəl wa t-išlān a ija a-wa-dāḡ; afāl t-dd-osa, ad-t-iḡḡuzzəbət, isärtəy-t d-ināmāšrayān dāḡ-edāḡḡ wār-iha ar tahāla d-aḡəmmākārkəḡ n-isenān fāl tāmujriḡt.

⁴⁷ A-wen-dāḡ a fāl ānaxdim-wa issanān erhet n-māssi-s, āḡḡima wār t-ija, əlkamnāt dāḡ-s tiwit ājjoḡḡnen

⁴⁸ māšan, ānaxdim-wa wārān issen erhet n-māssi-s, ija a wārān oḡed, ad-ijrəw tiwit wārən əjḡət. Ere ijrawān a ājḡen, ad-dāḡ-s itwəttar a ājḡeen, ere iḡlafān a māḡḡoorān, ad-dāḡ-s itwəttar daḡ ad-dd-ikkəs a māḡḡoorān.»

Išmal n-āzzāman

(Mātti 5:25-26; 10:34-36; 16:1-4; Marḡəs 8:11-13)

⁴⁹ Inn'-asān ḡisa ḡarāt-a-wen: «Oseḡ-dd i-ad-sārḡāḡ əfew fäll-ākall, āsidārhanāḡ a-s āru d-irḡa.

⁵⁰ Ilkam dāḡ-i atwəsəlmaḡ s-wār mad-sunfāḡ fāw wār-ija.

⁵¹ Ak tāḡelām āḡafyāt a-s dd-oseḡ i-ad-t-ākḡfāḡ i-ākall? Ābo, ənneḡ-awān, tābəḡḡawt a sār-s dd-āwwāyāḡ.

⁵² ḡur-ašāl-i-dāḡ, wāla-dāḡ ehān han səmmos āddināt, ad-ənməkšārān jer-iman-nāsān, ad-əššunjun wi n-kāraḡ wi n-əssin, əššunjun daḡ wi n-əssin wi n-kāraḡ.

⁵³ Ad-ibḡəw abba d-rure-s, ibḡəw alyaḡ d-ti-s, təbḡəw anna d-elle-s, təbḡəw talyaḡt d-ma-s, təbḡəw taḡāḡḡalt d-hānne-s n-rure-s, təbḡəw tamāḡt d-taḡāḡḡalt-net.»

⁵⁴ Innā ḡisa daḡ i-tamətḡe: «Wādden e-d tənḡāyām teḡārākt təzjar-dd s-emāynāj, ad-tənnəm: «Os'-anāḡ ajənna», āj a-wen s-əmmək-wa-dāḡ s-tān-tənnām;

⁵⁵ e-d tənḡāyām daḡ aḡu wa dd-ihan s-afālla, ad-tənnəm: «Ilkam dāḡ-nāḡ ašāl ākkuusān», āj a-wen s-əmmək-wa-dāḡ s-tān-tənnām.

⁵⁶ Ālmunafəḡān a tāmoosām! Kāwāneḡ-i əssānnen teḡāre n-išmal wi n-išənnawān d-ākall, uhən-dāḡ, indar-awān ad-təfhəmām āzzāman wa fälla-wān ijān ašāl-i-dāḡ.

⁵⁷ Mafāl wār tāddobem ad-təlmədām ḡur-iman-nāwān iji n-a-wa olāḡān?

⁵⁸ E-d kāy-iḡra ere kāy-āsiwārān uḡlem s-āššāreḡa, əttār əmmək s-dār-s tānmākḡnād hārwa wār hin-tāwwəḡām ehān wa n-āššāreḡa, dihen, wār mad-kāy-irməs āḡḡ-āššāreḡa, āj'-ik dāḡ-ifassān n-əlxəkum ed, əlxəkum afāl təjḡāšād ifassān-net, ad-kāy-āj dāḡ-takārmūt.

⁵⁹ Āsidətḡeḡ-ak a-s edāḡḡ-en, wār mad-t-dd-təzjārād a təkkāsād wār ḡelād har tāmma ta kāy-irwās.»

13

Utabāt iket-di!

¹ Āmmiijrād ḡisa hārwa a-s t-dd-osān āddināt has-jānnen isālan n-aḡāras wa ija Bilatəs wa n-āmānokāl n-teje ta n-Ālyāhudəyāt i-medḡən n-Galila təzzar, issärtāy ašni-nāsān d-wa n-tikutawen-nāsān.

² Inn'-asān: «Ak tordam a-s kāl-Galila win-dāḡ ənhaynen tamāttant-ten-dāḡ səmmāt, oḡārān kāl-Galila-wi iyyāḡḡnen tumast n-ināsbākkāḡan?

³ Fāw, māšan, āsidətḡeḡ-awān kāwāneḡ-dāḡ, a-s afāl wār tātubām, ad-təjəm tamāttant šund-ten-dāḡ.

⁴ Meḡ daḡ tordam a-s medḡən wi n-māraw d-əttam hānen Yārussālam fäll-dd-oḡa āḡalla wa n-tāsahāḡt ta s-itawānna ta n-Silwi inḡ'-en, tordam a-s oḡārān kāl-Yārussālam wi iyyāḡḡnen tumast n-ināsbākkāḡan?

⁵ Fäw, mäšan, äsidätteḡ-awän daḡ a-s afäl wär tätubäm, ad-təjəm tamättant šundten-däḡ jän.»

Tangalt n-ahəšk-wa wärän infa härät

⁶ Issäḡläy-tän-dd daḡ tangalt tiyyät däḡ-hasän-innä: «Käla äddomät ähaləs ašar däḡ-ašəkrəš-net n-läxnäb, iwwäd-dd äzzäman n-tirwe-net ḡas, osä-dd i-ad-däḡ-s ijrəw a län aratan mäšan, wär t-illa a fälla-s ijrəw.

⁷ Innä i-änaxdim n-ašəkrəš: «Awätay wa s-käraḡ da-däḡ tisäḡ-dd, jaräḡ ätṭäma n-ad-əjrəwäḡ aratan däḡ-ašar-wa-däḡ mäšan, wär t-illa a t-dd-ijammädän, ämära, äxtəs-t-in ed, äsinäkmäm edägg bännan.»

⁸ Inn'-as änanaxdim: «Mässi-ḡ, ärheḡ däḡ-k ad-t-təyyəd tene-ta-däḡ ḡas, ad-äḡəšäḡ dawa-s, äjäḡ dawa-s ädanda,

⁹ iha miši s-awätay wa dd-imalän, ad-ikrəš aratan, afäl wär-ija a-wen, äxtəs-t-in.»

Äzozäy Ḳisa tamäḡt äsikäränbäy Iblis däḡ-ašäl n-əssəbət-i n-täsonfat

¹⁰ Ašäl iyyän n-əssəbət, isayra Ḳisa däḡ-ehän n-äddin wa n-käl-Älyähud.

¹¹ Təll'-e dihen tamäḡt lat märaw iwətyan d-əttam iṭṭaf-tät alšin tät-äsikäränbäyän har äbas täddobät iqqud n-tebädde-net.

¹² Inhäy-tät Ḳisa, iḡr'-et, inn'-as: «Tamäḡt, äḡib-näm, təbḡded dār-s.»

¹³ Äswär-tät ifassän-net, toḡäd tebädde-net älwäqq-wen-däḡ, ad-tiiməl Mässinäḡ.

¹⁴ Inhäy älfäqqi n-ehän n-äddin a-s äzozäy-tät Ḳisa däḡ-ašäl n-əssəbət ḡas, ijjäš-t älhäm fälla-s, inna i-tamətte: «Ajän wädden säḡis išilan a t-əllanen i-älxidmät, tisät-dd däḡ-išilan-win-däḡ, təyyəm-dd ass ašäl wa n-əssəbət-i n-täsonfat.»

¹⁵ Äwwežäb-as Ḳisa, inn'-as: «Älmunafəḡän, ajän ih'-iwän-i s-wädden itir awdes-net meḡ ešəḡ-net däḡ-ašäl n-əssəbət i-ad-t-išrəj?

¹⁶ Ma hawän-ijrawän, ad-təfhamäm ašəroj n-awdes-näwän meḡ ešəḡ-näwän däḡ-ašäl n-əssəbət-i n-täsonfat, a-s ija a-wen, indar-awän, ad-təfhəməm azuzi wa jeḡ i-tahäyawt-ta-däḡ n-Ibrahim lat märaw iwətyan d-əttam iṭṭaf-tät Iblis däḡ-tišəm-net.»

¹⁷ Innä Ḳisa a-wen ḡas, təlsa täkrakiḡt imiksänän-net iket-näsän, täqqäl-dd tamətte ənta, täddiiwät däḡ-təssəba n-timašalen-ti ähuskätnen itäjj.

Tangalt ta n-temätäwt d-täzza

(Mätti 13:31-33; Marḡəs 4:30-32)

¹⁸ Inna Ḳisa daḡ: «Ma dār-toläh Təmmənəya n-Mässinäḡ? Ma dār-tät-mad-səssiləhäḡ?

¹⁹ Toläh d-temätäwt-ta tojārät təmmətkit äddomät äwadəm däḡ-ašəkrəš, tədwäl-dd, täqqäl ahəšk, ad-zattän igḡäḡ iskak-näsän däḡ-iləktan-net.»

²⁰ Inn'-asän daḡ: «Ma dār-e-səssiləhäḡ Təmmənəya n-Mässinäḡ?

²¹ Toläh d-takməttet n-täzza təssärtäy tamäḡt d-käraḡ ännäfäḡatän n-ejel n-älkäma i-ad-ikəf iket-net.»

Emm wa kärruzän itiḡədän s-älžännät

(Mätti 7:13-14, 21-23)

²² Ifäl Ḳisa dihen ḡas, ällil iḡärman d-tidbi iket-näsnät, isayra äddinät, ija tabarät ta n-Yärussalam.

²³ Iḡla a-s has-innä ähaləs iyyän: «Äḡalim, wädden äddinät wi maden-əjjəš älzännät, wär-əjjətän?»

²⁴ Innä Ḳisa i-tamətte: «Bällänät i-ad-təjjäšäm s-äššahät tämudre ta n-tidət s-emm wa kärruzän fäl-a-s, äsidätteḡ-awän a-s äddinät äjjootnen, ad-əttärän uješ-net mäšan, ad-hasän-indär.

²⁵ Afäl ixfäl mässi-s n-ehän tashärt n-ehän fäll-iman-net, ad-dd-təbdədäm data-s ad-tät-takāwkawäm, ɣarräm-t, jannem-as: <Mändam, mändam! Arr-anäx-in emm n-ehän> mäšan, ad-hawän-änn: <Älyafyät-nāwän, wär käwän-əzzeyäx, wär əssenäx əndek siha s-dd-häm;>

²⁶ tənəm-as daɣ: <Ajän wädden, nohär dār-k išəkša d-isəswa, tössäɣräd däx-tišarriten n-iɣärman-nänäx?>

²⁷ Mäšan, ad-hawän-änn: <Ya inäsbäkkadän-i-däx, näkk ya wär käwän-əzzeyäx, äjəjät-ahi.>

²⁸ Ašäl-wen-däx, ad-täj tahäla d-azəmmäkärkəz n-isenän fäl tämujrizt, ed ad-tənhəyäm Ibrahim d-Isxaqq d-Yaqub d-ännäbitän iket-däx-näsän äqqiimän däx-Təmmənəya n-Mässinäx, a-s ija a-wen käwäned, ejer a-hin-mad-tətwəjjəm däx-žohännäma.»

Täɣart-ta jän ulhawän n-käl-Yärussälam

²⁹ «Ašäl-en, ad-dd-əfələn äddinät emäynäj d-atäram d-afälla d-ajus, änxəymən däx-amäjaru wa madän-äj däx-Təmmənəya n-Mässinäx.

³⁰ Ašäl-en, ənhəywät! Wi hānen ajilal, ad-izarän, wi äzzarnen, ad-əjjəšan ajilal.»

Tälläbäst ta ija Harudəs

(Mätti 23:37-39)

³¹ Ohäzän-t-dd härät däx-käl-faris, ənnän-as: «He käyy, jawäð fäl-a-s, irha Harudəs ad-äj iman-näk.»

³² Inn'-asän: «Äglät, ännät i-isəm n-ebägg-di a-s näkk, takkäsäx alšinän däx-äddinät, zizuyäx ašäl-i-däx d-ašəkka, ašäl wa s-kärað, ad-imdew a-wa hi-išlän.

³³ Äduuttät a-s əkkeɣ Yärussäläm ašäl-i-däx d-ašəkka d-ašäl-wen fäl-a-s, wär-ämmukkän ad-ib' ännäbi däx-edägg säl Yärussäläm.»

Ilha ʒisa fäll-Yärussälam

(Mätti 23:13-39)

³⁴ Innä ʒisa: «Yärussäläm, ya Yärussäläm! Tamäskoyt kämm-i täjjät iman n-ännäbitän, hakkäd sämmäjori n-tihun inəmmušal wi sār-m dd-äšmašäl Mässinäx, əndek ɣas a-wa-däx wär jeɣ däx-utär n-asdu n-imuzäxän-näm šund a-wa täjj tekäzzit i-ikärtän-net daw-tafriwen-net mäšan, tössəndäräd-ahi.

³⁵ Ämära, isälan əmdän, ad-käwän-äyy Mässinäx d-iman-nāwän, umas aɣrəm-nāwän timšar, wär-ilkem ad-hi-tənhəyäm hundäx har ašäl wa d-mad-taləsäm tənna n-a-s: <Näkfet wa dd-osän däx-isəm n-Emäli semɣar.> »

14

Äzozäy ʒisa əhaləs s-äsiläfafäɣnät tikussawen eläm-net

¹ Ašäl iyyän daɣ n-əssəbət-i n-täsonfat, ikla ʒisa ɣur-iiyyän däx-imänokalän n-käl-faris, jan-as dihen äddinät iket-näsän ənniyät.

² A əndärrän əhaləs iyyän da-däx s-äsiläfafäɣnät tikussawen taɣəssa-net iket-net,

³ issəstän ʒisa käl-faris d-älɣulam-wi t-əllänen dihen: «Ak xälal meɣ xāram, ad-izuzəy äwadəm ämarhin däx-ašäl n-əssəbət-i n-täsonfat?»

⁴ Wär t-illa a has-ənnan ɣas, idäs ämarhin, äzozäy-t, issəgl'-e.

⁵ Inn'-asän ɗarät-a-wen: «Əndek däx-wän wa s-afäl oda rure-s meɣ awdes-net däx-anu ašäl wa n-əssəbət-i n-täsonfat ad-t-äyy däx-s har akəy ašäl-en təzzar?»

⁶ Äbä-hasän-dd a has-ənnän.

Asrəs n-iman d-imäjarän

⁷ Ijräh-in ʒisa asənnəfrən wa täjjän imäjarän i-idäggan wi ännufläynten däx-ehän ɣas, issäɣläy äddinät-wi dd-əklänen dihen tangalt, inn'-asän:

⁸ «E-d kăwăn-ăsmăjarăt äwadəm s-edăgg n-azli, wăr täsnăfrănăm idăggan-wi t-ellänen s-data ed, äddobăt ad-dd-ass äwadəm kăwăn-øjărăn atwəsəmçăr,

⁹ änn'-awăn măssi-s n-ehăn, ad-tənkărăm, təkfəm-t edăgg. Ad-hawăn-umas a-wen tăkrakiđt ed, ad-kăwăn-təhhuşşəl tebädde dat-äddinăt iket-năsăn, tăqqələm çara-săn.

¹⁰ Ufa a-s kăwăn-dd-ăsmăjarăt äwadəm, ad-təkkəm çarăt äddinăt iket-năsăn, tăqqayməm, dihen, afäl dd-ijjăş măssi-s n-ehăn, inhăy dihad tăqqimăm, ad-kăwăn-dd-içăr, änn'-awăn: <Ëyyăwăt, çaymăt s-data.> Ad-hawăn-umas a-wen semçar măqqoorăn dat-äddinăt wi dăr-tăniçäymăm.

¹¹ Ere idkălän iman-net ad-irəs, ere äsrăsăn iman-net, ad-itwəsəmçăr.»

¹² Innă Ÿisa çarăt-a-wen i-u-faris wa t-dd-ăsmăjaren: «E-d dd-simjurud äddinăt s-ehăn-năk, s-aşäl wăla s-ehăđ, wăr dd-tăsmăjared imidiwăn-năk d-ayətma-k d-işäqqaçăn-năk d-ănhăräjăn-năk wi lănen hărăt fäl-a-s, əntăneđ, äddooben ad-hak-dd-suçələn azăbăna,

¹³ änn-ak, e-d, tărhed asəmməjəru n-äddinăt, äçăr-dd tiläqqiwen d-imăsçätăçăn d-inəbdan d-iməddorçal.

¹⁴ Təndəđ-ak ed, əntăneđ wăr-äddoben ad hak-əçələn älçer wa hasăn-jed, Măssinăç a çur-hak-t-əllan imraş n-a-wa jed aşäl wa n-tebädde.»

Isălan n-amăjaru wa măqqărăn (Mătti 22:1-10)

¹⁵ Isl' iyyăn dăç-imăjarăn i-a-wa inna Ÿisa ças, inn'-as: «Təndəđ i-ere wa madăn-ăkş dăç-imçora-wi madăn-ăj dăç-Təmmənəya n-Măssinăç.»

¹⁶ Inn'-as Ÿisa: «Kăla t-illa ähaləs ijăn amăjaru-i-dăç măqqărăn, äsmăjarăt-dd săr-s äddinăt äjjootnen.

¹⁷ Ämmujnen imənsiwăn ças, äşmaşäl änaçdim-net s-äddinăt wi dd-içra i-ad-hasăn-änn: <Hărătăn ämmujnen, tăwwăçăm-anăç>

¹⁸ măşan, ässălähăn-as isoran iket-dăç-năsăn. Inn'-as wa äzzarăn: <Iket əžžənşăç aşəkrəş, ärheç ad-t-asăç, ənhəyăç-t təzzar, äns'-ahi-dd.>

¹⁹ Inna wa iyyădăn: <Iket əžžənşăç măraw iwdesăn-wi s-mad-ăçdəmăç išəkraş-in, ärheç ad-tăn-arəməç təzzar, äns'-ahi-dd.>

²⁰ Inn'-as wa s-kărad: <Iket dd-əççəçlăyăç, wăr-äddobəç ad-hin-asăç.>

²¹ Iqqăl-dd akli, ij' isălan i-măssi-s ças, ijjăş-t älhăm fäll-äddinăt-win-dăç; innă i-änaçdim-net ämăra: <Aşəl şik, ilal tişarriten, təlwəyăd-dd tiläqqiwen d-inăçyabăn d-iməddorçal d-imăsçätăçăn.>

²² Igl' änaçdim, iqqăl-dd, inna i-măssi-s: <Măssi-ç, a-wa tənneđ ija măşan, ehăn, ih' e edăgg hărwa.>

²³ Inn'-as măssi-s: <Ëççəl şik, ilal tişarriten, äkk attayăn n-ifərjan, şəhhəşşəl äddinăt ad-dd-asən i-ad-içnəy ehăn-in.>

²⁴ Ëçmanăç-awăn a-s meddən-winnin-dăç dd-ăsmăjareç s-tizarăt, wăr tăn-e-ijjəş-i madăn-ikrəbbət imənsiwăn-in.> »

Ălçim wa ihăn alkum i-Ÿisa

²⁵ Innăđ-dd Ÿisa s-tamətte ta tăjjet has-təlkămăt, innă:

²⁶ «Ere irhăn alkum-hahi, a-s ija a-wen, wăr tojer tărha ta hi-ija ta ija i-abba-net, d-anna-net, d-hănnə-s, d-aratăn-net, d-ayətma-s, d-şätma-s d-iman-net, wăr-äddobăt ad-umas änătçalib-in.

²⁷ Ere wărăn äsdăw i-alənçi n-tajəttewt-net ta n-taməttant i-ad-hi-ilkəm, wăr-äddobăt ad-umas änătçalib-in.

²⁸ İndek dăç-wăn wa s-wădden afäl irha edey n-ehăn, ad-äççayəm təzzar ixşəb äłçim n-a-wa dăç-s mad-ăkş təzzar isănt edey-net,

²⁹ afäl wär ija a-wen, ad-isänt ässas n-ehän, indär-as ad-t-in-isəmdəw, əjən-t äddinät tadäzza

³⁰ ed, ad-ənnən: <Wa äwadəm, issəntä edey n-ehän, indär-as ad-t-in-isəmdəw.>

³¹ Ajän wädden e-d irha ämänokal ad-ijäd amidi-net, ad-issən äddobät ad-ikrəš fälla-s ašäl ənta-i ilän märaw afdän n-əhaləs fäll-ämänokal wa dār-mad-iknəs-i ilän ənta sənātät timərwen n-efäd n-əhaləs.

³² Afäl inhäy a-s a-wen wädden a dār-äddobät amjār, ad-išəmmišəl sār-s älzämaḡät n-älxer, ittār dāḡ-s əmmək n-älḡafyät härwa-dāḡ ogaz.

³³ A-wen-dāḡ a fäl hawän-janneḡ, ere wa dāḡ-wän wärän iksen a-wa ila iket-net, wär-äddobät ad-umas änättalib-in.

(*Mätti 5:13; Marḡəs 9:50*)

³⁴ Tesəmt, härät olaḡän mäšan, afäl tät-təjmäd temde-net, ma s-tät-e-isəsməm äwadəm?

³⁵ Ad-äbas tənfa äkall wäla ädanda, ad-hin-tädf ḡas.

Ere ilän timəzzujen s-islä-dāḡ, isäjdet!»

15

Tehäle ta äba, tətəjrāw-dd

(*Mätti 18:10-14*)

¹ Tisən-dd inarmasän n-tiwse d-erk äddinät äjjootnen ḡisa i-ad-has-əslən.

² Ənhäyän käl-faris d-älḡulam n-Ättäwrät a-wen ḡas, ad-simtəktikän, jannen: «Ak, təjrahäm-in anḡim d-tihra ta itäj d-erk äddinät?»

³ Issäḡläy-tän-dd ḡisa tangalt dāḡ-hasän-inna:

⁴ «Əndek dāḡ-wän wa s-afäl ila temede n-tehäle har dāḡ-snät tässujäl tiyyät, wädden ad-äyy ti n-təzzayät timərwen d-təzzayät əfradnät, igləw, isəssəjjəl ta dāḡ-s äba har tät-dd-ijrəw?

⁵ Afäl tät-dd-ijrəw, ad-tät-isəwär izərhan-net ikna tedäwit,

⁶ afäl hin-iwwäd ihänan, ad-dd-iḡār imidiwän-net d-änhäräjän-net, änn'-asän: <Əyyäwät, ährät dār-i tedäwit, tehäle-nin ta tässujälät, əjrəwāḡ-tät-dd.>

⁷ S-əmmək-wen-dāḡ daḡ a fäl, ässiilmädāḡ-kāwän a-s, ad-tajār tedäwit ta madät-täj dāḡ-išənnawän dāḡ-təssəba n-iyyän anäsבַּקְקָאד ätubän, uhən i-təzzayät timərwen n-äwadəm d-təzza ḡur-ija a-s, wär-ämḡatärän s-tätubt.

Ärriyal wa äba, ittəjrāw-dd

⁸ Wädden daḡ afäl la tamädt märaw ärriyalän n-azrəf hundāḡ har dāḡ-sän äb' iyyän, ad-särməs tefätelt, ad-tišriwit äkall n-ehän, tiskənsəkit-t hundāḡ har dd-təjrəw ärriyal-net wa äba?

⁹ Afäl t-dd təjrāw, ad-dd-sədəw timidiwen-net d-tänhäräjən-net, tänn'-asnät: <Ahärmät dār-i tedäwit, ed ärriyal-in wa äba, əjrəwāḡ-t-dd.>

¹⁰ A-wen-dāḡ a fäl hawän-älḡeḡeḡ a-s, tämoos tätubt n-anäsבַּקְקָאד iyyän əssəbab n-tedäwit mäqqoorät i-änjəlosän n-Mässināḡ.»

Ämawaḡ wa äba, ittəjrāw-dd

¹¹ Inn'-asän ḡisa daḡ: «Käla t-illa ähaləs ilan əssin aratan.

¹² Ašäl iyyän, osä-dd wa əndärrän ti-s, inn'-as: <Abba, akf'-ahi ejädär-in dāḡ-täkasit.> Äzun ti-sän a-wa ila jere-sän.

¹³ Härät n-išilan ḡarät-a-wen, ättužžär-in wa əndärrän ejädär-net, irmäs azrəf-net, ikk' äkall iyyän ujəjan, ällil izəjraz n-iman-net, ad-ibaxxäs a-wa ila.

¹⁴ Älwəqq wa d-ikkəykäy a-wa ittäf, oḡä-dd laz fäll-äkall wa iha iket-net, toḡäy-as tämäḡatert.

¹⁵ Iгла, ixdam xur-iyyan dax-kal-akall, assok'-e ägg-akall isokraš-net i-ad-dax-san iden elxenžaran.

¹⁶ Ij'-as laz asemmänennäd wa-dax fal dd-iqqäl isadarhan tetäte n-isökša-wi-dax tattän elxenžaran mašan, wär t-ikfa mässi-san turhajät n-a-wen.

¹⁷ Eqqälän-t-dd iman-net ašäl iyyän, äznäzjamät, innä: <Näkk-i-dax, ma hi-ijän dax a-wa? Ajän wadden a-wa ila abba-nin dax-inaxdimän ijarräw a ikša har t-isössiköy, uhön-dax näkk, näkk-da-dax, isimnennid-ahi laz;

¹⁸ äddäbara, ad-önkäraḡ, äqqäläḡ abba-nin, ännäḡ-as: Abba, änmäšräyāḡ i-Mässinäḡ, äbodäräḡ-käy,

¹⁹ äbas änihäjjäḡ d-ad-itwönn rure-k a ämoosäḡ, äj'-ahi iyyän dax-inaxdimän-näk.>

²⁰ Ibdäd, iqqäl akall wa iha ti-s. Ikkä-dd ehän dax-ijöj a-s t-ojja ti-s, tänx'-e tähanint-net, ošäl sär-s, or'-as ifassän-net, oḡä dax-san, ad-t-itisös dax-ijerjar-net, itimöllut-as.

²¹ Innä alyad älwäqq-wen i-ti-s: <Abba, änmäšräyāḡ i-Mässinäḡ, äbodäräḡ-käy, äbas änihäjjäḡ d-ad-itwönn näkk rure-k.>

²² Iyrä-dd ti-s inaxdimän-net, inn'-asän: <Ašälät tärmaḡ, awöyät-dd anäkäbba wa ufän, töjem-as-t, äjät taḡhot dax-assökäḡ-net, tökföm-t tifädelen äynaynen,

²³ ärmösät-dd ašjar wa ojarän tadhont, täxrosäm-as, äjet amäjaru d-äzzäho

²⁴ fal-a-s rure-ḡ wa s-käla ämmut iddar-dd, käla ässujjal mašan, ittöjräw-dd.> Essöntän eqqas d-tiḡläla älwäqq-wen-dax.

²⁵ A-s itäjj a-wen, rure-s wa n-teḡäfädde ih' isokraš. Ikka-dd dihen a-s isla i-tandiwen d-tihärdänen d-isuhax ökkän isönnawän,

²⁶ iyrä-dd iyyän dax-inaxdimän, issöstän-t d-a-wa ijän,

²⁷ inn'-as äanaxdim: <Äñḡa-k, ad-dd-iqqälän, inḡ'-as ti-k ašjar wa iddären ed, iqqäl-t-dd rure-s, iddar-iḡlas.>

²⁸ Ojal, unjäy s-ad-dd-ijjöš ehän. Ikk'-e-hi-dd ti-s, ad-t-isalḡad.

²⁹ Inna i-ti-s: <Wadden näkk, a ilan iwötyan öšḡaläḡ-äk, wär käla änmäšräyāḡ i-a hi-tönned mašan, wär käla hi-tökfed wäla dax-eḡäyd s-ökley näkk d-imidiwän-in

³⁰ mašan, iqqäl-dd rure-k wa hin-ibxäsän azrəf-näk dax-tälkäxbaten ḡas, täxrasäd-as i-ašjar-wa iddären.>

³¹ Inn'-as ti-s: <Alyad-in, käyy, wär käla hi-fäläd, a-wa öley iket-net i-näk

³² mašan ašäl-i, änihäjja s-ad-näj amäjaru d-äzzäho, fal-a-s äñḡa-k wa s-käla ämmut, iddar-dd, käla ässujjal mašan, ittöjräw-dd.> »

16

Änazraf-wa wär töha taflest

¹ Innä ḡisa dax i-inöḡtulab-net: «Käla t-illa ähalös n-amärrözäḡ dd-osän äddinät, öjän dax-s isälan n-ömmök wa s-ibaxxäs änazraf-net ehäre-net.

² Issäxr'-e-hi-dd, inn'-as: <Käyy, ma ämoos a-wa salläḡ fälla-k? Siḡen-ahi ehäre-nin ed, äbas ärheḡ öššäḡel-näk.>

³ Innä änazraf älwäqq-wen-dax dax-iman-net: <Endek a-wa mad-äjäḡ afäl hi-ikkäs mässi-ḡ dax-älxidmät? Ajäyak n-isokraš, wär t-äddobex, tamädilt dax täsikärakäd-ahi.

⁴ Essanäḡ a-wa he-äjäḡ s-kud-dax ikkäs-ahi mässi-ḡ dax-öššäḡel, ad-hi-simöjurun äddinät dax-ihänen-näsän.>

⁵ Issäxrä-dd äddinät wi irwäs mässi-s iket-näsän, innä i-wa äzzarän: <Käyy, maniket käy-irwäs mässi-ḡ?>

⁶ Inn'-as: <Temeḡe n-bärgo n-özzäyt>. Inn'-as änazraf: <Täkarḡe-näk da ta n-ämarwas, ḡayäm, öktöb šik fälla-s, sөmmösät timөрwen n-bärgo.>

⁷ Innä i-wa iyyädan: «Käyy-i-š, ma käy-irwas mässi-χ?» Inn'-as: «Temeđe n-šaku n-älkäma.» Ikf'-e-hi-dd ənta-däχ älkad-net wa n-amarwas d-aχänib, inn'-as: «Ėktəb: əttaät timərwen n-šaku.»

⁸ Islä mässi-s n-ehäre i-amsud n-änazraf-net χas ad-t-itiməl.» Inna Ȳisa daχ: «Äduuttät a-s inəzzulam† n-äzzāman-i-däχ, ojarän imakşadän n-Mässinäχ amsud.»

Iba n-abāxas n-ehäre

⁹ Oläs daχ, inn'-asän: «Äjät imidiwän s-ehäre wa xāramän n-wälät-äddunya-ta-däχ n-āmāra, dihen, afäl fälla-wän tät-äba, ad-təjrəwäm irošan n-a-wen daχ-tämudre ta täxlälät.

¹⁰ Wa iχdälän daχ-a-wa wärän färör, ad-iχdöl daχ daχ-a-wa äjjen, wa wärän iχdel daχ-a-wa wärän färör, wär mad-iχdöl daχ daχ-a-wa äjjen.

¹¹ Afäl wär täχdeläm daχ-ärrezäχ wa xāramän n-äzzāman-wa-däχ wärän infa härät, mi käwän-madän-isäχləf ärrezäχ wa n-tidət ihän äddunya ta tēlkämät.

¹² Afäl wär täχdeläm daχ-ehäre n-äddinät wa käwän-əssäχləfän, mi käwän-madän-isäχləf wa mad-təkrəšäm daχ-äddunya-ta dd-malät.

¹³ Wär t-illa ānaxdim äddooben ad-ixdam i-əssin imālan; iyyät-i-däχ, ad-akəđ d-iyyän, ärh wa iyyädan, meχ daχ, ikf'-iman-net i-iyyän, iksən wa iyyädan. Wär-äddobät äwadəm ad-ixdam i-Mässinäχ, ošal daχ darät terše n-azrəf.»

Äsmäqqa Ȳis fäll-käl-faris

¹⁴ Ija Ȳisa mäjräd-wen-däχ χas, jän-t käl-faris tekäškäšt ed, əntəneđ əknan tārha n-azrəf.

¹⁵ Inn'-asän Ȳisa: «Käwāneđ, jam iman-nāwän äddinät oχadnen dat-dägg-adəm, māšan, Mässinäχ issan a-wa ihän ulhawän-nāwän fäl-a-s, a-wa äsihäskən dägg-adəm, tajlələht ȳur-Mässinäχ.

¹⁶ Äzzāman wa n-alāmār wa n-Mosa d-əlkəttabän wi n-ännäbitän, ibdäd ȳur-ännäbi Exya wa Enəsselmäχ, a ija a-wen-däχ, titwəjgin isālan n-Älənžil wa n-Təmmənəya n-Mässinäχ, tattārän äddinät uješ-net s-äşşahät-näsän.

¹⁷ Ojar täräχse ija ad-iba išənnawän d-äkall uhən, ad-iba wäla-däχ tätbäqqet tiyyät χas daχ-alāmār n-Mässinäχ.

¹⁸ Ere hin-äzmäzzäyän hāne-s, oläs adubən n-iyyät, ilmədet a-s izna, ere daχ wa ädobänän taməđt dd-tämmizzäyät, ilmədet a-s izna ənta-däχ.»

Tangalt ta n-amärrəzäχ d-Lazar wa n-taläqqe (Mätti 19:1-12; Marqəs 10:1-12)

¹⁹ Inn'-asän daχ: «Käla t-illa ähaləs n-amärrəzäχ s-hak ašäl äsisahäχ ašäl daχ-isəlsa wi äsmäχmäχnen, länen älqim, izha, änufläy, äyyiwän.

²⁰ A-s itäjj a-wen-däχ, ins' ähaləs n-taläqqe s-isəm-net Lazar dat-əmm n-ehän-net, əlsanät tikussawen daχ-iffay arəssuđ eläm-net.

²¹ A-wa has-ija əlläqqu, isadārhan ad-äkš a-wa dd-ititrəkkin daχ-imənsiwän wi itätt amärrəzäχ māšan, wär t-ijärrew; äddeew-as a-wen d-afdärfädär wa jänät tikussawen fäll-taχəssa-net hundäχ har dd-əqqälän iyyädan talläχän-tänät.

²² Har ašäl wa d-tämmut taläqqe, äwwäyän-tät änjälosän s-Ibrahim daχ-älžännät, ämmut amärrəzäχ ənta-däχ, izka.

²³ Iha tisənsa ti n-žohännäma-en-däχ ihannäy aχāna a-s idkäl asäwađ-net, ojj' Ibrahim ill'-e Lazar edes-has.

† 16:8 16:8 – Ȳur-käl-Älyähud, ere wärän ämoos ägg-Älyähud s-aläšäl meχ ere wärän ilkem i-äddin-näsän, iket-net, änəzzalim a ämoos. A-wen-däχ a fäl tiwsaten ti iyyäđnen iket-näsänät, ti n-inəzzulam. — Ašäl-i-däχ, änəzzalim, äkafär (ere wärän issen s-Mässinäχ).

²⁴ Ad-iḡar Ibrahim, ijann'-as: <Y' Abba Ibrahim, aḡen-ahi tāhanint, šemmišēl-dd sār-i Lazar i-ad-isēlmāḡ emm n-assēkāḡ-net dāḡ-aman, isēsmāḡ ilēs-in fāl-a-s, āsrākāttāt-ahi efew wa heḡ.>

²⁵ Inn'-as Ibrahim: <Alyāḡ-in, əktəw-dd a-s kāyy, tärzāḡād hullan dāḡ-tāmudre-nāk, a-s ija a-wen, Lazar, wār-inhey a sāl aḡāna, āmāra, ənta a āssismāḡdān, ānnuflāy, a-s ija a-wen kāyy, tiknənnəwid;>

²⁶ ḡarāt-a-wen daḡ, ill'-e eḡāy wārān ila ider jere-nāḡ dār-wān, wār-āddoben wi n-ḡur-nāḡ, ad-kāwān-in-əkkən, wār-āddoben daḡ wi n-ḡur-wān, ad-hanāḡ-dd-əkkən kud-tārham-dāḡ.>

²⁷ Inn' āhalēs āmāra: <Adiš abba, dalāḡ-kāy d-ad-šemmišēlād Lazar s-ehān n-abbanin

²⁸ fāl-a-s, leḡ səmmos āḡḡatān i-ad-tān-isəmmətār, udaḡ ad-dd-əjjəšān edāgg-wa-dāḡ n-tissust.>

²⁹ Inn'-as Ibrahim: <Wādden lan Mosa d-ānnābitān-wi iyyāḡnen, səjədnet-asān.>

³⁰ Inna i-Ibrahim: <Ābo! Abba Ibrahim, afāl tān-dd-iqqāl ere dd-inkarān jer-inəmmuttan, imməjrād-asān, ad-utabān.>

³¹ Inn'-as Ibrahim: <Afāl wār-āsḡādān i-ānnābi Mosa d-ānnābitān wi iyyāḡnen, wār mad-utabān kud-hasān-ija āwadəm dd-inkarān jer-inəmmuttan isālan-dāḡ.> »

17

Anməšri d-əssəbab-net

(Mätti 18:6-7, 21-22; Marḡəs 9:42)

¹ Innā ḡisa ḡarāt-a-wen i-inəḡḡulab-net: «Tanməšrayt, ad-tajj ḡas, māšan, iməskay käl-əssəbab-net.

² Wa has-issəbābān, iššām-as-in, ad-tətwāḡḡən tāhunt ta s-itəzḡad ālkāma dāḡ-err-net, itwəjār-in dāḡ-ejārew wa səmmān, uhən ad-umas əssəbab n-tanməšrayt i-iyyān dāḡ-inəḡḡulab-in.

³ Āḡāt ənniyāt i-iman-nāwān: afāl kāy-idlām āḡḡa-k, āḡtəl-t, kunta āmmujrāz, ānš'-as.

⁴ Afāl hak-ija əssa udlemān dāḡ-ašāl, ij'-ak-dd əssa uḡlawān dāḡ-dāḡ-k itattār tenāšše, ānš'-as.»

Ālfäyda n-immun s-Mässināy

⁵ Ənnān inəmmušal i-ḡisa: «Ālḡalim, siwəḡ immun-nānāḡ.»

⁶ Inn'-asān Ālḡalim ḡisa: «Afāl lam immun ogdāhān d-temātāwt ta tojārāt təmmətkit dāḡ-idommān, ad-tudabem ad-tənnəm i-ahəkš-wa-dāḡ: <Ēlbəy-dd iman-nāk, sāḡtəd-tān dāḡ-ejānš>, ad-āj a-wa has-tənnām.

⁷ Əndek dāḡ-wān wa s-afāl t-dd-odwa akli-net wa āssixdām dāḡ-ašəkrəš-net, meḡ wa āsḡān arəzzej-net, ad-has-ānn: <Ēyyāw mānsāw>,

⁸ wādden a has-mad-ānn: <Sāḡḡ'-ahi-dd a əkšəḡ, təjəd isəlsa-nāk wi n-ālxidmāt, təkfəd-ahi amənsi har ākšāḡ, āswāḡ təzzar, təkšəd, təswəd kāyy.>

⁹ Tordam a-s āhalēs-en-dāḡ, ill'-e a mad-umay i-akli-en-dāḡ, ijān a-wa t-iwarān?

¹⁰ Kāwāneḡ-dāḡ, e-d jān a-wa s-hawān-ätwānnā, ānnāt: <Nākkāneḡ, jer-t-nəlla wāla wār t-nəlla, eklan ḡas a nāmoos, wār nəja ḡas ar a-wa hanāḡ-iwarān.> »

Āzozāy ḡisa mārāw meddən ijraw jəri

¹¹ Ālwāḡḡ wa d-ikka ḡisa Yārussālam, āllil zābo wa ikkān jer-teje ta n-Sāmari d-ta n-Galila.

¹² Ijāš-dd tadābayt tiyyāt ḡas, əlkāḡdān-as-dd mārāw meddən ijraw jəri, əbdādān-as dihen,

¹³ əḡkālān imāslan-nāsān, ənnān-as: «Ālḡalim ḡisa! Aḡen-anāḡ tāhanint.»

¹⁴ Inhäy-tän, inn'-asän: «Äglät, säknät iman-näwän i-käl-tikutawen.» Eglan härwa a-s ezzäyän iket-näsän, šaddijän.

¹⁵ Inhäy iyyän däx-sän a-s izzäy xas, iqqäl däx-adäriš-net, idkäl emäsli-net, ad-itiiməl Mässinäx.

¹⁶ Osä-dd, irkäx dat-ÿisa, ad-has-itumay, ähaləs-en, i n-teje ta n-Sämari.

¹⁷ Innä ÿisa: «Ajän wädden märaw meddän a ezzäyenen, ma jän tözza wi iyyädnen?»

¹⁸ Xas wär tän-dd-izjer fäw ere dd-iqqälän i-ad-aməl Mässinäx ar amäjar-wa-däx?»

¹⁹ Innä ÿisa i-ähaləs qarät-a-wen: «Ebdəd, ögləw, ixläs-käy immun-näk.»

Išmal wi n-Təmmənəya n-Mässinäx

(Mätti 24:23-28, 36-41)

²⁰ Essəstänän käl-faris ÿisa, ənnän-as: «Emme dd-mad-təzzubbət Təmmənəya n-Mässinäx?» Inn'-asän: «Təmmənəya n-Mässinäx, wär mad-dd-täj ass ilan mänhoy,

²¹ wär mad-itwənn: «Enta da», wäla: «Enta den», fäl-a-s ädduuttät a-s, Təmmənəya n-Mässinäx, təll'-e jere-wän.»

²² Innä i-inəttulab-net qarät-a-wen: «Elkamän išilan däx-mad-səddärhənäm ahänay n-Ägg-ägg-adəm kud-däx i-ašäl iyyän xas, mäšan, wär t-mad-tənhəyäm.

²³ Afäl hawän-ätwänna: «Enta den», mex: «Enta da», wär töglem, wär təkemäm i-a-wen

²⁴ fäl-a-s, Ägg-ägg-adəm, ass-net, ad-aläh d-essam-i s-e-d issäm däx-ašrut iyyän n-išənnawän, ad-isəmmələwləw ašrut wa iyyädän.

²⁵ Mäšan, wär mad-äj a-wen ar s-ad-inhöy tersəmmawen, təkkuddəl-t əzzurəyät-ta-däx təzzar,

²⁶ fäl-a-s, a-wa ijän däx-išilan wi n-ännäbi Nox, a madän-äj dağ däx-išilan-wi dd-mad-iqqəl Ägg-ägg-adəm.

²⁷ Äzzäman wa n-ännäbi Nox, tayəwanän äddinät, sassän, tidubunän, sidubunän har ašäl wa d-ijjäs Nox turäft n-aman ta mäqqarät s-has-innä Mässinäx a tät-ikən, ođän-dd fälla-sän aman wi n-đuf, əlhäsän-tän iket-däx-näsän.

²⁸ Šund a-wen-däx dağ a ijän däx-išilan wi n-Lut, tattän äddinät, sassän, žanšen, satajän, tidumun, təddayän ihänan

²⁹ har ašäl wa d-izjār Lut axrəm wa n-Sodoma, iffäy-dd fälla-sän Mässinäx ajənnä n-efew d-əlkəbrit, ilhäs-tän iket-däx-näsän.

³⁰ Šund a-wen-däx a madän-äj ašäl wa dd-mad-iqqəl Ägg-ägg-adəm.

³¹ Ašäl-en, wa iwarän afälla n-ehän, wär dd-itəzəbbutet i-ad-iđkəl ilalän has-hanen ider n-ehän; wa ihan ašəkrəš-net dağ, wär-itəqqälet ehän,

³² wär hin-təttəwäm a-wa ijrəwän hənne-s n-Lut.

³³ Ere wa wärän idgež ar däx-ajärəw n-iman-net däx-äddunya-ta-däx, ad-ifut däx-älžännät, mäšan, əwadəm wa irdän əfota däx-iman-net, däx-äddunya-ta-däx, däx-äddimmät-in, ad-iyləs.

³⁴ Ässiilmädäx-kəwän s-ehäd-wen-däx, ad-ənsan əssin meddän fäll-asəftäx iyyän, ämmädəkäl iyyän, itwəyy-dd wa iyyädän,

³⁵ ad-təzzadnät sənätät tideđen əttəxam däx-edägg iyyän, tämmädəkäl tiyyät, tətəwəyy-dd ta iyyädät; [

³⁶ ad-əhan əssin meddän ašəkrəš iyyän, ämmädəkäl iyyän, itwəyy-dd iyyän.]»

³⁷ Essəstänän inəttulab ÿisa, ənnän-as: «Älxalim, əndek dihad-e-äj a-wen?» Inn'-asän: «Dihad t-təlla taməxsoyt, ad-itajj ellay.»

18

Tangalt ta n-tänudäft d-əlqalli wa n-enälläbäs

¹ Ij'-asän Ƴisa daɣ tangalt tiyyät dāɣ-irha ad-tän-isəlməd a-s lan s-ad-təddalän Mässināɣ hārkuuk, wār dāɣ-s təkəkəsän ätṭāma.

² Inn'-asän: «Kāla t-illa aɣrəm ih' ālqalli wārən äksuḍ Mässināɣ, wār-issəfrār daɣ dāgg-adəm.

³ Təll'-e daɣ dihen tānuḍäft t-dd-tiisət hak ašäl, təjann'-as: «Əkkəs-ahi tekəriḍt dāɣ-āwadəm wa hi-ohāɣän.»

⁴ Ähojā ālqalli wār tāt-in-ijreh, har šik, innä dāɣ-iman-net ašäl iyyän: «Kud-dāɣ wār-äksuḍāɣ Mässināɣ, wār-əssəfrārāɣ dāgg-adəm,

⁵ ad-əkkəsāɣ tekəriḍt i-tamäḍt-i-dāɣ hi-täsyäfāt i-ad-hi-täkf ālɣafyät.» »

⁶ Inn'-asän Älɣalim Ƴisa: «Säjdät ɣas i-a-wa-dāɣ inna ālqalli-wa-dāɣ n-enälläbäs.

⁷ Ƴas tordam a-s Mässināɣ wār-e-ikkəs tekəriḍt i-wi äsnäfrän sār-s dd-hallänen ehäḍ d-ašäl? Tordam a-s ad-hin-ähaj fälla-sän?

⁸ Äbo! Älleɣeɣ-awän a-s, ad-hasän-ikkəs tekəriḍt šik māšan, tordam fāw s-ašäl wa dd-mad-iqqəl Ägg-ägg-adəm, ad-dd-agəz immun fäll-ārori n-äkall?»

Tangalt ta ija Ƴisa fäll-u-faris d-u-tiwse

⁹ Issäɣläy Ƴisa ḍarät-a-wen tangalt äddinät wi ordänen iman-näsän iqqud, a-s ija a-wen, əlkähän imidiwän-näsän, inn'-asän:

¹⁰ «Kāla əkkän əssin meddən ehän n-ämudd wa mäqqārən i-ad-umadän, äɣbədän Mässināɣ. Iyyän u-faris, wa iyyädän änarmas n-tiwse.

¹¹ Osän-in ɣas, ibdäd wa n-u-faris, ad-itumad, ijanna dāɣ-iman-net: «Äjoḍäyāɣ-ak Mässināɣ fäl-a-s, wār-olehäɣ d-äddinät-wi iyyädnen n-imäkräḍän d-iməzzəna, wār-olehäɣ daɣ d-u-tiwse-wa-dāɣ,

¹² tuzamāɣ əssin išilan dāɣ-əssəboɣ, takkäsāɣ tämukäst n-a-wa jarrāwāɣ iket-net.»

¹³ A-s itäjj a-wen u-tiwse ənta, ibdad dihen, təgdal-as täkrakiḍt wāla ad-iḍkəl asāwaḍ-net, äsninän iman-net, ijanna ənta: «Ya Mässināɣ! Səsməḍ fäll-i, əkrəšäɣet data-k idəm näkk-i n-anəsbäkkäḍ.» »

¹⁴ Inn'-asän Ƴisa: «Älleɣeɣ-awän a-s u-tiwse-wa-dāɣ, a-s iqqəl ehän-net, ijraw idəm wār-ijrew u-faris dat-Mässināɣ. Ere iḍkälän iman-net, ad-irəs, ere daɣ wa äsräsän iman-net, ad-t-iḍkəl Mässināɣ.»

Ija Ƴisa älbāraka dāɣ-aratän

(Mätti 19:13-15; Marqəs 10:13-16)

¹⁵ Ämmewäyän-dd ḍarät-a-wen imärkäsän s-Ƴisa i-ad-dāɣ-sän äj älbāraka, māšan, ənhäyän inəṭṭulab-net a-wen ɣas, äkläwläwän fäll-imärawän-näsän.

¹⁶ Iyr'-en-dd Ƴisa s-iman-net, inn'-asän: «Äyyät aratän ad-hi-dd-əkkən, wār tän-in-tāwweɣäm fäll-i fäl-a-s Təmmənəya n-Mässināɣ, äddinät-wi dār-sän änifäqqänen a-s tāt-ihakk.

¹⁷ Äsidätteɣ-awän a-s ere wārən iqbel Təmmənəya n-Mässināɣ s-əmmək wa s-tāt-mad-iqbəl ara, wār tāt-mad-ijjəš.»

Äddunya meɣ əlaxärät?

(Mätti 19:16-30; Marqəs 10:17-31)

¹⁸ Osä-dd älfäqqi iyyän n-käl-Älyähud Ƴisa, inn'-as: «Älɣalim wa oläɣän, ma s-leɣ s-ad-t-äjäɣ i-ad-əkkusāɣ tämudre ta täylälät?»

¹⁹ Inn'-as Ƴisa: «Mafäl hi-ɣarräd s-isəm: Wa oläɣän? Wār t-illa ere oläɣän säl Mässināɣ.

²⁰ Wädden təssanäd alämärän-net: «Wār jed əzzəna, wār jed iman, wār tokeräd, wār täjjəyhäd s-bahu, səmyār ti-k d-ma-k.» »

²¹ Inn'-as älfäqqi: «Äɣdaläɣ i-a-wen-dāɣ iket-net hārwa ämoosāɣ ara.»

²² Isla ʃisa i-mäjräd wa ija ʃas, inn'-as: «Härät iyyän a hak-in-äba: tužžär-in a-wa led iket-net, tužanäd-t i-tiläqqiwen i-ad-təjrəwäd ärrəzäx däx-älžännät, dihen, əqqəl-dd, əlkəm-ahi.»

²³ Isl' älfäqqi i-a-wen ʃas, ənxäsän iman-net ed ila ehäre n-tikunen.

²⁴ Inhäy-t ʃisa änxäsän iman-net ʃas, innä: «Unhh! Ažwi ija i-ere irzaxän ujəš n-Təmmənəya n-Mässinäx!

²⁵ Ojār täräxse ta ija i-amnəs ujəš s-tiṭṭ n-änazmay uhən i-ere irzaxän ujəš n-Təmmənəya n-Mässinäx.»

²⁶ Ənnän-as äddinät-wi has-äsijädnen a-s inna a-wen-däx: «Adiš mi madän-iyləs.»

²⁷ Inn'-asän: «A-wa wär-äsmäkkänän dägg-adəm, äddoobät-t Mässinäx.»

²⁸ Iggäd-dd Bətrus, inn'-as: «Näkkäneḍ-i-š oyyänen ihānan-nänäx nəlkäm-ak, əndek isälan-nänäx, ma s-ilkam ad-t-nəjrəw?»

²⁹ Inn'-asän ʃisa: «Äsidätteḡ-awän a-s wär t-illa däx-wän-i madän-äyy ehän-net meḡ hāne-s meḡ ayətma-s meḡ imärawän-net meḡ məddana-s däx-təssəba n-Təmmənəya n-Mässinäx

³⁰ s-wädden, ad-ijrəw a ännuḍfäsän fäll-a-wen däx-äddunya-ta-däx, ijrəw day təmudre ta täḡlälät däx-äddunya ta dd-malät.»

*Äsihe wa s-käraḍ d-itaj ʃisa isälan n-tamättant-net d-tanäkra-net
(Mätti 20:17-19; Marqəs 10:32-34)*

³¹ Ikkäs-dd ʃisa ḍarät-a-wen inəṭṭulab-net wi n-märəw d-əssin s-takše, inn'-asän: «Ənhəywät, näkkäneḍ-da hi-əkkänen Yärussälam i-ad-itbət a-wa əktäbän ännäbitän däx-isälan n-Ägg-ägg-adəm

³² fäl-a-s, ad-t-əjən ayətma-s däx-ifassän n-inəzzulam,† əjən-t tekäškäšt, səmmäḍrəyän-t, sutəfən fälla-s,

³³ əjən däx-s tiwit, əjən iman-net məšan, ašäl wa s-käraḍ ḍarät tamättant-net, ad-dd-inkär jer-inəmmuttan.»

³⁴ Ij'-asän ʃisa mäjräd-wen-däx məšan, wär t-illa a däx-s əjrahän ed, ättunkäl-asän älmäxna-net, wär-əjrehän a-wa däx-hasän-ässewäl.

*Emədderyəl-wa äzozäy ʃisa
(Mätti 20:29-34; Marqəs 10:46-52)*

³⁵ Älwäqq wa d-hin-ohäzän taḡrəmt ta n-Žärriko, əkkän-dd edes i-emədderyəl äqqiimän däx-asälim n-zäbo, itattär takute däx-äddinät.

³⁶ Islä i-täkat ta ja tamətte ʃas, issəstän d-a-wa ijän.

³⁷ Ənnän-as äddinät: «ʃisa wa n-Näširät a okayän.»

³⁸ Äšxärät, innä: «Ya ʃisa wa n-Ägg-Dawəd, aḍən-ahi təhanint!»

³⁹ Äḡtälän-t äddinät-wi äzzarnen i-tamətte i-ad-hin-isusəm məšan, äšxärät s-afälla: «Ya Ägg Dawəd, aḍən-ahi təhanint!»

⁴⁰ Ibdäd ʃisa, omär s-ad-sär-s dd-ättälwäy. Os'-e-hi-dd emədderyəl ʃas, issəstän-t, inn'-as:

⁴¹ «Ma s-tärhed ad-hak-t-äjäx?» Inn'-as emədderyəl: «Älyalim, aləsäḡet ahānay.»

⁴² Inn'-as ʃisa: «Ənhəy! Iyläs-käy immun-näk.»

⁴³ Inhäy älwäqq-wen-däx, ilkäm i-ʃisa, ad-itiiməl Mässinäx, tiiməl day tamətte ta tənhäyät a-wa ijän Mässinäx fäl tiḡusay n-ijitän-net.

† 18:32 18:32 – ʃur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyäḍnen iket-näsnät, ti n-inəzzulam. — Ašäl-i-däx, änäzzalim, äkafär (ere wärän issen s-Mässinäx).

19

Isälan n-Zakøyyu wa n-ajəzzəlu

¹ Ijjäš ʔisa aɣrəm wa n-Žərriko, ällil-t.

² A əndərrän ähaləs n-amərrəzəɣ n-ämänokal n-inarmasän n-tiwse s-isəm-net Zakøyyu da-däɣ,

³ itattär əmmək s-inhäy ʔisa afäl okäy mäšan, tənjar-as-t tamətte ed, i jəzzəlän.

⁴ Ošäl, äzzar i-tamətte, iwwän ahəšk s-isəm-net sikamur i-ad-isənnəfləy däɣ-ʔisa, afäl ikka dawa-s.

⁵ Iwwäd-dd ʔisa dihen ɣas, idkäl asəwəd-net, inn'-as: «Zakøyyu! Zubbət-dd šik, ašäl-i, ämijareɣ-ak.»

⁶ Äzzubbät-dd Zakøyyu šik, äsməjarät ʔisa däɣ-tedäwit.

⁷ Ənhäyän äddinät a-wen ɣas, ad-simtəktikän, jannen: «A-wa, äbä-has ere ɣur-äzzubbät ar anəsbäkkad-wa-däɣ.»

⁸ İbdäd Zakøyyu dat-Äɣalim ʔisa, inn'-as: «Äɣalim, hakkäy tiləqqiwen təzune n-ehäre-nin, kunta daɣ ill'-e ere s-käla däɣ-s ohäɣäɣ ehäre-net, siɣuläɣ-as-t ija əkkoz inədfusän.»

⁹ İnnä ʔisa älwäqq-wen-däɣ däɣ-isälan n-Zakøyyu: «Ašäl-i-däɣ, ehän-wa-däɣ, ijjäš-t-dd əɣəllas, ed ähaləs-i-däɣ, ənta-däɣ ahäya n-ännäbi İbrahim a ämoos

¹⁰ fäl-a-s, Ägg-ägg-adəm, osä-dd, immaɣ i-äddinät-wi ässujjalnen i-ad-tän-iɣləs.»

Tangalt ta n-isuf wi itäjj Mässinäɣ

¹¹ Ənhäyän äddinät ʔisa d-inəttulab-net han attayän n-Yərussälam ɣas, äɣelän älwäqq wa d-fälla-sän dd-mad-təzzubbət Təmmənəya n-Mässinäɣ, iwwäd-dd. Təssəba n-a-wen-däɣ a fäl issäɣläy ʔisa tangalt-ta-däɣ i-wi has-äsijädnen,

¹² inn'-asän: «Käla ikk' ähaləs n-ägg-ehän äkall ujəjan i-ad-däɣ-s dd-ijrəw təmmənukəla, iqqəl-dd.

¹³ Ässawäd tekle ɣas, iɣrə-dd məraw däɣ-inaxdimän-net, hak iyyän däɣ-sän, ikf'-e abläɣ n-oräɣ təzzar, inn'-asän: «Äxdəmät s-oräɣ-i-däɣ iket-di dd-taqqäläɣ.»

¹⁴ Mäšan, fäl mikdaw-i-däɣ dār-s əjan käl-äkall-net, oyyän-t har iglä təzzar, əssəlkämän-as älzəməɣət äšimašälän s-ämänokal wa məqqārən ikka i-ad-has-ənnən: «Ähaləs-di, wär nərha ad-fälla-näɣ imnukəl.»

¹⁵ Hakd a-wen-däɣ, ijrəw-dd təmmənukəla, iqqəl-dd äkall-net; osä-dd ɣas, iɣrə-dd inaxdimän-net winnin ikfa oräɣ i-ad-ilməd a-wa ärbäxän däɣ-mamäla-näsän.

¹⁶ Os'-e-hi-dd wa äzzarän, inn'-as: «Mässi-ɣ, abläɣ-näk, ärbäxäɣ fälla-s məraw iyyäd.»

¹⁷ İnn'-as məssi-s: «Ehoyd! Änaxdim ifranän ha tafləst a təmoosäd; šəmad h'-iik tafləst däɣ-a-wärän ijət, ad-käy-səmmənukələɣ fäll-məraw iɣərman n-äkall-in.»

¹⁸ Osä-dd wa s-əssin ɗarät-a-wen, innä: «Mässi-ɣ, abläɣ-näk, ärbäxäɣ fälla-s səmmos iyyäd.»

¹⁹ İnnä daɣ i-wa: «Käyy, ad-təmnukələd fäll-səmmos iɣərman n-äkall-in.»

²⁰ Osä-dd iyyän daɣ, inn'-as: «Mässi-ɣ, abläɣ-näk, ənta da; a təgled-däɣ, əkmasäɣ-t, itwar,

²¹ jəɣ-ak tuksəda-i-däɣ məqqärät ed əssanäɣ a-s emäşşehi a təmoosäd, sikusäd-dd a wär təssətwäräd, tiləyəd-dd ašəkrəš wär täddomed.»

²² İnn'-as məssi-s: «Käyy wa-hi, erk ənaxdim a təmoosäd! A-wa-däɣ dd-izjarän emm-näk a-s käy-e-sədləmäɣ; a-s təssanäd a-s näkk emäşşehi a ämoosäɣ dd-isikusän a wär əssətwäräɣ, tiləyəɣ-dd ašəkrəš wär-äddomeɣ,

²³ mafäl wär jed əzrəf-in däɣ-bänk, dihen a-s t-dd-mad-äqqələɣ, ättilläɣäɣ härät fälla-s.»

²⁴ Innä ämänokal ɗarät-a-wen i-äddinät-wi t-əllänen dihen: <Ahäxät dāx-s ablāy wa iṭṭāf, təkfəm-t i-wa n-māraw.>

²⁵ Ğnnän-as äddinät: <Ĝnta-š wädden ila māraw?> »

²⁶ Inn'-asän Ƴisa: «Älleɣeɣ-awän a-s äwadəm wa ilän härät, ad-has-iwwaɗ māšan, wa wārän ila härät, ad-dāx-s ämahäx wāla a-wa iṭṭāf.

²⁷ <Darät-a-wen, išenja-nin winnin wären irha ad-fälla-sän əmnukələx, əlwəyät-ahi-tän-dd, täxresäm-asän dat-i.> »

Ujəš n-Ƴisa i-Yərussālam

(Mätti 21:1-11; Marqəs 11:1-11; Exya 12:12-19)

²⁸ Innä Ƴisa a-wen ɣas, äzzar-i-inəṭṭulab-net s-Yərussālam.

²⁹ Ohäz-in tidbi ti n-Bätfaži d-Bitanya, edes i-taɗaxt ta täsijätät ihəškan wi n-əzzäytun; dihen-dāx ad-äšmašäl əssin dāx-inəṭṭulab-net,

³⁰ inn'-asän: «Äkkät tadābayt ta-n data-wän, afäl tät-təjjäšäm, ad-təjrəwäm äza ojayän s-kāla wär t-iney äwadəm; arät-t-dd, təlwəyäm-t-dd.

³¹ Ere käwän-issəstänän d-a-wa fäl t-tirəm, ännät-as: <Ila dāx-s älyalim əššäxəl.> »

³² Əglän inəṭṭulab-wi äšmašäl, ogäzän-in härätän s-əmmək-wa-dāx s-hasän-tän-innä;

³³ tiirən äza a-s tän-äxtälän məssaw-s d-a-wa fäl t-tirən.

³⁴ Ğnnän-asän inəṭṭulab wi n-əssin: «Älyalim a dāx-s ilan əššäxəl.»

³⁵ Əlwəyän-dd äza i-Ƴisa, əstājän-as inkubba-näsän, äsnäyän-as-t ɣas,

³⁶ ad-fattäxän äddinät isəlsa-näsän fäll-zäbo wa mad-ilal iket-net.

³⁷ Issəntä-dd Ƴisa atrur n-taɗaxt ta n-əzzäytun ɣas, təddəwät tamətte ta n-inəṭṭulab-net iket-net, siixləlit, tiiməl Mässinäx s-afälla dāx-təssəba n-ijitän wi ässuksäɗnen tənähäy.

³⁸ Tiiməl Mässinäx, janna:

«Ozana!

Ija Mässinäx älbāraka dāx-ämänokal

wa dd-osän dāx-isəm n-Emäli, älxer ija,

imäl-t älxurmät dāx-išənnawän iket-näsän.»

³⁹ Əggädän-dd käl-faris hanen tamətte, ənnän i-Ƴisa: «Älyalim, səssusəm inəṭṭulab-näk.»

⁴⁰ Inn'-asän Ƴisa: «Älleɣeɣ-awän a-s afäl ässosämän, ad-säqqärətnät tihun.»

Tisnant ta təlcamät dāx-Yərussālam

⁴¹ Ohäz-in Ƴisa Yərussālam, inhäy-tät ɣas, ad-ihall fälla-s,

⁴² ijanna: «Yərussālam! Ğnnär täddobed ad-təlmədäd ašäl-i-dāx, əmmək wa s-täddobed ad-təjrəwäd älyafyät n-iman-näm māšan, ättunkäl-am a-wen, wär t-hənnəynät tiṭṭawen-näm.

⁴³ Äduuttät a-s, əlkamän dāx-m išilan səmuumnen dāx-mad-käm-äxləyɣələyän išənja-näm, äzbəbän-käm s-išrutän iket-dāx-näsän,

⁴⁴ ättäxtäxän-käm, kämm d-aratän-näm, wär mad-dāx-m-dd-əyyən wāla ablāy iwarän amidi-net fäl-a-s, tunjäyäd s-ašäl wa sār-m dd-äšbašäjäx.»

Ikkäs Ƴisa käl-mamāla dāx-ehän n-ämudd wa məqqārän

(Mätti 21:12-17; Marqəs 11:15-19; Exya 2:13-22)

⁴⁵ Ijjäš Ƴisa ɗarät-a-wen ehän n-ämudd wa məqqārän, ad-dāx-s isattäx ättužzar,

⁴⁶ ijann'-asän: «Ajän wädden iktab a-s inna Mässinäx:

<Ehän-in, ad-umas ehän n-tittar>,

māšan, käwänəɗ jām-t tajnut n-imäkrädän.»

⁴⁷ Isaxra ɗarāt a-wen-däx hak ašäl dāx-ehän n-ämudd wa mäqqārān. Ɛnkārān-dd imānokālān n-kāl-tikutawen d-älɣulam n-Ätṭāwrāt d-imizārān n-kāl-Älyāhud, ad-tattārān əmmək s-jān iman-net

⁴⁸ māšan, äbā-hasān taməntelt fäl jān a-wen ed, täsijad-as tamətte iket-net, ijraz-as daɣ a-wa ijānna.

20

A-wa innā Ƴisa i-kāl-tikutawen (Mätti 21:23-27; Marqəs 11:27-33)

¹ Ašäl iyyān, isaxra Ƴisa dāx-ehän n-ämudd wa mäqqārān, ixatṭāb i-äddināt isālan n-Älənžil a-s t-dd-osān kāl-tikutawen d-älɣulam n-Ätṭāwrāt d-inušāmān n-Işrayil,

² ənnān-as: «Läxāt-anāx, mi kay-ikfān turhajāt n-amışəl n-tikunen-ti-dāx, meɣ daɣ mi kāy-ikfān tārna-ta-dāx s-tājjād a-wa tājjād?»

³ Inn'-asān: «Ad-hawān-ājāx näkk-dāx asəstan iyyān, ämära, läxātāt-ahi:

⁴ Mi dd-äšmašālān Exya wa n-Enəsselmāx i-ad-isəlmāx äddināt dāx-aman? Ak Mässināx a t-dd-äšmašālān meɣ dāgg-adəm ɣas?»

⁵ Änmäkkāsān s-takše, ad-jannen: «Afäl has-nənna: <Mässināx a t-dd-äšmašālān>, ad-hanāx-änn: <Adiš, mafäl wār tomenām s-a-wa hawān-inna.>

⁶ Afäl has-nənna dāgg-adəm ɣas a t-dd-äšmašālān, ad-hanāx-täkf tamətte iket-net sämmājori n-tihun ed təkkaş iket-net äşşāk a-s Exya ännābi n-Mässināx a ämoos.»

⁷ Ɛqqālān-dd, ənnān-as wār əssenān ere t-dd-äšmašālān.

⁸ Inn'-asān Ƴisa: «Adiš näkk-dāx, wār hawān-e-älläxeyx ere wa hi-ikfān tārna ta s-tājjāx a-wa tājjāx.»

Tangalt ta n-meddān wi fārnen ašəkrəş (Mätti 21:33-44; Marqəs 12:1-11)

⁹ Issäɣläy-tān-dd Ƴisa ɗarāt-a-wen tangalt dāx-hasān-innä: «Kāla äddomāt ähaləs iyyān ašəkrəş n-lāxnāb, ifār-t i-inəsduma iyyād təzzar, ikk' äkall iyyān dāx-hin-ähoja.

¹⁰ Täwwād-dd täqqān n-amili n-ašəkrəş ɣas, äšmašāl-dd sār-sān äanaxdim i-ad-has-dd-awəy ɣur-sān folāt-net dāx-a-wa dd-orāw ašəkrəş. Osä-dd inəsduma wi fārnen ašəkrəş, əɗnāyān-t tiwit təzzar, əssəglān-t koräyräy.

¹¹ Olās-dd sār-sān ašəmmişəl n-äanaxdim iyyān daɣ, jān dāx-s ənta-dāx tiwit, äsmäɗrāyān-t, əssəglān-t koräyräy.

¹² Äšmašāl-dd sār-sān daɣ wa s-kāraɗ, ənta, äsbayāsān-t təzzar, əntājān-t-in koräyräy.

¹³ Innā mäs-s n-ašəkrəş ɗarāt-a-wen: <Ɛndek äddābara ämära? Wār hin-äqqima ɣas ar ad-sār-sān šəmmişəlāx rure-ɣ wa əkneyx tārha, ənta ya, änihājja s-ad-t-səmyārān.>

¹⁴ Ɛnhāyān inaxdimān rure-s n-mäs-s n-ašəkrəş imal-dd ɣas, änmännān jer-iman-nāsān: <Ɛnhəywāt-ak, amäkkasu-net, närməset-t, näjet iman-net, dihen ad-tumas tākasit ti-nānāx.>

¹⁵ Ärmāsān-t, əzjārān dār-s ašəkrəş, änyān-t kərəf.» Inn'-asān Ƴisa: «Ma tordam, wi-dāx inaxdimān, ma hasān-mad-āj mäs-s n-ašəkrəş?»

¹⁶ Ɛɗmanāx-awān a-s ämära, ad-tān-dd-ass ənta iman-net, ilhəs-tān iket-dāx-nāsān, aləs tefert n-ašəkrəş-net i-iyād.» Ɛslān, äddināt i-a-wen ɣas, ənnān: «Assəkāɗ äkall!»

¹⁷ Issäɣläy-tān-dd akāyad-net, inn'-asān: «Adiš mafäl ätiwānna dāx-əlkəttab n-Mässināx a-s:

<Tāhunt ta hin-jārān älbānnatān s-ənnān wār tənfa härät,

ənta a-s a-s təşrəy tanfust,
tāmoos tāhunt ta n-aɣmār tufāt, hakkāt aššahāt ehän;
18 tāhunt-ta-hi, ere fälla-s ođän,
ad-ärräzräz; ere fäll-tođa daɣ, ad-ilkəz.> »

19 Inn'-asän Ƴisa a-wen ɣas, əttärän älɣulam n-Ättäwrät d-imänokalän n-käl-tikutawen əmmək s-t-ästärmäsän älwäqq-wen-däɣ ed, əssanän a-s əntäned-en-däɣ, a əssiixläy tangalt-ta-däɣ mäšan, wär jen a-wen ed, äksuđän tamətte.

Isälan n-tiwse i-ämänokal Qäyşär
(Mätti 21:45-46; 22:15-22; Marqəs 12:12-17)

20 Jän-as darät-a-wen ənniyät däɣ-ijəj, ašmaşälän-dd sār-s inaramän janen iman-näsän älmät äddinät oɣadnen i-ad-t-səwwənnən a-wärän itətwənn, əjən-t däɣ-ifassän n-gəfär d-əlxəkum-net.

21 Osän-t-dd, ənnän-as: «Äɣalim, nəssan a-s a-wa jänned d-a-wa säɣred iket-net, oɣad; wär täzmäzläyäd äddinät ed tabarät ta n-Mässinäɣ ɣas a saɣred.

22 Ämära, nässistän-käy: ak iwar-anäɣ ad-nəzəl tiwse i-Qäyşär wa n-ämänokal mäqqärän meɣ?»

23 İlmäd Ƴisa ɣur-iman-net amsud wa t-illän darät asəstan wa has-jän, inn'-asän

24 «Säkənät-ahi-dd ärriyal, tälläɣem-ahi ere wa ilän ättäşwer d-isəm wa t-iwärän?»
Ənnän-as: «I n-ämänokal Qäyşär.»

25 Inn'-asän: «Adiš, suɣəlät i-Qäyşär a-wa fälla-wän ila, təkfəm daɣ Mässinäɣ a-wa fälla-wän ila.»

26 İndär-asän fäw a t-səwwənnən erk məjräd dat-tamətte, əqqälän-dd ɣas tof'-en təkunt n-älwižab wa hasän-ija, əssosämän.

Isälan n-tanäkra jer-inəmmuttan
(Mätti 22:23-33; Marqəs 12:18-27)

27 Os'-e-hi-dd darät-a-wen härät däɣ-käl-taggayt ta n-käl-sadus-i jännänen a-s wär təlکم tanäkra jer-inəmmuttan, afäl äba äwadəm, əmdän isälan-net.

28 Əssəstänän-t, ənnän-as: «Äɣalim, inn'-anäɣ ännäbi Mosa: <Afäl ädobän ähaləs, äba-t wär oher ara d-hänne-s, idubənet-tät äñña-s i-ad-ikreş əzzurəyät i-äñña-s wa äba i-ad-wär hin-itiləm isəm n-wa äba fäll-äröri n-äkall.>

29 Ämära, əkkəs-anäɣ däɣ-täqqän n-eɣäf: Kälä t-əllän əssa äññatän, ädobän däɣ-sän wa n-amäqqar mäšan, äba-t wär-ikreş ara,

30 işrəy-t wa s-əssin s-adubən n-hänne-s,

31 ilkäm-as daɣ wa s-kärađ mäšan, wär tän-iha i dār-s oharän ara; ädobänän-tät əssa-essän, äba-tän daɣ iket-näsän, wär t-illa i dār-s oharän ara.

32 Äba daɣ dara-sän tamädt.

33 Nässiistän-käy: ašäl wa n-tanäkra jer-inəmmuttan, əndek däɣ-sän wa s-e-tumas hänne-s ed, ənhayän-tät adubən əssa-essän?»

34 Inn'-asän Ƴisa: «Däɣ-äddunya-ta-däɣ, tidubunän meddən, tidubunnät tiđedən

35 mäšan, äddinät wi ikfa Mässinäɣ turhajät n-ad-dd-ənkärän jer-inəmmuttan i-ad-əjjəşän älžännät, jer-wi n-meddən wälä tiđedən, ad-äbas ämiɣatärän s-adubən,

36 ed äbas däɣ-sän təlکم tamättant, ad-alähän d-änjälösän, umasän aratän n-Mässinäɣ ed, ənkärän-dd jer-inəmmuttan.

37 Däɣ-a-wa dd-iqqälän isälan n-tanäkra jer-inəmmuttan, issətbät-tän ännäbi Mosa ed, ašäl wa t-iɣrä Emäli däɣ-tabsäyt ta tähjäljälät wär räqq, iɣr'-e Mosa s-isəm: Mässinäɣ n-Ibrahim d-İsxaqq d-Yaqub.

38 A-wen, älmäɣna-net a-s, äddinät-win-däɣ, han älžännät, tiimələn Mässinäɣ; ənnär wär ədderän wär təjjən a-wen. Mässinäɣ, wädden inəmmuttan a-s ämoos Mässinäɣ, ämoos-t i-wi əddärnen ed data-s, əddarän iket-däɣ-näsän.»

³⁹ Imməjräd härät dāḡ-älḡulam n-Ättäwrät ɖarät-a-wen i-Ḳisa, ənnän-as: «Älḡalim, edäwänne-näk, ikna.»

⁴⁰ Äbas t-illa ɖarät-a-wen ere ihälän asəstan-net.

Mi s-ämoos Ḳisa, rure-s?
(Mätti 22:41-46; Marqəs 12:35-37)

⁴¹ Issəstän-tän Ḳisa ɖarät-a-wen, inn'-asän: «Ma isawännen äddinät a-s Älmasex, rure-s n-Dawəd?»

⁴² Ajän wädden Dawəd iman-net inna fälla-s dāḡ-əlkəttab wa n-Äzzäbur:
<Inna Emäli i-Emäli-nin,
ḡayəm daw-aḡil-in,

⁴³ hundāḡ här äjāḡ išənja-näk daw-iɖarän-näk.>

⁴⁴ Ḳas kunta Dawəd iman-net iyarr Älmasex s-isəm <Emäli>, əndek əmmək wa s-äddobät ad-umas rure-s?»

Agəzät iman-nāwän dāḡ-təlmənufāḡa
(Mätti 23:1-36; Marqəs 12:38-40; Luqa 11:37-54)

⁴⁵ Innä Ḳisa ɖarät-a-wen i-inəttulab-net dat-tamətte ta has-täsijädät:

⁴⁶ «Agəzät iman-nāwän dāḡ-älḡulam n-Ättäwrät, ijraz-asän ad-tikələn timukal dāḡ-isəlsa ähobätnen, ijraz-asän ad-hasän-tajjän äddinät isofan dāḡ-tišarriten, ärhan tisäqqima ti ännufläynen dāḡ-ihänen n-äddin wi n-käl-Älyähud d-atwəsəmḡar dāḡ-imjora,

⁴⁷ saknen a-s härkuk tumadän, a-s ija a-wen, tihāḡän a-wa ihän ifassän n-tinuɖäfen, ilkam dāḡ-sän äššäreḡa səmmän.»

21

Isälan n-tänuɖäft ta tojārät imärrəzāḡän ihuk
(Marqəs 12:41-44)

¹ Iɖkäl Ḳisa ɖarät-a-wen asäwaɖ-net, inhäy käl-ehäre tajjän azrəf wa təkkatän dāḡ-əssəndəqq wa n-tikutawen ihän ehän n-ämudd wa mäqqārän,

² inhäy dāḡ tänuɖäft tiyyät läqqəwät har dd-tosa, tästäräkkät dāḡ-əssəndəqq sänatät tämmaten əbɖanen.

³ Inhäy Ḳisa a-wen ḡas, inna: «Tidət-dāḡ a-s tänuɖäft-ta-dāḡ n-taläqqe, tojār äddinät iket-näsän ihuk,

⁴ fäl-a-s iket-näsän, a-wa s-ässakäyän s-wär-ämḡatärän a əkfän, a-s ija a-wen ənta, dāḡ-əlläqqu-net, a-wa təttaf i-tämudre-net iket-net, a təkfa.»

Teräzze ta təlkämät dāḡ-ehän n-ämudd wa mäqqārän
(Mätti 24:1-2; Marqəs 13:1-2)

⁵ Islä Ḳisa ɖarät-a-wen i-äddinät iyyäɖ dāḡ-tamətte, tiimələn tihusay-ti ija ehän n-ämudd wa mäqqārän, tiimələn dāḡ a-wa t-ihän d-tihun ti s-idäy d-a-wa s-idläj mäšan, inn'-asän:

⁶ «A-wa-dāḡ hannäyäm ähusken, əlkamän išilan dāḡ-wär mad-dd-täqqayəm tähünt tiyyät ḡas warät tamidit-net, ad-ättäḡtäḡ iket-dāḡ-net.»

Išmal n-täməddawt n-äddunya
(Mätti 24:3-28; Marqəs 13:3-23)

⁷ Əssəstänän-t, ənnän-as: «Älḡalim, əmme d-mad-äj a-wen? Əkkəs-anāḡ dāḡ-tayɖärt n-išmal wi-s-e-nəlməd a-s sämdo, osä-dd.»

⁸ Inn'-asän Ḳisa: «He käwäneɖ, wär käwän-išäšket äwadəm ed, ad-dd-asən äddinät äjjootnen s-isəm-in, änn hak iyyän dāḡ-sän: <Näkk a-s Älmasex!> meḡ änn: <Täqqän, täwwäɖ!> wär tošeläm ɖara-sän.

⁹ Afäl tēslām i-isālan n-imjārān d-tanākra n-timōttawen, wār-itāggādet ēnniyāt-nāwān; a-wen a ilan s-ad-āj tēzzar išrøy-t-dd sāmdo n-hārāt iket-net.»

¹⁰ Inn'-asān dāḡ ḡarāt-a-wen: «Ad-tēknēs tawset tamidit-net, iknēs ēddōwəl amidinet,

¹¹ ad-iškēdkēd ākall dāḡ-idāggan ājjootnen, āj laḡ d-turhēnnawen ājjootnen, ēzjārān-dd hārātān d-ijitān āssuksādnen išēnnawān

¹² māšan, dat-ad-āj a-wen-dāḡ, ad-tāttārmāsām, tēt wāḡēzzōbem, tāttāl wāyām s-āššāreḡa dāḡ-ihānan n-āddin wi n-kāl-Ālyāhud, tējjōšām tikārmuten, sōrrōwrōwān-awān āddināt s-imānokālān d-gēfārān dāḡ-tōssōba n-isēm-in wa kāwān-iwarān,

¹³ ad-hawān-umas a-wen ēssōbab fāl tāmoosām tijuhaben-in.

¹⁴ Wār tāšāw wāšnet ulhawān-nāwān dāḡ-isālan n-a-wa mad-tēnnēm

¹⁵ fāl-a-s, ad-kāwān-āk fāḡ āllifaz d-sārho dāḡ-mājrād s-wār t-illa ašānjo-nāwān āddoben tebādde data-wān, wāla asebōggū-nāwān.

¹⁶ Ad-kāwān-sēttārmōsān imārāwān-nāwān, d-ayōtma-wān, d-išāqqaḡān-nāwān, d-imidiwān-nāwān, sōssānḡōn kōrēf iyyād dāḡ-wān,

¹⁷ ad-dār-wān akēdān āddināt iket-nāsān dāḡ-tōssōba n-isēm-in wa kāwān-iwarān

¹⁸ māšan, wār hin-e-iba wāla emzād n-eḡāf-nāwān iyyān ḡas.

¹⁹ Ere wa ākōyādān dāḡ-alkum-hahi dāḡ-immun-net har ašāl wa d-imda a-wen-dāḡ iket-net, ad-iḡlōs.»

Erk āzzāmanān wi dd-malōnen

²⁰ «Afāl tēnhāyām Yārussālam a-s tāt-dd-āḡlāyḡālāyān ēlḡōskārān, ēlmōdāt a-s ēlhōllak-net, ohāz-dd.

²¹ Dihēn, wi ēzzāḡnen teje ta n-Ālyāhudōyāt, jawādnet dāḡ-azzal s-ašrut wa n-iḡaḡān; wi ēzzāḡnen aḡrēm wa n-Yārussālam, ēzjārnet-t; wi ēzzāḡnen āroj-net, wār dd-tājjāšnet aḡrēm

²² fāl-a-s, išilan-en, išilan n-ukōs n-eḡa dāḡ-mad-āj a-wa ēnnān ēlkōttabān n-Māssināḡ iket-net.

²³ Timōskay tiḡēden-ti irmās a-wen-dāḡ lanāt ēnniyāt meḡ siḡuḡnāt, fāl-a-s, ad-tāj tizzurt māqqōorāt fāll-ākall, iḡōw adkār n-Māssināḡ fāll-tamōtte-ta-dāḡ.

²⁴ Aḡil-net iyyān, ad-t-tākš tākōba, aḡil wa iyyādān, ad-ākkālāt dāḡ-ikallān wi iyyādnen, ad-ēddōšnāt tiwsaten wāren āmoos ti n-Ālyāhud, Yārussālam hundāḡ har akōy āzzāman-nāsnāt.»

Tāmōddawt n-āddunya

(Mātti 24:29-31; Marḡōs 13:24-27)

²⁵ «Ad-āj hārāt dāḡ-tāfukt d-ewār d-etran, ējōnāt tirēmḡaḡ dāḡ-tiwsaten ti wārnen ārori n-ākall dāḡ-tōssōba n-emāsli-i-dāḡ āssuksādān he-ikkōs ējārew wa sōmmān d-tināzzāmāren-net.

²⁶ Āddināt iyyād, ad-tān-tāḡ tarēmḡeḡt n-a-wa hannāyān itājj fāll-ākall ed, wāla imōšsuha wi hānen išēnnawān, ad-ēnhōynēhōyān.

²⁷ Ālwāqq-wen-dāḡ, ad-e-ēnhōyān āddināt Āgg-āgg-adēm imal-dd, inay tijārāken, tōlkam-as tārna-net d-ālxurmāt-net.

²⁸ Afāl ēssōntān hārātān-win-dāḡ iji, ēbdōdāt, tōdkēlām iḡāfawān-nāwān fāl-a-s, ēlḡōllas-nāwān, ohāz-dd.»

ḡaymāt tokayām

(Mātti 24:32-35; Marḡōs 13:28-31)

²⁹ Issāḡlāy-tān ḡisa ḡarāt-a-wen tangalt tiyyāt, inn'-asān: «Sōjrāhāt dāḡ-ašar d-ihōškan wi iyyādnen;

³⁰ wādden e-d, tān-tēnhāyām a-s dd-ēnšārān, ad-tēlmōdām d-iman-nāwān a-s os'-iwān akāsa.

³¹ Emmək-wen-däx day a-s afäl tənähäyäm härätän-win-däx s-hawän-өнney har eqqälän iji, adiš əlmədät a-s Təmmənəya n-Mässinäx, tohäz-dd.

³² Äsidättey-awän a-s wär-e takəy əzzurəyät-ta-däx wär jen härätän-win-däx s-hawän-өнney iket-däx-näsän.

³³ Ojār täräyxə ija ad-ib'-išənnawän d-äkall uhən ad-iba tənna-nin.

³⁴ Äjät ənniyät i-iman-näwän, wär zəzayət tesäse n-asməd d-əlxəmār d-inəzjam n-äddunya ulhawän-näwän, wär toyyem ašäl-en-däx oða-dd fälla-wän

³⁵ šund tätart fäl-a-s ašäl-en, ad-dd-idəw fäll-äddinät wi wärnen ärori n-äkall iket-däx-näsän.

³⁶ Yas, xaymät jam ənniyät, täxbadäm Mässinäx s-älwäqq iket-net i-ad-täxləsäm däx-a-wa dd-imalän, tudabem day tebädde dat-Ägg-ägg-adəm.»

³⁷ Itajj Yisa ašäl iket-net isayra däx-ehän n-ämudd wa mäqqärän mäšan, e-d t-ija ehäq, ad-adəw taḍaxt ta n-əzzäytun;

³⁸ e-d äffäw, ad-dd-tənšəy tamətte iket-net ehän n-ämudd wa mäqqärän i-ad-has-səjəd.

22

Anu n-taydärt wa iyäš Yähudəs

(Mätti 26:1-5, 14-16; Marqəs 14:1-2, 10-11; Exya 11:45-53)

¹ Ohäz-dd ämudd wa n-Faşka-i däx-tattän äddinät tijəlwen ti wär täskäf täzza yas,

² əggädän-dd imänokalän n-käl-tikutawen d-älxulam n-Ättäwrät, ad-tattärän əmmək s-əjän iman n-Yisa mäšan, təgdäl-asän-t tuksəða ta jän i-tamətte.

³ Däx-a-wen-däx, ad-ijjäš Iblis Yähudəs Isxaryut, iyyän däx-inəṭṭulab n-Yisa wi n-märəw d-əssin,

⁴ iglä, imməjräd d-imänokalän n-käl-tikutawen d-imänokalän n-älgomitän, änmäknän dār-s i-ad-hasän-isäydär Yisa.

⁵ Äsdäwät-tän a-wa hasän-inna, əjjäšan-as ärkäwäl n-ad-t-əkfen əzrəf,

⁶ ird'-asän, ad-itammäx i-ässaxät ännufläyän d-wär t-təlla tamətte edes i-Yisa i-ad-hasän-t-isəttärməs.

Isəmməjna i-ämudd wa n-Faşka

⁷ Osä-dd ašäl wa däx-tattän äddinät tijəlwen-ti wär ha täzza d-ğarräsnät taysiwen ti n-Faşka,

⁸ äšmašäl Yisa Bəṭrus d-Exya, inn'-asän: «Äglät, səmməjnum-anäx imənsiwän wi n-ämudd wa n-Faşka.»

⁹ Ənnän-as: «Əndek diha d-tärhed ad-tän-nəsəmmujnət?»

¹⁰ Inn'-asän: «Diha-däx d-e-təjjəšäm ayğəm ad-där-wän-e-immuqqəs ähaləs dd-iktarän, əlkəmät-as s-ehän wa mad-ijjəš,

¹¹ tənnəm i-mässi-s n-ehän-en: «Inn'-ak älxalim, səkən-anäx edägg däx-ehän-näk wa-däx mad-səssikəyäx ämudd wa n-Faşka näkk d-inəṭṭulab-in.»

¹² Ad-käwän-isəkən ehän n-soro däx-ämmujnen isəftax, dihen-däx ad-mad-nəsəssikəy ämudd.

¹³ Eglän, ənhäyän härätän s-əmmək-wa-däx s-hasän-tän-inna Yisa, ad-siməjnun imənsiwän wi n-Faşka.»

Ämudd wa n-Faşka

(Mätti 26:20-30; Marqəs 14:22-26; 1 Kur. 11:23-25)

¹⁴ Ämmujnät-dd härät iket-net, əskärän-dd imənsiwän yas, änyäyma Yisa d-inəmmušal däx-edägg wa n-imənsiwän,

¹⁵ inn'-asän: «Äsdärhänäx hullan ad-där-wän ahäräx Faška-ta-däx härwa wär-äqquzzäbex

¹⁶ fäl-a-s, ädduuttät a-s äbas ilkam, ad-där-wän tät-oharäx hundäx har ašäl wa d-mad-ättälmäd älmäyna-net däx-Təmmənəya n-Mässinäx.»

¹⁷ İdkäl-dd Yisa kara han aman n-läxnäb äxxiimmärnen, äjodäy i-Mässinäx təzzar, ikf'-en i-inəttulab-net, inn'-asän: «Näxəbbətät a-wa jer-iman-näwän

¹⁸ fäl-a-s, ässiilmädäx-käwän a-s wär-ilkem xur-ašäl-i-däx ad-əswex a dd-ijmađän läxnäb, hundäx har ašäl-wa dd-mad-tass Təmmənəya n-Mässinäx.»

Asəbdad n-amənsi wa n-tasäktot šaddijän

¹⁹ İdkäl Yisa qarät-a-wen tajəlla, ämmoy i-Mässinäx, irz'-et təzzar, äzun-asän-tät, inn'-asän: «A-wa taḡəssa-nin ta mad-äkfäx däx-idäggan-näwän, tuzanät tajəlla jer-iman-näwän käwəneđ-däx i-ad-hi-dd-kittəwäm.»

²⁰ Əssəmdän tetäte ḡas, idkäl kara han aman n-läxnäb äxxiimmärnen, inn'-asän: «A-wa ihän kara-i-däx a-s ärkəwäl n-tassayt wa äynayän ijän s-ašni-nin wa madän-inḡəl däx-äddimmät-näwän

²¹ məšan, ənhəywät-ak əmaḡdar-in, ənta-da-däx dər-i oharän.

²² Äsidätteḡ-awän a-s Ägg-ägg-adəm, ätiwatäs ad-t-iba məšan, aməskoy əwadəm wa t-madän-isəssäḡdär!»

²³ Ad-tinməsəstinän ya inəttulab jer-iman-näsän i-ad-əlmədän ere wa ihälän ad-äj təkunt-ten-däx.

Mijraw wa n-tidət

²⁴ Tənkär däx-sän tamädašt təşsoohet älwäqq-wen-däx i-ad-əlmədän ere wa däx-sän ojärän.

²⁵ Inn'-asän Yisa: «Imänokalän äsiikälən əddəwəlän-wi fäll-äxkamän məšan, hakd a-wen-däx, ärhan ad-hasän-itawänna dägg-älxer

²⁶ məšan, käwəweđ, wär jem a-wen: Wa ojärän däx-wän, umaset šund wa əndərrän, wa n-ämizär, umaset ənaxdim n-wi iyyəđnen.

²⁷ Ässistänäx-käwän: əndek ere wa äniihəjjän d-semḡar jer-ere wa äqqiimän itatt d-ere wa has-ixdamän? Wädden wa äqqiimän itatt a äniihəjjän d-semḡar. Äywa! Näkk a-s käwän-dd-oseḡ, əjeḡ iman-in jere-wän däx-edägg n-ənaxdim.

²⁸ Käwəneđ-i-däx ḡas, ad-dd-äqqimänen təlkamäm-ahi qarät aḡəna wa ənhäyäḡ,

²⁹ a-wen-däx a fäl, tajjəḡ Təmmənəya ta n-Abba-nin jer-ifassän-näwän s-əmmək wa s-tät-ija jer-wi-nin,

³⁰ i-ad-där-wän ahäräx išəkša d-isəswa däx-Təmmənəya-nin, təqqayməm fäll-tisäqqima n-təmmənukəla i-ad-təšräḡäm tiwsaten ti n-märəwät d-sənətät n-İşrayil.»

Äloläy Yisa däx-isälan n-akuddəl wa t-mad-äj Bətrus

(Mätti 26:31-35; Marḡəs 14:27-31; Exya 13:36-38)

³¹ Innä Äḡalim Yisa qarät-a-wen: «Simyon, Simyon, ittär iblis turhajät n-ad-käwän-iskənsəkət šund älkäma

³² məšan, däläḡ-ak Mässinäx i-ad-wär-äba immun-näk sär-i; afäl hi-dd-täqqäläd, səbdəd ayətma-k däx-äddin.»

³³ İggäd-dd Bətrus, innä i-Yisa: «Äḡalim, näkk, äsidäwäḡ i-ad-där-k idawäḡ s-takärmüt hakd-däx s-tamättant.»

³⁴ Inn'-as Yisa: «Bətrus, ässiilmädäx-käy a-s, a-s mad-iwət eköz äḡora ašäl-i-däx, təkkuddäläd-ahi har kərəđ ihändäggan.»

Isəmməterän-wi ija Yisa i-inəttulab-net

³⁵ Inn'-asän Yisa iket-näsän darät-a-wen: «Älwäqq wa d-kāwän-äšmašäläx s-tizarät wär täwweyäm azrəf wāla šakkoš, wāla tifadəlen, ajän äba-hin härät fälla-wän.» Ænnän-as: «Wāla a əndärrän.»

³⁶ Yas, inn'-asän: «Ämära, ere ilän azrəf, idkəlet-t, ere ilän šakkoš, iشلəjet-t, ere dāx-wän wärän ila tākoba, iżänšet-in anākäbba-net i-ad-tät-ikrəš

³⁷ ed, älleḡeḡ-awän a-s a-wa ätwännän fäll-i dāx-əlkəttab n-Mässinäx a-s inna: <Ädin dāx-inaqlimän>, ad-äj.»

³⁸ Ænnän-as əntäneḡ: «Älḡalim, sānatät tikobawen da»; inn'-asän: «Täkat, igdäh-awän mäjräd!»

Ässayät wa ikkäs Yisa dāx-ašəkrəš wa n-Žätsämmani
(Mätti 26:36-46; Marqəs 14:32-42)

³⁹ Ifäl dihen ḡas, äddew dār-sän s-taḡaxt ta n-əzzäytun ed, äru-dāx a-wen-dāx a-s izzay ad-t-äj.

⁴⁰ Ewwādän-in taḡaxt-en ḡas, inn'-asän: «Ädölät Mässinäx i-ad-kāwän-agəz dāx-tändärbaten n-Iblis.»

⁴¹ Iššənkäš-in Yisa fälla-sän s-əḡḡəkuḡ n-tejere n-tähunt, irkāx, ad-itəddal Mässinäx,

⁴² ijanna: «Abba, kunta tärhed a-wen-dāx, səssijəj-ahi kara n-tisnant-ta-dāx māšan hakd a-wen-dāx, äjet erhet wa-nāk wädden wa-nin.»

⁴³ Ijanna a-wen-dāx a-s has dd-änfaläl änjəlos n-Mässinäx i-ad-t-isəşşuhət.

⁴⁴ Idgəz Yisa, ijläy hullan dāx-tamädilt n-Mässinäx har tämoos tide-net a olähän d-tikruten n-ašni dd-titrəkkitnen fäll-äkall.

⁴⁵ Imdä d-tamädilt n-Mässinäx ḡas ibdäd, iqqäl-dd inəḡḡulab-net, ogəz-tän-dd tässoḡäs-tän tisnant.

⁴⁶ Inn'-asän: «Ma s-təḡḡasäm? Ænkärät-dd, ädölät Mässinäx i-ad-kāwän-agəz dāx-tändärbaten n-Iblis.»

Atärməs n-Yisa Älmases
(Mätti 26:47-56; Marqəs 14:43-50; Exya 18:2-11)

⁴⁷ Härwa-dāx ämmiijräd i-inəḡḡulab-net a-s dd-osa ejhän wa t-ittärän, äzzar-as iyyän dāx-inəḡḡulab-net wi n-märəw d-əssin wa s-isəm-net Yähudəs. Ohəz-dd Yähudəs Yisa i-ad-t-asəs dāx-idmarän-net

⁴⁸ māšan, inn'-as Yisa: «ḡas kāyy Yähudəs, əmmək wa-dāx a-s saḡdaräd Ägg-ägg-adəm?»

⁴⁹ Ænhäyän inəḡḡulab wi iyyäḡnen a-wa ikkän iji ḡas, ənnän: «Ak näwtet-t s-tikobawen-nänäx meḡ?»

⁵⁰ Iwät iyyän dāx-sän akli n-ämänokal n-käl-tikutawen s-tākoba-net, ištäf-dd taməzzujt-net ta n-aḡil.

⁵¹ Iḡtäl-tän Yisa, inn'-asän: «Wär jem a-di.» Idäs taməzzujt n-ähaləs, äzozäy-t.

⁵² Innä Yisa i-imänokalän n-käl-tikutawen d-imänokalän n-älgomitän wi äḡläfnen ehän n-ämudd wa mäqqärän d-inušämän n-Işrayil d-wi t-äşşunjätnen: «Ma s-sär-i dd-täwweyäm tikobawen d-iboriyän şund änaḡtaf?»

⁵³ Wädden hak ašäl ärtayäx dār-wän dāx-ehän n-ämudd wa mäqqärän, mafäl wär hi-dāx-s tärmesäm; əlmədät a-s ašäl-wa-dāx, ašäl-nāwän kāwäneḡ d-Iblis d-tihay-net.»

Tisəḡbat n-akuddəl wa ija Bəḡrus i-Yisa
(Mätti 26:57-58, 69-75; Marqəs 14:53-54, 66-72; Exya 18:12-18, 25-27)

⁵⁴ Ärmäsän Yisa, əlwäyän-t s-ehän n-ämänokal wa n-käl-tikutawen, ij'-asän Bəḡrus alkum šəjren.

⁵⁵ A-s hin-əwwādān dihen, irxā efew dāx-ammās n-āxalla, əzzahān sār-s äddināt; ijjāš Bətrus ənta-dāx, iglā äqqiima edes i-äddināt-en.

⁵⁶ Tənhäy-t tənaxdimt tiyyāt äqqiima s-efew, təkñ'-e azəjjəzz, tənnā: «Hannäyäm-t wa-daḡ, amidi n-Ḡisa.»

⁵⁷ Äkkuddäl Bətrus a-wen, inn'-as: «Tamädt, wär t-əzzeyäx.»

⁵⁸ A əndärrän dərät-a-wen-dāx, inhäy-t äwadəm iyyän daḡ, inn'-as: «Iyyän dāx-sän a tämoosäd.» Inn'-as Bətrus: «Ähaləs, älyafyät-näk.»

⁵⁹ Okäy a iwwadān ässaḡāt dərät-a-wen, ikyäd dāx-s ähaləs iyyän, inna: «Ijmaḡ-t äššäk a-s ähaləs-i-dāx, amidi-näsän fäl-a-s ənta-dāx, i n-Galila.»

⁶⁰ Inn'-as Bətrus: «Ähaləs, wär-əssenäx a dāx-hi-tässewäläd.» Diha-dāx d-innä Bətrus a-wen-dāx, härwa-dāx ämmijräd a-s iwät ekäz äḡora.

⁶¹ Innäḡ-dd sār-s Ḡisa, ämmoqqäs asawaḡ-näsän, iknä dāx-s Ḡisa akäyad ḡas, iktä-dd Bətrus mäjräd wa s-käla has-t-ija a-s has-innä: «A-s mad-iwət ekäz äḡora ašäl-i-dāx, täkkuddäläd taməzzuyt-in har käraḡ ihändäggan.»

⁶² Izjār Bətrus, ad-ihall a-wa-dāx has-ja tisanant.

*Äsmädräyän əssärdusa Ḡisa
(Mätti 26:67-68; Marḡəs 14:65)*

⁶³ Əzzänän meddən-wi jänen ənniyät i-Ḡisa sār-s, ad-dāx-s dazžän, təggatän-t;

⁶⁴ äqqänän idəm-net s-ekäršäy, ad-has-jannen: «Luləy ya, tälläḡed-anäx ere wa käy-iwätän.»

⁶⁵ Ad-sikuforän, gaggärän-t.

*Tebädde n-Ḡisa dat-käl-Sinhidrin wi ḡattäsnen äššäreḡa
(Mätti 26:59-66; Marḡəs 14:55-64; Exya 18:19-24)*

⁶⁶ Äffaw ḡas, äddew-dd älzämaḡāt wa n-inušämän n-Işrayil d-imänokalän n-käl-tikutawen d-älḡulam n-Ätṭäwrät, əlwäyän Ḡisa s-käl-äššäreḡa.

⁶⁷ Əwwādän-in ḡas, əssəstänän-t, ənnän-as: «Kunta käyy a-s Älmasex, əkkəs-anäx dāx-taḡdärt.» Inn'-asän: «Kud-hawän-tän-ənnəx-dāx, wär hi-e-təfləsäm;

⁶⁸ kud-käwän-əssəstänäx daḡ, wär hi-e-täwwäzzäbäm

⁶⁹ mäšan, əlmədät a-s ḡur-ašäl-i-dāx, ad-tənhəyäm Ägg-ägg-adəm, äqqiima daw-aḡil n-Mässinäx-i ilän tärna.»

⁷⁰ Ənnän-as iket-dāx-näsän: «Adiš käyy a-s Rure-s n-Mässinäx?» Inn'-asän: «Käwänəḡ iman-näwän, tənnäm a-s näkk a t-ämoosän.»

⁷¹ Ənnän älwäqq-wen: «Ma nətajj i-tajuhe säl ta-dāx? Wädden nəslä näkkənəḡ iman-nänäx i-a-wa dd-izjārän emm-net.»

23

*Tebädde n-Ḡisa dat-Bilatəs
(Mätti 27:1-2, 11-14; Marḡəs 15:1-5; Exya 18:28-38)*

¹ Inkär älzämaḡāt iket-net, ittəlwäy Ḡisa s-Bilatəs wa n-gəfär.

² Osän-in dihen ḡas, ad-t-saḡlamän, jannen i-gəfär: «A-s närmäs ähaləs-i-dāx, išaška tamətte-nänäx, ijanna ənta a-s Älmasex wa n-ämänokal, ijanna daḡ i-äddināt wär zəlām tiwse i-Qäyşär-i n-ämänokal wa mäqqärän.»

³ Issəstän Bilatəs Ḡisa, inn'-as: «Ak, käyy a-s ämänokal n-käl-Älyähud meḡ?» Inn'-as Ḡisa: «Käyy iman-näk, tənneḡ-tän.»

⁴ Innä Bilatəs i-imänokalän n-käl-tikutawen d-tamətte: «Ähaləs-i-dāx, wär hənneyäḡ fälla-s udlem t-äsinähäjjän d-tamättant.»

⁵ Ʒzzäjän äddinät imäslan-näsän s-afälla, ənnän-as: «Issəntä-dd ašəšk n-tamətte s-a-wa tät-isäyra ħur-Galila ta dd-ifäl har dd-imdä Älyähudəyät, iwwäḍ-dd Yärussälam ämära.»

⁶ Islä Bilatəs i-a-wen ħas, issəstän d-a-s Ʒisa i n-Galila meḡ?

⁷ Ilmäd a-s Galila a t-tələt ħas, ässawäy-t i-Harudəs wa n-gəfär n-Galila-i fälla-s ixkamän ed, a-s itäj a-wen-däḡ, iha Yärussälam.

Tebädde n-Ʒisa dat-Harudəs Antibbas

⁸ Inhäy Harudəs Ʒisa ħas, iddəwät hullan fäl-a-s äru irh' ahänay-net däḡ-təssəba n-a-wa fälla-s isäll, ijar daḡ ätṭama n-ad-äj Ʒisa, iji n-Mässinäḡ iyyän data-s.

⁹ Ija Harudəs isəstanän äjjootnen i-Ʒisa mäšan, wär t-illa a has-inna Ʒisa.

¹⁰ A-s itäj a-wen, imänokalän n-käl-tikutawen d-älḡulam n-Ätṭäwrät, saḍlamän Ʒisa s-äššahät.

¹¹ Iggäd-dd daḡ Harudəs d-əssärdusa-net, ad-t-saməḍrayän, tajjän-t tekäškäšt; əssəlsän-t anäkäbba iknan tihusay, ässoḡälän-t ḍarät-a-wen i-Bilatəs wa n-gəfär.

¹² Ašäl-ənnin-däḡ, ad-änmäzäl Harudəs d-Bilatəs, ämedawän ed, dat-a-wa, änimäksärän.

Bilatəs, Bäryäbbas, Ʒisa

(Mätti 27:15-26; Marḡəs 15:6-15; Exya 18:39-19:16)

¹³ Äsdäw-dd Bilatəs imänokalän n-käl-tikutawen d-inušämän d-tamətte, inn'-asän:

¹⁴ «Ähaləs-i-däḡ ya, täwwäyäm-ahi-t-dd, tənnäm-ahi: <Išaška äddinät>, əssəstänäḡ-t data-wän mäšan, wär fälla-s əjrewäḡ fäw a t-äsinähäjjän d-taməttant däḡ-härätän-wi-däḡ t-sawaräm.

¹⁵ Ässawäyäḡ-t i-Harudəs ənta-däḡ mäšan, wär t-ill' uḍlem fälla-s ijraw ed, ässoḡäl-anäḡ-t-dd. Wär fälla-s hənnəyäḡ fäw a t-äsinähäjjän d-taməttant.

¹⁶ Äddäbara ämära, ad-däḡ-s səwwəjjäḡ tiwit, äyyäḡ-t-in.» [

¹⁷ Äzzäman-en, hak ämudd n-Faška, äsiwäyy'-asän-in Bilatəs u-takärmüt iyyän.

¹⁸ Ohärän iket-näsän iyyän n-emm, äšḡären däḡ-išənnawän, jannen: «Ämmätet ähaləs-wa-däḡ, səwwəyəd-anäḡ-dd Bäryäbbas.»]

¹⁹ Bäryäbbas-i-hi, iha takärmüt fäl-a-s kälä dd-issənkär tamətte däḡ-aḡrəm har ij' iman n-äwadəm däḡ-a-wen-däḡ.

²⁰ Ittär Bilatəs ad-hasän-ämmäjräd daḡ ed irha ənta ad-hin-isəwwəyy Ʒisa

²¹ mäšan, äšḡären iket-däḡ-näsän däḡ-išənnawän, ənnän-as: «Itwəšləbet fäll-tajəttewt, itwəšləbet fäll-tajəttewt!»

²² Oläs-tän asəstan wa s-käraḍ, inn'-asän: «Mafäl, ma iḡšäd t-äsiinähäjjän d-taməttant? Wär fälla-s əjrewäḡ a t-äsinähäjjän d-taməttant; äddäbara ämära, ad-däḡ-s səwwəjjäḡ tiwit, səwwəyyäḡ-t-in.»

²³ Äxwälän-t s-iḡäran-näsän, tattärän däḡ-s ad-itwəšləb fäll-tajəttewt. Oyy'-asän iman-net, äšjad-asän Bilatəs,

²⁴ ällil erhet-näsän, iytäs-as taməttant,

²⁵ äswäyy'-asän-in ähaləs wa däḡ-s əttärän ihän takärmüt däḡ-təssəba n-asənkär wa dd-ija i-tamətte d-iman-wi ija, ija Ʒisa däḡ-ifassän-näsän i-ad-has-əjən a-wa s-ärhän.

Atwəšləb n-Ʒisa Älmasex fäll-tajəttewt

(Mätti 27:32-44; Marḡəs 15:21-32; Exya 19:17-27)

²⁶ Älwäqq wa d-äwwäyän Ʒisa i-ad-itwəšləb, äšhäššälän ähaləs s-isəm-net Simyon n-tadäbayt ta n-Qərwan dd-ifälän isəkraš alənji n-tajəttewt ta fäll-mad-itwəšləb Ʒisa; idkäl-tät, ilkäm-asän.

²⁷ Təlcam-asān daḡ tamətte tājjeet əhanāt tiḡeḡen əsiikälälnen, təggaṡnāt iman-nāsnaṡ s-əkall.

²⁸ Innād-dd sār-snaṡ ʃisa, inn'-asnāt: «Šāt-Yārussālam, wār təlhemāt fäll-i, əlhəmāt fäll-iman-nākmāt d-aratan-nākmāt

²⁹ ed, malān-dd išilan daḡ-mad-itwənn: <Təndəḡ i-timəjjejruten d-ti s-kāla wār-əkrešnāt ara, wār kāla əssəḡāḡnāt>.

³⁰ ašäl-en, ad-ənnən əddināt i-iḡaḡān: <Aḡəwāt fälla-nāḡ>, ənnən i-tiḡaḡen: <Əlsəmāt-anāḡ>

³¹ fäl-a-s, efew kunta ošal daḡ-ahəšk ibdajān s-əmmək-wa-daḡ, ma inna wa əqqurān?»

³² Əttilwāyān daḡ daḡ-a-wen-daḡ əssin inaḡtafān əkkanen taməttant əntāneḡ-daḡ.

³³ Əlwāqq wa d-hin-əwwāḡān edāgg wa s-itawānna: «Edāgg wa n-akārkor», əşläbān ʃisa, əşläbān daḡ inaḡtafān edes-has, iyyān daw-aḡil-net, wa iyyāḡān daw-təşälje-net.

³⁴ Əlwāqq wa d-əşläbān ʃisa, innā: «Abba, ənš-asān fäl-a-s, wār-əssenān a hān»; jān ḡarāt-a-wen tişəḡeren i-ad-uḡanān isəlsa-net jer-iman-nāsān.

³⁵ A-s itājj a-wen, təbdad tamətte, tājjeyha i-a-wa ijān iket-net; ḡazzān imānāhāḡān n-käl-Əlyāhud daḡ-ʃisa, jannen: «Wādden iḡlās əddināt wi iyyāḡnen, iḡləset ya iman-net əməra kunta ənta a-s Əlmasex wa əsnāfrān Məssināḡ i-iman-net.»

(Mətti 28:16-20; Marḡəs 16:14-18; Exya 20:19-23)

³⁶ Əjān-t əssərdusa taḡəzza, zaḡaḡān-t-dd bənegār, hakkān-as-t,

³⁷ jannen-as: «Kunta kāyy a-s əmānokal n-käl-Əlyāhud, əḡləs iman-nāk ya!»

³⁸ Əttəytāyān əllox jənnəj-s, iktab fälla-s:

«A-WA ƏMĀNOKAL N-KĀL-ƏLYĀHUD».

³⁹ Iggād-dd iyyān daḡ-inaḡtafān wi ətwāşläbnen dihen, ad-isamāḡray ʃisa, ijann'-as: «Wādden kāyy a-s Əlmasex, əḡləs iman-nāk ya, təḡləsəd-anāḡ!»

⁴⁰ Əklāwlāw ənaḡtaf-wa iyyāḡān fäll-amidi-net, inn'-as: «Kāyy-i ḡār-s oharān tisanant-ta-daḡ, uksaḡ Məssināḡ,

⁴¹ nākkāneḡ, a-wa hanāḡ-irmāsān, imojjan-nānāḡ a sār-nāḡ-t-dd-orāwān, nānihājja ḡār-s, iwar-anāḡ uḡlem məşān ənta, wār t-illa a läbasān iḡşad.»

⁴² Inn' ənaḡtaf wa s-iket imməjrād i-ʃisa: «Əktəw-ahi-dd afäl dd-tāqqälād təminakälād.»

⁴³ Inn'-as ʃisa: «Əsidätteḡ-ak a-s ašäl-i-daḡ, ad-ḡār-i tahəreḡ əlžānnāt.»

Taməttant n-ʃisa Əlmasex

(Mətti 27:45-56; Marḡəs 15:33-41; Exya 19:28-30)

⁴⁴ A-s itājj a-wen-daḡ, işwar təja tarāhut, əlsānāt tihay ārori n-əkall iket-daḡ-net hundāḡ har təja tezzar.

⁴⁵ Tättunkäl tāfukt, iqqārrowāt ərido wa ibḡān daḡ-ehān n-əmudd wa məqqārān, edāgg wa şəddijān d-wa iknān təşəḡje.

⁴⁶ Əşḡarāt ʃisa s-əşşahāt ḡarāt-a-wen, innā: «Abba, ərməs unfas-in.» Innā a-wen-daḡ ḡas, əjmāḡān-t iman.

⁴⁷ Inhāy kābtān wa ixkāmān fäll-əssərdusa wi əşläbnen ʃisa a-wa ijān ḡas, omäl Məssināḡ, innā: «Wār t-ih' əşşāk a-s əhaləs-i-daḡ, əməyḡdal.»

⁴⁸ Ənhāyān əddināt wi dd-əddewnen s-edāgg-wen-daḡ a-wa ijān, əqqälān, ənḡasān iman-nāsān hullan.

⁴⁹ A-s itājj a-wen-daḡ, əbdadān imidiwān n-ʃisa daḡ-ijəj əkyadān əntāneḡ d-tiḡeḡen-ti has-dd-əlkāmnen wa-daḡ n-Galila har əntāneḡ-da-daḡ.

*Azəkka n-Ŷisa**(Mätti 27:57-61; Marqəs 15:42-47; Exya 19:38-42)*

⁵⁰ Osä-dd ähaləs oɣadän, olaɣän n-taɣrəmt ta n-Arimata s-isəm-net Yusəf, iha inušämän n-Işrayil-wi ɣattäsnen äššäreɣa,

⁵¹ wär-ohər d-imizärän-wi iyyädnen äddäbaratän-wi jän däɣ-isälan n-Ŷisa ed ijar ätṭäma n-a-s ilkam ad-dd-təzzubbət Təmmənəya n-Mässinäɣ,

⁵² ənta-en-däɣ a ihälän ad-äkk Bilatəs, ittär däɣ-s tafəkka n-Ŷisa,

⁵³ oyyas-tät Bilatəs ɣas, ikkäs-dd Yusəf tafəkka n-Ŷisa fäll-tajəttewt, ij'-et däɣ-tefit təzzar, issəns'-et däɣ-azəkka iɣaşän däɣ-esəwäl s-käla wär däɣ-s inša ere äba.

⁵⁴ Itajj a-wen-däɣ ašäl wa d-siməjnun äddinät i-ämudd wa n-əssəbət-i n-täsonfat.

⁵⁵ Elkämnät tiḏəden-ti dd-äddewnen d-Ŷisa wa-däɣ n-Galila har diha-däɣ i-Yusəf, ənhäynät edägg n-azəkka-en hakd-däɣ əmmək wa s-tənsa tafəkka n-Ŷisa däɣ-azəkka-en.

⁵⁶ Eqqälänät ihänan ɣas, ad-sadawnät əlɣənfärän d-aɗutän. Ijä ašäl wa n-əssəbət-i n-täsonfat ɣas, ässunfänät ed, a-wen-däɣ, a innä alämär wa n-ännäbi Mosa.

24*Tanäkra n-Ŷisa jer-inəmmuttan**(Mätti 28:1-10; Marqəs 16:1-8; Exya 20:1-10)*

¹ Abənnəbən n-älxad-i n-ašäl wa äzzarän däɣ-əssəboɣ, əkkänät tiḏəden azəkka əwwaynät əlɣənfärän d-aɗutän-wi dd-äsdawnät,

² äwwädänät-in azəkka, oğaznät-in tähünt-ta härät emm n-azəkka, täɣiraräd-in,

³ əjjäšnät ammas n-azəkka mäšan, wär däɣ-s ənhəynät tafəkka n-Ŷisa.

⁴ Äqqanän iɣäfawän-näsnät däɣ-a-wen-däɣ a-s dd-əbdädän əssin meddən əlsanen isəlsa äsimäɣmäɣnen edes-hasnät,

⁵ jänät tarəmməxt-ta-däɣ fäl dd-hänät-ärkaɣnät, äsidäsnät timmawen-näsnät äkall. Ənnän-asnät meddən: «Ma s-tammäɣmät i-ere iddarän jer-inəmmuttan?»

⁶ Ŷisa, wär t-illa diha, inkär-dd däɣ-tamättant. Əktəwmät-dd a-wa innä härwa iha teje ta n-Galila,

⁷ a-s innä: «Ägg-ägg-adəm, ilzam ad-ättärmäs, ijješ ifassän n-inäsbäkkadän, əşləbän-t mäšan, ašäl wa s-käraɗ, a dd-inkär jer-inəmmuttan.» »

⁸ Əktänät-dd iməjridän-win-däɣ ija Ŷisa.

⁹ Fälänät azəkka ɣas, əkkänät inəttulab wi n-märəw d-iyyən d-inalkimän-wi iyyädnen, jänät däɣ-sän isälan.

¹⁰ Tiḏəden-en, h'-enät Märyäma ta n-tadəbayt ta n-Muläzdələyät, Täxya d-Märyäma ta n-ma-s n-Yaqub d-tiyyäɗ dəɣ sidəttutnen a-wa ənnänät i-inəttulab

¹¹ mäšan, jän-tänät tinəbbuddal wären əssen a jannenät, unjäyän s-ad-tänät-əfləsän.

¹² Iggäd-dd Bətrus, ošäl s-azəkka, iwwäɗ-in ɣas, ässijja däɣ-əmmas-net mäšan, wär däɣ-s inhey ar tefit tənsat d-iman-net, iqqäl ənta-däɣ iqqan a-wa ijän eyäf-net.

*Zäbo wa n-Imayus**(Marqəs 16:12-13)*

¹³ Ekkän inalkimän n-Ŷisa əssin ašäl-wen-däɣ taɣrəmt ta n-Imayus täniməjjajät d-Yärussälam s-əddəkud n-märəw kelumetärän d-əssin,

¹⁴ ässokalän, simyuxulän isälan n-a-wa ijän iket-net

¹⁵ a-s tän-dd-iwwäɗ Ŷisa iman-net, äddew där-sän

¹⁶ mäšan, indär i-tiṭṭawen-näšan ad-t-əzzəynät.

¹⁷ Imməjräd-asän, inn'-asän: «Ma s-tärjašäm ham ti-net?» Äqqanän iɣäfawän-näšan, əbdädän,

18 inn'-as dāx-sān wa s-isəm-net Kälyobbas: «Xas, käyy xas, dāx-Yārussālam tēmdat a wār hen isālan n-a-wa dāx-s ijān išilan-wi-dāx?»

19 Inn'-asān: «Ma dāx-s ijān?» Ēnnān-as: «Un a-wa ijrāwān Yisa wa n-Nāširāt-i āmoosān ānnābi āšsoohen s-imojjan-net hakd mājrād-net dat-Māssināx d-tamōtte iket-net,

20 ārmāsān-t imānokālān n-kāl-tikutawen d-imizārān-nānāx, āssoḍān-t dāx-āššāreḡa-nāsān tēzzar, ešlābān-t.

21 Nākkāneḍ, nāmoos hārāt dāx-wi eḡārnen ātṭāma n-a-s ēnta a madān-iḡlōs Iḡrayil māšan, a-wa ašāl wa s-kāraḍ d-eḡān hārātān-win-dāx,

22 āqqānnāt daḡ tiḍeḍen-nānāx tiyyād iḡāfawān-nānāx ed, ēnšāynāt azəkka

23 māšan, wār dāx-s in-ogeḡnāt tafəkka-net, āqqālnāt-dd, ēnnānāt ānfalālān-asnāt-dd ānjālosān hasnāt-ēnnānen, iddar.

24 Osān iyyād dāx-nāx daḡ azəkka, āsbayānān a-wa ēnnānāt tiḍeḍen māšan, Yisa iman-net, wār t-illa ere t-inhayān.»

25 Inn'-asān Yisa ālwāqq-wen: «Kāwāneḍ-i-š, tidēt-dāx a-s ijrāw-kāwān iba n-tayōtte, uhēn, ma āsiḡārān ulhawān-nāwān, igdal-awān ad-tējrāhām a-wa ēnnān ānnābitān dāx-ēlkōttabān n-Māssināx?

26 Wādden ēnnān ilzam ad-inhēy Ālmaseḡ tāhānšariḍt tēzzar, iḡeš ālxurmāt-net.»

27 Irmās-asān-dd ḍarāt-a-wen ḡur-ānnābi Mosa, ikkā-dd ḡur-ānnābitān wi iyyāḍnen iket-nāsān, itafāssar-asān a-wa ēnnān ēlkōttabān dāx-isālan-net.

28 Ohāzān-in taḡrēmt ta ēkkān xas, issəkn'-en a-s okay-tān

29 māšan, ēnnān-as: «Xayēm ḡur-nāx ed, ašāl iglā, ehāḍ-dāx, išwar ija», āzzubbāt ḡur-sān.

30 Ēqqālān tetāte xas, idkāl tajōlla, āmmoy i-Māssināx, irḡ'-et, ikf'-asān-tāt.

31 Āmerānāt tiṭṭawen-nāsān ālwāqq-wen-dāx, ēzzāyān-t māšan, āttunkāl-asān āssaḡāt-wen-dāx.

32 Ānmānnān jer-iman-nāsān: «Wādden a-s hanāx-āmmijrād dāx-tabarāt, isafham-anāx ēlkōttabān n-ānnābitān, sanāḡmaḍān ulhawān-nānāx fāll-ad-t-ēzzōyān.»

33 Ēbdādān āssaḡāt-wen-dāx, ēqqālān Yārussālam. Ogāzān-in inēṭṭulab wi n-māraw d-iyyān d-inalkimān-wi iyyāḍnen, āžziimmāḡān dāx-edāḡḡ iyyān.

34 Ēnnān-asān inēṭṭulab d-inalkimān-wi iyyāḍnen: «Iḡmaḍ-t āššāk a-s Yisa, inkār-dd jer-inēmmuttan, inhay-t Simyon.»

35 Ēllāḡen-asān ēntāneḍ-dāx amuqqōs wa eḡān dār-s dāx-tabarāt d-ēmmeḡ wa s-t-ēzzāyān ālwāqq wa d-irḡa tajōlla.

Ānfalāl-dd Yisa i-inēmmuḡāl

(Mātti 28:16-20; Marḡōs 16:14-18; Exya 20:19-23)

36 Āmmijrādān hārwa a-s dd-ibdād Yisa iman-net jere-sān, inn'-asān: «Ins' ālxeḡ n-Māssināx fālla-wān.»

37 Āxwālān, ēḡḡādān ēnniyātān-nāsān, ēknān tarēmmeḡt ed, āḡelān āmāttānkul a hannāyān

38 māšan, inn'-asān Yisa: «Ma kāwān-ixwalān, igḡad d-ēnniyātān-nāwān, ikkas taflēst dāx-ulhawān-nāwān?

39 Ēkyōdāt dāx-ifassān-in d-iḍarān-in, nākk iman-in a-wa, āḍōsāt-ahi, tōkyōdām dāx-i i-ad-tōkkēsām āššāk, āmāttānkul, wār dār-i mad-alāh ed, wār-ila taḡōssa wāla iḡāsan.»

40 Iḡann'-asān a-wen, isakn'-en ifassān-net d-iḍarān-net

41 māšan, tēḡḡāl-asān tēmḡāre n-tedāwit-i-dāx jān ad-t-ēflēsān. Inhāy a-s āqqanān iḡāfawān-nāsān xas, inn'-asān: «Ak tēlam a itamākšen diha?»

42 Ēkfān-t-dd ašār n-emān āhhōḡen,

⁴³ irmäs-t-dd, ikš'-e data-sän.

⁴⁴ Inn'-asän ðarät-a-wen: «A-wa-däx a hawän-jannex härwa əlley jere-wän a-s ähhuuššäl ad-itbət a-wa fäll-i iktabän däx-alämär wa n-ännäbi Mosa d-əlkəttabän wi n-ännäbitän d-Äzzäbur.»

⁴⁵ Ora älwäqq-wen tiyətwen-näsän i-ad-əfhəmän əlkəttabän,

⁴⁶ inn'-asän: «Iktab a-s Älmasex, ilzam ad-inhöy tähänšariđt, inkär-dd ašäl wa s-kärađ jer-inəmmuttan,

⁴⁷ ətwəjjən ðarät-a-wen isälan n-tätubt d-tenäšše n-ibäkkadän s-isəm-net i-tiwsaten iket-däx-näsnät, isänt a-wen däx-Yărussälam.

⁴⁸ Käwäneđ a jex tjuhawen n-a-wen iket-net,

⁴⁹ näkk dađ, ad-hawän-dd-səssiwəyăx a-wa s-hawän-ija Abba-nin ärkäwäl-net, a-wen-däx a fäl wär feläm ađrəm-wa-däx, a təkäs tärna ta dd-fälät išənnawän wär käwän-təlsa.»

*Tikawt n-Ÿisa i-išənnawän
(Marqəs 16:19-20)*

⁵⁰ Ilwäy-tän ðarät-a-wen har edes i-tadäbayt ta n-Bitanya, iđkäl ifassän-net, ija däx-sän älbäraka.

⁵¹ Itajj däx-sän älbäraka härwa a-s där-sän ibða, imməđkäl s-išənnawän.

⁵² Ärkäxän-as əntäneđ dihen-däx təzzar, əqqälän Yărussälam əknan däx-tedäwit.

⁵³ Hak ašäl ðarät-a-wen, timäqqusän däx-ehän n-ämudd wa mäqqärän ihän Yărussälam, tiiməlon Mässinäx. Amin!

Älənžil n-ÿisa Älmasex wa iktäb Exya

Äšqjəš

¹ S-tizarät, a-s wär t-illa a dd-ixlakän, wär t-illa a t-illän a säl Wa s-itawänna Mäjräd, Mäjräd ill'-e çur-Mässinäç, Mäjräd ənta a-s Mässinäç.

² Ill'-e s-tizarät çur-Mässinäç,

³ ənta a-s dd-ixlak Mässinäç härät iket-net, wär t-illa a dd-ixlakän ar s-ənta,

⁴ ənta a ässodärän härät iket-net, tämudre-ten-däç ihakk a-s ännur i-dägg-adəm;

⁵ ännur, ämiläwläw däç-tihay mäšan, unjäynät sär-s.

⁶ Osä-dd ähaləs dd-äsimašäl Mässinäç s-isəm-net Exya,

⁷ i-ad-umas tajuhe, amənän dägg-adəm s-ännur wa fäll-hasän-itajäyha.

⁸ Wär-ämoos ənta iman-net ännur, tajuhe-net a ämoos.

⁹ Ännur-i-hi, ənta a-s wa n-tidət dd-osän äddunya i-ad-impləwləw fäll-dägg-adəm, arr tiṭṭawen-näsän.

¹⁰ Wa s-itawänna Mäjräd, ijjäš-dd äddunya, təbnä-dd sär-s mäšan, tunjäy s-ad-t-əzzəy,

¹¹ osä-dd ännur äkall-net mäšan, wär t-äqbelän imälan-net,

¹² hakd a-wen-däç däç, wi t-äqbälne, omänän sär-s, äsdabät-tän ad-umasän aratan n-Mässinäç.

¹³ Aratan-en, tiwit-näsän, wär tämoos ta n-täsa wäla ta n-erhet n-taçəssa wäla erhet n-ägg-adəm, ti n-Mässinäç.

Mäjräd, iqqäl-dd ägg-adəm

¹⁴ Mäjräd, ämoos-dd ägg-adəm, izzäç-dd jere-näç ännufläy däç-ännuçmät d-tidət, näjjunfä däç-älxurmät-net, älxurmät daç wa ikarräš Alyaḍ s-wär-il' Abba i säl ənta.

¹⁵ Ənta-en-däç a fäll-äjjəyha ännäbi Exya a-s innä s-afälla: «Ad-hi-dd-işrəy ere hi-ojarän fäl-a-s ill'-e härwa wär dd-äxlekäç.»

¹⁶ Nəjräw iket däç-nänäç ejädär-nänäç däç-älxurmät n-ännuçmät-net, ajäraw nəja-däç, ilkam-as iyyän

¹⁷ fäl-a-s, əmmək wa s-ija Mässinäç Äṭṭawrät däç-äfuss n-ännäbi Mosa, ənta daç a-s ija ännuçmät-net d-tidət-net däç-äfuss n-ÿisaÄlmasex.

¹⁸ Mässinäç, wär t-illa ere s-käla t-inhäy mäšan, Rure-s wa n-iiyyän çur-s izzäçän, äsbayän-anäç-t-dd.

Tajuhe ta ij' Exya fäll-ÿisa

(Mätti 3:11-12; Marqəs 1:7-8; Luqa 3:15-17)

¹⁹ Ənta da tajuhe ta ij' Exya a-s sär-s dd-äšmäšälän imänokalän n-käl-Älyähud wi hänen Yärussälam, käl-tikutawen d-dägg-Lewi i-ad-t-səstənän d-a-wa ämoos.

²⁰ Wär hasän-iffer iman-net, inn'-asän: «Wädden näkk a-s Älmasex.»

²¹ Oläsän-t asəstan: «Adiš mi tämoosäd? Ämmuukkän käyy a-s ännäbi ʾƏli?» Inn'-asän: «Wär t-ämoosäç.» Ənnän-as: «Adiš käyy a-s ännäbi wa s-ənnän ännäbitän ilkam a dd-ass?» Inn'-asän: «Äbo!»

²² Oläsän-as tənna: «Adiš, mi tämoosäd? Nārha älwižab näwwäy i-äddinät wi hanäç-dd-äšmäšälne, ma tənne, mi tämoosäd?»

²³ Inn'-asän:

«Näkk a-s wa äşəçären däç-tenere, janneç:

«səssiḡədāt tabarāt dat-Emāli»,
s-əmmək wa s-tān-innā ānnābi Saya.†»

²⁴ Āddināt-win-dāḡ sār-s dd-āmešälnen, i n-taggayt ta n-käl-faris.

²⁵ Olāsān-t asəstan daḡ, ənnān-as: «Adiš mafäl salmaḡād āddināt dāḡ-aman a-s wādden kāyy a-s Ālmasex wāla, ʔəli wāla ānnābi wa s-ätwānna?»

²⁶ Āwwežāb-asān, inn'-asān: «Nākk, aman a dāḡ-salmaḡāḡ āddināt māšan, ill'-e jere-wān ere wār təzzeyām,

²⁷ ad-hi-dd-išrəy, wār-ānhājjāḡ wāla-dāḡ d-ad-ādəsäḡ issal n-tifādelen-net fäl mijraw-i-dāḡ hi-ija.»

²⁸ Tadābayt ta n-Bitanya təwārāt asālim n-ʔurdəni wa n-atāram a dāḡ-itajj a-wa-dāḡ, dihen-dāḡ ad-isalmaḡ Exya āddināt dāḡ-aman.

ʔisa, Ašāḡol n-Māssināḡ

²⁹ Ašāl wa n-ḡarāt-wen, inhāy Exya ʔisa ikk'-e-hi-dd, innā i-tamətte: «Ənhəywāt-ak Ašāḡol n-Māssināḡ wa itakkāsān ibākkaḡān n-āddunya!

³⁰ Ənta-i-dāḡ a fäll-hawān-ənnəḡ: ad-hi-dd-išrəy ere hi-ojārān fäl-a-s ill'-e hārwa wār dd-āxlekāḡ;

³¹ nākk iman-in, ibda wār t-əzzeyāḡ māšan, i-ad-dd-ibbuyən i-käl-Išrayil, oseḡ-dd i-ad-salmaḡāḡ dāḡ-aman.»

³² Olās daḡ Exya aḡəyh, inna: «Hannāyāḡ Unfas Šāddijān, ifal-dd išənnawān dāḡ-ānnuḡ n-tedābert mällāt har fälla-s āsjān, izzāḡ fälla-s.

³³ Kāla t-əllex wār t-əzzexāḡ māšan, wa hi-dd-āšmašälān i-ad-salmaḡāḡ dāḡ-aman, inn'-ahi: «Ere wa s-tənhāyād Unfas har fälla-s āsjān, izzāḡ fälla-s, ənta a ihakkān Unfas Šāddijān.»

³⁴ Nākk daḡ, ənhāyāḡ-t, ājjəyhāḡ a-s ənta a-s Rure-s n-Māssināḡ.»

Inəṭṭulab n-ʔisa wi āzzarnen

³⁵ Ašāl wa n-ḡarāt-wen, ibdad Exya d-inəṭṭulab-net əssin dāḡ-edāgg-wənnin-dāḡ a-s iswād,

³⁶ inhāy ʔisa okay ḡas, innā: «Ənhəywāt-ak Ašāḡol n-Māssināḡ!»

³⁷ Əslān inəṭṭulab-net wi n-əssin i-mājrād-wen-dāḡ ij' Exya ḡas, əlkāmān i-ʔisa.

³⁸ Āšnāšlām ʔisa ḡara-s, inhāy a-s əlkamān-as ḡas, inn'-asān: «Ma tārham?» Ənnān-as: «Rābbi, a-wen ālmāḡna-net: Āḡalim! Ənde d-təzzaḡād?»

³⁹ Inn'-asān: «Əyyāwāt, ad-t-tənhəyām.» Əḡlān, ənhāyān dihad izzāḡ, əzzāḡān ḡur-s ašāl-en-dāḡ. Itajj a-wen s-takkāšt.

⁴⁰ Inəṭṭulab wi n-əssin əslānen i-mājrād wa ij' Exya fäll-ʔisa ḡas əlkāmān-as, iyyān dāḡ-sān Idris wa n-āḡḡa-s n-Simyön Bəṭrus;

⁴¹ Idris-en-dāḡ a osān āḡḡa-s Simyön, inn'-as: «Əyyāw, nəjrāw Ālmasex». Ālmasex, ālmāḡna-net: Wa innəfrānān.

⁴² Ilwāy Idris Simyön s-ʔisa. Ikna ʔisa akāyad dāḡ-Simyön, inn'-as: «Wādden isəm-nāk: Simyön āgg Yunəs? Ad-kāy-iwār isəm Sefas». Sefas, ālmāḡna-net: Tāhunt.†

Ilkām Fəlibb d-Natanāhil i-ʔisa

⁴³ Ašāl wa n-ḡarāt-wen, ikka ʔisa teje ta n-Galila a-s āmmoqqās d-Fəlibb, inn'-as: «Fəlibb, əlkəm-ahi.»

⁴⁴ Fəlibb hakd Idris d-Bəṭrus, iket-nāsān, i n-taḡrəmt ta n-Bāṭsayda.

† 1:23 1:23 A-wa ānnābi dd-āzzarān i-ʔisa, ālolāy dāḡ-isālan-net əssayāt timad n-awātay dat-tiwit-net. † 1:42 1:42 Sefas dāḡ-Tālyunanit a has-itawānnen: Bəṭrus.

⁴⁵ Iglä Fəlibb ənta-däx har osa Natanähil, inn'-as: «Ašäl-i, nəjräw ere wa s-ij' ännäbi Mosa isälan-net däx-Ättäwrät, əlläxen daḡ ännäbitän s-ass-net: a t-ämoosän Ḡisa wa n-ägg Yusəf n-tayrəmt ta n-Näširät».

⁴⁶ Inn'-as Natanähil: «Ajän Näširät, a tät-dd-ifəl a olayän?» Inn'-as Fəlibb: «Eyyäw, ənhəy-t.»

⁴⁷ Inhäy Ḡisa Natanähil ikk'-e-hi-dd ḡas, innä: «Ašäl-i-š, hannäyäḡ U-Bänu-Işrayil n-ägg-aläšäl wär ha täkkärzäzzäl.»

⁴⁸ Inn'-as Natanähil: «Ənde hi-təzzäyäd?» Inn'-as Ḡisa: «Hannäyäḡ-käy härwa wär käy-dd-iḡra Fəlibb, a-s ija a-wen, tölled-t daw-tele n-ašar.»

⁴⁹ İdkäl Natanähil eməsli-net, innä: «Äḡalim, käyy a-s Rure-s n-Mässinäḡ, käyy a-s ämänokal n-Işrayil!»

⁵⁰ Inn'-as Ḡisa: «Ḡas a-wa-däx fäl hak-ənnəḡ hannäyäḡ-käy härwa tölled-t daw-tele n-ašar a fäl tomänäd? Əlməd a-s ilkam däx-k ad-tənhəyäd härätän ojärnen a-wen-däx təmyäre.

⁵¹ Älleḡəḡ-awän s-tidət tädduuttet† a-s ad-tənhəyäm işənnawän ämerän, tənhəyäm daḡ änjälösän n-Mässinäḡ tiwənən tizəbbun-dd fäll-Ägg-ägg-adəm.»

2

Iji n-Mässinäḡ wa äzzarän ija Ḡisa

¹ Käraḡ išilan ḡarät-a-wen, ij' azli däḡ-hin-tätiwäḡra ma-s n-Ḡisa däḡ-tayrəmt n-Käna ta n-Galila;

² ätwäḡr'-in daḡ Ḡisa s-azli-en-däḡ ənta d-inəttulab-net.

³ Əmdän aman n-läḡnəb wi äxxiimmärnen taməswanen däḡ-azli ḡas, tənn'-as ma-s: «Äddinät ya, äbas lan aman n-läḡnəb wi äxxiimmärnen əswän.»

⁴ Inn'-as Ḡisa: «Anna, tazidert, ässaḡät-in, wär dd-iwwəḡ härwa.»

⁵ Tənnä ma-s i-inaxdimän: «A hawän-innä-däḡ, təjəm-t.»

⁶ Əllan-t dihen säḡdis iḡsas mäqqornen əknanen däḡ-tähunt s-təggatän käl-Älyähud älwälä s-aman-wi tän-hänen; hak iyyän däḡ-iḡsas-en-däḡ, itiwəy teməḡe n-litär.

⁷ Innä Ḡisa i-inaxdimän: «Əḡkärät-dd iḡsas-i-hi aman»; əḡkärän-tän har imawän-näsän.

⁸ Inn'-asän daḡ: «Əlkəwät ämära, tawəyəm i-ere-wa ännihəḡän däḡ-imənsiwän»; jän a-wa hasän-inna.

⁹ Äkrəbbät emännähäd n-imənsiwän aman n-läḡnəb wi äxxiimmärnen s-wär-issen e-s t-dd-hän kud-däḡ əssanän inaxdimän-wi tän-dd-əlkäwnen siha s-dd-hän; iḡrä-dd ämazlay,

¹⁰ inn'-as: «Wär t-illa ere s-wädden aman n-läḡnəb wi äxxiimmärnen äzednen a isaswa äddinät har tän-ijməḡ ənniyät təzzar, işəşrəy-tän-dd wi wären əkna təzude məšan, käyy wi äzednen a təşşəşrəyäd.»

¹¹ Iji n-Mässinäḡ wa-däḡ ija Ḡisa däḡ-Käna ta n-Galila a-s iji-net wa äzzarän, äsnäfaläl-dd sār-s tärna-net dat-äddinät, omänän sar-s inəttulab-net.

¹² Ätrara Ḡisa ḡarät-a-wen, ikka tayrəmt ta n-Qäfärnaxum äddeew d-ma-s d-ayətma-s d-inəttulab-net məšan, wär-əhoja dihen.

Işşəşdəj Ḡisa ehän n-ämudd wa mäqqārən

(Mätti 21:12-13; Marḡəs 11:15-18; Luḡa 19:45-46)

¹³ Ohäz-dd ämudd n-käl-Älyähud wa n-Faşka ḡas, äjozäy Ḡisa, ikka Yärussälam.

¹⁴ Ogäz-dd däḡ-ehän n-ämudd wa mäqqārən ättuzžar n-iwdesän d-tihatten d-tidäberən d-käl-amähaş äqqiimän däḡ-s,

† **1:51 1:51** Däḡ-Tälyunanit: Amin, amin (S-tidət, tidət).

¹⁵ iknä-dd ebärtäk n-iyunan, ad-tän-isattäx ɔntäned d-tihatten-näsän d-iwdesän-näsän, išamähaš izärfan n-käl-amähaš, isibräxwil tisəskar-näsän,

¹⁶ ijanna i-ättužžar n-tidäberen: «Ekkəsät a-wa diha, wär jem ehän n-Abba-nin ehän n-mamäla.»

¹⁷ Innä a-wen xas, ɔktän-dd inəttulab-net a-s iktab däx-mäjräd n-Mässinäx a-s: «Tədgaž-ahi tärha n-ehän-näk.»

¹⁸ Eggädän-dd sār-s imizärän n-käl-Älyähud, ɔnnän-as: «Ma ämoos iji n-Mässinäx wa s-täddobed iji-net i-ad-hanäx-səfləsäd a-s a-wa jed ämära-däx, led sār-s.»

¹⁹ Inn'-asän: «Ändät ehän n-ämudd-wa-däx ad-hawän-t-dd səbdədäx däx-käraḍ išilan.»

²⁰ ɔnnän-as käl-Älyähud: «Käh! Ajän wädden ehän n-ämudd-wa-däx, ɔkkožät timərwen n-awätay d-sädis a ija ibinnəw təzzar imdä, xas ɔndek dihad ila ɔmmək ad-t-dd-səbdədäd käyy däx-käraḍ išilan?»

²¹ Ij'-asän ʒisa mäjräd-wen-däx mäšan, wär-əjrehän a-s ehän n-ämudd wa s-hasän-ihä isälan-net, taḡəssa-net ɔnta iman-net.

²² Šämad dd-inkär ʒisa jer-inəmmuttan a dd-ɔktän inəttulab-net tifer-tin-däx ija, omänän s-a-wa ɔnnän ɔlkəttabän d-a-wa innä ɔnta iman-net.

²³ Äzzäman-wen-däx n-ämudd wa n-Faška ässakäy däx-Yärussälam, omänän sār-s äddinät äjjootnen hannäyneren ijitän n-Mässinäx wi itäj,

²⁴ mäšan wär tän-ifles ed izzay-tän iket-däx-näsän,

²⁵ wär-ämḡatär daḡ, ad-has-äjjäyh äwadəm wäl' iyyän fäll-iyän ed, issan d-iman-net a-wa ihän ulh n-e d t-illäm ägg-adəm.

3

Edäwänne wa ija ʒisa d-Nikodem däx-isälan n-tiwit ta täynayät.

¹ Ehäd iyyän, ɔsä-dd iyyän däx-imänokalän n-käl-Älyähud la taggayt ta n-käl-faris s-isəm-net Nikodem ʒisa,

² inn'-as: «Älyalim,† nössan a-s käyy älyalim dd-äšimasäl Mässinäx a tämoosäd fäl-a-s ijitän n-Mässinäx wi täjjäd, wär t-illa ere äddooben iji-näsän ar s-ad-t-idhal Mässinäx.»

³ Äwwežäb-as ʒisa, inn'-as: «Älleḡeḡ-ak s-tidət tädduuttet† a-s a ikkäs äwadəm wär-ija tiwit ta täynayät dd-fälät išənnawän, wär mad-inhöy Təmmənəya ta n-Mässinäx.»

⁴ Inn'-as Nikodem: «Endek ɔmmək wa s-mad-iwəy äwadəm wäššärän? Ajän äddobät ad-iqqəl täsa n-ma-s, äj-dd tiwit ta s-sänatät?»

⁵ Inn'-as ʒisa: «Älleḡeḡ-ak s-tidət tädduuttet a-s ere wärän iwa s-aman d-Unfas Šäddijän, wär-e ijješ Təmmənəya n-Mässinäx

⁶ fäl-a-s, a-wa dd-toräw taḡəssa, i n-taḡəssa, a-wa dd-oräw Unfas daḡ, i n-Unfas.

⁷ Wär-itäqqänet eyäf-näk fäl-a-s innin ɔnneḡ-ak: «Wär hawän-t-təlla ar tiwit ta täynayät dd-fälät išənnawän.»

⁸ Wädden adu itəhhal siha s-irha, salläd i-eməsli-net mäšan, wär təssenäd siha s-dd-ihä wäla siha s-ikka, a-wen-däx daḡ, a ij' äwadəm iket-net dd-iwan s-Unfas n-Mässinäx.»

⁹ Issəstän Nikodem ʒisa daḡ, inn'-as: «Endek ɔmmək wa s-mad-äj a-wen?»

¹⁰ Inn'-as ʒisa: «End'-e-d-il' ɔmmək a-s käyy älyalim n-Işrayil ogdähän d-a-wa-däx, uhən-däx wär käy-hen isälan n-a-wen-däx?»

¹¹ Älleḡeḡ-ak s-tidət tädduuttet a-s nətajj isälan n-a-wa nössän, nətajäyha daḡ fäll-a-wa nənhäy mäšan käwänəḍ, wär tärḍem s-tajuhe-nänäx.

† 3:2 3:2 Däx-ʒäbranəyya: Rəbbi. † 3:3 3:3 Däx-Tälyunanit: Amin, amin: (S-tidət, tidət).

12 ʁas, kunta wär hi-töflesäm dihad hawän-ässewäläx däx-isälan n-härätän wi n-äddunya, ɔndek ɔmmək wa s-hi-mad-töflesäm afäl hawän-ässewäläx däx-isälan wi n-tidət ɔlkämnen n-išənnawän?

13 Wär t-illa ere iwwaḍän išənnawän kunta wädden ere wa-tän-dd-ifälän, a-wen a t-ämoosän Ägg-ägg-adəm-i däx-sän izzäxän.

14 Emmək-wa-däx s-issärjäj ännäbi Mosa taššält däx-tenere, ɔmmək-wen-däx day a-s ilzam, ad-itwəḍkəl Ägg-ägg-adəm,

15 dihen, ere sār-s omänän-däx, ad-ijrəw tämudre täxälälät

16 fäl-a-s, Mässinäx, ija i-äddunya tärha-ta-däx fäl ikfa Rure-s wa n-iyjän i-ere sār-s omänän-däx, wär-e ämmät, änn-ak, ad-ijrəw tämudre ta täxälälät;

17 Mässinäx, wär dd-äšmašäl Rure-s s-äddunya i-ad-tät-išräx, änn-ak i-ad-tät-iḅləs.

18 Ere sār-s omänän, wär t-e-išräx mäšan, ere sār-s wärän omen, äru d-itbät äššäreḅa-net fäl-a-s, wär-omen s-Rure-s n-Mässinäx wa n-iyjän.

19 Äddälil n-äššäreḅa-en, ɔnta da: ɔsä-dd ännur äddunya mäšan, ässofän dägg-adəm tihay ed timaşalen-näsän ti läbasnen.

20 Äwadəm itamašalän a läbasän härkuk äššunjät ännur, wär dawa-s dd-itəmmil ed äksuḍ ad-dd-əffukkärän erk imojjan-net

21 mäšan, ere iglan fäl tidət, wär-äksuḍ ad-dd-äkk ännur i-ad-dd-infiləl a-s imojjan-net, Mässinäx a-s ɔssəbab-näsän.»

Tajuhe ta s-sänatät ija Exya wa n-Enəsselmäx fäll-ʁisa

22 Ɖarät-a-wen, ikka ʁisa d-inəṭṭulab-net teje ta n-Älyähudəyät, ɔzzäxän dihen-däx, ad-isalmax äddinät.

23 A-s ija a-wen, Exya ɔnta, tisən-t-dd äddinät, isalmax-tän däx-edägg s-isəm-net Anun däx-ihəz n-tadäbayt ta n-Saləm fäl-a-s, ɔjjətän aman dihen.

24 A-wen itajj härwa wär hin-ätwäjär Exya däx-takärmüt.

25 Tənkär tamḅənnant jer-inəṭṭulab n-Exya d-ägg-Älyähud iyyän däx-isälan n-älwälla wa išäšdajän ḅas,

26 ɔkkän-t-dd, ɔnnän-as: «Älyalim,† ähaləs wa s-käla dār-s tärtäyäd fäll-täjjəyhäd fäll-ašrut n-ejäns n-ʁurdəni wa iyyäḍän, ämära isalmax ɔnta-däx, takkän-t äddinät iket-näsän.»

27 Inn'-asän Exya: «Ägg-adəm, wär-e äj ar a-wa dār-t-äskälläf Mässinäx.

28 Wädden, täjjəyhäm iket-näwän a-s ɔnney: <Näkk, wär-ämoosäx Älmasex, ämišəl ḅas a dd-jeḅ data-s.>

29 Nəssan a-s ämazlay ɔnta a ilän tämazlayt mäšan, amidi n-ämazlay-i ḅur-sän t-illän äsijäd, äsidäwät-t emäslä n-ämazlay wa s-isäll. Elmədät a-s tedäwit-ten-däx itajj amidi n-ämazlay, a jeḅ näkk-däx ämära, tedäwit-in daḅ, təjlay, təmda.

30 Imḅaret isəm-net, ifnəzet wa-nin.»

Isälan n-Wa dd-ifälän išənnawän

31 «Ere wa dd-ifälän išənnawän, ɔjār äddinät iket-näsän, ere wa dd-ifälän äkall, i n-äkall, wär mad-äj daḅ ar isälan n-äkall-i-däx mäšan, ere wa dd-ifälän išənnawän, [ɔjār äddinät iket-näsän ed]

32 ɔnta isälan n-a-wa inhäy d-a-wa islä a itajj mäšan, wär t-illa ere t-iflasän.

33 Ere wa t-ifläsän, ässiitbät tənna n-Mässinäx

34 fäl-a-s, ere wa dd-äšmašäl Mässinäx, a-wa innä Mässinäx a ijanna ed äsinäfläy-t Mässinäx däx-isuf n-Unfas-net.

35 Abba ikna tärha n-Rure-s, härät iket-net a ija däx-ifassän-net.

† 3:26 3:26 Däx-ʁäbranəyya: Rābbi.

³⁶ Ere wa omänän s-Rure-s, ijraw tämudre ta täxlälät, ere wa sär-s wärän omen, wär mad-inhöy tämudre ta ihäkk Mässinäx ed, insa fälla-s aḍkär n-Mässinäx.»

4

Tu-Sämarit ta tomänät s-Ḡisa

¹ Ilmäḍ Ḡisa a-s əslän käl-faris a-s ojarän inəṭṭulab wi isälmaḡ ənta, uhən wi isälmaḡ Exya, a-wen-däḡ a äḡelän.

² Tidət a-s, Ḡisa ənta iman-net, wär t-illa ere əssilmäḡ, inəṭṭulab-net ḡas a salmaḡnen äddinät.

³ Ifäl teje ta n-Älyähudəyät, oläs tikawt n-ta n-Galila

⁴ mäšan, i-ad-äj a-wen, ilzam-t ad-ijləy teje ta n-Sämari.

⁵ Ässookal har dd-iwwäḍ aḡrəm n-Sämari s-isəm-net Sišar, ikkä dihen anu wa ihän ašəkrəš wa iḡäš ännäbi Yaḡub təzzar ikf'-e i-rure-s Yusəf, anu-en, iwär-t isəm wa n-Yaḡub.

⁶ Osä-dd anu ḡas, äqqimä fäll-əmm-net i-ad-isunf a-wa-däḡ has-ija aləḍḍeš n-asikəl. A-wen a itajjän s-tarähut.

⁷ Äqqiima fäll-əmm n-anu-en-däḡ a-s dd-tosa tu-Sämarit dd-təšrajät, inn'-as Ḡisa: «Tamäḍt, säsw'-ahi-dd.»

⁸ A-s itäj a-wen-däḡ, əkkan inəṭṭulab-net aḡrəm i-ad-dd-žənšən imənsiwän əkšän.

⁹ Tənn'-as tamäḍt: «Ma käy-äsihälän käyy-i n-ägg-Älyähud, ad-däḡ-i tətäräd aman näkk-i n-tu-Sämarit?» Äzzäman-en, käl-Älyähud d-käl-Sämari, wär-änmännäkän.

¹⁰ Inn'-as Ḡisa: «Ənnar təssanäd fäll-isuf n-Mässinäḡ d-ere wa ham-ijännen: <säsw'-ahi-dd>; kämm a has-madän-änn: <säsw'-ahi-dd>; äkf'-im ənta, aman əddärnen.»

¹¹ Tənn'-as tamäḍt: «Äḡalim, anu-i, i šəjreen, käyy day wär led äja, ḡas, əndek əmmək wa s-mad-dd-təjrəwäd aman əddärnen wi s-jänned?

¹² Ajän tojaräd abba-nänäḡ ännäbi Yaḡub-i hanäḡ-ikfän anu-i-däḡ däḡ-iswa ənta d-aratän-net d-irəzzejän-net?»

¹³ Inn'-as Ḡisa: «Ere iswän aman n-anu-i-däḡ, ad-aləs fad

¹⁴ mäšan, ere iswän aman-wi t-mad-äkfäḡ, wär däḡ-s ilkem fad ed, ad-däḡ-s umasän aman wi t-mad-äkfäḡ, a däḡ-has-dd-təffay tämudre ta täxlälät.»

¹⁵ Tənn'-as tamäḍt: «Äḡalim, säsw'-ahi däḡ-aman-win-däḡ i-ad-äbas tifadäḡ, əbdəwäḡ s-iyyəät d-ašəroj n-anu-i-däḡ.»

¹⁶ Inn'-as Ḡisa: «Əḡləw, idaw-dd d-ähaləs-näm, täqqələd-ahi-dd.»

¹⁷ Tənn'-as tamäḍt: «Wär-ədobänäḡ.» Inn'-as Ḡisa: «Tənned tidət a-s wär tädobänäd

¹⁸ fäl-a-s, jed səmmos idubnawän mäšan, təzjarät-tän-dd iket-näsän, ähaləs day wa dār-tärtäyäd ämära-däḡ, wär tämsäxläläm.»

¹⁹ Tənn'-as tamäḍt: «Äḡalim, hannäyäḡ a-s käyy ya ännäbi a tämoosäd!

²⁰ Ibda abbatän-nänäḡ aḍaḡ-wa-däḡ a fäll-ḡabbädän Mässinäḡ mäšan, käwäned-i n-käl-Älyähud, tənnäm wär t-illa äḡyibadät n-Mässinäḡ ar däḡ-Yärussälam.»

²¹ Inn'-as Ḡisa: «Tamäḍt, əfləs-ahi, ilkam älwäqq d-wär mad-täḡbədäm Abba fäll-aḍaḡ-wa-däḡ wälä däḡ-Yärussälam.

²² Käwäned, ḡabbädäm a wär təssenäm mäšan, näkkäned nəssan ere wa nəḡabbäd ed, əḡəllas, käl-Älyähud a dd-ifäl.

²³ Mäšan, ilkam ässaḡät s-ənta-da-däḡ nəha ämära-däḡ däḡ-mad-äḡbədän imumənän wi n-tidət Abba s-tidət däḡ-ənniyätän-näsän fäl-a-s, inayḡbadän əjlaynen šund-win-däḡ a has-əjrazzen.

24 Mässināḡ, Unfas, wār-itətwənhəy, a-wen-dāḡ a fāl ere t-iḡabbādān, iḡbədət-t s-ənniyāt d-tidət.»

25 Tənn'-as tamädt: «Eßsanāḡ a-s Wa innəfrānān s-itawānna Älmaseḡ, ilkam ad-dd-ass, afäl dd-osa, ad-hanāḡ-isəssiḡəd dāḡ-härät iket-net.»

26 Inn'-as Ḳisa: «Näkk-i-dāḡ ham-ämmiijrādān a t-ämoosān.»

27 Ämmiijrād-as Ḳisa härwa a-s dd-əqqälān inəttulab-net. Iqqān a-wa s-ämmiijrād i-tamädt iḡäfawān-nāsān māšan, hakd a-wen-dāḡ, wār tān-ihā-i t-ässistānān d-a-wa dāḡ-s irha wāla a-wa fāl dār-s ädiwānnāt.

28 Toyyə tamädt aḡāsis-net dihen-dāḡ, täqqäl aḡrəm, tənnä i-äddināt:

29 «Eyyāwāt, ənhəywāt ähaləs hi-illāḡen a-wa s-kāla t-jəḡ iket-net, ämmuukkān a-s ənta-i-dāḡ a-s Älmaseḡ.»

30 Ezzārān-dd käl-aḡrəm, əkkān-dd Ḳisa.

31 A-s itāj a-wen, salḡadān inəttulab älḡalim-nāsān i-ad-ämmäklāw

32 māšan, inn'-asān: «Näkk, leḡ a əkšəḡ wār təssenām.»

33 Ad-tinmənnin: «Ajān iwwāy-as-dd äwadəm amənsi ḡara-nāḡ?»

34 Inn'-asān Ḳisa: «Amənsi-nin, iji n-erhet n-Wa hi-dd-äšmašälān, sətbətāḡ ämašäl-net.

35 Wädden a jannem diha-dāḡ s-əkkəz orān ad-ämalāyān išəkraš? Ənneḡ-awān: ənhəywāt, əḡkəlāt tiḡtawen-nāwān, təkyədām dāḡ-išəkraš, əḡḡan, wār-ərhen ḡas ar aḡili.

36 Ässaḡāt wa d-ijarrāw ānaxdim wa itiləyən išəkraš älxaqq n-tide-net, ənta-da-dāḡ dāḡ-təssəba n-ad-isədəw allon-net i-tämudre ta täḡlälāt, i-ad-imzəyyət ānaxdim-wa äddomen d-wa itiləyən tedāwit

37 ed, ozz wa innān: <äddomāt iyyān, olāy wa iyyāḡān>, innä tidət.

38 Näkk, ässəkāḡ-kāwān illuy n-išəkraš dāḡ-wān wāren irh' äššahāt, iyyāḡ a tān-ixdāmān, tārbāxām kāwāneḡ-dāḡ äššahāt-nāsān.»

39 Omānān käl-Sāmari n-aḡrəm-ənnin-dāḡ äjjootnen s-Ḳisa dāḡ-təssəba n-tajuhe ta hasān-təja tamädt a-s hasān-tənnā: «Illāḡāt-ahi a-wa s-kāla t-jəḡ iket-net.»

40 A-wen-dāḡ a fāl osān-dd Ḳisa ḡas, dälān-t d-ad-ḡur-sān izzāḡ, ija ḡur-sān əssin išilan.

41 Eßlān-as ənta iman-net ämmiijrād ḡas, jān wi sār-s omānnen əjut ojārān wənnin.

42 Ənnān wi sār-s omānnen i-tamädt: «Ämära, äbas sār-s noman dāḡ-təssəba n-a-wa hanāḡ-tənned, nəsl'-as iman-nānāḡ, nomān daḡ a-s ädduuttāt a-s ənta a-s Ämaḡlas n-äddunya.»

Rure-s n-ägg-əlxəkum wa äzozāy Ḳisa

43 Ässakāy Ḳisa əssin išilan-win-dāḡ dihen ḡas, ikkä teje ta n-Galila

44 ed, issan a-s: «Wār t-illa ännābi ätiwäsämḡārān dāḡ-äkall-net.»

45 Māšan, diha-dāḡ d-hin-iwwāḡ Galila, ad-t-äsbärrākān käl-äkall ed, ənhāyān dāḡ-sān i äjjootnen dāḡ-wi ässakāyən ämudd dāḡ-Yārussālam a-wa ija Ḳisa iket-net.

46 Iqqāl Ḳisa ḡarāt-a-wen tadābayt ta n-Kāna hāt teje ta n-Galila dāḡ-äsmāškäl aman, ij'-en aman n-lāḡnāb äxxiimmārnen. A-s itāj a-wen-dāḡ, ih' ägg-əlxəkum iyyān s-ärhin rure-s aḡrəm wa n-Qāfārnaḡum.

47 Islā a-s Ḳisa ifäl-dd Älyähudəyāt s-Galila ḡas, ikk'-e-hi-dd, ad-t-ilaqqād i-ad-dd-itruḡ, izuzəy rure-s s-işwar t-äba.

48 Inn'-as Ḳisa: «Adiš kāwāneḡ a təkkām wār tənheyām ijitān n-Mässināḡ d-tikunen, wār-e tamənām s-Mässināḡ.»

49 Inn'-as kābtān: «Äḡalim, nāḡlet şik iket-di d-wār-ämmut alyāḡ-in.»

50 Inn'-as Ḳisa: «Eḡləw, rure-k iddar.» Iflās kābtān a-wa has-innä Ḳisa, iglä.

⁵¹ Ikka-dd ehän-net härwa a-s has-dd-əlkaḍän inaxdimän-net, ənnän-as: «Rure-k, iddar.»

⁵² Issəstän-tän d-əssaḡät wa-däḡ ijrāw əlafu, ənnän-as: «Əndəšel s-tezzar ad-toyyä tenäde.»

⁵³ Inhäy abba n-alyaḍ a-s əlwäqq-wen-däḡ iman-net ad-has-innä Ḳisa: «Rure-k, iddar». Omän əšäl-wen-däḡ s-Ḳisa ənta hakd ejädäš-net iket-net.

⁵⁴ Iji n-Mässinäḡ wa-däḡ a-s wa s-əssin ija Ḳisa ḍarät efel-net i-Əlyähudəyät s-Galila.

5

Anəbdon wa əzozäy Ḳisa

¹ Ijä əmudd iyyän daḡ n-käl-Əlyähud ḡas, oläs Ḳisa tikawt n-Yərusšalam.

² Yərusšalam, uješ-net wa s-itawänna wa n-tihatten, h'-e təsahayt n-aman s-isəm-net dəḡ-Ḳäbranəyya: Bätzata, əḡlaynät-tät səmmosät tisəkla

³ daw-ənsan imarhinän d-iməddorḡal d-inəbdan d-inaxyabän əjjootnen [əqqalnen i-eməremar n-aman

⁴ fäl-a-s dehiyyän, itizəbbut-dd ənjəlos n-Eməli dəḡ-təsahayt, isəmrumär aman-net. Ere əzzarän s-ujəš n-aman-en-däḡ ḍarät a-s tän-əsiməramär ənjəlos, ad-izzəy a təmoos turhənnan-net dəḡ].

⁵ Ins' əhaləs dihen ibdanän a ilan kərəḍät timərwen n-awätay d-əttam.

⁶ Inhäy-t Ḳisa insa, ilmäd dəḡ-iman-net a-s əhoja əssins'-e bəddin-net dihen-däḡ ḡas, inn'-as: «Ajän tərhed ad-käy-dd-iqqəl əssexät-nək?»

⁷ Inn'-as anəbdon: «Əḡalim, wär leḡ əwadəm hi-ijärän dəḡ-təsahayt e-d əmramärän aman. E-d sār-sän dd-əmhärhämärəḡ-däḡ, ad-hi sār-sän išwār ere hi-ojärän armuḍ.»

⁸ Inn'-as Ḳisa: «Əbdəd, əḍkəl asəftäḡ-nək, ərjəš.»

⁹ Izzäy əhaləs əlwäqq-wen-däḡ, iḍkäl asəftäḡ-net, irjəš. Əšäl wa d-itəjj a-wen-däḡ, əšäl n-əssəbət-i n-təsonfat.

¹⁰ Izzäy ḡas, osän-t-dd imizärän n-käl-Əlyähud, ənnän-as: «Ajän wär təssenäd a-s əšäl-i, əssəbət-i-däḡ wär hak-xälal aggay n-asəftäḡ-nək.»

¹¹ Inn'-asän: «Əhaləs wa hi-əzozäyän, a hi-innä: <Əḍkəl asəftäḡ-nək, ərjəš.> »

¹² Ənnän-as: «Ma əmoos əhaləs wa hak-innä: <Əḍkəl asəftäḡ-nək, ərjəš?> »

¹³ Əhaləs wa izzäyän, wär-izzey ere wa t-əzozäyän ed əzozäy-t Ḳisa ḡas, izjār tamətte.

¹⁴ Əmmoqqäs dār-s Ḳisa ḍarät-a-wen dəḡ-ehän n-əmudd wa məqqärän, inn'-as: «Əməra d-təzzeyäd, wär tolesäd iji n-abəkkaḍ, uksaḍ ad-käy-ijrəw a irnän a-wa s-käla käy-ijrəw.»

¹⁵ Igl' əhaləs ḍarät-a-wen, illäḡät i-imizärän n-käl-Əlyähud a-s Ḳisa a t-əzozäyän.

¹⁶ Əslän i-a-wen ḡas, ad-tattärän arəmas n-Ḳisa ed əmešäl iji n-Mässinäḡ wen-däḡ dəḡ-əšäl n-əssəbət-i n-təsonfat.

¹⁷ Inn'-asän Ḳisa: «Abba-nin, ixdam härkuk, nəkk-däḡ, a-wen-däḡ a jeḡ.»

¹⁸ Əmoos a-wen əməra əsarü wa fäl tattärän imizärän n-käl-Əlyähud iji n-iman-net ed ənnän, wär-issəmyär əšäl wa n-əssəbət-i n-təsonfat, əsisəgdäh daḡ iman-net d-Mässinäḡ ed, innä Abba-net a əmoos.

Turhajät ta ikfä Mässinäḡ Ḳisa

¹⁹ Inn'-asän Ḳisa daḡ: «Əlleḡeḡ-awän s-tidət tədduuttet† a-s, wär t-illa a ixaddäm Rure-s n-Mässinäḡ ar a-wa s-inhäy Abba-net ixdam-t, a-wa əmešäl Abba iket-net, ad-t-əməšäl Rure-s ənta-däḡ

† 5:19 5:19 Dəḡ-Tälyunanit: Amin, amin (S-tidət, tidət).

²⁰ fäl-a-s, Abba ikna tärha n-Rure-s, isakn'-e daḡ a-wa itamašal iket-net, ad-t-isəkən daḡ ijitan ojännen wi-däḡ təmyäre, əknən iḡäfawän-näwän uḡən.

²¹ Fäl-a-s, əmmək wa s-dd-isänkar Abba inəmmuttan i-ad-tän-isudär, əmmək-wen-däḡ daḡ a-s ihakk Rure-s tämudre ere wa s-tät-irha.

²² Wär-išərräḡ Abba äwadəm wäl' iyyän mäšan, ija äššäreḡa n-härät iket-net jer-ifassän n-Rure-s

²³ däḡ-təssəba n-ad-t-səmyärän äddinät iket-näsän s-əmmək wa s-ässimḡärän Abba-net. Ere wärän issəmyär Rure-s n-Mässinäḡ, wär mad-isəmyär Abba-i t-dd-äšmašälän.

²⁴ Älleḡeḡ-awän s-tidət tädduuttet a-s ere äsjädän i-mäjräd-in, omän s-wa hi-dd-äšmašälän, ijraw tämudre ta täḡlälät, wär-e inhöy äššäreḡa, änn-ak, ad-dd-ihləbbət däḡ-ifassän n-tamättant, ijjöš tämudre ta täḡlälät.

²⁵ Älleḡeḡ-awän s-tidət tädduuttet a-s imal-dd ässaḡät s-ənta-da-däḡ nəha däḡ-mad-əslən inəmmuttan i-eməsli n-Rure-s n-Mässinäḡ. Wi has-maden-isəll, ad-əddärän

²⁶ fäl-a-s, əmmək-wa-däḡ s-tämudre, ifassän n-Abba a təha, əmmək-wen-däḡ daḡ a-s ikfa Rure-s tädabit n-ad-isudär äddinät.

²⁷ Ənta a ikfä tädabit n-äššäreḡa-näsän ed ənta iman-net a-s Ägg-ägg-adəm.

²⁸ ḡas, wär täqqännet iḡäfawän-näwän fäl-a-s, imal-dd ässaḡät däḡ-mad-əslən inəmmuttan iket-näsän i-eməsli n-Ägg-ägg-adəm.

²⁹ Ašäl-en dd-nakkär tamətte jer-inəmmuttan, äddinät wi ämešälnen sərho, ad-dd-ənkärän i-tämudre ta täḡlälät, wi s-tälläbäst ḡas a ämešälän, ad-dd-ənkärän i-äššäreḡa.»

ḡisa Älmasex, tidət ḡas a isayra tamətte

³⁰ «Näkk, wär t-illa fäw a tajjäḡ d-iman-nin ḡas, tənna n-Mässinäḡ ḡas a-s šarräḡäḡ, äššäreḡa-nin daḡ härkuk oḡad ed, wädden erhet wa n-iman-in a-s tattäräḡ iji-net, wär tättäräḡ ar iji n-erhet n-Wa hi-dd-äšmašälän.

³¹ Afäl äqqäläḡ tajuhe i-iman-in, wär mad-tənfəw tajuhe-nin härät.

³² Ere säl näkk a fäll-i itajäyhen, əssanäḡ daḡ a-s tajuhe-net fäll-i ənta, wär tät-iha äššäk.

³³ Wädden a-s täšmašäläm äddinät s-Exya, äjjöyha fäll-i.

³⁴ Əlmədät a-s näkk, wär t-illa ägg-adəm däḡ-tättäräḡ tajuhe mäšan, a-wa hawän-ənnəḡ, ənnəḡ-awän-t däḡ-derhan n-ad-täḡləsäm.

³⁵ Exya, a-s dd-osä, ämoos tefätelt tärḡat, tämiläwläw mäšan, wär tötteräm ar tedäwit n-ässaḡät əndärrän däḡ-ännur-net.

³⁶ Näkk, leḡ tajuhe tojärät ta fäll-i ijä Exya fäl-a-s, ijitan wi s-hi-ikfa Abba tädabit-näsän, əntäneḡ-en-däḡ a äsidättätnen s-ənta a hi-dd-äšmašälän.

³⁷ Abba daḡ-i hi-dd-äšmašälän, äsidättät a-wa ənnəḡ mäšan, wär käla təsläm i-eməsli-net, wär käla t-tənhäyäm daḡ,

³⁸ tänimäšräyäm daḡ i-mäjräd-net ed, wär tomenäm s-ere wa dd-äšmašäl.

³⁹ Əlkəttabän n-Mässinäḡ di-däḡ safäykem, tammäḡäm däḡ-sän i-tämudre ta täḡlälät, a tajäyhanen fäll-i

⁴⁰ mäšan, hakd a-wen-däḡ, tunjayäm s-ad-hi-dd-təkkəm näkk, i-ad-təjrəwäm tämudre ta täḡlälät.

⁴¹ Təmmal-in wädden dägg-adəm a dd-təfal

⁴² mäšan, əzzayäḡ-käwän, əssanäḡ a-s wär təha tärha n-Mässinäḡ ulhawän-näwän.

⁴³ Näkk-i dd-osän fäll-isəm n-Abba-nin, tənkaräm-ahi mäšan, afäl käwän-dd-osa ere iglan däḡ-älhimmät n-iman-net, šik a-s mad-t-täqbələm.

⁴⁴ Əndek əmmək wa s-mad-tamənäm käwäneḡ-i wären ətəmmäḡ ar i-təmmal jer-iman-näwän, a-s ija a-wen, wär təmməḡäm i-təmmal ta dd-fälät Mässinäḡ-i n-iiyän.

⁴⁵ Wār teḡalāt näkk a käwän-e-isəḍləmän dat-Abba, ännäbi Mosa-i s-tənnäm ənta a dāḡ-jarām äṭṭāma, a käwän-e-isəḍləmän

⁴⁶ fäl-a-s, ənnar təflasäm ännäbi Mosa, tamənäm sār-i ed, isālan-nin, iktab-tän.

⁴⁷ Ƴas, šāmad wār təfləsäm a-wa iktāb, əndek əmmək wa s-mad-təfləsäm a-wa hawän-janney?»

6

Äsyāwän Ƴisa səmmos afdän n-äwadəm (*Mätti 14:13-21; Marqəs 6:30-44; Luqa 9:10-17*)

¹ Ijläy Ƴisa ɗarāt-a-wen s-asālim n-ejānš wa iyyäḍän n-Galila s-itawänna wa n-Tibäryad.

² Əlkämän-as-dd äddinät äjjootnen hannäyнен ijitän n-Mässinäḡ wi s-izizuy imarhinän.

³ Iwwän taɗayt ənta d-inəṭṭulab-net, äqqima fälla-s.

⁴ Äzzāman-en, ohaz-dd ämudd n-käl-Älyähud wa s-itawänna Faška.

⁵ Iɗkäl Ƴisa akäyad-net, inhäy tamətte ta täjjet t-dd-təkkät Ƴas, inna i-Fəlibb: «Əndek diha d-mad-nəžänš tijəlwen äššikšänen tamətte-ta-dāḡ?»

⁶ Irrum Ƴas a t-itajj ed issan ƣur-iman-net a-wa mad-äj.

⁷ Äwwežäb-as Fəlibb, inn'-as: «Kud-nəžžənša tijəlwen n-sānatāt timaɗ n-ärriyal n-azrəf-dāḡ, wār mad-igdäh a-wen i-tamətte jat əjut-wa-dāḡ kud-dāḡ s-afärs-afärs.»

⁸ Iggäd-dd iyyän dāḡ-inəṭṭulab wa s-isəm-net Idris n-änḡa-s n-Simyon Bəṭrus, inn'-as:

⁹ «Ill'-e alyaɗ diha ilan səmmosät tijəlwen n-tärruza d-əssin imānan mäšan, a-wen ma ikna dāḡ-tamətte jat əjut-wa-dāḡ?»

¹⁰ Inn'-asän Ƴisa: «Säqqəymät tamətte.» Eddäg-en, ässiidwäl teyəšše, täqqima fälla-s tamətte iha a iwwäḍän səmmos afdän n-ähäləs.

¹¹ Iɗkäl Ƴisa tijəlwen ti n-səmmosät, ämmoy i-Mässinäḡ təzzar, äzun-tänät i-tamətte. Ija a-wen-dāḡ daḡ i-imānan wi n-əssin, təkša tamətte har tässakäy.

¹² Älwäqq wa d-əkšän, əyyəwänän, innä Ƴisa i-inəṭṭulab-net: «Sädwät-dd ifärsän wi äjoläšnen i-ad-wär-ibäxxəs əttäḡam.»

¹³ Äsdāwän-dd a-wa dd-əjläšän äddinät, osän-t iɗnäy märaw deketän d-əssin n-tijəlwen.

¹⁴ Ənhäyän äddinät iji n-Mässinäḡ wa s-iket t-ija Ƴisa Ƴas, ənnän: «Ädduuttät a-s ənta-da-dāḡ ännäbi wa ilän s-a dd-ass äddunya.»

¹⁵ İlmäd Ƴisa a-s ärhan ad-t-səmmənukəlän s-äššil Ƴas, ifäl-tän, oläs aggan n-taɗayt ənta Ƴas.

Räjjoš n-Ƴisa fäll-aman (*Mätti 14:22-27; Marqəs 6:45-52*)

¹⁶ İjä ehäɗ Ƴas, ätrarän-dd inəṭṭulab-net ejānš,

¹⁷ əjjäšän turäft n-aman, ad-jalläyän ejānš s-efäyy wa n-aḡrəm wa n-Qäfärnaxum. A-s itajj a-wen-dāḡ, janät tihay, wār tän-dd-äwweɗ daḡ Ƴisa härwa.

¹⁸ İnkär-dd fälla-sän aɗu äššoohen, änmäntaš ejānš.

¹⁹ Äḡyämnen turäft n-aman-näsän har ujęän asālim n-ejānš s-a iwwäḍän səmmos meḡ säɗis kelumetärän təzzar, ənhäyän-t, ikk'-en-dd, irjaš fäll-aman.

²⁰ Ärmäḡän mäšan, inn'-asän: «Näkk a-wa, wār tärmeḡäm.»

²¹ Diha-dāḡ d-əttärän ad-dd-ijjəš turäft fälla-sän ad-täsjän, təɗäs äkall wa əkkän.

Tajella ta n-tidət häkkät tämudre

²² Äffaw ƣas, ƚjrahän-in äddinät-wi wärnen asälim n-ejänš wa dd-fälän a-s turäft n-aman tiyyät ƣas a-s käla täsjän dihen mäšan, wär däƣ-s igla Ƴisa, inəttulab a däƣ-s ƚglänen, äkunän.

²³ Osänät-dd daƣ turfen n-aman tiyyäð dd-falnen Tibäryad, ƚkkanät-dd edägg-wənnin däƣ-əksän äddinät tijəlwen darät tämayit ta ija Ƴisa i-Emäli.

²⁴ Təjräh-in tamette a-s Ƴisa hakd inəttulab-net äbas t-əllan dihen ƣas, ƚjjäšan turfen n-aman ti s-iket dd-osänät, ƚkkän Qäfärnaxum, ƚmmaƣän-as.

²⁵ Ƴjrawän-t fäll-asälim n-ejänš wa iyyädän ƣas, ƚnnän-as: «Älyalim, ƚmme dd-tosed diha?»

²⁶ Inn'-asän Ƴisa: «Älleƣeƣ-awän s-tidət tädduuttet† a-s wädden ijitan n-Mässinäƣ wi tənähäm a fäl hi-tammäƣäm, änn-ak, tammäƣäm-ahi däƣ-tössəba n-tijəlwen ti-däƣ təyyəwänäm.

²⁷ Wär täxdemäm i-išəkša-i s-ilkam ad-tän-iba, änn-ak, äxdəmät i-išəkša wi dd-tiirəwnen sār-wän tämudre ta täylälät-i käwän-mad-äkf Ägg-ägg-adəm, ed ənta-endäƣ a äswär Abba Mässinäƣ ešwäl-net.»

²⁸ Ƴnnän-as: «Ƴndek ƚmmək wa s-mad-näxdəm erhet n-Mässinäƣ?»

²⁹ Inn'-asän Ƴisa: «Erhet n-Mässinäƣ a t-ämoosän ad-təfləsäm wa dd-äšmašäl.»

³⁰ Ƴnnän-as: «Säkən-anäƣ iji n-Mässinäƣ wa hanäƣ-käy-madän-isəfləs.

³¹ Abbatän-nänäƣ a-s ƚzzaƣän tenere, ƚksän tajəlla ta hasän-dd-äsfäl Mässinäƣ išənnawän fäl-a-s, iktab a-s:

‹Ikf'-en Mässinäƣ tajəlla dd-falät išənnawän i-ad-tät-əksən.› »

³² Inn'-asän Ƴisa: «Älleƣeƣ-awän s-tidət tädduuttet a-s wädden ännäbi Mosa a käwän-ikfän tajəlla ta dd-fälät išənnawän, Abba-nin ənta, ad-käwän-äkf tajəlla ta n-tidət dd-fälät išənnawän

³³ ed, tajəlla ta ihäkk Mässinäƣ a tät-ämoosän ere wa dd-ifälän išənnawän, ənta a ihakkän tämudre i-äddinät.»

³⁴ Ƴnnän-as: «Älyalim, ten-däƣ tajəlla, äkf'-anäƣ-tät härkuk.»

³⁵ Inn'-asän Ƴisa: «Näkk a-s tajəlla ta hakkät tämudre, wa hi-dd-ikkän, wär-ilkem ad-älluz, wa sār-i omänän wär-ilkem ad-äffud.

³⁶ Ässiilmädäƣ-käwän a-s tənähäm-ahi mäšan, tunjäyäm tomänäm.

³⁷ Ƴas, ƚlmədät a-s äddinät-wi hi-ikfa Abba-nin a hi-dd-asən iket-däƣ-näsän, wär mad-äkfäƣ daƣ ärori-nin i-ere hi-dd-ikkan

³⁸ ed, wär dd-feläƣ išənnawän i-ad-äjäƣ erhet-in, fäläƣ-tän-dd i-ad-äjäƣ erhet n-Wa hi-dd-äšmašälän.

³⁹ Erhet daƣ n-Wa hi-dd-äšmašälän a t-ämoosän, ad-wär-äsbätäƣ wäl' iyyän däƣ-äddinät-wi hi-ikfa, änn-ak, a irha ad-tän-dd-sənkäräƣ däƣ-tamättant ašäl wa ilkämän

⁴⁰ fäl-a-s, erhet n-Abba-nin ənta da: e d t-illäm ere sār-i omanän näkk-i n-Rure-s, ad-ijrəw tämudre ta täylälät, sənkäräƣ-t-dd däƣ-tamättant ašäl wa ilkämän.»

⁴¹ Ad-simtəktikän käl-Älyähud jer-iman-näsän fäl-a-s innin inn'-asän: «Näkk a-s tajəlla ta dd-fälät išənnawän»,

⁴² tinmənnin: «Ak wa ənta, wädden Ƴisa wa-däƣ n-ägg Yusəf, nəzzay ti-s, nəzzay ma-s? Ƴas, ma t-isawännen išənnawän a dd-ifal?»

⁴³ Äwwežäb-asän, inn'-asän: «Äyyät fälla-wän takšiwen,

⁴⁴ wär t-illa ere äddoben ad-hi-dd-äkk ar s-ad-t-dd-intaš Abba-nin sār-i, ere daƣ wa sār-i omänän, ad-t-dd-sənkäräƣ däƣ-tamättant ašäl wa ilkämän.

⁴⁵ Ajän wädden ƚktabän ännäbitän a-s: ‹Ilkam ad-umasän dägg-adəm iket-näsän inəttulab n-Mässinäƣ»,

ƣas, ere islän i-tənna n-Abba, irða s-a-wa t-issäƣra, ad-hi-dd-äkk.

† 6:26 6:26 Däƣ-Tälyunanit: Amin, amin (S-tidət, tidət).

46 Älmäḡna n-a-wen a-s wär t-illa ere inhayän Abba kunta wädden ere wa dd-ašmašäl Mässinäḡ, ənta ḡas a inhayän Abba.

47 Älleḡeḡ-awän s-tidət tädduuttet a-s ere wa sār-i omänän, ijraw tämudre ta täḡlälät.

48 Näkk a-s tajəlla ta hakkät tämudre.

49 Abbatän-nāwän a-s əzzaḡän tenere, əkšän mana,† a-wen tajəlla n-taləmmizt ta hasän-dd-äsfäl Mässinäḡ išənnawän, hakd a-wen-däḡ, ämmun,

50 māšan, tajəlla ta dd-təšräyät dd-fälät išənnawän, ere tät-ikšän, wär-e ämmät.

51 Näkk a-s tajəlla ta n-tämudre dd-fälät išənnawän, ere ikšän tajəlla-ten-däḡ, ad-iddar härkuk; taḡəssa-nin a-s tajəlla-ten-däḡ mad-äkfäḡ i-ad-təddär äddunya.»

52 Inna ḡisa a-wen ḡas, tənkar tamḡənnant täšsoohet jer-käl-Älyähud, ad-tinmənnin: «Əndek əmmək wa s-mad-hanäḡ-äkf taḡəssa-net i-ad-tät-näks?»

53 Inn'-asän ḡisa: «Älleḡeḡ-awän s-tidət tädduuttet a-s afäl wär təksem taḡəssa-nin näkk-i n-Ägg-ägg-adəm, təswəm daḡ ašni-nin, wär mad-təddäräm.

54 Ere ikšän taḡəssa-nin, iswä ašni-nin, ijraw tämudre ta täḡlälät, sənkaräḡ-t-dd daḡ däḡ-tamättant ašäl wa ilkämän

55 fäl-a-s, taḡəssa-nin a-s amənsi wa n-tidət, ašni-nin a-s tesäse ta n-tidət.

56 Ere ikšän taḡəssa-nin, iswä ašni-nin, nosäḡ näkk d-ənta, heeḡ-t, ih'-ahi.

57 Əmmək wa s-iddär Abba-i hi-dd-ašmašälän, əmmək-wen-däḡ a-s əddaräḡ näkk-däḡ. ḡas, ere ikšän taḡəssa-nin däḡ, ad-has-umasäḡ əssəbab n-tämudre täḡlälät.

58 Ənta-da-däḡ tajəlla ta dd-fälät išənnawän təzläyät d-tajəlla ta əkšän abbatän-nāwän uhən-däḡ, ämmun. Ere wa ikšän tajəlla ta ämoosäḡ, ad-iddar härkuk.»

59 Ənta-da-däḡ älxuḡbät wa ija ḡisa däḡ-ehän n-äddin wa n-käl-Älyähud ihän aḡrəm wa n-Qäfärnaxum.

Mäjräd n-ḡisa, ihakk tämudre

60 Əslän inəḡḡulab-net äjjootnen i-älxuḡbät wa s-iket t-ijä ḡas, änmännän jer-iman-näsän: «Wa mäjräd, ojar-anäḡ, mi äddoben asjed-has?»

61 Ilmäd ḡisa ḡur-iman-net a-wa simtəktikän, inn'-asän: «Ajän wa mäjräd, ikm'-iwän?»

62 Kud-täjjəyhäm i-Ägg-ägg-adəm har iqqäl däḡ-išənnawän edägg wa s-käla t-ihä s-tizarät, ma mad-tənnəm?

63 Unfas n-Mässinäḡ a ihakkän tämudre, taḡəssa mälayäḡna. Iməjridän wi hawän-jeḡ, hen tämudre ed, Unfas Šäddijän a dd-fälän

64 māšan, iyyäd däḡ-wän hi-əlkamnen, wär sār-i omenän.» Inn'-asän ḡisa a-wen ed issan ašäl äzzarän äddinät wi has-əlkamnen a-s ija a-wen wär sār-s omenän, issan daḡ däḡ-sän ere wa t-madän-isəssäḡdär.

65 Ässewäd ḡisa fäll-a-wen, innä: «Ənta-den-däḡ a-wa fäl hawän-ənnəḡ ihənnin a-s wär t-illa ere hi-dd-madän-äkk ar s-ad-ijraw turhajät n-a-wen ḡur-Abba.»

66 ḡur-ten-däḡ, əqqälän ḡara-s inalkimän äjjootnen, äbas has-əlkamän.

Tajuhe n-Bəḡrus fäll-ḡisa

67 Innäd-dd ḡisa ḡarät-a-wen s-inəḡḡulab-net wi n-märäw d-əssin, inn'-asän: «Käwänəd-i-š, ajän wär tärhem uḡəl ḡar'-i?»

68 Inn'-as Simyon Bəḡrus: «Äḡalim, mi mad-näkk? Käyy a ittafän iməjridän-wi hakkänen tämudre ta täḡlälät;

69 noman sār-k, nəkkas daḡ äššäk a-s käyy a-s Wa Šäddijän dd-ifälän Mässinäḡ.»

† 6:49 6:49 A-wa isəm n-amənsi wa dd-əzzäbbät Mässinäḡ fäll-käl-Işrayil äzzäman wa d-hän tanəzruft. Itawänn'-as däḡ-Tälyunanit: Mana; itawänn'-as däḡ-Tämašäḡt: Taləmmizt n-Mässinäḡ.

⁷⁰ Inn'-asän Үisa: «Käwäneḍ-i n-märaw d-əssin, ajän wädden näkk a käwän-äsnäfränän? Hakd a-wen-däx, iyyän däx-wän, iblis.»

⁷¹ Mäjräd-wen-däx, ij'-e Үisa fäll-Yähudəs Ägg Simyon wa n-Isxaryut fäl-a-s, ənta-i-däx n-iiyyän däx-inəṭṭulab wi n-märaw d-əssin a t-madän-isəssäxḍär.

7

Täxart n-ulh n-ayətma-s n-Үisa

¹ Ällil Үisa ḍarät-a-wen teje ta n-Galila fäl-a-s, wär irha ad-ilal ta n-Älyähudəyät ed, äxtafän-as däx-s imizärän n-käl-Älyähud i-ad-t-änxən kərəf.

² Äzzäman-en, ohaz ämudd n-käl-Älyähud wa s-e-d dd-ija ad-əzzäxän daw-ihəktan.

³ Eggädän-dd ayətma-s n-Үisa, ənnän-as: «Äkk Älyähudəyät i-ad-ənhəyän inəṭṭulab-näk wi t-əllanen dihen ijitän-näk əntäneḍ-däx,

⁴ ed ere irhan ad-sär-s əlmədän äddinät, wär-ixəddəm däx-ufär, xas, kunta tadjäd timaşalen ogdähnen d-a-wa-däx asuksäḍ, äj'-enät dat-äddunya iket-net.»

⁵ Ənnän-as ayətma-s a-wen ed wär sär-s omenän əntäneḍ-däx.

⁶ Inn'-asän Үisa: «Älwäqq-in wär-ija härwa mäšan, wa-näwän ija härkuk,

⁷ käwäneḍ wär təla äddunya äddälil fäl käwän-təksär mäšan, näkk təksär-ahi ed, tajäyheḡ fäll-ijitän-net wi läbasnen.

⁸ Äglät xas käwäneḍ, äkkät ämudd, näkk wär t-əkkeḡ ed ässaḡät-in, wär-iwwed.»

⁹ Inn'-asän Үisa a-wen xas, äqqima däx-Galila-en-däx.

Tikawt n-Үisa i-ämudd wa n-ihəktan däx-Yärussälam

¹⁰ Əkkän ayətma-s ämudd xas, ikk'-e ənta-däx ḍarät-a-wen, mäšan, däx-ufär i-ad-wär sär-s ilmed äwadəm.

¹¹ Ij' ašäl wa n-ämudd xas, ad-has-tammäxän imizärän n-käl-Älyähud, sastanän d-diha d-t-illa.

¹² Tənkär tamxənnant däx-tamətte däx-isälan-net, ijanna axil iyyän: «Äwadəm olaḡän a ämoos», ijanna axil wa iyyäḍän: «A fäw, a-di, išinməsrəy tamətte»;

¹³ mäšan, hakd a-wen-däx, wär t-illa ere iḍakkälän eməsli-net i-ad-aməl Үisa fäl tuksəḍa n-imizärän n-käl-Älyähud.

¹⁴ Äzunän išilan n-ämudd xas, ikka Үisa ehän n-ämudd wa mäqqārän, ad-däx-s isaḡra.

¹⁵ Äkunän käl-Älyähud däx-älxikmatän wi tän-isasla har jannen: «Wa älzahil, ənde d-dd-iḡra, mi t-issəlmədän ättäfässir n-əlkəttabän?»

¹⁶ Äwwežäb-asän, inn'-asän: «A-wa säḡreḡ, wädden a dd-izjarän erhet-in, erhet n-Mässinäḡ-i hi-dd-äšmašälän a dd-ifal.

¹⁷ Xas, ere irhän ad-ämašäl erhet n-Mässinäḡ, ad-ilməd kunta asəssäḡär wa tadjäḡ Mässinäḡ a dd-ifal meḡ-i dd-əkneḡ xur-iman-in.

¹⁸ Ere itamäjrädän fäll-iman-net, aḍkul n-iman-net xas a itattär mäšan, ere itattärän təmmal n-wa t-dd-äšmašälän, tidət a ijanna, wär t-iha a ifraḡän.

¹⁹ Ajän wädden ännäbi Mosa a käwän-ikfän Äṭṭäwrät? Adiš mafäl wär təmišiläm a-wa hawän däx-s inna? Ma hawän-äḡšäḍäḡ a-s tattäräm tenäḡe-nin?»

²⁰ Ənnän-as: «Tidət-däx a-s ih'-ik alšin, mi itattärän tenäḡe-näk?»

²¹ Inn'-asän Үisa: «Jeḡ data-wän iji iyyän xas, təkunäm däx-s,

²² amili, nəssan a-s wädden ännäbi Mosa a fäll-dd-äzzubbät s-tizarät, imḡarän wi has-äzzarnen a fäll-dd-äzzubbät mäšan, omär-käwän sär-s xas, ad-samalayäm aratän wäla däx-ašäl n-əssəbət-i n-täsonfat.

²³ Ҷас, šamad wār kāwān-āšnāmāšrāy d-Āttāwrāt asəmmili n-ara dāḡ-ašāl n-əssəbət-i n-tāsonfat, adiš, mafāl kāwān fäll-i ih' ālhām fāl-a-s innin āzozāyāḡ āwadəm imdan dāḡ-ašāl n-əssəbət?

²⁴ He kāwāneḡ! Wār təḡkeḡām āwadəm s-a-wa s-tordām, hannāyām fälla-s, əḡkeḡāt-t s-a-wa āmoosān tidət.»

²⁵ Innā Ҷisa a-wen Ҷас, ad-jannen iyyāḡ dāḡ-kāl-Yārussālam: «Ajān wādden ənta-i-dāḡ a-s tattārān tenāḡe-net?»

²⁶ Ənhəywāt-t, ādiwānnāt dār-sān s-əmmək wa s-irha uhən wār t-illa a has-ḡaššādān. Tordam a-s wādden asədəttu a jān imizārān-nānāḡ a-s ənta-i-dāḡ a-s Ālmaseḡ?

²⁷ Ālwāxla a-s ənta-i, nəssan siha s-dd-iha, a-s ija a-wen Ālmaseḡ, wār t-illa ere issanān siha s-mad-dd-ihiy.»

²⁸ Iḡkāl Ҷisa emāsli-net, hārwa isayra dāḡ-ehān n-āmudd wa māḡḡārān, innā: «Wādden təzzayām-ahi, təssanām daḡ siha s-dd-heḡ māšan, hakt a-wen-dāḡ, əlmədāt a-s wār dd-āšmašālāḡ iman-in, ere wa hi-dd-āšmašālān, wār t-təzzeyām māšan, ādduuttāt;

²⁹ nākk-i t-dd-ifālān, əzzayāḡ-t ed ənta a hi-dd-āšmašālān.»

³⁰ Əttārān arāmas-net māšan, wār t-illa ere t-iḡasān ed ālwāḡḡ-net, wār dd-iwwed hārwa.

³¹ Omānān āddināt əjjootnen hanen ālzāmaḡāt-en-dāḡ s-Ҷisa Ҷас, ad-tinmənnin jer-iman-nāsān: «Ak tordam a-s Ālmaseḡ fāw kud-dd-osa-dāḡ, ajān ad-āj ijitān n-Māssināḡ ojarān wi ij' āhaləs-i-dāḡ!»

Əttārān imizārān n-kāl-Ālyāhud əmmək s-ārmāsān Ҷisa

³² Əslān kāl-faris i-aḡkul wa təja tamətte Ҷisa dāḡ-ātuktek Ҷас, əssəḡlān imizārān n-kāl-tikutawen d-kāl-faris ālḡomitān n-ehān n-āmudd wa māḡḡārān i-ad-dd-ārməsān Ҷisa.

³³ Inn'-asān Ҷisa: «Əlleḡ jere-wān ālwāḡḡ ənḡārān, ḡarāt-a-wen, ad-āḡḡəlāḡ ere wa hi-dd-Āšmašālān.

³⁴ İlkam dāḡ-wān ad-hi-təmmāḡām māšan, wār mad-hi-təjrəwām ed siha s-əkkeḡ, wār tāddobem agḡaḡ-net.»

³⁵ Ānmānnān imizārān n-kāl-Ālyāhud jer-iman-nāsān: «Əndek Ҷас edāḡḡ wa mad-ākk dāḡ-t wār mad-nəjrəw? Tordam a-s irha ad-ākk kāl-Ālyāhud wi əmmāhāšnen jer-kāl-Ālyunan† meḡ tordam a-s kāl-Ālyunan-en-dāḡ a mad-ākk i-ad-tān-isāḡār āmāra?

³⁶ Meḡ ma tordam əndek ālmāḡna n-a-wa s-innā: «Ad-hi-təmmāḡām māšan, wār hi-mad-təjrəwām» d-a-wa s-innā daḡ: «Siha s-əkkeḡ, wār tāddobem agḡaḡ-net?» »

Ҷisa a-s aman əddārnen

³⁷ Ašāl wa isrāyān māḡḡārān d-imiddəw āmudd, ibdād Ҷisa dat-ālzāmaḡāt, iḡkāl emāsli-net, innā: «Ere āffudān-dāḡ, aset-ahi-dd, āswet.

³⁸ Ere sār-i omānān, ad-ənjəyān ijərwan n-aman əddārnen dāḡ-ulh-net s-əmmək wa s-tān-innā əlkəttab n-Māssināḡ.»

³⁹ Innā Ҷisa a-wen, dāḡ-isālan n-Unfas n-Māssināḡ wa mad-əjrəwān wi maden-amən sār-s ed a-s itājj a-wen-dāḡ, wār dd-āzzubbāt Unfas Šāddijān ed Ҷisa wār-ijješ ālxurmāt-net hārwa.

Əbdān āddināt dāḡ-təssəba n-Ҷisa

⁴⁰ Təslā tamətte ta təsijādāt i-a-wa innā Ҷас, inn' aḡil-net iyyān: «Ādduuttāt a-s ānnābi wa s-ātwānna ənta-da-dāḡ.»

† 7:35 7:35 Itawann'-asān: Gəriktān. (Les Grecs dāḡ-Təfrānsit). Əzəḡān Erobbā dāḡ-ākall wa itawānna: Gəris (La Grèce dāḡ-Təfrānsit). Tawalt-nāsān: Tālyunanit.

⁴¹ Inn' aḡil iyyän daḡ: «Älmaseḡ lab ənta-da-däḡ.» Inn' aḡil wa iyyädän: «Ajän Älmaseḡ Galila a mad-dd-ifəl?»

⁴² Wädden inn'-anäḡ əlkəttab n-Mässinäḡ a-s: «Älmaseḡ əzzurəyät ta n-ämänokal Dawəd d-tadäbayt-net Bätlehäm ta s-käla däḡ-s-izzäḡ a dd-mad-izjār?» »

⁴³ Tāzun tamətte däḡ-təssəba n-Ḳisa,

⁴⁴ əttärän iyyäd däḡ-sän ad-t-ärməsän mäšan, ikkä jere-sän, wär t-illa ere t-iḡasän.

⁴⁵ Əqqälän-dd älgomitän n-ehän n-ämudd wa mäqqärän, ənnän-asän imizärän n-käl-tikutawen d-käl-faris: «Mafäl wär t-dd-təlweyäm?»

⁴⁶ Ənnän-asän älgomitän: «Näkkäneḡ a nəwa-däḡ, wär käla nəslä i-äwadəm ijan mäjräd irzan wa ija ähaləs-i-däḡ.»

⁴⁷ Ənnän-asän käl-faris: «Adiš käwäneḡ-däḡ, äšnämäšräy-käwän?»

⁴⁸ Meḡ ajän hannäyäm däḡ-näḡ ämizär meḡ ere təla taggayt ta n-käl-faris sār-s omanän?»

⁴⁹ Ajän wär hönneyäm a-s wär sār-s omen ar äddinät wi n-älzihal wären əssen a ihän Ättäwrät.»

Irmäs Nikodem ašrut wa n-Ḳisa

⁵⁰ Iggäd-dd Nikodem wa n-u-faris s-käla dd-ädwännät i-Ḳisa s-ehäd, inn'-asän:

⁵¹ «Ajän äššäreḡa-nänäḡ isaḡlam äwadəm dat-ad-has-əslən äddinät, itwəlməd a-wa iḡšäd?»

⁵² Ənnän-as: «Ajän käyy-däḡ Galila a käy-təlät? Səffəyk ḡas əlkəttabän n-Mässinäḡ, təmmaḡ təkkäsäd-dd däḡ-sän ännäbi dd-ifalän Galila.» [

⁵³ Darät mäjräd-wen-däḡ, hak äwadəm ikk' ehän-net.

8

Tamäḡt ta s-ätwännä, təzna

¹ Odwa Ḳisa ənta ehäd-wen taḡayt ta n-ihəškan wi n-əzzäytun.

² Äffäw ḡas, oläs-dd uḡəl n-ehän n-ämudd wa mäqqärän, täddew-dd sār-s daḡ tamətte iket-net, äqqima, ad-tät-isaḡra.

³ Əwwäyän-dd älyulam n-Ättäwrät d-käl-faris tamäḡt tättirmäsät däḡ-əzzəna, əssəbdädän-tät däḡ-ammäs n-älzämayät təzzar,

⁴ ənnän i-Ḳisa: «Älyalim, ta-däḡ tamäḡt, a-s tät-dd-näḡdär, izinnəw-tät ähaləs iyyän.

⁵ Däḡ-isälan n-tiḡeḡen-ti maden-ättärmäs däḡ-əzzəna, inn'-anäḡ ännäbi Mosa däḡ-Ättäwrät a-s ad-tänät-näkf sämmäjori n-tihun. Ämära, nässistän-käy, ma tənneḡ käyy däḡ-isälan-win-däḡ?»

⁶ Otasän älyulam n-Ättäwrät d-käl-faris asəstan-net, wär təmmäḡän ḡas ar i-äsaru fäl t-əssəḡlämän. Ənnän-as a-wen ḡas, äddunkät Ḳisa ad-ikattäb fäll-äkall s-assəkäḡ-net.

⁷ Äxwälän-t s-asəstan ḡas, iḡkäl-dd sār-sän asəwaḡ-net, inn'-asän: «Ijaret-tät däḡ-wän wa s-käla wär-ofa abäkkäḡ s-tähunt ta täzzarät.»

⁸ Äddunkät daḡ ḡarät-a-wen, ad-ikattäb fäll-äkall.

⁹ Əslän älyulam n-Ättäwrät d-käl-faris i-a-wa hasän-inna ḡas, əḡlän s-iiyyän-iiyyän, ḡur-wi wäššarnen har wi mäḡroynen. Wär dd-äqqima däḡ-edäḡḡ-ənnin-däḡ ar Ḳisa, təbdad data-s tamäḡt, däḡ-ammäs n-edäḡḡ wa s-käla däḡ-s ibdäd älzämayät.

¹⁰ Ibdäd-dd sār-s Ḳisa, inn'-as: «Tamäḡt! Ma jän äddinät wi s-käla käm-əḡḡäfän? Ajän äbas käm-äsiwär äwadəm wäl' iyyän uḡlem?»

¹¹ Tənn'-as: «Äbo, Älyalim, äbas t-illa äwadəm wäl' iyyän.» Inn'-as Ḳisa daḡ: «Wär käm-əssəḡlämäḡ näkk-däḡ, ämära, əḡləw mäšan, wär tolesäd iji n-abäkkäḡ.»]

Yisa a-s ännur n-äddunya

¹² Innä Yisa darät-a-wen i-tamette: «Näkk a-s ännur n-äddunya, ere-wa hi-ilkämän wär mad-irjəš dəx-tihay, änn-ak, ad-ijrəw ännur wa ihäkkän tämudre.»

¹³ Eggädän-dd käl-faris, ənnän-as: «Käyy ya tajäyhed fäll-iman-näk, a-wen-däx dəx a äsdätten a-s tajuhe-näk, bahu.»

¹⁴ Inn'-asän Yisa: «Kud-tajäyheḡ fäll-iman-in-däḡ, näkk, tajuhe-nin, tädduuttät ed, əssanäḡ siha s-dd-heḡ, əssanäḡ dəx siha s-häläḡ mäšan käwäneḡ, wär təssenäm siha s-dd-heḡ, wäla siha s-əkkeḡ.»

¹⁵ Käwäneḡ, tayette ta n-dägg-adəm a-s šarräḡäm äddinät, näkk wär t-illa ere šarräḡäḡ.

¹⁶ darät-a-wen dəx, näkk, kud-əšräḡäḡ äwadəm-däḡ, a-s mad-tasəm äššäreḡa-nin, i n-tidət fäl-a-s, wär t-jex d-iman-in ḡas, oharäḡ-t d-Abba-nin i hi-dd-äšmašälän.

¹⁷ Wädden iktab dəx-alämär-näwän a-s təgdäh tajuhe n-əssin äddinät i-asətbət n-härät.

¹⁸ Äywa, näkk leḡ sänatät tjuhawen, ämoosäḡ tajuhe fäll-iman-in, äjjəyh'-ahi dəx Abba-i hi-dd-äšmašälän.»

¹⁹ Innä Yisa a-wen ḡas, ənnän-as käl-faris: «Abba-näk-i-š, əndek diha t-illa?» Inn'-asän Yisa: «Wär hi-təzzeyäm näkk wäla Abba-nin ed, ənnär hi-təzzayäm, təzzəyäm dəx Abba-nin.»

²⁰ A-s ijä Yisa mäjräd-wa-däḡ, isayra dəx-ehän n-ämudd wa mäqqärän, edes i-əssəndoqq wa dəx-inass azrəf d-oräḡ wa təkkatän äddinät i-ehän n-ämudd wa mäqqärän mäšan, wär t-illa ere t-irmasän ed, älwäqq-net wär dd-iwwəḡ härwa.

A-wa iqqäl Yisa Älmaseḡ

²¹ Inn'-asän Yisa dəx: «Təlcam dəx-i tekle, tekle dəx dəx-mad-hi-təmmäḡäm mäšan, ad-tämmätäm dəx-abäkkad-näwän ed, edägg wa əkkeḡ, wär täddobem aggaḡ-net.»

²² Əslän käl-Älyähud i-a-wen ḡas, änmännän jer-iman-näsän: «Tordam a-s wädden a-s äbok ad-äny iman-net a-s ijän: «Edägg wa əkkeḡ, wär täddobem aggaḡ-net.» »

²³ Inn'-asän Yisa: «Käwäneḡ äddunya-i-däḡ a käwän-lät, näkk išənnawän a hi-länen, käwäneḡ, təl'-iwän äddunya-ta-däḡ, a-s ija a-wen näkk, wär hi-təla.

²⁴ A-wen-däḡ dəx a fäl hawän-ənnex a-s ad-tämmätäm dəx-ibäkkadän-näwän ed, ijmad-t äššäk a-s afäl wär tomenäm a-s «Näkk a iḡlalän», ad-tämmätäm dəx-ibäkkadän-näwän.»

²⁵ Ənnän-as: «Käyy-š, mi tämoosäd?» Inn'-asän Yisa: «Ämoosäḡ a-di-däḡ s-äru d-hawän-ənnex: «Näkk äḡlaläḡ.»

²⁶ Leḡ a äjjeen fälla-wän ənnex, ill'-e dəx uḡlem äjjeen käwän-äswäräḡ mäšan, Wa hi-dd-äšmašälän, ädduuttät, wär jənnex dəx i-äddunya ar a-wa s-has-əsleḡ har tän-innä.»

²⁷ Inn'-asän Yisa a-wen-däḡ mäšan, wär əfhəmän s-isälan n-Abba-net a hasän-itajj.

²⁸ Inn'-asän dəx älwäqq-wen: «Afäl dd-osa ašäl wa d-tənhäyäm Ägg-ägg-adəm ämmiidkäl s-išənnawän dəx-ammas-näwän, dihen, ad-təlmədäm a-s: «Näkk a iḡlalän», təlmədäm dəx a-s wär t-illa a tajjāḡ d-iman-nin, wär jənnex ḡas ar a-wa hi-issäḡra Abba.

²⁹ Ənta-i hi-dd-äšmašälän, idhal-ahi, wär hi-oyya d-iman-in ḡas ed, ənta ḡas a-s tamašäläḡ erhet-net härkuk.»

³⁰ Oräw-dd mäjräd-wen-däḡ ija Yisa, immun s-äddinät äjjootnen.

A-wa isadärfen ägg-adəm

³¹ Inna Yisa darät-a-wen i-käl-Älyähud wi sār-s omännən: «Afäl təkfäm iman-näwän i-mäjräd-in, ad-tumasäm inəḡḡulab ətbatnen,

³² tēzzəyām tidət, səddärfət-kāwān.»

³³ Ğnān-as: «Nākkāneḍ-š wādden əzzurəyāt n-ännābi Ibrahim a nāmoos, wār kāla hanāḡ-ikrāš āwadəm wāl' iyyān ḡas, ənnār əmmək wa s-jānned ad-nāddārf?»

³⁴ Inn'-asān Ƴisa: «Älleḡeḡ-awān s-tidət tädduuttet† a-s, e d t-illām āwadəm itamašalān abākkāḍ, äkkilāt-as.

³⁵ Təssanām a-s akli, wār-itəzzāḡ dāḡ-ehān n-māssi-s hārkuk māšan, Rure-s n-māssi-s n-ehān ənta, ad-dāḡ-s izzāḡ hārkuk.

³⁶ Afāl kāwān-äsdārfāt Rure-s n-māssi-s n-ehān, ad-təjrəwām iman-nāwān.

³⁷ Ğssanāḡ a-s əzzurəyāt n-ännābi Ibrahim a tāmoosām māšan, hākd a-wen-dāḡ, tattārām tenāḡe-nin fāl-a-s, wār-ijrew mājrād-in edāgg dāḡ-ulhawān-nāwān.

³⁸ Nākk, wār hawān-jəneḡ ar a-wa ənhāyāḡ ḡur-Abba-nin ḡas, kāwāneḍ dāḡ, wār təjjəm ḡas ar a-wa s-təslām ḡur-abba-nāwān.»

³⁹ Äwwežābān-as, ənnān-as: «Nākkāneḍ, ännābi Ibrahim a-s abba-nānāḡ.» Inn'-asān Ƴisa: «Ğnār ihāyawān n-ännābi Ibrahim a tāmoosām, ikād-di, tāmašälām a-wa ämešäl

⁴⁰ māšan ämära, kāwāneḍ-da-dāḡ, tattārnen tenāḡe-nin fāl-a-s innin əneḡ-awān tidət-ta s-əsleḡ ḡur-Māssināḡ, tākunt šund-ten, wār tāt-ija Ibrahim.

⁴¹ A-wen-dāḡ a fāl hawān-janneḡ a-s kāwāneḍ, ijitān n-abba-nāwān ḡas, a tamašälām.» Ğnān-as: «Nākkāneḍ ya, wādden ikzewān a nāmoos, Abba iyyān a nəla, a t-āmoosān: Māssināḡ.»

⁴² Inn'-asān Ƴisa: «Ğnār ämoos Māssināḡ Abba-nāwān, tārhem-ahi ed ənta a dd-əzjarāḡ, ənta dāḡ a dd-fälāḡ, wār dd-əgleḡ d-iman-in, ənta a hi-dd-äšmašälām.

⁴³ Ajān ma hawān-igdalān ad-təjrāhām a-wa hawān-janneḡ? Igdal-awān-t a-wa dāḡ s-tunjāyām asjəd i-mājrād-in.

⁴⁴ Iblis a-s abba-nāwān, ənta a-s tāqbalām amišəl n-derhanān-net, ənta-i-s s-alāšäl dāḡ-emājj n-iman, wār kāla ibdād fäll-tidət ed, tidət fāw a wār-issen. E-d imməjrād-dāḡ, bahu ḡas a ijanna ed a-wen-dāḡ a-s agna-net fāl-a-s, änāsbahu a ämoos, ənta dāḡ a-s abba n-bahu.

⁴⁵ Nākk wār hi-təflesām ed tidət a hawān-janneḡ.

⁴⁶ Ğndek dāḡ-wān ḡas wa äddoben ad-äjjāyh a-s kāla ämešälāḡ abākkāḍ? Šāmad tidət a hawān-janneḡ, adiš mafāl wār hi-fəlləsām?

⁴⁷ Ere wa ila Māssināḡ, asjəd a itajj i-a-wa innā Māssināḡ māšan, kāwāneḍ, wār tāmoosām arātān n-Māssināḡ, a-wen-dāḡ a fāl wār hi-səjidām.»

Ƴisa Älmasex, ojār ännābi Ibrahim

⁴⁸ Äwwežābān-as käl-Älyāhud, ənnān-as: «A-wa tidət-dāḡ a-s nənna kāyy u-Sāmari a tāmoosād, ih'-ik alšin.»

⁴⁹ Inn'-asān Ƴisa: «Nākk lab, wār h'-iha alšin, semḡar ḡas a jeḡ Abba-nin, a-s ija a-wen kāwāneḍ, tunjayām s-asəḡar-in.

⁵⁰ Nākk, wār tətärāḡ ad-hi-səḡārān äddināt, ill'-e ere wa itattārān ad-hi-səḡārām, ənta-en-dāḡ a kāwān-madān-išrāḡ.

⁵¹ Älleḡeḡ-awān s-tidət tädduuttet a-s ere iṯṯafān mājrād-in, wār dāḡ-s ilkem ad-inhay tamättant.»

⁵² Ğnān-as käl-Älyāhud: «ḡur-ta-dāḡ, ad-nəlmād s-tidət-dāḡ a-s ih'-ik alšin, ajān wādden Ibrahim hākd ännābitān wi iyyādnen, təmmār-tān-in tamättant, ḡas kāyy, ma kāy-äsihälān tənna n-a-s: <Ere iṯṯafān mājrād-in, wār dāḡ-s ilkem ad-inhay tamättant.>

⁵³ Adiš kāyy ija ḡur-k a-s tojārād abba-nānāḡ Ibrahim d-ännābitān wi iyyādnen ämmutnen? Ajān kāyy, ma s-tāḡelād tāmoosād-t?»

† 8:34 8:34 Dāḡ-Tälyunanit: Amin, amin (S-tidət, tidət).

⁵⁴ Inn'-asän Ƴisa: «Ǝnnar iman-in ƣas a timəlaƣ, wär-inəffəw a-wen härät, Abba-nin-i s-tənnäm Emäli-näwän a ämoos, ənta a hi-itiməlän.

⁵⁵ Abba-nin-en, əzzayäƣ-t mäšan käwäned, wär t-təzzeyäm. Afäl hawän-ənnex wär t-əzzeyäƣ, ad-umasäƣ änäsbaħu dār-wän olähän. Ädduuttät a-s Abba-nin, əzzayäƣ-t, tamašaläƣ day mäjräd-net.

⁵⁶ Ännäbi Ibrahim day-i s-jannem abba-näwän a ämoos, iddəwät däƣ-derhan n-aħänay n-ašäl wa n-tiwit-in, inhäy-t ƣas, ija tedäwit təmdat.»

⁵⁷ Innä Ƴisa a-wen ƣas, ənnän-as käl-Älyähud: «Käyy, wär led wäla-däƣ səmmosät timərwen n-awätay, uhən-däƣ, häläd ad-tənnəd, tənhayäd ännäbi Ibrahim?»

⁵⁸ Inn'-asän Ƴisa: «Älleƣex-awän s-tidət tädduuttet a-s dat-tiwit n-Ibrahim, əlleƣ-t ed <Näkk äƣlaläƣ.> »

⁵⁹ Ədkälän älwäqq-wen-däƣ tihun i-ad-t-əjrən sār-snät mäšan, iffär-asän däƣ-tamətte, izjār ehän n-ämudd wa mäqqārän.

9

Äzozäy Ƴisa emədderƣəl iyyän

¹ Ašäl iyyän, irjaš Ƴisa a-s inhäy äħaləs s-a-s dd-iwa-däƣ dārƣal.

² Əssəstänän-t inəttulab-net, ənnän-as: «Äƣalim,[†] ak äħaləs-i-däƣ s-ad-dd-iwa-däƣ dārƣal, ənta a ämešälän abäkkad wa has-ämoosän əssəbab n-täddärƣält meƣ imärawän-net?»

³ Äwwežäb-asän, inn'-asän: «Wär-ofa abäkkad ənta wäla imärawän-net, änn-ak Mässinäƣ a irhan ad-äj äƣlib-net əssəbab s-issəkna tärna-net.

⁴ Iwar-anäƣ ad-näxdəm tärha n-Wa hi-dd-äšmašälän härwa ij' ašäl fäl-a-s, imal-dd ehäd s-wär t-illa ere äddoben älxidmät däƣ-s.

⁵ A əkkeƣ heƣ äddunya-ta-däƣ, näkk a-s ännur-net.»

⁶ Innä Ƴisa a-wen ƣas, ässotäf fäll-äkall, issəbdäj tälayt s-tisutaf-net təzzar, isəls'-et tiŋtawen n-emədderƣəl.

⁷ Inn'-as dərät-a-wen: «Əgləw, ärdəb däƣ-täsahayt n-aman ta n-Silwi.» (Silwi, älmäƣna-net: ännämmašul.) Iglä, irdäb-dd, a-s dd-iqqäl, ihannäy.

⁸ Ənhäyän-t änhäräjän-net d-äddinät wi t-əzzäyən härwa dārƣal ƣas, änmännän: «Ka! Ajän wädden a-wa emədderƣəl wa itaƣäyən däƣ-täšarrit itattär takute däƣ-äddinät?»

⁹ Inn' aƣil-näsän: «Ewällä ənta.» Inn' aƣil wa iyyädän: «Aa fäw! Wädden ənta, milhaw ƣas a jan.» Iggäd-dd emədderƣəl iman-net älwäqq-wen, inn'-asän: «A-wa näkk wədi-däƣ təzzayäm.»

¹⁰ Ənnän-as: «Əndek əmmək wa s-ämeränät tiŋtawen-näk?»

¹¹ Inn'-asän emədderƣəl: «Äħaləs wa s-isəm-net Ƴisa a issəbdäjän tälayt, issəls'-et tiŋtawen-in təzzar, inn'-ahi: <Əgləw, ärdəb däƣ-täsahayt n-aman ta n-Silwi>. Əkkeƣ täsahayt n-aman älwäqq-wen-däƣ, ärdäbäƣ-dd däƣ-s.»

¹² Ənnän-as äddinät: «Wa käy-äzozäyän-š, ma ija?» Inn'-asän äħaləs: «Wär-əssenäƣ.»

Asəstan wa jän käl-faris i-emədderƣəl wa izzäyän

¹³ Əmdän äddinät d-asəstan n-äħaləs wa s-käla dārƣal ƣas, äwwäyän-t s-käl-faris

¹⁴ fäl-a-s, ašäl n-əssəbət-i n-täsonfat a däƣ-issəbdäj Ƴisa tälayt-ta äswär tiŋtawen-net, or'-enät.

¹⁵ Osä-dd emədderƣəl wa izzäyän käl-faris ƣas, əssəstänän-t d-əmmək wa s-izzäy. Inn'-asän: «Äswär Ƴisa tälayt tiŋtawen-in, ärdäbäƣ, ənhäyäƣ.»

[†] 9:2 9:2 Rəbbi däƣ-Ƴäbranəyya.

¹⁶ Inn' aḡil n-käl-faris iyyän: «Wa-däḡ Ḷisa, wär-ämoos änämmašul n-Mässinäḡ ed ənnar t-ämoos, isəməḡär ašäl wa n-əssəbət-i n-täsonfat.» Inn' aḡil-näsän wa-iyyädän: «Ajän anəsbäkkad wär-idhel Mässinäḡ, äddoobät amišəl n-ijitän wi itäj j ähaləs-i-däḡ?» Ǝqqälän-dd ḡas ämiḡännänän jer-iman-näsän dihen-däḡ.

¹⁷ Ǝssəstänän ɗarät-a-wen emədderyəl wa izzäyän, ənnän-as: «Käyy ma tənned, ma iqqal ähaləs wa orän tiṭṭawen-näk?» Inn'-asän: «Un ännäbi a ämoos.»

¹⁸ Äḡrän-dd imizärän n-käl-Älyähud ɗarät-a-wen imärawän n-emədderyəl fäl-a-s, wär-əfləsän a-s käla därḡal, izzäy.

¹⁹ Osän-dd imärawän n-ähaləs ḡas, əssəstänän-tän: «Ak rure-wän wa s-tənnäm a-s dd-iwa-däḡ, därḡal, ənta-da-däḡ meḡ? Kunta daḡ a dd-iwa-däḡ, därḡal, əndek əmmək wa s-ämära, ihannäy?»

²⁰ Ǝnnän-asän imärawän n-ähaləs: «Tidət lab a-s a-wa rure-näḡ, wär t-ih' äššäk daḡ s-a-s dd-iwa-däḡ, därḡal

²¹ mäšan, däḡ-isälan n-əmmək wa s-ihannäy ämära d-ere wa orän tiṭṭawen-net, a-wen, wär hanäḡ-ha tijya-net, səstənät-t ənta iman-net ed ähaləs iššamän a ämoos, äddoobät ad-äj isälan n-a-wa t-iqqälän.»

²² Tuksəɗa n-imizärän n-käl-Älyähud a täswännät imärawän-net a-wen fäl-a-s, ässiibdädän imizärän n-käl-Älyähud s-e d t-illäm ere irɗän a-s: «Ḷisa a-s Älmasex», ad-has-əgdəlän ujəš n-ehän n-äddin wa n-käl-Älyähud.

²³ Däḡ-tuksəɗa n-a-wen-däḡ a fäl ənnän imärawän n-ähaləs: «Ähaləs iššamän a ämoos, səstənät-t ənta iman-net.»

²⁴ Oläsän-dd käl-faris teḡäre n-ähaləs wa s-käla därḡal, ənnän-as: «Änn tidət i-Mässinäḡ fäl-a-s, nəssan a-s wa käy-äzozäyän, anəsbäkkad a ämoos.»

²⁵ Inn'-asän: «Kunta anəsbäkkad a ämoos wäla, wär-əssenäḡ; härät iyyän a əssanäḡ: käla därḡaläḡ, ämära, hannäyäḡ.»

²⁶ Ǝnnän-as daḡ: «Läḡät-anäḡ ma hak-ija? Ǝndek əmmək wa s-ora tiṭṭawen-näk?»

²⁷ Inn'-asän ähaləs: «Wädden äru d-hawän-tän-ənnex mäšan, wär hi-täsjadäm ḡas, mafäl tärham daḡ ad-hawän däḡ-s äqqəläḡ? Adiš a tärham ad-tumasäm käwäned-däḡ härät däḡ-inəṭṭulab-net?»

²⁸ Inn'-asän a-wen ḡas, ad-t-gaggärän, jannen-as: «Aa təfəw! Käyy ḡas a-s änätṭalib-net, näkkäneɗ, inəṭṭulab n-ännäbi Mosa a nämoos,

²⁹ nəssan daḡ a-s ännäbi Mosa imməjräd-as Mässinäḡ mäšan, wa-hi, wär nəssen e-s dd-iha.»

³⁰ Inn'-asän emədderyəl wa izzäyän: «Adiš täqqän n-eḡäf təja härwa ed, ənta a orän tiṭṭawen-in mäšan hakd a-wen, wär təssenäm e-s dd-iha.»

³¹ Inn'-asän daḡ: «Nəssan a-s Mässinäḡ, wär iḡəbbəl tittar n-inəsbäkkadän mäšan, iḡabbäl tittar n-e d t-illäm ere t-äksuɗän, itamašalän erhet-net.

³² Nəssan daḡ a-s wär käla ätwäsla äwadəm oran tiṭṭawen n-ere s-a-s dd-iwa-däḡ, därḡal.

³³ Ḷas, ähaləs-i-däḡ, ənnär wädden Mässinäḡ a dd-ifal, wär-ikərrəš tädabit n-a-wa itäj j.»

³⁴ Issəmdä emədderyəl wa izzäyän d-mäjräd ḡas, ənnän-as: «Ewad! Käyy iket-näk abäkkad a däḡ-wed, ma käy-äsihälän älxuṭbät wa hanäḡ-täjjäd?» Äššewäjän sār-s ɗarät-a-wen har t-əzzəzjərän ehän n-äddin wa hän.

Käl-faris, wär-əzleyän d-iməddoryal

³⁵ Islä Ḷisa a-s əkkäsän-t däḡ-ehän n-äddin-näsän ḡas, os'-e-hi-dd, inn'-as: «Ak käyy tomanäd s-Ägg-ägg-adəm meḡ?»

³⁶ Inn'-as ähaləs wa s-käla därḡal: «Älyalim, säkən-ahi-t ḡas ad-sär-s amənäḡ.»

³⁷ Inn'-as Ḷisa: «Tənhäyäd-t ed, ənta-da-däḡ hak-ämmijrädän ämära-däḡ.»

³⁸ Inn'-as ähaləs älwäqq-wen: «Älğalim, omanäx sär-k.» Irkäx dat-ÿisa ässağät-wen-däx.

³⁹ Innä ÿisa i-tamötte ðarät-a-wen: «Näkk, osex-dd i-ad-əbdəwäx jer-äddinät: wi dāryalnen, ad-ənhöyän, wi hannäynen, ad-äddäryälän.»

⁴⁰ Eslän käl-faris wi t-əllänen xur-ÿisa i-mäjräd-wen-däx ija ças, ənnän-as: «Ajän näkkäneç-däx iməddoryal a nämoos?»

⁴¹ Inn'-asän ÿisa: «Ənnär tämoosäm iməddoryal, wär käwän-itəgger uđlem wa n-abäkkəç mäšan, däx-təssəba n-a-di-däx s-tənnäm hannäyäm, a fäl, tumast-näwän i-inäsbäkkəçän, tətbat.»

10

Tangalt ta n-a-s ÿisa a-s Amäçan n-iman

¹ Inn'-asän ÿisa ðarät-a-wen: «Älleçex-awän s-tidət tädduuttet† a-s e d t-illäm ere dd-ijjašan afäraj n-arəzzej s-aşrut säl wa n-emm-net, emäkräd d-änarkab a ämoos,

² mäšan, amäçan n-tihatten ənta, emm n-afäraj a-s dd-itajjäs fäll-tihatten-net.

³ E-d tänät-dd-osa, ad-has-arr änaçlaf-näsnät s-ehäç emm n-afäraj. Afäl has-ämera afäraj har dd-ijjäs fälla-snät, ad-əslənät tihatten-net i-emäsli-net, içär hak iyyät s-isəm-net təzzar, izəzjār-tänät,

⁴ afäl tänät-dd-izzəzjār iket-näsnät, ad-iməl data-snät, əlkəmnät-as ed, əzzaynät emäsli-net.

⁵ Amäçan-en, tihatten-net, wär mad-əlkəmnät i-amäjar, änn-ak, ad-has-əffoçqətnät ed, wär-əzzeynät emäsli-net.»

⁶ Äsnäfäçç'-asän ÿisa isälan-win-däx mäšan, indär-asän ad-əfhəmän a däx-hasän-ässewäl.

ÿisa a-s amäçan wa oläçän

⁷ Oläs daç, inn'-asän: «Älleçex-awän s-tidət tädduuttet a-s näkk a-s emm n-afäraj wa s-tajjäšnät tihatten,

⁸ äddinät-wi hi-dd-äzzarnen, imäkräçän d-inarkabän a ämoosän iket-däx-näsän, wär hasän-äşjädnät tihatten;

⁹ näkk a-s emm n-afäraj, ere sär-i t-dd-ijjäšan-däx, ad-içləs, ad-igilləw, itaqqäl-dd, ijarräw daç amäçon.

¹⁰ Emäkräd ənta, wär dd-itis ar i-tikra d-açaras d-ahälak; näkk, osex-dd i-ad-əjrəwän dägg-adəm tämudre, əjrəwän-tät daç s-tänoflayt.

¹¹ Näkk a-s amäçan wa oläçän, amäçan wa oläçän iman-net a ihakk i-ad-äçləsnät tihatten-net

¹² mäšan, ere wa s-tefert a fäl ixdam, wär-ämoos amäçan oläçän, wädden ənta a-s mässi-s n-tihatten. A-wen-däx a-s, afäl inhäy taçəssit dd-malät, ad-äjawäd, äyy tihatten d-iman-näsnät, təjjəş-tänät taçəssit, şəmməhəş-tänät,

¹³ ed issan a-s tefert ças a fäl ixdam, wär-äkkul a jänät tihatten.

¹⁴ Näkk a-s amäçan wa oläçän, əzzayäx tihatten-in, əzzaynät-ahi daç.

¹⁵ Əzzaynät-ahi s-əmmək wa s-əzzayäx Abba, izzay-ahi daç ənta. Hakkäx-tänät tämudre-nin,

¹⁶ leç härwa tihatten äjjootnen wären ha afäraj-wa-däx, iwar-ahi s-ad-tänät-dd-əwətäx, əslənät əntänätəç-däx i-emäsli-nin, təməl-t tiyyät tahrut idan iyyän n-amäçan.

¹⁷ Abba ənta, irh'-ahi ed hakkäx tämudre-nin, siçuläx-tät-dd iman-in.

† 10:1 10:1 Däç-Tälyunanit: Amin, amin (S-tidət, tidət).

¹⁸ Wār t-illa ere äddoben ad-däx-i ahäx tämudre-nin, hakkäx-tät d-iman-in, siḡuläx-tät-dd däx d-iman-in, ənta-den-däx turhajät ta əjräwäx ḡur-Abba-nin.»

¹⁹ ʔslän käl-Älyähud i-mäjräd-wen-däx ija ʔisa ḡas, tənkar tamḡənnant daḡ jere-sän.

²⁰ ʔggädän-dd däx-sän iyyäd äjjootnen, ad-jannen: «Ak mafäl täsijädäm i-ere ih' alšin, äbbuddäl?»

²¹ Jannen wi iyyädnen: «Mäjräd wa dd-izjärän emm n-ähaləs-i-däx, wädden mäjräd s-äddoobät ad-t-äj ere ih' alšin, nəssan daḡ a-s ere ih' alšin, wär-äddoobät ad-arr tiṭṭawen n-iməddorḡal.»

Unjäyän käl-Älyähud äqbälän ʔisa

²² Äzzäman-en, ijä ämudd n-tasäktot n-ašəšdaj wa jän käl-Älyähud i-ehän n-ämudd wa mäqqärän ihän ʔärussälam s-tajrəst,

²³ irjäš ʔisa däx-ehän n-ämudd wa mäqqärän däx-tele n-edägg wa s-itawänna: Wa n-Suläyman,

²⁴ əžžəmmäḡän-dd fälla-s käl-Älyähud, ənnän-as: «ʔkkəs-anäḡ däx-taḡdärt, kunta käyy a-s Älmasex, änn'-anäḡ-tän, ma s-täqqaläd, təkəkəsäd-anäḡ däx-täqqän n-eḡäfta-däx?»

²⁵ Äwwežäb-asän, inn'-asän: «Wädden, əlläḡeḡ-awän mäšan, tunjäyäm tomänäm sär-i, ənhəywät ḡas ijitän wi s-hi-ikfa Abba-nin turhajät n-amisəl-näsän, əntäneḡ-en-däx a tajäyhanen fäll-i.

²⁶ Käwänəḡ, wär sär-i tomenäm fäl-a-s wär täḡḡinäm däx-äddinät wi hənən tahrut ta n-inalkimän-in.

²⁷ Tahrut ta leḡ n-inalkimän-in, sallän i-eməsli-nin, əzzayäḡ-tän, əlkamän-ahi daḡ.

²⁸ Wi leḡ, hakkäx-tän tämudre ta täḡlälät, wär däx-sän təlکم tamättant, wär tänmad-ahäḡ daḡ äwadəm wäl' iyyän däx-äfuss-in

²⁹ fäl-a-s, Abba-nin-i hi-tän-ikfän, wär t-illa ere s-wädden ill'-e jənnəj-s, wär t-illa daḡ ere äddoben ukəs-näsän däx-äfuss-net.

³⁰ Näkk d-Abba, iyyän härät, wär nəḡley.»

³¹ Innä ʔisa a-wen ḡas, obärän-dd sär-s tihun i-ad-t-əkfen sämmäjori-näsänät mäšan, inn'-asän:

³² «Läḡätät-ahi ḡas däx-ijitän n-Abba wi-däx ähuskätnen jeḡ jere-wän, əndek däx-sän wa ilän äddälil n-tenäḡe ta s-tärham ad-hi-tät-təjəm?»

³³ ʔnnän-as käl-Älyähud: «Wädden däx-təssəba n-iji ähusken jed a fäl käy-nəhakk tamättant, änn-ak däx-təssəba n-asəkkufar wa jed ed käyy-i n-ägg-adəm, täsisägdähäd iman-näkk d-Mässinäḡ.»

³⁴ Inn'-asän ʔisa: «Ajän wädden iktab däx-Äṭṭawrät-näwän a-s, Mässinäḡ, innä: <Äxläkäḡ-dd dägg-adəm däx-milhaw-in>.

³⁵ Wädden, nəssan daḡ a-s mäjräd n-Mässinäḡ, iḡlal, wär-itəməttəy. ʔas kunta äddinät wi əlkämnen i-mäjräd-en, ixläk-tän-dd däx-milhaw-net,

³⁶ mafäl jannem äskafäräḡ, näkk-i äsnäfrän Abba, äšmašäl-ahi-dd s-äddunya fäl-a-s innin ənnəḡ-awän: <Näkk Rure-s n-Mässinäḡ a ämoosäḡ.>

³⁷ Ämära kunta ḡas a-wa tamašäläḡ wädden Abba-nin a dd-ifal, adiš wär sär-i tomenäm mäšan,

³⁸ kunta a-wa tamašäläḡ Abba-nin a dd-ifal, adiš kud-däx wär sär-i tomenäm näkk, ämənat s-timašalen-en-däx i-ad-təlmədäm, səbbuyənäm a-s näkk, ärtayäḡ d-Abba, irtay där-i daḡ ənta, heeḡ-t, ih'-ahi.»

³⁹ Äsmäḡäggäyän daḡ käl-Älyähud däx-arämas-net mäšan, äzläbbät-dd ʔisa däx-sän, iglä.

⁴⁰ Ikka ɗarāt-a-wen asālim wa n-emāynāj n-ējānš wa n-Ŷurdəni, dāx-edāgg wa s-kāla dāx-s isalmaḡ Exya āddināt, izzāx dihen-dāx.

⁴¹ Ɛkkān-t-dd āddināt ājjootnen, jannānen: «Exya, wār-ija tākunt wāl' iyyāt māšan, a-wa inna fäll-āhaləs-i-dāx, itbat iket-net.»

⁴² Omānān āddināt ājjootnen s-Ŷisa dāx-edāgg-en-dāx.

11

Issənkār-dd Ŷisa Lazar jer-inəmmuttan

¹ Āzzāman-wen-dāx ad-ārhin Lazar wa n-taxrəmt ta n-Bitanya n-āŋŋa-s n-Marta d-Māryāma

² ta s-kāla təssəŋxāl aɗutān fäll-iɗarān n-Ŷisa təzzar, ad-tān-timəs s-tiṣəkkaɗ-net. Ɛnta-i-dāx a-s āmāra, ārhiin āŋŋa-s, Lazar.

³ Ārhin ḡas, āssawāynāt šātma-s āmašal s-Ŷisa, ənnānāt-as: «Ālḡalim, āss-dd, emārhn-āk Lazar ārhiin.»

⁴ Iwwāɗ-dd āmašal Ŷisa ḡas, innā: «Turhənnə ta tārmāsāt Lazar, wādden ənta a t-madāt-tawəy s-ālxārāt, turhənnə-net ta-dāx a madāt-tumas əssəbab fāl ātwāsāmyār Māssināx, itwəsəmyār day Rure-s.»

⁵ Tārha ta ija Ŷisa i-Lazar, ənta daḡ a ija i-Marta d-wālātma-s Māryāma.

⁶ Ɛjjāšān isālan n-turhənnə n-Lazar Ŷisa māšan, āssakāy dāx-edāgg-ənnin-dāx əssin išilan təzzar,

⁷ innā i-inəṭṭulab-net: «Āqqəlāt-anāx Ālyāhudəyāt.»

⁸ Ɛnnān-as inəṭṭulab-net: «Ālḡalim, ajān wādden a āynayān tattārān kāl-Ālyāhud, ad-kāy-əkfən sāmājori n-tihun dāx-teje-ten-dāx, ḡas ma dāx-s tāqqalād?»

⁹ Inn'-asān Ŷisa: «Ajān wādden māraw āssaḡātān d-əssin a hanen ašāl? Ere irjašān hārwa ijā ašāl, wār mad-ājjārtāqqəl fāl-a-s ihannāy data-s

¹⁰ māšan, āwadəm irjašān s-ehād, ad-ājjārtāqqāl ed irjaš dāx-tihay.»

¹¹ Ija Ŷisa mājrād-wen-dāx ḡas, inn'-asān: «Emārhn-nānāx Lazar, iṭṭas māšan, əgley i-ad-t-dd-sənkārāx.»

¹² Ɛnnān-as inəṭṭulab-net: «Ālḡalim, adiš kunta eɗəs ḡas a ija, ill'-e āṭṭāma n-ad-izzəy.»

¹³ Mājrād wa hasān-ija, ij'-asān-t i-ad-tān-isəlməd a-s Lazar āba-t māšan, əbdadān ənniyātān-nāsān fäll-eɗəs wa n-ere ilḡad eɗəs.

¹⁴ Ij'-asān Ŷisa ɗarāt-a-wen mājrād s-āddooben afāham-net, inn'-asān: «Ɛlmədāt a-s Lazar ya āba-t, māšan,

¹⁵ āddiweḡ dāx-təssəba-nāwān ed a-s ārhin, wār ḡur-s t-əlleḡ, ātiwatās a-wen i-ad-sār-i tamənām; āmāra, ənkārāt, ākkāt-anāx-t.»

¹⁶ Iggād-dd Tomi wa s-itawānna Didim, a-wen ālmāḡna-net: ekne, innā i-inəṭṭulab wi iyyāɗnen: «Āglāt-anāx nākkāneɗ-dāx i-ad-nahār d-ālxalim-nānāx tamāttant.»

Ŷisa Ālmasəx, isidur

¹⁷ A-s hin-osa Ŷisa Bitanya, ila Lazar əkkoḡ išilan dāx-azəkka.

¹⁸ Bitanya-i dāx-t-āba, wār jere-s t-illa d-Yārussālam ar kāraɗ kelumetārān.

¹⁹ Āba Lazar ḡas, osān-dd kāl-Ālyāhud ājjootnen Marta d-Māryāma, ad-sasmaɗān ulhawān-nāsnāt.

²⁰ Təsla Marta a-s imal-dd Ŷisa ḡas, təlkaɗ-as, a-s ija a-wen Māryāma ənta, tāqqima-hin ḡur-ehān.

²¹ Tāmmoqqās d-Ŷisa ḡas, tənn'-as: «Ālḡalim, əssanāx a-s ənnār telled diha-dāx, wār-itiba āŋŋa-ḡ.

²² Mäšan hakd a-wen-däx, əssanəx a-s käyy a təttäräd, däx-Mässinəx-däx, ad-hak-t-äkf.»

²³ Inn'-as Ƴisa: «Äŋŋa-m a dd-inkär däx-tamättant.»

²⁴ Tənn'-as Marta: «Əssanəx lab s-ad-dd-inkär däx-tamättant ašäl wa ilkämän.»

²⁵ Inn'-as Ƴisa: «Näkk a-s Wa dd-isänkarän däx-tamättant, näkk a ihakkän tämudre, ere sār-i omänän-däx, ad-iddar härkuk kud-däx ämmut,

²⁶ ere iddarän daɣ har sār-i omän, wär däx-s təkem tamättant fäw. Ak kämm Marta, təflasäd a-wen meɣ?»

²⁷ Tənn'-as Marta: «Əyya Älyalim, omanəx a-s käyy a-s Älmasex wa n-Rure-s n-Mässinəx s-ätwänna ilkam ad-dd-ass äddunya.»

Issänxäl Ƴisa imettawän däx-təssəba n-Lazar

²⁸ Təja Marta mäjräd-wen-däx ɣas, təglä, təkäs-dd wälätma-s s-takše, tənn'-as: «Älyalim ya, osä-dd, inn'-am ad-t-in-tasəd.»

²⁹ Təsla Märyäma i-a-wen ɣas, təggäd əssaɣät-wen-däx, təkä Ƴisa.

³⁰ A-s itäjj a-wen-däx, wär dd-ijješ Ƴisa aɣrəm härwa, ih' edägg-wənnin-däx däx-där-s tämmoqqäs Marta,

³¹ əllan-t daɣ imänokalän n-käl-Älyähud iyyäd ɣur-Märyäma däx-ehän, sasmaɣän ulh-net. Ənhäyän-tät a-s təbdäd šik, təzjār ɣas, əlkämän-as ed ija ɣur-sän a-s Lazar a təkka i-ad-tälh fäll-azəkka-net.

³² Täwwäd-in Märyäma diha t-illa Ƴisa, tənähäy-t ɣas, tärkäx-as, tənn'-as: «Emäli, əssanəx a-s ənnär telled diha-däx, wär-itiba äŋŋa-ɣ.»

³³ Inhäy-tät Ƴisa hall ənta d-wi dār-s äddewnen, ɣas, əsnin, əkmän-t iman-net,

³⁴ inn'-asän: «Säknät-ahi azəkka wa däx-jäm Lazar.» Ənnän-as: «Əyyäw, ənhəy-t.» Inhäy-t ɣas,

³⁵ ilhä Ƴisa.

³⁶ Ənnän iyyäd däx-imänokalän n-käl-Älyähud: «Təmɣäre n-tärha ij'-et i-Lazar»,

³⁷ ənnän wi iyyädnen: «Ənta-i orän tiɣtawen n-emədderyəl, indär-as ad-igdəl i-Lazar tamättant?»

Issənkar-dd Ƴisa Lazar jer-inəmmuttan

³⁸ Oläsän-t iman-net təkma, iglä ɗarät-a-wen, ikk' azəkka wa iha Lazar iɣäšan däx-esəwäl, ihar s-tähunt mäqqoorät.

³⁹ Osä-dd Ƴisa azəkka ɣas, innä i-äddinät: «Əkkəsät-in təhunt ta härät azəkka.» Təggäd-dd Marta ta n-wälät ma-s n-enəmmettən əssaɣät-wen, tənna i-Ƴisa: «Älyalim, Lazar ya äru d-irkäh, ašäl-net wa s-əkkoɣ a-wa ih' azəkka.»

⁴⁰ Inn'-as Ƴisa: «Ajän wädden Marta äru d-ham-ənnex a-s afäl sār-i tomänäd, ad-tənhəyäd tärna n-Mässinəx?»

⁴¹ Əkkäsän-in äddinät təhunt fäll-əmm n-azəkka ɣas, äjoɣäy Ƴisa išənnawän, innä: «Abba, ämmoyäx-ak aɣäbal wa jed a-wa däx-k əttäräx,

⁴² əssanəx daɣ a-s ɣabbäläd tittar-in härkuk mäšan, ämmijrädäx-ak ämära däx-təssəba n-älzəməɣät-wa-däx ibdädän, däx-təssəba n-ad-amənän äddinät a-s käyy a hi-dd-äšməšälän.»

⁴³ Innä Ƴisa a-wen ɣas, idkäl eməsli-net, innä: «Lazar, əzjār-dd!»

⁴⁴ Izjār-dd Lazar azəkka, äqqanän ifassän-net d-idarän-net s-isəssora, ilsä ekäršäy idəm-net. Inn'-asän Ƴisa älwäqq-wen: «Arät-t, təbɗəwäm-t d-ikäršäyän-wi-däx ittäl, təyyəm-t ad-igləw.»

Əswärän imizärän n-käl-Älyähud udlem Ƴisa (Mätti 26:1-5; Marqəs 14:1-2; Luqa 22:1-2)

⁴⁵ Osän-dd käl-Älyähud äjjootnen, ənhäyän a-wa ija ʒisa ɣur-Märyäma ɣas, omänän sār-s

⁴⁶ mäšan, əglän iyyäd dəɣ-sän, osän käl-faris, əlläɣen-asän a-wa ija ʒisa.

⁴⁷ Əzzəmmäɣän-dd imänokalän n-käl-tikutawen d-käl-faris d-älžämaɣät wa n-käl-Sinhidrin-i† iyattäsän äššäreɣa, änmännän: «Əndek äddäbara? Wa äwadəm, əjjətän fälla-näɣ ijitän-net wi ässuksädnen!

⁴⁸ Elmədät a-s afäl t-noyya s-əmmək-wa-däɣ, ad-sār-s amənän äddinät iket-näsän. Afäl ämoos a-wen a ijan, ad-ärzən käl-Roma-i hanäɣ-äsitäxmärnen ehän n-ämudd-nänäɣ wa šaddijän, ättäxtäɣän äkall-nänäɣ.»

⁴⁹ Iggäd-dd dəɣ-sän Qayäf-i s-ənta a äminakälän fäll-käl-tikutawen awätay-wen-däɣ, innä: «Ijmaḍ-t äššäk a-s wär t-illa a təjrahäm iket-däɣ-näwän,

⁵⁰ ajän wär hənnəyäm a-s uf'-awän, ad-ämmät äwadəm iyyän dəɣ-təssəba n-tamətte uhən ad-tämmät tamətte iket-net.»

⁵¹ Mäjräd-wen-däɣ ija Qayäf, wädden a dd-ifalän tayətte-net mäšan, šamad ənta a äminakälän fäll-käl-tikutawen awätay-wen-däɣ, ikf'-e Mässinäɣ mäjräd hin-ässawäḍ tamətte n-a-s ilkam ad-ämmät ʒisa, dəɣ-təssəba n-tamətte ta n-Işrayil iket-net.

⁵² Təzzar dəɣ wädden käl-Işrayil ɣas a-s mad-ämmät, ad-ämmät i-ad-dd-isədəw aratän n-Mässinäɣ wi əmmähäşnen jer-ikallän, umasän tiyyät taɣəssa.

⁵³ Äxtäsän ɣur-aşäl-wen-däɣ n-a-s wär-e sunfən fəw wär jen iman-net.

⁵⁴ Ixtäf ənta-däɣ ɣur-aşäl-wen-däɣ i-räjjöş dəɣ-edägg t-hannäyän käl-Älyähud. Ifäl äkall-wen-däɣ hän, ikkä teje ta tohäzät tanəzruft, izzäɣ ənta d-inəttulab-net dəɣ-aɣrəm s-isəm-net Ifɣahim.

⁵⁵ Ohäz-dd ämudd n-käl-Älyähud wa n-Faşka ɣas, ähhujjäjäñ-dd äddinät äjjootnen s-Yärussälam i-ad-şəşdəjän iman-näsän dat-ämudd-en-däɣ,

⁵⁶ ad-tammäɣän iməhhujjaj iket-näsän i-ʒisa, tinmənnin jer-iman-näsän dəɣ-ehän n-ämudd wa mäqqārän: «Ak, tordam a-s ihäl a dd-äkk ämudd meɣ?»

⁵⁷ A-s jännen a-wen-däɣ, omarän imänokalän n-käl-tikutawen d-käl-faris s-ere ilmädän diha t-illa ʒisa iket-net, isäɣdäret-t i-ad-ättärmäs.

12

Təssänɣäl Märyäma aḍutän fäll-ʒisa (Mätti 26:6-13; Marqəs 14:3-9)

¹ Aşäl wa s-säḍis dat-ämudd wa n-Faşka, ikkä ʒisa taɣrəmt ta n-Bitanya dəɣ-izzäɣ Lazar wa dd-issənkär jer-inəmmuttan.

² Təssəkär-dd Marta imənsiwän dat-ʒisa, äniɣäyima d-Lazar d-imäjarän wi iyyädnen.

³ Təḍkäl Märyäma ḍarät-a-wen təzune n-litär n-aḍutän lanen älqim wär-iqquer härät, ad-tän-sanɣal fäll-iḍarän n-ʒisa, timəs-tän s-tişəkkaḍ-net. Äbyänɣälän aḍutän dəɣ-ehän-ənnin-däɣ iket-net.

⁴ Iggäd-dd iyyän dəɣ-inəttulab n-ʒisa wa s-isəm-net Yähudəs wa n-Isxaryut-i t-e-isəssäɣdärän, innä:

⁵ «Mafäl aḍutän-wi-däɣ wär hin-ənşen kərəḍät timaḍ n-ärriyal n-azrəf ämoosnen takute i-tiläqqiwen.»

⁶ Innä a-wen wädden dəɣ-a-s innin ozar dəɣ-a əjrəwnät tiläqqiwen, änn-ak fäl-a-s innin emäkräḍ a ämoos, ənta a-s änazraf n-taggayt ta n-inalkimän n-ʒisa, a ätwäjjän dəɣ-əssəndoqq wa n-azrəf-däɣ, ad-där-s in-işləy.

† 11:47 11:47 A-wa älzämaɣät n-inuşämän d-imizärän n-käl-Işrayil wa itirən äššäreɣa, əntäneḍ a-s älqallitän, osəɣän dəɣ tamətte d-əlxəkum d-äddin.

⁷ Inn'-asän Yisa: «Äkfät-tät älyafyät, a-wa tēja, tøj'-e dāx-tössəba n-ašäl wa d-mad-əjjəšāx azəkka.

⁸ Tiläqqiwen ya, əllanät xur-wän härkuk məšan näkk, ilkam ad-kāwän-äflāx.»

Utär n-iji n-iman n-Lazar

⁹ Əslän käl-Älyähud äjjootnen a-s iha Yisa taxrəmt ta n-Bitanya xas, fälän-dd Yärussälam, əkkän-t-dd məšan, wädden ənta xas a-s otasän ahānay-net, ərhan daḡ, ad-ənhəyän Lazar wa dd-issənkär jer-inəmmuttan,

¹⁰ äxtäsän imänokalän n-käl-tikutawen s-ad-əjən iman n-Lazar ənta-däḡ

¹¹ ed hannäyän a-s, dāx-tössəba n-asənkär wa t-dd-ija Yisa jer-inəmmuttan a fäl, taqqälän imänokalän n-käl-Älyähud äjjootnen qarät käl-tikutawen, timənən s-Yisa.

Ujəš n-Yisa i-Yärussälam

(Mätti 21:1-11; Marqəs 11:1-11; Luqa 19:28-40)

¹² Äffāw xas, təslä tamətte ta täjjet dd-təkkät əmudd a-s Yisa ikkä-dd Yärussälam.

¹³ Əjjäšän-tät isälan xas, ad-dd-ḡattäsän äddinät iləktan n-tišday, lakkädän-as, säḡären s-afälla:

«Ozana! Ija Mässinäḡ älbäraka
däḡ-ämänokal wa n-Işrayil
dd-osän fäll-isəm n-Emäli.»

¹⁴ Ijrāw Yisa äza iyyän dāx-zäbo, inäy-t, ämoos a-wen a ässitbätän a-wa iktäbän dāx-əlkəttab n-Mässinäḡ a-s innä:

¹⁵ «Yärussälam ta dāyät fäll-taḡayt ta n-Sayon,
wär tärmeḡäd, ənhəy xas ämänokal-näm
imal-dd inay ara n-teşədt.»

¹⁶ Ašäl wa d-jän härätän-winnin-däḡ, wär tän-əfhemän inəttulab n-Yisa məšan, ašäl wa d-ijjəš təmḡäre n-älxurmät-net, əktän-dd a-s ənta-en-däḡ a fäl əktäbän ännäbitän härätän-win-däḡ, ämeşäl-tän daḡ.

¹⁷ Ašäl-wen-däḡ, täsoḡäl tamətte iket-net a-wa ijä Yisa ed, täjjəyha a-s dd-issənkär Lazar jer-inəmmuttan, ikkäs-t-dd dāx-azəkka.

¹⁸ Təlkäd-dd tamətte-en iket-net i-Yisa dāx-tössəba n-iji n-Mässinäḡ wa-däḡ s-təslä ij'-e.

¹⁹ Ənhäyän käl-faris a-wen xas, änmännän jer-iman-näsän: «Tənhäyäm ämära a-s a-wa wädden a dd-nəkka d-härät, tamətte iket-däḡ-net a qarə-s toşalät.»

Äsdärhänän käl-Älyunan iyyäd ahānay n-Yisa

²⁰ Osän-dd härät dāx-käl-Älyunan† s-ijraz äddin wa n-käl-Älyähud, əkkan-dd daw-əmudd-i-däḡ i-ad-äḡbədän Mässinäḡ dāx-Yärussälam,

²¹ əjrāwän änättalib wa s-isəm-net Fəlibb wa n-taxrəmt ta n-Bätsäyda ta n-Galila, ənnän-as: «Ähaləs, nārha ad-nənhəy Yisa.»

²² Iglä Fəlibb, ija isälan dāx-Idris, äddewän issənän-essän s-Yisa, əlläyən-as.

²³ Əwwädän-dd Yisa xas, inn'-asän: «Ässaḡät wa dāx-mad-ijjəš Ägg-ägg-adəm älxurmät-net, osä-dd.

²⁴ Älleḡeḡ-awän s-tidət tädduuttet† a-s a təkkäs temätəwt n-älkäma wär tənbel dāx-äkall tämmät, ad-tämoos tiyyät tablalt xas məšan, afäl tənbal dāx-äkall har tämmut, a dd-tarəw tiblalen äjjootnen.

† 12:20 12:20 Itawann'-asän: Gəriktän. (Les Grecs dāx-Təfränsit). Əzzaḡän Erobbə dāx-äkall wa itawänna: Gəris (La Grèce dāx-Təfränsit). Tawalt-näsän: Tälyunanit. † 12:24 12:24 Dāx-Tälyunanit: Amin, amin (S-tidət, tidət).

²⁵ Ere wa wärän itettär ar ömmək s-ijmār iman-net dāḡ-äddunya-ta-dāḡ, ad-ifut dāḡ-älžännät, māšan, äwadəm wa irđän äfota dāḡ-iman-net, dāḡ-äddunya-ta-dāḡ, dāḡ-äddimmät-nin, ad-ijrəw tāmudre ta täḡlälät.

²⁶ Ere dāḡ-wän irhän tumast n-änaxdim-in-dāḡ adiš, ilkəmet-ahi fäl-a-s, näkk edəgg wa dāḡ-mad-əzzäḡäḡ, ənta daḡ a dāḡ-mad-izzäḡ änanxdim-in, ijrəw semḡar ḡur-Abba.»

Äloläy ḡisa dāḡ-isälan n-tamättant-net

²⁷ «Äḡḡan iman-in, äḡḡan ämära-dāḡ, ak ma he-ännäḡ fäw? Abba, äḡləs-ahi dāḡ-ässayät-wa-dāḡ? Fäw, näkk, əssanäḡ a-s təssəba n-ässayät-wa-dāḡ a fäl dd-äməšäläḡ.

²⁸ Abba, səkən äddinät təmyäre n-älxurmät n-isəm-näk.» Ifäl-dd emäsli älwäqq-wen-dāḡ išənnawän innän:

«Isəm-in, əssəmḡäräḡ-t, ad-t-aləsäḡ daḡ asəmyar.»

²⁹ Təslä tamətte ta t-təllät dihen i-emäsli-ənnin-dāḡ ḡas, innä aḡil-net iyyän: «Ak salläm i-ejjaj wa ijjäjän?» Inna aḡil wa iyyädän: «A-di wädden ejjaj, änjälos a has-imməjrädän.»

³⁰ Inn'-asän ḡisa daḡ: «Emäsli wa s-iket has-təsläm, wädden təssəba-nin a dāḡ-ija, təssəba-näwän käwänəḡ a dāḡ-ija.

³¹ Elmədät a-s ämära-dāḡ, ad-mad-tətwəšärräḡ äddunya, itwəstäḡ daḡ ämänokal-net Iblis,

³² näkk daḡ, afäl əmməḡkäläḡ, ad-dd-äḡräḡ s-iman-in äddinät iket-näsän.»

³³ Innä a-wen-dāḡ i-ad-tän-isəlməd əmmək wa s-mad-ämmät.

³⁴ Tənn'-as tamətte: «Äjän wädden näḡra dāḡ-Äḡḡawrät a-s Älmaseḡ, wär-e ämmät, iḡlal, adiš ma käy-isawännen: «Ägg-ägg-adəm, ad-ämmäḡkäl?» Wa Ägg-ägg-adəm fäl wär nəssen madän-ämmäḡkäl, mi ämoos?»

³⁵ Inn'-asän ḡisa: «Ännur, wär has-in-äqqima ar a əndärrän ill'-e jere-wän, äsimätäräḡ-käwän d-ad-has-təlkəmäm i-ad-wär käwän-ḡäddärnet tihay fäl-a-s, ere irjašan dāḡ-tihay, wär-issen e-s ihäl.

³⁶ Iket-di täzzegäzäm a-wen, a ikkäs ännur ill'-e jere-wän, amənät sär-s i-ad-tumasäm dägg-ännur.» Innä ḡisa a-wen ḡas, ifäl tamətte, iffär.

Täḡart n-ulhawän n-tamətte

³⁷ Ija ḡisa data-sän ijitän n-Mässinäḡ-i-dāḡ äjjootnen māšan, unjäyän sär-s omänän,

³⁸ ämoos a-wen a ässiitbätän mäjräd wa ikfä Mässinäḡ ännäbi Saya† a-s innä dāḡ-əlkəttab n-Mässinäḡ:

«Emäli, mi omänän s-a-wa nənna?

Mi s-dd-tänfaläl tärna n-äfuss n-Emäli?»

³⁹ Äqqurän ulhawän n-käl-Iḡrayil fäl-a-s, innä ännäbi Saya daḡ:

⁴⁰ «Äsdäryäl-tän Mässinäḡ,

äḡḡar ulhawän-näsän i-ad-wär hənnəyän s-tiḡḡawen-näsän,

əjrähän härät s-ulhawän-näsän,

utabän i-ad-tän-izuzəy Mässinäḡ.»

⁴¹ Mäjräd-wen-dāḡ, ij'-e ännäbi Saya äzzäman wa d-has-dd-änfaläl älxurmät n-ḡisa, ädwännät dāḡ-isälan-net.

† 12:38 12:38 A-wa ännäbi dd-äzzarän i-ḡisa, äloläy dāḡ-isälan-net əssayät timad n-awätay dat-tiwit-net.

⁴² Hakd a-wen-däx, omänän imizärän n-käl-Älyähud äjjootnen s-ÿisa mäšan, tögda-asän tuksəda n-käl-faris ad-sətbətän immun-näsän, fäl-a-s äksuđän ad-tän-əkkəsän däx-ihänan n-äddin-näsän,

⁴³ ässofän təmmal ta dd-fälät dägg-adəm uhən ta n-Mässinäx.

ÿisa Älmasex a-s ilkam ad-išräx dägg-adəm

⁴⁴ İdkäl ÿisa emäsli-net, innä: «Ere sār-i omänän-däx, ilmədet a-s wädden näkk a-s omän, Mässinäx-i hi-dd-äšmašälän a-s omän,

⁴⁵ ere daḡ wa hi-inhäyän, ilmədet a-s Mässinäx-i hi-dd-äšmašälän a inhäy.

⁴⁶ Näkk a-s ännur, ämešäläx-dd s-äddunya däx-təssəba n-ad-wär-itəzzäx fäw ere sār-i omanän däx-tihay,

⁴⁷ ere islän i-mäjräd-in wär t-iṭṭef, wädden näkk a t-madän-išräx fäl-a-s, wär dd-ämešäläx i-ad-əšräxäx äddunya, änn-ak, ämešäläx-dd i-ad-tät-äxləsäx.

⁴⁸ Ere sār-i unjäyän, unjäy s-mäjräd-in, mäjräd-en-däx a t-e-išräxän ašäl wa ilkämän

⁴⁹ fäl-a-s, mäjräd wa jeḡ iket-net, wädden a dd-əkkaşäx däx-eḡäf-in ḡas, Abba-nin ənta iman-net-i hi-dd-äšmašälän a hi-ikfän turhajät n-ad-ännäx a-wa hi-inna, äjäḡ daḡ isälan-net i-äddinät.

⁵⁰ Əssanäx daḡ a-s e d t-illäm äwadəm ilkamän i-a-wa innä, ad-ijrəw təmudre ta täylälät. A-wen-däx a fäl näkk, a-wa jänney iket-net, jänney-tän s-əmmək wa s-hi-tän-innä Abba.»

13

Ässeräd ÿisa iđarän n-inəṭṭulab-net

¹ Ehäḡ wa n-dat-wa n-ämudd wa n-Faşka, ilmäd ÿisa s-ässaxät n-ajmuḡ-net i-äddunya i-ad-akk Abba, iwwäḡ-dd. Ehäḡ-en-däx, issəmdä-dd təmḡäre n-tärha-net s-inəṭṭulab-net, issəkn'-en tärha tokäyät ta tän-isakna hak ašäl a ija a-wa-däx.

² Härwa tamänsawän a-s ija Iblis däx-ulh n-Yähudəs Ägg Simyon wa n-Isxaryut erk ənniyät wa n-ad-isäḡdär ÿisa.

³ Däx-təlluləya-net, issan ÿisa a-s wär t-illa a-s wädden ij'-e Abba-net däx-ifassän-net, issan daḡ a-s Mässinäx-i t-dd-äšmašälän, ənta a iqḡal.

⁴ Əssəmdän tetäte ḡas, ibdäd ÿisa, ikkäs emäls-net, iḡkäl-dd ekärşäy iyyän, ijbäs sār-s,

⁵ ijä ḡarät-a-wen aman däx-tazäwat, ad-isarad iđarän n-inəṭṭulab-net, itiməs-tän s-ekärşäy wa s-ijbäs.

⁶ Iwwäḡ-dd ässaḡät wa n-asirəd n-iđarän n-Simyon Bəṭrus ḡas, iggäd inna i-ÿisa: «Xäša Älḡalim! Näkk a iwar asirəd n-iđarän-näk wädden käyy.»

⁷ Inn'-as ÿisa: «A-wa hi-işlän, wär mad-təjrähäd älmäḡna-net ämära-däx mäšan, ilkam ad-t-təfhəməd.»

⁸ Inn'-as Bəṭrus älwäqq-wen: «Käla käla Älḡalim, näkk lab wär-ilkem ad-ärḡey tässerädäd iđarän-in.» Inn'-as ÿisa: «Afäl wär-ässerädäx iđarän-näk, wär hak t-illa ad-nahär.»

⁹ Innä Simyon Bəṭrus: «Adiš Älḡalim, wär təbdeḡad ḡur-iđarän-in ḡas, sirəd daḡ eḡäf-in hakd ifassän-in.»

¹⁰ Inn'-as ÿisa: «Wädden ere ässerädän telämäkt-net, wär-ämḡatär s-ad-aləs asirəd daḡ kunta wädden iđarän-net ed, šäddij iket-net, käwäneḡ, a-s təkkäsäm iyyän däx-wän, šäddijäm.»

¹¹ Mäjräd-wen-däx, ij'-e ÿisa ed, issan ere wa t-madän-isəssäḡdär. Däx-təssəba n-a-wen-däx a fäl hasän-innä iyyän däx-sän, wär šäddij.

12 Ässeräd idarän-näsän ɣas, ils' emäls-net, iqqäl-dd, äqqima dāɣ-edägg wa n-imənsiwän, inn'-asän: «Ak, käwäneḍ, təfhamäm a-wa s-iket hawän-t-jeɣ meɣ?

13 Wädden a hi-jannem: <Älyalim d-Emäli,> ikna ed a-wen-dāɣ a ämoosäɣ

14 ɣas, šamad näkk-i n-Emäli d-älyalim, ässerädäɣ idarän-nāwän, adiš käwäneḍ-däɣ, iwar-kāwän ad-tinməsiridäm idarän jer-iman-nāwän;

15 əssəknäɣ-kāwän älmital he-tinməjjim jer-iman-nāwän s-əmmək-wa-däɣ s-hawän-t-jeɣ.

16 Älleɣeɣ-awän s-tidət tädduuttet† a-s wär t-illa akli ojarän mässi-s, wäla änəmmašal ojarän ere wa t-äšmašälän.

17 Təndəḍ-awän kunta təssanäm s-härätän-wi-däɣ, ad-tän-tamašäläm.

18 A-wa hawän-janneɣ, wädden iket-nāwän a fäl t-janneɣ fäl-a-s näkk, əzzayäɣ inəṭṭulab-in wi äsnäfränäɣ, ämära, mäjräd n-Mässinäɣ a madän-isətbət a-wen ed, iktab dāɣ-s a-s:

<Wa dār-i ohärän äkoss, ənta a-s äšanjo-nin.>

19 Ekkasäɣ-kāwän dāɣ-tayḍärt n-härätän-wi-däɣ härwa wär-ətbetän dāɣ-təssəba n-a-s afäl jän, ad-tamənäm a-s: <Näkk, äɣlaläɣ.>

20 Älleɣeɣ-awän s-tidət tädduuttet a-s ere äsbärräkän ere hin-äsimašäläɣ, a ämoos-däɣ, näkk a äsbärräk, ere daɣ wa hi-äsbärräkän, Wa hi-dd-äšmašälän a äsbärräk.»

Äloläy Ȳisa dāɣ-isälan n-ämaydar-net

(Mätti 26:20-25; Marqəs 14:17-21; Luqa 22:21-23)

21 A-s issəmda Ȳisa mäjräd-wa-däɣ, əkman-t iman-net, inn'-asän: «Älleɣeɣ-awän s-tidət tädduuttet a-s iyyän dāɣ-wän a hi-madän-isəssäɣdär.»

22 Eslän inəṭṭulab i-a-wen ɣas, ad-tinməkyidän, tinməsəstinän d-ere wa s-iha ti-net.

23 A-s itäj j a-wen-däɣ, äsiɣämär änəṭṭalib wa ikna Ȳisa tārha edes-has,

24 inzäj-as Simyon Bətrus tiṭṭ, inn'-as, ad-isəstən Ȳisa d-ere wa s-iha ti-net.

25 Äsmätäktäk änəṭṭalib-en i-Ȳisa, inn'-as: «Älyalim, mi käy-madän-isəssäɣdär?»

26 Inn'-as Ȳisa: «Ere wa s-mad-səlmäɣäɣ afärs n-tajəlla dāɣ-aḍrəz, ənta-en-däɣ a hi-madän-isəssäɣdär.» Issəlmäɣ Ȳisa afärs n-tajəlla dāɣ-aḍrəz, ikf'-e Ȳähudəs wa s-itawänna Isxaryut n-ägg Simyon.

27 Diha-däɣ d-irmäs Ȳähudəs afärs n-tajəlla-ənnin-däɣ, ad-innäḥäḍ Iblis dāɣ-ulh-net, inn'-as Ȳisa älwäqq-wen: «Ȳähudəs! A-wa täjjäd, äj'-e šik.»

28 Ijä Ȳisa i-Ȳähudəs mäjräd-wen-däɣ mäšan, wär t-illa dāɣ-inəṭṭulab-net wi iyyäḍnen äsiɣämärnen dāɣ-isəftaɣ i ifhamän a-wa innä,

29 äɣelän a has-innä: «Žänš-dd a-wa s-nämiɣatär i-ämudd wa n-Faška» meɣ «Äkf härät tiläqqiwen» fäl-a-s, ənta a-s änazraf-näsän.

30 Irmäs-dd Ȳähudəs afärs n-tajəlla wa has-dd-izžäl Ȳisa ɣas, izjär. Isälan-wi-däɣ, ehäḍ a-s tajjän.

Alämär wa äynayän ikfä Ȳisa inəṭṭulab-net

31 Izjär Ȳähudəs ɣas, innä Ȳisa i-inəṭṭulab-net: «Ämära-däɣ ad-mad-itwəsəmyär Ägg-ägg-adəm, itwəsəmyär daɣ Mässinäɣ dāɣ-təssəba-net,

32 äkf Ägg-ägg-adəm älxurmät ɣur-iman-net, äkf'-as-t daɣ šik.

33 Ilyadän-in, wär-e ähajäɣ əlleɣ jere-wän, əssanäɣ a-s ilkam ad-hi-təmmäɣäm mäšan, ənneɣ-awän a-wa s-käla tän-ənnəɣ i-käl-Älyähud wi iyyäḍnen: <Edägg wa əkkeɣ, wär mad-tudabem aggaḍ-net>.

34 Ämära, ənta-da färəḍ wa äynayän əfräḍäɣ fälla-wän: <Nəməjjät jer-iman-nāwän anmärh šund wa hawän-jeɣ, nəmärhät jer-iman-nāwän,

† 13:16 13:16 Dāɣ-Tälyunanit: Amin, amin (S-tidət, tidət).

³⁵ anmärh jer-iman-nāwān en-dāx a he-isəlmədān äddināt a-s tidət-dāx a-s inəṭṭulab-in a tāmoosām.» »

*Ālolāy Ƴisa dāx-isālan n-akuddəl wa t-e-āj Bəṭrus
(Mātti 26:31-35; Marqəs 14:27-31; Luqa 22:31-34)*

³⁶ Issəmdā Ƴisa mājrad-wen-dāx ɣas, iggād-dd Simyon Bəṭrus, innä: «Āɣalim, əndek siha s-təkkeḏ?» Inn'-as Ƴisa: «Edägg wa əkkeɣ, wär täddobed ad-hi-sār-s təkəməd əməra-dāx māšan, ilkam dāx-k ad-hi-dd-tawəḏād dāx-s.»

³⁷ Inn'-as Bəṭrus: «Āɣalim, mafāl wär-äddobəɣ alkum-hak əməra-dāx? Äddobəɣ-t, näkk, əsidāwəɣ wāla i-tamättant dāx-təssəba-näk.»

³⁸ Inn'-as Ƴisa: «Wädden tənned täsidāwəd wāla i-tamättant dāx-təssəba-nin? Ikna māšan, əsidätteɣ-ak a-s, wär-e iwət ekāz āɣora wär hi-täkkuddälād har kərad ihändäggan.»

14

Ƴisa Ālmaseɣ a-s tabarāt ta tiɣəḏāt s-Mässināɣ

¹ Inn'-asān Ƴisa ḏarāt-a-wen: «Wär ramməɣnet ulhawān-nāwān, amənāt s-Mässināɣ, amənāt sār-i,

² ehän n-Abba-nin, han-t idäggan äjjootnen, ənnär wär-itbet a-wen, wär hawān-jənneɣ əgleɣ i-ad-hawān-səmməjnux edägg,

³ afāl əgleɣ har hawān-əsmājneɣ edägg, ad-kāwān-dd-əqqələɣ, əḏkələɣ-kāwān, təmləm diha t-əlleɣ.

⁴ Edägg daɣ wa əkkeɣ, təssanām tabarāt-net.»

⁵ Iggād-dd ənätṭalib wa s-isəm-net Tomi, inn'-as: «Āɣalim, näkkāneḏ lab, wär nəssen siha s-təkkeḏ, əndek əmmək wa s-mad-nəlməd tabarāt-net?»

⁶ Inn'-as Ƴisa: «Näkk a-s tabarāt, näkk a-s tidət, näkk daɣ a-s təmudre, wär t-illa fāw ere äddooben aggaḏ n-Abba ar s-ad-hi-ija əssəbab n-a-wen.

⁷ Šāmad daɣ näkk təzzayām-ahi, ad-təzzəyām Abba-nin, šāmad təzzayām-t, adiš, tənḥayām-t.»

⁸ Iggād-dd wa s-isəm-net Fəlibb, inn'-as: «Āɣalim, səkən-anāɣ ɣas Abba, igdāh-anāɣ a-wen-dāx.»

⁹ Inn'-as Ƴisa: «ɣas Fəlibb, a-wa-dāx jeɣ iket-net ärtayāɣ dār-wān, wär hi-təzzeyād? Wa hi-inḥayān, inḥay Abba, ɣas əndek əmmək wa s-jānneḏ: <səkən-anāɣ Abba>.

¹⁰ Ajān wär tomenād a-s näkk ärtayāɣ d-Abba, irtay dār-i daɣ ənta, heeɣ-t, ih'-ahi? A-wen-dāx a fāl iməjridān wi hawān-tājjāɣ, wädden a dd-əkkasāɣ dāx-eɣäf-in ɣas, Abba-i dār-i irtayān a əmoosān əssəbab n-ijitān wi tamašalāɣ iket-nāsān.

¹¹ Amənāt a-s näkk ärtayāɣ d-Abba, irtay dār-i daɣ ənta, heeɣ-t, ih'-ahi. Kunta daɣ wär tomenām s-mājrad-in, amənāt bānna s-ijitān-wi tamašalāɣ.

¹² Ālleɣəɣ-awān s-tidət tädduuttet† a-s ere sār-i omānān-dāx, ad-āj ənta-dāx ijitān-wi jeɣ, aj fāw-i tān-əknanen mijraw ed näkk, əkkeɣ Abba.

¹³ A-wen-dāx a fāl a tətārām-dāx s-isəm-in, ad-t-ājāɣ i-ad-ijrəw Abba älxurmät dāx-təssəba n-Rure-s.

¹⁴ A tətārām-dāx s-isəm-in, ad-hawān-t-ājāɣ.»

Unfas wa s-ilkam ad t-dd-isəssiwəy Mässināɣ

¹⁵ «Kunta tidət-dāx a-s tārham-ahi adiš, əṭṭəfāt fərəḏān-in,

¹⁶ ad-hawān-ädələɣ Abba i-ad-kāwān-əkf ānabdid iyyān ɣur-wān e-illan härkuk,

† 14:12 14:12 Dāx-Tälyunanit: Amin, amin (S-tidət, tidət).

¹⁷ ɔnta a-s Unfas wa s-tidɔt ɣas a t-dd-zajjārāt, wār tāddoobāt äddunya ad-t-täq̄bəl fäl-a-s wār tāddobāt ahānay-net wāla muzəyāt-net māšan, kāwāneḍ, təzzayām-t ed äheräj dār-wān, izzaȳ daɣ dāɣ-ulhawān-nāwān.

¹⁸ Wār kāwān-mad-äyyäɣ täjohälām, ad-kāwān-dd-äqqələɣ,

¹⁹ äqqim-in a ɛndärrān i-ad-ābas hi-hannäy äddunya māšan kāwāneḍ, a hi-hannäyām fäl-a-s, ɛddaräɣ, təddarām.

²⁰ Ašäl-wen-däɣ ad-mad-təlmədām a-s näkk ärtayäɣ d-Abba, tärtayām dār-i kāwāneḍ, ärtayäɣ dār-wān daɣ näkk.

²¹ Ere wa iknān uḍəf n-färəḍān-in, ɔnta a-s emār̄h-in, ere daɣ wa hi-irhān, ad-t-ärh Abba-nin, ärhāɣ-t näkk-däɣ, sənnəfilələɣ-as-dd daɣ iman-in.»

²² Inn'-as änät̄talib wa s-isəm-net Hudd izleyān d-Yāhudəs wa n-Isxaryut: «Älyalim, ɛndek ɛmmək wa s-mad-hanäɣ-dd-sənnəfilələḍ iman-näk wār tän-dd-täsnäfaläläḍ i-äddunya?»

²³ Inn'-as Ƴisa: «Ere hi-irhan, ad-agəz mäjräd-in, dihen, ad-t-ärh Abba-nin, nidaw-dd sär-s, nəzzäɣ ɣur-s.

²⁴ Ere wa hi-wārān-irha, wār mad-it̄təf mäjräd-in. Mäjräd wa s-təslām ɣur-i, wädden a dd-əkkašäɣ dāɣ-eyäf-in ɣas, Abba-nin-i hi-dd-äšmašälān ahi-ikfān turhajāt n-tənna-net.

²⁵ Ƴas, əkkašäɣ-kāwān dāɣ-tayḍärt härwa əlley jere-wān,

²⁶ änabdid daɣ wa s-hawān-ənney, a t-ämoosān Unfas Šäddijän, ad-hawān-t-dd-isəssiwəy Abba s-isəm-in, afäl hawān-t-dd-ässawäy, ad-kāwān-isäɣär härät iket-net, isəktəw-kāwān-dd a-wa hawān-ənney iket-net.

²⁷ Ämära, oyyey ɣur-wān älxer, älxer daɣ wa s-näkk ɣas a t-ihakkān a ɣur-wān oyyey ed näkk, isuf-wi hawān-täjjäɣ, wār-olehān d-wi hawān-täjj äddunya, wār täšawwašnet ulhawān-nāwān, wār rämmäɣāt.

²⁸ Wädden, sallām-ahi a-s hawān-ənney: «Əgley dāɣ-təssəba n-ad-kāwān-dd-äqqələɣ», ɣas ɛnnär hi-tärham, ijrəz-awān a-wa hawān-ənney ed Abba-i əkkeɣ, ojār-ahi.

²⁹ Härätān-wi-däɣ, janney-awān-tän ämära-däɣ i-ad-kāwān-əkkəsäɣ dāɣ-tayḍärt härwa wār jen, dihen afäl jän, ad-tamənām sär-i.

³⁰ Igdäh dāɣ-mäjräd diha-däɣ ämära fäl-a-s, Iblis-i n-ämānokāl n-äddunya, imal-dd. Əlmədāt a-s wār fäll-i ila tärna

³¹ māšan, ärhey ad-təlməd äddunya a-s näkk ärhey Abba, wār təmišiläɣ daɣ ɣas ar erhet-net. Ənkärät ämära, äflät-anäɣ edägg-wa-däɣ.»

15

Ƴisa a-s ahəšk wa dāɣ-ärmamān imumənān

¹ Fälān dihen ɣas, inn'-asān Ƴisa: «Näkk a-s ahəšk n-läɣnāb wa n-tidɔt, Abba-nin a-s änäsdamu.

² Kāwāneḍ a-s iləktan n-ahəšk, e d t-illām eläkāt dāɣ-i irmamān wārān itirəw, ad-t-in-iɣtəs Abba-nin, eläkāt daɣ iket-net itirəwān arātān, ad-hin-isrəmsərəm iləḍan-net, išəsdəj-t i-ad-dd-arəw arātān s-əjut.

³ Ƴur-ämära-däɣ, əlmədāt a-s šäddijäm dāɣ-təssəba n-asəssäɣär wa kāwān-jeɣ.

⁴ A-wen-däɣ a fäl ɣaymāt tärtayām dār-i s-ɛmmək wa s-dār-wān ärtayäɣ. Wār t-illa eläkāt äddooben tiirwe d-iman-net afäl wār-irmem d-tafäja, ɛmmək-wen-däɣ daɣ a-s wār t-illa a iha ärramāt s-täddobem amišəl-net i-Mässinäɣ ar s-ad-dār-i tärtayām.

⁵ Ässiilmädäɣ-kāwān a-s näkk a-s tafäja n-ahəšk n-läɣnāb, kāwāneḍ a-s iləktan-net. Ere wa dār-i irtayān, ärtayäɣ dār-s näkk-däɣ, ad-ämašäl i-Mässinäɣ a iha ärramāt fäl-a-s, wār t-illa a-s täddobem iji-net wāla näkk.

⁶ Ere dār-i wārān irtey iket-net, ad-hin-itwāxtəs, itwøjār-in šund elākāt äqçqurān s-afāl hin-ätwājār dāç-efew, ad-ārç s-iiyāt māšan,

⁷ afāl näkk a ihan inəzjam-nāwān, ad-dār-i tārtayām, tamašalām mājrad-in, a tətārām dāç-Mässināç-dāç, ad-hawān-t-äkf.

⁸ Afāl inəttulab tamašalnen a iha ärramāt i-Mässināç a tämoosām, ad-hawān-dd-isənnifiləl a-wen älxurmāt n-Abba-nin.

⁹ Tārha ta-hi ija Abba, ənta a hawān-jey näkk-dāç; əttəfāt tārha-nin, təzzāçām dāç-s.

¹⁰ Tārha-nin daç, wār tät-mad-təttəfām ar s-ad-təttəfām färəðān-in s-əmmək wa s-əttəfāç färəðān n-Abba-nin, əlkamāç i-tārha-net, əzzaçāç dāç-s.»

Äsmadaw Yisa inəttulab-net d-iman-net

¹¹ «Mājrad-wa-dāç hawān-jey, jey-awān-t dāç-təssəba n-ad-təjəm tedāwit šund ta jey, təjəm daç tedāwit təmdat.

¹² Ämāra, ənta da färəð wa kāwān-äsiwārāç: «Nəmārhat jer-iman-nāwān s-əmmək-wa-dāç s-kāwān-ärheç».

¹³ Wār t-təlla tārha tojārāt ad-äkf äwadəm iman-net dāç-təssəba n-imidiwān-net,

¹⁴ afāl tamašalām a-wa fälla-wān əfräðdāç, ad-kāwān-çarrāç s-isəm: «imidiwān-in»,

¹⁵ ad-äbas kāwān-jey eklan-in ed akli, wār dāç-s itəjj mäs-s isälan-net, änn-ak, ad-tumasām imidiwān-in fäl-a-s, a-wa s-əsleç çur-Abba-nin iket-net, əssəlmädāç-awān-t.

¹⁶ Wädden kāwāneð a hi-äsnäfränān, näkk a kāwān-äsnäfränān, äçreç-kāwān-dd i-ad-tamašalām a iha ärramāt i-Mässināç, umasnāt timaşalen-nāwān a içlalān. Afäl jam a-wen, a tətārām dāç Abba-nin s-isəm-in, ad-hawān-t-äkf.

¹⁷ Ənta da a-wa s-kāwān-omarāç: «Nəmārhat jer-iman-nāwān.» »

Äddunya, tašanjot n-älməssexitän

¹⁸ «Kunta tokäð dār-wān äddunya, əlmədāt a-s tokäð dār-i data-wān,

¹⁹ ənnār tämoosām äddināt ättälälnen a-wa fäll-təgl' äddunya, wār kāwān-kəssən. Ässiilmädāç-kāwān a-s wār kāwān-təla äddunya, tokäð dār-wān daç dāç-təssəba n-a-wa s-kāwān-äsnäfränāç.

²⁰ Çaymāt dd-kittəwām mājrad wa s-kāla hawān-t-jey a-s hawān-ənnəç: «Wār t-illa akli ojarān mäs-s.» Kunta, täqquzabāt-ahi äddunya-ta-dāç, adiš ad-kāwān-täqquzəbət kāwāneð-dāç, kunta daç täsjäd i-mājrad-in, adiš, ad-hawān-səjəd kāwāneð-dāç

²¹ māšan, əlmədāt a-s wār hawān-mad-səjdən äddināt, änn-ak, älyizabāt a kāwān-e-səknən dāç-təssəba-nin ed, wār-əzzeyän ere wa hi-dd-äšmašälän.

²² Ənnār wār dd-oseç i-ad-hasän-äjäç isälan, iket-di, wār tän-itəwwer abäkkad māšan, ämāra-dāç d-hasän-jey isälan, äbas hasän-t-illa äsarü injārān ibäkkadän-näsän.

²³ Ere wa dār-i okäðän, okäð daç d-Abba-nin.

²⁴ Ənnār wār jere-sän jey ijitän n-Mässināç s-kāla wār tän-ija äwadəm dat-i, äqçqaymən wār tän-iwer abäkkad, māšan ämāra-dāç, d-ənhäyän ijitän n-Mässināç wi jey dat-tiçtawen-näsän, okäðän dār-i näkk hakd Abba-nin.

²⁵ Hakd a-wen-dāç, mikdaw-näsän dār-i, i n-təssəba n-ad-itbat mājrad n-Mässināç wa iktäbän dāç-alämär-näsän a-s tän-içtäl, inn'-asän: «Okäðän dār-i dägg-adəm bännan baçilän.»

²⁶ Afäl hawān-dd-ässawäyāç änadid wa t-illan çur-Abba, ənta-i n-Unfas wa wār dd-zəjjār ar tidət ta dd-fälāt Abba, ad-hawān-äj isälan-in,

²⁷ tumasām tjuhawen-in fäl-a-s, kāwāneð-i-dāç a-s wi s-a əssəntäç ämašal-in har näkk-da-dāç, täddewām dār-i.»

16

Ilkam älyizabät

¹ «Jex däx-wän isälan-wi-däx i-ad-wär tinmøšrøyäm.

² Ilkam ad-hawän-өгдөлән кäl-Älyähud ämudd däx-ihänan n-äddin-näsän, ilkam fäw äzzäman s-äwadəm inxän iyyän däx-wän, ad-iḡal teḡse a ikät i-Mässinäx.

³ Ad-өjөн a-wen ed wär hi-өzzeyän näkk wäla Abba.

⁴ Elläyex-awän härwa ämära, däx-tössöba n-a-s afäl dd-өwwäḡän härätän-win-däx, ad-dd-täktöwäm a-s älleyyex-awän sär-sän härwa wär jen, wär hawän sär-sän өlläyex äru ed a-s ija a-wen, ärtayäx där-wän mäšan

⁵ ämära-däx d-ässawäḡäx uxəl n-Wa hi-dd-äšmašälän, wär käwän-iha-i hi-isastanän d-diha өkkeḡ

⁶ mäšan, äḡšadän ulhawän-näwän däx-tössöba n-a-wa hawän-өнney.

⁷ Tidöt a hawän-өннөḡ, uf'-awän ad-ägläx ed, afäl wär-өgleḡ, wär mad-käwän-dd-ass änabdid, afäl өgleḡ, ad-hawän-t-dd-sukäx.

⁸ Afäl dd-osa änabdid, ad-isəlməd a-s toška äddunya däx-a-wa ämoosän abäkkad d-a-wa ämoosän iqqud d-a-wa ämoosän äššäreḡa n-Mässinäx;

⁹ ad-isəlməd äddinät a-s oškan däx-isälan n-ibäkkadän ed, wär sär-i omenän,

¹⁰ isəlməd-tän a-s oškan däx-isälan n-iqqud ed өkkeḡ Abba, wär-ilkem ad-hi-tənhayäm,

¹¹ isəlməd-tän a-s oškan däx-isälan n-äššäreḡa ed Iblis-i n-ämänokal n-äddunya, äššäreḡa-net, äru d-t-iḡtäs Mässinäx.

¹² Leeḡ a äjjeen s-ärheḡ ad-hawän-t-ännäx mäšan, wär täddobem ujreh-net ämära-däx.

¹³ Afäl dd-osa Unfas wa wär dd-zөjjar ar tidöt, ad-käwän-aḡöd däx-tidöt iket-net fäl-a-s, wädden isälan n-iman-net a däx-e ämmäjräd, änn-ak, ad-äj isälan n-a-wa s-islä, älläḡät-awän härätän-wi dd-malönen.

¹⁴ Afäl dd-osa Unfas, ad-hi-isəmyär fäl-a-s, ad-dd-irmös mäjräd-in, isuxəl-awän-t.

¹⁵ A-wa ila Abba iket-net, i-nin, a-wen-däx a fäl hawän-өнney, ad-dd-irmös mäjräd-in, isuxəl-awän-t.»

Tössökma tekle n-ḡisa iman n-inөḡtulab-net

¹⁶ «Äqqima-hin a өndärrän i-ad-äbas hi-hannäyäm, akөy daḡ ässaḡät өndärrän, talösäm-ahi ahänay.»

¹⁷ Eslän iyyäḡ däx-inөḡtulab-net i-tifer-tin-däx ḡas, änmännän jer-iman-näsän: «Enderk älmäḡna n-mäjräd wa hanäx-ija a-s innä: <Äqqima-hin a өndärrän i-ad-äbas hi-hannäyäm, akөy daḡ ässaḡät өndärrän, talösäm-ahi ahänay.> Ma ämoos daḡ älmäḡna n-: <өkkeḡ Abba-nin> wa hanäx-innä?»

¹⁸ Änmännän daḡ: «Näkkäneḡ ya wär t-illa a nəfham, ma ämoos älmäḡna <n-älwäqq өndärrän> wa s-hanäx-ijänna.»

¹⁹ Ilmäḡ ḡisa a-s ärhan ad-t-sөstөнän ḡas, inn'-asän: «Käwäneḡ, tinmöссөstinäm härwa jer-iman-näwän däx-a-wa s-hawän-өнney: <Äqqima-hin a өndärrän i-ad-äbas hi-hannäyäm, akөy daḡ ässaḡät өndärrän, talösäm-ahi ahänay.>

²⁰ Älleyyex-awän s-tidöt tädduuttet† a-s ad-šoršөm, säkkөлөлäm, a-s ija a-wen äddunya өnta täsriiw, ad-äḡšөdän iman-näwän mäšan, ad-dd-tөsrөy tedäwit a-wen.

²¹ Wädden tamäḡt ed, täbok ajäraw n-eḡäf-net, ad-tazär hullan mäšan, afäl төjräw eḡäf-net ad-hin-titaw tiḡzurt-net төnnin-däx iket-net, tissant-net, ad-has-tät-in-sөtөw tedäwit n-ara wa төkräš.

† 16:20 16:20 Däx-Tälyunanit: Amin, amin (S-tidöt, tidöt).

²² Emmək-wen-däx a-s käwäneḍ-däx ämära-däx, äxšadän iman-näwän mäšan, ad-käwän-aləsäx ahänay, äddäwen ulhawän-näwän, əjən daḡ tedäwit-ta-däx s-wär t-illa ere äddoben aḡšad-net.

²³ Ašäl-wen d-hi-mad-tənhəyäm, wär mad-t-iməl fäw a-s tämiḡatäräm d-asəstan-in dār-s. Älleḡeḡ-awän s-tidət tädduuttet a-s a təttäräm däḡ-Abba s-isəm-in, ad-hawän-t-äkf.

²⁴ Har ämära-däx, wär t-illa a däḡ-t-daläm s-isəm-in, ädölät-t ämära, ad-käwän-äkf a-wa däḡ-s təttäräm i-ad-sär-wän dd-təmdəw tedäwit.»

A əttärän imumənän däḡ-Mässinäḡ-däḡ, ad-hasän-t-äkf

²⁵ «A ija a-wa-däḡ, saḡlayäḡ-käwän tangalen, sinfäqqeḡ-awän härätän, mäšan, imal-dd älwäqq d-äbas hawän-e-tamäjrädäḡ s-tangalen, ašäl-en, ad-hawän-äjäḡ isälan n-Abba s-əmmək ässiifhämän.

²⁶ Ašäl-wen, wär mad-təmyutäräm s-ad-hawän-ädöläḡ Abba, ad-t-tədöləm käwäneḍ iman-näwän s-isəm-in

²⁷ fäl-a-s, Abba iman-net irh'-iwän ed tärham-ahi, tomanäm daḡ a-s Mässinäḡ a dd-faläḡ.

²⁸ Ənta a hi-dd-äšmašälän s-äddunya ḡas, ämära, faläḡ-tät, äqqaläḡ-t ənta-i n-Abba.»

Ikräš ḡisa ašäl fäll-äddunya

²⁹ Ənnän-as inəṭṭulab-net: «Näkkäneḍ iket nəjräh a-wa hanäḡ-janned ed, äbas hanäḡ-saḡlayäd tangalen, a-wa hanäḡ-janned ämära iket-net, il' ujh.

³⁰ Nəssan ämära a-s wär t-illa a-s wädden tössanäd-t, wär tämyatäräd s-ad-käy-isəstən äwadəm d-härät wäl' iyyän. Däḡ-tössəba n-a-wen-däḡ a fäl noman a-s käyy Mässinäḡ a dd-faläd.»

³¹ Inn'-asän ḡisa: «Ak tənnäm tomanäm sār-i wädden?

³² Ikna mäšan, ässiilmädäḡ-käwän a-s imal-dd ässaḡät, ässaḡät daḡ s-išwar dd-osa, ad-tämmähäšäm, ilal hak iyyän däḡ-wän tenere n-iman-net, təyyəm-ahi näkk ḡas mäšan, kud-hi-fäläm-däḡ, wär mad-äqqaymäḡ näkk ḡas ed, idhal-ahi Abba.

³³ Əkkäsäḡ-käwän däḡ-taḡdärt n-härätän-wi-däḡ i-ad-sär-i tamənäm, təjrəwäm älxer. Əlmədät a-s ad-tənhəyäm aḡäna däḡ-äddunya-ta-däḡ mäšan, wär käwän-isärmaḡet härät, əkräšäḡ ašäl fäll-äddunya.»

17

Tittar ti n-tinahäyen ija ḡisa

¹ Ija ḡisa isälan-win-däḡ ḡas, äjozäy išənnawän, innä: «Abba, täqqän ta hi-təkfed, täwwäḍ-dd, sətbət təmyäre n-älxurmät n-Rure-k i-ad-isətbət ənta-däḡ wa-näk

² fäl-a-s Rure-k, ənta a təkfed tärna fäll-e d t-illäm ägg-adəm i-ad-umas əssəbab wa ihäkkän tämudre ta täḡlälät i-äddinät wi t-tössäḡläfäd.

³ Tämudre-en, a tät-ämoosän: ad-käy-əzzəyän, käyy-i n-Mässinäḡ wa n-tidət, əzzəyän Rure-k ḡisa Älmasex wa dd-täšmašäläd.

⁴ Əssəlmädäḡ s-älxurmät-näk fäll-äröri n-äkall, ässawäḍäḡ-in daḡ ämašal wa hi-tössäḡläfäd,

⁵ ämära Abba, iqqəlet-ahi-dd älxurmät wa ḡur-k leḡ härwa wär dd-täxlek äddunya.

⁶ Däḡ-a-wa əkkäsäḡ heḡ äddunya-ta-däḡ, äsbayänäḡ-käy i-äddinät wi hi-dd-tohäḡäd däḡ-s, tössäḡläfäd-ahi-tän; käyy a tän-ilän mäšan, təkfed-ahi-tän daḡ ḡas, əlkämän i-mäjräd-näk, əṭṭäfän-t.

⁷ Ašäl-i, əlmädän a-s a-wa hi-təkfed iket-net, käyy a dd-ifal

⁸ fäl-a-s, a-wa hi-tønned iket-net, ənneḡ-asän-t, äqbalän-t, əlmädän daḡ a-s tidət a-s käyy a dd-fäläḡ, əfläsän a-s käyy a hi-dd-äšmašälän.

⁹ Təddaläḡ-käy hasän, wär käy-təddiläḡ i-äddunya ta wärät sär-k tomen, təddaläḡ-käy i-äddinät wi hi-täsnäfränäd fäl-a-s, äddinät-win-däḡ a-s wi-näk.

¹⁰ A-wa ley iket-net, i-näk, a-wa led daḡ iket-net, i-nin; əntäneḡ-en-däḡ daḡ sär-k omännən a daḡ-dd-änfaläl älxurmät-in.

¹¹ Šamad näkk ämära, əzjaräḡ äddunya-ta-däḡ i-ad-käy-in-äkkäḡ, äqqaymən daḡ-s əntäneḡ, əttaräḡ daḡ-k Abba Šäddijän, ad-tän-tagəzäd s-tärna n-isəm-näk wa hi-təkfed näkk-i n-Rure-k, i-ad-osaxän s-əmmək wa s-nosaḡ näkk d-käyy.

¹² Äzzäman wa əkkäsäḡ jere-sän, ogaḡäḡ-tän s-tärna n-isəm-näk, ogaḡäḡ-tän daḡ iket-däḡ-näsän, jeḡ ənniyät, wär tän-iha fäw-i hi-änimäšräyän a-s təkkäsäd wa n-ägg-əlhəllak i-ad-itbət a-wa daḡ-äloläy əlkəttab.

¹³ Ämära, näkk-da-däḡ s-išwar käy-in-äqqaläḡ, tajjäḡ-asän mäjräd-wa-däḡ, daḡ-äddunya-ta-däḡ, i-ad-äddäwen s-tedäwit n-tänoflayt ta s-näkk ḡas a tät-ihakkän.

¹⁴ Əssäyläfäḡ-tän mäjräd-näk mäšan, täššunjät-tän äddunya ed, wär tän-təla s-əmmək wa s-wär hi-təla näkk-i s-omännən.

¹⁵ Abba, wär daḡ-k təttäräḡ ad-tän-təkkəsäd daḡ-äddunya-ta-däḡ, änn-ak, tattäräḡ daḡ-k, ad-tän-tagəzäd daḡ-a-wa läbasän.

¹⁶ Wär tän-təla äddunya-ta-däḡ s-əmmək wa s-wär hi-təla näkk-däḡ-i s-omännən.

¹⁷ Šəšdəj-tän s-mäjräd-näk ed mäjräd-näk a-s tidət ta n-tidət.

¹⁸ Äšimašäläḡ-tän s-äddunya s-əmmək wa s-hi-dd-täšmašäläd sär-s,

¹⁹ näkk, hakkäḡ-käy iman-in daḡ-təssəba-näsän i-ad-käy-əkfen iman-näsän əntäneḡ-däḡ, šəšdəj-tän s-tidət-näk.

²⁰ Wädden əntäneḡ-i-däḡ ḡas a fäl käy-təddaläḡ, təddaläḡ-käy daḡ i-äddinät iket-däḡ-näsän wi s-ilkam ad-sär-k amənan daḡ-təssəba n-tajuhe-ta mad-əjən fäll-i,

²¹ umasnet iket-däḡ-näsän iyyät taḡəssa s-əmmək wa s-nämoos näkk d-käyy iyyän, heḡ-käy, hed-ahi, umasnet əntäneḡ-däḡ iyyän dār-näḡ i-ad-təfləs äddunya a-s käyy a hi-dd-Äšmašälän.

²² Näkk daḡ, älxurmät wa hi-təkfed, əkfəḡ-asän-t i-ad-osaxän, ämoosän iyyän s-əmmək wa s-nosaḡ, nämoos näkk d-käyy, iyyän.

²³ Tartit-ta dār-k jeḡ a dār-sän jeḡ näkk-däḡ i-ad-tumas tartit-näsän ti təmḡdat, təlməd daḡ äddunya a-s käyy a hi-dd-äšmašälän, təlməd daḡ a-s jed-asän tārha šund ta hi-jed.

²⁴ Əttaräḡ daḡ-k Abba a-s edägg wa hi-təkfed, ähräḡet-t ḡur-k daḡ d-äddinät-wi hi-təkfed i-ad-əjjunfun əntäneḡ-däḡ, daḡ-älxurmät wa hi-təkfed ed, käyy tārha-ta hi-jed, jed-ahi-tät härwa wär dd-täxlek äddunya.

²⁵ Abba, käyy-i oḡädän, tunjäy äddunya-ta-däḡ s-ad-käy-təzzəy mäšan näkk, əzzäyäḡ-käy, äddinät daḡ wi sär-i omännən, əfläsän a-s käyy a hi-dd-äšmašälän;

²⁶ äzozäyäḡ-tän isəm-näk, ad-käy-aləsäḡ daḡ azuzi-hasän i-ad-təjjəš tārha-ta hi-jed ulhawän-näsän, äknäḡ tartit dār-sän.»

18

Atärməs n-Ḳisa

(Mätti 26:47-56; Marḡəs 14:43-50; Luḡa 22:47-53)

¹ Issəmḡda Ḳisa d-tittar-tin-däḡ ḡas, iglä ənta d-inəḡḡulab-net, əjläyän tasənjit ta s-itawänna ta n-Šäḡron, əjjäšän ammas n-ašəkrəš n-ihəškan ihan asälim n-aman,

² a-wen edägg s-issan Yähudəs-i t-madän-isəssäḡdär a-s itakk'-e-hi-dd Ḳisa d-inəḡḡulab-net.

³ Iha Ƴisa ammas n-ašəkrəš-en-däx a-s Ƴähudəs-da-däx äddew d-əssärdusa d-älgomitän n-ehän n-ämudd wa mäqqārän dd-ässiglän imänokalän n-käl-tikutawen d-käl-faris äwwayän tiftəl d-imämmälän, əšlajän tikobawen.

⁴ Issan Ƴisa xur-iman-net a-wa has-iqqälän, izjār-dd sār-sän, inn'-asän: «Mi s-tammäxäm?»

⁵ Ənnän-as: «Ƴisa wa n-Näširät.» Inn'-asän Ƴisa: «Näkk da.» Äddinät-en, ih'-en Ƴähudəs-i t-e-isəssäxdärän.

⁶ Diha-däx d-hasän-innä: «Näkk da», issəkn'-en iman-net, ad-äškätarəšän, təwät-tän tarəmməxt s-əkall älwäqq-wen-däx.

⁷ Oläs-tän asəstan, inn'-asän: «Ak kəwəneḍ, mi s-tammäxäm?» Ənnän-as daḡ: «Ƴisa wa-n Näširät.»

⁸ Inn'-asän: «Wädden ənneḡ-awän: <Näkk da.> Kunta tidət-däx a-s näkk a-s təmmaxäm adiš, äyyät inəṭṭulab-in ad-əglun.»

⁹ Ijä Ƴisa mäjräd-wen-däx i-ad-umas a äsidätten a-wa s-käla tän-innä a-s innä: «Abba, wi hi-təkfed, wär däx-sän änməšräy wäl' iyyän.»

¹⁰ Ilbäy-dd älwäqq-wen-däx Simyon wa s-itawänna Bəṭrus təkoba-net, iwät sār-s Malkus wa n-akli n-ämänokal n-käl-tikutawen, inkäḍ-dd taməzzujt-net ta n-aḡil.

¹¹ Ixtäl Ƴisa Bəṭrus, inn'-as: «Suḡəl təkoba-näk titar; wär t-illa əmmək s-unjäyäx s-tesäse n-kara n-tisnant wa hi-izzäl Abba ässaḡät-wa-däx.»

(Mätti 26:57-58; Marqəs 14:53-54; Luqa 22:54)

¹² Irmäs kumända d-əssärdusa-net d-älgomitän-wi dd-äšmašälän imänokalän n-käl-Älyähud Ƴisa, əkrädän-t,

¹³ əlwäyän-t s-tizarät s-ehän n-Xäna wa n-aḍəggal n-Qayäf-i n-ämänokal n-käl-tikutawen awätay-wen-däx.

¹⁴ Qayäf-en-däx a-s käla innä i-imänokalän n-käl-Älyähud däx-isälan n-Ƴisa: «Ufa ämmut ähaləs iyyän uhən təlhäs tamətte iket-net.»

Akuddəl wa ija Bəṭrus i-Ƴisa

(Mätti 26:69-70; Marqəs 14:66-68; Luqa 22:55-57)

¹⁵ A-s itäjj a-wen-däx, äddeew Simyon Bəṭrus d-änäṭṭalib iyyän, əjan alkum šəjren i-Ƴisa. Änäṭṭalib-en dār-äddew Simyon, izzay-t ämänokal n-käl-tikutawen, ijrāw-as a-wen-däx ad-imzəyyət d-Ƴisa uješ n-əḡalla n-ehän n-ämänokal n-käl-tikutawen

¹⁶ məšan, äqqima-hin Bəṭrus ənta ibdad däx-təfärre dat-əmm n-əḡalla. Ähoja änäṭṭalib wa izzäy ämänokal n-käl-tikutawen ḡas, izjār-dd, imməjräd i-tamäḍt ta təṭṭäfät əmm n-əḡalla, toyy'-e, äššojäš-dd Bəṭrus.

¹⁷ Təkyäd tänaxdimt ta təṭṭäfät əmm n-əḡalla däx-Bəṭrus, tənn'-as: «Ajän käyy wädden iyyän däx-inəṭṭulab n-ähaləs-wa-däx s-iket ittärmäs?» Inn'-as Bəṭrus: «Wär t-ämoosäx.»

¹⁸ Itajj a-wen s-əzzäman n-tajrəst, ässiirḡän inaxdimän n-ämänokal n-käl-tikutawen d-älgomitän wi äḡläfnen ehän n-ämudd wa mäqqārän efew, əzzahän sār-s, ibdəd-dd Bəṭrus edes-hasän, ad-itazzäh ənta-däx.

Tebädde n-Ƴisa dat-äššäreḡa wa mäqqārän

(Mätti 26:59-66; Marqəs 14:55-64; Luqa 22:66-71)

¹⁹ Issəstän ämänokal n-käl-tikutawen Ƴisa, ittär däx-s ad-has-äj isälan n-inəṭṭulab-net d-a-wa tän-isäḡra.

²⁰ Äwwežäb-as Ƴisa, inn'-as: «Näkk, wär käla ənneḡ härät fəw i-äddinät däx-ufär, əssäḡrəḡ däx-ihənan n-äddin wi n-käl-Älyähud d-ehän n-ämudd wa mäqqārän-i däx-tazəmmaxän käl-Älyähud, wär t-illa a ässiḡrəḡ däx-ufär ḡas,

21 mafäl hi-sastanäd? Səstən äddinät-wi əslänen i-a-wa əssäxräx, əssanän a-wa hasän-ənnex.»

22 Diha-däx d-innä Yisa a-wen-däx ad-has-istäx iyyän däx-älgomitän n-ehän n-ämudd wa mäqqārän, inn'-as: «Käyy, ma käy-äsihälän a təjəd erk mäjräd i-amänokäl n-käl-tikutawen?»

23 Inn'-as Yisa: «Kunta jey erk mäjräd, säkənät-ahi a-wa däx-änmäšräyäx, kunta dax mäjräd oğadän a jey adiš, mafäl tamättey?»

24 Issəgdäh Xäna däx-isəstanän n-Yisa xas, ikräd-t, əssawäy-t i-Qayäf-i n-ämänokal n-käl-tikutawen.

25 A-s itäj a-wen-däx, äqqiima Simyon Bətrus härwa s-efew, itazzäh. A əndərrän, äkrättät-t əwadəm iyyän, inn'-as: «Wädden käyy-däx iyyän däx-inəttulab-net?» Äkkuddäl Bətrus a-wen, innä: «Wär t-ämoosäx.»

26 Iggäd-dd iyyän däx-inaxdimän n-ämänokal n-käl-tikutawen, ämoosän ašəqqay n-əhaləs wa s-dd-ifräs Bətrus taməzzujt-net s-təkoba, innä i-Bətrus: «Käyy-i-däx, ənhayäx-käy täddewäd d-Yisa däx-ašəkrəš n-ihəškan wa-däx ittärmäs?»

27 Oläs dax Bətrus akuddəl n-a-wen. Tamäzäyyat-ten-däx, ad-iwät ekaz äxora.

Ämewäy Yisa s-Bilatəs

(Mätti 27:1-2, 11-14; Marqəs 15:1-5; Luqa 23:1-5)

28 Härwa tifawt ad-fälän d-Yisa ehän wa n-Qayäf, əkkän dər-s ehän wa n-gəfär mäšan, unjäyän s-ad-əjjəšan ammas-net fäl tuksəda n-ad-səmmədəsän iman-näsän, igdəl-asän a-wen-däx tetäte n-isan n-taxsiwen-ti länen s-ad-äxrəsnät ašäl wa n-ämudd wa n-Faşka.

29 Ebdadän däx-ajäma n-ehän-en-däx a-s sər-sän dd-izjār Bilatəs, inn'-asän: «Ma ämoos udlem wa täsiwäram əhaləs wa təlwäyäm?»

30 Ənnän-as: «Ənnär a-s ija a läbasän, wär t-dd-nələwwəy sər-k.»

31 Inn'-asän Bilatəs: «Äglät, əšräxät-t s-a-wa innä älqanun-näwän.» Ənnän-as imänokalän n-käl-Älyähud: «Näkkäneđ, däx-a-wa innä älqanun-nänäx, wär hanäx-t-illa ad-näj iman n-əwadəm.»

32 Wär hasän-ijrew älqanun-näsän tenäxe n-əwadəm i-ad-tədduttət tənna n-Yisa fäl tamättant ta mad-äj.

33 Oläs Bilatəs uješ n-ehän-net, iğrä-dd Yisa təzzar, inn'-as: «Ak, käyy a-s ämänokal n-käl-Älyähud mex?»

34 Inn'-as Yisa: «Ak tifer-ti-däx jed ämära-däx, ad-dd-təkkasäd däx-eğäf-näk mex mäšällät a tänät-jed?»

35 Inn'-as Bilatəs: «Näkk-š ma äkkuläx, ajän ägg-Älyähud a ämoosäx, täjjäšan-ahi isälan-näk? Tumast-näk d-imänokalän n-käl-tikutawen a käy-dd-əwwäyən sər-i, xas, läxät-ahi, ma täxšädäd?»

36 Inn'-as Yisa: «Təmmənəya-nin, wär tät-təla äddunya-ta-däx, ənnär tät-təla äddunya-ta-däx, iket-di, əknəsän inəttulab-in i-ad-wär hi-jen imänokalän n-käl-Älyähud däx-ifassän-näk, ämära, Təmmənəya-nin, wär tät-təla äddunya-ta-däx.»

37 Inn'-as Bilatəs älwəqq-wen: «Adiš tidət-däx a-s ämänokal a tämoosäd?» Inn'-as Yisa: «Käyy iman-näk tənned-tän, ämänokal a ämoosäx. Näkk, äməšäləx-dd s-äddunya-ta-däx, wex-dd däx-s i-ad-umasäx tajuhe i-tidət, ere wa ilkämän i-tidət iket-net, ad-isəjəd i-a-wa jänneç.»

38 Innä Yisa a-wen xas, inn'-as Bilatəs: «Tidət-i-däx fäw, əndek-tät?» Innä Bilatəs a-wen xas, izjār-dd dax s-imänokalän n-käl-Älyähud, inn'-asän: «Əhaləs wa hi-dd-täwwäyäm, wär fälla-s əjrewäx udlem t-əsinähäjjan d-tamättant mäšan,

³⁹ šāmad ässilmädäx-kāwān a-s hak āmudd n-Faška, äsiwäyyäx-awān-in u-takārmuṭ iyyān, əssənät ten'-i-däx tārham ad-hawān-in-səwwəyyäx āmānokāl n-kāl-Älyāhud meḡ?»

(*Mätti 27:15-31; Marqəs 15:6-20; Luqa 23:13-25*)

⁴⁰ Ʒslān i-a-wen ḡas, äşḡären dāx-işənnawān, ənnān-as: «Fāw, wār hanāx-t-dd-toyyed, ānn-ak, səwwəyy-anāx-dd Bārḡābbas.» Bārḡābbas-i s-ārhan a hasān-t-dd-isəwwəyy, ätiwässan a-s ānaḡtaf a āmoos.

19

Irda Bilatəs s-atwəşləb n-Ʒisa

(*Mätti 27:15-31; Marqəs 15:6-20; Luqa 23:13-25*)

¹ Irmās Bilatəs Ʒisa, omār əssārdusa i-ad-dāx-s əjən tiwit s-ibärtäkān.

² Ʒggādān-dd əssārdusa, əzzān älmät, korona, a-wen, takənbut n-isənnanān šund ta tājjān imānokālān təzzar, äşwārān-tāt eḡāf-net, əssəlsān-t anākābba šāggāḡān

³ təzzar, ad-t-tiḡliḡələyān, jannen-as: «Ämānokāl n-kāl-Älyāhud, nəj'-ak ḡārdəbu», sattāḡān-as siha d-siha.

⁴ Izjār-dd Bilatəs daḡ s-kāl-Älyāhud, innā: «Ənhəywät, āhaləs-i-dāx, äsoḡäläx-awān-t-in i-ad-kāwān-səlmədäx a-s wār t-illa uḡlem fälla-s əjrawäx t-äsināhājjan d-tamättant.»

⁵ Izjār-dd Ʒisa sār-sān ḡarāt-a-wen, ija takənbut ta n-isənnanān, ilsa anākābba wa šāggāḡān, inn'-asān Bilatəs älwäqq-wen «Ähaləs-nāwān dədi.»

⁶ Ənhāyān imānokālān n-kāl-tikutawen d-älgomitān Ʒisa ikk'-en-dd ḡas, äşḡären iket-nāsān, ənnān i-Bilatəs: «Itwəşləbet fäll-tajəttewt, Itwəşləbet fäll-tajəttewt!» Inn'-asān Bilatəs āmāra: «Ärməsät-t, təşləbām-t fäll-tajəttewt kāwāneḡ iman-nāwān fäl-a-s näkk, wār t-illa uḡlem fälla-s əjrawäx t-äsināhājjan d-tamättant.»

⁷ Ənnān-as imānokālān n-kāl-Älyāhud: «Näkkāneḡ, ijraw-anāx Äṡṡāwrāt iji n-iman-net ed, ija iman-net Rure-s n-Mässināx.»

⁸ Isla Bilatəs i-mājrād-wen-dāx ḡas, irmāx,

⁹ ijjäš ehān-net təzzar, innā i-Ʒisa: «Käyy-i-dāx fāw, əndek siha s-dd-hed?» Wār t-illa a has-inna Ʒisa. Inn'-as Bilatəs:

¹⁰ «Mafäl wār hi-jənnid hārät? Ajān wār təssenäd a-s näkk leḡ tādabit n-ad-käy-in-äyyäx, leḡ daḡ tādabit n-ad-käy-əşləbäx fäll-tajəttewt?»

¹¹ Inn'-as Ʒisa: «Wār fäll-i mad-təkrəşäd tārna wäl' iyyät sāl ta käy-ikfa Mässināx dāx-ässaxät-wa-dāx, a-wen-dāx a fäl ere wa hi-ijān jer-ifassān-nāk, ojar-käy tifut n-abäkkad.»

¹² Ad-itammāx ya Bilatəs i-äddābara s-t-in-äşwäyya māšan, äşḡären käl-Älyāhud dāx-işənnawān, ənnān-as: «Afäl t-in-toyyed, ad-nəlməd a-s käyy wädden amidi n-Qäyşār a tämoosäd fäl-a-s, nəssan a-s ere ijan iman-net āmānokāl iket-net, ad-umas ašanjo n-Qäyşār.»

¹³ Islā Bilatəs i-a-wen ḡas, izzəzjār-dd Ʒisa təzzar, äqqima dāx-edägg wa dāx-iḡattäs äşşäreḡa s-itawānna dāx-Ʒābranəyya: Ʒābbata.

¹⁴ Itajj a-wen s-tarāhut n-aşāl wa n-dat-wa n-āmudd wa n-Faška. Innā Bilatəs i-imānokālān n-kāl-Älyāhud: «Uhənät, āmānokāl-nāwān dədi.»

¹⁵ Māšan, äskälälān iket-nāsān, ənnān-as: «Ämmätet, ämmätet, itwəşləbet fäll-tajəttewt.» Inn'-asān Bilatəs: «ḡas kāwāneḡ, äba-hawān ere təşləbām ar āmānokāl-nāwān?» Ənnān-as imānokālān n-kāl-tikutawen: «Näkkāneḡ, wār nəla āmānokāl sāl Qäyşār.»

Atwəşləb n-Ʒisa

(*Mätti 27:32-44; Marqəs 15:21-32; Luqa 23:26-43*)

¹⁶ Ijä Bilatəs Ƴisa jer-ifassän-näsän i-ad-itwəşləb fäll-tajəttewt. Ärmäsän əssärdusa Ƴisa, əlwäyän-t təzzar,

¹⁷ əslänjen-t tajəttewt ta fäll-mad-itwəşləb, əzjārän dār-s aƳrəm, əkkän dār-s edəgg wa s-itawänna dəƳ-Ƴäbranəyya: «Gälgota»; a-wen älmäƳna-net: «Edəgg wa n-akärkor.»

¹⁸ Aşäl-en, ämizäyyen əssin inaxtafän atwəşləb d-Ƴisa; iyyän daw-aƳil-net, wa iyyädän daw-täşälje-net, imäl-t ənta jere-sän.

¹⁹ Əşläbän Ƴisa Ƴas, issəktäb Bilatəs fäll-ällox iyyän a-s:

«A-WA ƳISA WA N-NÄŞIRÄT
N-ÄMÄNOKAL N-KÄL-ÄLYÄHUD».

Əttəytäyän-t jənnəj-s fäll-tajəttewt ta fäll-ätwəşləb.

²⁰ Akätäb-en, äƳrən-t käl-Älyähud äjjootnen fäl-a-s, edəgg wa dəƳ-ätwəşləb Ƴisa, ohaz aƳrəm. Ällox-en, akätäb wa t-iwarän, ija dəƳ kərađ iməjridän: Ƴäbranəyya, Täromanit d-Tälyunanit.

²¹ Əggädän-dd imänokalän n-käl-tikutawen d-käl-Älyähud, äsmätärän Bilatəs d-udaƳ ad-iktəb a-s Ƴisa ämänokal n-käl-Älyähud änn-ak, iktəbet a-s, innä: näkk, ämänokal n-käl-Älyähud mäšan,

²² inn'-asän Bilatəs: «A-wa s-işwär əktäbäƳ-t, əktäbäƳ-t.»

²³ Əşläbän əssärdusa Ƴisa fäll-tajəttewt Ƴas, əjän i-isəlsa-net əkkozät tizunawen, idkäl hak iyyän dəƳ-sän təzune tiyyät, wär dd-äqqima ar tanäkəbbat wär iha azämay wäl' iyyän.

²⁴ Ärmäsän-tät əssärdusa Ƴas, änmännän jer-iman-näsän: «UdaƳ ad-tät-nəsäƳarriwət, näjet fälla-s tisäƳeren i-ad-t-ikrəş iyyän dəƳ-näƳ.» Əjän tisäƳeren, ämoos a-wen a əssiitbätän a-wa iktäbän dəƳ-mäjräd n-MässinäƳ a-s inna:

«Äzunän isəlsa-nin,
jän tisäƳeren fäll-tanäkəbbat-in.»

Jän əssärdusa a-wen s-əmmək-wa-dəƳ s-tän-innä əlkəttab n-MässinäƳ.

²⁵ Edes i-tajəttewt ta fäll-ätwəşləb Ƴisa, təbdad ma-s d-wälätma-s n-ma-s d-Märyäma ta n-hänne-s n-Klufas d-Märyäma ta s-itawänna ta n-Muläzđaləyät.

²⁶ Inhäy Ƴisa ma-s təbdad edes i-änätđalib wa ikna tärha Ƴas, inn'-as: «Anna, rurem dədi ibdädän edes-ham.»

²⁷ Innä dəƳ i-änätđalib: «Käyy dəƳ, ma-k dədi təbdädät edes-hak, taƳälift-näk.» Ƴur-aşäl-wen-dəƳ, ij'-et-dd änätđalib-en s-iman-net, iđđaf-as tämudre.

Tamättant n-Ƴisa

(Mätti 27:45-56; Marqəs 15:33-41; Luqa 23:44-49)

²⁸ İlmäd Ƴisa a-s əssəbab wa fäl dd-əmeşäl s-əddunya, əssawäd-t-in iket-net, fäll-tajəttewt-en-dəƳ, innä: «ÄffuudəƳ.» Ämoos a-wen a əssiitbätän a-wa innä əlkəttab n-MässinäƳ fälla-s.

²⁹ İskar dihen äkoss idkarän bənegär, innä Ƴisa äffuud Ƴas, əttälän əssärdusa təduft fäll-äbori, əssəlmäƳän-tät dəƳ-bənegär təzzar, əzžälän-as-tät i-ad-tät-isuməm mäšan,

³⁰ äkrəbbät Ƴisa bənegär Ƴas, inna: «A-wa s-dd-oseƳ, ijä, imdə». Äskäräyry-đđ əƳaf-net đarät-a-wen, ijmäd-t unfas.

(Mätti 27:57-61; Marqəs 15:42-47; Luqa 23:50-56)

³¹ İtəjj a-wen aşäl wa n-dat-wa n-Faşka-i-dəƳ sadawän äddinät i-ämudd. Şəmad wär-ərhen imänokalän n-käl-Älyähud ad-tän-dd-iydär ämudd wa n-Faşka-i əknän asəmyar ed awätay-wen, ođa aşäl wa n-ämudd fäll-əssəbət-i n-täsonfat, Ƴas, osän Bilatəs, əttärän dəƳ-s ad-amär i-əssärdusa teräzže n-iđarän n-äddinät-wi ätwəşləbnen fäll-tijəttewen təzzar, əkkəsän-tän-dd fälla-snät.

³² Osän-dd əssärdusa ɣas, ärzän idarän n-änaxtaf wa äzzarän, okäyän daɣ s-amidi-net wa iyyäðän, jän-as a-wen-däɣ ənta-däɣ.

³³ Ewwäðän-dd ʁisa, ənhäyän-t ämmut ɣas, okäyän-t wär-ärzen idarän-net

³⁴ mäšan, inbäj iyyän däɣ-əssärdusa tajəzzelt n-ʁisa s-allax-net, izjār-tät-dd ašni s-əlkamän aman.

³⁵ Näkk a iktäbän isälan-wi-däɣ ed, äjjəyhäɣ-asän iket-däɣ-näsän, tajuhe-nin daɣ, wär tät-ih' äššäk. ʁas, siɣuläɣ-tän näkk-i tän-inhäyän s-tittawen-in däɣ-təssəba n-ad-tamənäm s-ʁisa.

³⁶ Isälan-wi-däɣ, jän i-ad-itbət a-wa iktäbän däɣ-mäjräd n-Mässinäɣ a-s innä: «Wär mad-ärz eɣäs-net wäl' iyyän.»

³⁷ Innä daɣ mäjräd n-Mässinäɣ däɣ-edägg iyyän säl-wen:

«Ad-əjjənfun äddinät däɣ-wa däjän.»

Azəkka n-ʁisa

³⁸ Osä-dd Yusəf wa n-tadäbayt ta n-Arimata. Ämoos ənta iman-net, änätətalib n-ʁisa, mäšan, iffar a-wen fäl tuksəda n-a-wa däɣ-s-e-ənnən imänokalän n-käl-Älyähud. Ənta-en-däɣ a ihälän tikawt n-Bilatəs, ittär däɣ-s turhajät n-ad-dd-ikkəs tafəkka n-ʁisa fäll-tajəttewt; ikf'-e Bilatəs turhajät n-a-wen ɣas, ikkäs-dd tafəkka n-ʁisa fäll-tajəttewt.

³⁹ Osä-dd daɣ dihen Nikodem wa s-käla dd-ädwännät i-ʁisa s-ehäd, iwway a okäyän kərədät timərwen n-kelu n-matälxer d-aɟutän.

⁴⁰ Ärmäsän tafəkka n-ʁisa, əknän-tät s-matälxer d-aɟutän təzzar, əttälän-tät däɣ-tefit, ed a-wen-däɣ a tajjän käl-Älyähud i-ere äba təzzar, əjän-t däɣ-azəkka.

⁴¹ Edägg wa däɣ-ätwäšlāb ʁisa, ohaz-t ašəkrəš n-ihəškan, iha azəkka s-käla wär däɣ-s insa ere äba.

⁴² Azəkka-wen-däɣ a däɣ-jän tafəkka n-ʁisa ed, wär tän-ujəj, äsinäkmäm-tän daɣ ämudd-i s-afäl dd-iwwäð ässaɣät-net, ad-äbas t-illa emäremar.

20

Tanäkra n-ʁisa jer-inəmmuttan

(Mätti 28:1-10; Marqəs 16:1-8; Luqa 24:1-12)

¹ Abənnəbən n-älxad-i n-ašäl äzzarän däɣ-əssəboɣ, härwa janät tihay, tənšäy Märyäma ta n-Muläzdaləyät azəkka wa iha ʁisa, tənähäy a-s təhənt ta mäqqarät härät emm n-azəkka, tämmuqqäs-in.

² Tošäl s-Simyön Bətrus d-änätətalib wa iyyäðän ikna ʁisa tärha, tənn'-asän: «Tafəkka n-Äɣalim-nänäh, təmmädkä, äbas ha azəkka, wär nəssen ənde d-tät-jän ämära.»

³ İgla Bətrus d-änätətalib wa iyyäðän, əkkän azəkka.

⁴ Ošälän issənän-essän mäšan, ijmäd änätətalib wa iyyäðän Bətrus däɣ-azzal, išwār-t-in s-azəkka,

⁵ äddunkät, ässijjä däɣ-ammās-net, inhäy tefit tənsa d-iman-net mäšan, wär-ijješ ammas n-azəkka.

⁶ İwwäð-t-dd Simyön Bətrus ɣas, ijjäš ənta azəkka, inhäy tefit ta tənsät d-iman-net,

⁷ oläs daɣ ahənay n-taswədt ta s-käla təttäl eɣäf n-ʁisa, tənsa d-iman-net s-edes, todha.

⁸ İjjäš-dd fälla-s ɟarät-a-wen änätətalib wa iyyäðän t-dd-išwārän s-azəkka, inhäy, omän;

⁹ fäl-a-s, a-wa-däɣ jän ärtayän d-ʁisa iket-net, wär-əfhemän a-wa ənnän əlkəttabän däɣ-isälan-net, a-s ənnän a-s, ilzam ad-t-iba təzzar, inkär-dd jer-inəmmuttan.

¹⁰ İqqälän ɟarät-a-wen ihənan-näsän.

*Issəkna Ƴisa iman-net i-Märyäma ta n-Muläždaləyät
(Marqəs 16:9-11)*

¹¹ Täqqimä-dd ɗara-sän Märyäma, təbdad edes i-azəkka, hall. Halla dihen-däx har šik-däx tässijjä däx-ammās n-azəkka,

¹² tənħay əssin ənjalosän əssiimlälnen, äqqimän däx-edägg wa s-käla däx-s tənša tafəkka n-Ƴisa. Äqqiima iyyän däx-edägg wa s-käla däx-s insa eɣäf n-Ƴisa, äqqiima wa iyyädän däx-edägg wa s-käla däx-s ənsän iɗarän-net.

¹³ Əssəstänän ənjalosän Märyäma, ənnän-as: «Märyäma, ma kām-isalhen?» Tənn'-asän: «Tafəkka n-Älɣalim-in a təmmäɗkälät, wär-əssenäx ənde d-tät-jän ämära.»

¹⁴ Tənnä a-wen ɣas, täšnəšläm, tənħay Ƴisa ibdad məšan, indär-as ad-t-təzzəy.

¹⁵ Imməjräd-as, inn'-as: «Tamäɗt, ma kām-isalhen? Ma däx-m äba?» Ämmiijräd-as məšan, täxel Märyäma məssi-s n-ašəkrəš a has-ämmiijrädän, tənn'-as: «Ya ähaləs-i-däx, kunta käyy a iɗkälän tafəkka n-Emäli-nin, əttaräx däx-k idəm n-ad-hi-səknəd diha tät-jed i-ad-tät-əɗkələx.»

¹⁶ Iyr'-et Ƴisa s-isəm-net, inn'-as: «Märyäma!» Təggäd təzzar, tənnäɗ-dd sār-s, tənn'-as däx-Ƴäbranəyya: «Rabbuni»; a-wen älmäɣna-net: «Mässi-ɣ.»

¹⁷ Inn'-as Ƴisa älwäqq-wen: «Wär hi-ɗesäd, tawəxəd-ahi fäl-a-s, wär-osex isənnawän-i iha Abba-nin härwa. Ämära, əgləw, läxät i-ayətma-ɣ a-s əkkeɣ Abba-nin-i s-ənta ɗax a-s Abba-näwän, əkkeɣ Mässi-ɣ-i n-Mässinäx-i s-ənta a-s Mässinäx-i n-Mässi-wän.»

¹⁸ Təkkä Märyäma ta n-Muläždaləyät inəttulab, tənn'-asän: «Näkk, ənhayäx Emäli». Ad-däx-sän tajj isälan n-a-wa has-innä Ƴisa.

*Issəkna Ƴisa iman-net i-inəttulab-net
(Mätti 28:16-20; Marqəs 16:14-18; Luqa 24:36-49)*

¹⁹ Ehäɗ n-ašäl-wənnin-däx n-älxad, äžziimmäxän inəttulab däx-ehän iyyän, ättubben imawän-net fäll-iman-näsän a-wa hasän-təja tuksəɗa n-imänokalän n-käl-Älyähud. Wär tän-hen isälan a-s ənta iman-net da-däx dd-ibdädän jere-sän, inn'-asän: «Ins' älxer n-Mässinäx fälla-wän.»

²⁰ Ij'-asän isofan, ad-tän-isakna ifassän-net d-tajəzzelt-net. Älwäqq-i-däx t-ənhäyän, əjän inəttulab tedawit-i-däx məqqarät.

²¹ Inn'-asän Ƴisa: «Ins' älxer n-Mässinäx fälla-wän. Ämašal wa ijä Abba däx-ifassän-in, jex-t näkk-däx ämära däx-ifassän-näwän.»

²² ɗarät-a-wen, äshäɗ Ƴisa jənnəj-iɣäfawän-näsän, inn'-asän: «Uhənät Unfas Šäddijän,

²³ ere wa s-tənšäm ibäkkadän-net, ad-ijrəw tenäšše-näsän, ere wa s-tän wär tənšem, wär mad-ijrəw tenäšše-näsän.»

Issəkna Ƴisa iman-net i-Tomi

²⁴ Ašäl wa d-jän isälan-wi-däx, wär t-illa iyyän däx-inəttulab wi n-märaw d-əssin s-isəm-net Tomi wa s-itawänna Ekne.

²⁵ Osä-dd ɣas, ənnän-as inəttulab wi iyyädnen: «Išräy-käy-dd Emäli Ƴisa.» Unjäy s-ad-tän-ifləs, inn'-asän: «Näkk ɣas, a əkkäsäx wär t-ənhəyäx s-tiɗtawen-in, ənhəyäx ɗax idraš n-ibuyəsän däx-ifassän-net, äjäx ɗax assəkäɗ-in däx-adəriš n-ibuyəsän, äjäx äfuss-in däx-tajəzzelt-net ta inbäj allax, wär mad-əfləsäx a-s dd-inkar jer-inəmmuttan.»

²⁶ Ašäl wa n-əttam ɗarät-a-wen, äžziimmäxän inəttulab däx-ehän ättubben, ih'-en ämära Tomi. Wäla hin-əjrähän a-s dd-ibdäd Ƴisa jere-sän, inn'-asän: «Ins' älxer n-Mässinäx fälla-wän.»

²⁷ Innä Ƴisa i-Tomi ɗarāt-a-wen: «Ahəz-ahi-dd, səjräh ifassän-in, hənda assəkäɗ-näk, äj'-e dəx-äfuss-in, təjəd-t dəx dəx-tajəzzelt-in, wär täsxäräd ulh-näk.»

²⁸ Äwwežäb-as Tomi, inn'-as: «Emäli-nin, Mässi-ɣ Mässinäx.»

²⁹ Inn'-as Ƴisa: «Käyy, tənähäd-ahi təzzar tomänäd, tənɗəd i-äddinät wi hi-wären-ənhey mäšan, omänän.»

Äddälil-wa fäl iktäb Exya əlkəttab-wa-däx

³⁰ Ija Ƴisa dat-inəttulab-net ijitän n-Mässinäx äjjootnen wären əkteb dəx-əlkəttab-wa-däx

³¹ mäšan, a-wa dəx-sän iktäbän dəx-əlkəttab-wa-däx iket-net, iktab dəx-təssəba n-ad-tamənäm a-s Ƴisa a-s Älmasex wa n-Rure-s n-Mässinäx, ere omänän s-isəm-net-däx, ad-ijrəw tämudre ta täylälät.

21

Oläs Ƴisa asəkən n-iman-net i-əssa dəx-inəttulab-net

¹ Ɗarāt-a-wen-däx ijän, äsnäfaläl-dd Ƴisa dəx iman-net i-inəttulab-net dəx-asälim n-əjäns wa s-itawänna Tibäryad. Ənta da əmmək wa s-hasän-dd äsnäfaläl iman-net:

² Ašäl iyyän, äžziimmäx Simyon Bətrus, Tomi wa n-ekne d-Natanähil wa n-tayrəmt ta n-Käna təhät teje ta n-Galila d-dägg-Zäbdi d-əssin inəttulab iyyäd dəx,

³ äqqiimän har šik-däx, inn'-asän Simyon Bətrus: «Näkk, əkkeɣ ejäns i-ad-əhhuyey imänen.» Ənnän-as inəttulab wi iyyädnen: «Äqqəl-anäx, näddew ɗär-k.» Əzjären, əjjäšan turäft n-aman, əglän. Okäy-tän ehäd-wen-däx iket-net, wär t-illa a ärmasän.

⁴ Äffäw ɣas, iwär-dd Ƴisa asälim n-əjäns mäšan, indär-asän ad-t-əzzəyän.

⁵ Iyr'-en, inn'-asän: «Ilyadän, ajän wär lem a təkšäm?» Ənnän-as: «Äbo!»

⁶ Inn'-asän: «Äjrät ämära tətart-näwän s-ašrut wa n-aɣil n-turäft n-aman, ad-tärməsäm imänen.» Jären tətart-näsän s-ašrut-wen-däx tän-issəkna, əttären ad-tät-dd-ärkəbän dəx-aman mäšan, təndär-asän fäl aɗänay-i-däx təja imänen.

⁷ Inhäy änəttalib wa ikna Ƴisa tärha a-wen ɣas, inna i-Bətrus: «Ijmaɗ-t äššäk a-s a-wa Emäli-nänäx.» Islä Simyon Bətrus a-s a-wa Emäli Ƴisa ɣas, iɗkäl emäls-net wa ikkäs i-älxidmət, ij'-e dəx-err-net, ijär iman-net dəx-aman, išyäf, ikk' asälim.

⁸ Äyyämmen-dd inəttulab wi iyyädnen turäft, ähoben-dd tətart ta təɗkärät imänen ed, wär t-illa jere-sän d-asälim n-əjäns ar sənätät timaɗ n-aɣil.

⁹ Əwwäɗän asälim n-aman ɣas, ənhäyän efew irɣan fäll-naŋŋän imänen d-tajəlla,

¹⁰ inn'-asän Ƴisa: «Awəyät-dd a län imänen dəx-wi s-iket tän-dd-tärmäsäm.»

¹¹ Ijjäš Simyon Bətrus turäft ta n-aman, ähobät-dd tətart s-asälim n-aman, osän-tät, ih'-et a iwwäɗän temede d-səmmosät timərwen n-emän d-käraɗ dəx-wi šuharnen mäšan, hakd a-wen-däx, wär ser tətart.

¹² Əŋgän imänen d-tajəlla ɣas, inn'-asän Ƴisa: «Əyyäwät, mänsäwät.» Itajj a-wen-däx iket-net mäšan, wär tän-ihä-i ihälän asəstan-net d-ere wa ämoos ed, əssanän ämära a-s Emäli iman-net a-wa.

¹³ Iɗkäl Ƴisa tajəlla, äzun-asän-tät, äzun dəx imänen jere-sän.

¹⁴ Ənta-da-däx anfiləl wa s-käraɗ dd-ija Ƴisa i-inəttulab-net ɗarät tanäkra-net jer-inəmmuttan.

Isəstanän wi ija Ƴisa i-Bətrus

¹⁵ Ekšän ɣas, innä Ƴisa i-Simonyon Bətrus: «Simyon ägg Yunəs, ak torded a-s tojär tärha ta hi-jed, ta hi-jän imidiwän-näk?» Inn'-as Simyon: «Emäli, təssanäd a-s ärhey təmmidəwa-näk.» Inn'-as Ƴisa: «Adiš, äj i-inəttulab-in tayälift ta itäj amäɗan i-ikərwätän-net.»

¹⁶ Ij'-as Ȳisa asəstan wa s-əssin, inn'-as: «Simyon ägg Yunəs, ak torded a-s tärhed-ahi?» Inn'-as Simyon: «Näkk lab, ärheȳ təmmidəwa-näk.» Inn'-as Ȳisa: «Adiš, äj i-inəṭṭulab-in tamäḍint ta itäjj amäḍan i-tihatten-net.»

¹⁷ Ij'-as Ȳisa asəstan wa s-käraḍ, inn'-as: «Simyon ägg Yunəs, ak tidət-däȳ a-s tärhed təmmidəwa-nin?» Inxäs a-wen-däȳ iman n-Bəṭrus d-a-s har kərəḍ ihändäggan isastan-t d-a-s irh'-e meȳ? Inn'-as Bəṭrus ämära: «Emäli, wär t-illa a-s wädden təssanäd-t, təssanäd a-s jeȳ-ak tärha təmdat.» Inn'-as Ȳisa: «Adiš, äj i-inəṭṭulab-in taȳälift ta itäjj amäḍan i-tihatten-net.

¹⁸ Älleȳeȳ-ak s-tidət tädduuttet a-s däȳ-təmmiwəḍa-näk, salsed iman-näk, erhet-näk ȳas a käy-išilləwän mäšan, afäl wäššaräd, ere wär tämoosäd a käy-madän-isäls, tättärmäsäd, tättälwäyäd s-edägg wär tärhed.»

¹⁹ Inn'-as a-wen-däȳ i-ad-isəlməd Bəṭrus älxal n-tamättant ta has-täqqälät madät-tumas tajuhe ta s-mad-isəməȳär Mässinäȳ. Ij'-as Ȳisa mäjräd-wen-däȳ ȳas, inn'-as: «Elkəm-ahi.»

Änäṭṭalib wa ikna Ȳisa tärha

²⁰ Äšnäšläm Bəṭrus ḍara-s, inhäy änäṭṭalib wa irha Ȳisa, ilkam-asän. Änäṭṭalib-wen-däȳ a dd-insän fäll-idmarän n-Ȳisa ehäḍ wa ḍär-s ohärän amənsi, ənta-en-däȳ a issəstänän Ȳisa ehäḍ-wen a-s has-innä: «Äȳalim, əndek däȳ-näȳ wa käy-madän-isəssäyḍär?»

²¹ Inhäy-t Bəṭrus ilkam-asän ȳas, innä i-Ȳisa: «Emäli, wa hi-š änäṭṭalib, ma däȳ-s ilkamän?»

²² Inn'-as Ȳisa: «Kud-ärheȳ ad-iddar har dd-äqqələȳ, ma täkkuuläd däȳ-a-wen? Käyy, əlkəm-ahi ȳas.»

²³ Mäjräd-wen-däȳ ija Ȳisa i-Bəṭrus a dd-orəwän a-wa s-jannen inalkimän n-Ȳisa, änäṭṭalib-en-däȳ, wär däȳ-s təlکم tamättant mäšan, wär has-inna Ȳisa wär mad-ämmät, änn-ak a inna i-Bəṭrus: «Ajän kud-ärheȳ ad-iddar har dd-äqqələȳ, ma täkkuuläd däȳ-a-wen?»

Ajilal n-mäjräd

²⁴ Änäṭṭalib-wen-däȳ fäll-ija Ȳisa tajuhe-ten-däȳ, a äjjəyhän i-isälan-wi-däȳ, iktäb-tän, nəssan ḍaȳ a-s tajuhe-net, tädduuttät.

²⁵ Ellan-t härätän äjjootnen ija Ȳisa wären əkteb diha-däȳ. A-wa ija, ija əjut wa-däȳ s-ənnär ittär əwadəm akätab-net s-iyän-iyän, wär-ordeȳ a-s täddobät täkost n-äkall-i-däȳ aggay n-əlkəttabän-win-däȳ he-siwəlnen däȳ-isälan-net. Amin!

Ijitän n-inəmмуšal n-Ŷisa Älmasex

Äšqjəš

¹ A-wa näkk hin-iktabän i-enəssemxär-in Täyofil:

Däx-əlkəttab-in wa äzzarän, ässoxäläx-ak isälan n-a-wa s-issəntä Ŷisa iji-net d-a-wa issäxra iket-net

² hundäx har ašäl wa d-immədkäl s-išənnawän, qarät a-s äsimätär inəmмуšal wi äsnäfrän s-tärna n-Unfas Šäddijän.

³ Entäneḍ-en-däx a-s dd-äsnäfaläl iman-net s-tizarät qarät tamättant-net i-ad-tän-isəlməḍ s-timtär äjjootnen a-s iddar. Ija qarät tanäkra-net jer-inəmmuttan əkkožät timərwen n-ašäl izzax jer-inəṭṭulab-net, itajj'-asän isälan n-Təmmənəya n-Mässinäx.

Ärkäwäl wa ija Mässinäx i-aratän-net

⁴ Ašäl iyyän, ohar dār-sän amənsi har šik-däx, inn'-asän: «Wär feläm axrəm wa n-Yärussälam, əqqəlät i-a wa s-hi-təsläm saxreḡ-t s-hawän-ijjāš Abba ärkäwäl-net;

⁵ tidət, Exya, aman a däx-issəlmäx äddinät məšan käwāneḍ, däx-härät n-išilan, ad-tətəwəselmäxäm däx-Unfas Šäddijän-i dd-e-izzubben fälla-wän.»

(*Marqəs 16:19-20; Luqa 24:50-53*)

⁶ Äžziimmäxän dihen-däx a-s t-əssəstänän, ənnän-as: «Emäli, ajän äzzäman wa däx-dd-taqqäl təmmənukəla İşrayil, osä-dd?»

⁷ Inn'-asän: «Wädden käwāneḍ a iwar almud n-täqqän wäla ässaḡät wa ixtäs Abba däx-älxikmät-net;

⁸ käwāneḍ, ad-təjrəwäm tärna, ad-fälla-wän dd-izzubbət Unfas Šäddijän, tumasäm tjuhawen-in däx-axrəm wa n-Yärussälam, däx-teje ta n-Älyähudəyät iket-net d-ta n-Sämari təkkəm har diha dd-təmḍa äddunya.»

⁹ Inn'-asän a-wen xas, immədkäl data-sän s-išənnawän; əbdadän, əswaḍän däx-s har hasän-t tənjar tejäräkt.

¹⁰ Äjožäyän išənnawän-i s-immədkäl a-s hasän-dd-änfalälän əssin meddən ässiimlälän, ənnän-asän:

¹¹ «Ya käl-Galila, ma s-təbdadäm täjožäyäm išənnawän? Ŷisa wa immədkälän jere-wän s-išənnawän, ilkam a dd-iqqəl s-əmmək-wa-däx s-t-tənhäyäm ikk'-en.»

¹² Fälän inəmмуšal qarät-a-wen taḍaxt ta n-əzzäytunitän, əqqälän axrəm wa n-Yärussälam-i hasän-t-illän əḍḍəkuḍ n-täzune n-ässaḡät n-räjjoš.

¹³ Ewwäḍän-in axrəm, əkkän soro n-ehän-wa s-əzzäyän azəmmäx däx-s. A-wen: Bəṭrus, Exya, Yaqub, İdris, Fəlibb, Tomi, Bartälamma, Mätti, Yaqub ägg Älfa, Simyon wa s-itawänna Äššažex, Hudd wa n-ägg Yaqub.

¹⁴ Ejläyän iket-däx-näsän däx-a-wa hän, oharän iyyän n-ulh däx-temädilt n-Mässinäx əntäneḍ d-tiḍəḍen təha Märyäma ta n-ma-s n-Ŷisa d-ayətma-s n-Ŷisa.

Änäṭṭalib wa ijjäšän edägg n-Yähudəs İsxaryut

¹⁵ Äžziimmäxän dihen-däx, ämoosän teməḍe n-äwadəm d-sänatät timərwen a-s dd-ibdäd Bəṭrus jere-sän, inn'-asän:

¹⁶ «Ayətma-x, a-wa innä Unfas Šäddijän s-emm n-ännäbi Dawəḍ, däx-isälan n-Yähudəs-i dd-äslälän äddinät wi ärmäsnen Ŷisa, ijä;

¹⁷ kälä däx-näx äḍḍiin, kälä t-illa ijraw folät-net däx-ämašal wa hanäx-issäxläf Mässinäx.

¹⁸ Azrəf-wa xəramän irmäs i-ad-ämaſäl abäkkad wa ofa, izžənſä sär-s ašəkrəš wa dāx-dd-ihā äsikattāy fäll-eḡäf-net, äsfätäqqāt iman-net, äzun dāx-ammās, äbräzzät-dd a-wa ihän täsa-net iket-net fäll-äkall;

¹⁹ wär t-illa ere izzaḡän Yärussälam s-wädden han-t isälan n-a-wen-dāx, əglän äddinät fāw har ašəkrəš-wen-dāx dāx-t-äba, əjän-as isəm dāx-tawalt-näsän: <Häqqäldäma>, a-wen älmäḡna-net: <Ašəkrəš wa n-ašni>.

²⁰ Ämära, iktab dāx-əlkəttab wa n-Äzzäbur a-s:
<Iqqəlet ehän-net timšar,
wär t-itiləset äwadəm uzäx.>

Iktab day a-s:
<Ijjəšet iyyän edägg-net.>

²¹ Ilzam ämära ad-nəsənnəfrən iyyän dāx-meddən wi hanäx-hänen s-alkum i-Ÿisa dāx-takliwen-net d-uḡlawän-net dāx-a-wa ikkäs Emäli Ÿisa ill'-e jere-näx,

²² a-wen, ḡur-ašäl wa t-issəlmäx Exya dāx-aman har ašäl wa dd-inkär jer-inömmuttan təkəkəd ašäl wa d-immədkäl jere-näx s-išənnawän.»

²³ Äsnäfränän-dd əssin meddən, iyyän Yusəf wa s-itawänna Bärsabas, jannen-as iyyäd Istus, wa iyyädän Matiyas.

²⁴ Dälän Mässinäḡ darät-a-wen, ənnän: «Emäli, käyy a issanän a-wa ihän ulh n-e d t-illäm ägg-adəm, səlməd-anäx wa täsnäfränäd jer-meddən-wi-dāx n-əssin

²⁵ i-ad-ijjəš edägg wa n-tənnəmušəla irfäd Yähudəs, ikk' edägg wa ija i-iman-net.»

²⁶ Jän tisəḡeren darät-a-wen, oḡänät fäll-Matiyas, äḡḡin ya fäll-inömmuſal wi n-märāw d-iiyän.

2

Äzabbu wa dd-ija Unfas Šaddijän fäll-inəḡḡulab

¹ A-s dd-iwwäḡ ašäl n-ämudd n-käl-Älyähud wa s-itawänna Fantäkawt, äžžimmäḡän inəḡḡulab iket-dāx-näsän dāx-iiyän n-edägg.

² Wäla a hin-əjrähän a-s dd-ifäl emäsli iyyän olähän d-i n-tamäḡalt täšsoohet išənnawän, änhäynähäy edägg-ənnin-dāx dāx-äqqiimän iket-net;

³ ibdäd-dd fäll-hak iyyän dāx-sän a olähän d-ilsawän n-imämmälän n-efew əbḡanen,

⁴ idnäy-tän Unfas Šaddijän älwäqq-wen-dāx, ad-tamäjrädän awalän äynaynen s-əmmək wa s-hasän-issärḡäs Unfas turhajät n-a-wen.

⁵ A-s itäjj a-wen-dāx, ähhujjäjän-dd käl-Älyähud äjjootnen äddinnen s-Yärussälam, wär t-illa äkall s-wädden falän-t-dd.

⁶ Təslä tamətte n-aḡrəm i-emäsli wa ijän, tošäl-dd iket-net s-edägg wa dāx-ija, təjraw-tät tākunt n-emäsli-wa-dāx d-a-wa s-hak äwadəm-dāx, isall i-inömmuſal ämmijrädän tawalt n-äkall-wa-dāx dd-ifäl.

⁷ Əqqälän-dd äddinät ḡas, oran imawän, təjraw-tän tākunt, jannen: «Käh! Wi äddinät hanäx-ämmiijrädnen, ajän wädden teje ta n-Galila a tän-lät?

⁸ Ma n-əmmək n-a-s hasän-nəsall ämmiijrädän tawalen-nänäḡ?

⁹ Han-anäx äddinät dd-falnen Bartas, Midyas, Ilam, Mizəbbuḡamyä, Älyähudəyät, Kafadusya, Fon, Azya;

¹⁰ Frižya, Banfilya, Mišra, Libya, Qərwan, Roma,

¹¹ iyyäd dāx-näx käl-Älyähud s-aläšäl, iyyäd inalkimän n-äddin wa n-käl-Älyähud, iyyäd dāx-näx käl-Kritus, iyyäd Arabän; mäšan, nəsall'-asän iket-dāx-nänäḡ tiimələn tiḡusay n-ijitän n-Mässinäḡ dāx-tawalen-nänäḡ.»

¹² Əqqälän-dd äddinät ḡas oran imawän, iqqan a-wa ijän iḡäfawän-näsän, tinmännin: «Ma ämoos älmäḡna n-a-wa-dāx?»

13 Ǝggädän-dd iyyäḍ, jän inəṭṭulab tekäškäšt, ad-jannen: «A-di, asməd a dāḡ-äyyiwänän.»

Älxuṭbat wa ija Bəṭrus ašäl wa n-Fantäkawt

14 Ibdäd-dd Bəṭrus jer-imidiwän-net wi n-māraw d-iiyän, idkäl emäsli-net, innä i-tamətte: «Meddən, käwāneḍ-i n-iməhhujjaj, käwāneḍ-i n-käl-Älyähud əzzäḡnen Yārussälam, säjdät-ahi iket-dāḡ-nāwän, təjrahäm a-wa hawän-e-ännäḡ dāḡ-älmäḡna n-a-wa ijän jere-wän ašäl-i-dāḡ.

15 Wädden a-wa tordäm a ijan, meddən wi hannäyäm, wär-əswen asməd dāḡ-sän ikkasän ənniyät, wär-ämmukkän a-wen ed agdəlset-dāḡ iket ija.

16 A-wa ijän ašäl-i-dāḡ, wär-ämoos ḡas ar tasəṭbat n-a-wa inn' ännäbi Yuwil† äzzäman wa d-äloläy, innä; innä Mässinäḡ:

17 <Ǝnta da a-wa ilkämän dāḡ-išilan wi dd-malənen, A dd-zəzzubbuḡ Unfas-in fäll-e d t-illäm ägg-adəm, ad-äkfäḡ mäjräd-in mədḍa-wän d-ešše-wän, səssiwəḍän-t-in dägg-adəm, ad-dd-ənfilələn härätän ättunkälnen i-imawaḍän-nāwän, əhhərjun imḡarän-nāwän tikunen;

18 išilan-en, a dd-zəzzubbuḡ Unfas-in fäll-eklan-in d-tiklaten-in, əluləyän iket-näsän.

19 Ad-dd-əjmäḍän härätän ässuksäḍnen išənnawän, äjāḡ ijitän n-Mässinäḡ fäll-ärori n-äkall, inḡəl ašni, äḡ efew, inkär äho s-išənnawän.

20 Ad-tämaḡäy täfukt, əjənät tihay, išwaḡ ewär šund ašni təzzar, ass-dd ašäl wa mäqqārän n-älxurmät iḡtäs Emäli.

21 Ašäl-en, ere iḡrän isəm n-Emäli i-tinahäḡen, ad-iḡləs.>

22 Ya käl-Išrayil, säjdät i-isälan-wi-dāḡ: Ƴisa wa n-Näširät, təssanäm käwāneḍ iman-nāwän a-s ähaləs äsinäfrän Mässinäḡ a ämoos, issəṭbät a-wen dat-tiṭṭawen-nāwän s-tikunen d-tišušab d-ijitän n-Mässinäḡ wi ija jere-wän,

23 dāḡ-a-wa itäjj Mässinäḡ d-təlluləya-net, oyy'-iwän tärmäsäm-t, jäm iman-net s-ifassän n-inəzzulam† wi t-əšläbnen fäll-tajəttewt;

24 tidət, ämmut mäšan, ikkäs-t-dd Mässinäḡ dāḡ-tamättant ta t-təzbäbät, ed wär t-illa əmmək s-t-təṭṭäf dāḡ-tišəm-net.

25 Isälan n-a-wen-dāḡ a dāḡ-äloläy ännäbi Dawəd a-s innä: <Hannäyāḡ hak ässaḡät Emäli dat-i; iwar aḡil-in i-ad-ozja ənniyät-in.

26 Äsidäwät a-wen ulh-in, olwa iləs-in ed jarāḡ äṭṭäma n-ad-täns tafəkka-nin dāḡ-älxer,

27 wär-e təyyəd iman-in ənsan dāḡ-ider n-äkall, wär-e təyyəd Eməššeddəj-näk rakkäh tafəkka-net dāḡ-azəkka.

28 Käyy a hi-issəknän tabarät ta ha tämudre, sämməd ulh-in, äddiwät ed telled-t edes-in.>

† 2:16 2:16 A-wa ännäbi dd-äzzarän i-Ƴisa, äloläy dāḡ-isälan-net səmmosät timaq n-awätay dat-tiwit-net. † 2:23 2:23 – Ƴur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änəzzalim a ämoos. A-wen-dāḡ a fäl tiwsaten ti iyyäḍnen iket-näsän, ti n-inəzzulam. — Ašäl-i-dāḡ, änəzzalim, äkafär (ere wärän issen s-Mässinäḡ).

²⁹ Meddøn, käwäneḍ-i n-ayətma-ḡ, əkkasäḡ äššäk dāḡ-a-wa hawän-janneḡ: Amḡar n-amäzzaḡ Dawəd, äba-t, izka; azəkka-net daḡ har ašäl-i-dāḡ, ill'-e diha-dāḡ jere-näḡ.

³⁰ Ēnta-i n-ännäbi, issan fäll-ärkäwäl wa has-ihäḍ Mässinäḡ a-s has-innä:

<Ilkam ad-isəbdəd dāḡ-edägg-net iyyän
dāḡ-ihäyawän-net dāḡ-təmmənukəla.>

³¹ A-s ijänna Dawəd a-wen, ihannäy dāḡ-ijəj tanäkra n-Älmasex jer-inəmmuttan ed äru d-älöläy Dawəd dāḡ-isälan n-a wa s-ilkam ad-äj. Ēnta-en-dāḡ a dāḡ-ässewäl Dawəd a-s innä:

<Wär-e təyyəd tafəkka-nin təjar-in dāḡ-azəkka,
wär-e təyyəd tafəkka-nin rakkäh dāḡ-azəkka.>

³² ʔisa-i s-hawän-heḡ isälan-net, näjjəyha i-asənkär wa t-dd-ija Mässinäḡ jer-inəmmuttan təzzar

³³ idkäl-t s-išənnawän, äsyäym'-e daw-aḡil-net i-ad-imnukəl, ikf'-e Abba Unfas Šäddijän wa s-ijjäš ärkäwäl-net, äzzäbbät-t-dd daḡ fälla-näḡ, äsnäfläy-anäḡ dāḡ-s, ənta-den-dāḡ a-wa dd-oräwän a-wa s-sälläm d-a-wa hannäyäm ašäl-i-dāḡ.

³⁴ Ännäbi Dawəd ya, təssanäm a-s wär-imməḍkäl s-išənnawän ed ənta iman-net a innän:

<Innä Emäli Mässinäḡ i-Emäli-nin:
Ēyyäw, ḡayəm, täxkəməd daw-aḡil-in

³⁵ hundäḡ har äjäḡ išənja-näk isəkkukal daw-iḍarän-näk.>

³⁶ Ašäl-i, əlmədnət käl-Işrayil iket-dāḡ-näsän a-s ʔisa wa təşläbäm fäll-tajəttewt, ənta a ija Mässinäḡ Emäli d-Älmasex!»

Älmässexitän wi äzzarnen

³⁷ Idäs mäjräd wa ija Bəṭrus ulhawän n-äddinät wi has-äsijädnen, ənnän-as ənta d-inəmмуšal wi iyyäḍnen: «Ayətma-näḡ, ma hanäḡ-iwarän?»

³⁸ Inn'-asän Bəṭrus: «Utabät, tətweşəlmäḡäm iket-näwän dāḡ-aman s-isəm n-ʔisa Älmasex, i-ad-təjrəwän tenäšše n-ibäkkadän-näwän, äkf'-iwän Mässinäḡ Unfas Šäddijän,

³⁹ ed ärkäwäl wa ijjäš Mässinäḡ, käwäneḍ d-ihäyawän-näwän d-äddinät wi əzzäḡnen dāḡ-ijəj, d-e d t-illäm ere dd-iḡra Emäli-nänäḡ Mässinäḡ s-iman-net a-s t-ija.»

⁴⁰ Ij'-asän Bəṭrus isälan äjjootnen, isatbat härätän data-sän, isamätar-tän, ijann'-asän: «Agəzät iman-näwän dāḡ-əzzurəyät-ta-dāḡ təfräḡät.»

⁴¹ Äddinät wi omännen s-a-wa ätwännän, ätwäsälmäḡän dāḡ-aman; ämoos a-s, käraḍ aḍän n-äwadəm ašäl-wen-dāḡ a dd-əwwäḍnen fäll-imumənän.

Anməṭṭaf wa t-illän jer-imumənän

⁴² Ēkfän imumənän iket-dāḡ-näsän iman-näsän i-a-wa tän-säḡren inəmмуšal, oharän ittus, tuzanän amənsi wa šäddijän n-tasäktot, təddalän Mässinäḡ.

⁴³ Təjjäš tuksəḍa n-Mässinäḡ tamətte iket-net, fäl-a-s tamašälän inəmмуšal tišušab d-ijitän n-Mässinäḡ äqqannen eḡäf.

⁴⁴ Änimäṭṭafän imumənän iket-dāḡ-näsän jer-iman-näsän, əzzaḡän iyyän n-edägg, tihərən a-wa eṭṭäfän,

⁴⁵ žänš'-en-in a-wa län dāḡ-ehäre, ad-tuzanän älqim-net s-a-wa dār-ogdähñät timḡutar n-hak iyyän dāḡ-sän.

⁴⁶ Äkoyädän hak ašäl s-iyän n-ənniyät dāḡ-ažəmmäḡ dāḡ-təfärre n-ehän n-ämudd wa mäqqarän, tihərən imənsiwän dāḡ-ihänan-näsän s-iman äddiwätnen; a-wa täjjän iket-net, il' əmmək,

⁴⁷ tiimələn Mässinäḡ, ässiimḡarän-tän äddinät iket-näsän. Isawaḍ-dd Emäli hak ašäl fäll-älžəmaḡät-näsän äddinät wi iḡalläs.

3

Anäbdon wa äzozäyän inəmмуšal

¹ Ašäl iyyän, ikka Bəṭrus ehän n-ämudd wa mäqqārän, äddeew d-Exya i-ämudd wa ṇ-tezzar.

² Älwäqq-wen-däx däx, ad-dd-ämewäy s-emm n-ehän n-ämudd wa s-itawänna: «Tihusay», ähaləs s-a-s dd-iwa-däx ibdan. Hak ašäl dihen-däx a t-sänsen äddinät-net i-ad-itattär takute däx-äddinät wi dd-tajjšnen ehän n-ämudd.

³ Inhäy Bəṭrus d-Exya äbokän ujəš n-ehän n-ämudd ɣas, izžäl-asän äfuss.

⁴ Ikn'-e Bəṭrus d-Exya azəjjəzz təzzar, inn'-as Bəṭrus: «Ekən däx-näx akäyad.»

⁵ Iknä däx-sän ähaləs akäyad, ijar äṭṭäma n-ad-t-əkfən härät

⁶ mäšan, inn'-as Bəṭrus: «Wär leɣ oräx wäl' azrəf mäšan, a-wa leɣ, hakkäx-ak-t s-isəm n-ḂisaÄlmasex wa n-Näširät: əbdəd, ärjəš.»

⁷ Äšhätäl-as-dd Bəṭrus s-äfuss-net wa n-aɣil, issəbdäd-t. Iqqäl-dd äššahät idarän-net d-timzəzzəden-net ässaɣät-wen-däx;

⁸ ijä-dd tiyyät teggedt, irjäš, änmäjjäš dār-sän ehän n-ämudd, itaggäd a-wa-däx has-təja tedäwit, itiiməl Mässinäx.

⁹ Ənhäyän-t äddinät iket-näsän irjaš, itiiməl Mässinäx,

¹⁰ əzzäyän-t ɣas, ad-jannen: «Ak, wa wädden emädäl wa s-härkuk äqqiima dat-emm wa ähusken n-ehän n-ämudd wa mäqqārän.»

Ənhäyän a-wa däx-s ijän ɣas, äqqänän iɣäfawän-näsän, tof'-en tākunt n-a-wa ijän.

Iffəssär Bəṭrus i-tamətə älmäɣna n-azuzi wa jän i-änabdon

¹¹ İltäx ähaləs-ənnin Bəṭrus d-Exya, unjäy fäw dār-sän ibda. Tošäl-dd tamətə iket-net s-edägg wa däx-əbdädän s-itawänna tisuɗaf n-ehän wa n-Suläyman, äɣläyɣäläyän-tän-dd äddinät tufa tākunt n-a-wa ijän.

¹² Inhäy Bəṭrus awnaf wa hasän-ämoosän ɣas, inn'-asän: «Käl-İşrayil, ma s-däx-näx təkyadäm s-əmmək-wa-däx šund a-s näkkäneɗ d-iman-nänäx, meɣ s-iqqud-nänäx dat-Mässinäx a-s näzozäy ähaləs-i-däx?

¹³ Mässinäx wa n-Ibrahim d-İsxaqq d-Yaqub, ənta-i n-Mässi-s n-abbatän-nänäx, ənta a idkälän s-älxurmät-net, akli-net Ḃisa-wa tästärmäsäm təzzar, täkkuddäläm-t dat-Bilatəs-i a-s itäj a-wen-däx, äbook ad-t-in-isəwwəyy mäšan,

¹⁴ käwäneɗ täkkuddäläm Eməššeddəj d-Ämaydal, töttäräm däx-ämänokal ad-hawän-dd-isəwwəyy emäjj n-iman,

¹⁵ jäm iman n-ämänokal wa ihakkän tämudre mäšan, issənkär-t-dd Mässinäx jer-inəmmuttan, näkkäneɗ a-s tijuhaben-net.

¹⁶ Elmədät a-s s-tärna n-isəm n-Ḃisa d-təssəba n-immun wa sār-s nəja, a fäl hannäyäm ähaləs-wa-däx təzzayäm, har t-dd-iqqäl äššahät-net data-wän; immun s-isəm n-Ḃisa a äzozäyän ähaləs-i-däx hannäyäm ibdäd data-wän.

¹⁷ Ämära ayətma-ɣ, əssanäx a-s a-wa təjäm käwäneɗ d-imizārän-näwän, älzähälät a däx-t təjäm,

¹⁸ a-wa ijän, a otas Mässinäx i-ad-isətbət a-wa s-äru d-äloläyän ännäbitän däx-isälan-net, a-s ənnän a-s Älmasex, ad-inhəy aɣäna təzzar imnukəl.

¹⁹ A-wa ənnän, ijä, a-wen-däx a fäl ämära, mujrəzät ibäkkadän-näwän, tutabäm i-ad-hin-aməs Mässinäx ibäkkadän-näwän,

²⁰ izəzzubbət-dd fälla-wän išilan n-älxer, i-ad-hawän-dd isuxəl Ḃisa-i n-Älmasex äsnäfrän-i s-ämära-däx,

²¹ ih' isənnawän har ašäl wa d-mad-isəynəy Mässinäx härät iket-net, s-əmmək wa s-äru tän-innä s-imawän n-ännäbitän-net wi n-iməššeddəjän.

²² Däx-isälan n-a-wen-däx, ad-inn' ännäbi Mosa:
<Ad-hawän-dd-isəsiwəy Emäli Mässinäx

ännäbi dār-toharām temiḏt, dār-i olāhän,
säjdät i-a-wa hawän-e-änn iket-net.

²³ Ere unjäyän s-asjød-has,
ad-äbas äḏḏiin dāḡ-tamøtte n-Mässināḡ, ämmätet.»

²⁴ Ämära, ännäbitän iket-näsän, ḡur-Sumäyla har wi t-dd-əšräynen, äloläyän iket-dāḡ-näsän dāḡ-isälan wi s-hanāḡ-salläm nøttajj'-awän-tän ašäl-i-dāḡ.

²⁵ Käwäneḏ a-s imökkusa n-ännäbitän-win-dāḡ ed tākosäm ärkäwäl wa ohär Mässināḡ d-abbatän-nänāḡ ašäl wa d-innä i-Ibrahim:

<S-isəm n-əzzurəyät-nāk a-s mad-ijjəš
älbāraka tiwsaten n-äkall iket-näsnät.>

²⁶ Təssəba-nāwän käwäneḏ, s-tizarät, a fäl dd-issenkär Mässināḡ akli-net, ḡisa Älmasex, äšmašäl-t-dd sār-wän i-ad-dāḡ-wän äj älbāraka, təbḏəwäm d-erk imojjan-nāwän.»

4

¹ Ämmiiräd Bəḡrus d-Exya härwa i-tamøtte a-s tän-dd-osän härät dāḡ-käl-tikutawen, äddewän d-emännähäḏ n-ehän n-ämudd wa mäqqārän d-käl-sadus.

² Äšyäf-tän asəḡär wa täjjän inəmмуšal i-tamøtte ed, jannen i-äddinät a-s ḡisa Älmasex, inkär-dd jer-inəmmuttan,

³ ärmäsän-tän, jän-tän dāḡ-takärmüt har äffäw ed a-s itäjj a-wen-dāḡ, ijjaš-dd ehäḏ.

⁴ Omänän äddinät äjjootnen əslanen i-mäjräd wa jän, a-wa ätubän dāḡ-ašäl-wen-dāḡ, iwwäḏ səmmos afḏän n-äwadəm.

⁵ Äffäw ḡas, əžžəmmäḡän-dd imizärän n-käl-Älyähud d-inušämän d-älḡulam n-Äḡḡäwrät wi hānen Yärussālam

⁶ d-Hənnan wa n-ämānokäl n-käl-tikutawen d-Qayäf d-Exya d-Älxader d-käl-ehän n-ämānokäl n-käl-tikutawen iket-näsän.

⁷ Əssəbdädän-dd Exya d-Bəḡrus jere-sän, ənnän-asän: «Käwäneḏ, ma tämoos tärna d-isəm wa s-täjjäm a-wa täjjäm?»

⁸ Äzzubbät-dd Unfas Šäddijän s-əššahät fäll-Bəḡrus ässaḡät-wen-dāḡ, inn'-asän: «Imizärän n-käl-Älyähud, käwäneḏ-i n-inušämän,

⁹ asəstan a hanāḡ-tajjäm ašäl-i-dāḡ, dāḡ-isälan n-a-wa ähusken ätwäjjän i-anäbdon d-əmmək wa s-iḡlās.

¹⁰ Nārha ad-təlmədäm iket-nāwän, käwäneḏ hakd käl-Išrayil wi iyyäḏnen a-s tärna n-isəm n-ḡisa Älmasex wa n-Näširät təšlābäm fäll-tajəttewt māšan, issenkär t-dd Mässināḡ jer-inəmmuttan, tärna-net ənta-en-dāḡ a təzozäyät ähaləs wa hannäyäm ibdad data-wän.

¹¹ ḡisa, ənta a-s tähunt ta hin-järäm

käwäneḏ-i n-älbännatän māšan,
tämoos-dd tähunt ta n-aḡmär fäll-insa ehän iket-net.

¹² Wār t-illa əḡḡəllas ar s-isəm wa-net fäl-a-s wār t-illa isəm ikfa Mässināḡ daw-išənnawän i-əḡḡəllas n-dägg-adəm säl wa-net.»

¹³ Islä älzāmaḡät i-əššuhu n-mäjräd wa hasän-ija Bəḡrus d-Exya ḡas, tof'-en tākunt-näsän, ed jan-tän äddinät əžhalnen wāren əḡra māšan, əlmädän a-s Bəḡrus d-Exya, ämoosän inalkimän n-ḡisa.

¹⁴ Ḍarät-a-wen daḡ, anäbdon-wa izzäyän, ənta-da-dāḡ ibdädän edes-hasän, äbas əssanän a mad-ənnən.

¹⁵ Əzzəzjārän Bəḡrus d-Exya ehän wa dāḡ-ḡattäsän äššərəḡa iket-di d-tamānhayän əntāneḏ.

16 Däx-taḡimit-näsän, ənnän: «Wi äddinät, ma hasän-e-näj? Iji n-Mässinäx wa ijän, wär t-iha äššak ed əssanän sār-s käl-Yārussälam iket-däx-näsän, wär näddoobät akuddəl-net.

17 Ämära, i-ad-wär səməlsin isälan-wi-däx fäll-tamətte, nəsemməhädet fälla-sän i-ad-äbas ilkam ad-jan isälan n-isəm n-Ḡisa i-äwadəm wäl' iyyän, olasän ḡas, ämmänhayän d-iman-näsän.»

18 Əssäxran-dd Bətrus d-Exya darät-a-wen, äsmäqqän fälla-sän i-ad-äbas ilkam ad-äxran wäla ässiḡrän isəm n-Ḡisa i-äwadəm wäl' iyyän.

19 Äwwežäbän-asän, inn'-asän Bətrus d-Exya: «Əssənät käwänəḡ iman-näwän kunta ma ufän asjəd-hawän käwänəḡ, meḡ asjəd i-Mässinäx?

20 Däx-a-wa hanäx-dd-iqqälän näkkänəḡ, wär näddobät asusəm fäll-isälan nənhay, nəsl'-asän.»

21 Oläs älzämaḡät asəmmähəḡ däx-sän təzzar, oyyän-tän-in ed wär t-illa uḡlem fälla-sän əjrawän. Täqqäl-dd tamətte iket-net, tiiməl Mässinäx fäl tössəba n-a-wa ija.

22 Anäbdon-wa izzäyän, ähaləs ilan a okäyän əkkožät timərwen n-awätay.

Tittar ti jän imumənän darät a-s dd-ätiwäyya Exya d-Bətrus

23 Ätwäyyän-in inəmмуšal ḡas, əkkän imidiwän-näsän, əjän däx-sän isälan n-a-wa ənnän imänokalän n-käl-tikutawen d-inušämän.

24 Əslän i-isälan-en-däx ḡas, əttäfän iyyän n-emm, ad-təddalän Mässinäx s-afälla, jannen: «Emäli, käyy a dd-ixläkän išənnawän d-äkall d-əjärew wa səmmän d-a-wa tän-ihän iket-net,

25 käyy a innän s-tärna n-Unfas Šəddijän s-emm n-abba-nänäx Dawəd-i n-akli-näk: <Ma däx-əḡgažnät tiwsaten?

Ma ijan äddinät däx-a wären infa härät?>

26 Ma äsihälän imänokalän əššənju-näk, tihərən d-imännähəḡän emm fäll-Emäli d-Älmasex-net.

27 Itbat a-s ijəḡ Bunəs Bilatəs d-Harudəs akli-näk Ḡisa Wa n-Eməššeddəj täsnäfränäd i-ad-umas Älmasex. Ohärän fälla-s emm əntänəḡ d-tiwsaten ti n-inəzzulam† d-käl-Işrayil däx-Yārussälam.

28 A-wen jän-t i-ad-itbat erhet-näk d-a-wa s-äru t-dd-täxtäsäd.

29 Ämära Emäli, aḡəz-anäx däx-äššar-näsän, təkfəd eklan-näk ənniyät ozjan s-äxtäbän məjräd-näk.

30 Ilal-anäx s-tärna n-äfuss-näk i-ad-nəzizuy äddinät, näj tikunen d-tišušab s-isəm n-akli-näk Ḡisa Wa Šəddijän.»

31 Diha-däx d-əssəmdän tamädilt n-Mässinäx, ad-äškäḡkəḡ edägg-wənnin-däx däx-äžziimmäxän, idnay-tän Unfas Šəddijän iket-näsän, ad-xaḡtäbän məjräd n-Mässinäx s-ənniyät ozjan.

Tassaḡt ta t-təllät jer-älməssexitän

32 İttaf älzämaḡät wa n-imumənän iyyän n-ulh d-iiyyän n-ənniyät, wär tän-iha fäw ere ijannen a-wa i-nin wäla a-wa i-nin, änn-ak tihərən a-wa län iket-net jer-iman-näsän.

33 Tajäyhen inəmмуšal s-tärna täšsohet, xaḡtäbän i-äddinät tanäkra-ta dd-ija Emäli Ḡisa jer-inəmmuttan, ässinsa daḡ Mässinäx ännuḡmät-net s-äššahät fälla-sän iket-näsän.

† 4:27 4:27 – Ḡur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyäḡnen iket-näsän, ti n-inəzzulam. — Ašäl-i-däx, änäzzalim, äkafär (ere wärän issen s-Mässinäx).

³⁴ Wār tän-iha fāw ere ämiḡatārān s-hārāt, žānš'-en-in dāḡ-sān wi länen išəkraš d-ihānan,

³⁵ tiwəyən-dd äłqim n-a-wa tän-in-əžžənsān, sans'-en-t dat-inəmмуšal i-ad-t-užanān jer-imumənān. Hak āwadəm, ijraw s-a-wa dār-ogdāhnāt timḡutar-net.

³⁶ Osā-dd Yusəf wa n-ahāya n-Lewi, il' ākall wa n-Qəbrus, ḡarrān-t inəmмуšal s-isəm Bārñabbas, a-wen älmāḡna-net: enəssesmäḡ n-talḡiwen. Ižžənsā-hin ašəkrəš-net,

³⁷ iwwāy-dd a-wa t-in-ižžənsā, ikf'-e inəmмуšal.

5

A-wa ija Ānanyas d-hānne-s Sāfiḡa

¹ Dāḡ-a-wen-dāḡ a dd-iggād Ānanyas ənta d-hānne-s Sāfiḡa, ižžənsā-hin ašəkrəš-net

² māšan, ānmānāk d-hānne-s fäll-ad-hin-iṭṭəf aḡil n-äłqim n-ināzzan-net, awəy-dd a-wa iyyādān i-inəmмуšal.

³ Osā-dd ḡas, inn'-as Bəṭrus: «Ānanyas! Mafāl təyyəd Iblis itajj erk ənniyāt ogdāhān d-a-wa-dāḡ dāḡ ulh-nāk? Ma kāy-isawānnen bahu i-Unfas Šāddijān a-s hin-tattāfād aḡil n-äłqim n-ašəkrəš-nāk?

⁴ Mi kāy-āšhāššälān ināzzan-net? Ajān wādden jer-inša-hin wāla, i n-nāk ḡas, tāddobed ad-has-təjəd a-wa s-tārhed. Ma dd-orāwān sār-k erk əššāḡəl-wa-dāḡ? Elməd a-s wādden dāḡg-adəm a-s tənned bahu, Māssināḡ a-s tän-tənned.»

⁵ Islā Ānanyas i-tifer-tin-dāḡ ḡas, oḡa, əjmāḡdān-t iman. Āmoos a-wen isəksaḡ i-āddināt wi əslānen i-a-wen-dāḡ.

⁶ Osān-dd hārāt dāḡ-imawaḡān, əssəlsān-in tafəkka-net, əḡlān dār-s, ənbālān-t-in.

⁷ Okāy a iwwāḡān kāraḡ āssaḡātān ḡarāt-a-wen ḡas, tosā-dd hānne-s n-Ānanyas, wār tāt-təha tijya n-a-wa ijān.

⁸ Təjjāš-dd ḡas, issəstān-tāt Bəṭrus, inn'-as: «Sāfiḡa, lāḡāt-ahi, ak ajān äłqim-wa-dāḡ a-s hin-təžžənsām ašəkrəš meḡ?» Tənn'-as: «Ēyya!»

⁹ Inn'-as Bəṭrus: «Ma sār-wān dd-orāwān tanmənnakt šund-ta-dāḡ, tiirəməm Unfas Šāddijān? Ənhəy adāriš n-āddināt wi s-iket hin-ənbālān āhaləs-nām, əqqalān-dd, əbdadān dat-əmm n-ehān i-ad-kām-awəyān kām-dāḡ.»

¹⁰ Toḡā älwāqq-wen-dāḡ daw-iḡarān n-Bəṭrus, tämmut ənta-dāḡ s-iiyyāt. Əḡkālān-tāt imawaḡān, əžkān-tāt edes i-āhaləs-net.

¹¹ Orāw-dd a-wen-dāḡ taksāḡt-i-dāḡ māqqārāt fäll-äłkānisāt iket-net d-āddināt wi iyyāḡnən əslānen i-a-wa ijān.

¹² Əjān inəmмуšal ijitän n-Māssināḡ d-hārātān āssuksāḡnən äjjootnən dat-āddināt. Tažāmmaḡān imumənān n-Ÿisa hak ašāl dāḡ-ehān n-āmudd wa māqqārān edes i-tāfala ta s-itawānna ta n-Sulāyman. Əknan tassāḡt, əṭṭafān iyyān n-əmm,

¹³ wādden ere dd-iggādān-dāḡ, ad-fälla-sān dd-iwwaḡ, ässiimḡārān-tān äddināt.

¹⁴ Tiwwaḡān-dd fälla-sān meddən d-tiḡeḡen äjjootnən omannen s-Emāli.

¹⁵ Tiwəyān-dd sār-sān äddināt imarhinān, sāns'-en-tān fäll-isəftaḡ dāḡ-ittus n-ad-tān-tāls kud-dāḡ tele n-Bəṭrus afāl okāy, ed ere təlsa tele-net dāḡ, ad-izzəy.

¹⁶ Təffalān-dd äddināt iḡārman wi ohāznen, tišələn-dd s-Yārussālam āwwayān imarhinān d-iməlsān, zizuyān-tān inəmмуšal iket-dāḡ-nāsān.

¹⁷ Iggād-dd ämänokal n-kāl-tikutawen, osām hullan ənta d-iyyāḡ sār-s oraknen n-tagḡayt ta təḡlāt fäll-tiḡət n-iman-net, s-itawānna ta n-kāl-sadus, ānmānākān i-ad-əjrəwān əmmək s-āḡšādān hārāt i-inəmмуšal.

¹⁸ Ästärmāsān-tān, əjān-tān dāḡ-takārmüt ta māqqārāt.

19 Mășan, osä-dd änjälos dd-ășimašäl Măssinăx s-ehăd, ora tishar n-takărmuť, izzəzjăr-tän-dd təzzar, inn'-asän:

20 «Äkkät ehän n-ämudd wa măqqārän, täxtəbäm i-tamətte isälan n-tämudre ta täylälät.»

21 Ejän inəmмуšal a-wa hasän-ätwännän, ənšäyän ehän n-ämudd wa măqqārän ad-dăx-s saxren äddinät. Älwäqq wa dd-osa ämänokal n-käl-tikutawen ənta d-äddinät wi sār-s oräknen, issäxřä-dd käl-Sinhidrin wi n-imizārän n-käl-Älyähud xattäsnen äššärexa, d-inušämän n-käl-Iřrayil wi iyyädnen, omārän s-ad-dd-ättälwäyän inəmмуšal dăx-takărmuť.

22 Eglän əssärdusa măšan wăr tän-in-ogežän dăx-səllul-näsän, əqqälän-dd, əjän isälan dăx-älžämaxät wa äqqimän, ənnän-asän:

23 «A-s hin-nosa takărmuť, ättubben imawän-net, əbdadän əssärdusa wi tät-äxläfnen dăx-idäggan-näsän măšan, älwäqq wa d-nora səllul, wăr t-təha tiťť.»

24 Islä kumända wa ännihădän dăx-əssärdusa wi jänen ənniyät i-ehän n-ämudd wa măqqārän d-ämänokal n-käl-tikutawen i-a-wen xas, äqqänän ixfawän-näsän har äbas əssanän a mad-ənnən.

25 Osä-dd ämaway n-isälan, inn'-asän: «Meddən wi jäm dăx-takărmuť, han ehän n-ämudd wa măqqārän, saxren dăx-s tamətte.»

26 Iggäd-dd kumända äddew d-əjhän n-əssärdusa, əlwäyän-dd inəmмуšal s-tiläqqad, ed äksudän ad-fälla-sän dd-təggəd tamətte əntəneđ-en-dăx, täkf'-en səmmäjori n-tihun.

27 Osän-dd xas, äššojšän-tän ehän wa dăx-äqqiima älzämaxät wa n-imänokalän. İdkäl ämänokal n-käl-tikutawen mäjräd, innä i-inəmмуšal:

28 «Ajän wădden äru d-fälla-wän năsmähăd i-ad-äbas ilkam ad-tăssiixřäm äwadəm wäl' iyyän s-isəm-wa-dăx? Eñhəywät xas a-wa jäm ämăra, tədkăräm-anăx Yărussälam iket-net texäre-năwän, tărham dăx đarät-a-wen, ad-hanăx-səwərəm iman n-ähaləs wa s-jannem.»

29 Äwwežăb-asän Bətrus d-inəmмуšal: «Ufa amišəl n-a-wa innä Măssinăx uhən asjəd i-a-wa jännen dăgg-adəm.

30 Măssi-s n-abbatän-nănăx, ad-dd-issənkārän Yisa wa s-jäm iman-net a-s t-təslăbäm fäll-tajəttewť,

31 təzzar idkäl-t s-iman-net, äsxăym'-e daw-axil-net i-ad-imnukəl, umas Ämaxlas fäll-hărät iket-net. A-wen ij'-e Măssinăx i-ad-utabän käl-Iřrayil, əjrəwän tenăšše n-ibăkkadän-näsän.

32 A-wen, nəjjəyh'-as iket-net, äjjəyh'-as dăx Unfas Šăddijän-i ikfä äddinät wi tamašalnen erhet-net.»

33 Äfdändärräy älzämaxät dăx-älhäm a-s islä i-a-wen-dăx, ad-tattārän əmmək s-tän-in-olămän fäll-ărori n-äkall.

34 Kittəwän a-wen-dăx a-s, dd-ibdăd jere-sän iyyän dăx-sän la taggayť ta n-käl-faris s-isəm-net Gamälyäl, älxalim äzizăbben alămăr wa n-ännäbi Mosa a ämoos, tăssiimxăr-t dăx tamətte iket-net. Omăr s-ad-zəzjārän inəmмуšal i-hărät n-ässaxät təzzar, inn'-asän:

35 «Käl-Iřrayil, äjät ənniyät i-a-wa s-tăbokäm ad-t-təjəm i-meddən-wi-dăx;

36 əktəwät-dd xas Tadi wa s-a ilan äzzăman dd-osa, iji iman-net hărät dat-äddinät, äsläl đara-s a iwwădän əkkožät timađ n-äwadəm măšan, wăr-əhoja a-s ätwăjjän iman-net, əmmähăšän inalkimän-net, äbă-dd isälan-näsän đarät-a-wen.

37 Đara-s dăx, dăx-äzzăman wa n-tăđint n-äddinät, osä-dd Yăhudəs wa n-Galila, äsläl ənta-dăx tamətte tăjjeet đara-s măšan, ämmuť ənta-dăx, əmmähăšän inalkimän-net.

³⁸ Āmāra, äyyät-ahi ad-hawän-äjäx äddäbara: əjmädät isälan n-äddinät-wi-däx, äkfät-tän älɣafyät, təyyəm-tän ad-əglun fäl-a-s tiyyät-i-däx, kunta a-wa tän-išlän, erhet n-əgg-adəm meɣ a dd-ifalän dägg-adəm, adiš, ad-t-in-iba

³⁹ mäšan, kunta Mässinäx ad-dd-ifal a-wa tän-išlän, adiš, wär has-lem tärna. He käwäneḍ! Wär-itumaset a-s Mässinäx a dār-tät-jam.» Äsjäd älžämaɣät iket-net i-äddäbara-wen-däx hasän-ija Gamälyäl.

⁴⁰ Əssäxran-dd inəmмуšal, äswäjjan däx-sän tiwit s-ibärtäkän, äsmähädän däx-sän i-ad-äbas ilkam ad-ämmijrädän s-isəm n-Ŷisa təzzar, äswäyyän-tän-in.

⁴¹ A-s fälän inəmмуšal ehän-en-däx, əknan däx-tedäwit fäl təssəba n-turhajät ta tän-ikfa Mässinäx n-ad-ənhəyän erk əmmək šund wa-däx, däx-idəm n-Ŷisa.

⁴² Tažämmäxän ɗarät-a-wen hak ašäl däx-ehän n-ämudd wa mäqqārän, d-ihānan n-imumənän wi iyyäḍnen. Wär t-illa edägg s-wädden xaṭṭäbän däx-s, saɣren däx-s Ālənžil n-Ŷisa Ālmasex.

6

Əssa inušämän wi ənnəfrännən

¹ Äzzāman-en, hak ašäl tiwwaḍän-dd imaksadän n-Mässinäx däx-wi əlkammen i-ättäbeɣa wa n-käl-Ālyunan† fäll-älžämaɣät wa n-imumənän. Däx-a-wen-däx, ad-ikka mäjräd jer-käl-Ālyähud wi əzzäɣnen jer-käl-Ālyunan d-käl-Ālyähud wi sawalnen Ŷābranəyya. Ənnän wi n-käl-Ālyunan, timəddun wi n-Ŷābranitän tinuḍāfen-näsän däx-isälan n-tizunawen n-tadhəlt ta tajjan hak ašäl.

² Əssäxran-dd inəmмуšal wi n-māraw d-əssin tamətte ta n-inəttulab, ənnän-asän: «Wär-änhäjja ad-näyy älxuṭbät n-isälan n-Mässinäx, näqqəl-dd nännuṭṭäf d-tizunawen n-imənsiwän.

³ A-wen-däx a fäl, sənnəfrənät jere-wän əssa meddən ätiwäsämɣärnen, iḍnay Unfas Šaddijän n-iməssorha, ännuṭṭāfnen d-əššäɣəl-wen-däx,

⁴ dihen, näkkäneḍ, ad-näkf iman-nänäx tamädilt n-Mässinäx d-älxuṭbät hak ašäl n-mäjräd-net.»

⁵ Ijrəz äddäbara-wen-däx i-älžämaɣät iket-net, innəfrän-dd Stifan,† a-wen əhaləs n-immun imdan, iḍnay Unfas Šaddijän d-Fəlibb d-Brukurus d-Nikanur d-Timun d-Bärmenas d-Nikola wa n-teje ta n-Intyuš s-kāla ilkam i-äddin wa n-käl-Ālyähud.

⁶ Meddən-win-däx a dd-issəbdäd älžämaɣät dat-inəmмуšal, əttārən-asän s-Mässinäx təzzar, äswārən-tän ifassän-näsän, jan däx-sän əlbāraka.

⁷ Ad-xaṭṭäbän əntāneḍ mäjräd n-Mässinäx, tijatän-dd fälla-sän hak ašäl imumənän äynaynen däx-Yərussālam. Omänän fəw käl-tikutawen əjjootnen, ad-tamašalän əntāneḍ-däx, a-wa innä mäjräd n-Mässinäx.

Ajəyh wa ija Stifan dat-tamətte

⁸ Stifan, əmoos əhaləs s-tidət-däx, fäll-ässinsa Mässinäx ännuɣmät-net d-tärna-net, itamašal härätän əqqannen eɣäf d-ijitän n-Mässinäx dat-tamətte iket-net.

⁹ Əggädän-dd meddən ila ehän n-äddin wa n-käl-Ālyähud s-itawänna «Idärfan», əntāneḍ d-iyyəḍ dd-falnen Qərwan d-Iskändərya d-tajiwən ti n-Silisi d-ti n-Azya, ad-taməzaɣän d-Stifan,

¹⁰ mäšan indār-asän ad-t-siḍəwən däx-mäjräd fäl tihusay n-sərho wa t-ikfa Unfas Šaddijän.

¹¹ Əglän, əžžənšän imawän n-äddinät iyyäḍ i-ad-t-səḍləmän, ənnän, əslan-asän har əskafar, innä daɣ a läbasän fäll-ännäbi Mosa d-Mässinäx.

† 6:1 6:1 Itawann'-asän: Gəriktän. (Les Grecs däx-Təfränsit). Əzzaɣän Erobbä däx-əkall wa itawänna: Gəris (La Grèce däx-Təfränsit). Tawalt-näsän: Tälyunanit. † 6:5 6:5 Jannen-as iyyäḍ: Ālmuštafa.

¹² Entäjän-dd s-a-wen-däx tamette d-imizärän-net d-älxulam n-Ättäwrät. Wäla a hin-ijrah Stifan a-s fälla-s ođän äddinät, əwwäyän-t s-käl-Sinhidrin wi n-imizärän n-käl-Älyähud xattäsnen äššärexa.

¹³ Äwwäyän-dd daḡ tjuhawen n-bahu ənnänen: «Ähaləs-i-däx, wär käla okäy ašäl d-wär-innä a läbasän fäl ehän n-Mässinäx wa šaddijän d-alämär wa n-Mosa.»

¹⁴ Təhhađän, jannen: «Ijmađ-t äššäk a-s nəsl'-as har innä a-s ilkam, ad-ärz Ƴisa wa n-Näširät ehän n-ämudd wa mäqqärän, isəmməskəl älyadatän wi hanäx-dd-oyya ännäbi Mosa.»

¹⁵ Iqqäl-dd älzämayät iket-net əsibäläläx däx-Stifan, iqqäl-dd sār-sän a-s änjälos a däx-əkyadän fäl tihusay-i-däx dd-ija idəm-net.

7

Älxuṭbät wa ija Stifan i-käl-Älyähud i-ad-tän-dd-isəktəw a-wa innä Mässinäx

¹ Issəstän ämänokal n-käl-tikutawen wa mäqqärän Stifan† ḡarät-a-wen, inn'-as: «Käyy, a-wa ätwännän fälla-k, ak tidət meḡ bahu?»

² Inn'-asän Stifan:

«Ayətma, abbatän, säjdät-ahi: Mässinäx-i ilän älxurmät iket-net, ənta a dd-änfalälän i-abba-nänäx Ibrahim härwa izzaḡ äkall wa n Mizəbbuṭamya, härwa wär dd-iddek äkall wa n-Haran.

³ A-s has-dd-änfaläl Mässinäx, inn'-as:
<Əfəl äkall-näk d-imärawän-näk,
tähanəd s-äkall wa käy-mad-säknäx.>

⁴ Ähona ya Ibrahim, ifäl äkall wa n-Käldäyän, iddäk wa n-Haran.

⁵ Äba abba-net dihen ḡas, inn'-as Mässinäx, ad-ähän s-äkall-wa-däx, təzzaḡäm ašäl-i-däx. Äkall-en, wär däx-s ikfa Mässinäx Ibrahim täkasit n-wäla edägg däx-ässinsa ađär-net mäšan, ijjäš-as ärkäwäl n-ad-t-äkf äkall-en-däx ənta d-ihäyawän-net. A-s has-ijänna Mässinäx a-wen-däx, wär-ila Ibrahim ara.

⁶ Inn'-as Mässinäx äzzäman-en:
<Ihäyawän-näk ad-umasän imäjarän däx-äkall wär len,
ad-äkkälen, ənhəyän aḡana har əkkozät timađ n-awätay

⁷ mäšan, ad-hasän-əkkəsäx tekäriđt,
əšräḡäx äkall-en tän-äskälen,
zəzjäḡäx-asän-t-dd, äḡbədän däx-edägg wa-däx tän-əkfeḡ.>

⁸ Ijjäš Mässinäx ärkäwäl n-tassaḡt i-Ibrahim, ärkäwäl-en, amili a-s tamätart-net. A-wen-däx a fäl ikräš Ibrahim Isxaqq, äsmäläy-t ašäl wa s-əttam; a-wen-däx daḡ a ija Isxaqq i-rure-s Yaquub, ij'-e daḡ Yaquub i-məddana-s wi n-märaw d-əssin i n-imḡarän n-imäzzaḡän n-tiwsaten-nänäx ti n-märawät d-sänatät.

⁹ Osämän ḡarät-a-wen məddana-s n-Yäquub wi n-imḡarän n-imäzzaḡän fäll-Yusəf-i n-əḡḡa-sän, əžžənsän-t-in i-ad-äkkälät däx-Miṣra mäšan, issän Mässinäx däx-Yusəf däx-äkall-wen-däx.

¹⁰ Wär t-illa erk əmmək däx-wär t-dd-ikkəs Mässinäx, issənsä fälla-s ännuḡmät-net d-särho i-ad-ikrəš idəm dat-Firḡawna-i n-ämänokal n-Miṣra-i has-ijän tafləst-ta-däx fäl t-äsmänakäl dawa-s fäll-äkall d-a-wa ihän eḡewən-net iket-net.

¹¹ Däx-a-wen-däx a dd-ođa laḡ läbasän fäll-Miṣra d-Xäna, ämḡatärän äddinät hullan har äbas əṭṭafän imärawän-nänäx a əksän.

¹² Isla Yaquub a-s ih' əttäḡam Miṣra ḡas, äšmašäl sār-s məddana-s wi hanäx-äshäyawnen.

¹³ Osän-dd, əqqälän, šamad dd-jan asikəl wa s-əssin a tän-äzozäy Yusəf iman-net, ilmäd daḡ Firḡawna s-a-wen-däx, tumast n-Yusəf.

† 7:1 7:1 Jannen-as iyyäđ: Älmuštafa.

14 Ässotär Yusəf ti-s d-imärawän-net iket-näsän, ämoos a-wen-däx əssayät timərwen n-äwadəm d-səmmos.

15 Iddäk-dd ya Yaqub Mişra, äba-t daḡ dihen-däx ənta d-imärawän-nänäx wi hanäx-äshäyāwnen.

16 Emmədkälñät tifəkwen-näsän darät tamättant-näsän s-aḡrəm wa n-Sišäm i-ad-ənbəlän dihen däx-təfärre ta iżžənša Ibrahim fäll-məddana-s n-Hämmär däx-Sišäm.

17 A-s dd-täwwäd täqqän n-ärkäwäl wa ijjäš Mässinäx i-Ibrahim, təkna tamətten-nänäx əjut däx-Mişra.

18 Inäy-dd äzzäman-en Firḡäwna äynayän wärän izzey Yusəf.

19 Ijjäš sār-näx erk älxal, issəknä tumast-nänäx aḡäna, ijä a wärän ijrez i-imärawän-nänäx, äsmädräy-tän hullan s-älxidmät wa däx-tän-ijä, iglä däx-tälläbäst-net har hasän-innä ad-hin-əndəwän aratan-näsän wi n-eyyan i-ad-ämmätän.

20 Äzzäman-en-däx ad-iwa Mosa-i ikräšän idəm dat-Mässinäx; käraḡ orän ḡas a jän imärawän-net ətṭafän-t, təzzar, äshäššäl-tän a-wa inna Firḡäwna täbəḡḡawt dār-s.

21 Järän-t-in ḡas, təkkmät-t-dd elle-s n-Firḡäwna, təj'-e-hi-dd s-iman-net, təj'-as asədwal wa mad-täj i-ara n-täsa-net.

22 Ämoos Mosa ere iḡran däx-təḡḡuləma d-musnät wa n-käl-Mişra, ikf'-e Mässinäx äššahät däx-mäjräd hakd däx-timašalen.

23 Ikräš əkközät timərwen n-awätay ḡas, ijjäš-t-dd ənniyät n-ad-äkk ayətma-s wi n-Işrayil, idhəl-tän, əntäned-i n-tumast-net.

24 Ašäl iyyän, inhäy iyyän däx-sän isalmaḡ u-Mişra t-irnan ḡas, ohäx-as tinahäxen, ijä iman n-wa n-u-Mişra.

25 Äḡel afäl ija a-wen, ad-əjrähän ayətma-s a-s Mässinäx a t-dd-äšmašälän sār-sän i-ad-tän-ikkəs däx-əkkəlu wa hän mäšan, wär əjrehän a-wen.

26 Ašäl wa ilkamän i-wen, inhäy əssin meddən n-käl-Älyähud əknasnen, ittär ad-äkk jere-sän, ibḡəw-tän, əjən älxer. Inn'-asän: <Imidiwän, käwäned wädden ayətmatän a tämoosäm, mafäl tinməjjim a läbasän jer-iman-näwän.>

27 Iggäd-dd sār-s wa irnän, imhäl-t-in, inn'-as: <Käyy, mi käy-ijän ämizär d-älqalli-hanäx,

28 əyya, a tärhed ad-hi-tänḡəd šund a wa jed i-u-Mişra wa s-jed iman-net əndəšel.>

29 Islä Mosa i-mäjräd-wen-däx ḡas, irmäḡ, äjewäd älwäqq-wen-däx s-äkall wa n-Mädyan, izzäḡ, ädobän ya dihen-däx, ikräš əssin ilyaḡän.

30 Šamad okaynät əkközät timərwen n-awätay ad-has-dd-änfaläl änjälos n-Mässinäx däx-tenere fäll-aḡaḡ wa n-Säynay däx-tabsäxt ta tähijäljälät wär räqq.

31 Täqqän tänfalilt-ta-däx ihannäy eḡäf-net, iknä-dd ihəz n-tabsäxt i-ad-ikən asənnəfli däx-a-wa ihannäy mäšan, izjār-tät-dd eməsli n-Emäli has-innän:

32 <Näkk a-s Mässinäx n-imḡarän wi käy-äshäyāwnen, näkk a-s Mässinäx wa n-Ibrahim d-Isxaqq d-Yaqub.>

Ihä-dd ḡas Mosa äšikäḡkäḡ a-wa-däx has-ja tarəmməxt har äbas ihäl wäla-däx ad-idkəl idəm-net, ikyəd.

33 Inn'-as Emäli daḡ:

<Əkkəs tifädelen-näk fäl-a-s edägg wa däx-təbdadäd, edägg šaddiijän,

34 ənhäyäx tissant ta tärmäsät tamətten-nin däx-Mişra, əsley i-tihnəffa-näsän,

a-wen-däx a fäl dd-äzzubbəx i-ad-tän-səddärfəx.

Ämära, əgləw, käyy a he-šəmməsələx s-äkall wa n-Mişra.>

35 Wädden hannäyäm a-s Mosa-wa-däx äkkuddälän a-s has-ənnän: <Mi käy-ijän ämizär d-älqalli-hanäx?> Ənta-en-däx a dd-äšmašäl Mässinäx i-ad-izar i-käl-Işrayil,

isəddärf'-en-dd s-tärna n-änjälös wa has-dd-änfalälän däḡ-tabsäḡt ta tähijäljälät wär räqq.

³⁶ Ēnta-en-däḡ a tän-dd-izzəzjārān Mišra itajj s-tärna n-Mässināḡ hārātān äqqannen eḡäf d-ijitän n-Mässināḡ har əjlāyān ejārew wa səmmān šāggāḡān, əjān ḡarāt-a-wen əkkozāt timərwen n-awātay āhonān däḡ-tenere.

³⁷ Mosa, ənta a-s kälā innä i-käl-Išrayil:
 <Ilkam ad-sār-wān dd-išəmmišəl Mässināḡ
 ānnābi dār-i olāhān,
 ānnābi dār-wān oharān temid̄t.>

³⁸ Ēnta-en-däḡ daḡ a ibdādān däḡ-tenere ta n-Sāynay jer-änjälös wa has-ämmiijrādān fäll-afälla n-aḡaḡ wa n-Sāynay d-tamət̄te, ikf'-e Mässināḡ mājrad wa ihakkān tämudre i-ad-hanāḡ-t-dd isəssiwād̄

³⁹ māšan, unjāyān abbatān-nānāḡ s-asjed-has, āšḡārān-as ulhawān-nāsān, ənnādān fälla-s, ad-sadārhanān uyəl n-Mišra-i dd-əzjārān.

⁴⁰ Däḡ-a-wen-däḡ, a dd-təggād tamət̄te s-Harun, tənn'-as:
 <Āj'-anāḡ imālan āynaynen ārjāšnen data-nāḡ fäl-a-s
 Mosa wa hi-hanāḡ-dd-izzəzjārān Mišra, ābas nəssan a ija.>

⁴¹ Ēššəwwārān-dd ḡarāt-a-wen i-iman-nāsān ehādäl n-orāḡ, ad-tajjān tikutawen i-āššanām wa jān s-ifassān-nāsān, ad-t-ḡabbādān, tiimələn-t, sānkarān izəjraz d-isudal dat-a-wa dd-əknān ifassān-nāsān.

⁴² Ēssəksānān iman-nāsān Mässināḡ s-a-wen-däḡ tän-išlān, oyy'-en ənta-däḡ s-āššanām-nāsān d-älḡibadāt wa täjjān i-ajhanān wi n-išənnawān: täfukt, ewār d-etran; āmoos a-wen a əssiitbātān a-wa innä ānnābi ḡāmmosa† a-s inna däḡ-əlkəttab-net, innä Mässināḡ:

<Ya käl-Išrayil!
 Ēkkozāt timərwen n-awātay a jān däḡ-tenere,
 ḡarrāsām i-taḡsiwen, təkkatām-tānāt,
 ak əssistānāḡ-kāwān, ajān nākk a-s tānāt-kātām?

⁴³ Wādden ehāket n-āššanām wa s-isəm-net Molax d-atār wa s-isəm-net Rufan-i jān emāli-nāwān, tahanem dār-s siha d-siha, a-s tānāt-kātām, tāqqālām-dd ḡabbādām-tān.

Däḡ-təssəba n-a-wen-däḡ tāmešälām
 a fäl mad-ärzən käl-Bābilun ākall-nāwān,
 tākkālem däḡ-ikallān wi hasān-in-əllanen.>

⁴⁴ A-s hān imḡarān-nānāḡ tenere, əṭṭafān ehāket wa n-tāmuqqest n-Mässināḡ āmoosān tajuhe i-ärkāwāl n-tassaḡt wa ijjāš Mässināḡ i-Mosa a-s, has-innä, ad-ikrəs ehāket-en s-əmmək wa s-has-omār s-a-wen.

⁴⁵ Ehāket-en, togāz-t-dd əzzurəyāt ta hasān-təlkāmāt har āzzāman wa d-hasān-āzzar Yešwa, əjjāšān d-ehāket ākall wa tän-ikfa Mässināḡ, ohāḡān däḡ-əddəwəlān wi iyyādnen; əṭṭafān ehāket-en däḡ-ākall-en-däḡ har āzzāman wa n-Dawəd-i

⁴⁶ ijrāwān idəm d-ānnuḡmāt dat-Mässināḡ. Ēnta-en-däḡ a ittārān däḡ-Mässināḡ turhajāt n-ad-isəkrəs ehān i-Māssi-s n-Yaqub

⁴⁷ māšan, turhajāt-ten-däḡ, Sulāyman-i n-rure-s n-Dawəd a tät-ijrāwān.

⁴⁸ Ikrās ehān-en māšan, issəlmād-t Mässināḡ s-hārāt iyyān,

⁴⁹ inn'-as Emāli:

<Išənnawān a-s tasāqqaymut-in,
 ākall a-s isəkkukal n-iḡarān-in.
 Ma āmoos ehān wa s-tāddobem
 a hi-t-tədəyəm i-ad-hi-awəy, sunfāḡ däḡ-s?>

† 7:42 7:42 A-wa ānnābi ālolāyān däḡ-isālan n-ḡisa, a okāyān səmmosāt timād n-awātay dat-tiwit-net.

⁵⁰ Ajän wädden äfuss-in a dd-ixläkän härät iket-net.> »

⁵¹ Oläs daḡ inn'-asän Stifan: «Ya meddön-i-däḡ n-iḡäfawän äqqurnen n-ulhawän wären ätub s-äṭṭubbätntät timəzzujen-näsän, tunjayäm s-Unfas Šaddijän šund a-wa jän abbatän-näwän,

⁵² ijmaḍ-t äššäk a-s a-wa əjän abbatän-näwän ḡas a käwän-išlän käwäneḍ-däḡ, wär t-illa ännäbi s-wädden äqquzäben-t, jän iman n-wi hasän-äloläynen n-a-s ilkam a dd-ass wa n-iyän n-Ämaydal äsnäfrän Mässinäḡ, tətäläläm-tän käwäneḍ-däḡ ed төssäḍäräm-t ənta-däḡ төzzar, täḡäm-t kərəf,

⁵³ äzzäbbät-dd Mässinäḡ fälla-wän alämärän-net, əmməjrädän-awän sär-sän änjälosän mäšan, tunjayäm s-asjed-hasän.»

Tamättant n-Stifan

⁵⁴ Islä ämänokal n-älžämayät wa iyattäsän äššäreḡa i-a-wen-däḡ ḡas, ad-isamädad ənta d-äddinät-net, zimkärkəwežän isenän, fäll-älhäm-i-däḡ mäqqärän tän-ijjäšän fäll-Stifan.

⁵⁵ Ənta älwäqq-wen-däḡ, idnäy-t Unfas Šaddijän, idkäl asäwaḍ-net s-išənnawän, inhäy älxurmät n-Mässinäḡ d-Ḣisa ibdad daw-aḡil n-Mässinäḡ.

⁵⁶ Idkäl emäsli-net älwäqq-wen, innä i-älžämayät: «Säjdät, ənhəywät išənnawän, ämerän, ibdad Ägg-ägg-adəm daw-aḡil n-Mässinäḡ.»

⁵⁷ Əslän i-a-wen ḡas, äšḡäyyän däḡ-išənnawän, härän timəzzujen-näsän, ošälän-dd šund iyyän n-äwadəm sär-s iket-däḡ-näsän, oḍän fälla-s,

⁵⁸ äšräwräwän-t har dār-s əzjārän aḡrəm, ad-t-hakkän sämmäjori n-tihun har t-änḡän kərəf. Äddinät wi jänen a-wen-däḡ, ämawaḍ s-isəm-net Sawəl a əssäḡläfän isəlsa-näsän төzzar äšewäjän s-Stifan.

⁵⁹ Hakkän-t sämmäjori n-tihun wär dd-išrey, itəddal ənta Mässinäḡ, ijanna: «Emäli Ḣisa, ässiḡläfäḡ-käy iman-in.»

⁶⁰ Irkäḡ ḍarät-a-wen, idkäl emäsli-net s-afälla, innä: «Emäli, wär tän-täswäräd abäkkad-wa-däḡ.» Innä a-wen-däḡ ḡas, əjmäḍän-t iman.

8

Älyzabät d-amšändu n-imumənän äzzäman-wen-däḡ

¹ A-wa ijän ašäl-wen-däḡ iket-net issan-as Sawəl härät, iqqäs i-tamättant ta ija Stifan.† Ḣur-ašäl-wen-däḡ, ad-intä älyzabät səmmän fäll-älkänisät ta təhät Yärussälam, əmmähäšän imumənän däḡ-tajiwən ti n-Älyähudəyät d-Sämari, inəmмуšal ḡas a dd-äqqimänen däḡ-Yärussälam.

² Osän-dd meddön äddinnen, əštärän-in Stifan, əṭṭäfän iba-net däḡ-tisnant.

³ Iggäd-dd Sawəl däḡ-a-wen-däḡ, ad-itammäḡ i-əmmək s-hin-oläm älkänisät edägg t-təlla-däḡ, wär t-illa ehän wär-ijješ, isatärmas äddinät wi omänneren s-Ḣisa jer-əmoosän meddön wäla tiḍəḍen, itəjjar-tän-in däḡ-tikärmuten.

Älxuṭbät wa ija Fəlibb däḡ-Sämari

⁴ Imumənän wi dd-əzjärnen Yärussälam, əmmähäšän ḡas, ällilän äkall iket-net, xaṭṭabän Älənzil i-äddinät.

⁵ Däḡ-a-wen-däḡ ad-ikkä Fəlibb aḡrəm iyyän ihan teje ta n-Sämari ad-däḡ-s ixatṭäb i-tamətte isälan n-Älmaseḡ.

⁶ Sajadän-as äddinät äjjootnen s-ijraz mäjräd wa itäjj d-ijitän n-Mässinäḡ wi itamašal data-sän,

⁷ itakkäs alšinän naḍḍawnen iḡəran däḡ-äddinät, izizuy daḡ inaxəyabän d-inəbdan äjjootnen.

† 8:1 8:1 Jannen-as iyyäd: Älmuštafa.

⁸ Ja tedäwit mäqqoorät dāḡ-aḡrəm-wen-dāḡ.

⁹ Izzaḡ dihen āhaləs n-emässāxär s-isəm-net Simon, āmoos a-wa itäj awnaf i-käl-Sāmari, āsimḡär iman-net hullan,

¹⁰ ɔltayän-t wi mädroynen hakd wi wäššarnen, jannen fälla-s: «Wa āhaləs, tärna ta tojārät n-Mässināḡ a ittaf.»

¹¹ ɔltayän-t ya äddinät äjjootnen dāḡ-tössəba n-əssāxär wa itäjj, itaqqän iḡāfawän-nāsän.

¹² Inhäy Simon a-s omänän äddinät s-Älənžil wa hasän-ixaṭṭāb Fəlibb fäl Təmmənəya n-Mässināḡ d-ḡisa Älmaseḡ ḡas, ad-titwəsəlmiḡän meddən hakd tiḡeden dāḡ-aman,

¹³ omän ənta-dāḡ, ätwäsälmāḡ dāḡ-aman. Iltāḡ ya Fəlibb ḡarät-a-wen fäl tössəba n-ijitän n-Mässināḡ d-tikunen ti s-t-ihannāy itäjj'-enät, äqqännen eḡāf-net ənta-dāḡ.

Ajāraw wa jän käl-Sāmari i-Unfas Šäddijän

¹⁴ ɔslän inəmмуšal wi hänen Yārussālam a-s käl-Sāmari-dāḡ omänän s-mäjräd n-Mässināḡ ḡas, āšmašälän-dd sār-sän Bəṭrus d-Exya.

¹⁵ ɔwwäḡän-in ḡas, dälän Mässināḡ i-ad-dd-izəzzubbət Unfas Šäddijän fäll-äddinät wi ätubnen dihen

¹⁶ ed, dat-a-wen-dāḡ, wär tän-iha-i fäll-dd-äzzubbät Unfas Šäddijän, atwəsəlmaḡ ḡas a ätwäjjän dāḡ-aman s-isəm n-Emäli ḡisa.

¹⁷ Äswär-tän Bəṭrus d-Exya ifassän-nāsän, äzzubbät-dd fälla-sän Unfas Šäddijän.

¹⁸ Inhäy Simon a-s šamad tän-äsiwārän inəmмуšal ifassän-nāsän, ad-fälla-sän dd-äzzubbät Unfas Šäddijän ḡas, ittär ad-tän-äkf azrəf, ijann'-asän:

¹⁹ «Äkfät-ahi näkk-dāḡ tädabit-ta-dāḡ i-ad-umas a-s ere äswärāḡ ifassän-in näkk-dāḡ, ad-fälla-s dd-izəzzubbət Unfas Šäddijän.»

²⁰ Inn'-as Bəṭrus: «Təkšäfäd, käyy hakd azrəf-näk ed torded a-s a-wa ikfa Mässināḡ bännan, täddoobed azənš-net.

²¹ Šamad käyy ənniyät-näk da-dāḡ, əlməd a-s a-wa ijän, ābas t-iha folät-näk ed ifraḡ ulh-näk dat-Mässināḡ.

²² A-wen-dāḡ a fäl utab dāḡ-amsud-näk iket-di, tədöläd Emäli kunta ämmukkän a-wen, ad-hak-änš erk ənniyät wa innähäḡän dāḡ-ulh-näk

²³ ed, hannäyāḡ a-s ulh-näk, wär-iḡney a säl tälläbäst d-iba n-iqqud.»

²⁴ Äwwežāb Simon, inn'-asän: «ɔttärät-ahi-in käwänəḡ-di-dāḡ dāḡ-Emäli i-ad-wär hi-irəmməs a-wa s-tənnäm.»

²⁵ Äjjəyhän inəmмуšal, äxtābän mäjräd n-Emäli i-äddinät äjjootnen təzzar, əqqälän Yārussālam. Dāḡ-asikəl-nāsän, tajjän isälan n-Älənžil dāḡ-tidbi äjjootnen n-Sāmari.

Mənistär n-Ityobyä wa omänän s-ḡisa Älmaseḡ

²⁶ Imməjräd ḡarät-a-wen änjälos n-Emäli i-Fəlibb, inn'-as: «Fəlibb, tärur, təjəd tabarät ta fälät Yārussālam təkka Gaza ed wär dāḡ-s əjjətän iməssukal ämära-dāḡ.»

²⁷ Iglä, wär-ähoja a-s āhaləs iyyän n-ämudäš n-minəstär-da-dāḡ, ənta a ännihäḡän dāḡ-a-wa la Kändas ta n-tämänokalt n-äkall wa n-Ityobyä. Ähhujjäjj-dd ənta-dāḡ s-Yārussālam i-ad-dāḡ-s iḡbəd Mässināḡ.

²⁸ Issəmda ähujjəj ḡas, iqqäl äkall-net dāḡ-turäft-net əlwayän ibəjwan. Ässookal minəstär-di iḡarr əlkəttab wa n-ännäbi Saya† a-s dār-s ämmuqqäs Fəlibb.

²⁹ Innä Unfas Šäddijän i-Fəlibb ad-hin-ahəz turäft-net.

† 8:28 8:28 A-wa ännäbi dd-äzzarän i-ḡisa, älöläy dāḡ-isälan-net əssayät timad n-awätay dat-tiwit-net.

³⁰ Ošäl Fəlibb har dār-s ämsadäx, isl'-as iḡarr əlkəttab wa n-ännäbi Saya ḡas, inn'-as: «Ähaləs, ak a-wa ḡarräd, təjrahäd älmäḡna-net meḡ?»

³¹ Inn'-as ähaləs: «Endek a-wa he-äjäx əjrähäx-t a-s wär t-illa ere hi-t-iffəssärän.»

³² Äsnäy-t-dd ähaləs edes-has ad-has-iḡarr edägg wa däx-iktäb a-s:
«Oläh ḡas d-tiḡse tättilwäyät s-asäḡrəs,
oläh d-takəndəmt s-təllasän äddinät,
wär t-illa emäsli dd-izjarän emm-net,

³³ immədräy bännan,
wär has-ätwäjjä äššäreḡa wa dār-äniihäjja.
Mi s-ilkam ad-dd-iḡkal isälan-net i-ihäyawän-net
ed tärza taḡrəst-net däx-äddunya?»

³⁴ Issəstän ähaləs wa n-ämudäš n-Ityobya Fəlibb, inn'-as: «Läḡät-ahi, mi s-ihä ännäbi ti-net däx-edägg-wa-däx? Ak iman-net a däx-ämmijräd meḡ isälan n-ere s-ilkam ad-dd-ass a-s iha ti-net?»

³⁵ Irmäs-as-dd Fəlibb tifer-ti-däx, ad-has-itafässar a-wa inna Älənžil n-ḡisa.

³⁶ Eḡlan har dd-əkkän edes i-edägg han aman ḡas, inn'-as ähaləs wa n-ämudäš:
«Aman da, ma igdalän ad-ətwəsəlmäḡäx?» [

³⁷ Inn'-as Fəlibb: «Amən ḡas s-ulh imdan.»] Inn'-as ähaləs wa n-ämudäš: «Omanäḡ a-s ḡisa Älmasəx a-s Rure-s n-Mässinäḡ.»

³⁸ Omär älwäqq-wen-däx i-ad-təbdəd turäft, ijjäš dār-s Fəlibb aman, issəlmäḡ-t.

³⁹ Diha-däx dd-əzjārän aman ad-iḡkäl Unfas n-Emäli Fəlibb, wär t-oles ämudäš-ənnin-däx ahänay, iglä ənta däx-zäbo-net, ikna tedäwit.

⁴⁰ A-s hin-ijräh Fəlibb iman-net ḡarät-a-wen, iha äkall wa n-Ašdud, ifäl dihen, ikk' aḡrəm wa n-Qäyšara. Tadäbayt immär-däx, ad-däx-s äj isälan n-Älənžil.

9

Tätubt n-Sawəl (Ijtän 22:6-16; 26:12-18)

¹ Äzzäman-en-däx, a dd-iggäd Sawəl, isamädad, isamähaḡ, wär t-illa anəzjum ila säl wa n-iji n-iman n-inəṭṭulab n-ḡisa. Däx-isälan n-a-wen-däx a däx-ikka ämänokal n-käl-tikutawen

² i-ad-t-äkf tikarḡiwen issəknä däx-ihänan n-äddin wi n-käl-Älyähud hänen Dämašaq i-ad-ijrəw s-asəttärməs n-e d t-illäm ere ällilän tabarät-ten-däx n-Emäli, jer-ähaləs wäla tamäḡt, i-ad-t-dd-awəy däx-tišəm s-Yärussälam.

³ Äsookal Sawəl däx-a-wen a-s hin-ohäz aḡrəm wa n-Dämašaq. A əndärrän, ämläwläw ännur-i-däx äšsoohen dd-ifalän išənnawän;

⁴ ihä-dd oḡa, isl' älwäqq-wen-däx i-emäsli has-innän: «Sawəl, Sawəl, ma käy-orämän sār-i tiḡəzzəbud-ahi?»

⁵ Inn'-as Sawəl: «Mi tämoosäd Emäli?» Inn'-as Emäli: «A-wa näkk ḡisa wa tiḡəzzəbud, ad-hak-indär amzəzzaj dār-i härkuk.

⁶ Ämära, əbdəd, əjjəš aḡrəm wa n-Dämašaq, ad hak-itwənn dihen a-wa s-led s-ad-t-təjəd.»

⁷ Eḡqälän-dd ḡas meddən wi äddewnen d-Sawəl oran imawän, äbas əssanän a he-ənnən ed əslan i-emäsli-wənnin-däx mäšan, wär t-illa ere hannäyän.

⁸ Ibdäd Sawəl ḡarät-a-wen fäll-iman-net, ittär ad-arr tiṭṭawen-net mäšan, wär t-illa a ihannäy. Əlwäyän-t imidiwän-net har dār-s əjjäšan aḡrəm wa əkkän.

⁹ Ija kərəḡ išilan ḡarät-a-wen dārḡal, wär-ikša, wär-iswa.

¹⁰ Aḡrəm wa n-Dämašaq, ih'-e änätṭalib n-ḡisa s-isəm-net Änanyas, änfaläl-as-dd Mässinäḡ, inn'-as: «Änanyas!» Inn'-as Änanyas: «Näkk da Emäli.»

11 Inn'-as Emäli: «Äkk täšarrit ta s-itawänna <ta toḡädät>, tøjješäd ehän wa n-Yähudəs, sөstөнäd d-ähaləs n-taḡrөmt ta n-Tarša s-isөm-net Sawəl.» A-s itäj a-wen-däḡ, itөddal Sawəl Mässinäḡ,

12 änfaläl-as-dd däḡ-a-wen-däḡ a-s ikk'-e-hi-dd ähaləs s-isөm-net Änanyas-i t-madän-isөwär ifassän-net i-ad-t-dd-iqqөл ahänay-net.

13 Innä Änanyas: «Emäli, өsley a äjjeen fäll-ähaləs-i-däḡ, өlläḡen-ahi äddinät äjjootnen erk өmmөk wa issөkna imөššөddөjän wi hänen Yärussälam,

14 wäla Dämašaq-i dd-ikka, ikk'-et-dd äwway tikarḡiwen t-dd-өkfan imänokalän n-käl-tikutawen has-өjrawnen ad-isөттärmөs e d t-illäm ere iḡarrän isөm-näk.»

15 Inn'-as Emäli: «Eḡlөw, ähaləs-di, näkk a t-äsnäfränän i-ad-awөy isөm-in, isөlmөd tiwsaten ti n-inөzzulam† d-imänokalän d-käl-Iḡrayil a-wa ämoosäḡ,

16 ad-t-säknäḡ aḡäna wa mad-inhöy däḡ-tөssөba-nin.»

17 Iḡl' Änanyas, ikk' ehän wa s-has-ätwänna ih'-e Sawəl, os'-in, äswär-t ifassän-net, inn'-as: «Äḡḡa-ḡ Sawəl, Emäli ḡisa-i hak-dd-änfalälän däḡ-tabarät ta dd-jed, өnta a hi-dd-äšmašälän sär-k i-ad-käy-dd-iqqөл ahänay-näk, idnөy-käy Unfas Šäddijän.»

18 Tamäzäyyat-ten-däḡ a däḡ-dd-äträkkät a olähän d-tifrөnkawen däḡ-tiḡḡawen n-Sawəl tөzzar iqqäl-t-dd ahänay-net,

19 ibdäd ḡarät-a-wen, ätwäsälmaḡ däḡ-aman, immөnsäw, iqqäl-t-dd äššahät-net, izzäḡ Sawəl ḡur-inөḡḡulab wi n-aḡrөm-en-däḡ har ḡur-sän ässakäy a län išilan.

Ämoos Sawəl ämära tajuhe n-ḡisa Älmasex

20 Wär-ähoja a-s issөntä axätab n-isälan n-ḡisa däḡ-ihänan n-äddin wi n-käl-Älyähud, isatbat dat-tamөtte iket-net a-s, ḡisa a-s, Rure-s n-Mässinäḡ.

21 Äkunän äddinät wi has-sällänen, өqqälän-dd ḡas, jannen: «A-wa, wädden Sawəl wa izzänän s-wi ḡarränen isөm wa n-ḡisa hänen Yärussälam? Äjän wädden ass-net i-aḡrөm-wa-däḡ, i n-tөssөba n-ad-tän-isөттärmөs, äj'-en däḡ-ifassän n-ämänokal n-käl-tikutawen?»

22 Sawəl өnta, itiišuhut immun-net s-Mässinäḡ hak ašäl, isimxөлxil käl-Älyähud wi өzzäḡnen Dämašaq, isikus-tän äššäk a-s ḡisa a-s Älmasex.

23 Okäy äzzäman ḡas, änmännakän käl-Älyähud fäll-өmmөk wa s-t-mad-säḡdärän, äḡḡen-t kөрөf. Әssөbdädän ḡarät-a-wen meddөн däḡ-imawän n-aḡrөm iket-net i-ad-äqqaymөн has-äḡtafän i-ad-өjрөwän өmmөk s-t-äḡḡän

24 mäšan, өjjäšan-t isälan n-taḡdärt ta s-äbokän ad-has-tät-өjөн.

25 Änkärän inөḡḡulab s-ehäd, jän Sawəl däḡ-deke hөрөwän, ästärarän-t s-ašrut n-äḡalla wa iyyädän iḡläyän aḡrөm, өssөjmädän-t, ikkä Yärussälam.

26 Iwwäd-in ḡas, ikkä inөḡḡulab wi iyyädnen i-ad-där-sän irtөy mäšan, äksudän-t iket-näsän ed wär-өflesän härwa a-s iyyän däḡ-sän a ämoos.

27 Irmäs-t-dd Bärnäbbas s-iman-net, ilwäy-t s-inөmmušal, illäḡät-asän өmmөk wa s-inhäy Sawəl Emäli ḡisa däḡ-tabarät ta n-Dämašaq d-өmmөk wa s-has-immөjрäd Mässinäḡ d-turhajät ta t-ikfa n-ad-ämmäjräd s-өнniyät ozjan däḡ-ihänan n-äddin wi n-käl-Älyähud i-ad-äjjäyh a-s ḡisa a-s Älmasex.

28 Äsbärräkän-t älwäqq-wen-däḡ, irtäy där-sän; edägg өkkän däḡ-Yärussälam-däḡ, äddeew där-sän, itajäyha s-өнniyät ozjan өnta-däḡ fäll-isөm n-Emäli,

29 itidwөnnit, itamäzaḡ d-käl-Älyähud wi sawalnen Tälyunanit mäšan, өggädän-dd sär-s, ad-tammäḡän өntäneḡ-däḡ i-tašlөlt s-өjän iman-net.

† 9:15 9:15 — ḡur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-däḡ a fäl tiwsaten ti iyyädnen iket-näsän, ti n-inөzzulam. — Ašäl-i-däḡ, änäzzalim, äkafär (ere wärän issen s-Mässinäḡ).

³⁰ Eslän ayətma-s dāḡ-äddin i-a-wen ḡas, əssəjmädän-t s-aḡrəm wa n-Qäyšära təzzar, ikkä ḡarät-a-wen wa n-Tarša.

Ikkä Bəṭrus älkänisät ta n-teje ta n-Älyähudəyät

³¹ Äzzäman-en, təjraw älkänisät älyafyät dāḡ-tajiwen ti n-Älyähudəyät d-Galila d-Sämari, tişuhun inəṭṭulab dāḡ-immun-näsän, tinmækfin tayətte, tamaşalän härät iket-net dāḡ-tuksəda n-Emäli, idhal-tän Unfas Şäddijän, isawaḡ-dd fälla-sän hak aşäl äddinät wi iyläs Mässinäḡ.

³² Älliil Bəṭrus ənta äkall iket-net har dd-osa iməşşeddəjän wi əzzäḡnen tadäbayt ta n-Ludd.

³³ Ill'-e dihen ähaləs s-isəm-net Inyas s-a ilan əttam iwətyan ibdan, wär käla ifäl asəftäḡ-net.

³⁴ Os'-e-hi-dd Bəṭrus, inn'-as: «Inyas, äzozäy-käy ʔisa Älmasex, əbdəd, aḡh asəftäḡ-näk.» Ibdäd Inyas ässaḡät-wen-dāḡ.

³⁵ Ənhäyän käl-Ludd əntänəḡ d-äddinät wi əzzäḡnen telämse ta n-Sarun a-wen ḡas, omänän s-Emäli iket-dāḡ-näsän.

³⁶ A-s itäj a-wen-dāḡ, təzzaḡ tənəṭṭalibt s-isəm-net Täbita aḡrəm wa n-Žafa, tawäḡra daḡ s-isəm wa n-Dorkas, a-wen älmäḡna-net: «Taşənkäḡt.» Tämoos tamäḡt n-wälät-älxer, tāj imärkedän äjjootnen, təkkat.

³⁷ İşilan-en-dāḡ ad-tärhin, äba-tät, əknän äddinät tafəkka-net, əssənsän-tät dāḡ-ehän n-soro.

³⁸ Eslän inəṭṭulab wi hänen taḡrəmt-en wärät tənmäjjaj d-Ludd a-s dd-ijjaş Bəṭrus äkall ḡas, äşmaşälän sār-s əssin meddən i-ad-där-sän dd-idaw şik.

³⁹ Äddew dār-sän Bəṭrus, əwwädän-dd ḡas, əlwäyän-t s-soro wa dāḡ-tənsa tafəkka n-tamäḡt, əlkäḡnät-as-dd tinuḡäfen əṭṭafnät iba-net, hallänät, saknenät isəlsa wi hasnät-təzzəzmäy Dorkas dāḡ-a-wa təkkaş təll'-e jere-snät.

⁴⁰ İzzəjār-tänät əntänəḡ d-tamətte iket-net, irkäḡ ḡarät-a-wen jənnəj-s, idäl Mässinäḡ. İssəmdä tittar ḡas, innäḡ-dd sār-s, inn'-as: «Täbita, ənkär-dd!» Torä-dd tiṭṭawen-net älwäqq-wen-dāḡ, tənähäy Bəṭrus, täqqimä-dd.

⁴¹ Äşhätäl-as-dd s-äfuss-net, issəbdäd-tät, iḡrā-dd iməşşeddəjän d-tinuḡäfen ḡarät-a-wen, issəkn'-asän-tät, təddar.

⁴² Şik-dāḡ a-s dd-əssäḡläyän isälan n-a-wen-dāḡ aḡrəm wa n-Žafa iket-net, omänän äddinät äjjootnen s-Emäli.

⁴³ İja Bəṭrus äzzäman dāḡ-Žafa izzaḡ dāḡ-ehän n-Simyon wa isafalän ilämawän.

10

İkka Bəṭrus ehän wa n-Kärnälyus

¹ Aḡrəm wa n-Qäyšära, izzaḡ-t käbtän n-käl-Roma s-isəm-net Kärnälyus, ännihäḡ dāḡ-əjhän n-əssärdusa wi hänen taggayt ta s-itawänna: İṭali.

² Ähaləs äddinän a ämoos ənta hakd käl-eḡewən-net, itəkkat, infa tamətte s-a äjjeen, härkuk daḡ itəddal Mässinäḡ.

³ Aşäl iyyän, ebre n-tezzar, ḡur ässaḡät wa s-käraḡ, änfaläl-as-dd änjälos n-Mässinäḡ dāḡ-ehän-net s-älmäḡna äsisäjrähän, inn'-as: «Kärnälyus!»

⁴ İssəjräh Kärnälyus dāḡ-änjälös dāḡ-a-s irmaḡ, inn'-as: «Emäli, näkk-da, ma tənneḡ?» İnn'-as änjälos: «Tittar-näk, d-tikutawen-näk, əwwäḡnät Mässinäḡ, wär käy-in-ittəwa,

⁵ şəmmişəl ämära meddən s-Žafa i-ad-hak-dd aḡrən Simyon wa s-itawänna Bəṭrus,

⁶ äzzubbät ḡur-Simyon wa isafalän ilämawän s-t-illa ehän-net dāḡ-asälim n-ejärew wa səmmän.»

⁷ Ifäl-t änjälos wa hasän-imməjrädän ɣas, issäɣrā-dd Kärnəlyus əssin dəɣ-inaxdimän-net, äsdäw-tän d-əssärdasi äddinän dəɣ-wi äɣläfnen ehän-net, ikna taflest.

⁸ Ijä dəɣ-sän isälan n-a-wa ijän iket-net təzzar, äšmašäl-tän s-Žafa.

⁹ Härwa han tabarät ašäl wa iyyädän, ad-iwwän Bəṭrus afälla n-ehän s-tarähut, ad-itəddal Mässinäɣ.

¹⁰ Itəddal Mässinäɣ dihen-dəɣ a-s älluz, äsdärhän a ikša. Samäjnen-as äddinät imənsiwän dihen-dəɣ a-s t-irmäs härät,

¹¹ ojja išənnawän a-s dd-ämerän, ifäl-tän-dd ässärer mäqoorän ätiwätṭäfän s-əkkoz išrutän-net, insä-dd data-s.

¹² Ässärer-en, iskar fälla-s a-wa t-illän dəɣ-irəzzejän d-izlulam d-igdaḍ.

¹³ Inn'-as eməsli iyyän älwäqq-wen: «Bəṭrus, äɣrəs, äkš.»

¹⁴ Inn'-as Bəṭrus: «Fäw Emäli! Näkk, wär kälä əkšəɣ a xəramän wälä a ämmidäsän.»

¹⁵ Inn'-as eməsli daɣ: «Wär käy-iwer asäxrəm n-a-wa issäxläl Mässinäɣ.»

¹⁶ Itajj änjälos mäjräd-wənnin-dəɣ i-Bəṭrus har kərəḍ ihändəggan təzzar, immədkäl data-s ässärer s-išənnawän.

¹⁷ Iqqän a-wen-dəɣ eɣäf-net, ad-isiməktəw, itassän ad-ijräh älmäɣna n-a-wa has-dd-änfalälän. Tamäzäyyat-ten-dəɣ a dəɣ-dd-əbdädän meddən dər-s sastannen dat-emm n-ehän wa n-Simyon-i ɣur-äzzubbät,

¹⁸ əssəstänän s-afälla kunta ehän-wen-dəɣ a dəɣ-izzaɣ Simyon wa s-itawänna Bəṭrus.

¹⁹ Isiməktəw Bəṭrus dəɣ-isälan n-tänäfalilt-ta-dəɣ a-s has-innä Unfas Šäddijän: «Sastanän dər-k kərəḍ meddən,

²⁰ wär täsmäsändädäd tidawt dər-sän ed näkk a tän-dd-äšmašälän sər-k.»

²¹ Äzzubbät-dd sər-sän Bəṭrus, äzozäy-tän iman-net, issəstän-tän d-äddälil wa fäl dər-s sastanän.

²² Ənnän-as: «Kärnəlyus wa n-käbtän n-Roma a hanəɣ-dd-äšmašälän sər-k, ähaləs n-ämaɣdal n-ämaksəḍ n-Mässinäɣ, ässiimɣärän käl-Älyähud iket-näsän a ämoos. A ilan išilan d-has-dd-änfaläl änjälos n-eməššeddəj n-Mässinäɣ t-äsmätärän d-ad-käy-dd-isəssäɣär, isəjəd i-a-wa has-mad-tənnəd afäl t-dd-tosed.»

²³ Äsbärräkät Bəṭrus meddən wi dd-äšmašäl Kärnəlyus, äsməjarät-tän. Äffäw ɣas, ärkäbän, äddewän dər-sän härät dəɣ-ayətma-sän dəɣ-äddin əzzaɣnen Žafa.

Ajəyh wa ija Bəṭrus dat-äddinät wären ämoos dägg-Älyähud

²⁴ Əwwädän-in ašäl wa iyyädän Qäyšära. A-s hin-osän, iqqal-asän Kärnəlyus ənta d-käl-eɣewən-net d-inaflišän-net.

²⁵ Iräs-dd Bəṭrus ehän ɣas, ilkäḍ-as-dd Kärnəlyus, oḍa daw-iḍarän-net, irkäɣ data-s

²⁶ mäšan, issəbdäd-t-dd Bəṭrus, inn'-as: «Ahaa, wär jed a-di, näkk-dəɣ ägg-adəm ɣas a ämoosäɣ.»

²⁷ Ädiwännen har-əjjäšan fäll-älžəmaɣät wa äqqiimän dəɣ-ammäs n-ehän.

²⁸ Iḍkäl Bəṭrus mäjräd, inn'-asän: «Təssanäm käwäneḍ iman-nəwän a-s ässixräm alämär wa n-käl-Älyähud i-iyän dəɣ-sän uješ n-ehän, wälä təmmidəwa d-ere d-wär-oher äddin mäšan, näkk-i-hi, inn'-ahi Mässinäɣ a-s wär leɣ s-ad-səjrähäɣ äwadəm wäl' iyyän i-ad-t-äjäɣ a xəramän wälä a ämmidäsän.

²⁹ Təssəba n-a-wen-dəɣ afäl wär jeɣ əsarü wäl' iyyän i-ad-wär käwän-dd-əkkeɣ, läɣätät-ahi äməra, äddälil wa fäl hi-dd-təssäɣräm.»

³⁰ Inn'-as Kärnəlyus: «A ilan kərəḍ išilan, s-ässayät šund-wa-dəɣ, təddaläy Mässinäɣ s-tezzar dəɣ-ehän-in, har šik-dəɣ, ibdäd-dd ähaləs ilsan imälsan äsimäɣməɣnen dat-i,

³¹ inn'-ahi: <Kärnəlyus, tittar-näk d-tikutawen-näk, əwwädnät Mässinəx, wär käy-in-ittəwa,

³² šəmmişəl ämära meddən s-ayrəm wa n-Žafa i-ad-dd-idawän d-ähaləs s-isəm-net Simyon wa s-itawänna Bətrus, äzzubbät dəx-ehän n-Simyon wa isafalän ilämawän, ehän-net, ih' asälim n-əjärew wa səmmän.>

³³ Äšmašäləx-in sär-k älwäqq-wen-dəx meddən-in, irəš-ak Mässinəx ass wa hi-dd-jed. Ämära, iket-dəx-nänəx da-dəx, Mässinəx a dəx-nəjar ätəma, näsijəd day iket-nänəx i-a-wa s-hak-inna Emäli ad-hanəx-t-səlmədäd.>

³⁴ İdkäl Bətrus mäjräd, innä: «Tidət-dəx a-s, iket əjrahəx a-s, Mässinəx, wär-izley äddinät,

³⁵ änn-ak, e d t-illäm ere t-äksudän, itamašal erhet-net s-iqqud, tawset t-tələt-dəx, ijraz-as.

³⁶ Mässinəx, ässawäy-dd s-tizarät mäjräd-net i-käl-Işrayil i-ad-tän-isəlməd s-älxer wa tän-mad-äkf YisaÄlmasex-i n-Emäli n-e d t-illäm ägg-adəm.

³⁷ Təssanäm a-wa ijän dəx-Galila d-Älyähudəyät qarät asəlməx wa ij' Exya i-äddinät dəx-aman.

³⁸ Yisa wa n-Nəşirät, äsnäfrän-t Mässinəx, ikf'-e Unfas, issəxläy-dd äkall iket-net, itajj älxer, izizuy äddinät iket-näsän wi ässirməx Iblis.

³⁹ Näjjəyh i-a-wa ija iket-net dəx-teje ta n-Älyähudəyät d-ayrəm wa n-Yərussälam hundəx har ašäl wa d-t-ärmäsän käl-Älyähud, əşläbän-t fäll-tajəttewt

⁴⁰ mäšan, issənkär-t-dd Mässinəx s-tärna-net jer-inəmmuttan ašäl wa s kərəd i-ad-t-ənhəyän äddinät, iddar,

⁴¹ wädden äddinät iket-näsän a t-ənhäynen, wär t-inhey ar wi äsnäfrän ənta iman-net i-a-wen. Äddinät-en, nəh'-en näkkäneḍ-i ohärnen išəkša d-isəswa d-Yisa qarät a-s t-dd-ässinkär Mässinəx jer-inəmmuttan.

⁴² Ənta-en-dəx a hanəx-äsnäfränän, omär-anəx s-axättab n-isälan-net i-äddinät, nəselməd-tän a-s Yisa a äsnäfrän Mässinəx i-ad-işräx e d t-illäm ägg-adəm, wi äba hakd wi əddärnen.

⁴³ Dəx-isälan-net ənta-en-dəx a dəx-əjjəyhän, ənnän ännäbitän iket-dəx-näsän a-s, ere sär-s omänän-dəx, ad-ijrəw tenäšše n-ibäkkadän-net s-tärna n-isəm-net.>

Ajäraw wa jän inəzzulam i-Unfas Šəddijän

⁴⁴ İjana Bətrus a-wen-dəx a-s dd-äzzubbät Unfas Šəddijän fäll-älžəməxät-en iket-net.

⁴⁵ İqqän a-wen eḡäf n-imumənän wi n-käl-Älyähud ämeläynen äddewnen d-Bətrus ed ənhäyän Unfas Šəddijän har dd-äzzubbät fäll-äddinät s-aləšäl-näsän, inəzzulam a ämoosän.

⁴⁶ Sällän-asän day ämmiirädän awalän äynaynen, samxarän Mässinəx.

⁴⁷ Inn'-asän Bətrus qarät-a-wen: «Ak, ma igdalän i-äddinät fäll-dd-äzzubbät Unfas Šəddijän s-əmmək wa s-fälla-nəx dd-äzzubbät ad-ətwəsəlməxän dəx-aman?»

⁴⁸ Omär älwäqq-wen-dəx s-ad-ətwəsəməxän dəx-aman s-isəm n-Yisa Älmasex.

İttär Kärnəlyus d-älžälməxät-net dəx-Bətrus ad-xur-sän isəssikəy a län išilan.

11

Isälan wi ija Bətrus dat-imumənän wi n-Yərussälam

¹ Ʒslän inəmмуšal d-ayətma wi iyyäðnen hänen teje ta n-Älyähudəyät a-s iyyäð dāḡ-inəzzulam† omänän s-mäjräd n-Mässinäḡ.

² Älwäqq wa dd-iqqäl Bətrus Yärussälam, ämzäyžäyän-t imumənän wi n-dägg-Älyähud jānen amili härät, ənnän-as:

³ «Käyy, ma käy-äsihälän ujəš n-ehän n-äddinät wären ämeläy tihəred dār-sän imənsiwän?»

⁴ Issənt'-asän Bətrus afəssär n-isälan s-iyjän-iyjän ḡur-aläšäl-näsän har ašäl-i-dāḡ, inn'-asän:

⁵ «Heḡ aḡrəm wa n-Žafa, təddaläḡ Mässinäḡ a-s dd-heḡ oḡeḡ, irmäs-ahi härät, änfäläl-ahi-dd ässärer dd-ifälän išənnawän

⁶ fäll-ənsanät taḡsiwen d-tawäqqast d-ižlulam d-igḡaḡ. Zajäzzeḡ a-wa insän fäll-ässärer-en-däḡ

⁷ a-s əsleḡ i-eməsli hi-innän: <Bətrus, aḡrəs, äkš>

⁸ mäšan, ənneḡ-as: <Fäw Emäli! Näkk, wär käla əkšeḡ a xäramän wäla a ämmidäsän.>

⁹ Inn'-ahi eməsli-ənnin daḡ: <Wär käy-iwer asäxrəm n-a-wa issäxläl Mässinäḡ.>

¹⁰ Itajj a-wen har käraḡ ihändäggan təzzar, imməḡkäl dat-i ässärer s-išənnawän.

¹¹ Iqqan a-wa ijän eḡäf-in dihen-däḡ a-s dd-əbdädän käraḡ meddön dd-falnen Qäyšära dat-emm n-ehän wa ḡur-äzzubbeḡ,

¹² inn'-ahi Unfas Šäddijän ad-dār-sän idawäḡ šik. Äddewäḡ dār-sän, äddeewäḡ daḡ d-säḡis ayətma wi t-əllänen data-wän ämära-däḡ s-ehän n-Kärnəlyus-i hi-dd-issäḡrən.

¹³ Näwwäḡ-in ḡas, ija dāḡ-näḡ Kärnəlyus isälan n-əmmək wa s-has-dd-änfäläl änjälos wa has-innän: <Šəmmişəl ämära äwadəm s-aḡrəm wa n-Žafa i-ad-dd-idaw d-ähaləs s-isəm-net Simyon wa s-itawänna Bətrus.>

¹⁴ Afäl dd-osa, ad-hak-älläḡät əmmək wa s-mad-täḡləsäd käyy d-eḡewən-näk.>

¹⁵ Ämmiijrädäḡ-asän dihen-däḡ, a-s fälla-sän dd-äzzubbät Unfas Šäddijän iket-näsän s-əmmək wa s-fälla-näḡ dd-äzzubbät näkkäneḡ ašäl äzzarän.

¹⁶ Əkteḡ-dd älwäqq-wen mäjräd n-Emäli Ʒisa a-s inna: <Exya, issəlmäḡ dāḡ-aman mäšan, käwäneḡ, ad-tətwəsəlmäḡäm dāḡ-Unfas Šäddijän.>

¹⁷ Ʒas šämad ij'-asän Mässinäḡ ihuk šund wi hanäḡ-ija a-s nomän s-Emäli ƷisaÄlmaseḡ, mi ämoosäḡ timsəgəgḡiyäḡ d-Mässinäḡ?»

¹⁸ Isl' älzämaḡät i-isälan-win-däḡ ḡas, sämmed ənniyät-net ad-tiimələn Mässinäḡ, jannen: «Itbat a-s inəzzulam-däḡ, ikf'-en Mässinäḡ turhajät n-ad-utabän, amənän sār-s, əjrəwän əntäneḡ-däḡ tämudre ta n-tidət.»

Ätwäjjän isälan n-älxer dāḡ-taḡrəmt ta n-Intyuš

¹⁹ Imumənän wi əmmähäšnen darät tissust ta təlkmät i-tamättant n-Stifan,† əkkän dāḡ-sän iyyäḡ äkall wa n-Finisyä, əkkän iyyäḡ awtəl wa n-Qəbrus, əkkän iyyäḡ aḡrəm wa n-Intyuš, mäšan wär xəḡḡəb təššəm-näsän ar i-käl-Älyähud.

²⁰ Dāḡ-a-wen-däḡ a dāḡ-sän əkkän iyyäḡ əwanen dāḡ-äkall wa n-Qəbrus d-wa n-Libya aḡrəm wa n-Intyuš, ad-xaḡḡabän dihen isälan n-älxer n-Emäli Ʒisa i-käl-Älyunan.

²¹ Idhal-tän Emäli dāḡ-a-wa täjjän. Omänän äddinät äjjootnen dāḡ-a-wen-däḡ, əkfän iman-näsän i-Emäli.

²² Təsl' älkänisät ta hät Yärussälam i-a-wen ḡas, täšmašäl-dd Bärnäbbas s-aḡrəm wa n-Intyuš.

† 11:1 11:1 – Ʒur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-däḡ a fäl tiwsaten ti iyyäðnen iket-näsän, ti n-inəzzulam. — Ašäl-i-däḡ, änäzzalim, äkafär (ere wärän issen s-Mässinäḡ). † 11:19 11:19 Jannen-as iyyäḡ: Älmüştafa.

²³ Osa-hin, inhäy tihusay n-ännuymät n-Mässinäx xas, äsdawät-t a-wen, ad-isamatar imumənän d-ad-əknən uḍəf n-Emäli s-ulhawän əjlaynen.

²⁴ Ämoos ənta iman-net ähaləs n-emässärho, idnay Unfas Šaddijän, äšsoohät day dāx-immun-net. Išilan-en-dāx, omänän äddinät äjjootnen s-Emäli.

²⁵ Dāx-a-wen-dāx ad-ikka Bärnäbbas taḡrəmt ta n-Tarša itammāx i-Sawəl, ijrāw-t xas, ilwāy-t-dd s-Intyuš.

²⁶ Jän dihen awätay imdan änniixdämän d-älkänisät n-aḡrəm-en, saḡr'-en tamətəte täjjet. Aḡrəm-wen-dāx n-Intyuš a dāx-ätwäḡrən inəṭṭulab n-ḡisa s-isəm wa n-älmässexitän s-tizarät.

²⁷ Äzzäman-en-dāx ad-dd-fälän ännäbitän iha Äggäbbas aḡrəm wa n-Yärussälam, əkkän-dd Intyuš.

²⁸ Ənta-en-dāx a ibdädän, äloläy s-tärna n-Unfas Šaddijän n-a-s ilkam ad-äj laž läbasän fäll-äröri n-əkall iket-net. Ija day a-wen s-əmmək-wen-dāx s-tän-innä dāx-äzzäman wa d-ämoos Kəlod ämänokal n-əkall.

²⁹ Təssəba n-a-wen-dāx a fäl, änmännakän imumənän wi hänen Intyuš i-ad-arəj hak iyyän dāx-sän s-a-wa itṭäf d-a-wa s-äddoobät i-ayətma-sän dāx-äddin wi hänen Älyähudəyät.

³⁰ Əjän a-wen s-əmmək-en-dāx təzzar, jän tasəssiwit-ten-dāx jer-ifassän n-Bärnäbbas d-Sawəl i-ad-tät-in-səssiwəḍän inušämän n-älkänisät ta hänt Älyähudəyät.

12

Iyläs-dd Mässinäx Bəṭrus dāx-tamättant

¹ Äzzäman-wen-dāx, ad-izzän ämänokal Harudəs Ägribba s-iiyəḍ dāx-äddinät n-älkänisät ta hänt Yärussälam, ad-tän-itixəzzəbut.

² Dāx-a-wen-dāx, ad-inḡa s-təkoba Yaḡub wa n-ənḡa-s n-Exya.

³ Inhäy a-s a-wa ija, ijrāz i-käl-Älyähud xas, ästärmäs Bəṭrus ašäl n-ämudd wa n-Faška-i-dāx tattän äddinät tijəlwen ti wär ha täzza,

⁴ ij'-e dāx-takärmüt təzzar, issəbdäd əkkoḡät taggayen n-əkkoḡ-əkkoḡ əssärdusa i-ad-t-äyləfän ed irha ad-t-dd-isəbdəd dat-käl-äššäreḡa afäl okäy ašäl wa n-Faška.

⁵ Iha Bəṭrus takärmüt-en-dāx mäšan, a-s ija a-wen-dāx, älkänisät ənta, täžziimāx, tajäynan dat-Mässinäx, tattär dāx-s ad-t-dd-äswäyyän.

⁶ Dāx-ehäḍ wa n-dat-wa d-ila Harudəs ad-t-išräx, insa Bəṭrus dāx-takärmüt jer-əssin əssärdusa dāx-s janen sənātät tišəm, əbdadän day əssärdusa iyyəḍ dat-emm n-takärmüt.

⁷ Har šik-dāx, osä-dd ənjälos n-Emäli edägg-en, ämläwlaw səllul wa iha, äkrättät ənjälos tasäja n-Bəṭrus, issənkär-t, inn'-as: «Tärmaḍ, əbdəd šik!» Särnät fälla-s tišəm əssaḡät-wen-dāx, oḍänät.

⁸ Inn'-as ənjälos day: «Tärmaḍ, əjbəs taməntəka-näk, əsəl tifädelen-näk, uhən, äj anäkäbba-näk, əlkəm-ahi.» Ija Bəṭrus a-wa has-innä ənjälos iket-net.

⁹ Izjār-dd Bəṭrus takärmüt, ilkäm i-ənjälos mäšan har ämära-dāx, ija ḡur-s a-s tāharjit xas a-wa-dāx iket-net.

¹⁰ Əkkän-dd edes i-əssärdusa wi äzzarnen, əkkän-dd day edes i-taggayt ta s-sənātät har dd-ohäzän tashärt ta n-täzoli təkfat emm-net aḡrəm, tämera d-iman-net data-sän, əzjārən, əjjäšan ammas n-täšarrit xas, ifäl ənjälos Bəṭrus.

¹¹ Älwäqq-wen-dāx, ad-t-dd-iqqäl ənniyät-net, ikkäs äššäk a-s Mässinäx a sär-s dd-äšmašälän ənjälos-net i-ad-t-dd-ikkəs jer-ifassän n-Harudəs, d-a-wa läbasän s-ärhän käl-Älyähud ad-has-t-əjən.

¹² Ijräh taḡārha-net ämära xas, ikkä ehän n-Märyäma ta n-ma-s n-Exya wa s-itawänna Marḡəs, äžziimmāxän ḡur-s imumənän äjjootnen təddalnen Mässinäx.

¹³ Ikköwkäw emm n-ehän, toſäl-dd sär-s tämawađt n-tänaxdimt s-isem-net Roda, tössöstän-t d-ere wa ämoos,

¹⁴ tēzzäy temäsläxt-net mäſan, tēja tedäwit-ta-däx fäl hin-töttöwa wäla-däx ad-has-tarr emm n-ehän, toſäl, täqqäl ammas n-ehän, tēja isälan däx-älžämaḡät n-a-s Bətrus a itakäwkawän emm n-ehän.

¹⁵ Eslän i-a-wa jänna ḡas, əjän-tät tenəbbeddelt, ənnän-as: «A-di änjälos-net ḡas a-s tösled.» Mäſan, tēnn'-asän: «Tidət-in, əjlayäḡ a-s ənta.»

¹⁶ Jannen a-wen-däx, itakäwkaw-asän Bətrus emm n-ehän. Eglän, orän-as-t, əqqälän-dd ḡas, tof'-en tākunt n-a-s tidət-däx a-s ənta a-wa.

¹⁷ Äswär-asän assəkäđ emm-net, ästafäy-asän d-ad-susəmän, ad-hasän-itajj đarät-a-wen isälan n-əmmək wa s-t-dd-ikkäs Emäli däx-takärmüt. Inn'-asän daḡ: «Äglät, äjät ämära isälan däx-Yaqub d-ayətma-näḡ däx-äddin wi iyyäđnen.» Ifäl-tän đarät-a-wen, ikk' edägg iyyän.

¹⁸ Äffäw ḡas tēja tämdärwäy mäqqoorät däx-əssärdusa, hak iyyän isastan amidi-net d-a-wa ija Bətrus.

¹⁹ Ässomäḡ-asän-t Harudəs mäſan, äba-hasän-t-dd. Issäḡrä-dd əssärdusa wi s-käla t-äḡläfän, omär s-ad-ətwəsəstənän tēzzar, ämmätän. Ifäl Harudəs đarät-a-wen teje ta n-Älyähudəyät, ikk' aḡrəm wa n-Qäyşara i-ad-däx-s isəssikəy a län išilan.

Tamättant n-ämänokal Harudəs

²⁰ A-s itäjj a-wen-däx, ih' ađkär n-iḡärman wi n-Tir d-Säyda ämänokal Harudəs. Tössəba n-ad-äj älxer dār-sän a fäl dd-äſmaſälän iḡärman-en älžämaḡät n-älḡafyät. Änmännakän d-Blastas-i ännihäđän däx-ehän n-ämänokal Harudəs d-a-wa t-dd-iqqälän iket-net. Ənta-en-däx a däx-əttärän ad-ilyəd ämänokal i-ad-äj älxer ed isudar-näsän teje-ten-däx fäll-ixkäm Harudəs a dd-təffälän.

²¹ Aşäl wa d-əlän s-ad-sətbətən älxer jere-sän, ässahäḡ-dd Harudəs aşäl däx-isəlsa-net wi n-təmmənukəla, äqqima fäll-tasäqqaymut-net ta n-təmmənukəla, imməjräd i-tamətte.

²² Təsla tamətte i-mäjräd-net ḡas, täşḡäyya däx-işənnawän, ad-janna: «Aşäl-i, Mässinäḡ iman-net a hanäḡ-ämmijrädän, wädden ägg-adəm.»

²³ Diha-däx d-tənna tamətte a-wen-däx, ad-has-äzzuggät änjälos n-Mässinäḡ ed unjäy ikfa Mässinäḡ semḡar wa dār-änihäjja. A-s t-in-əjrähän äddinät, əfradnät däx-s tiwəkkawen har ämmüt.

²⁴ Intäj mäjräd n-Mässinäḡ däx-idäggan äjjootnen, omänän äddinät däx-işilan-win-däx.

²⁵ Ässawäđ-in Bärnäbbas d-Sawəl ämaſal-näsän i-käl-Yärussälam ḡas, əqqälän siha s-dd-hän, äddeewän ämära d-Exya wa s-itawänna Marqəs.

13

Asikəl wa äzzarän ija Sawəl äddew d-Bärnäbbas

¹ Älkänisät ta hät aḡrəm wa n-Intyuş, ännäbitän-net d-imäsäḡran-net da: Bärnäbbas, Simyon wa s-itawänna «Ekäwel», Lisyus wa n-äkall wa n-Qərwan, Mänahin wa s-ənta d-Harudəs Intibbas a ədwälnen däx-iyyän n-ehän d-Sawəl.

² Aşäl wa n-älḡibadät n-Emäli, äzuumän imumənän, äžziimmäḡän däx-iyyän n-edägg, ḡabbädän Emäli a-s hasän-innä Unfas Şäddijän. «Äjät-ahi Bärnäbbas d-Sawəl s-edes i-ämaſal wa s-tän-dd-äḡreḡ.»

³ Äzumän, dälän Mässinäḡ tēzzar, äswärän ifassän-näsän Bärnäbbas d-Sawəl, oyyän-tän, əglän.

⁴ Oḡäd-tän Unfas Şäddijän, äzzubben s-aḡrəm wa n-Slukya tēzzar əjjäşän turäft n-aman, jän tamdujt ta n-Qəbrus;

⁵ əwwäḏän-in taḡrəmt s-isəm-net Sälamın ɣas, jän isälan n-mäjräd n-Mässinäḡ ḏäḡ-ihānan n-äddin wi n-käl-Älyāhud, ämoos-asän Exya Marqəs ämadhal.

Yəlimas wa n-emässäxär

⁶ Əjläyän awtəl wa n-Qərwan iket-net har Bafus, əjräwän dihen ägg-Älyāhud n-emässäxär s-isəm-net Bärɣisa, ijanna s-bahu, ännäbi a ämoos,

⁷ izzaḡ ɣur-Saržus Buləs-i n-ämānokāl n-awtəl, ähaləs, a-wen, iknan terše n-tayətte. Isla ämānokāl Bärnäbbas d-Sawəl ɣas, issäɣr'-en-dd ḏäḡ-derhan n-ad-t-səslən mäjräd n-Mässinäḡ.

⁸ Iggäd-dd Yəlimas wa n-emässäxär, a-wen isəm-net ḏäḡ-Tälyunanit, äšmäšäkkät-asän mäjräd, ad-itattär ad-hin-išəšləl ämānokāl fäll-isälan n-immun.

⁹ Ibdäd-dd sār-s Sawəl-i s-itawänna ḏaḡ Buləs, iḏkar-t Unfas Šäddijän, ikna asəns n-akäyad-net fäll-Yəlimas,

¹⁰ inn'-as: «Əyya isəm n-ägg-Iblis, käyy wär təḏneyäd a səl amsud d-təlmənufäḡa, ašanjo n-a-wa oḡädän a tämoosäd, isəm n-eməkkerrəs, ɣas äba-hak a käy-išilləwän ar asəfraḡ n-tabarät ta toḡädät n-Emäli.

¹¹ Ämära, səjəd-ahi: ad-fälla-k isəns Emäli äfuss-net, täddäryäläd, təhajəd wär tənheyäd täfukt s-tiṭṭawen-näk.» Wärnät tihay d-tähozt tiṭṭawen-net ässaḡät-wen-ḏäḡ, ad-isikluluf siha d-siha, itammäḡ i-ere t-ilwäyän.

¹² Inhäy ämānokāl n-äkall a-wa ijän ɣas, omän, təḏäs teḡäre ta s-islä fäll-Emäli ulh-net.

Älxuṭbät wa ija Buləs ḏäḡ-taḡrəmt ta n-Intyuš

¹³ Ijjäš Buləs d-imidiwän-net turäft n-aman ḏäḡ-Bafus, əkkän aḡrəm wa n-Birga ḏäḡ-äkall wa n-Bänfəli, dihen-ḏäḡ a dār-sän ibḏa Marqəs, äsof ad-iqqəl Yärussälam.

¹⁴ Fälän Birga, əkkän Intyuš ta n-teje ta n-Bəssidi. Ij'-en ašäl wa n-əssəbət dihen ɣas, əkkän ehän n-äddin wa n-käl-Älyāhud.

¹⁵ Äqqimän dihen-ḏäḡ, itawäḡra alämär n-Mässinäḡ d-a-wa ənnän ännäbitän ḏäḡ-əlkəttabän ɣas, ənnän-asän imizärän n-ehän wa n-äddin: «Meddən, ayətma-näḡ, kunta lam isəmməterän s-tärham ad-tän-təjəm i-äddinät, äxtəbät-asän.»

¹⁶ Ästafäy Buləs i-älžəmaḡät, ibdäd, inn'-asän: «Käl-Işrayil d-imaksaḏän n-Mässinäḡ, säjdät-ahi.

¹⁷ Mässinäḡ n-tamətte-ta-ḏäḡ n-Işrayil, ənta a äsnäfränän abbatän-nänäḡ, ässet'-en härwa han äkall wa n-Mişra təzzar, izzəzjär-asän-t-dd s-tärna n-äfuss-net,

¹⁸ wär t-illa erk älxal wär has-əjješän mäšan, äzzäydär fälla-sän har jän əkkozät timərwen n-awätay ḏäḡ-tenere.

¹⁹ Darät a-s tən-ikfa tärna fäll-əssa əddəwəlän ḏäḡ-Xäna a tən-ikfa təkasit ta hasän-ämoos äkall-wen-ḏäḡ.

²⁰ Okäy darät-a-wen a ojarän əkkozät timaḏ n-awätay d-səmmosät timərwen təzzar, ikf'-en älcəllitän-i fälla-sän ämnakälnen hundäḡ har äzzäman wa n-ännäbi Sumäyla.

²¹ Ənta-en-ḏäḡ a ḏäḡ-əttärän käl-Işrayil ere fälla-sän ämnakälän, ij'-asän a-wa ḏäḡ-s əttärän, ikf'-en Mässinäḡ Sayəl ägg Kis wa n-tawset ta n-Bänyamin. Ämnakäl fälla-sän əkkozät timərwen n-awätay

²² mäšan, innäḏ fälla-s Mässinäḡ, ijä-dd Dawəd ägg Yasa-i s-ənta a fäll inna Mässinäḡ:

<Əjräwäḡ Dawəd ägg Yasa, ənta a-s ähaləs-wa s-ulh-net ilkam i-wa-nin, ad-ämašäl erhet-in iket-net.>

²³ Ijəllan n-Dawəd-en-ḏäḡ a ḏäḡ-dd-ikkäs Mässinäḡ ɣisa-i s-ənta a-s Ämaḡlas wa s-ijjäs ärkəwäl-net i-käl-Işrayil.

²⁴ Үйса, а-с ија Exya isälan-net härwa wär-issənta ämašal-net älwäqq wa d-ixattäb asəlməx däx-aman i-ad-umas a-wen ašämöl n-tätubt i-tamətte n-Išrayil iket-net.

²⁵ Älwäqq wa dd-tohäz tamättant n-Exya, innä i-tamətte: <Mi s-tordam ämoosäx-t? Wär teyalät näkk а-с ätwänna ilkam a dd-asäx; wa s-ätwänna ilkam a dd-ass, imal-dd, ənta-en, wär-änhäjjäx wäla-däx d-ad-əkkəsäx tifädelen däx-idarän-net.>

²⁶ Ayətma-x wi n-ihäyawän n-Ibrahim, käwäneḍ-i äksuḍnen Mässinäx, näkkäneḍ а-с dd-ässawäy Emäli mäjräd wa n-əlxəllas.

²⁷ Äduuttät а-с Yärussälam d-imizärän-net, əžžəžhälän iman-näsän i-Үйса, wär t-illa a əfhamän däx-a-wa ənnän ännäbitän däx-əlkəttabän wi titwäxrinen hak əssəbət n-älxibadät däx-ihänan n-äddin, äswärän Үйса uḍlem, ittärmäs,

²⁸ а-с ија а-wen, wär t-illa uḍlem fälla-s ättijräwän, hakd а-wen-däx, əttärän däx-Bilatəs ad-ətwəjjən iman-net.

²⁹ Əssəbtätän а-wa fälla-s ənnän əlkəttabän xas, əkkäsän-t-dd fäll-tajəttewt, jän-t däx-azəkka

³⁰ mäšan, issənkär-t-dd Mässinäx jer-inəmmuttan.

³¹ Änfäläl-dd i-äddinät äjjootnen däx-wi dār-s äddewnen wa-däx n-Galila har Yärussälam, ија išilan äjjootnen ill'-e jere-sän. Ämära, äddinät-win-däx s-dd-änfaläl a tajäyhanen i-isälan-win-däx data-wän.

³² Näkkäneḍ ämära, nətajj'-awän isälan-win-däx n-älxer s-ätwäjjä ärkäwäl-näsän i-abbatän-nänäx.

³³ Ärkäwäl-en, näkkäneḍ-i ämoosnen ihäyawän-näsän а-с t-ijjäs Mässinäx ənta-i dd-issənkärän Үйса jer-inəmmuttan s-əmmək wa s-iktäb däx-əlxəsəb-wa s-əssin n-əlkəttab wa n-Äzzäbur, innä Mässinäx däx-isälan n-Үйса:

<Käyy а-с Rure-x, oräwäx-käy ašäl-i-däx.>

³⁴ Äywa, Үйса ya, Mässinäx iman-net a innän, a t-dd-issənkärän jer-inəmmuttan härwa wär-inhey märkähaw wa n-azəkka. A-wen-däx daḡ a fäl innä däx-isälan-net: <Ad-käwän-äkfäx älbāraka wa šaddijän itbätän s-jey ärkäwäl n-ad-t-äkfäx i-ännäbi Dawəd.>

³⁵ Iktab daḡ а-с:

<Wär-e təyyəd Eməššeddəj-näk irakkäh däx-azəkka.>

³⁶ Təssanäm а-с Dawəd ənta iman-net ämešäl а-wa fälla-s irha Mässinäx däx-äzzäman-net təzzar, ämmut, inhäy märkähaw wa n-azəkka šund а-wa jän abbatän-net wi has-dd äzzarnen

³⁷ mäšan Үйса ənta, wär-inhey märkähaw-wen-däx ed, issənkär-t-dd Mässinäx jer-inəmmuttan.

³⁸ Ayətma, əlmədät а-с Үйса-i, ənta a xur-hawän-t-təlla tenäšše n-ibäkkadän, ənta а-с sämdo n-a-wa hawän-ihän alämär wa dd-äzzäbbät Mässinäx fäll-ännäbi Mosa iket-net,

³⁹ ənta a xur-ijarräw e d t-illäm amumən idəm dat-Mässinäx,

⁴⁰ а-wen-däx a fäl, agəzät iman-näwän iket-di d-wär fälla-wän oḡa äššar-wa s-ənnän ännäbitän. Innä Mässinäx:

⁴¹ <Ənhəywät, käwäneḍ-i əḍnäynen kəssən,

tärməset-käwän täqqän n-eḡäf,

ibähet-käwän fäl-a-s

ad-əjən ijitän däx-äzzäman-näwän s-kud-däx

ij'-awän äwadəm isälan-näsän, wär mad-t-təfləsäm.> »

⁴² Izjār-dd Buləs d-Bärnäbbas ehän n-äddin xas, əttärän däx-sän äddinät a dd-aləsän uḡəl əssəbət-wa ilkämän i-ad-hasän-aləsən iji n-isälan-wi-däx.

⁴³ Immähäš älzämaḡät ḡas, əlkämän-asän käl-Älyähud äjjootnen d-iiyäd əlkammen i-äddin wa n-käl-Älyähud, ädwännən dār-sän, sisibuyunän-tän, sikusän-tän äššäk n-ad-äqqäymən eṭṭafän ännuḡmät n-Mässinäḡ.

Ija Buləs d-Bärnäbbas isälan n-älxer i-äddinät wären ämoos däḡ-Älyähud

⁴⁴ Ijä ašäl wa n-əssəbət-i n-täsonfat ḡas, äddew-dd aḡrəm iket-däḡ-net i-ad-isəjəd i-mäjräd n-Emäli.

⁴⁵ Ənhäyän käl-Älyähud əjut n-tamətte ḡas, osämän, ad-šimsəkken mäjräd i-Buləs, jannen isikufor.

⁴⁶ Buləs d-Bärnäbbas ämoosän meddən ozjanen s-itbat immun-näsän, ənnän-asän: «Käwäneḡ a-s äniihäjjä ad-hawän-itwäxtəb mäjräd n-Mässinäḡ s-tizarät mäšan, tunjäyäm sār-s ed, wār täsnähäjjäm iman-näwän d-tämudre ta täḡlälät, a-wen-däḡ a fäl ämära, əlmədät a-s ad-nənnäḡ s-inəzzulam.†

⁴⁷ Ənta-den-däḡ a-wa s-hanäḡ-omär Emäli däḡ-əlkəttab-net a-s innä:
 <Jəḡ käy-ännur i-tiwsaten
 i-ad-hin-səssiwädəd
 əlḡəllas ifäyyän n-äkall iket-net.> »

⁴⁸ Əslän inəzzulam i-a-wen ḡas, əddəwen, ad-timələn mäjräd n-Emäli, omänän wi s-ätiwatäs ad-əjrəwän tämudre ta täḡlälät iket-näsän.

⁴⁹ Intäj mäjräd n-Emäli däḡ-äkall iket-net.

⁵⁰ Jän käl-Älyähud erk iman däḡ-tiḡedən ätiwäsämḡärnen d-imuzärän n-aḡrəm, oḡä-dd älyizabät səmmän fäll-Buləs d-Bärnäbbas, äsmähäḡän däḡ-sän äddinät i-ad-əzjārän isäḡlay n-äkall-näsän.

⁵¹ Əbbəkəkän əboqqal n-iḡarän-näsän fäll-aḡrəm-en təzzar, əkkän aḡrəm wa n-Ikanyun.

⁵² Äqqimän-dd inəṭṭulab wi n-Intyuš ḡarät tekle-näsän, əknan däḡ-tedäwit, iḡnay-tän daḡ Unfas Šäddijän.

14

Ija Buləs d-Bärnäbbas isälan n-älxer däḡ-Ikanyun

¹ Oläs Buləs d-Bärnäbbas däḡ-Ikanyun iji n-a-wa s-əzzäyän iji-net däḡ-äzzäman-en-däḡ, əjjäšan ehän n-äddin wa n-käl-Älyähud, jän däḡ-s mäjräd-wa-däḡ fäl omänän käl-Älyähud äjjootnen d-tamətte täjjeet däḡ-ta n-käl-Älyunan,†

² mäšan, əssənkärän-dd käl-Älyähud wi s-äqqurän ulhawän-näsän inəzzulam,† jän däḡ-sän erk iman i-ad-əššunjen äddinät-wi omännen s-ḡisa.

³ Ädwännät Buləs d-Bärnäbbas dār-sän har jän äzzäman, tajjän-asän mäjräd ädduutten, tajjäyhen-asän fäll-Emäli. Ikf'-en daḡ Mässinäḡ ännuḡmät s-tajjän ijitän n-Mässinäḡ d-härätän ässuksäḡnen, wār t-illa a tän-ässirmäḡän, ed äsiwār-tän Emäli tärna-net.

⁴ Təbḡa tamətte n-aḡrəm iket-net, əlkämän iyyäd i-käl-Älyähud, əlkämän wi iyyäḡnen i-inəmмуšal.

⁵ Əjjäšan-dd erk iman inəzzulam d-käl-Älyähud iyyäd d-imizärän-näsän, ad-tattärän əmmək s-äsmäḡrəyän Buləs d-Bärnäbbas, əkfən-tän səmmäjori n-tihun,

† **13:46 13:46** – ḡur-käl-Älyähud, ere wärän ämoos äḡḡ-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-däḡ a fäl tiwsaten ti iyyäḡnen iket-näsnät, ti n-inəzzulam. — Ašäl-i-däḡ, änäzzalim, äkafär (ere wärän issen s-Mässinäḡ). † **14:1 14:1** Itawann'-asän: Gərüktän. (Les Grecs däḡ-Təfränsit). Əzzaḡän Erobbä däḡ-äkall wa itawänna: Gəris (La Grèce däḡ-Təfränsit). Tawalt-näsän: Tälyunanit. † **14:2 14:2** – ḡur-käl-Älyähud, ere wärän ämoos äḡḡ-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-däḡ a fäl tiwsaten ti iyyäḡnen iket-näsnät, ti n-inəzzulam. — Ašäl-i-däḡ, änäzzalim, äkafär (ere wärän issen s-Mässinäḡ).

⁶ əlmädän inəttulab s-a-wen ɣas, əjewädän s-Likawni d-Listra d-Darba d-attayän n-tidbi-tin-däx.

Ija Buləs d-Bärnäbbas isälan n-älxer däx-Listra

⁷ Jän isälan n-Älənžil däx-iɣərman-win-däx iket-näsän.

⁸ Aɣrəm wa n-Listra, ih'-e ähaləs n-anäbdon s-a dd-iwa-däx, ibdan.

⁹ Islä i-Buləs ämmijräd ɣas, äsjäd-as. Inhäy Buləs däx-tiṭṭawen-net a-s ila immun t-äzozäyän, iɣləs ɣas,

¹⁰ inn'-as s-afälla: «Əbdəd fäll-iman-näk.» Iggäd ähaləs, irjäš.

¹¹ Ənhäyän äddinät a-wa ija Buləs ɣas, äsɣären, ənnän däx-tawalt ta n-Likawni: «Ašäl-i, məssaw-näx dd-falnen isənnawän däx-taɣəssa n-dägg-adəm a dd-äzzubbätne fälla-näx.»

¹² Jän i-Bärnäbbas isəm Zuss, jän i-Buləs isəm Armas† ed, ənta a ämmijrädän ässaɣät-wen-däx.

¹³ Ošäl-dd u-tikutawen wa n-Zuss ila ehän-n-ämudd wa ihän emm n-aɣrəm, ilwäy-dd iwdesän d-täboyt n-isəhhəska, ad-itattär ənta d-tamətte əmmək s-jän härätän-win-däx takute i-Buləs d-Bärnäbbas.

¹⁴ Əlmädän inəmмуšal s-a-wen ɣas, äsɣärrewen inkubba-näsän fäll-iman-näsän, ošälän s-tamətte äseɣären,

¹⁵ jannen: «Ya meddön! Wär jem a-di, ma ämoos a-wa s-täbokäm iji-net? Näkkäned dägg-adəm ɣas a nämoos, wär t-illa a där-wän nəzlay. Isälan n-älxer a häwän-näwway i-ad-təbdəwäm d-mäläyäɣna, tutabäm s-Mässinäx-i n-Äməɣlal dd-ixläkän isənnawän d-äkall d-ijərwan d-a-wa tän-ihän iket-net.

¹⁶ Ibda, oyya əzzurəyyatän-ti okäyenen əlkamnät i-erhet n-iman-näsnät

¹⁷ mäšan hakd a-wen-däx, wär hin-issəbdäd fälla-snät älxer-net. Ənta a fälla-wän dd-äzzäbben ijənnawän, iymär-käwän s-äzzämanän olaynen, ikf'-iwän isudar, ij' älxer däx-ulhawän-näwän.»

¹⁸ Jannen-asän a-wen-däx mäšan, šärnaš d-əgdälän tikutawen-ti s-ärhan äddinät a tänät-əjən däx-təssəba-näsän.

¹⁹ Osän-dd härät däx-käl-Älyähud dd-falnen Intyuš d-Ikanyun, əzzänän s-Buləs. Əkfän-t sämmäjori n-tihun təzzar, äšräwräwän-t har t-əzzəzjārän aɣrəm ed, äxelän äba-t.

²⁰ Əlkämän-as-dd inəttulab-net, äɣläyɣäläyän-t ɣas, inkär-dd, oläs ujəš n-aɣrəm. Äffäw ɣas, äddew d-Bärnäbbas s-Darba.

Iqqäl-dd Buləs d-Bärnäbbas tayrəmt ta n-Intyuš

²¹ Äslänžen aɣrəm-wen-däx, jän däx-s inəttulab äwwädnen härät təzzar, əqqälän Listra d-Ikanyun d-Intyuš.

²² Samätarän inəttulab däx-idäggan-win-däx d-ad-əṭṭəfän immun s-Mässinäx ed, itbat a-s ujəš n-Təmmənəya n-Mässinäx, äddeew daɣ d-älɣizabät äjjeen.

²³ Älkänisät əmmärän-däx, a däx-s səbdədän inušämän, ədölən-asän Mässinäx, uɣamän təzzar, səɣləfän-tän i-tärna n-Emäli-i s-omänän i-ad-däx-sän äj älbäraka.

²⁴ Əjläyän dərät-a-wen teje ta n-Bəssidi, okäyän s-ta n-Bänfəli,

²⁵ äxtäbän däx-aɣrəm wa n-Birga təzzar ätrarän s-Antalya.

²⁶ Əjjäšan turäft n-aman dihen, jän tamdujt ta n-Intyuš-i-däx dd-ämešälän dərät a-s ässiyläfän imumənän i-ännuɣmät n-Mässinäx.

²⁷ Osän-in ɣas, äsdäwän-dd älkänisät, ad-siɣulän i-imumənän isälan n-a-wa s-tän-ikfa Mässinäx turhajät n-iji-net, d-əmmək wa s-ora Mässinäx emm n-ehän n-immun i-inəzzulam.

† 14:12 14:12 A-wa ismawän n-härät däx-asmel n-imakrašän wi jan käl-Älyunan i-iman-näsän.

28 Ähojän darät-a-wen əzzağan ħur-inəttulab wi n-dihen.

15

Mäjräd wa ikkän jer-imumənän dāğ-isälan n-a-wa iyalläsän

1 Äzzäman-en-dāğ a dd-fälän meddön iyyäð teje ta n-Älyähudəyät, ad-saxren imumənän n-a-s ere wärän ämeläy s-älxadät wa dd-oyya ännäbi Mosa, wär-e ixləs.

2 Ija dār-sän Buləs d-Bärnäbbas tamğənnant täşsoohet təzzar, änmärđän imumənän fäl ad-sukən Buləs d-Bärnäbbas d-härät dāğ-meddön n-älkänisät-näsän Yärussälam i-ad-əjən isälan n-tamğənnant-ta-dāğ i-inəmmušal d-inušämän wi t-əllänen dihen i-ad-hasän-tät-arən.

3 Äsofädän-tän-in imumənän n-älkänisät ta n-Intyuš-i tän-täşmaşälät s-tizarät, räsän teje ta n-Finisya d-ta n-Sämari, siğulän isälan n-əmmək wa s-ätubän inəzzulam† i-Mässinäğ. Ämoos umär wa tän-dd-jän a iknan asəddəwi n-ayətma-sän dāğ-äddin dāğ-idəggan-win-dāğ.

4 Əwwädän-in Yärussälam, täsbärräk-tän älkänisät d-inəmmušal d-inušämän, jän dāğ-sän isälan n-a-wa s-tän-ikfa Mässinäğ turhajät n-iji-net s-ifassän-näsän.

5 Əggädän-dd meddön iyyäð hanen taggayt ta n-käl-faris təglät fäll-tidət n-iman-net, ənnän əflasän a-s ämoos amili d-alkum i-alämär wa n-ännäbi Mosa a ifrađän fäll-inəzzulam i-ad-əjjəšan Təmmənəya n-Mässinäğ.

6 Əzzəmmäğan inəmmušal d-inušämän i-ad-əjrəwän äddäbara dāğ-isälan-wi-dāğ.

7 Təja dāğ-sän taməzağt täşsoohet. Dāğ-a-wen-dāğ, ad-dd-ibdäd Bətrus jere-sän, inna: «Ayətma-ğ, təssanäm a-s äru d-hi-äsnäfranän Mässinäğ jere-wän i-ad-säsläğ inəzzulam isälan n-Älənžil i-ad-amənän s-Mässinäğ.

8 Mässinäğ i issänän a-wa ihän ulh n-ägg-adəm a hasän-imməjrädän, ikf'-en Unfas Şäddijän s-əmmək wa s-hanäğ-t-ikfa näkkäneđ-i n-käl-Älyähud,

9 wär t-illa a-s hanäğ-ažimäzläy dār-sän ed, immun s-Mässinäğ a išşəşdäjän ulhawän-näsän.

10 Şamad tidət a-wen, adiş mafäl tirəməm Mässinäğ, tajjäm fäll-errawän n-inəttulab äzuk s-näkkäneđ wäla abbatän-nänäğ, indär-anäğ älänji-net?

11 Wädden ännuğmät n-Emäli Үisa-i s-nomän, ixläs-anäğ, ənta dağ a-s omänän əntäneđ-dāğ.»

12 Tässosäm tamətte iket-net, äsjädän äddinät darät-a-wen i-Bärnäbbas d-Buləs siğulän isälan n-ijitän n-Mässinäğ wi jän d-härätän wi ässuksäđnen jän jer-inəzzulam.

13 Əssəmdän mäjräd ħas, idkäl-t Yağub, inna: «Ayətma-ğ, säjdät-ahi.

14 Ija dāğ-näğ Simyon Bətrus isälan n-əmmək wa s-dd-äşbaşaj Mässinäğ s-inəzzulam i-ad-dāğ-sän isənnəfrən tamətte təlcamät i-isəm-net ed,

15 ämoos a-wen a änimännakän d-a-wa ənnän ännäbitän ed, iktab a-s, innä Mässinäğ:

16 <Darät-a-wen, ilkam a dd-äqqələğ i-ad-aləsäğ edey n-ehän n-Dawəd-wa ođän, səbdədağ-t-dd dāğ-timşar-net, ädyäğ-t.>

17 A-wen, dāğ-təssəba n-ad-immäğ a-wa t-illän dāğ-äddinät i-Emäli, əmmäğnät-as dağ tiwsaten-ti fäll-itawäğra isəm-in. A-wen, Emäli a tän-innän, erhet-net dağ den-dāğ ənta-i ilän tärna n-iji n-härätän-win-dāğ dağ den-dāğ,

18 wär t-illa dağ a has-idrajan dāğ-a-wen-dāğ, ed issän-t ħur-aläşäl-net.

† 15:3 15:3 — Үur-käl-Älyähud, ere wärän ämoos ägg-Älyähud s-aläşäl meğ ere wärän ilkem i-äddin-näsän, iket-net, änäzzalim a ämoos. A-wen-dāğ a fäl tiwsaten ti iyyäđnen iket-näsnät, ti n-inəzzulam. — Aşäl-i-dāğ, änäzzalim, äkafär (ere wärän issen s-Mässinäğ).

19 Təssəba n-a-wen-däx a fäl hawän-jannex a-s, wär täsmäxatäräm inəzzulam-wi maden-utab s-Mässinäx

20 məšan, nəktəbet-asän təkarde n-tamätert i-ad-əbdəwän d-härät iket-net ädooben asəmmədəs-näsän, əbdəwnet d-älxibadät n-əşšanämän d-əzzəna d-tetäte n-mäxsoy d-tesäse n-aşni.

21 Äduuttät a-s ila ännäbi Mosa däx-əzzurəyatän-ti-däx hakd-däx ti-okäynten äddinät däx-işärman iket-näsän çarränen əlkəttabän-net hak əssəbət-i n-təsonfat däx-ihənan n-äddin.»

22 Änmännakän inəmмуšal d-inušämän d-älkänisät darät-a-wen fäll-ad-sənnəfrənän härät däx-meddən-näsän maden-idaw d-Buləs d-Bärnäbbas s-Intyuş, äsdəwän dər-sän daç Yahudəs wa itawäçren s-isəm Bərsabas d-Sillas, əssin meddən a-wen ätiwäsəmçärnen jer-ayətma-sän däx-äddin.

23 İkfän-tän təkarde əktabän s-ifassän-näsän. Ənnän däx-s:

A-wa näkkəneç inəmмуšal d-inušämän wi n-ayətma-wän däx-äddin. Nəhuul-in ayətma-näx wi s-käla ämoosän inəzzulam hənen Intyuş d-Surya d-Silisi.

24 İjmaç-t äşşək a-s nəşşəwwaş a-s nəslä ass wa käwän-in-jän meddən hanäx-in-falnen wär hin-näşmaşäl, nəssan a-s, ənxäsän iman-nəwän.

25 A-wen-däx a fäl nohär iyyän n-äddäbara iket däx-nänäx i-ad-kəwän-in-nəsuk meddən nəsidaw d-Bärnäbbas d-Buləs-i nəkna tərha ed,

26 ämoosän meddən jänen iman-näsän däx-miši fäl təssəba n-isəm n-Emäli-nänäx YisaÄlmasex.

27 Nəşimaşäl-in daç sər-wän Yəhudəs d-Sillas i-ad-hawän-aləsän asuçəl n-isälan-wi-däx.

28 İssəlməd-anäx Unfas Şəddijän, nərdə daç s-ad-wär nətəjj fälla-wän äçuk wäl' iyyän säl wa ämoosän färəç,

29 a-wen a t-ämoosän, asəxrəm n-tetäte n-takute jat i-əşšanämän, asəxrəm n-tesäse n-aşni d-tetäte n-mäxsoy d-təbəççəwt d-iji n-əzzəna. Afäl tətçäfäm iman-nəwän fäll-härätän-win-däx, ad-təçəm a ähuusken ed, wär mad-içşəd isəm-nəwän dat-äddinät.

Nəhuul-kəwän-in, wässälam!

30 Ärkəbän darät-a-wen, əqqälän Intyuş, äwwayän təkarde-tənnin-däx. Əwwäçän-in ças, äsdəwän-dd älkänisät, əkfän älzəmaçät təkarde,

31 tätwäçra, ämoosän isälan-wi tät-hänen əssəbab n-tedəwit məççoorät.

32 Äsmätär-tän daç Yəhudəs d-Sillas ed ännəbitän a ämoosän s-iməjridän äjjootnen, sasmaçän ulhawän n-imumənän, siçuhun-tän däx-immun-näsän.

33 Ässakäyän härät n-işilan dihen ças, fälän-tän imumənän-wi dd-fälnen Yərussälam däx-älxer, əqqälän älkänisät ta tän-dd-täşmaşälät [

34 məšan, äççima Sillas çara-sän].

35 İzzäç Buləs d-Bärnäbbas däç-Intyuş-en-däç, saçr'-en əntəneç d-iyyäç, xaççäbän s-älxälän äjjootnen isälan n-Emäli.

Təbəççəwt n-Buləs d-Bärnäbbas

36 Härät n-işilan darät-a-wen, innä Buləs i-Bärnäbbas: «Nəççəlet ayətma-näx däç-äddin wi hənen işärman wi däç-nəja isälan n-mäçräd n-Emäli, nəssən əndek əmmək-näsän.»

37 İttär Bärnäbbas a-dər-sän aləs Exya Marçəs tädiwt

38 məšan, wär has-irçə Buləs s-a-wen. Inn'-as, wär-änhäjja a-dər-sän idaw ed, ənta iman-net a hin-içtäsän iman-net dər-sän a-s çara-sän ibçə däç-Bänfəli.

39 Təkkus talça jere-sän har dd-orəw a-wen-däç təbəççəwt-näsän s-iyyät. Äddew Bärnäbbas d-Marçəs darät-a-wen, əjjäşän turäft n-aman, əkkän Qəbrus.

⁴⁰ Ixrä-dd Buləs Sillas s-iman-net, iglä ɗarät a-s t-ässeɣläfän ayətma-s dāɣ-äddin ännuxmät n-Emäli.

⁴¹ Immär Buləs äkall wa n-Surya d-Silisi, isişuhut immun n-älkänisäten dāɣ-idäggan-win-dāɣ iket-näsän.

16

U-Mäsidunya wa ittärän tinahäyen dāɣ-Mässinäɣ

¹ Immär Buləs aɣrəm wa n-Darba d-wa n-Listra, ill'-e dihen-dāɣ a-s änätṭalib iyyän da-dāɣ s-isəm-net Timoti, ma-s tamumənt lan käl-Älyähud mäšan, ti-s, i n-käl-Älyunan,†

² jannen fälla-s imumənän wi n-Listra hakd-dāɣ wi n-Ikanyun a ähuusken.

³ Ixr'-e-hi-dd Buləs s-iman-net i-ad-där-s idaw mäšan, äsmaläy-t təzzar i-ad-wär jarrəwän käl-Älyähud wi t-əllänen dihen a fälla-s ənnän ed, əssanän iket-näsän a-s abba-net, i n-käl-Älyunan.†

⁴ Aɣrəm əmmärän-dāɣ darät-a-wen, ad-dāɣ-s səmmətärän imumənän dāɣ-alkum d-uɗəf n-äddäbaratän-wi hasän-äɣtäsän inəmмуšal d-inušämän dāɣ-Yärussälam.

⁵ Samätarän älkänisäten i-ad-işşuhət immun n-inəṭṭulab, isajat-dd Mässinäɣ hak ašäl äddinät äynaynen dāɣ-älkänisät əkfänen iman-näsän i-Emäli.

⁶ Ijläy Buləs d-imidiwän-net Frižya d-teje ta n-Gälasya mäšan, wär hasän-irɗa Unfas Šäddijän jan isälan dāɣ-äkall wa n-Azya,

⁷ əwwäɗän-dd Masi, əttärän ad-əkkən Bətni mäšan, igdal-asän dāɣ Unfas n-Ŷisa s-a-wen,

⁸ əjläyän Masi, äzzubben dāɣ-Tärwas.

⁹ Əllan-t dihen-dāɣ a-s əhhurjät Buləs u-Masidunya iyyän t-iɣarrän, ibdad, iddal Mässinäɣ, ijann'-as: «Ya Mässinäɣ! Šəmmişəl-dd sār-nāɣ ere hanāɣ-ohāɣän tinahäyen, nāɣləs.»

¹⁰ Nəfhäm s-a-wen-dāɣ dd-änfalälän i-Buləs, a-s irha fälla-nāɣ Mässinäɣ ad-nəsəllənžət teje-ten-dāɣ, ad-nətammāɣ ya i-əmmək s-nəkka Masidunya. Ŷur-dihendāɣ ad-tän-dd-əjjäšāɣ, ohärāɣ d-Buləs asikəl näkk-i iktābän isälan-wi-dāɣ.

¹¹ Nəjjäš turäft n-aman dāɣ-Tärwas, nəja s-iiyät tamdujt ta n-Somättras, äffäw nəkka Näyyabolis;

¹² nəfäl dihen, nəkka aɣrəm wa n-Fəlibb-i s-ənta a itammär ere dd-ijjāšän Masidunya s-tizarät, ämoos dāɣ aɣrəm fäll-ixkam Roma, nässakāy härät n-işilan dihen.

Ija Buləs isälan n-älxer dāɣ-tayrəmt ta n-Fəlibb

¹³ Ašäl wa n-əssəbət-i n-täsonfat, nəzjār aɣrəm, nəkka asälim n-əjärew ed, norda s-ad-dāɣ-s nəjrəw edägg iştärän dāɣ-nədäl Mässinäɣ, nogāz-in dihen tiɗeɗen äžziimmāɣnen, nāqqima ad-hasnät-nətajj isälan.

¹⁴ Täsjad-anāɣ tiyyät dāɣ-snät n-tämaksədt n-Mässinäɣ s-isəm-net Lidya, tumaməlat n-aɣrəm wa n-Təyatir hin-žänšet məşär wa n-nefran n-ini šäggāɣän. Orä Emäli ulh-net, tomän s-a-wa has-ijänna Buləs,

¹⁵ tätwäsälmāɣ dāɣ-aman ənta d-käl-ehän-net. Tənnä i-Buləs d-imidiwän-net darät-a-wen: «Kunta təflasäm a-s tamumənt n-Emäli a ämoosāɣ, məjurətät-ahi». Laqqäd-anāɣ har hanāɣ-täşhäşşäl s-a-wen.

† 16:1 16:1 Itawann'-asän: Gəriktän. (Les Grecs dāɣ-Təfränsit). Əzzaɣän Erobbä dāɣ-äkall wa itawänna: Gəris (La Grèce dāɣ-Təfränsit). Tawalt-näsän: Tälyunanit. † 16:3 16:3 Gərik (Grec) dāɣ-Təfränsit.

16 Noläs day nəkka edägg n-tittar a-s hanäx-dd-təlkäd tänaxdimt tiyyät ih' alšin iknan tälläbäst, tämoos i-məssaw-s əssəbab n-ərrəzäx ed, itiləxut alšin wa tät-ihän a-wa ilkämän, təzzälän-as äddinät.

17 Tənhäy-anäx ɣas, təltäx-anäx, e-s nəkka-däx täseɣärät ɖara-näx, janna: «Ya äddinät, əlmədät a-s meddən-wi-däx hannäyäm, eklan n-Mässinäx wa iknän aɖkul, isälan n-tabarät ta n-əlyəllas a-s dd-osän i-ad-tän-əjən.»

18 Təj'-anäx alkum-wen-däx har ja isilan, təglä fəw har täsxäf Buləs; ämlälläy-dd sär-s, äsmähäd fäll-alšin wa tät-ihän, inn'-as: «Omaräx-käy s-isəm n-Ÿisa Älmasex, əsjär-tät!» Izjär-tät alšin ässaɣät-wen-däx.

19 Ənhäyän məssaw-s a-s taklit-näsän äbas-hasän-dd-saxsal ehäre ɣas, ärmäsän Buləs d-Sillas, əlwäyän-tän s-eyäryär wa n-tamxənnant s-itawänna Larofaž däx-itamär äššäreɣa, əssəbdädän-tän dat-älqallitän,

20 əssəknän-tän ɖarät-a-wen day i-käl-äššäreɣa wi n-Roma, ənnän-asän: «Meddən-i n-käl-Älyähud hannäyäm, wär dd-äwweyän a säl äɖɖärora s-axrəm-nänäx,

21 sasäxren äddinät älyadatän s-näkkäneɖ-i n-käl-Roma wär hanäx-t-illa uɖəf-näsän wäla alkum-hasän.»

22 Təsla tamətte i-a-wen ɣas, təzzän sär-sän. Ənnän käl-äššäreɣa, ətwəkkəsnet isəlsa däx-Buləs d-Sillas, ättäwätnet.

23 Əknän-tän asəsnan təzzar, järän-tän-in däx-takärmüt däx-a-s ənnan i-əssärdusa ad-hasän-əknən iji n-ənniyät.

24 Ätwännä a-wen i-emännähäd n-takärmüt ɣas, ija däx-sän tišəm, ij'-en däx-səllul.

25 Ebre n-ammäs n-ehäd, irmäs Buləs d-Sillas äsahäx n-təmmal i-Mässinäx, äsijädän-asän käl-takärmüt wi iyyäɖnen.

26 A əndärrän-däx äškäɖkäd-dd äkall daw-sän s-äššahät här äsnähäynähäy issas n-takärmüt, ämerän isäɣfal n-takärmüt iket-däx-näsän ässaɣät-wen-däx, ämeränät day tišəm-näsän.

27 Inkär-dd emännähäd n-takärmüt däx-eɖəs, inhäy tishar n-takärmüt ämeränät ɣas, ilbäy-dd takoba-net i-ad-sär-s idəj iman-net ed, äyel käl-takärmüt wi iyläf, əjmäɖän.

28 Mäšan, äsxärät-as Buləs s-afälla, inn'-as: «Ahaa! Wär jed a-di, nəll'-e diha iket-nänäx.»

29 Irmäs-dd emännähäd n-takärmüt emämmäl n-efew s-inhäy data-s, ošäl-dd, irkäy dat-Buləs d-Sillas äšikäɖkäd,

30 ikkäs-tän-dd däx-ammäs n-takärmüt təzzar, inn'-asän: «Meddən, ma s-leɣ s-ad-t-äjjäx i-ad-äɣləsəx?»

31 Ənnän-as: «Amən käyy d-əjadäš-näk s-Emäli Ÿisa, ad-täɣləsäm.»

32 Äxtäbän-as mäjräd n-Emäli ənta d-käl-ehän-net älwäqq-wen-däx.

33 Ilwäy-tän däx-täkkäwält n-ehäd-en-däx s-ehän-net, issəfär ibuyəsän-näsän, ätwäsälmaɣ däx-aman ɖarät-a-wen ənta hakd käl-ehän-net iket-näsän.

34 Äsmäjarät-tän däx-a-s ikna tedäwit ənta d-käl-ehän-net n-a-wa s-omänän iket-näsän s-Mässinäx.

35 Äffaw ɣas, äšmašälän-dd käl-äššäreɣa meddən s-emännähäd n-takärmüt i-ad-hin-isəwwəy Buləs d-Sillas.

36 Ija däx-sän emännähäd isälan n-a-wa ənnän käl-äššäreɣa mäšan,

37 inn'-as Buləs: «Fəw, šamad jän däx-näx tiwit dat-tamətte, a-s ija a-wen, wär nätwäšräx, näkkäneɖ-i äɖɖinnen fäll-Roma, järän-anäx-in däx-takärmüt s-əmmək-wa-däx, ämära ärhan ad-hin-nətwəyy däx-ufär, wär närɖa s-a-wen, asənet-dd əntänəɖ iman-näsän, səwwəyyən-anäx-in.»

³⁸ Ǝqqälän meddän-wi dd-ämešälne, ässoğälän isälan n-a-wa inna Buləs i-imännähäđän. Ǝslän i-isälan n-a-s Buləs d-Sillas äđđinän fäll-Roma ɣas, ärmäğän.

³⁹ Osän-tän-dd ɗarät-a-wen ɔntäneđ iman-näsän, ɔttärän tenäšše dăğ-Buləs d-Sillas, ɔkkəsän-tän-dd dăğ-takärmüt dăğ-a-s dăğ-sän ɔttärän ad-ɔfələn aɣrəm-näsän.

⁴⁰ Ǝzjārän-dd takärmüt ɣas, ɔkkän ehän wa n-Lidya, ad-samätarän dihen ayətmasän dăğ-äddin d-alkum i-Mässinäğ tɔzzar, ɔglän.

17

Buləs d-Sillas dăğ-aɣrəm wa n-Täslonika

¹ Ǝjläyän Änfibbolis d-Abuləbbis, osän-dd Täslonika ɣas, ijjäš Buləs ehän n-äddin wa n-käl-Älyähud

² ed a-wen-dăğ a-s izzay ad-t-äj. Ija dihen kərađ ɔssəbətän itidwənnit d-käl-Älyähud dăğ-isälan n-a-wa ɔnnän ɔlkəttabän n-Mässinäğ.

³ Itafässar-asän-tän, isatbat-asän a-s iktab dăğ-sän a-s Älmaseɣ, ilzam-t ad-inhöy tersəmmawen, ämmät tɔzzar, inkär-dd jer-inəmmuttan. Ijann'-asän dăğ a-s Ǝisa-wa hasän-ixatğab a-s Älmaseɣ.

⁴ Ǝkkäsän iyyäđ dăğ-sän äššäk dăğ-a-wa hasän-ijanna, ɔlkämän-asän dăğ käl-Älyunan† äjjootnen äddinnen d-tiđeđen äjjootnen lanen isəm dăğ-aɣrəm.

⁵ Mäšan, ɔsämän fälla-sän käl-Älyähud, ɔglän, äsdāwän-dd härät dăğ-erk äddinät, äsmädärwäyän aɣrəm tɔzzar, ɔkkän ehän wa n-Yazun, ɔmmağän i-Buləs d-Sillas i-ad-tän-səbdədən dat-tamətte, tɔšräğ-tän.

⁶ Wär tän-in-ogeğän dihen ɣas, ɔđän fäll-Yazun iman-net, äšräwräwän-t ɔnta d-imumənän iyyäđ, ɔssəbdədən-tän dat-imännähäđän n-aɣrəm, ad-tän-sawarän käl-Älyähud uđlem, jannen: «Äddinät-wi-dăğ, äkall iket-net a äsnäxänbälän siha d-siha tɔzzar, ɔwwäđän-anäğ-dd ämära,

⁷ ɔntäneđ-da-dăğ äsmäjarät Yazun, ad-tajğän härätän ɔšlaynen i-a-wa innä ämänokal wa mäqqārän ed, jannen ill'-e ämänokal säl Qäyşär s-isəm-net Ǝisa.»

⁸ Wär-əjreğän isälan-wi-dăğ i-tamətte wäla i-imännähäđän n-aɣrəm,

⁹ äğtäsän i-Yazun d-imumənän wi iyyäđnen äddäyyät s-lan s-ad-t-ɔzələn i-ɔlxəkum tɔzzar, ɔtwəyyən-in.

Buləs d-Sillas dăğ-aɣrəm wa n-Biri

¹⁰ Ǝnhäyän imumənän tukəse n-talya-ta-dăğ ɣas, ɔssəjmäđän Buləs d-Sillas ehäđ-wen-dăğ, ässokän-tän aɣrəm wa n-Biri. Ǝwwäđän-in dihen ɣas, ɔkkän ehän n-äddin wa n-käl-Älyähud.

¹¹ Ǝssəknän-tän käl-aɣrəm wa n-Biri tärha tojərät ta n-käl-Täslonika, ed ɔntäneđ, ɔslän i-mäjräd n-Mässinäğ ɣas, ɔmänän sār-s šik, ad-ğarrän hak asäl ɔlkəttabän, tassänän a-wa hasän-itawännen tidət meğ.

¹² Ǝmänän dăğ-sän äddinät äjjootnen hanät tiđeđen äjjootnen n-Tälyunaniten lanen isəm d-meddän dăğ äjjootnen.

¹³ Ǝslän käl-Älyähud wi n-Täslonika a-s itajğ Buləs isälan n-mäjräd n-Mässinäğ dăğ-Biri ɣas, ɔlkämän-as-dd, ad-tattärän dăğ asənkär n-tamətte fälla-s ɔnta d-imidiwän-net;

¹⁴ ɔssəglän imumənän Buləs ɗarät-a-wen dăğ-armuđ, ɔssəjmäđän-t aɣrəm s-ašrut wa n-əjärew mäšan, äqqimä-dd ɣur-sän Sillas d-Timoti.

† 17:4 17:4 Itawann'-asän: Gərıktän. (Les Grecs dăğ-Təfränsit). Ǝzɣayän Erobbä dăğ-äkall wa itawänna: Gəris (La Grèce dăğ-Təfränsit). Tawalt-näsän: Tälyunanit.

15 Äddewän meddēn wi hin-äsofädnen Bulēs har hin-əwwädän aḡrēm wa n-Atinya tēzzar, ənnädän-dd, ässawäy-tän Bulēs ämašal i-ad-has-dd-ilkēm Sillas d-Timoti dāḡ-armuḡ.

Bulēs, dāḡ-aḡrēm wa n-Atinya

16 Isimäqqul-asän Bulēs dāḡ-Atinya dihen-dāḡ a-s inxäs a-wa ihannäy iman-net fäl əjut-i-dāḡ jän äššänämän dāḡ-aḡrēm-en-dāḡ.

17 Iglä, ädwännät d-käl-Älyähud dāḡ-ehän n-äddin-näsän, ad-itidwənnit daḡ hak ašäl d-inaybadän n-Mässinäḡ wi hānen eḡäryär wa n-tamḡənnant s-itawänna Larofaž.

18 Ädwännēn dār-s dihen käl-fälšäfa wi s-itawänna käl-Ibbikur d-iyyəḡ s-itawänna käl-Stoyis. Jannen dāḡ-sän iyyäḡ: «Ak i n-ilēs šejren-wa, ma ijanna?» Jannen wi iyyädnen: «A-wa mēssaw-näḡ iyyäḡ fäll-wär nēssen əzzaḡnen išənnawän a-s hanäḡ-ixatḡäb isālan-näsän.» Jannen a-wen fäl-a-s ij'-asän Bulēs isālan n-älxer n-ḡisa d-isālan n-tanäkra jer-inəmmuttan.

19 Ärmäsän Bulēs ḡarät-a-wen, əlwäyän-t s-Larofaž, ənnän-as. «Säsəl-anäḡ ya ämära isālan n-teḡäre ta täynayät dār-hanäḡ-dd-tosed

20 fäl-a-s käyy, tikunen ti s-hanäḡ-säsled, wär kälä hasnät-nəsla dāḡ-äddunya, fässär-anäḡ älmäḡna-näsnät.»

21 Äzzāman-en, käl-Atinya hakd-dāḡ imäjarän-näsän, wär t-illa ere s-wädden issan a-s wär-oren timəzzujen ar dāḡ-umaḡ n-isālan d-iji-näsän.

22 Ibdäd-dd Bulēs dāḡ-ämmas n-Larofaž, eḡäryär wa n-tamḡənnant, innä: «Ya käl-Atinya, dāḡ-a-wa hannäyāḡ, ijmaḡ-t äššäk a-s tējlayäm hullan dāḡ-äddin wa häm,

23 əssäḡläyāḡ-dd dāḡ-aḡrēm-nāwän, əkney əzəjjəzz n-idäḡgan n-älḡibadät-nāwän, əgleḡ fäw har oḡeḡ fäll-edäḡg n-tikutawen-nāwän fäll-iktäb:

⟨I-Ämakraš wa wär nəzzey⟩.

Əlmədät ašäl-i, a-s Wa ḡabbädäm wär t-təzzeyäm a-wa hawän-ija älzähälät, ənta a-s hawän-tajjāḡ isālan-net.

24 Mässinäḡ-i dd-ixläkän äddunya d-a-wa tät-ihän iket-net, ənta-i n-Emäli n-išənnawän d-äkall, wär-itəzzāḡ ehän dayän ifassän-n-ägg-adəm,

25 wär-ämḡatär s-tadhəlt n-ifassän n-ägg-adəm wälä s-härät wäl' iyyän ed, ənta a ihakkän e d t-illäm ägg-adəm tämudre, ənta daḡ a ihakkän unfas d-tämudre i-härät iket-net.

26 Ənta a dd-ixläkän ähalēs-wa dd-äshäyāwän e d t-illäm ägg-adəm iwarän ärori n-äkall, ənta a ixtäsän täkost n-ikallän wi tazžāḡän, ənta daḡ a hanäḡ-dd ijän äzzāmanän.

27 A-wen, ij'-e Mässinäḡ i-ad-has-əmmäḡän äddinät kud-dāḡ s-ekälelaf i-ad-t-əjrəwän ed, ijmaḡ-t äššäk a-s Mässinäḡ, wär hanäḡ-ihä i ujəj.

28 Ənta a hanäḡ-ikfän tämudre d-emäremar d-tumast. Mäjräd-wen-dāḡ, täsdättät täsawit-nāwän ta tənnät:

⟨Noläh dār-s ed nämoos arātän-net.⟩

29 ḡas, šämäd nämoos arātän-net, adiš təläš fälla-näḡ torda n-a-s Mässinäḡ äniḡäqqa d-a ämoosän oräḡ meḡ azrəf meḡ tähünt meḡ äḡḡäšwer dd-izjarän tähore wälä tayətte n-ägg-adəm.

30 Əlmədät a-s Mässinäḡ, iwətyan-wi ässakäyän äddinät dāḡ-älzähälät, wär tän-ixseb fäll-errawän-näsän, a-wen-dāḡ a fäl ämära, omar i-e d t-illäm ägg-adəm dāḡ-e d-t-illäm edäḡg s-ad-utab

31 fäl-a-s ässiibdäd ašäl dāḡ-mad-išräḡ äddunya-ta-dāḡ s-ähalēs-wa äsnäfrän tat-madän-išräḡ s-iqqud. A-wen, issətbät-t Mässinäḡ i-tamətte iket-net s-əmmək wa s-dd-issenkär ḡisa jer-inəmmuttan.»

³² Təslä tamətte i-isälan n-tanäkra jer-inəmmuttan ɣas, jän-t iyyäð tekäškäšt, ənnän-as iyyäð: «Egləw, təqqələd-anəɣ-dd ašäl iyyän säl wa i-ad-naləs əsjəd i-isälan-wi-däɣ.»

³³ Ifäl Buləs jere-sän əlwäqq-wen-däɣ məšan, əlkämän-as iyyäð omänneren s-a-wa innä.

³⁴ Äddinät-en, ih'-en Denis wa ijän ənniyät i-Larofaž d-tamäðt tiyyät s-isəm-net Dəmaris d-iyyäð daɣ säl-win-däɣ.

18

Akilas d-Briska

¹ Ifäl Buləs Atinya ɗarät-a-wen, ikkä aɣrəm wa n-Kurənta.

² Ämmoqqäs dihen d-əgg-Älyähud n-əkall wa n-Fon s-isəm-net Akilas. Iket-dd ifäl İtali ənta d-hänne-s s-isəm-net Briska fäl-a-s əzziizjər-dd əmänokal n-əkall Kələd aləmər däɣ-iktab a-s, əzjərnet käl-Älyähud iket-näsän Roma.

³ Ämedəw Buləs d-Akilas ed oharän əlxidmət wa n-iji n-ihəktan.

Buləs d-Sillas, däɣ-aɣrəm wa n-Kurənta

⁴ Hak əssəbət-i n-təsonfat, isatbat Buləs isälan i-äddinät däɣ-ehän n-äddin i-käl-Älyähud hakd-däɣ käl-Älyunan.†

⁵ İwwäð-dd Sillas d-Timoti Buləs, falän-dd Masidunya ɣas, oyyä iji n-ihəktan, ikfä iman-net axətab n-məjräd n-Mässinəɣ, itajəyha i-käl-Älyähud a-s ɣisa a-s Älmasex.

⁶ Äšməšəkken a-wa hasän-ijanna, ad-sikuforän. İbbəkbək Buləs isəlsa-net, inn'-asän: «Eɗmanän däɣ-wän iman-nəwän, əbas däɣ-i əɗmanän, əməra, inəzzulam a-s e-ənnädäɣ, əjəɣ-asän isälan.»

⁷ Ifäl Buləs dihen, ikk' ehän n-əhaləs s-isəm-net Titus İstus, ənaɣbad n-Mässinəɣ s-ənimältaɣ ehän-net d-wa n-äddin.

⁸ Däɣ-a-wen-däɣ, ad-omän Krisbus wa n-əlfəqqi n-ehän n-äddin s-Emäli ənta hakd d-əjadəš-net d-käl-Kurənta əjjootnen əsijädnen i-Buləs; omänän, ad-titwəsəlmixän däɣ-aman.

⁹ Ehäð iyyän, ənfaläl-dd Emäli i-Buləs, inn'-as: «Buləs, wär käy-isərməɣet härät, məjräd, wär təssosämäd,

¹⁰ əlleɣ-t edes-hak, ədhaləɣ-käy, wär t-illa ere hak madän-iɣšəd härät fäl-a-s ley tamətte təjjeet s-ərheɣ ad-tät-əɣləsəɣ däɣ-aɣrəm-wa-däɣ.»

¹¹ İzzəɣ Buləs dihen har ija awätay d-səðis orän, isayra äddinät məjräd n-Mässinəɣ.

¹² Äzzäman wa d-əmoos Galyon gəfar n-Akaya, ənmännakän käl-Älyähud fäll-Buləs, əyrän-t s-əlqallitän i-ad-t-əšräɣän.

¹³ Äswärän-t udlem dat-gəfär, ənnän-as: «Əhaləs-i, isayra äddinät əlyibadät n-Mässinəɣ s-əlyadät əniməšrayän i-a-wa innä aləmər.»

¹⁴ İttär Buləs ad-arr emm-net i-ad-əmməjräd ɣas, innä Galyon i-käl-Älyähud: «Ənnär anməšri i-əššərəɣa meɣ erk əmašal a fäl hi-dd-təkkäm i-ad-hawän-arəɣ əššərəɣa-net, əjəɣ-awän-t

¹⁵ məšan, šamad a-wa tamədəšt jat fall-tijəttewen n-teɣərə-nəwän d-ismawän wi əktäbnen däɣ-aləmər-nəwän, wär-ərheɣ ad-umasəɣ əlqall-i-nəwän däɣ-isälan-win-däɣ, əšräɣät-tän käwəneð iman-nəwän.»

¹⁶ Äsfäl-tän Galyon ehän wa n-əššərəɣa ɗarät-a-wen.

† 18:4 18:4 Itawann'-asän: Gəriktän. (Les Grecs däɣ-Təfränsit). Əzzaɣän Erobbə däɣ-əkall wa itawänna: Gəris (La Grèce däɣ-Təfränsit). Tawalt-näsän: Tälyunanit.

¹⁷ Təzzän tamətte iket-net s-Sustin wa n-älfäqqi n-ehän n-äddin, ad-t-təggatän dat-älqallitän mäšan, wär t-illa a hasän-inna Galyon wa n-gəfär.

¹⁸ Ähoja Buləs däx-Kurənta təzzar, ässälläm fäll-imumənän, əkfän-t turäft n-aman ijjäš s-äkall wa n-Surya, igla, äddew d-Briska d-Akilas. Əwwädän-in aɣrəm wa n-Sänkərya ɣas, ästäbälbäl Buləs i-ad-umas a-wen a ässitbätän ärkäwäl wa ijjäš.

¹⁹ Osän-dd aɣrəm wa n-Ifäsus ɣas, ibda dār-sän Buləs, ijjäš ehän n-äddin, ad-itidwənnit d-käl-Älyähud.

²⁰ Ettärän däx-s ad-ɣur-sän ähaj

²¹ mäšan, wär hasän-irda s-a-wen ed, inn'-asän: «Kunta otäs Mässinäx a-wen, ilkam ad-käwän-dd-äqqələx.» Ifäl-tän, ijjäš turäft n-aman,

²² äzzubbät däx-Qäyşara ɗarät-a-wen. Ijjäš aɣrəm, ässälläm fäll-älkänisät təzzar, okäy s-Intyuš.

²³ Ija härät n-işilan dihen ɣas, ijläy s-teje ta n-Gälasya d-ta n-Frižya. Edägg immär-däx, ad-däx-s isəmmətär inəttulab i-ad-isəşşuhət immun-näsän.

Isälan n-Äbbäloš

²⁴ A-s itäjj a-wen-däx, aɣrəm wa n-Ifäsus, ih'-e ähaləs n-ägg-Älyähud il' aɣrəm wa n-Iskändərya s-isəm-net Äbbäloš. Äɣalim iknan musnät n-mäjräd a ämoos, ikna daɣ teɣäre n-a-wa ənnän əlkəttabän.

²⁵ Han-t isälan n-tabarät n-Emäli, ijlay hullan däx-a-wa iha, itamäjräd, isaɣra s-älmäxna oɣadän isälan n-Ŷisa däx-a-s wär t-təha tijya ar ta n-asəlmaɣ däx-aman wa n-Exya.

²⁶ Təsl'-as Briska d-Akilas a-s ixtäb s-tihusay däx-ehän n-äddin wa n-Ifäsus ɣas, aɣrən-t-dd s-iman-näsän, ad-t-sasaɣadän, tafässarän-as tabarät n-Mässinäx.

²⁷ Äsdärhän Äbbäloš ɗarät-a-wen tikawt n-äkall wa n-Akaya, ədhälän-t imumənän däx-derhan-net wen-däx, əkfän-t täkarde i-inəttulab wi n-äkall-en i-ad-t-səbbärrəkän afäl tän-in-iwwäd. Iwwäd-in ɣas, ämoos tadhəlt mäqqoorät i-äddinät-wi omännən s-ännuymät n-Mässinäx.

²⁸ Isibəggut s-tayətte käl-Älyähud dat-tamətte, isasäjräh-tän a-s Ŷisa a-s Älmasex.

19

Ijjäš Buləs aɣrəm wa n-Ifäsus

¹ Äzzäman-wen-däx d-iha Äbbäloš Kurənta, ad-ijläy Buləs ejärew s-afälla n-äkall, ikka Ifäsus. Ijräw dihen härät däx-inəttulab,

² inn'-asän: «Ak käwəneɗ, a-s tomänäm, təjräwäm Unfas Šäddijän?» Ənnän-as: «Wär käla nəslä fäw a-s t-illa a-s itawänna Unfas Šäddijän.»

³ Inn'-asän: «Adiš ma ämoos asəlmaɣ wa hawän-ätwäjjän?» Ənnän-as: «Asəlmaɣ wa n-Exya.»

⁴ Inn'-asän Buləs: «Exya, issəlmäx tamətte däx-aman i-ad-umas a-wen ašämol n-tätubt-näsän mäšan, illäxät i-äddinät a-s ilkam iyyän wär-ämoos, a-wen a t-ämoosän Ŷisa, ənta-en-däx a-s lan äddinät ad-sär-s amənän.»

⁵ Əslän meddən-en i-mäjräd-wen-däx ɣas, əttärän ad-ətwəsəlmäxän däx-aman s-isəm n-Emäli Ŷisa.

⁶ Äswär-tän Buləs ɗarät-a-wen ifassän-net, äzzubbät-dd Unfas Šäddijän fälla-sän, ad-tamäjrädän tawalen äynaynen, tamajradän däx-isälan n-Mässinäx.

⁷ Meddən-en, märaw-essän d-əssin.

⁸ Itakk Buləs ehän n-äddin wa n-käl-Älyähud, ixattäb däx-s tidət s-əşşahät har ässakäy dihen käraɗ orän, itidwənnit d-äddinät, isatbat-asän isälan wi n-Təmmənəya n-Mässinäx.

⁹ Mășan, äşyarän iyyäd däx-sän ulhawän-näsän, unjäyän omänän s-a-wa ijanna, eglän fäw har jannen a läbasän fäll-tabarät-ta-däx s-itäj Buləs isälan-net dat-tamətte. Ikkäs-dd Buləs iman-net däx-sän, ad-isayra hak ašäl inəṭṭulab däx-läkkol n-äddin ora ähaləs s-isəm-net Tiranus.

¹⁰ Iśl'e a-wen-däx dihen har əssin iwətyan, əmmək-wen-däx a-s əslän käl-Azya iket-näsän i-mäjräd n-Emäli jer-wi n-käl-Älyähud-näsän hakd-däx wi n-käl-Älyunan.†

¹¹ Itajj Mässinäx s-ifassän n-Buləs tikunen äjjootnen, äqqannen eḡäf,

¹² tišələn-dd äddinät sär-s, tazäwen imälsan d-ikäršäyän t-ḡasnen, sänsen-tän fäll-imarhinän, tazäyän, zäjjarän daḡ alšinän iməlšan.

¹³ Eḡgädän-dd imässäxärän n-käl-Älyähud takkānen jer-ikallän, ad-ḡarrän entäneḡ-däx fäll-iməlšan isəm n-Emäli Ḡisa-wa ixatṭāb Buləs.

¹⁴ Meddən-wi išla a-wen-däx, əssa-essän, abba-näsän u-tikutawen s-isəm-net Žibba.

¹⁵ E-d əttärän teḡäre n-isəm n-Ḡisa fäll-iməlšan, ad-hasän-änn alšin: «Näkk ya əzzaḡäḡ Ḡisa, əssanäḡ daḡ a-wa ämoos Buləs-i t-ixatṭābän məšan käwāneḡ, mi tämoosäm?»

¹⁶ Oḡa fälla-sän amälšon iyyän, iknäs-tän ed irn'-en äššahät, ikn'-en asəlmaḡ hundäḡ har a-s əzjārän ehän-en-däx, əzzafän, šarän.

¹⁷ Eslän käl-Älyähud hakd käl-Älyunan-wi hänen Ifäsus i-isälan-en-däx ḡas, ärmäḡän ad-samḡarän isəm n-Emäli Ḡisa.

¹⁸ A dd-tišən äddinät äjjootnen omannen s-Mässinäx, safäkkarän-dd terk timašalen-näsän.

¹⁹ Äwwäyän-dd imässäxärän äjjootnen əlkəttabän-näsän, ad-tän-sarḡen dat-tamətte iket-net, äḡkädän älqim n-a-wen-däx irḡän, osän-t, iwwäḡ səmmosät timərwen n-efäḡ n-ärriyal n-azrəf.

²⁰ Emmək-wen-däx a-s təntäm tärna n-Mässinäx d-äššahät n-mäjräd n-Emäli däx-ulhawän n-äddinät, ad-nattäjän daḡ isälan-net.

²¹ Ijjäš-dd ḡarät-a-wen ənniyät n-Buləs tärha n-ad-ijləy Masidunya d-Akaya, äkk Yärussälam, ijanna däx-iman-net a-s afäl-hin-iwwäḡ dihen, ad-ittär əmmək s-ikka Roma.

²² Äšmašäl Timoti d-Errast wi n-imadhalän-net s-Masidunya, ija ənta äzzäman däx-Azya.

Azwi n-iji n-isälan däx-Ifäsus

²³ Äzzäman-en-däx ad-təja tamdərwayt mäqqoorät fäl төssəba n-tabarät n-Emäli-ta isayra Buləs.

²⁴ Iḡgäd-dd enhäḡ iyyän s-isəm-net Dimitrus, ikanna äṭṭäşwerän n-azrəf fäll-äššiwwwär idəm n-temälit tiyyät s-isəm-net Artamis, ämoos a-wen a ih' älfäyda mäqqoorän i-inhäḡän ed, itiirəw-dd sär-sän ehäre n-tikunen.

²⁵ Äsdäw-dd inhäḡän-wi dār-ohär älxidmät, inn'-asän: «Meddən, nəhläk, төssanäm a-s älxidmät-nänäḡ, a-s terše-nänäḡ, wädden hannäyäm, salläm daḡ däx-Ifäsus hakd-däx däx-Azya iket-net a-s Buləs-wa-hi,

²⁶ äsmättäy tamətte täjjeet ed edäḡg osa-däx, ad-däx-s änn a-s: «Imakrašän wi nəkann s-ifassän-nänäḡ, mälayäḡna ḡas.»

²⁷ Ämoos-anäḡ a-wa t-išlän säbexas, ämoos-t daḡ i-ehän n-ämudd wa n-Artamis fäl-a-s išwar äba s-tät-ässimḡarän äddinät wi tät-ḡabbädnen däx-Ifäsus d-ikallän n-äddunya wi iyyädnen.»

²⁸ Eslän i-a-wen ḡas, ijjäš-tän aḡkär, ad-saḡären däx-išənnawän, jannen: «Artamis ta n käl-Ifäsus, ənta a-s mässa-näḡ ta tojärät däx-išənnawän d-äkall.»

† 19:10 19:10 Itawann'-asän: Gəriktän. (Les Grecs däx-Təfränsit). Əzzaḡän Erobbä däx-äkall wa itawänna: Gəris (La Grèce däx-Təfränsit). Tawalt-näsän: Tälyunanit.

²⁹ Ämdärwäy aḡrəm iket-net, ad-dd-tidaw tamötte s-ehän wa n-äddäl d-ižəjraz. Təzzän tamötte s-Gayəs d-Aristarəq wi n-Masidunya n-imidiwän n-Buləs dār-ohär asikəl, əlwäyän-tän.

³⁰ Ittär Buləs ənta-däḡ ad-äkk ehän wa n-äddäl d-ižəjraz mäšan, əgdalän-as inəttulab s-a-wen,

³¹ äsmätärän-t daḡ imizärän n-Azya n-imidiwän-net t-əllanən dihen-däḡ d-ad-wär-ikka ehän-en.

³² A-s itäj a-wen-däḡ, täseḡärät tamötte däḡ-išənnawän, ämidärwäy a-wen-däḡ iket-net s-iḡäran, wär t-illa-i s-olähän iḡäran-net d-wi n-amidi-net, fäl-a-s təššəm n-tamötte-ten-däḡ, wär təssen wäla-däḡ äddälil n-tamdərwayt-ta-däḡ təjät.

³³ Əmhälän-dd käl-Älyähud ähaləs s-isəm-net Älxadəer i-ad-iməl dat-tamötte, jän-as isälän n-a-wa ijän, ästafäy-asän i-ad-hasän-ämmäjräd

³⁴ mäšan, təlmäd tamötte a-s i n-käl-Älyähud ḡas, ad-saḡären, jannen: «Artamis ta n-käl-Ifäsus, ənta a-s mässa-näḡ ta tojärät däḡ-išənnawän d-äkall.» Täseḡäyya tamötte s-əmmək-wen-däḡ hundäḡ har okäyän əssin ässaḡätän.

³⁵ Iggäd-dd älmer n-aḡrəm wa n-Ifäsus, ad-isasmaḡ tamötte, ijann'-as: «Ya käl-Ifäsus, mi wärän issen däḡ-äddunya a-s näkkäneḡ-i-däḡ n-Ifäsus a iḡlafän ehän wa-däḡ titwäḡbid Artamis ta tojärät, ənta d-tele-net ta täššiwwärät däḡ-tähunt ta dd-täträkket däḡ-išənnawän?

³⁶ ḡas, šamad a-wen, wär t-ih' äššäk, adiš, sänsät ənniyät-näwän, wär täjjät a išlayän,

³⁷ meddən-wi dd-täwwäyäm, wär-äskafärän, wär-ənnen daḡ a läbasän fäll-mässa-näḡ,

³⁸ kunta äḡšadän a läbasän i-Dimitrus d-imidiwän-net, adiš, əqqəlnet i-išilan wi däḡ-itayätäs äššäreḡa ed, əllan-t älqallitän i-a-wen, əškəwnet sār-sän;

³⁹ kunta daḡ täsiwäram-tän uḡlem säl wen-däḡ, ad-itwäḡtəs äššäreḡa-net däḡ-älžämaḡät wa ilän s-a-wen.

⁴⁰ Afäl wär nəlkem i-äddäbara-wen-däḡ, ad-hanäḡ-isəwär əlxəkum uḡlem ed ažəmmäḡ-nänäḡ ämära-däḡ, wär-ila äddälil.»

⁴¹ Innä älmer a-wen ḡas, innä i-tamötte, ad-tämmähäš.

20

Asikəl n-Buləs s-Masidunya d-Älyuna

¹ Tokäy tamdərwayt, sämmiḡ tanfust ḡas, issäḡrä-dd Buləs inəttulab, ad-tän-isamätar, isasmaḡ ulhawän-näsän, issəlläm fälla-sän ḡarät-a-wen, ikkä teje ta n-Masidunya.

² Issäḡläy-dd däḡ-s iket-net, isamätar imumənän. Ifäl dihen, ikk' äkall wa n-Älyuna,[†]

³ ässakäy dihen, kərəḡ orän; älwäqq wa d-itəffal äkall-en, äkk wa n-Surya, əjjäšan-t isälän n-tayḡärt ta s-ärhän käl-Älyähud ad-has-tät-əjən ḡas, oläs uḡəl n-teje ta n-Masidunya,

⁴ äddeew d-Subatir ägg Birus wa n-aḡrəm wa n-Biri, d-Aristarəq d-Skändus wa n-Täslonika d-Gayəs wa n-Darba d-Timoti, d-Tušik d-Tirfim wa n-teje ta n-Azya.

⁵ Äzzarän-as meddən-win-däḡ, əqqälän-asän däḡ-aḡrəm wa n-Tärwas,

⁶ okäy-anäḡ ämudd wa däḡ-tattän äddinät tijəlwen ti wär ha täzza ḡas, nəjjäš turäft n-aman däḡ-aḡrəm wa n-Fəlibb, nässakäy səmmos išilan fäll-əjärew təzzar, näwwäḡ-tän-in däḡ-Tärwas-i-däḡ nässakäy əssəboḡ imdan.

[†] 20:2 20:2 Gəris (Grèce) däḡ-Təfränsit.

⁷ Ij'-anäx ašäl wa n-älxad-i n-ašäl wa äzzarän däx-əssəbox dihen xas, näžžimäx iket-nänäx, nətatt amənsi wa n-tasäktot šäddijän. Issan Buləs, a-s ašäl wa ilkämän i-wen, iglä. Däx-təssəba n-a-wen-däx a fäl ässakäy ehäð-wen-däx, ädiwännät d-imadhalän-net d-äddinät.

⁸ Näžžimäx iket-nänäx fäll-afälla n-ehän n-soro äsimäläwlawwät tiftəl äjjootnen,

⁹ ädiwännät Buləs i-älžəməxät dihen-däx, a-s ija a-wen-däx, äsihätäl ämawað s-isəm-net Itikus fäll-fənetär ämerän. Ämmiijräð Buləs ehäð-en-däx a-s hin-ilxäd eðəs Itikus, äträkkät-dd fäll-afälla n-soro wa s-kärað. A-s sār-s dd-äzzubben imumənän, əjmaðän-t iman.

¹⁰ Äzzubbät-dd sār-s Buləs ənta-däx, ibdäd jənnəj-s, irmäs-t-dd s-äfuss təzzar, innä i-äddinät: «Änset ənniyät-näwän, iddar.»

¹¹ Iqqäl ðarät-a-wen afälla n-ehän, äzun amənsi wa n-tasäktot šäddijän, oläs-asän edäwänne har tänfäraräw tifawt.

¹² Iqqäl ämawað ənta ehän-net, iddar-iylas. Ämoos a-wen əssəbab n-tedäwit ässismäðän ulhawän n-tamətte iket-net.

Ifäl Buləs Tärwas, ikkä Milati

¹³ Näzzar näkkəneð i-Buləs, nəjjaš turäft n-aman, nəkka Asus-i dār-s nohär ed, ässof ənta ad-äj asikəl-en fäll-iðarän-net.

¹⁴ Iwwäð-anäx-dd däx-Asus xas, nämohär dār-s asikəl har näsjän däx-Mittilän,

¹⁵ nokäy ašäl wa iyyäðän s-Šayo, təzzar, nokäy s-Samos d-Milati.

¹⁶ Ässof Buləs ad-wär-immer ayrəm wa n-Ifäsus i-ad-wär t-äwwəxän däx-s äddinät wi n-teje ta n-Azya ed, äroräð Yärussälam i-ad-däx-s isəssikəy ämudd wa n-Fantäkawt.

Isəmməterän wi ija Buləs i-inušämän n-älkänisät ta n-Ifäsus

¹⁷ Älwäqq wa d-näsjän däx-Milati, ässof Buləs inušämän n-älkänisät ta n-Ifäsus.

¹⁸ Osän-t-dd xas, inn'-asän: «Təssanäm käwəneð iman-näwän tämudre ta ətṭäfäx yur-wän däx-a-wa əkkäsäx əlley jere-wän ašäl wa d-käwän-dd-osex däx-teje ta n-Azya,

¹⁹ təssanäm əmmək wa s-äsräsäx iman-in data-wän däx-älxidmät wa hey i-Emäli. A-wen, jəx-t s-imetṭawän d-ahänay n-talxiwen sämumnen sār-i dd-orawän käl-Älyähud.

²⁰ Təssanäm da x a-s wär t-illa a hawän-əffaräx, äxtäbäx-awän, əssäxräx-käwän däx-ihänan-näwän hakd tifärrawen a-wa hawän-iha älfäyda iket-net,

²¹ wär käla hi-okäy ašäl d-wär-äsmätäräx käl-Älyähud hakd inəzzulam† d-ad-utabän i-Mässinäx, əjən immun-näsän däx-Emäli Yisa.

²² Ämära näkk da-hi, izzəlzäm Unfas Šäddijän tikawt n-Yärussälam, wär-əssenäx a hi-iqqälän däx-s

²³ mäšan, ikkas-ahi Unfas Šäddijän däx-tayðärt n-a-s tayrəmt osex-däx, äjäyət fäll-ujəš n-tišəm d-ahänay n-aḡāna.

²⁴ Diha t-əlleḡ, wär-əjeḡ tämudre-nin härät, wär fälla-s ärməxäx ed, wär hənnəyäx a säl ittus wa s-ošäläx i-ad-hin-səssiwəðäx amäšal wa hi-issäxläf Emäli Yisa, äxtəbäx isälan n-Älənžil-i hän isälan n-ännuymət n-Mässinäx.

²⁵ Ämära, käwəneð-i jer-äxtäbäx isälan n-Təmmənəya n-Mässinäx, əssanäx a-s äbas ilkam ad-tənhayäm idəm-in,

† 20:21 20:21 – Yur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyäðnen iket-näsnät, ti n-inəzzulam. — Ašäl-i-däx, änäzzalim, äkafär (ere wärän issen s-Mässinäx).

²⁶ əkkasəχ-kāwän dāχ-taydārt iket-dāχ-nāwän, ābas dāχ-i ədmanän iman-nāwän ed, a-wa āmoosän älmāχna n-əlxəllas n-Mässinäχ wa hawän-irha,

²⁷ əssəχräχ-kāwän tayətte-net iket-net, wār dāχ-s-in-oyyeyχ härät.

²⁸ Ämāra, äjät ənniyät i-iman-nāwän, tagəzäm day älzāmayät n-imumənän wa kāwän-issəχläf Unfas Šaddijän, umasät šund imādanän əχdalnen, agəzät älkānisät n-Mässinäχ ta ikfä iman-net s-ašni-net wa inχälän.

²⁹ Əssanəχ a-s afäl kāwän-əfäläχ, ad-jere-wän dd-əlmuməsnät tiχəs wāren-e-aḍən tāhanint i-tahrut ta n-imumənän.

³⁰ Ad-kāwän-dd-əzjārän meddən n-inəsbuha maden-əttār ere əslälän ḍara-sän,

³¹ a-wen-dāχ a fäl, äjät ənniyät, əktəwät-dd a-s kāraḍ iwətyan-wi əkkāsəχ jere-wän, ehäḍ d-ašäl, samātarəχ-kāwän s-iyyän-iyyän, dehiyyän fāw, imetṭawän a-s jey a-wen.

³² Ämāra, ayətma, əssiiχläfäχ-kāwän i-Mässinäχ d-ännuymət n-mäjräd-net, Mässinäχ a ilan tārna n-ad-kāwän-isədwəl dāχ-immun-nāwän, isətbət tākasit ta itwār i-iməšseddējän iket-dāχ-näsän.

³³ A-s t-əlleχ jere-wän, wār-əsdārhanəχ azrəf wāla orəχ wāla isəlsa n-wäl' iyyän dāχ-wän,

³⁴ səjrähät ifassän-in, təssanäm kāwäned iman-nāwän a-s ifassän-in a-s äxdämäy i-a-wa s-əmiyatärəχ, näkk d-meddən-wi dār-i äddewnen,

³⁵ əssəknəχ-kāwän hak ašäl a-s a-wen-dāχ a-s təlam s-ad-t-təjəm i-ad-tədhələm tiləqqiwen. Əktəwät-dd a-wa innä Emäli Yisa a-s innä:

<Ojār älxer ihän isuf uhən ajāraw.> »

³⁶ Issəmdä Buləs d-timtär-tin-dāχ χas, ärkäχän iket-dāχ-näsän, ad-hasän-itəddal Mässinäχ.

³⁷ Hallän iket-dāχ-näsän, tikrirəyän dāχ-s, tisəsän-t dāχ-idmarän-näsän,

³⁸ əsniinän iman-näsän fäll-a-wa s-hasän-innä, ābas ilkam ad-t-ənhayän. Əssofädän-t-in ḍarät-a-wen hundəχ har ijjäš turäft n-aman təzzar, əqqälän.

21

Tikawt n-Buləs d-imidiwän-net i-Yārussälam

¹ Nəbḍa dār-sän χas, nəjjäš turäft n-aman, nārmäs tamdujt n-awtəl wa n-Kus, äffāw-anəχ, nokäy s-Rudus təzzar, nəkkä Batara.

² Nəjrāw dihen turäft n-aman tiyyät təkkat teje ta n-Finisya, nəjjäš-tät,

³ nohäz-in awtəl wa n-Qəbrus, noyy'-e fäll-tāšalje-nänəχ, nokäy s-Surya, nəzzubbät dāχ-aχrəm wa n-Tir-i dāχ-la turäft s-ad-zəzzubbət ilalän wi tät-əhänen.

⁴ Nəjrāw härät dāχ-inəṭṭulab, nəssakäy χur-sän əssa išilan. Nəll'-e χur-sän dihen-dāχ a-s tän-dd-imhəl Unfas Šaddijän s-Buləs, ad-t-salχadän d-ad-wār-ikka Yārussälam.

⁵ Okäyän-anəχ išilan-en-dāχ dihen χas, əssofädän-anəχ-in imumənän-win-dāχ, meddən, tiḍeḍen d-aratän har nəzjār aχrəm, nārkäχ dāχ-asälim n-əjärew, ad-nətəddal Mässinäχ.

⁶ Nəssəmdä tittar d-isənnəχlaf dār-sän χas, nəjjäš turäft n-aman, əqqälän əntäned ihānan-näsän.

⁷ Nəfäl näkkäned Tir, nəkkä Bätlomis. Näsjan dāχ-s χas, nəkkä ayətma-nəχ dāχ-əddin wi t-əllänen dihen, nəssälläm fälla-sän təzzar, nəssakäy ašäl χur-sän.

⁸ Äffāw-anəχ χas, nəkk' ehän wa n-Filəbb wa n-amällänžal,† izzaχ aχrəm wa n-Qäyšara, ənta a-s iyyän dāχ-meddən wi n-əssa ənnəfrānnen dāχ-Yārussälam, nəzzubbät χur-s.

† 21:8 21:8 — Isəm n-āwadəm wa ikkələf Mässinäχ dāχ-älkānisät d-älxuṭbät n-Älənžil. — Afäl əjjətän a hasän-itawānnen: Imällänžalän.

⁹ Ila əkkozät tilyaden wären əzzey meddən, jarrəwnät məjräd xur-Mässinäx i-ad-t-in-səssiwədnät äddinät.

¹⁰ Nässakäy härät n-išilan dihen-däx a-s hanäx-dd-osa ännäbi dd-ifalän Älyähudəyät s-isəm-net Äggäbbas.

¹¹ Os'-anäx-dd xas, idkäl taməntəka n-Buləs, osäx sār-s ifassän-net d-idarän-net, inna: «Enta da a-wa innä Unfas Šaddijän: məssi-s n-taməntəka-ta-däx, ilkam ad-t-əkrədän käl-Älyähud s-əmmək-wa-däx däx-Yärussälam, əjən-t jer-ifassän n-inəzzulam.†»

¹² Nəslä i-isälan-win-däx xas, ad-nəlaqqäd näkkəneḍ hakd imumənän wi əzzäxnen Qäyşara Buləs i-ad-wär ikkä Yärussälam

¹³ məšan, inn'-anäx: «Ma ämoos a-wa käwän-išlän, naxxäsäm ulh-in s-imetṭawän-nəwän? Näkk, diha t-əlley, əsidəwäx i-tišəm hakd-däx i-taməttant däx-Yärussälam fäl təssəba n-isəm n-Emäli Yisa.»

¹⁴ Issəndär-anäx xas, nəkf'-e əlyafyät, nənn-as: «Ija Mässinäx erhet-net.»

¹⁵ Nässakäy äzzäman däx-Qäyşara təzzar, nəsdəw, nəjozäy s-Yärussälam.

¹⁶ Äsofädän-anäx-in härät däx-inəṭṭulab n-ayrəm-en, äwwäyän-anäx s-ehän n-amumən s-isəm-net Mənasun ila awtəl wa n-Qəbrus, nəzzubbät xur-s.

Amuqqəs n-Buləs d-Yaqub

¹⁷ Näwwəḍ-in Yärussälam xas, əsbərräkän-anäx däx-s ayətma-näx däx-äddin s-tedəwit.

¹⁸ Äffäw, nəddew d-Buləs s-ehän wa n-Yaqub-i xur-əzzimmäxän inušämän n-älkənisät iket-nəsän.

¹⁹ Nänməjja dār-sän isofan təzzar, illäxät-asän Buləs isälan s-iyyəni-iyyəni n-a-wa ija Mässinäx iket-net jer-inəzzulam s-älxidmət wa ija jere-sän.

²⁰ Əslän i-isälan-en-däx xas, ad-tiimələn Mässinäx. Ənnän-as dərät-a-wen: «Äḡḡanäx Buləs, ənhəy xas afdän fäll-afdän n-käl-Älyähud wi omännən s-Mässinäx, əṭṭafän iket-däx-nəsän alkum i-alämär wa n-Mosa däx-isälan n-asəmmili n-aratän d-älxadatän wi-iyyədnen;

²¹ nəssan a-s äməra d-əslän a-s dd-tosed, ilkam däx-sän tənna n-härät ed əslän a-s käyy, tänimäşrayäd i-alämär wa n-Mosa.

²² Nərha fälla-k äməra ad-tän-təkkəsäd däx-täqqän n-eḡäf-ten-däx.

²³ Äməra, äddəbara-nänäx hak da: hann-anäx əkkoz meddən əjjaşnen ärkəwäl,

²⁴ idawnet dār-k s-edəgg wa däx-šaşdajän äddinät iman-nəsän, şəşdəjad iman-näk dār-sän, təkkəsäd-asän ehäre wa n-asəttəbəl-bəl-nəsän, dihen, ad-əlmədän äddinät a-s a-wa fälla-k itawännən, wädden a ijan ed, a-wa mad-təjəd, əsijäyha a-s wär tänmäşrayäd i-alämär wa n-Mosa.

²⁵ Däx-isälan n-inəzzulam wi s-äməra, omanän s-Älmasex, nəktab-asän təkarde n-tamətert däx-hasän-nənnä, wär tättänet isan ämoosnen takute i-əşşänäm, wär sässänet ašni, wär tättänet məxsoy, əbdəwnet d-e d t-illäm a isaməḍasän taḡəssa.»

²⁶ Äffäw, äddew Buləs d-meddən wi n-əkkoz, ijjaş dār-sän edəgg wa n-təşədje, illäxät i-äddinät täqqän ta mad-səssikəyən təzzar işdajän, təzzar äkt hak iyyän däx-sän fäll-iman-net.

Atärməs n-Buləs

²⁷ İşwar imda əssəbox wa n-təşədje-nəsän, ənhäyän härät däx-käl-Älyähud n-əkall wa n-Azya Buləs däx-ehän n-ämudd wa məqqārän xas jän-dd erk iman däx-tamətte, toḍa fälla-s,

† 21:11 21:11 – Xur-käl-Älyähud, ere wärän ämoos ägg-Älyähud s-aləşäl mex ere wärän ilkem i-äddin-nəsän, iket-net, änäzzalim a ämoos. A-wen-däx a fäl tiwsaten ti iyyədnen iket-nəsnät, ti n-inəzzulam. – Aşäl-i-däx, änäzzalim, äkafär (ere wärän issen s-Mässinäx).

²⁸ saḡären äddinät, jannen: «Ya käl-Işrayil, öyyäwät! Ənhöywät äwadəm-wa s-edägg osa-däḡ, işinməsröy tamötte-nänäḡ s-a-wa ixaṭṭäb fäll-alämär wa n-Mosa d-a-wa ijän fäll-ehän n-ämudd wa mäqqārän, ənhöywät-ak, igla fäw har dd-äşşojäş dägg-Älyunan† iyyäð ehän n-ämudd wa mäqqārän, äsmädäs-t.»

²⁹ Ənnän a-wen fäl-a-s innin, ənhayän Tirfim wa n-İfäsus äddeew d-Buləs däḡ-ammäs n-aḡrəm, äḡelän, äşşojäs-t-dd ehän n-ämudd wa mäqqārän.

³⁰ İwäs aḡrəm-ənnin-däḡ iket-net, toşäl-dd tamötte, ärmäsän äddinät Buləs, äşräwräwän-t har t-əzzəzjārän ehän n-ämudd təzzar, äḡfälän tishar-net çara-sän.

³¹ Tattārän iji n-iman-net dihen-däḡ a-s osän isälan n-tamdərwayt ta jat däḡ-aḡrəm kumända wa ännihädän däḡ-əssärdusa wi n-käl-Roma hänen Yärussälam.

³² İssäḡrä-dd älwäqq-wen-däḡ käbtänän d-əssärdusa, äddew dār-sän şik s-tamötte. Tənhäy-t tamötte imal-dd ənta d-əssärdusa-net ḡas, əbdän d-Buləs.

³³ İkkä-dd kumända Buləs, omär s-ad-däḡ-s ətwəjjənät sänatät tişəm təzzar, işsəstän-t d-ere wa ämoos d-a-wa iḡşäd.

³⁴ Täsiḡärät tamötte iket-net, hak aşrut-däḡ wär-oher d-amidi-net iḡäran, indär i-kumända ad-isəl i-a-wa has-ijanna Buləs. Omär çarät-a-wen s-ad-ättälwäy Buləs s-ehän wa n-əlyəşkär.

³⁵ Älwäqq wa d-itiwən Buləs asəggaggən wa işijuşän äwadəm ehän wa n-əlyəşkär, amsiwi a t-əjän əssärdusa fäl təssəba n-aşunəy-i-däḡ sār-s təja tamötte i-ad-t-tänḡ. İssəntä Buləs uješ n-ehän, təzzän sār-s tamötte har dd-əqqälän əssärdusa jan-as afäraj.

³⁶ Täsiḡärät tamötte iket-däḡ-net, janna: «Ämmätet, ämmätet.»

Ämewäy Buləs s-ehän wa n-əlyəşkär

³⁷ Älwäqq wa d-äbok Buləs uješ n-ammäs n-ehän wa n-əlyəşkär, innä i-kumända: «Ak äddobəḡ ad-hak-ännäḡ härät meḡ?» İnn'-as kumända: «Kähh! ḡas käyy təssanäd Tälyunanit?»

³⁸ Adiş käyy, wädden u-Mişra-wa s-a äynayän d-äsfälläg əkkoḡ afdän n-äwadəm wi has-əlkämnen s-tenere?»

³⁹ İnn'-as Buləs: «Näkk, ägg-Älyähud, əweḡ däḡ-taḡrəmt ta n-Tarşa däḡ-teje ta n-Silisi, a-wen taḡrəmt təlat isəm. Ämära, ärheḡ däḡ-k, ad-hi-təkfəd turhajät n-ad-äjäḡ härät n-mäjräd i-tamötte-ta-däḡ.»

⁴⁰ İkf'-e kumända mäjräd ḡas, ibdäd Buləs, ikkə-dd tamötte, ibdäd fäll-isəgguggan n-ehän, illäf i-tamötte i-ad-susəm, tässosäm. İmməjräd-asän älwäqq-wen däḡ-ḡäbranəyya, tawalt ta-däḡ ənkäsän. İnn'-asän:

22

Mäjräd wa ija Buləs i-ad sār-s iḡləs iman-net (Ijitän 9:1-9; 26:12-18)

¹ «Ayətma-ḡ, abba-tän-in, säjdät ämära i-mäjräd wa s-ärheḡ ad-hawän-t-äjäḡ i-ad-sār-s əkkəsäḡ uḡlem fäll-iman-in.»

² Əslän a-s ḡäbranəyya-ta-däḡ əttädän a däḡ-hasän-əssewäl, əṭṭäfän ṭäbb, äşjadän-as. İnn'-asän:

³ «Näkk, ägg-Älyähud, əweḡ däḡ-taḡrəmt ta n-Tarşa təhät Silisi mäşan, aḡrəm wa n-Yärussälam a däḡ-ədwäläḡ. A-wa əlmädäḡ iket-net, əlmädäḡ-t daw-təlyuləma n-Gamälyäl. Ənta a hi-issäḡrən alkum i-a-wa innä alämär n-abbatän-nänäḡ iket-net. Əjjəluḡyät-in däḡ-tuksəda n-Mässinäḡ a hi-iwwäyän s-əşşənju n-tabarät ta-däḡ n-ḡisa s-əmmək wa s-tät-täşşunjem aşäl-i-däḡ.

† 21:28 21:28 Gərik (Grec) däḡ-Təfränsit.

4 Ʒgleŷ dăŷ-əššənu wa has-jəŷ har tajjăŷ iman n-ăddinăt wi əlkămnen i-zăbo-wen-dăŷ, tajjăŷ tišəm dăŷ-iyyăd, tøjjarăŷ-tăn dăŷ-takărmuť, wăr-əzleyăŷ meddən d-tiđeđen.

5 A-wen, äjjəyh'-as ämänokal n-kăl-tikutawen, äjjəyhăn-as daŷ inušămän wi ŷattăsnen äššäreŷa ed əntăneđ iman-năsän a hi-əkfănen tikarđiwen əkkanen kăl-Ălyăhud wi n-aŷrəm wa n-Dămašăq i-ad-əjrəwăŷ tabarăt n-asəttărməs n-ăddinăt-wi əlkămnen i-tabarăt-ta-dăŷ, äjăŷ dăŷ-săn tišəm təzzar, əlwəyăŷ-tăn-dd s-Yărussălam.

(Ijitän 9:1-19; 26:12-18)

6 Ǻssokalăŷ dăŷ-isălan n-a-wen-dăŷ har hin-ohăzăŷ Dămašăq. Diha-dăŷ tăt-in-ohăzăŷ s-tarăhut, wăla a hin-əjrăhăŷ, a-s făll-i dd-ăzzubbăt ännur, dd-ifalăn išənnawăn, ijan amləwləw n-tikunen,

7 əheŷ-dd ođeŷ, əsleŷ i-emăsli hi-innăn: <Sawəl, Sawəl! Ma kăy-orămän săr-i, tiŷəzzubud-ahi?>

8 Ʒnneŷ: <Emăli, mi tămoosăd?> Inn'-ahi: <Năkk a-wa ŷisa wa n-Năširăt tiŷəzzəbud.>

9 Ʒnhăyăn meddən wi dăr-ăddewăy ännur wa dd-ămlăwłăwăn măsän, wăr-əslen i-emăsli wa hi-ămmijrădăn.

10 Ʒnneŷ-as: <Emăli! Ma s-leŷ s-ad-t-ăjăŷ?> Inn'-ahi Emăli: <Ʒbdəd, äkk aŷrəm wa n-Dămašăq, ad-hak-itwənn dihen a-wa s-led s-ad-t-təjəd.>

11 A-s ităjj a-wen-dăŷ, wăr t-illa a hannăyăŷ ed, əsdăryăl-ahi ännur wa făll-i dd-ăzzubben. Ʒlwăyăn-ahi imidiwăn-in s-ăfuss har nəjjăš Dămašăq.

12 Ill'-e dihen ähaləs äddiinăn dăŷ-a-wa innă alămăr wa n-Mosa, ässiimŷărăn kăl-Ălyăhud s-isəm-net Ǻnanyas,

13 ənta-en-dăŷ a hi-dd-osăn, äzozăy-ahi iman-net, inn'-ahi: <Ǻŋŋa-ŷ Sawəl, arr tiŷtawen-năk>. Ǻmerănăt-dd tiŷtawen-in, ənhăyăŷ-t.

14 Inn'-ahi daŷ: <Măssinăŷ-i s-əlkămän abbatăn-nănăŷ a-s ăru d-kăy-ăsnăfrăn i-ad-kăy-isəlməd erhet-net, tənəhəyăd wa s-itawănna Ǻmaŷdal, təsləd i-a-wa fălla-k irha s-əmm-net,>

15 tumasăd tajuhe-net dat-dăgg-adəm, tăllăŷed-asăn a-wa tənəhəyăd d-a-wa s-təsləd iket-net.

16 Ǻmăra, ma kăy-iwwăŷăn? Ʒbdəd, tətəwəsəlmăŷăd dăŷ-aman, săŷləfăd iman-năk Măssinăŷ i-ad-kăy-išəšdəj dăŷ-ibăkkadăn-năk.>

17 Ǻlwăqq wa d-ăqqălăŷ Yărussălam đarăt-a-wen, təddalăŷ Măssinăŷ dăŷ-ehăn n-ămudd wa măqqărăn ašăl iyyăn a-s hi-tăssoda tănăfalilt dd-falăt Măssinăŷ.

18 Ʒnhăyăŷ Emăli, inn'-ahi: <Tărmăđ, əzjăr Yărussălam šik făl-a-s wăr mad-ărđən imuzăŷăn-net s-tajuhe ta făll-i mad-təjəd.>

19 Ʒnneŷ-as: <Emăli, wădden, əssănăn imumənăn əmmək wa s-əkkeŷ jer-ihănan n-ăddin wi n-kăl-Ălyăhud, naqqăŷ iyyăd dăŷ-săn, tajjăŷ tiwit s-ebărtăk dăŷ-iyyăd, tøjjarăŷ-in wi iyyădnen dăŷ-takărmuť.>

20 Ašăl wa d-inŷăl ašni n-Stifan† i n-tajuhe-năk, əbdadăŷ, taqqăsăŷ i-wi t-naqqănen, năkk făw a əssăŷlăfăn isəlsa-năsän.>

21 Inn'-ahi Emăli ălwăqq-wen: <Ʒgləw, ad-kăy-sukăŷ tiwsaten n-inəzzulam† ti hănen ikallăn wi ujejnən.,> »

Ujəš n-Buləs i-takărmuť

22 Ǻsijădăn-as äddinăt hundăŷ har ten-dăŷ ŷas, əšŷăren dăŷ-išənnawăn, ad-jannen: «Ʒlhəsăt fălla-năŷ ăwadəm-wa-dăŷ, wăr-ilă s-ad-ăqqayəm iddar.»

† 22:20 22:20 Jannen-as iyyăd: Ǻlmuštafa. † 22:21 22:21 – ŷur-kăl-Ălyăhud, ere wărăn ămoos ägg-Ălyăhud s-alăšăl meŷ ere wărăn ilkem i-ăddin-năsän, iket-net, ănăzzalim a ămoos. A-wen-dăŷ a făl tiwsaten ti iyyăđnen iket-năsăt, ti n-inəzzulam. — Ašăl-i-dăŷ, ănăzzalim, ăkafăr (ere wărăn issen s-Măssinăŷ).

²³ Naḍḍawän iḡaran, täkkäsän isəlsa-näsän fäll-iman-näsän, nabbäsän-as äkall.

²⁴ Omär kumända älwäqq-wen i-ad-t-šujəšan əssärdusa ammas n-ehän wa n-əlyəskär, əjən dəḡ-s tiwit i-ad-t-šəhhəššəlän tənna n-äddälil-wa fäl fälla-s saḡarat tamətte.

²⁵ Karrädän-t əssärdusa dihen-däḡ i-ad-däḡ-s əjən tiwit a-s innä Buləs i-käbtän wa t-illän dihen: «Ajän, ijraw-awän älqanun ad-təjəm tiwit dəḡ-u-Roma wär-əswär äššäreḡa uḍlem.»

²⁶ Isla käbtän-en i-a-wen ḡas, ošäl s-kumända, inn'-as: «Hekäyy! Äj ənniyät i-a-wa s-tärhed iji-net, ähaləs-i, i n-Roma.»

²⁷ Ikkä-dd kumända Buləs, inn'-as: «ḡas, tidət käyy u-Roma?» Inn'-as Buləs: «Eyya.»

²⁸ Inn'-as kumända: «Näkk, azrəf äjjeen a zäläḡ i-ad-əjrəwäḡ tumast-ten-däḡ.» Inn'-as Buləs: «Näkk, a əweḡ-däḡ, ämoosäḡ-t.»

²⁹ Əššəkäšan fälla-s əssärdusa wi s-ihənnin ärhan ad-t-əkrədän, əjən dəḡ-s tiwit. Irmäḡ kumända ed, ija tišəm dəḡ-ere la Roma iket-di d-ititwəšreḡ.

Ätwäḡrə-dd Buləs s-imizärän n-käl-Išrayil

³⁰ Äffaw ḡas, ad-itammäḡ kumända i-äddälil n-äḍḍärora wa t-əswärän käl-Älyähud, ikkäs Buləs dəḡ-tišəm, issäḡrə-dd ḍarät-a-wen imänokalän n-käl-tikutawen d-inušämän-wi ḡattäsnen äššäreḡa təzzar, issäḡrə-dd Buləs, ij'-e jere-sän.

23

¹ Ikna Buləs akäyad n-inušämän wi n-Sinhidrin† ḡattäsnen äššäreḡa təzzar, inn'-asän: «Ayətma-ḡ, wär t-illa a dəḡ-əššakäḡ iman-in, a-wa s-ila ägg-adəm s-iji-net dəḡ-isälan n-ta n-jere-s d-Mässinäḡ, wär kälä has-änmäšräyäḡ har näkk-da-däḡ.»

² Iggäd-dd sār-s Änanyas wa n-ämänokal n-käl-tikutawen, omär i-əssärdusa wi t-əllanen edes i-Buləs s-ad-has-ənfäzän, isusəm s-iiyät.

³ Ənfäzän əssärdusa i-Buləs ḡas, innä i-ämänokal n-käl-tikutawen: «Infäz-ak Mässinäḡ isəm n-erk äwadəm; ənde d-ämmukkän a-s käyy-i s-äniihäjja d-ad-hi-təšräḡäd s-iqqud s-a-wa innä alämär, käyy-da-däḡ ämära has-itinməšriyän, sasənḡed-ahi.»

⁴ Ənnän-as äddinät: «Käyy, ma käy-äsihälän tigəggar n-ämänokal n-käl-tikutawen n-Mässinäḡ?»

⁵ Inn'-asän Buləs: «Ayətma, änsät-ahi-dd, wär-əssenäḡ a-s ənta-i-däḡ a-s ämänokal n-käl-tikutawen ed əssanäḡ a-s iktab a-s:

<Wär tənneḍ a läbasän fäll-ämänokal-näk.> »

⁶ Däḡ-a-wen-däḡ, ad-ilmäd Buləs a-s ašrut n-tamətte iyyän, i n-taggayt ta n-käl-sadus, wa iyyäḍän, i n-ta n-käl-faris. Iḍkäl eməsli-net dat-käl-Sinhidrin,† innä: «Ayətma-ḡ, näkk u-faris n-ägg-u-faris a ämoosäḡ, kunta ill'-e uḍlem hi-iwarän ašäl-i-däḡ, wär t-illa a ämoos kunta wädden wa n-äḡḡama-i järeḡ n-a-s təlcam tanäkra jer-inəmmuttan.»

⁷ Innä a-wen ḡas, tənkar tamḡənnant jer-käl-faris d-käl-sadus, täzun tamətte.

⁸ Ämoos ašrut iyyän wa n-käl-sadus-i jannänen wär təlcam tanäkra n-inəmmuttan, wär t-əllen änjəlosän wälä alšinän; ämoos ašrut wa iyyäḍän wa n-käl-faris-i ässiitbätän emel n-härätän-win-däḡ iket-näsän.

† 23:1 23:1 A-wa älzämaḡät n-inušämän d-imizärän n-käl-Išrayil wa itirən äššäreḡa, əntäneḍ a-s älqallitän, osaḡän ḍaḡ tamətte d-əlxəkum d-äddin. † 23:6 23:6 A-wa älzämaḡät n-inušämän d-imizärän n-käl-Išrayil wa itirən äššäreḡa, əntäneḍ a-s älqallitän, osaḡän ḍaḡ tamətte d-əlxəkum d-äddin.

⁹ Təwäs tamətte iket-net, ja təkät. Əggädän älyulam wi n-taggayt ta n-käl-faris, əwārän s-əşşahät s-aşrut wa n-Buləs, ad-jannen: «Ähaləs-i-däx, wär t-illa uđlem fälla-s nəhannäy, ak mi issanän fəw kunta wädden a dd-ifalän išənnawän mey änjəlos iyyän a has-imməjrädän?»

¹⁰ Inhäy kumända tuköse n-talxa ta dd-təşräyät xas, irmäx fäll-ad-t-təmzəyözəy tamətte, tənəkədnəkəđ-t. Omär i-əssärdusa s-ad-t-əlwəyän s-ehän wa n-əlxəskär i-ad-t-səssijəjän tamətte.

¹¹ Ehäd wa ilkämän i-wen, änfäläl-dd Emäli i-Buləs, inn'-as: «Buləs, kuyəd, wär käy-işäšlalet härät fäll-ämaşal wa käy-əşşäyläfäx, əmmək wa s-hi-tämoosäd tajuhe dāx-Yärussälam, əmmək-wen-dāx dāx a-s mad-hi-tumasäd tajuhe dāx-Roma.»

Taydärt ta s-əttärän käl-Älyähud ad-tät-əjən i-Buləs

¹² Äffaw xas, häđän käl-Älyähud n-a-s wär t-illa a mad-əkşən wäla a mad-əswən a əkkän wär-əşşäyđärän Buləs, əjən iman-net.

¹³ Əkkožät timərwen n-ähaləs a jänen tahuđe-ten-dāx.

¹⁴ Dāx-a-wen-dāx, ad-əkkän ämänokal n-käl-tikutawen d-imännähädän n-tamətte, ənnän-asän: «Nəj'-awän tahuđe, ilxän-anäx dāx Mässinäx kunta ill'-e a he-näks wäla a he-nəsəw a nəkkäs wär nəja iman n-Buləs.

¹⁵ Nārha dāx-wän ämära, ad-təttäräm dāx-kumända d-käl-Sinhidrin, ad-dd-səbdədän Buləs data-wän dāx-äsarə n-a-s tərham əsəstan-net, afäl təjäm a-wen, ad-näj näkkäneđ əmmək fäll-has-in-nəssəmdä.»

¹⁶ Təsla tejäşe n-Buləs i-taydärt-näsän xas, ikka ehän n-əssärdusa wa iha Buləs, ija dāx-s isälan.

¹⁷ Ixrä-dd Buləs iyyän dāx-käbtänän, inn'-as: «Əlwəy alyad-i-dāx s-kumända fäl-a-s ilə a-s irha ad-has-tän-änn.»

¹⁸ Äddew dār-s käbtän-en s-kumända, innä i-kumända: «Buləs wa n-u-takärmüt a hi-innän ad-sär-k dd-əlwəyāx ämawađ-i-dāx fäl-a-s äwway isälan s-irha ad-dāx-k tän-äj.»

¹⁹ İkkäs-dd kumända alyad s-takşe təzzar, issəstän-t d-isälan wi äwwäy.

²⁰ Inn'-as alyad: «Änmännäkän käl-Älyähud fäll-ad-dāx-k əttärän aşəkka ad-dd-təyyəd Buləs sār-sän i-ad-t-səbdədän dat-käl-Sinhidrin älmät ärhan ad-t-əknən əsəstan d-a-wa ixsäd,

²¹ wär käy-səswadnet fäl-a-s, a iwwädän əkkožät timərwen n-ähaləs a ihädän n-a-s wär mad-əkşən, wär mad-əswən a əkkän wär jen iman-net, wär-əqqelän ämära xas ar i-ad-sär-sän t-dd-təyyəd.»

²² Älwäqq wa d-isigləw kumända ämawađ-ənnin-dāx, äsmätär-t d-ad-wär ija isälan-wi-dāx i-äwadəm wäl' iyyän.

Ujəş n-Buləs i-takärmüt dāx-axrəm wa n-Qäyşära

²³ İssäxrä-dd dərät-a-wen əssin käbtänän, inn'-asän: «Sädwät-dd sənätät-timađ n-əşşärdusa, əşşayät timərwen n-əşşärdasi dāx-wi näynen ibəjwan d-sənätät timađ dāx-wi ärjaşnen, äwwayän allaxän, sədəwəm afäl okäynät tisuđəsen i-tikawt n-Qäyşära,

²⁴ əstəjät i-tisnay, səssiwəđäm-in Buləs iddar-iğlas Filiks wa n-gəfär.»

²⁵ İktäb kumända təkərde dərät-a-wen-dāx innä:

²⁶ A-wa näkk Kələd Lisyas hin-ähuulän gəfär Filiks-i əkneş semxar.

²⁷ Ähaləs-i-dāx sār-k-in-əssiğläx, ärmäsän-t käl-Älyähud, əttärän ad-əjən iman-net. Əlmädäx a-s äđdiin fäll-Roma xas, ässokäsäx-t-dd jer-ifassän-näsän s-əjhän n-əşşärdusa.

²⁸ Dāx-derhan-in n-almud n-a-wa fäl ärhän tenäxe-net, əşşəbdädäx-t-dd dat-inuşämän-wi xattäsnen äşşärexa i-ad-əlmədäx äddälil n-uđlem wa t-äsiwārän,

²⁹ əlmädäx a-s a ihalän ebre n-tijəttewen n-alämär-näsän xas, wädden a änihäjjän d-tamättant wäla takärmüt.

³⁰ Iket hi-əjjäšän isälan n-a-s ärhan käl-Älyähud asäxdär-net i-ad-əjən iman-net. Däx-təssəba n-a-wen-däx a fäl t-in-əssärmädäx sār-k, səlmədäx day wi has-dd-əškänen a-s käyy a ännihädän däx-isälan-net.

Wässälam!

³¹ Əjän əssärdusa əlwäqq-wen-däx a-wa hasän-innä kumända, əglän d-Buləs ehäḍ-en-däx har t-in-əssawädän taxrəmt ta n-Antibatris.

³² Äffäw xas, əqqälän əssärdusa wi ärjäšnen Yärussälam, əssofädän-in wi näynen ibəjwan Buləs s-Qäyşära.

³³ Əwwädän-in xas, jän təkərḍe-tənnin-däx ifassän n-gəfär, əssəbdädän-dd day Buləs data-s.

³⁴ Iyra gəfär təkərḍe təzzar, issəstän d-teje ta lät Buləs. Ilmäd a-s Silisi a t-lät xas, inn'-as:

³⁵ «Ad-käy-dd-säxräx afäl dd-əwwädän äddinät wi hak-dd-əškänen.» Omär ḍarät-a-wen i-əssärdusa i-ad-t-əjən däx-ehän s-ətiwäjjä ənniyät, däx-ehän n-təmmənukəla wa əsdäy ämänokal Harudəs.

24

Tebädde n-Buləs dat-ämänokal Filiks

¹ Səmmos išilan ḍarät-a-wen, osä-dd Änanyas wa n-ämänokal n-käl-tikutawen ifal-dd Yärussälam, äddeew d-härät däx-inušämän d-änabdid s-isəm-net Tartäloš. Osän-dd xas, əškän i-Buləs s-gəfär.

² Ätwäxrä-dd Buləs. Diha-däx dd-osa, ad-sär-s əšonäj Tärtäloš, ad-t-isawar uḍlem, ijanna:

³ «Ämänokal-nänäx Filiks, nämmoy-ak əlxal wa əhusken d-əlxafyät wa s-təzozäxäd əkall-nänäx, a-wen, wär t-illa əwadəm s-wädden issan sār-s.

⁴ Ämära, wär nārha asxəf-näk s-mäjräd äjjen, ärheex däx-k däx-milxaw-näk, ad-hanäx-təkfəd əssaḡät əndərrän n-mäjräd.

⁵ Ähaləs-i-däx n-əgg-əḍḍärorä, edəgg osa-däx, ad-däx-s isəffəlləg käl-Älyähud, ittär əšənnəməšri-näsän, ämoos iyyän däx-imizärän n-taggayt ta təglät fäll-tidət n-iman-net s-itawänna ta n-käl-Nəširät.

⁶ Däx-təmyäre n-anməšri-i-däx ija, ittär fəw ad-isəmmädəs ehän n-ämudd wa məqqārän. Nəstärmäs-t s-a-wa innä alämär-nänäx [

⁷ məšan, ohäx-t däx-näx Kumända Lisyas s-əşşahät.

⁸ Təddobed käyy iman-näk ad-t-səstənnäd d-uḍlem wa t-nəswär ed ənta iman-net, ill'-e diha].»

⁹ Ohärän käl-Älyähud wi iyyädnen iket-näsän iyyän n-əmm, ad-jannen isälan-dendäx.

¹⁰ Ästafäy gəfär ḍarät-a-wen i-Buləs, inn'-as ad-ämmäjräd. Iḍkäl Buləs mäjräd, innä: «Əssanäx ämänokal-in a-s käyy ärü təmoosäd əgg-əşşärexa i-käl-əkall-i-däx, a-wen-däx day a fäl əflasäx a-s ad-hi-təkkəsäd tekəriḍt.

¹¹ A ilan məraw išilan d-əssin dd-əjjäšäx Yärussälam i-ad-däx-s əxbədäx Məssinäx, təddoobed käyy iman-näk ad-səbbuyənäd isälan-win-däx,

¹² wär t-illa ere hi-inhayän əntajäx tamətte, wäla ämiixännanäx d-əwadəm däx-ehän n-ämudd wa məqqārän, wäla däx-ihänan n-äddin wi n-käl-Älyähud, wäla däx-əxrəm,

¹³ wär t-illa day däx-äddinät wi-hi-sawarnen uḍlem data-k-i äddooben asətbat n-a-wen ed, wär len tjuhawen.

¹⁴ Hakd a-wen-däx, härät iyyän, ädduuttät, janney-t daḡ data-k: näkk, Mässinäḡ wa n-abbatän-nänäḡ a-s əlkamäḡ s-əmmək wa s-tän-innä alämär d-əlkəttabän n-ännäbitän. A-wen-däx a-s jannen əntäneḡ taggayt təglat fäll-tidət n-iman-net.

¹⁵ Mässinäḡ a däḡ-jaräḡ ätṭäma, jarän-t däḡ-s əntäneḡ-däḡ n-a-s təlkam tanäkra n-inəmmuttan, jer-wi oläḡnen, wäla wi läbasnen.

¹⁶ Təssəba n-a-wen-däḡ a fäl tattäräḡ, ad-wär-itəmmil a däḡ-əššakäḡ iman-in, dat-Mässinäḡ wäla dat-dägg-adəm.

¹⁷ A ilan iwətyan d-əzjäräḡ äkall-i-däḡ, a-s t-dd-äqqäläḡ, äwwayäḡ takute n-azrəf təmoosät tadhəlt i-imumənän n-äkall-in, äwwayäḡ daḡ näkk a-wa s-ärheḡ ad t-əkətäḡ i-Mässinäḡ.

¹⁸ Ašäl wa d-əssəmdäḡ a-wa iktäbän däḡ-alämär däḡ-isälan n-təšədje-nin, əbdadäḡ däḡ-ammäs n-ehän n-ämudd wa mäqqārän, wär ḡur-i t-təlla tamətte wäla tamdərwayt wäl'-iyyät. Əbdadäḡ dihen-däḡ a-s fäll-i toḡa tamətte.

¹⁹ A-wa wär-ih' äššäk ənta da: käl-Älyähud wi dd-fälnen Azya a fäll-i oḡänen, a-wen-däḡ a fäl äniihäjja daḡ a-s kunta ill'-e uḡlem hi-iwarän, əntäneḡ-en-däḡ a lanen s-ad-hi-səwrən uḡlem data-k i-ad-səddəttun a-wa fäll-i itawännən.

²⁰ Kunta a-wen, wär-ija, adiš, läḡätnet meddən-wi əbdädnen diha uḡlem wa hi-iwarän a-s dd-əbdädäḡ dat-käl-Sinhidrin-wi† ḡattäsnen äššäreḡa.

²¹ Wär t-illa uḡlem hi-iwarän säl wa n-a-s ənney: təlkam tanäkra jer-inəmmuttan, tənna daḡ n-a-wen-däḡ a fäl əbdadäḡ data-k ašäl-i-däḡ.»

²² Äsfäl Filiks äddinät iman-net ḡarät-a-wen ed issan a äjjeen fäll-taggayt-ta-däḡ təglät fäll-tidət n-iman-net, inn'-asän: «Afäl dd-osa Lisyas wa n-ämänokal n-əssärdusa, ad-käwän-dd-säḡräḡ.»

²³ Omär ḡarät-a-wen i-käbtän iyyän i-ad-äj ənniyät i-Buləs mäšan, äkfet-t turhajät n-ad-t-dd-tisən äddinät-net, tassänän däḡ-s.

²⁴ Härät n-išilan ḡarät-a-wen, iqqäl-dd Filiks äddeew d-Dərusil ta n-hänne-s län käl-Älyähud. Issäḡrä-dd Buləs, äsjäd i-isälan-wi itäj fäll-immun s-ḡisaÄlmasex.

²⁵ Itajj'-as Buləs isälan har dd-iwwäḡ edägg-wa däḡ-has-ijanna əmmək wa s-ila ägg-adəm ad-sär-s iddär dat-Mässinäḡ, ijrəw äḡafyät, isədəw i-äššäreḡa wa dd-imälän, ännähäḡ däḡ-iman-net ḡas, irmäḡ Filiks, innä i-Buləs: «Əḡləw ämära, afäl sär-k əjräwäḡ, ad-käy-dd-aləsäḡ asäḡär.»

²⁶ E-d ähoj a dd-isäḡär Buləs, isəddəwənnət-t, däḡ-a-s, ijar ätṭäma n-ad-t-äkf Buləs a ila azrəf.

²⁷ Ija a-wen-däḡ har okäyän əssin iwətyan, izjär Filiks Təmmənəya, ijjäš Bursəs Fistus edägg-net. Äsof ənta, ad-iṭṭəf Buləs däḡ-takärmüt i-ad-izəjrəz iman-net i-käl-Älyähud.

25

Iyra Buləs Qäyşär i-ad-has-ikkəs tekäriḡt

¹ Käraḡ išilan ḡarät a-s iḡkal Fistus tanäya, ifäl-dd Qäyşära, teje ta fäll-ixkäm, ikkä Yärussälam.

² Əškän-dd sär-s imänokalän n-käl-tikutawen d-imizärän n-Älyähud däḡ-isälan n-Buləs,

³ laqqädän-t d-ad-hasän-dd-isəwwəyy Buləs i-ad-t-əšräḡän däḡ-Yärussälam, jannen a-wen, a-s ija a-wen, äru d-əjän äddäbara n-ad-t-säḡdärän däḡ-tabarät, äḡən-t kərəf.

⁴ Inn'-asän Fistus: «Buləs iha takärmüt däḡ-Qäyşära, ḡarät-a-wen daḡ, näkk iman-in, əkkeḡ Yärussälam däḡ-išilan-i-däḡ,

† 24:20 24:20 A-wa älzämaḡät n-inušämän d-imizärän n-käl-Işrayil wa itirən äššäreḡa, əntäneḡ a-s äḡqallitän, ošaḡän daḡ tamətte d-əlxəkum d-äddin.

⁵ idawnet dār-i iyyād dāḡ-wän tēflasām i-ad-ēbdēdän fälla-wän, umasän tjuhawen-nāwän dāḡ-isālan n-āhalēs-wa-dāḡ sawarän uḍlem.»

⁶ Ikkā Fistus Yārussālam, ija dāḡ-s a t-illan jer-ēttam tēkkēd māraw išilan tēzzar, iqqāl-dd Qāyşāra. Aşāl wa ilkāmān i-wa n-uḡəl-net, issāḡrā-dd Bulēs s-edāgg wa dāḡ-iyattās āşşāreḡa.

⁷ Ijjāş-dd Bulēs ehän-en ḡas, āḡlāyḡālāyän-t-dd käl-Ālyāhud wi-dd fälnen Yārussālam, ad-t-sawarän bahutän d-uḍlemän s-wār t-illa ere āddoben asēddēttu-nāsän.

⁸ Iḍkäl Bulēs mājrād i-ad-ihēl iman-net, isēbbuggēt a-wa fälla-s itawännen, inna: «Wār t-illa uḍlem hi-iwarän, wār t-illa a läbasän āḡşadāḡ wāla ēnneḡ fäll-alāmār n-käl-Ālyāhud, wāla fäll-ehän n-āmudd wa māqqārän, wāla fäll-Qāyşār-i n-āmānokāl wa māqqārän.»

⁹ Innā Fistus ālwāqq-wen i-Bulēs i-ad-ijrāz i-käl-Ālyāhud: «Ak tārḍed s-ad-tēkkēd Yārussālam i-ad-kāy dāḡ-s ēşrāḡāḡ meḡ?»

¹⁰ Inn'-as Bulēs: «Nākk, āmāra, Qāyşār-i n-āmānokāl wa māqqārän ihän Roma, ēnta a-s ārheḡ tebdēde data-s i-ad-hi-işrāḡ. Käl-Ālyāhud-i sār-k dd-ēşkānen, wār t-illa a hasän-āḡşadāḡ, a-wen, kāyy iman-nākk, hannāyād-t.

¹¹ Kunta ill'-e a āḡşadāḡ wāla a jeḡ läbasän, ārḍeeḡ s-tamāttant māşan, kunta a wa fäll-i itawännen bahu, adiş, wār-ēleḡ s-ad-ētwējjāḡ jer-ifassän-nāsän. Āmāra, şāmad tanfust-da-dāḡ, āḡreḡ Qāyşār wa n-āmānokāl māqqārän.»

¹² Ānmānhāy Fistus d-inušāmān wi ḡattāsnen āşşāreḡa tēzzar, innā i-Bulēs: «Şāmad kāyy iman-nākk a iḡrān āmānokāl wa māqqārän, adiş, ad-hak-sukāḡ.»

Tebādde n-Bulēs dat-Fistus d-Āgribba

¹³ Hārāt n-işilan ḍarāt-a-wen-dāḡ, osā-dd āmānokāl iyyän s-isēm-net Āgribba āddeew d-wälātma-s s-isēm-net Berenis, jan-dd tāboşajt s-Fistus dāḡ-Qāyşāra.

¹⁴ Jān išilan dihen ḡas, iḍkäl-asän-dd Fistus isālan n-Bulēs, inn'-asän: «Ill'-e diha āhalēs dd-oyya Filiks dāḡ-takārmūt,

¹⁵ ēşkān-dd sār-i fälla-s imānokālän n-käl-tikutawen d-inušāmān n-käl-Ālyāhud, ēttārän dāḡ-i ad-t-siḍewāḡ dāḡ-āşşāreḡa

¹⁶ māşan, ēllāḡeḡ-asän a-s ālqanun-nānāḡ nākkāneḍ-i n-käl-Roma, wār hanāḡ-ijrew ad-nēsiḍew āwadēm dāḡ-āşşāreḡa ar s-ad-t-dd-nāssibdād dat-āşşāreḡa tēzzar, nēlmēd kunta a-wa fälla-s itawännen tidēt meḡ.

¹⁷ Osän-ahi-dd dāḡ-Qāyşāra ḡas, ēssāḡrāḡ-asän-dd nākk iman-in āhalēs wa s-sār-i dd-ēşkān.

¹⁸ Āḡelāḡ dāḡ-a-wa fälla-s jannen, iḡşad a māqqoorän māşan, oseḡ-t wār-ija a-wen

¹⁹ ed, isālan n-āddin-nāsän d-isālan ēkkanen āhalēs iyyän āmmun s-isēm-net Ÿisa, s-orda ēnta a-s inkār-dd jer-inēmmuttan, ēnta-den-dāḡ a-wa ikkān jere-sän,

²⁰ wār-ēssenāḡ a has-e-ājāḡ, ēttārāḡ dāḡ-s ad-ākk Yārussālam i-ad-dāḡ-s itwēşrāḡ ed, nākk iman-in, wār hēnnēyāḡ uḍlem t-āswārāḡ

²¹ māşan, āssof teḡāre n-Qāyşār wa n-āmānokāl māqqārän ed, ijrāw-as ālqanun-nānāḡ a-wen.»

²² Iggād-dd Āgribba ālwāqq-wen, inna i-Fistus: «Āhalēs-wa-dāḡ, sāsł'-ahi-has nākk-dāḡ.» Inn'-as Fistus: «Aşēkka, ad-t-dd-sēbdēdāḡ data-k, tēslēd-as.»

²³ Āffāw ḡas, āssahāḡ-dd Āgribba aşāl s-ālxal wa n-imānokālän ēnta d-Berenis ta n-wälātma-s, ējjāşän ehän wa n-āşşāreḡa āddewän d-kumānda d-inušāmān n-aḡrēm. Issāḡrā-dd Fistus Bulēs, ittēlwāy-dd.

²⁴ Immējrād Fistus, innā: «Āmānokāl Āgribba, kāwāneḍ-i dd-ēżżēmmāyñen diha-dāḡ aşāl-i, āhalēs-i-dāḡ hannāyām, wār t-illa dāḡ-Yārussālam hakd diha-dāḡ, ere s-wādden innā, ābas ānihājja d-tāmudre.

²⁵ Däx-a-wa hi-dd-iqqälän näkk, wär t-illa uđlem fälla-s əjrawäx t-äsinähäjjän d-tamättant mäšan, šamad ənta iman-net a äsnäfränän ad-t-išräx ämänokal wa mäqqärän, adiš ad-has-t-sukax i-ad-t-išräx.

²⁶ Hakd a-wen-däx, wär-ärheç, ad-has-t-sukax ar s-ad-t-äsidawäx d-takarđe däx-iktab uđlem wa t-iwarän. Təssəba n-a-wen-däx a fäl ässofäx ad-t-dd-səbdədäx data-k i-ad-hi-təkfəd tayətte n-a-wa mad-əktəbäx däx-takarđe i-ämänokal wa mäqqärän darät isəstanän wi t-mad-äjäx

²⁷ ed, wär-il' əmmək n-ad-sukax ämänokal u-takarđut s-wär-ätwässän a-wa iḡšād.»

26

Edäwänne wa ija Buləs i-ad-ikkəs uđlem fäll-iman-net (Ijitän 22:6-16; 26:12-18)

¹ İdkäl Ägribba mäjräd, inna i-Buləs: «Mäjräd! Əkkəs uđlem fäll-iman-näk.» İdkäl Buləs äfuss-net i-ad-has-səjəd tamətte, innä:

² «Ämänokal Ägribba, ämoos-ahi a mäqqorän turhajät n-mäjräd wa hi-təkfəd ašäl-i-däx i-ad-əkkəsäx fäll-i uđlem wa hi-äswärän käl-Älyähud wi hi-dd-əškänen sär-wän.

³ Ğssanäx a-s wär t-illa a hak-idrajän däx-älçadatän-näsän, wäla däx-tijəttewen n-äddin-näsän, a-wen-däx a fäl əttaräx däx-k tazidert n-ad-hi-səjədəd.

⁴ Näkk, wär t-illa ägg-äkall-i-däx wärän issen a-s təmmäđrit-in iket-net, jeç-tät jer-käl-tumast-in däx-Yäruşsaläm-i-däx ədwäläx.

⁵ Äru əzzayän-ahi, əssanän daç a-wa ämoosäx kunta äbokän i-a-wen, tämudrenin iket-net, əjeç-tät däx-alkum i-a-wa saçra taggayt ta n-käl-faris, wär t-təlla taggayt tät-tojarät isəm, wäla älyädalät däx-äddin-nänäx.

⁶ Ašäl-i, əbdadäx dat-äššäreça fäl təssəba n-ätṭäma wa järäx däx-ärkäwäl-wa ijjäš Mässinäx i-abbatän-nänäx wi n-ibda,

⁷ äṭṭäma-en-däx, a-s äqqalnät tiwsaten-nänäx ti n-märawät d-sänatät n-Işrayil ed, a-wen-däx a sär-snät dd-oräwän älyibadät n-Mässinäx ehäđ d-ašäl. Ämänokal-in, wär t-illa uđlem hi-äsiwärän käl-Älyähud wi hi-dd-əškänen säl wen-däx.

⁸ Ak ajän ämoos-awän täkunt a-wa s-ilkam ad-dd-isənkär Mässinäx inəmmuttan?

⁹ Däx-a-wa hi-dd-iqqälän näkk, wär t-illa a-wa-däx wär-əjeç i-ad-hin-aləməx s-ıyyät isəm wa n-Ÿisa wa n-Näşirät.

¹⁰ A-wen, jeç-t däx-açrəm wa n-Yäruşsaläm-i däx-hi-əjräwän imänokalän n-käl-tikutawen asəttärməs n-e d t-illäm ere ilkamän i-Ÿisa Älmaseç, äjäh-t däx-takarđut. Afäl ənhäyäh i däx-sän änihäjjän d-tamättant, ifassän-in a-s tajjäh iman-net.

¹¹ Əkkeç jer-ihänan n-äddin wi n-käl-Älyähud i-ad-tän-säknäx däx-sän açana, šahäşşaläh-tän s-asəkkufär, däx-təmyäre n-ađkär-näsän wa hi-ihän, ahoreç-tän har ikallän wi iyyäđnen däx-əzzaçän.

(Ijitän 9:1-19; 22:6-16)

¹² Däx-isälan n-a-wen-däx a fäl əkkeç Dämaşäç, äwwayäh tikarđiwen hi-əkfan imänokalän n-käl-tikutawen, hi-əjrawnen tädabit n-a-wa s-ärheç iji-net.

¹³ Ämänokal-in, əgleç däx-a-wen-däx a-s hin-ohäzäh Dämaşäç s-ammas n-tarähut, wäla a hin-əjrähäh näkk d-imidiwän-in a-s ənhäyäh ännur dd-ifalän isənnawän ojarän täfukt amləwləw.

¹⁴ Nəhä-dd noça iket-däx-nänäx, əsleç dihen i-eməsli hi-innän däx-Ÿäbranəyya: <Sawəl, Sawəl! Ma käy-orämän sär-i, tiçəzzəbud-ahi? Ad-hak-indär amzəzəçj där-i härkuk.>

15 Ǝnneḡ-as: <Emäli, mi tämoosäd?> Inn’-ahi Emäli: <Näkk a-wa Ƴisa wa tiḡezzəbud.

16 Ämära, əbdəd fäll-iman-näk, änfaläläḡ-ak-dd i-ad-tumasäd ännämmašul-in, tumasäd daḡ tajuhe-nin däḡ-a-wa tənḡäyäd ašäl-i-däḡ d-a-wa hak dd-madän-infiləl ḡarät a-wa,

17 ad-käy-dd-äḡləsəḡ däḡ-käl-Älyähud d-inəzzulam† šəmmişäläḡ-käy sār-sän,

18 i-ad-tarəd tiṡṡawen-näsän, əzjārän-dd tihay s-ännur, əzjārän-dd tärna n-Iblis s-Mässinäḡ, amənän sār-i i-ad-tän-äkfäḡ tenäšše n-ibäkkaḡän i-ad-ahərən tākasit d-iməššeddəjän wi iyyäḡnen.>

19 Ämänokal-in Ägribba, wär-ətteräḡ anməšri i-a-wa hi-dd-änfalälän dd-ifälän išənnawän ed, Mässinäḡ ad-dd-ifal.

20 Ǝmməjrädäḡ s-tizarät i-käl-Dämašəḡ d-käl-Yärussälam təzzar, okäyäḡ s-Älyähudəyät d-iḡärman wi iyyäḡnen ḡän inəzzulam, xaṡṡabäḡ-asän iket-däḡ-näsän isälan n-a-s lan s-ad-utabän, əjən tämudre täddewät d-imärkedän olaxnen ässiitbätnen tiynəya ta dd-təšräyät fälla-sän.

21 Təssəba n-a-wen däḡ, a fäl fäll-i oḡän käl-Älyähud däḡ-ammās n-ehän n-ämudd wa mäqqārän, əttārän tenäḡe-nin

22 mäšan, idḡäl-ahi Mässinäḡ, ikkäs-ahi-dd däḡ-ifassän-näsän i-ad-udabəḡ tebdəde, äjjayḡäḡ fäll-isälan-net har ašäl-i-däḡ i-wi länen isəm hakd wi t-wären əla. A-wa jänneḡ daḡ ašäl-i-däḡ, wär-ämoos a äynayän, äru däḡ-s ässewälän ännäbitän d-Mosa-i əssətbatnen a-s əlkamän isälan-wi-däḡ ḡawän-tajjäḡ.

23 A-wen a t-ämoosän, a-s ilkam ad-inḡəy Ƴisa Älmasəḡ tersəmmawen təzzar, umas teḡäfädde n-äddinät wi dd-maden-ənkär jer-inəmmuttan i-ad-ətwəjjən isälan n-ännur n-əḡəllas i-käl-Älyähud hakd inəzzulam.»

Älwižab n-Ägribba i-Buləs

24 Ämmiijräd Buləs itakkäs uḡlem fäll-iman-net dihen-däḡ a-s iḡkäl Fistus emäsli-net, innä: «Käyy Buləs, äbas təssanäd a jänned, təkkas däḡ-k təmḡäre n-təḡuləma tayətte.»

25 Inn’-as Buləs: «Ämänokal-in Fistus, näkk ḡas ozja ənniyät-in, əjrahäḡ a-wa ḡeḡ; a-wa jänneḡ iket-net, wär-ämoos ḡas ar tidət lat ujhə.

26 Käyy daḡ ämänokal-in Ägribba, wär hak-ədrejän isälan-win-däḡ, a-wen-däḡ daḡ a fäl wär-äksudäḡ mäjräd data-k, ed wär t-illa däḡ-isälan-wi-däḡ a-s wädden təssanäd sār-s e-d, əkkasäḡ äššäk a-s isälan-wi-däḡ, wär jen däḡ-ufär.

27 Ämänokal-in Ägribba, tomanäd s-a-wa ənnän ännäbitän, wädden?»

28 Iggäd-dd Ägribba älwäqq-wen s-Buləs, inn’-as: «Käyy, ḡannäyäḡ-käy, a əndärrän ḡas teḡaläd ämoosäḡ älməssexi.»

29 Inn’-as Buləs: «Jer-a əndärrän wäla a hin-illan i-ad-tumasäd a-wen, daläḡ-ak Mässinäḡ käyy hakd älzämaḡät wa hi-äsijädän, ad-där-i taləḡəm ḡärät iket-net, a säl tišəm-ti-däḡ hi-ḡänen.»

30 Issəmdä Buləs mäjräd-wen-däḡ ḡas, ibdäd ämänokal Fistus hakd Ägribba d-Berenis, təlkäm-asän daḡ tamətte,

31 zäjjarän äddinät, tinmənnin: «Äḡaləs-i-däḡ, wär t-illa a iḡšad t-äsinähäjjän d-tamättant wäla tišəm.»

32 Inna Ägribba i-Fistus älwäqq-wen: «Ǝnnär wädden teḡäre-i ija äḡaləs-i-däḡ i-Qäyšär wa n-ämänokal mäqqārän, itwəyy’-in.»

† 26:17 26:17 – Ƴur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-däḡ a fäl tiwsaten ti iyyäḡnen iket-näsän, ti n-inəzzulam. — Ašäl-i-däḡ, änäzzalim, äkafär (ere wärän issen s-Mässinäḡ).

27

Asikəl n-Buləs s-Roma

¹ Tāwwāḍ-dd tāqqān ta n-tikawt n-ākall wa n-Iṭali ḡas, jān käl-əlxəkum Buləs d-käl-takärmuṭ wi iyyāḍnen dāḡ-ifassān n-kābtān s-isəm-net Yulyus, ənta a ānnihāḍān fäll-ejhān n-əḡəskār wa s-isəm-net: «Wa tān-ojārān».

² Nəjjāš turāft n-aman jat isəm Adāramit, nəkkā ākall wa n-Azya, nāddeew dāḡ-asikəl-nānāḡ d-Aristarāq wa n-Tāslonika.

³ Ašāl wa ilkāmān i-wen, nāsjan dāḡ-teje ta n-Sidon. Āmoos kābtān Yulyus āwadəm s-ikna Buləs əjjāruḡāt, iglā fāw har t-ikfā turhajāt n-ad-ākk imuzāyān-net wi hānen aḡrəm-en i-ad-has-arəjān dāḡ-asikəl.

⁴ Nəfāl dihen, nällil asālim n-aman, nāmsadāḡ i-awtəl wa n-Qəbrus i-ad-nəmjušet d-aḍu d-tināzzāmāren-ti dd-bahhālneṭ i-turāft.

⁵ Nəjlāy ḍarāt-a-wen ejārew wa səmmān ošālān dāḡ-ākall wa n-Silisi d-Banfəli, nāsjan dāḡ-taḡrəmt ta n-Mira təhāt ākall wa n-Lisya.

⁶ Ijrāw kābtān-nānāḡ dihen turāft n-aman təkkaṭ Iṭali, ij'-anāḡ dāḡ-s.

⁷ Nəjā išilan nāsialām sollan fäll-aman har šārnaš d-nānmawāḍ d-aḡrəm wa n-Kānida, igdāl-anāḡ əḡḡuhu n-aḍu ad-nakəy ḡas, nārmās tamdujt ta n-ajus n-ākall wa n-Kritus, nəkka dawa-s har nāmsadāḡ d-Sālmuni.

⁸ Šārnaš d-nällil asālim n-ejārew har dd-nāwwāḍ edāgg ijan isəm: tasjənt ta n-tihusay, a-wen edāgg, ānimahāzān d-taḡrəmt ta n-Lazaya.

Anməntaš n-ejārew fäll-turāft n-aman ta iha Buləs

⁹ Nəja išilan s-əmmək-en-dāḡ a-s fälla-nāḡ ānməntaš ejārew, nəjjāš miši, okāy fälla-nāḡ dāḡ āzum wa n-tajrəst.

¹⁰ Dihen-dāḡ, ad-āsmātār Buləs iməssukal wi iyyāḍnen hānen turāft n-aman, inn'-asān: «Meddən, hannāyāḡ a-s asikəl-nānāḡ wār-mad-āj wāla šāḡšad d-miši; nākkāneḍ hakd a-wa ihān turāft, nəha miši d-šāḡšad-wen-dāḡ.»

¹¹ Māšan ojār tafləst ija kābtān a-wa has-innā u-taḡāya-net a-wa innā Buləs.

¹² Ənhāyān a-s edāgg-wa-dāḡ āsjānān wādden edāgg dāḡ-isasakay āwadəm tajrəst ḡas, āsoḡālān tisdas n-turāft, ārmāsān tamdujt n-aḡrəm wa n-Fənikus daw-awtəl wa n-Kritus i-ad-dāḡ-s səssikəyān tajrəst.

¹³ Əllan-t dihen-dāḡ a-s dd-isrāj aḍu dd-ifalān ajus, orān-dd turāft, ārkābān dāḡ-a-s āllilān tasāja n-ejārew ed, āḡelān āḡlāsān dāḡ-āššar-net.

¹⁴ A əndārrān ḍarāt-a-wen-dāḡ, toḍā-dd fälla-sān tāšikwālt tāššoohet s-itawānna dāḡ-Tālyunanit: Erakilun.

¹⁵ Izzəwāt āššahāt-net turāft, iglā dār-s emānān, ābas t-illa ere dāḡ-s ānnihāḍān.

¹⁶ Ija a-wen-dāḡ har nokāy afälla n-awtəl wa n-Kluda, ij'-anāḡ aḡrəm-en eff ḡas, nəttār āddābara s-nānmawāḍ d-isāḡlas wi hānen turāft.

¹⁷ Əjrāwān meddən aḍkul n-asāḡləs wa n-əndārrān ihān turāft, āstārākken-t dāḡ-aman, əkrāsān-t dāḡ-turāft s-iḡunan, nəḍkāl tisdas i-ad-tānāt-isəkəf aḍu i-ad-ābas hanāḡ-āzziwāt aḍu. Nāšinanāj s-əmmək-wen-dāḡ har nānmawāḍ d-Libya, noyya iman-nānāḡ s-ašrut wa dāḡ-wār šəjrətān aman.

¹⁸ Okāy fälla-nāḡ ašāl imdan nābillān d-aḍu s-əmmək-wen-dāḡ, har hanāḡ-ilzām ašāl wa iyyāḍān, ad-hin-nəjār ilalān wi hānen turāft i-ad-tifsas.

¹⁹ Ašāl wa s-kāraḍ, jārān-in inaxdimān a-wa āzzayān ihān turāft iket-net.

²⁰ Nəjā āzzāman wār nənhey tāfukt wāla etran, a ija a-wen-dāḡ, itiwwaḍ-dd fälla-nāḡ āššahāt n-aḍu har ābas hanāḡ-iha ere ijarān āṭṭāma n-tāmudre.

²¹ Išilan-win-dāḡ, nāssakāy-tān wār t-illa a nəkša, dāḡ-a-wen-dāḡ ad-dd-ibdəd Buləs, innā i-āddināt: «Imidiwān-in, ənnār hi-tāsijādām ihənnin a-s hawān-əmməjrādāḡ dāḡ-awtəl wa n-Kritus, wār nətəjjəš miši d-šāḡšad ogdāhān d-a-wa-dāḡ.»

22 Ärheey fälla-wän ämära, ad-hi-səjdəm: sänsät ənniyät-nəwän, ədmanəx-awän a-s wär t-illa i dəx-nəx mad-iba məšan, turäft ənta, əkkəsät ätṭama-net.

23 Änfäläl-ahi-dd änjälos n-Mässinäx əndähaḍ,

24 inn'-ahi: Buləs, wär tärmeḡäd ed, wär t-illa ad-wär təbdeḍad dat-Qäyşär wa n-ämänokal məqqārän. Ad käy-iḡləs Mässinäx käyy d-iməssukal wi dār-täddewäd.

25 Ҳas, imidiwän-in, kuyədät, wär təkkesäm ätṭama, əflasəx a-s Mässinäx a-wa hi-innä, ad-äj,

26 ilkam dəx-nəx ad-nəsəjən fäll-awtəl iyyän.»

27 Nəja ehäḍ-nänəx wa s-māraw d-əkkəz məšan, äzziwät-anəx aḍu härwa fäll-əjärew wa səmmän s-itawänna Adərya, a-wen, dəx-əjärew wa səmmän məqqārän n-Miditerani. Ebre n-ammas n-ehäḍ, ofräyän käl-taḡäya n-turäft a-s ohazän edägg dəx-wär əknən aman əjut.

28 Järän aḡan dəx-aman i-ad-sär-s əkətən təşşəjrət n-aman, osän aman jan təşşəjrət n-käraḍät timərwen n-metär d-əssa. Eḡlän har dihen, oläsän daḡ ejer n-aḡan-ənnin dəx-aman, imäl-asän ider n-aman ämära, dəx-sänatät timərwen n-metär d-əttam.

29 Äksudän käl-taḡäya ad-tiḍəw turäft-näsän, tənkef i-tihun, ḡas, järän əkkəzät tiḡolyawen dəx-aman i-ad-əhəlnät turäft, əqqälän ḍarät-a-wen i-tebädde n-aşäl.

30 Dəx-a-wen-dəx, ad-tattārän käl-taḡäya əmmək s-əjmädän, äsräsän dəx-aman asəḡləs əndärrän, jän äsarü n-a-s ärhan ad-hin-şəşşenkəşän tiḡolyawen ti jän dəx-aman i-ad-əknənät antum, ətṭəfnät turäft.

31 Ilmäḍ Buləs fäll-amsud-näsän ḡas, innä i-käbtän d-əssärdusa: «Änn i-meddən-näk, afäl wär-äqqimän meddən-wi-dəx dəx-turäft, adiş, əkkəsnet ätṭama n-tämudre.»

32 Äḡtäsän əssärdusa ḍarät-a-wen iḡunan n-asəḡləs wa əndärrän, oyyän-t iḡlä, äwwäyän-t aman.

33 A əndärrän dat-äbaḡqu n-tifawt, äsmätär Buləs imidiwän-net i-ad-əkşən härät fäl-a-s lan a iwwädän māraw işilan d-əkkəz wär t-illa a ikkan imawän-näsän.

34 Inn'-asän Buləs: «Ənfəwät iman-nəwän s-härät iyyän, əfləsät a-s wär t-illa dəx-wän-i s-mad-hin-iba wäla-dəx emzäd iyyän ḡas dəx-eḡäf-net.»

35 Inn'-asän Buləs a-wen-dəx ḡas, idkäl-dd tiḡəlwen, ämmoy i-Mässinäx dat-äddinät wi hanen turäft, äzun-tänät ḍarät-a-wen, ad-itatt.

36 Tokäy-tän tarəmməḡt, ad-tattän əntəneḍ-dəx.

37 Dəx-turäft-en-dəx, nəwwäḍ sänatät timaḍ n-ähaləs d-əssayät timərwen d-säḍis.

38 Älwäqq wa d-əyyəwänän äddinät, əssänḡälän-in älkäma dəx-əjärew i-ad-səfsəsän turäft.

39 Ja tifawt, əşlämän dəx-ijəj taḡmärt dəx-ijjət äkall məšan wär-əssenän ma ämoos äkall-wen-dəx. Ənnän ad-sär-s ənnäḍän turäft, səjnən-tät dihen-dəx kunta ämmukkän a-wen.

40 Əkkäsän isässärän wi ittäfnen turäft, oyyän-tän-in s-aman, orän iḡunan wi n-taḡäya sasəḡadnen turäft, jän tisdas i-aḍu s-data n-turäft i-ad-tän-in-imhəl aḍu s-edägg wa äqqurän əşlämän.

41 Diha-dəx d-əkkän s-data a əndärrän ad-oḍän fäll-härät n-tejeft, təntäm-asän turäft dəx-äkall. Ittəytäy äkumkum-net dəx-äkall hundəx har äbas timtəkwəy, irzä-dd daḡ ajilal-net fäll-äşşahät wa ija anməntaş n-əjärew wa səmmän.

42 Ənhäyän əssärdusa a-wen ḡas, änmännakän i-ad-əjən iman n-käl-takärmüt i-udaḡ ad-ijmäḍ wäl' iyyän dəx-eşşaf,

43 məšan unjäy-asän käbtän s-a-wen fäl tärha-i ija i-Buləs. Dihen-dəx ad-innä käbtän i-äddinät wi əssännen eşşaf, ad-əyyən iman-näsän s-tizarät s-aman, əşyəfän s-asälim.

⁴⁴ Innä i-wi iyyädnen, ad-əjən äddäbara fäl näyän iferəsän n-tisəjwen n-turäft wi dd-irza adu. Emmək-wen-däx a-s hin-əwwädän iket-däx-näsän asälim n-aman, əddarän-äxlasän.

28

Täsjän turäft n-aman ta iha Buləs däx-awtəl wa n-Malta

¹ Näxläs-dd däx-a-wen-däx iket-däx-nänäx, nəzjār-dd aman xas, nəslä a-s awtəl wa däx-näsjän, isəm-net Malta.

² Äsmäjaren-anäx käl-awtəl-en, əssäryän-anäx efew, nəzzäh sār-s iket-nänäx ed, iwat əjənna, ija esämeḍ.

³ Ikkəmät-dd Buləs isuksukän s-əshäjäljäl efew məšan, täkwättät-t taššält dd-təstax tukəse n-efew, tärmäm däx-äfuss-net.

⁴ Ənhäyän käl-awtəl a-wen xas, ad-tinmənnin: «Ähaləs-i-däx, wär t-ih' äššäk a-s emäj j n-iman, ənta da-däx s-iket dd-ixlās däx-aman məšan, ilkäm-as-dd əlxədär n-a-wa ixšad i-Mässinäx.»

⁵ Irsäy-in Buləs taššält ḍarät-a-wen fäll-iman-net, ännunnäzät-tät däx-efew, wär t-illa a has-täxšad.

⁶ Ija a-wen xas, əsbäläläxän käl-awtəl däx-Buləs, ija xur-sän a-s a əndärrän xas a has-in-əqqimän ihḍəḍi, mex ämmut əlwäqq-wen-däx. Ähojän wär t-illa a ijan däx torda-näsän xas, əqqälän s-a-wa ənnän, ad-jannen ämära: «A-wa, härät däx-imälan wi n-išənnawän.»

⁷ Edägg-en, ohazän-t išekraš n-ämänokal n-awtəl s-isəm-net Bubləs. Isl'-anäx xas, äsməjarät-anäx s-ehän-net, nässakäy xur-s kəraḍ išilan.

⁸ Nəll'-e dihen-däx a-s tärmäs tenəde täddewät d-tanänäxat abba n-ämänokal. Os'-e Buləs, əswär-t ifassän-net, ittär-as däx-Mässinäx, izzäy.

⁹ Äwwäyän-dd käl-əkall ḍarät-a-wen imarhinän-näsän, äzozäy-tän Buləs əntäneḍ-däx.

¹⁰ Əssəmxärän-anäx käl-awtəl en-däx fäl təssəba n-a-wen-däx. Nässawäḍ tekle xas, jän-anäx äzzad igdähän i-a-wa hanäx-in-əqqimän däx-asikəl.

Ujəš n-Buləs i-axrəm wa n-Roma

¹¹ Šamad fälla-näx okayän kəraḍ orän n-asikəl, ad-nəjrəw turäft n-aman täššiwwärät idmawän d-ismawän n-imälan n-eknewän wi s-itawänna: Kästur d-Boläkəs dd-falät Iskändərya, nəjjäš-tät, tässakäy ḍär-näx tajrəst däx-awtəl-wen-däx.

¹² Nəfäl dihen, näsjän kəraḍ išilan däx-Sirakuz,

¹³ təzzar nällil asälim n-aman har Rajyo. Ašäl wa ilkämän i-wen, inkär-dd fälla-näx adu dd-ifalän əjus, izzəwät-anäx emänän har näsjän däx-Bəzula.

¹⁴ Nəjrəw dihen härät däx-ayətma-näx däx-əddin, äsmäjaren-anäx; nässakäy xur-sän əssəbox imdan. Xur-sän en-däx, ad-närmäs tamdujt ta n-Roma.

¹⁵ Əslän-anäx härät däx-əlməssexitän n-Roma xas, əlkəḍän-anäx-dd s-əssuk n-axrəm wa n-Abyud, əssəlkəḍän-anäx-dd da x iyyäḍ s-əssuk wa n-axrəm wa n-kəraḍät tihənzubba. Inhäy-tän Buləs xas, irəš i-Mässinäx, ikf'-e a-wen-däx ätṭäma d-əššahät əynayän.

¹⁶ Näwwäḍ-in Roma xas, irḍa əlxəkum i-Buləs s-ad-ifär ehän n-iman-net, izzäx däx-s ənta d-əssərdasi wa has-ijän ənniyät.

Ajəyh wa ija Buləs däx-axrəm wa n-Roma

¹⁷ Kəraḍ išilan ḍarät-a-wen, issəxrä-dd Buləs inušämän n-käl-Əlyähud wi əzzəxnen Roma. Əžžəmməxän-dd sār-s xas, inn'-asän: «Ayətma-x, wär t-illa a

äḡšadäḡ s-animäšräyāḡ i-tumast-nänāḡ, wäla i-älḡadatän-nänāḡ. Aḡrəm wa n-Yäruššälam a däḡ-dd-əttärmäsäḡ, əjjäšäḡ däḡ-s takärmüt, ätwäjjäḡ jer-ifassän n-käl-Roma,

¹⁸ əttärän əntäneḡ almud n-a-wa äḡšadäḡ ḡarät a-s hi-äsımäjrädän mäšan, wär t-illa äḡḡärora fäll-i əjrawän hi-äsinähäjjän d-tamättant, əttärän fäw ad-hin-səwwəyyən mäšan,

¹⁹ ənkärän-dd käl-Älyähud dihen fäll-i, unjäyän ärḡän a-wa hi-äḡtäsän käl-Roma. Ənhäyāḡ a-s wär t-illa a ärhan säl tamättant-in ḡas, tämoos-ahi teḡäre n-Qäyšär wa n-ämänokal mäqqärän ihän Roma tähaššilt. Mäšan, hakd a-wen-däḡ, wär-iha ənniyät-in n-ad-säwräḡ tumast-in uḡlem wäl' iyyän.

²⁰ A-wa-däḡ a fäl äsdärhänäḡ ahänay-näwän, səfhömäḡ-käwän a-s tišəm-ti-heḡ, wär tänät-dd-orew sär-i a säl äḡḡäma wa ohäräḡ d-käl-Išrayil iket-näsän.»

²¹ Inn'-as älzämaḡät wa sär-s dd-äddewän: «Däḡ-a-wa hanäḡ-dd-iqqälän näkkäneḡ, wär t-təlla täkarḡe hanäḡ-dd-tosat dd-falät Älyähudəyät hanäḡ-təjat isälan-näk, wär t-illa daḡ ere nənhay däḡ-ayətma-näḡ dd-ifalän dihen hanäḡ-käy-omalän wäla i hanäḡ-käy-oḡamän.

²² Ämära, nässof, ad-hak-nəsəll näkkäneḡ iman-nänāḡ ed taggayt ta hed təḡlät fäll-tidət n-iman-net, nəssan a-s wär t-illa edäḡg s-wädden äššunjen-tät däḡ-s äddinät.»

²³ Ohärän där-s ḡarät-a-wen ašäl däḡ-t-dd-mad-äqqəlän äddewän d-äddinät ojärnen wi dd-osänen äsihe-wa. Osän-dd ašäl-en, imməjräd-asän wa-däḡ n-tifawt har toḡa täfukt, itafässar-asän tijəttewen n-a-wa isayra, ixattäb-asän isälan n-Təmmənəya n-Mässinäḡ d-a-wa innä alämär wa n-Mosa d-ännäbitän wi iyyäḡnen, isafham-tän daḡ a-wa ənnän fäll-ḡisaÄlmaseḡ.

²⁴ Issətbät ašrut iyyän däḡ-sän tənna-net, äšḡär-as ašrut wa iyyäḡän ulh-net, unjäyän omänän s-mäjräd n-Mässinäḡ.

²⁵ A-s t-fälän äddinät, äzunän däḡ-a-wa ordän fäll-ḡisa Älmaseḡ. Inhäy Buləs täḡune ta jän ḡas, inn'-asän: «Ijmaḡ-t äššäk a-s tidət a-wa innä Unfas Šäddijän i-imärawän-nänāḡ s-əmm n-ännäbi Saya† a-s t-äšmašäl Mässinäḡ. Äzzäman-en, inn'-as:

²⁶ <Əḡləw, äkk äddinät-i-däḡ, tənnəd-asän:

ad-salläm s-timəzzujen-näwän mäšan,
wär t-illa a mad-təfhəmäm,
ad-təswaḡäm s-tiḡtawen-näwän mäšan,
wär t-illa a mad-tənhəyäm

²⁷ fäl-a-s tamətte-i, täšḡär-ahi ulh-net,
täḡfäl-ahi timəzzujen-net,
tähär-ahi tiḡtawen-net i-ad-wär hənney,
wär səll,

i-ad-wär t-illa a isalmaḡän ulh-net,
i-ad-sär-i dd-tənnäḡ, zuzəḡäḡ-tät.»

²⁸ Inn'-asän Buləs ḡarät-a-wen: «Əlmədät, ḡur-ašäl-i-däḡ a-s, əḡḡəllas wa käwän-ikfa Mässinäḡ, ikf'-e daḡ i-inəzzulam† -i has-e-səjəḡnen.» [

²⁹ Issəmda Buləs tənna n-a-wen ḡas, fälän-t käl-Älyähud ämiḡḡännän jer-iman-näsän.]

† 28:25 28:25 A-wa ännäbi dd-äzzarän i-ḡisa, äloläy däḡ-isälan-net əssayät timaḡ n-awätay dat-tiwit-net.
† 28:28 28:28 – ḡur-käl-Älyähud, ere wärän ämoos äḡḡ-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-däḡ a fäl tiwsaten ti iyyäḡnen iket-näsän, ti n-inəzzulam. — Ašäl-i-däḡ, änäzzalim, äkafär (ere wärän issen s-Mässinäḡ).

³⁰ Izzäḡ Buləs dăḡ-ehän-wen-dăḡ ifär har dăḡ-s ässakäy əssin iwətyan əmdanen. Ijraw iman-net, ehän-en-dăḡ, a dăḡ-t-dd-tisən äddinät iket-näsän wi ärhänen ahänay-net,

³¹ ixaṭṭäb-asän isälan n-Təmmənəya n-Mässinäḡ, isaḡr'-en, wär t-illa daḡ ere has-igdalän tənna n-a-wa s-irha, ad-tän-änn fäll-Emäli Ḳisa Älmasex.

Täkarde-ta iktäb Buləs i-käl-Roma

Äšajəš

¹ A-wa näkk Buləs wa n-akli n-ŸisaÄlmasex dd-iyra s-iman-net i-ad-umasäx änämmašul ixattäbän Älənžil n-Mässinäx i-dägg-adəm.

² Älənžil, isälan-net, äru d-äsjär Mässinäx ätṭäma-näsän däx-əlkəttabän wi šäddijnen əktäbän ännäbitän

³ i-ad-əjön däx-sän isälan n-Ÿisa Älmasex wa n-Rure-s n-Mässinäx.

⁴ Ÿisa, s-eḡäs-net, ahäya n-ämänokal Dawəd a ämoos mäšan, tumast-net i-Rure-s n-Mässinäx, äsdättät-tät Mässinäx s-tärna n-Unfas Šäddijän-i t-dd-issənkärän jer-inəmmuttan.

⁵ Təssəba n-Ÿisa Älmasex-i n-Emäli-nänäx-en-däx, ad-fälla-näx dd-äzzäbbät Mässinäx ännuymät-net, ij'-anäx inəmmušal-net i-ad-amənnät tiwsaten ti n-inəzzulam,† ämašäl-nät erhet-net, səmḡärnät isəm-net.

⁶ Inəzzulam, käla tän-ham käwäneḡ-däx, mäšan, ašäl-i-däx, iyr'-iwän-dd Ÿisa Älmasex s-iman-net.

⁷ Təssəba n-a-wen-däx a fäl hawän-in-kattäbäx täkarde-ta-däx, käwäneḡ-i n-iməšseddəjän ikna Mässinäx tärha əzzaḡnen aḡrəm wa n-Roma. Ähuuläx-käwän-in, ikf'-iwän Mässinäx-i n-Abba-nänäx d-Emäli Ÿisa Älmasex ännuymät d-älxer.

Tenere n-käl-Roma ta tärmäsät Buləs

⁸ Däx-eḡäf n-a-wa s-ärheḡ ad-hawän-tän-ännäx, ärheḡ ad-umayäx i-Mässinäx däx-idəm n-ŸisaÄlmasex fäl-a-s, wär t-ill' äwadəm däx-äddunya s-wädden isl' isälan n-iqqud n-immun-näwän.

⁹ A-wa heḡ däx-asəssiwäd n-isälan n-Älənžil n-Rure-s n-Mässinäx, heḡ-t s-ulh imdan. Mässinäx-i ḡabbädäx s-ulh imdan a-s tajuhe-nin, wär käla okäy ašäl s-wädden kittəwäx-käwän, təddaläx-awän-t

¹⁰ hak ašäl n-a-s kunta erhet-net a-wen, isäryəset-ahi əmmək fäl käwän-in-əkkeḡ.

¹¹ Ijmaḡ-t äššäk a-s äsidärhänäx hullan ahänay-näwän, əzzəyäx-käwän, äkfäx-käwän härät däx-isuf wi hi-ija Unfas Šäddijän i-ad-išṡuhət immun-näwän,

¹² tənfüm-ahi, ənfəwäx-käwän näkk-däx däx-immun wa hanäx-osayän.

¹³ Ayətma-x, ärheḡ ad-təssanäm a-s äru d-äsdärhänäx ad-käwän-in-äkkäx mäšan, har ašäl-i-däx, wär-otes Mässinäx a-wen. Äsidärhänäx hullan ad-ikrəš älxidmät wa heḡ fälla-wän älfäyda s-əmmək wa s-t-ikrəš jer-tiwsaten ti iyyäḡnen n-inəzzulam

¹⁴ fäl-a-s däx-isälan wi n-Älənžil, wär t-illa ere s-wädden ila fäll-i älyar jer-käl-iḡärman wäla käl-ejef, jer-älḡulam wäla älzuhäl.

¹⁵ Iba n-azəmmäzli n-äddinät-en-däx a sār-i dd-oräwän derhan n-ad-käwän-in-äkkäx käwäneḡ-däx i əzzäḡnen Roma, äjäx-awän isälan n-Älənžil.

Immun a ihakkän idəm dat-Mässinäx

¹⁶ Wär-äkrakädäx Älənžil ed ənta a-s tärna ta s-iḡalläs Mässinäx ere sār-s omänändäx, käl-Älyähud təzzar əlkämän-asäl inəzzulam.

† 1:5 1:5 – Ÿur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyäḡnen iket-näsän, ti n-inəzzulam. — Ašäl-i-däx, änəzzalim, äkafär (ere wärän issen s-Mässinäx).

¹⁷ Älönzil-en-däx a hanäx-isalmadän mi ilan idəm dat-Mässinäx s-əmmək wa s-tän-ənnän əlkəttabän n-Mässinäx a-s ənnän:

«Xur-sänto har sämdo,
immun a ihakkän ägg-adəm idəm dat-Mässinäx
i-ad-äj tämdre ta fälla-s irha Mässinäx.»

A-wa tamašalän inəzzulam

¹⁸ Tidət, Mässinäx, izazäbbat-dd adkär-net fäll-dägg-adəm däx-təssəba n-iba n-tuksəda ta t-wär jen d-iba n-iqqud däx-a-wa tamašalän, əgdalän i-iman-näsän tidət, ənkazän-tät daḡ i-äddinät wi iyyäḍnen s-a-wa läbasän tamašalän.

¹⁹ A-wa s-ämiḡatär ägg-adəm i-ad-sär-s izzəy Mässinäx, inbaj tiṭṭawen ed äsnäfaläl-t-dd.

²⁰ A-wa dār-oläh Mässinäx, wär t-illa ere t-inhayän s-tiṭṭawen-net mäšan, tärna-net ta täxlälät, tumast-net i-Mässinäx, a-wen-däx iket-net, afäl däx-s äznäzjamät ägg-adəm, ad-t-inhöy däx-a-wa dd-ibna a-s dd-ixläk äddunya.

²¹ Təssəba n-a-wen-däx a fäl äbas t-illa asäru wäl' iyyän i-iba n-tuksəda-net ed, dägg-adəm, əssanän a-s Mässinäx ill'e mäšan, unjäyän s-ad-t-səmyärän wäla s-ad-has-umayän. Əzzəwen-tän erk inəzjam-näsän s-mäläyähna, oräw-dd sār-sän a-wen-däx tekle däx-tihay d-täḡart n-ulh.

²² Jan iman-näsän äddinät äzizäbbätnen musnät, a-s ija a-wen, irmas-tän iba n-tayətə.

²³ Ənnär lan tayətə, wär həkkən iroriyawän-näsän Mässinäx-i ixlälän n-Mässi-s n-ännur, samäskalän-t əlxibadät n-əşşänämän əşşiwwärnen dägg-adəm-i s-a ijan-däx, ad-tän-iba, ad-ḡabbädän taliwen d-igḡad d-irəzzejän d-izlulam.

²⁴ Inhäy Mässinäx erk əzzənəf wa əjjäşän ḡas, äsräs-tän, oyy'-en, iwway-tän aḡu, oşäl dār-sän ḡarät erk derhanän n-ulhawän-näsän, ad-samäḡasän iman-näsän, şilləwnät-tän tikrukaḡ.

²⁵ Äsmättäyän tidət ta n-Mässinäx, jän-tät bahu; əqqälän-dd ḡabbädän amätäwäxlak, oyyän Ämaxlak-i änihäjän d-təmmal härkuk. Amin!

²⁶ Təssəba n-a-wen-däx a fäl fälla-sän innäd Mässinäx, oyy'-en, oḡän däx-tikrukaḡ-tin-däx. A-wa issäxräm Mässinäx, ässiixlälänt-əntäned; əbdänät tiḡeḡen-näsän d-meddən-näsnät, oyyänät a-wa ilän əmmək, äqqälän-dd tinmökkinät jer-iman-näsnät.

²⁷ A-wen-däx daḡ a jän meddən-näsnät, järän-in a-wa dd-äzzäbbät Mässinäx aşäl äzzarän, ad-tän-işilləw a äsikärakəḡän. Oyyän meddən tiḡeḡen-näsän, izzəwät-tän iblis-näsän ad-itakk ähaləs-ähaləs, ämoos a-wen-däx tän-işlään əlxəqq wa dār-ənihäjän imojjan-näsän d-təmyäre n-tanməşrayt-näsän.

²⁸ Şamad, unjäyän s-ad-uksaḡän Mässinäx, işläy-asän ənta-däx däx-xorəzzəma wa əkfän iman-näsän, immär härät tiyətwen-näsän, ad-tän-işilləw a äsikärakəḡän wärän itətwəjj.

²⁹ Äsisakäyän ulhawän-näsän däx-iba n-iqqud d-tälläbäst d-erk derhan, d-tismiten d-iji n-iman d-ikənnasän d-əkkäzzu d-erk inəzjam d-ukşaf.

³⁰ Ämoosän imawayän n-ännämima, äşşunjen Mässinäx, əkfärän, həlän, əḡnayän əttəkəbru d-ibərajän, äsisakäyän däx-musnät n-iji n-a-wa läbasän, inəbbudar iket-däx-näsän,

³¹ irmas-tän iba n-tayətə, imärzan n-ärkäwäl, äqqurän, käwalän ulhawän-näsän, wär tən-ha təhanint.

³² İşl'-en a-wen-däx kud-däx əssanän a-s ilkam däx-sän äşşərəḡa n-Mässinäx ed iktab däx-mäjräd-net a-s äddinät wi şillun härätän-win-däx, əlhəllak ḡas a däx-sän ilkamän. Ässetän däx-a-wa äsuksaḡän tən-işlään har eqqas fäw a tājjan i-äddinät wi tamašalnen a-wen-däx tən-işlään wärän il' əmmək.

2

Hak äwadəm d-a-wa has-jän imojjan-net

¹ Äywa, käyy-i isawarän äddinät wi iyyädnen udlem, ere tämoosäd-däx, äbas hak t-illa äsarü; dädi-däx fäw d-sawaräd äddinät wi iyyädnen udlem, ad-satbatäd a-s käyy iman-näk, iwar-käy udlem ed a-wa-däx tän-sawaräd a xaddämäd käyy iman-näk.

² Wär t-ih' ässä, nössan iket-däx-nänäx, a-s äddinät wi tamašalnen härätän-windäx läbasnen, ad-tän-išräx Mässinäx s-ässärexa wär-iha bahu.

³ Uhön käyy, ma yur-k ijan? Käyy-i s-a-wa täjjäd, i läbasän, sawaräd udlem äddinät, torded a-s ad-täylösäd däx-ässärexa n-Mässinäx wa ilkämän?

⁴ Mex käyy šäxnet, wär tössəfräräd tömyäre n-milyaw wa ija Mässinäx d-tazidert-net d-marušät-net? Äniihäjja s-oräw-dd sär-k a-wen-däx tämujrixt, tutabäd.

⁵ Mäšan, käyy wa hannäyax, äqqur ulh-näk, wär tärhed ad-tutabäd. Äššar yas n-Mässinäx a-s ilkam ad-t-dd-izəzzəbbət fälla-k ašäl wa n-aḍkär-net d-ässärexa-net wa oḡädän.

⁶ Ašäl-en, hak äwadəm d-a-wa has-jän imojjan-net.

⁷ Äddinät-wi äkoyädnen däx-amišəl n-a-wa oläxän d-təmmal n-Mässinäx d-semyar-net d-umäx i-tämudre ta n-tidət, ad-tän-äkf Mässinäx tämudre ta täylälät

⁸ mäšan, wi has-äffüllägnen, ässofnen iba n-iqqud uhön tidət, ad-tän-isəlməd a-s wär has-ijrez älxal-näsän, izəzzubbət-dd aḍkär-net fälla-sän.

⁹ Ad-tärməs tissust d-tizzurt e d t-illäm ägg-adəm itamašalän a läbasän, isänt a-wen s-käl-Älyähud, akəy s-tiwsaten ti iyyädnen n-inəzzulam.†

¹⁰ Mäšan, äddinät-wi tamašalnen a-wa oläxän, ad-əjrəwän semyar d-təmmal d-älxer yur-Mässinäx, isänt a-wen s-käl-Älyähud, akəy s-tiwsaten ti iyyädnen

¹¹ fäl-a-s Mässinäx, wär-äzmäzläy äddinät.

¹² Äddinät wi ofänen abäkkad a-s ija a-wen əžhalän i-a-wa innä alämär n-Mässinäx wa dd-äzzäbbät fäll-ännäbi Mosa, ad-dd-ətwäxrən s-ässärexa əntäned-däx mäšan, wär mad-ətwəšräxän s-tijəttewen ti n-alämär-wen-däx. Käl-Älyähud-i ha tijya n-a-wa innä alämär, wär t-illa a hasän-idrajän däx-s, tijəttewen n-alämär-en-däx a-s tän-e-išräx Mässinäx.

¹³ Wädden äddinät-wi sajadnen i-a-wa innä alämär s-timəzzujen-näsän a he-əkrəšnen idəm yur-Mässinäx, änn-ak, wi has-sajadnen s-ulhawän-näsän, tamašalän a-wa däx-s iktäbän, a data-s-e-əkrəšnen idəm.

¹⁴ Kunta tiwsaten ti n-inəzzulam, wär-əssennät s-alämär wa dd-äzzäbbät Mässinäx fäll-ännäbi Mosa, mäšan tamašalnät d-iman-näsnät däx-älžähalät a-wa däx-s ätwännän, ässiilmäd-anäx a-wen-däx a-s, əssannät a-wa oläxän d-iman-näsnät, ämešalnät-t.

¹⁵ Ənta-den-däx a-wa hanäx-isalmadän a-s a-wa innä alämär n-Mässinäx, iktab-t däx-ulhawän-näsnät i-ad-t-ämašalnät, ässiilmäd-tänät daḡ ənniyät-näsnät sär-s, mäqqär daḡ iššaki wa jänät däx-iman-näsnät, tänät-isalmadän s-išk wa jänät kud-däx dehiyyän unjajnät s-a-wen.

¹⁶ Wär t-illa a-s wädden ilkam ad-itbət, infiləl-dd iket-däx-net ašäl wa ilkämän d-e-išräx Mässinäx äddinät s-ḡisaÄlmasex, isənnəfiləl-dd a-wa iffärän däx-ulhawän n-dägg-adəm s-əmmək wa s-tän-innä Älənžil-i xatṭäbäx.

Udlem wa iwärän käl-Älyähud

† 2:9 2:9 – Yur-käl-Älyähud, ere wärän ämoos ägg-Älyähud s-aläšäl mex ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyädnen iket-näsnät, ti n-inəzzulam. — Ašäl-i-däx, änäzzalim, äkafär (ere wärän issen s-Mässinäx).

¹⁷ Käyy-i ijännen ägg-Älyähud a tämoosäd, tabärajäd n-a-s il'ik Mässinäḡ, täsifälläd fäll-a-wa s-tamašaläd a-wa innä alämär wa n-Mosa,

¹⁸ ija ḡur-k a-s tössanäd a-wa fälla-k irha Mässinäḡ, issəlmäd-käy alämär jer-a-wa oläḡän d-a-wa läbasän,

¹⁹ təkkašad äššäk a-s äddinät wi iyyädnen, iməddorḡal, käyy a-s ämalway-näsän, käyy a-s ännur i-wi əzzäḡnen dāḡ-tihay;

²⁰ tärhed tumast n-älḡalim i-älzihal, emässäḡär n-aratän, təflasäd iman-näk s-tidət ta käy-issäḡra alämär wa n-Mosa.

²¹ Uhən käyy-i s-härkuk təmmaxäd i-ere tössäḡräd, ma s-hak-indar ad-säḡrəd iman-näk? Xatṡäbäd i-äddinät iba n-tikra, a-s ija a-wen, tikərəd;

²² xatṡäbäd-asän täxärme n-əzzəna, a-s ija a-wen, zinnud; janned-asän, uday ad-ḡabbädän äššanämän, a-s ija a-wen, tikərəd a-wa ihän ihänen wi dāḡ-əzzäḡän äššanämän-win-dāḡ, ad-t-in-žanšed.

²³ Tabärajäd n-a-s tössanäd alämär wa n-Mosa, a-s ija a-wen, tänimäšräyäd-as; ənta-den-dāḡ iba n-tuksəda-näk i-Mässinäḡ.

²⁴ A-wen-dāḡ a fäl inna əlkəttab n-Mässinäḡ dāḡ-isälan n-käl-Älyähud:

«Tössəba-näwän käwänəḡ-di-dāḡ

a fäl wär-ätwäsämḡär isəm n-Mässinäḡ jer-inəzzulam.»

Wär t-illa a ihan amili wäla iba-net

²⁵ Tidət, amili infa härät afäl itamašäl äwadəm a-wa fälla-s ifraḡ alämär mäšan, ere irazzän a-wa innä alämär, wär-izley amili-net d-iba-net

²⁶ fäl-a-s, kunta ere wa wärän ämeläy, ilkam i-a-wa ifraḡ alämär fäll-ägg-adəm, ajän wädden dat-Mässinäḡ, ad-äbas izlay d-wa ämeläyän.

²⁷ Käwänəḡ, tössanäm a-wa fälla-wän ifraḡ alämär, samalayäm iman-näwän, a-s ija a-wen, wär käwän-išla ar teräzze n-a-wa fälla-wän ifraḡ alämär, kunta inəzzulam əntänəḡ, wär səmiləyän iman-näsän mäšan, tamašalän a-wa fälla-sän ifraḡ alämär, əntänəḡ-en-dāḡ a-s ilkam ad-käwän-səḡləmän dat-Mässinäḡ, səkkərəkəḡän-käwän.

²⁸ Säjdät ämära, tidət, ənta da: ägg-Älyähud wa n-tidət, wädden ere iwar ešwäl ilan mänhoy wäla amili, änn-ak,

²⁹ ämoos-t ere wa s-äsmaläy Mässinäḡ ulh-net, wädden ere wa ḡur-ija a-s itamašäl a-wa innä alämär dāḡ-takarḡe-net. Ənta-den-dāḡ, ägg-Älyähud wa n-tidət. Darät-a-wen day, amili wa n-tidət, a t-ämoosän a-wa ija Unfas Šäddijän n-Mässinäḡ dāḡ-ulh n-ägg-adəm wädden härät n-taknəšset jat dāḡ-taḡəssa. Amili wa dd-oräw Unfas Šäddijän s-ägg-adəm, kud irha wär-ikreš idəm dat-dägg-adəm, ad-t-ikreš dat-Mässinäḡ.

3

Wär t-illa ere s-wädden iwar-t uḡlem

¹ Adiš, əndek abäraj wa ihän tumast n-ägg-Älyähud? Meḡ day: amili-i-dāḡ, ma infa?

² Ila tänfo mäqqärät ed käl-Älyähud əntänəḡ a fäll-dd-äzzäbbät Mässinäḡ mäjräd-net.

³ Nəššan a-s wär has-äšjadän, ed, wär-ämešälän a-wa hasän-innä mäšan hakd a-wen-dāḡ, ajän a-wen a hin-äsibätṡälän älḡadalät n-Mässinäḡ-hasän? Äbo, wär-ämukkän a-wen ed,

⁴ kunta dägg-adəm razzän dāḡ-tənnanäsän, Mässinäḡ, tidət ḡas a t-dd-təffalät s-əmmək wa s-tän-innä əlkəttab n-Mässinäḡ a-s innä:

«Mässinäḡ, a innä-dāḡ, oḡad.

Ere has-iškän day,

ad-fälla-s ikreš tidət.»

⁵ Mäšan, kunta iba n-iqqud-nänäx ənta, a izaḗharän iqqud wa n-Mässinäx, ma nənnä dāx-a-wen? Ämära, edāwänne wa itäjj ägg-adəm dāx-isəstanän-net a hawän-tajjāx näkk-dāx. Ak ajän Mässinäx-i-dāx, wär-oyed fäl-a-s innin itakkäs dāx-näx älxaqq?

⁶ Aa fāw ed ənnär ha wäla-dāx tafräxt tiyyät ḡas Mässinäx, əndek əmmək wa s-mad-išräx äddunya?

⁷ Ämmukkän a-s dāx-a-wa jänneḡ, əllan-t äddinät jannänen a-s: kunta bahu wa janneḡ, isinfiləl-dd tidət i-ad-iwwaḗ semḡar fäll-isəm n-Mässinäx, adiš mafäl hi-itəggar uḗlem, tumasäx anäsbäkkad bännan?

⁸ Adiš šämäd isälan əntäneḗ-den-dāx, nilbaset ḡas i-ad-dd-tarəw tälläbäst-nänäx-en-dāx imärkedän. Tordam a-s bahu šund-wen-dāx, häläx ad-t-səssäḡräx. Äddinät wi tiwəynen ännämimatän šund-win-dāx, iskar äššäreḡa wa dār-änihäjjän ḡur-Mässinäx.

A-wa s-olähän dägg-adəm

⁹ Adiš, əndek tidət dāx-a-wa-dāx? Ak, ajän näkkäneḗ-i n-käl-Älyähud, nufa äddinät wi iyyäḗnne? Ma n-əmmək? Əssəjrähäx-käwän-in a-s käl-Älyähud hakd inəzzulam,† wär-əzleyän, ännihäḗ dāx-sän abäkkad iket-dāx-näsän.

¹⁰ Isälan n-a-wen-dāx a dāx-hanäx-ässewäl əlkəttab n-Mässinäx a-s innä: «Wär t-illa ägg-adəm oḡadän, wäla-dāx iyyän ḡas,

¹¹ wär t-illa-i ijarahän härät, wäla-i itattärän ad-uksaḗ Mässinäx.

¹² Oškan iket-dāx-näsän, wär-äḡnen härät, wär tän-iha wäla-dāx iyyän ḡas itamašälän a-wa oläḡän.

¹³ A-wa dd-izajjārän imawän-näsän, ija märkähaw wa ija azəkka ämerän; ilsawän-näsän a-s saswadän äddinät; a-wa jännen s-iḗlay-näsän, irn' ihäräynänän n-emäjäl.

¹⁴ Laqqänän äddinät, sasmamän fälla-sän s-a-wa dd-ijammäḗän imawän-näsän,

¹⁵ ärorädän iji n-iman,

¹⁶ edägg əmmärän-dāx, wär dāx-s dd-tiyyən a säl ahälak d-älmäššibät.

¹⁷ A-wa s-itawänna tabarät n-älxer, wär hen zäbo-net,

¹⁸ wär ha tuksəḗa n-Mässinäx tiḗtawen-näsän.»

¹⁹ Nəssan ya a-s a-wa innä alämär wa n-Mosa iket-net, inn'-en i-äddinät əssannen s-alämär-en, hakd a-wen-dāx, han-tän-i äsisändärnen. A-wen, ädduuttät i-ad-wär-itəmmil äwadəm itabärajän dat-Mässinäx ed äddunya iket-dāx-net, a iwar uḗlem dat-Mässinäx.

²⁰ A-wen älmäḡna-net a-s wädden amišəl n-a-wa innä alämär a hanäx-ihakkän idəm dat-Mässinäx ed wär t-ih' äššäk a-s a-wa innä alämär, indär i-dägg-adəm ad-t-ämašälän. Ənta-den-dāx a-wa ässiitbätän a-s ägg-adəm-i-dāx, tidət-dāx a-s anäsbäkkad a ämoos.

Immun a ihakkän ägg-adəm idəm dat-Älmasex

²¹ Ämära, a-wa hanäx-ihakkän idəm dat-Mässinäx, äsnäfaläl-anäx-t-dd. Iktab dāx-alämär d-a-wa ənnän əlkəttabän wi n-ännäbitän,

† 3:9 3:9 – ḡur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änəzzalim a ämoos. A-wen-dāx a fäl tiwsaten ti iyyäḗnne iket-näsän, ti n-inəzzulam. — Äšäl-i-dāx, änəzzalim, äkäfär (ere wärän issen s-Mässinäx).

²² äsdätten iket-däx-näsän a-s immun s-ÿisaÄlmasex a ihakkän imumönän idəm dat-Mässinäx, a-wen, wär sär-s izley dagg-adəm.

²³ Dagg-adəm iket-däx-näsän a ofän abäkkad, ibd'-en a-wen d-ännur n-Mässinäx

²⁴ mäšan, hakd a-wen-däx, ixtäs Mässinäx däx-ännuymät-net n-a-s ere omänän s-ÿisa Älmasex-däx, ad-ikrəš idəm dat-Mässinäx ed ämoos-as ÿisa Älmasex, Ämaçlas wa has-in-inaššan ibäkkadän-net bännan.

²⁵ Mässinäx däx-tärha-net i-iqqud, ija ÿisa tasəbdärt i-ad-isəlməd s-iqqud, inçäl ašni-net fäll-tajəttewt, ämmut däx-idäggan-nänäx i-ad-izəl ibäkkadän-nänäx. Ibda, Mässinäx däx-tazidert-net, wär-isreç ibäkkadän wi ämešälän äddinät

²⁶ mäšan ämära, takute n-täfaške-ta-däx ijä a hanäx-salmadät s-iqqud n-a-wa ija, a-wen-däx a hanäx-isalmadän a-s ila tärna n-ad-äkf idəm dat-Mässinäx i-ere wa omänän s-ÿisa.

²⁷ Endeç ças a-wa däx-mad-äbbäräj ägg-adəm? Wär t-illa ed ämära, immun s-ÿisaÄlmasex a içalläsän wädden amišəl n-a-wa ifräç alämär.

²⁸ Enta-den-däx a-wa hanäx-isawännən a-s: immun a ihakkän ägg-adəm idəm dat-Mässinäx wädden amišəl n-a-wa fälla-s ifräç alämär.

²⁹ Meç daç a tordam a-s Mässinäx-i-däx, i n-käl-Älyähud wädden in-inəzzulam?

³⁰ I näsän lab iket-däx-näsän ed Mässinäx, iyyän ças, ənta a ihakkän ere wa sär-s omänän idəm, tawset t-lät-däx, jer-ti n-käl-Älyähud-i jänen amili härät wäla ti n-inəzzulam-i wären əja amili härät.

³¹ Ajän a-wen-š älmäçna-net a hin-ikkasän alämär wa n-ännäbi Mosa fäl-a-s innin nənna a-s immun a ih' älfäyda? Äbo, wär nənnä a-wen, alämär, ih' edägg-net.

4

Älmital wa hanäx-ämoos Ibrahim

¹ Ämära, ännäbi Ibrahim-i hanäx-äshäyāwän, ma däx-s-e-nänn, ma t-ikfän idəm dat-Mässinäx?

² Ənnär timašalen-net a t-əkfänen idəm dat-Mässinäx, umas-as a-wen abäraj, mäšan, wär-äddobät a-wen dat-Mässinäx

³ ed, əlkəttab n-Mässinäx iman-net a hanäx-innän a-s:

«Omän Ibrahim s-Mässinäx, ikräš data-s idəm.»

⁴ Ägg-adəm ya, afäl ixdäm härät, timçal-net dihen, wädden bännan, äniihäçja d-älçaqç n-tide-net

⁵ mäšan ägg-adəm, immun-net s-Mässinäx a t-ihakkän data-s idəm, wädden älxidmät ija s-äššahät-net. Enta-den-däx əmmək wa s-ihakk Mässinäx idəm i-wi wären äddin.

Təttəlal ta hanäx-ämoos Dawəd

⁶ Däx-təssəba n-a-wen-däx ijarräw äwadəm ikrašan idəm çur-Mässinäx wäla imärkedän a fäl innä ämänokal Dawəd:

⁷ «Təndəd i-wi s-hin-inša Mässinäx erk imojjan-näsän, omäs-in ibäkkadän-näsän,

⁸ təndəd i-wa s-hin-inša Emäli ibäkkadän-net, wär tän-dd-idkel däx-meçan.»

Amili, wär-ihəkk idəm dat-Mässinäx

⁹ Älçer-wen-däx, ajän wädden, ill'-e fäll-wi ämeläynen hakd wi wären ämeläy? Wädden, ätwänn'-anäx a-s:

«Omän Ibrahim s-Mässinäx, ikräš data-s idəm.»

¹⁰ Ëmme d-ikräš Ibrahim idəm-wen-däx dat-Mässinäx? Ak ajän a-s t-ikräš, äzizäbbät-dd Mässinäx amili meḡ? Äbo, a-s ikräš Ibrahim idəm dat-Mässinäx, wär fälla-s ins' absär.

¹¹ Šamad oman s-Mässinäx, ikräš ḡur-s idəm, ad-ämeläy i-ad-umas a-wen tamätart tässitbätät idəm wa ikräš. Otäs Mässinäx s-a-wen-däx ad-umas Ibrahim abba n-e d t-illäm amumən däx-tössəba n-ad-ḡur-s ökrəšan wi ämeläy nən hakd-däx wi wären ämeläy idəm

¹² s-əmmək wa s-t-ḡur-s ikräš Ibrahim-i s-ənta a-s abba n-äddinät-wi wären äsfälla fäll-amili, änn-ak wär-omenän ar s-Mässinäx s-əmmək wa s-sär-s omän Ibrahim-i n-abba-nänäx-i ḡur-s ikräšan idəm härwa wär t-immer absär.

Immun a ihakkän ägg-adəm ärkäwälän wi ijjäš Mässinäx

¹³ Ijjäš Mässinäx ärkäwäl i-Ibrahim, inn'-as, ad-ikus äddunya ənta d-ihäyawän-net mäšan, täkasit-en, wädden alkum i-a-wa innä alämär a has-tät-e-ikfən, immun s-Mässinäx d-idəm wa ḡur-s ikräš a has-ijräwän a-wen.

¹⁴ A-wen-däx afäl kunta täkasit-ten-däx, alkum i-alämär a-s əssəbab-net, adiš ma infä immun s-ḢisaÄlmasex ed, ärkäwäl-wa t-ässitbätän, ibbətäl-in?

¹⁵ Mäšan, alämär, wär dd-itirəw sär-näx ar adkär n-Mässinäx ed, ənnär wär dd-ixlek, wär-itəmməl musnät n-a-wa ämoos abäkkad, wär-itəmmil dihen ere iwar udlem.

¹⁶ Däx-tössəba n-a-wen-däx a fäl, ere wa omänän s-Mässinäx ḡas a-s tətwar täkasit-ten-däx i-ad-tumas isuf ätiwäjjänen däx-ännuymät-net. Ḣas, a-wen-däx a dd-oräwän a-s ärkäwäl wa ijjäš Mässinäx i-Ibrahim, oharän-t dār-s ihäyawän-net iket-däx-näsän jer-wi ətäf nən alämär hakd wi omän nən s-Mässinäx s-əmmək wa s-sär-s omän Ibrahim-i n-abba-nänäx iket-däx-nänäx.

¹⁷ Isälan n-a-wen-däx a fäl innä əlkəttab n-Mässinäx:
«Ibrahim, jeḡ-käy abba n-abrək n-tiwsaten.»

Ḣas, Ibrahim-en-däx dat-Mässinäx-i dd-isankarän inəmmuttan, ixalläk-dd a wärän t-illa, a-s abba-nänäx däx-tössəba n-immun wa ija s-Mässinäx.

¹⁸ Ibda, wär t-illa ätätma ijar Ibrahim mäšan, omän s-Mässinäx ḡas, ikräš-t. Tössəba n-a-wen-däx a fäl t-ija Mässinäx:

«Abba n-tiwsaten äjjootnen»,
inn'-as:

«Ad-ətəyän ihäyawän-näk, agdähän d-etran.»

¹⁹ A-s ija Mässinäx mäjräd-wen-däx, ikn' Ibrahim tušäre, lämməd hullan däx-tayəssa-net ed ila temədə n-awätay mäšan, wär-ifneḡ immun-net. Saräta day i n-hänne-s, wär tänmäjjaj d-a-wen, äbas təjar ätätma n-ad-təkrəš ara.

²⁰ Hakd a-wen-däx, wär-ifneḡ immun n-Ibrahim, wär ij' äššäk däx-ärkäwäl wa has-ijjäš Mässinäx, ikf'-e immun-net äššahät n-ad-ifləs Mässinäx, ad-t-itəmmal,

²¹ ikkas äššäk n-a-s ärkäwäl wa has-ijjäš Mässinäx, ad-t-äj.

²² Tössəba n-a-wen-däx a fäl ikräš idəm ḡur-s, äddin jer-imaydalän

²³ mäšan, tifer-tin-däx n-a-s ikräš idəm dat-Mässinäx, wädden ənta ḡas a-s ätwännänät,

²⁴ ätwännänät-anäx näkkänəd däx-i ässeḡän Mässinäx däx-imaydalän däx-tössəba n-immun wa sär-s nəja ənta-i dd-issənkärän Emäli-nänäx Ḣisa jer-inəmmuttan.

²⁵ Ənta-en-däx a ämmun däx-tössəba n-timəntal n-ibäkkadän-nänäx təzzar, issənkär-t-dd Mässinäx jer-inəmmuttan i-ad-nəkrəš idəm data-s.

5

Ušreyän n-immun, äl xer d-Mässinäx

¹ Ämära d-hanäx-ikfä immun-nänäx idəm dat-Mässinäx, imäl-t älxer jere-näx där-s dāx-äddimmät n-Emäli-nänäx YisaÄlmasex,

² ənta-en-dāx a hanäx-ijrāwän tabarät s-Mässinäx i-ad-nəjrəw ännuymät-net, intəm immun-nänäx. Ənta-en-dāx ämära a-s ätṭäma wa fäll-näsifälla ed, nəjar ätṭäma n-a-s ilkam ašäl wa d-fälla-näx dd-mad-izəzzəbbət Mässinäx älxurmät-net, a-wen-dāx a hanäx-äsihäläyläyän.

³ Älyzabät nənhäy-dāx, ad-sär-näx-dd-arəw akuyəd dāx-alkum-has,

⁴ arəw-dd sär-näx akuyəd, immun išmārän, arəw sär-näx a-wen, ätṭäma ädduutten

⁵ wär henät tikärras, itbat ed, Mässinäx iman-net a ijän tärha-net dāx-ulhawän-nänäx s-tärna n-Unfas Šäddijän-i hanäx-ikfa.

Tärha n-Mässinäx i-dägg-adəm, Älmasex a tät-dd-äsnäfalän

⁶ Darät-a-wen-dāx, Älmasex, härwa wär t-illa älfäyda hanäx-ihan a-wa-dāx hanäx-ija abäkkad, tosä-dd täqqän ta issəbdäd Mässinäx ɣas, ämmut dāx-äddimmät n-inäsbäkkadän.

⁷ İzzəwät ere madän-äj iman-net dāx-miši dāx-təssəba n-iyän kud-irha fäw umas a-s ənta a ojarän älyädalät dāx-äddunya, šärnaš d-e-isəmməkəl äwadəm iman-net iman n-iyän, a ija dāx-milyaw-dāx.

⁸ Mäšan Mässinäx, ij'-anäx tärha-ta-dāx s-härwa-dāx nämoos äddinät warän ibäkkadän-näsän, ämmut Älmasex dāx-təssəba-nänäx.

⁹ ɣas, kunta nəkräš idəm ogdähän d-a-wen-dāx ɣur-Mässinäx dāx-təssəba n-ašni n-Yisa Älmasex wa inɣälän, äb' ätṭäma n-əddəttu wa ija igguz wa hanäx-e-äj dāx-äššar wa ilkämän.

¹⁰ ɣas, kunta härwa nämoos išənja n-Mässinäx, äznämäzäl-anäx Mässinäx d-iman-net s-tamättant ta ija Rure-s, äb' ätṭäma n-əddəttu wa ija anməzəl-nänäx där-s dāx-təssəba n-tanakra ta dd-ija Yisa-i hanäx-iɣalläsän jer-inəmmuttan.

¹¹ A-wen-dāx a fäl ämära, näddiwät, näsifälla fäll-Mässinäx dāx-idəm n-Emäli-nänäx Yisa Älmasex-i hanäx där-s äznämäzälän.

Adəm, ässoḍa dägg-adəm; Älmasex, issəbdäd-tän-dd

¹² Adəm a dd-orāwän abäkkad s-äddunya iket-net, abäkkad-wen-dāx ofa, a dd-orāwän tamättant s-äddunya. Emmək-wen-dāx a-s toḍa tamättant fäll-dägg-adəm iket-dāx-näsän ed wär t-illa fäw ere s-wädden itra-dd abäkkad-wen-dāx.

¹³ Abäkkad, ämoos a ihan äddunya härwa wär dd-äzzäbbät Mässinäx alämär fäll-ännäbi Mosa mäšan, ibäkkadän wi ämešälän äddinät dat-äzabbu n-alämär-wen-dāx, wär tän-ixseb Mässinäx fäll-dägg-adəm

¹⁴ mäšan, hakd a-wen-dāx, a-wen, wär hin-ikkes a-s a dd-täxläk äddunya-dāx, ɣur-Adəm hundäx har ännäbi Mosa, tamätten äddinät wären ämešäl abäkkad olähän d-wa ämešäl Adəm-i ämoosän tele n-wa s-ätwänna ilkam ad-dd-ass.

¹⁵ Ännuymät wa ihäkk Mässinäx bännan d-abäkkad wa ämešäl Adəm, wädden a oharän härät. Təssəba n-abäkkad wa ofa iyyän n-ähaləs, Adəm, a fäll-dd-toḍa tamättant fäll-e d t-illäm ägg-adəm, mäšan ännuymät wa ihäkk Mässinäx d-ännuymät wa sär-näx dd-orāw iyyän n-ähaləs, YisaÄlmasex, ih'-e älfäyda mäqqoorän.

¹⁶ A-wen wädden fäw a-s äddobät äwadəm ad-t-isənnəfäqq ed, dāx-təssəba n-anməšri n-iyän n-ähaləs ɣas a fäl dd-oḍa äššäreɣa n-Mässinäx-wa äswärän uḍlem e d t-illäm ägg-adəm mäšan, ännuymät wa dd-äzzäbbät Mässinäx, ikf'-anäx idəm ɣur-Mässinäx, äsdärfät-anäx.

¹⁷ Үас, kunta šäxšad n-iyyän n-ähaləs a sār-näx dd-orāwän tärna ta fälla-näx tēkrāš tamättant, äb' ätṭāma n-ärrözäx wa mäqqārān sār-näx dd-mad-arəw ännuymät n-Mässinäx wa hanäx-ikfän tämudre d-Təmmənəya dāx-təssəba n-Үisa Älmasex-i n-iyyän.

¹⁸ A-wen-däx a fäl kunta šäxšad n-iyyän n-ähaləs a dd-orāwän udlem fäll-e d t-illäm ägg-adəm, orāw-dd sār-näx dāx iqqud n-iyyän n-ähaləs, Үisa Älmasex, ajāraw n-idəm xur-Mässinäx d-tämudre täylälät.

¹⁹ Emmək-wa-däx s-anməšri n-iyyän n-ähaləs a ijän e d t-illäm ägg-adəm anäsbäkkad dat-Mässinäx, өmmək-wen-däx dāx a-s iqqud n-iyyän n-ähaləs, a ijrāwän idəm xur-Mässinäx i-e d t-illäm ägg-adəm.

²⁰ Alämär, äzzäbbät-t-dd Mässinäx fäll-Mosa i-ad-isəlməd dāgg-adəm a-s inäsbäkkadän a ämoosän mäšan, өjut dd-ija abäkkad-däx, äsjät-dd fälla-s Mässinäx ännuymät

²¹ dāx-ittus n-a-s өmmək-wa-däx s-käla fälla-näx ixkäm abäkkad-i sār-näx dd-orāwän tamättant, ad-fälla-näx ixkäm ämära ännuymät n-Mässinäx wa ihäkkän idəm xur-s i-ad-nəjrəw tämudre ta täylälät s-ämoos Үisa Älmasex-i n-Emäli-nänäx өssəbab-net i-e d t-illäm ägg-adəm.

6

Tassaxt d-Älmasex a ihakkän ašäl fäll-abäkkad

¹ Mäjräd-wa-däx, ma ämoos älmäxna-net? Adiš näkfet xas ämära iman-nänäx i-abäkkad i-ad-itwənhəy өjut n-ännuymät n-Mässinäx.

² Xäša! Näkkäned-i ämmutnen dāx-isälan n-abäkkad, өndek өmmək wa s-has-e nөddar, nөhakk'-e iman-nänäx dāx? Wār-ämmukkän a-wen.

³ Ajän wār төssenäm a-s näkkäned-i ätwäsälmäxnen dāx-aman s-isəm n-ҮisaÄlmasex i-ad-där-s nasäx, atwəsəlməx-nänäx-en, älmäxna-net a-s nohär där-s tamättant ta ija,

⁴ ämoos a-wen šund xas a-s ašäl wa d-ijjāš Älmasex azəkka, nohär-t där-s, nohär där-s dāx tanäkra ta dd-ija jer-inөmmuttan s-өmmək wa s-dd-inkär jere-sän s-tärna n-älxurmät n-Abba Mässinäx i-ad-nəkrəš ašäl, närjəš dāx-tämudre ta täynayät ihäkk.

⁵ Ädduuttät dāx a-s kunta nohär där-s azəkka, ad-där-s nahär dāx tämudre ed, inkär-dd jer-inөmmuttan

⁶ fäl-a-s nөlmөdet a-s ägg-adəm n-anäsbäkkad wa s-käla t-nämoos, ätwäsläb d-Үisa fäll-tajөttewt i-ad-hin-tämmät tasna ta tärəwät i-ad-äba s-näkkilät i-abäkkad

⁷ ed, ere wa ämmun ya, ibda s-iyyät d-a-wa s-itawänna abäkkad.

⁸ Үас, šämad ädduuttät a-s nohär d-Älmasex tamättant, adiš, ädduuttät a-s ad-där-s nahär dāx tämudre ed,

⁹ nөssan dāx a-s Älmasex-i dd-inkärän jer-inөmmuttan, äbas ilkam ad-olas tamättant tiyyät fäl-a-s äbas fälla-s təla tamättant tärna.

¹⁰ Ija tiyyät tamättant i-ad-äbas ila abäkkad äššar; ämära dd-iddär, iddar i-amišəl n-erhet n-Mässinäx.

¹¹ A-wen-däx a fäl käwäned, äjät iman-näwän äddinät ämmutnen dāx-isälan n-a-wa ämoosän abäkkad dāx-a-s tämoosäm ämära äddinät өddarnen i-Mässinäx dāx-tassaxt-näwän d-Үisa Älmasex.

¹² Wār toyyem abäkkad ännihäd dāx-təxəssa-näwän-i fäll-la tamättant tärna i-ad-tättäläläm erk derhanän-net.

¹³ Wār toyyem ašrut n-təxəssa-näwän wäl' iyyän ännihäd dāx-s Iblis, isawäjj'-et a wärän өyed, änn-ak, äkfät iman-näwän i-Mässinäx, talөhөm d-äddinät äynaynen, tөkfөm-t dāx tixəswen-näwän, tämašäläm iqqud.

14 Afäl jām a-wen, wār dāḡ-wān-e-ännähād abäkkad ed, äbas t-tellam daw-älxikmät n-alämär, änn-ak, mäläm ämära daw-ännuḡmät n-Mässināḡ.

Amumən, Mässināḡ a-s äkkilät wädden abäkkad

15 Ma ämoos daḡ älmäḡna n-mäjräd-wa-dāḡ s-iket t-jeḡ n-a-s äbas-t-nälla daw-alämär wa n-Mosa, nәмäl-t ämära daw-ännuḡmät n-Mässināḡ? Ak ajän a-wen älmäḡna-net, niḡwet ḡas dāḡ-abäkkad? Xäša!

16 Ajän wār төssenäm a-s ere төkfäm tanhaḡt fäll-iman-nāwän dāḡ, ad-has-täkkälem, ad-tamašaläm erhet-net, umas mässi-wän. Emmək-wen-dāḡ daḡ a-s afäl toyyām abäkkad ännihād dāḡ-wän, ad-has-täkkälem, arəw-dd sār-wän a-wen-dāḡ tamättant. Umasät eklan n-Mässināḡ i-ad-sār-wän dd-arəw a-wen tämudre toḡadät.

17 Naməlet Mässināḡ ed kunta ibda täkkilem i-abäkkad, ašäl-i, tamašaläm s-taḡārha төjlayät tijəttewen n-äddin ti төlmädäm.

18 Tөntäšäm-dd iman-nāwän dāḡ-tanhaḡt n-abäkkad i-ad-dāḡ-wän ännähād ämära amišəl n-a-wa oḡädän.

19 Mäjräd šund wa tajjän dāḡḡ-adəm a hawän-in-jeḡ i-ad-tudabem ujreh n-isälan-wi-dāḡ. ḡas, kunta ibda, täsnähädäm abäkkad dāḡ-tiḡəswen-nāwän s-iba n-təšədje d-azzal ḡarät a-wa äsikarakädän, adiš ämära, sөnnəhädät iman-nāwän dāḡ-amišəl n-a-wa oḡädän dāḡ-ittus n-ad-təzzäḡäm tämudre šäddijät.

20 Ibda, a-s dāḡ-wän ännihād abäkkad, wädden wār täkkuläm dāḡ-iji n-a-wa oḡädän mäšan,

21 өndek a-wa sār-wän dd-iššəšräy a-wen? Ajän wädden, wār sār-wän dd-iššəšräy a-wen ar täkrakiḡt n-a-wa tamašaläm ed tamättant dat-Mässināḡ ḡas a sār-wän dd-orəw a-wen.

22 Mäšan ämära d-kāwän-äsdärfät Mässināḡ dāḡ-isälan n-abäkkad, өnta a-s tämoosäm eklan-net i-ad-tamašaläm a-wa šäddijän sār-wän dd-madän-isäḡsəl tämudre ta täḡlälät ed,

23 älxäqq n-abäkkad, tamättant, mäšan, ännuḡmät n-Mässināḡ wa ihäkk bännan a t-ämoosän, tämudre ta täḡlälät dāḡ-idəm n-Emäli-nänāḡ ḡisaÄlmasex.

7

Älmital dd-izjarän adubən

1 Ayətma-ḡ! Əssanāḡ a-s a-wa s-əkkeḡ төнна-net dāḡ-isälan n-a-wa innä alämär, wār has-təžheläm. A ikkäs äwadəm iddar-dāḡ, ifraḡ fälla-s amišəl n-alämär.

2 Älmital da ässiifhämän a-wen: tamäḡt tädobänät, a ikka ähaləs-net iddar, wār has-t-illa dāḡ-a-wa innä alämär a dāḡ-s tärkəb eḡäf-net mäšan afäl ašäl wa d-äba ähaləs-net, төjrəw ya iman-net, ad-äbas fälla-s ifraḡ a-wa innä alämär.

3 Afäl tärkəb eḡäf-net dāḡ-ähaləs-net, төḡlä, төjä adubən iyyän äynayän, a-di төzna mäšan, afäl ijmaḡ ähaləs-net äddunya, төjrəw ya iman-net dāḡ-a-wa iḡtäs alämär dāḡ-isälan-win-dāḡ. Afäl toläs adubən ḡarät iba n-ähaləs-net, wār mad-has-umas a-wen өzzəna.

4 Ämära, ayətma-ḡ, šund a-wen-dāḡ a jam kāwäned-dāḡ: dāḡ-tөssəba n-tassaxt ta jām d-taḡəssa n-Älmasex, tämoosäm i-a-wa innä alämär äddinät s-äbas өddarän. Ämoos a-s өnta a kāwän-ikräšän, өnta-i dd-inkärän jer-inөmmuttan i-ad-tamašaläm erhet n-Mässināḡ.

5 Ibda a-s nөlkäm i-erk derhanän n-tiḡəswen-nänāḡ d-mäläyāḡnatän wi iyyäḡnen, ällil-anāḡ alämär s-a-wen ed, wār sār-nāḡ dd-orew a-wen a säl tamättant mäšan,

6 ämära d-nämmut dāḡ-isälan n-a-wa fälla-nāḡ ifraḡ alämär-i hanāḡ-ikrädän dāḡ-tišəm n-tansit n-tiḡəswen-nänāḡ, näddoobät amišəl n-erhet n-Mässināḡ s-tasna

täynayät däx-ixkam Unfas Šaddijän. Ænta-en-däx a-s tärna ta ihäkk, tözlay d-tärna ta ila alämär-i s-älkaḍ ḡas a fäll-təktab.

Isälan n-alämär d-abäkkad

⁷ Ma ämoos älmäḡna n-mäjräd-wen-däx? Adiš alämär wa n-Mosa, ænta a hanäḡ-isiḍewän däx-abäkkad? Xäša! Änn-ak alämär-en-däx a hi-isselmäädän s-abäkkad ed, ænnär wär hi-innä alämär: «Wär täsdärhänäd a ila äwadem wär led», wär lömmödäḡ s-a-wen.

⁸ A-wen-däx a fäl aḡätal-wen-däx hi-ija alämär a ijräwän i-abäkkad tašlölta ta sār-i-dd-toräwät e d t-illäm erk derhan. Ænnär wär dd-ixlek alämär, wär hi-töjjöš tijya n-a-wa s-itawänna abäkkad.

⁹ Ibdä, æddaräḡ wäla alämär mäšan, äzzubbät-dd a-wa ifräd alämär ḡas, innähäd däx-i abäkkad, ämoos šund a-s äbas æddaräḡ.

¹⁰ Färöd n-alämär wa s-änihäjjä a-s tämudre a sār-i dd-oräw, tamättant ḡas a sār-i dd-iwwäy

¹¹ ed, ämoos-dd färöd-wen-däx äsarü wa s-hi-äsjäḍlät abäkkad däx-tamättant.

¹² Hakd a-wen-däx, alämär, wär t-illa a t-ijrawän, Mässinäḡ ad-dd-ifal, a-wen-däx a-s: šaddiij, oḡad, ifran.

¹³ Adiš, ma n-æmmək n-a-s a-wa oläḡän, oräw-dd sār-i tamättant? A-wen ya, wär il' æmmək. Tidöt ænta da: alämär-en-däx šaddijän, a sār-i dd-oräwän äsarü wa dd-äwwäyän asønnöfilöl wa dd-ija abäkkad iman-net däx-i.

Tumast n-ägg-adem

¹⁴ Næssan, äduuttät daḡ a-wen, a-s alämär, Unfas n-Mässinäḡ a-s æssəbab-net mäšan älwäxla a-s näkk-i-däx n-ägg-adem, a wär-ihä älfäyda s-ämešäläḡ a-wa ifräd ed, äkkileḡ i-abäkkad šund äzənš a hi-ijä.

¹⁵ A-wa tamašaläḡ, iḡqan eḡäf-in, indär-ahi ad-t-əjrähäḡ ed a-wa s-ärheḡ amišöl-net, wär t-təmišiläḡ; a-wa-däx dār-okäḍäḡ ḡas a tamašaläḡ.

¹⁶ ḡas, šamad a-wa dār-okäḍäḡ ḡas a tamašaläḡ, ænta-den-däx a-wa ämoosän tajuhe ḡur-i n-a-s alämär-i-däx, wär t-illa älyib t-iwarän.

¹⁷ Tidöt-däx a-s abäkkad wa däx-i ännihädän a itamašalän härätän-win-däx, wädden näkk

¹⁸ ed, æssanäḡ a-s a-wa oläḡän, näkk-i n-ägg-adem, wär ihä taḡəssa-nin. A-wa oläḡän, ärheḡ iji-net mäšan, indar-ahi. Ijmaḍ-t äššäk a-s ækfäräḡ däx-amišöl n-a-wen-däx,

¹⁹ wär təmišiläḡ a-wa oläḡän, wär təmišiläḡ ḡas ar a-wa läbasän dār-əkney mikḍaw.

²⁰ Šamad äbas tamašaläḡ ar a-wa dār-okäḍäḡ, adiš, äbas näkk a itamašalän tälläbäst-ten-däx, änn-ak abäkkad wa ḍäx-i ännihädän a t-itamašalän.

²¹ Issəjräh-ah'-in a-wen-däx härät iyyän: äsidärhänäḡ iji n-a oläḡän mäšan a-wa läbasän a fäll-i ikarräšan ašäl.

²² Däx-ammas n-ulh-in, ijräz-ahi alämär n-Mässinäḡ

²³ mäšan, taḡəssa-nin ænta, ih'-et alämär iyyän säl wa ärheḡ. Alämär-wen-däx a hi-iknasän hak ašäl, iḡtaf-ahi däx-tišem n-alämär n-abäkkad wa däx-i ännihädän.

²⁴ Amäskoy näkk-i s-wär t-illa älfäyda hi-ihan! Mi hi-e-aḍənän tähanint, ikkəs-ahidd däx-taḡəssa-ta-däx hi-tähobet s-tamättant?

²⁵ Təmmal i-Mässinäḡ däx-äddimmät n-ḡisaÄlmaseḡ-i n-Emäli-nänäḡ hanäḡ-ijräwän ad-dd-nəkkəs errawän-nänäḡ däx-a-wen-däx. Ämära, ænniyät-in, alämär wa n-Mässinäḡ a-s äkkiilät, a-s ija a-wen, taḡəssa-nin ænta, alämär wa n-abäkkad a-s täkkilät.

8

Tämudre ta n-tidət ihäkk Unfas Šaddijän

¹ Ämära, ɖarät-a-wen-däx ätwännän, äddinät wi osäxnen d-Ÿisa Älmasex, äbas t-illa fäw-fäw udlem tän-iwarän dat-Mässinäx ed ənniyät-näsän wädden tiḡeswen-näsän a däx-sän ännihädän.

² Unfas Šaddijän-i ihakkän alämär wa n-tämudre ta n-tidət dd-tirəw tassaxt d-Ÿisa Älmasex, tärna-net a hi-täsdärfet, təbd'-ahi d-alämär wa n-abäkkad d-tamättant.

³ A-wa s-käla ämoos isəssəndar i-alämär wa n-Mosa-i ännihädän däx-e d t-illäm ägg-adəm däx-təssəba n-abror wa təja taḡəssa-net, issäryäs-t-dd Mässinäx ed, äšmašäl-dd Rure-s, ämoos-dd ägg-adəm i-ad-umas tasəbdärt ta jarräwät i-ägg-adəm tenäšše n-ibäkkadän ḡur-Mässinäx.

⁴ A-wa fälla-näx ifräd alämär, ämešäl-t ed, ämära, wädden a-wa tärha taḡəssanänäx ḡas a däx-näx ixkamän, Unfas Šaddijän n-Mässinäx a däx-näx ännihädän.

⁵ Äduuttät a-s ere ättilälän erhet n-taḡəssa-net, wär mad-ämašäl daḡ ḡas ar a-wa fälla-s tärha taḡəssa-net mäšan, wa s-Unfas n-Mässinäx a ättiläl, wär-e ämašäl ḡas ar erhet n-Unfas Šaddijän.

⁶ Ijmad-t äššäk a-s a-wa tärha taḡəssa n-ägg-adəm, tamättant ḡas a sār-s dd-itirəw, a-s ija a-wen, Unfas ənta, tämudre ta n-tidət d-älxer a dd-itiirəw s-ägg-adəm.

⁷ Äwadəm wa wärän izənnəzjumət ar däx-a-wa fälla-s tärha taḡəssa-net, ašänjo n-Mässinäx, wär-äddobät asrəs n-iman-net dat-alämär n-Mässinäx, wär t-äddobät kud t-irha-däx.

⁸ A-wen-däx a fäl äddinät wi ättilälnen erhet n-tiḡeswen-näsän, wär t-illa əmmək s-əjräzän i-Mässinäx.

⁹ Käwäned, äbas təglam fäll-derhan wa n-tiḡeswen-näwän, änn-ak, jäm iman-näwän daw-tärna n-Unfas wa ija Mässinäx däx-ulhawän-näwän. Ere daḡ wa s-wär-ihä Unfas Šaddijän n-Älmasex ulh-net, wär t-ila Älmasex.

¹⁰ Kunta daḡ iha Älmasex ulhawän-näwän, kud-däx tamättant a mad-təjəm däx-abäkkad, ill'-awän-t əḡəllas ed ij'-iwän Mässinäx däx-təssəba n-tassaxt ta jäm d-Unfas Šaddijän n-Älmasex äddinät ḡur-s lanen idəm.

¹¹ A-wen-däx a fäl kunta iha Unfas Šaddijän n-Mässinäx-i dd-issənkärän Ÿisa jer-inəmmuttan ulhawän-näwän, adiš, ad-käwän-äkf daḡ ənta-i dd-issənkärän Älmasex jer-inəmmuttan tämudre ta dd-e-sənkärät tiḡeswen-näwän jer-inəmmuttan s-tärna n-Unfas wa izzäxän ulhawän-näwän.

¹² Ayətma-ḡ, kunta ill'-e färəd hanäx-iwarän, əlmədät a-s wädden wa n-alkum i-erk derhanän n-tiḡeswen-nänäx.

¹³ Ere ättilälän erhet n-taḡəssa-net, tamättant ḡas a dd-e-arəw s-iman-net mäšan, ere wa hin-ijärän s-tärna n-Unfas Šaddijän erhet n-taḡəssa-net, tämudre ta n-tidət a däx-s təlkamät.

Mässinäx d-aratän wi dd-ija s-iman-net

¹⁴ Ere wa s-Unfas n-Mässinäx a t-oḡadän, ara n-Mässinäx a ämoos.

¹⁵ Unfas daḡ wa käwän-ikfä Mässinäx, wädden Unfas käwän-ijan eklan s-härkuk han tarəmməxt, änn-ak, ikf'-iwän Mässinäx Unfas-net i-ad-talähäm d-äddinät dd-ija s-iman-net. A-wen-däx a hanäx-ikfän turhajät n-ad-nəḡarr Mässinäx s-isəm: «Abba».

¹⁶ Tärna n-Unfas Šaddijän-en-däx hanäx-ikfa Mässinäx a hanäx-ämoosän tajuhe ta hanäx-satbatät n-a-s tidət-däx a-s aratän n-Mässinäx a nämoos.

¹⁷ Ҳас, шамад аددууттат а-с аратан н-Мәссинәх а нәмоос, адиш, нәмоос имәккуса, ад-һанәх-әкф Мәссинәх а-ва s-һанәх-ијјәш әркәwәл-net, һаһәр дах d-Әлмасех терше-net. Кунта нәрда s-ад-дәр-s һаһәр аҫана ва инһәй, адиш, ад-дәр-s һаһәр әлхурмәт-net.

Әлхурмәт ва ilkәмән

¹⁸ Ija ҫур-и а-с терсәммәwен ти нәһаннәй әмәра-дәх, wәдден wәла а әндәrrән едес i-әлхурмәт ва s-ilkam ад-һанәх-dd-infilәl.

¹⁹ Әлхурмәт ва s-әqqalән аратан н-Мәссинәх, wәдден әнтәнед ҫас а ирмас иба n-tәзидерт n-ад-әј; а-ва iwәрән әрори n-әkall икет-net а әрорәдән ад-dd-ass.

²⁰ Әмоос а-ва iwәрән әрори n-әkall а wәрән иssen е-s ihәl, wәдден ад-t-dd-ikkasән а-wen, Мәссинәх а һас-ixtәsән а-wen. Мәшан, а-wen, wәр һin-иккес әттәма ва әsjәр Мәссинәх taxlәkt икет-net.

²¹ Imal-dd аsәl d-mad-isәттәҫләл Мәссинәх taxlәkt-net икет-net дәх-әlhәllak ва s-tәšewәј, әjrәwән аратан н-Мәссинәх әлхурмәт ва s-һасән-innә.

²² Nәssan а-s аsәl-i-dәх, taxlәkt икет-net а tәššorsәt, tәkna tiззurt tolәһәt d-ta rammәsәt tamәdt jarrәwәt еҫәf-net.

²³ Wәдден дах әнта ҫас а ирмас а-wen-dәх, ирмас-анәх нәккәнед дәх-и ija Мәссинәх tiҫәffaddiwen n-Unfas-net. Nәккәнед дах, нәтиһнәffit дәх-iman-nәнәх, нәqqal i-aәl ва d-e-numas s-tidәt-dәх аратан н-Мәссинәх, иккәs-анәх дәх-tissust та дәх-һанәх-jәнәt tiҫәswen-ti-dәх.

²⁴ Ed нәккәнед, tidәt-dәх а-s әлҫәllas-nәнәх itbat мәшан һар әмәра-дәх, әмоос а дәх-nәjar әттәма. Әywa, әттәма ва ihannәy әwadәм, ад-әbas әмоос әттәма; әндек әттәма ва ilkәмән дәх-а-ва-s iswәр, инһәй-t әwadәм? Wәр t-illa.

²⁵ Мәшан аfәl әттәма-nәнәх, әмоос а wәр нәһәннәy, dihen, ад-һас-nәqqәl s-tәзидерт d-ulh ijlayән.

²⁶ А-wen-dәх fәw а fәl һанәх-итilal Unfas Šәddijән дәх-tәlәмdә-nәнәх ed а-ва s-әniihәјja ад-t-nәттәр дәх-Mәссинәх, wәр t-nәssen. Ёnta-en-dәх а һанәх-itәddalән Мәссинәх s-tihнәffa wәren la аfәssәр.

²⁷ Tidәt а-wen, Мәссинәх-и issanән а-ва ihән ulhawән, issan дах а-ва ihән әnniyәt n-Unfas. А-wen-dәх а fәl әнта, еrhет n-Mәссинәх а itattәр i-imәššeddәјән.

Tihusay d-tәmҫәre n-tәрһа та һанәх-ija ҫisa Әлмасех

²⁸ Dәрәt-а-wen дах, нәssan а-s әddinәt wi әrhәнәn Мәссинәх d-әddinәt wi dd-ixrә s-iman-net дәх-erhet-net, а tән-irmәsән-dәх, а әмоос-dәх, Мәссинәх iman-net а itajjән а-s tišrayәten n-tanfust-ten-dәх tән-tәrmәsәt, i n-tәнfo-nәsән.

²⁹ Мәссинәх әddinәt wi әsnәfrән dat-axәlak i-ad-umasән аратан-net, ixtәs-асән milhaw d-Rure-s i-ad-umas Rure-s teҫәfәdde n-әnҫatән әjjootnen.

³⁰ Мәссинәх, әddinәt wi s-dd-ixtәs а-wen, ixr'-en-dd s-iman-net; wi dd-ixra s-iman-net, ikf'-en idәм data-s, wi ikfa idәм data-s, ikf'-en дах әлхурмәт-net.

Tәрһа n-Mәссинәх та һанәх dd-әsnәfalәl дәх-Әлмасех

³¹ Šәmad isәlan-den-dәх, ma s-nәddоobәt tәnna-net дах? Кунта Мәссинәх-и-dәх, tidәt-dәх а-s аsrut wa-nәнәх а iһа, mi fәlla-nәх ilan tәрna?

³² Zәnnәzjumәtәt ҫас: kунта Мәссинәх, Rure-s iman-net ва n-iyyән ila, wәр t-ixles дәх-tamәttant, әnn-ak, oyy'-e әmmut дәх-tәssәba-nәнәх, әндек ҫас dәрәt-а-wen-dәх а-ва һанәх mad-unjәy? Wәр t-illa.

³³ Әddinәt wi әsnәfrән Мәссинәх, mi tән-e-isәwәрән uдlem? Wәр t-illa ed Мәссинәх iman-net а tән-ikfән idәм data-s.

³⁴ Mi äddoben ad-tän-isewär udlem? Ajän wädden Älmasex ämmut mäšan, isälan, wär-ömden dihen ɣas, a ojarän a-wen, inkär-dd jer-inömmuttan, ikk' isönnawän, äqqima dihen daw-aɣil n-Mässinäɣ, itattär-anäɣ s-Mässinäɣ.

³⁵ Endeɣ ɣas a-wa-däɣ hanäɣ-e-ibðewän d-tärha ta hanäɣ-ija Älmasex? Ak tirömmaɣ meɣ erk ömmök, ak älyizabät meɣ laɣ meɣ ɣölləl, ak miši meɣ täkoba? Wär t-illa fäw a hanäɣ-där-s-e-ibðewän, a ämoos-däɣ.

³⁶ Däɣ-isälan n-a-wen-däɣ a däɣ-hanäɣ-innä ölkötab n-Mässinäɣ:

«Tössöba-näk, Mässinäɣ a fäl nötamättat hak ašäl,

jän-anäɣ äddinät ɣas šund taɣsiwen

däɣ-wär-ilkem a säl aɣäras.»

³⁷ Mäšan, hakd a-wen-däɣ, däɣ-a-wen-däɣ iket-net, nämoos imärnan, nokäy fäw tumast n-imärnan, näkräš ašäl imdan fäll-išönja-nänäɣ s-turhajät n-Wa hanäɣ-irhän.

³⁸ Ekkasäɣ äššäk a-s wär t-illa fäw a hanäɣ-e-ibðewän d-tärha ta hanäɣ-ija Mässinäɣ: ak tamättant wäla tämudre wäla änjälosän wäla isönnawän wäla käl-tärna, a-wa t-illän d-a-wa ilkämän,

³⁹ käl-äššahät wi n-isönnawän d-a-wa iwärän ärori n-äkall, wär t-illa fäw a dd-ätiwäxläkän äddoben ad-hanäɣ-ibðew d-tärha n-Mässinäɣ ta hanäɣ-dd-äsnäfaläl däɣ-Emäli-nänäɣ ɣisa Älmasex.

9

Tisnant n-iman ta ija Buləs däɣ-tössöba n-käl-Işrayil-i äsɣärnen ulhawän-näsän i-Mässinäɣ

¹ Näkk-i s-ašäl-i-däɣ osaxäɣ d-ɣisaÄlmasex, tidöt a hawän-janneɣ wädden bahu, Unfas Šäddijän iman-net a hi-oɣadän däɣ-önniyät-in däɣ-a-wa s-ärheɣ ad-hawän-tän-ännäɣ.

² Ärxan iman-in, ärxan; jan tisanant wärät köttəl.

³ Äsniinän daɣ hullan däɣ-isälan n-a-wa dd-iqqälän ayötma wi n-käl-Işrayil. Diha t-ölleɣ, kud irha fäw təwär-ahi tilɣant, önmöjjöjəɣet fäw d-Älmasex i-ad-där-s önmihözän öntäneɣ, öjrəwän ölyöllas.

⁴ Käl-Işrayil, Mässinäɣ a tän-dd-ijän s-iman-net, äswär-tän ännur-net, änmäjjäš där-sän ärkäwälän n-tassayt, äzzäbbät fälla-sän alämär wa n-Mosa, issəlmäd-tän älyibadät n-Mässinäɣ wa n-tidöt, ijjäš-asän ärkäwälän äjjootnen.

⁵ Entäneɣ a länen imärawän-nänäɣ wi n-ibda dd-izjār Älmasex s-eyäs-net önta-i n-Mässinäɣ-i t-illan jönnöj-härät iket-net. Namölet-t, amin!

Mässinäɣ, a-wa s-ijjäš ärkäwäl-net, ad-t-äj

⁶ A-wa hawän-janneɣ, wädden i n-a-s innin ärkäwäl wa hasän-ijjäš Mässinäɣ, äbbottäl-in. Äbo, änn-ak, wädden äddinät iket-näsän wi-dd-özjärnen Işrayil a ämoosnen dägg-Işrayil wi n-tidöt.

⁷ Wädden daɣ äddinät iket-näsän wi dd-özjärnen Ibrahim a-s ihäyawän-net wi n-tidöt, öktəwät-dd a-s Mässinäɣ iman-net a innän i-Ibrahim:

«Isxaqq a hak dd-e-özjärän ihäyawän.»

⁸ A-wen älmäɣna-net a-s wädden aratän wi s-dd-issəbäb ägg-adəm, a-s wi n-Mässinäɣ, änn-ak, aratän-net a tän-ämoosän, wi s-dd-issəbäb ärkäwäl wa ijjäš i-Ibrahim.

⁹ Ärkäwäl-en, önta da a-wa däɣ-s innä Mässinäɣ i-Ibrahim:

«Ad-käy-dd-äqqöläɣ däɣ-äzzäman šund wa-däɣ,

a-s käy-dd-e-äqqöläɣ s-äzzäman-en,

tökraš-ak Saräta alyaq.»

¹⁰ A-wa has-innä Mässinäx, wädden Saräta xas a xur-dd-imdä, inn'-en daḡ i-Räbka ta n-hänne-s n-Isxaqq-i n-abba-nänäx iket-nänäx ed təkraš-as eknewän s-əmmək-wen-däx.

¹¹ Härwa wär-əwen eknewän-en-däx, härwa wär-əmešälän a oläxän wäla a läbasän a-s imməjräd Mässinäx i-Räbka, issəlmäd-tät s-wa äsnäfrän jere-sän; ämoos a-wen erhet n-Mässinäx wädden fäl төssəba n-emärked jan i-ad-dd-iḡär s-iman-net wa s-irha.

¹² A-s itäjj a-wen, innä Mässinäx i-Räbka:
«Ad-äkkälät wa n-amäqqar i-wa n-amäḡray.»

¹³ Enta-den-däx a-wa ijän ed innä Mässinäx iman-net:
«Ässofäx Yaquub uhən Iso.»

Mässinäx, enəsdebbär n-iman-net

¹⁴ Ak ajän a-wa ija Mässinäx, ajän ad-hanäx-isəwwənn a-s Mässinäx, wär-oxed? Aa fäw, wädden a ijan a-wen

¹⁵ ed Mässinäx iman-net a innän i-Mosa:
«Sanseḡ ärräxmät-in fäll-ere wa s-ärheḡ,
naqq'-ahi tähanint n-ere wa s-ärheḡ.»

¹⁶ A-wen wädden a dd-izjarän erhet n-ägg-adəm wäla äššahät-net, tähanint n-Mässinäx a dd-ifal.

¹⁷ Iktab däx-əlkəttab a-s innä Mässinäx i-Firḡäwna:
«Jeḡ-käy əssəbab i-ad-səlmədäx s-tärna-nin
i-ad-itwäxṭəb isəm-in fäll-ärori n-äkall iket-net.»

¹⁸ A-wen-däx a fäl ere wa s-oḡän Mässinäx tähanint, oḡän-as-tät, wa s-äsḡär ulh-net daḡ, ad-iḡar.

Mässinäx a-s ämaxlak d-ämänokal

¹⁹ Ämmukkän a-s afäl əslän iyyäḡ däx-wän i-mäjräd-wen-däx, ad-dd-əggədän, ənnən: Mässinäx adiš, ma s-isawar ägg-adəm uḡlem? Ajän mi äddooben azəzzəwi n-iman-net data-s? Wädden a-wa s-irha xas a itäjj.

²⁰ Uhən käyy-i n-ägg-adəm dd-tajjäšän inəzjam šund-win-däx, mi tämoosäd fäw tamäzaḡäd d-Mässinäx? Käla tənḡäyäd aḡäsis isastan ere wa t-iknän d-äddälil wa fäl t-dd-ikna.

²¹ Wädden ere wa ikannän iḡsas, a-wa s-irha xas a itäjj, tālaḡt a iḡarräz təzzar ikən sār-s jer-aḡäsis ilan älqim d-i t-wärän ila. Tālaḡt-en-däx a-s ikann a-wen-däx iket-net.

Derhan n-Mässinäx i-käl-Işrayil

²² Mässinäx daḡ, isakna adkär-net i-ad-isəlməd s-tärna-net. Ähoja äzizäydär i-wi äniihäjjänen d-adkär-net wären änhäjja ar d-əlhəllak

²³ mäšan wi s-oḡän tähanint s-irha ad-t-səmyärän, irha daḡ ad-tän-isənnəfləy däx-älxurmät-net.

²⁴ Teḡäre ta hanäx-dd-ija Mässinäx s-iman-net näkkäneḡ-i n-käl-Älyähud, ənta daḡ a dd-ija i-tiwsaten ti iyyäḡnen n-inəzzulam†

²⁵ s-əmmək wa s-tän-innä ännäbi Ozi däx-əlkəttab-net a-s innä, innä Mässinäx:
«Tamətte ta s-ibda wär tämoos ta-nin,
ənta ämära a he-äjäḡ tamətte-nin.
Tamətte ta s-ibda tätiwäksän,
ənta a he-tumasät ta əkneḡ tārha.»

²⁶ Edägg daḡ wa-däx hasän-ätwännä:

† 9:24 9:24 – ḡur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyäḡnen iket-näsnät, ti n-inəzzulam. — Äšäl-i-däx, änäzzalim, äkafär (ere wärän issen s-Mässinäx).

«Wär tämoosäm tamette n-Mässinäx»,
edägg-wen-däx iman-net a däx-e-ətwäxrən s-isəm:
«Aratän n-Mässinäx wa iddarän.»

²⁷ Ännäbi Saya† ənta, innä:

«käl-Älyähud, kud-ärhan əjən əjut
wa wär jenät timətwen n-äkall
däx-asälim n-əjärew wa səmmän
tasəkkemt däx-sän ɣas a he-ijrəwän əlyəllas»

²⁸ Emäli day a-wa s-innä, ad-t-äj, äššərəɣa wa s-innä ilkam ad-t-dd-izəzzubbət fäll-äddunya, ad-t-äj šik šik.

²⁹ Oläs day ännäbi Saya innä:

«Ennär wär hanäx-dd-oyya
Mässinäx-i n-Mässi-s n-ajhanän
härät däx-əzzurəyät-nänäx,
ašäl-i-däx, nooläh ɣas
d-iɣärman wi n-Sodoma d-Gomora-i ihläk.»

Äddälil wa fäll-innäđ Mässinäx fäll-käl-Işrayil

³⁰ Ma säl a-wen? Inəzzulam-i wären təmmäx i-iqqud dat-Mässinäx, ij'-en immun-näsän s-Mässinäx imaɣdalän data-s lanen idəm. Immun-näsän s-Mässinäx a sār-sän dd-orəwän a-wen.

³¹ A-s ija a-wen käl-Işrayil əntäneđ, amišəl n-a-wa innä alämär a-s tattärän ad-tän-äkf idəm dat-Mässinäx mäšan, indär-asän ad-dd-säxsəlän a-wen.

³² A-wen-š ma t-ijän? Adiš əttärän ad-əjrəwän iqqud išlayän i-wa ihakk immun s-Mässinäx. Ettärän ajäraw n-a-wen s-a-wa tamašalän, ämoosän ɣas šund äddinät s-tärsal təhunt har išwar ođan.

³³ Ija a-wen s-əmmək-wa-däx s-ätwännä, innä Mässinäx däx-isälan n-Ÿisa:

«Enhəywät! Sanseɣ təhunt rassälät i-äddinät
däx-aɣrəm wa n-Sayon.
Ad-tumas əssəbab n-əjäđäl i-iyyəđ mäšan,
ere fälla-s äshätälän-däx,
wär-ilkem ad-ämmujräz.»

10

¹ Ayətma-ɣ, derhan n-ulh-in d-a-wa tattäräx hak ašäl däx-Mässinäx da: äɣləsnet käl-Işrayil.

² Äddoobex tajuhe n-a-s käl-Işrayil, ədgažän hullan däx-isälan wi n-Mässinäx mäšan, wär jen a-wen s-ənniyät ijarahän härät.

³ Ežhalän härwa däx-isälan n-a-s Mässinäx a isaydalän ägg-adəm i-ad-ɣur-s ikrəš idəm wädden imärkedän-net, a-wen, unjäyän sār-s.

⁴ Älmasex, a ɣur-dd-imdä a-wa innä alämär, ere sār-s omänän-däx, ad-ikrəš idəm dat-Mässinäx.

Ere omänän s-Ÿisa Älmasex, ad-iyləs

⁵ Däx-isälan n-a-wa ihakkän ägg-adəm idəm dat-Mässinäx, innä Mosa:

«Ere ämešälän färəđän
wi əktäbnen däx-alämär,
ad-has-umas a-wen-däx
əssəbab n-əlyəllas.»

† 9:27 9:27 A-wa ännäbi dd-əzzarän i-Ÿisa, äloläy däx-isälan-net əssayät timađ n-awätay dat-tiwit-net.

⁶ Mășan așäl-i, immun-nănăx s-Măssinăx, issəlmäd-anăx a-wa hanăx-ihakkän idəm dat-Măssinăx, inn'-anăx:

«Wär tənned dăx-iman-năk:
mi he-ikkən isənnawān?»

A-wen, azəzzəbbu n-Ălmasex dăx-săn;

⁷ wär tənned dăx:

«Mi he-ikkən ider n-ăkall?»

Ajän wădden Ălmasex, ăru dd-inkăr jer-inəmmuttan.

⁸ Isălan n-a-wen-dăx, a dăx-hanăx-innă măjrăd n-Măssinăx:

«Așäl-i, măjrăd n-Măssinăx,
ohaz-kăy, ih'-emm-năk, ih'-ulh-năk.»

Isălan-win-dăx a hin-nəsasawađ dăgg-adəm i-ad-amənăn s-Ŷisa.

⁹ Ere ittăfăn dăx-tămudre-net tənna n-a-s Ŷisa, Emăli, iflăs dăx-ulh-net a-s issənkăr-t-dd Măssinăx jer-inəmmuttan, ad-iyləs

¹⁰ făl-a-s immun wa dd-ifălän ulh n-ăwadəm a t-ihakkän idəm ɣur-Măssinăx, wa ittăfăn tənna n-a-wen s-emm-net, ad-t-iyləs Măssinăx.

¹¹ Ěnta-den-dăx a-wa innă əlkəttab n-Măssinăx a-s innă:

«Ere omănăn s-Emăli-dăx,
wăr-ilkem ad-ămmujrăz.»

¹² A-wen ămăra, wăr săr-s izley ägg-Ălyăhud wăla wa t-wărăn ămoos ed iket-năsăn, iyyăn n-Emăli ihakkän a olayăn s-əjut a oharăn, ere t-iyrăn-dăx, ad-has-ăkawən.

¹³ İktab a-s:

«Ere iyrăn isəm n-Emăli,
omăn săr-s dăx, ad-iyləs.»

Tăxart n-ulhawăn n-käl-Ălyăhud

¹⁴ Mășan, äddinăt ya, əndek əmmək wa s-mad-əɣrən isəm n-Emăli a-s wăr săr-s omenăn? Ěndek dăx əmmək wa s-mad-săr-s amənăn a-s wăr kăla əslăn i-isălan-net? Ěndek əmmək wa s-mad-əslən i-isălan-net a-s wăr t-illa ere hasăn-tăn-ixtăbăn?

¹⁵ Ěndek əmmək wa s-mad-hasăn-ətwăxtəbăn a-s wăr t-illa ere săr-săn ămeșălăn? Təssəba n-a-wen-dăx a făl innă əlkəttab n-Măssinăx:

«Tihusay ija ass n-imawayăn n-isălan n-Ălənžil,
edăgg ăkokălăn idarăn-năsăn dăx,
ălɣer a săr-s dd-tirəwăn.»

¹⁶ Ălwăxla a-s a äjjeen dăx-ăddinăt, unjay s-Ălənžil. A-wen-dăx a ăswănnăn ănnăbi Saya:†

«Emăli, a ija a-wa-dăx năssewăl,
mi omănăn s-a-wa nəxattăb?»

¹⁷ Immun wa iyallăsăn, a-wa s-isăl ăwadəm ihăn Ălənžil-wa-dăx nəxattăb dd-ifălän Ălmasex, a iha.

¹⁸ Ak ajăn a-wen ălmăxna-net a-s har ămăra-dăx, wăr-əslən käl-Ălyăhud i-isălan-win-dăx? Ěslan-asăn lab ed a-wen-dăx făw a dăx-innă əlkəttab n-Măssinăx:

«Ăssewălăn imawayăn n-isălan făl-ărori n-ăkall iket-net,
wăr t-təlla tamdujt dăx-ăddunya s-wădden təsl'-asăn.»

¹⁹ Ad-kăwăn-səstənăx:

«Tordam a-s isălan-wi-dăx,
wăr tăn-əjrehăn käl-İşrayil?»

Ějrahăn-tăn lab. Ěntăneđ-en-dăx făw a-s innă ănnăbi Mosa s-tizarăt, innă Măssinăx:

«Ad-dăx-wăn äjăx tismiten

† **10:16 10:16** A-wa ănnăbi dd-ăzzarăn i-Ŷisa, ălolăy dăx-isălan-net əssayăt timăđ n-awătay dat-tiwit-net.

fäll-tamøtte wärät tämoos ta-nin,
zəzzəkənzäräḡ-kāwän fäll-tawset jam tawset n-älžuhäl.»

²⁰ Oläs daḡ ännäbi Saya, iglä har innä:

«Äddinät wi s-ibda, əkfan-ahi iroriyawän-näsän,
əqqälän-ahi-dd;
wi s-ihənnin, wär dāḡ-i äkkulän,
äsnäfaläläḡ-asän-dd iman-in.»

²¹ Dāḡ-a-wa dd-iqqälän käl-Işrayil, ənta da a-wa dāḡ-sän innä Mässināḡ:

«Əzzäläḡ əfuss-in har äqqur
i-tawset hi-tənkərät,
oseḡ-tät a-wa tawset hi-täsiḡärät ulh-net,
tawset sār-i tunjayät.»

11

Mässināḡ, wär hin-inḡew käl-Işrayil

¹ Ässistänäḡ-kāwän ämära, ak ajän Mässināḡ ijär-in tamøtte ta n-käl-Işrayil äsnäfrän? Äbo! Näkk-i hawän-äsewälän, ägg-Işrayil n-ahäya n-Ibrahim la tawset ta n-Bänyamin a ämoosäḡ.

² Mässināḡ, tawset ta äsnäfrän i-iman-net härwa wär dd-täxlek äddunya, wär tät-in-ijer. Əktəwät-dd ḡas a-wa innä ännäbi ʔəli dāḡ-isälan n-käl-Işrayil a-s hasän-işkä s-Mässināḡ, inn'-as:

³ «Emäli, tamøtte-ta-hi, tänyä ännäbitän-näk,
tärzä idäggan wi dāḡ-tajjänät tikutawen-näk.
Näkk daḡ-i dd-äqqimän, təzzan sār-i,
tärha ad-täj iman-in.»

⁴ Innä a-wen ḡas, inn'-as Mässināḡ:

«ʔəli, änsət ənniyät-näk,
leḡ əssa afdän n-ähaləs wär-iha wäl' iyyän
s-käla irkäḡ dat-Baal-i n-ämänokal n-äşşänämän.»

⁵ A-wa ijän dāḡ-äzzäman-wen-dāḡ, ənta daḡ a ijan dāḡ-äzzäman-wa-dāḡ, iḡlaf Mässināḡ dāḡ-ännuḡmät-net tamøtte wärät təjjət dd-äsinäfrän jer-käl-Işrayil.

⁶ Şamad ännuḡmät n-Mässināḡ a äsnäfränän tamøtte-ten-dāḡ i-ad-tät-iḡləs, adiş, wädden imärkedän-näsän a tän-e-iḡləsän ed, afäl ija a-wen, ad-äbas ämoos ännuḡmät, ännuḡmät wa n-tidət.

⁷ A-wen-ş, ma ämoos älmäḡna-net? Ajän a-wa s-əmmäḡän käl-Işrayil, wär t-əjrewän? Əjräwän-t dāḡ-sän lab wi dāḡ-sän äsnäfrän Mässināḡ. Wi iyyädnen wären əjrew a-wen, asḡär a has-jän ulhawän-näsän.

⁸ Isälan n-a-wen-dāḡ a dāḡ-innä əlkəttab n-Mässināḡ:

«İşşəşläl-tän-in Mässināḡ
i-ad-wär hənneyän, wär səllən.
Ənta-den-dāḡ a-wa ijräwän käl-Işrayil har aşäl-i-dāḡ.»

⁹ Oläs daḡ ḡarät-a-wen, innä ännäbi Dawəd:

«Umasnet imjora-näsän
a hasän-iha sunsəj,
ättärmäsnet dāḡ-tändärbaten;
idəwet-dd fälla-sän älmäşşibät tän-in-immärän.

¹⁰ Təwäret təməlle tiḡḡawen-näsän i-ad-äbas hannäyän,
äjənet aləddəş wa-dāḡ fäll-hak iyyän dāḡ-sän,
umaset ḡas, şund əzük a ällinjät.»

Ejädäl d-tebädde n-käl-Işrayil

¹¹ Ak ejädäl wa jän käl-Işrayil, i n-härkuk meḡ? Äbo! Änn-ak šäḡşad-näsän ɔntäned-en-däḡ a dd-oräwän taşlɔlt i-ɔlyəllas i-tiwsaten ti iyyädnen i-ad-asəmən käl-Işrayil.

¹² Ḡas kunta wäla šäḡşad-näsän däḡ, älfäyda a dd-oräw s-äddunya, äb' ätṭäma n-təmḡäre ta he-äj älfäyda wa sär-s dd-e-arəwän afäl dd-əqqälän Mässinäḡ i-ad-utabän. Ijmaḍ-t äşşäk a-s ad-umas a-wen älxer mäqqoorän.

Älənžil a iha ɔlyəllas i-inəzzulam

¹³ Ämära käwäned-i n-inəzzulam a-s ämmijrädäḡ: Näkk-i-hi, Mässinäḡ a hi-ijän änämmaşul-hawän, işl'-ahi daḡ ämaşal hi-ijrazän.

¹⁴ Ija ḡur-i a-s ämaşal wa hi-issäḡläf Mässinäḡ ija təmḡäre-ta-däḡ s-afäl t-in-ässawädäḡ, ad-dd-arəw a-wen tismiten n-käl-tumast-in, utabän, iḡləs Mässinäḡ iyyäd däḡ-sän

¹⁵ fäl-a-s, kunta ämära, ij'-en Mässinäḡ s-edes i-ad-dd-arəw a-wen tanməzalt n-äddunya d-Mässinäḡ, ma he-äj afäl ätubän käl-Işrayil? Ad-umas a-wen täkunt tolähät d-äddinät äba, oläsän-dd tanäkra jer-inəmmuttan.

¹⁶ Kunta afärs n-tajəlla wa n-eḡäf a ikät äwadəm i-Mässinäḡ, adiş tajəlla daḡ, iket-net ti-net ed šaddij. A-wen-däḡ a ijän a-s kunta ikewän n-ahəşk, i n-Mässinäḡ, adiş, iləktan-net daḡ, iket-näsän, i-net ed šaddij.

¹⁷ Tamətte ta n-Işrayil, toläh d-ahəşk n-əzzäytun s-hin-inkäḍ Mässinäḡ härät däḡ-iləktan-net təzzar issärmäm-käy-dd käyy-i wärän ämoos ägg-Älyähud i-ad-käy-infəw käyy-däḡ a-wa dd-itəffalän ikewän, isidorän ahəşk iket-net.

¹⁸ Təssəba n-a-wen-däḡ a fäl, käyy-i n-änəzzalim, he käyy! Wär təlkehäd iləktan wi hin-əttənkädnen. Ma däḡ-tabärajäd? Wädden käyy a iṭṭafän tämudre i-ikewän, änn-ak, ikewän a hak-tät-əṭṭafnen.

¹⁹ Ämmukkän a-s ad-hi-tənnəd a-s: ajän wädden iləktan, əttənkädän-in i-ad-dd-ətwəsärmämäḡ däḡ-edägg-näsän?

²⁰ Tidət lab a-wen mäşan, əlməd a-s iba n-immun-näsän a fäl hin-əttənkädän, tätwəsärmämäd-dd däḡ-edägg-näsän ed tomänäd. Ḡas, wär sakaf iman-näk, uksad Mässinäḡ!

²¹ Fäl-a-s Mässinäḡ wär-oyya iləktan-wi s-aläşäl-däḡ, ärmamän d-ahəşk äb' ätṭäma n-käyy-i s-a äynayän dd-təjjäşäd a-wa-däḡ iket-net.

²² Ənhəywät ḡas əmmək wa s-isalmad Mässinäḡ miḡaw-net wa äddewän d-aḍkär-net: wi t-wären äksud, ad-ənmənhəyän d-älmäşşibät-net, wi t-äksudnen, ad-äḡləsän däḡ-äşşar-net. Ḡas, äj ätṭäma-näk däḡ-miḡaw n-Mässinäḡ ed afäl wär jed a-wen, ad-hin-tättänkädäd şund eläkät.

²³ Afäl dd-əzjārän käl-Älyähud täḡart n-ulh ta tän-tärmäsät, ad-ətwəsärməmän däḡ-edägg-näsän ed Mässinäḡ ila tärna s-tän-dd-äsoyäl idäggan-näsän.

²⁴ Käyy ibda, wär təzleyäd d-eläkät irmamän däḡ-ahəşk n-täkoyt, tätwänkädäd-dd fälla-s, tätwəsärmämäd däḡ-ahəşk n-əzzäytun olaḡän kud-däḡ a-wen, əssin ihəşkan wären oleh iyyän n-əzzənəf. Käl-Işrayil-i s-aläşäl-däḡ ärmamän d-ahəşk-en, räqqiis i-Mässinäḡ, ad-tän-dd-isuḡəl edägg-näsän.

Ännuḡmät n-Mässinäḡ, äddinät iket-näsän a-s t-irha

²⁵ Ayətma, əkkasäḡ-käwän däḡ-taḡdärt däḡ-isälan n-əddäraj wa s-käla ättunkäl dd-änfalälän i-ad-wär tordem iman-näwän tayətte. Əlmədät a-s täḡart n-ulh ta tärmäsät təşşəm n-käl-Işrayil ämära-däḡ, ti n-ad-dd-əjjəşnät tiwsaten ti iyyädnen iket-däḡ-näsnät, amənnät s Mässinäḡ, iḡləs-tänät.

²⁶ Ənta-den-däḡ əmmək wa s-mad-əḡləsän käl-Işrayil iket-däḡ-näsän s-əmmək wa s-tän-innä əlkəttab n-Mässinäḡ a-s innä:

«Taḍayt ta n-Sayon ad-dd-e-ifel ämukäs n-tekäriḍt wa hin-e-ikkəsän iba n-äddin fäll-ihäyawän n-Yaqub.

²⁷ Dihen, ad-där-sän ahäräy ärkäwäl n-tassayt, aməsäy-in ibäkkadän-näsän iket-däy-näsän.»

²⁸ Afäl täqqäl tanfust s-isälan n-anməšri wa jän i-Älənžil, ij'-en a-wen-däy išənja n-Mässinäy iket-däy-näsän, mäšan ämoos-awän a-wen käwäneḍ, tänfo mäšan, afäl täqqäl tanfust s-ebre n-nefran wa n-Mässinäy, iṭṭaf-asän ärkäwäl däy-idəm n-imärawän-näsän

²⁹ ed Mässinäy, wär-itäqqəl s-a-wa ikfä, wär-itäqqəl s-ämašal-net.

³⁰ Ibda, täḍḍinäm däy-inämäšrayän mäšan ašäl-i, təlmädäm s-tähanint n-Mässinäy ed änmäšrayän käl-Älyähud.

³¹ Anməšri-näsän ad-dd-oräwän tähanint-ten-däy däy-a-s irha Mässinäy ad-ämärənät tiṭṭawen-näsän i-ad-əlmədän əntäneḍ-däy ämära s-tähanint-net.

³² Mässinäy a oyyän dägg-adəm oḍan däy-tanməšrayt i-ad-isəlməd hak iyyän däy-sän s-tähanint-net.

Təmyäre n-tärna n-Mässinäy

³³ Isälan n-a-wen-däy a däy-ässewäl əlkəttab n-Mässinäy a-s innä:

«Təmyäre n-tihusay ij'-enät ärrəzäy wa n-Mässinäy
Mi äddoben ad-dd-isäxloy sārho-net wäla tayətte-net
A-wa itäjj, ojar tayətte n-ägg-adəm,
wär t-illa ere dd-e-isäxloyän zäbotän-net.

³⁴ Mi issanän a-wa ihän ənniyät n-Emäli?

³⁵ Mi s-käla t-ikfa härät äb' äṭṭäma
n-ad-ijär äṭṭäma n-timzal n-älxer-net?»

³⁶ Wär t-illa ed ənta a dd-ibnän a-wa-däy iket-net, tärna-net a-s t-illa a-wa t-illän, wär t-illa a-s wädden i-net. Ənta ɣas a äniihäjjän d-semɣar härkuk. Amin!

12

Ihuk n-iman d-taxəssa i-Mässinäy

¹ Ayətma-ɣ! Jaräy-käwän s-idəm n-təmyäre n-tähanint ta hanäy-oḍän Mässinäy, äkfät-t iman-nawän däy-tixəswen-nawän iket-di təddaräm s-älxal šaddijän, ənta-den-däy takute ta has-təjrazät, ənta-den-däy älxibadät wa n-tidət.

² Wär təlkemäm i-a-wa fäll-təgl' äddunya-ta-däy, änn-ak äyyät Mässinäy ad-isəynəy ənniyätän-nawän i-ad-tudabem azəmmäzli däy-a-wa ämoosän erhet-net, wa oläxän, a-wa has-ijrazän d-a-wa ifränän.

Ašəmmišəl n-isuf wi hanäy-ija Unfas Šaddijän

³ Əttaräy däy-hak iyyän däy-wän däy-idəm n-ännuɣmät wa fäll-i issənsä Mässinäy d-ad-wär-ija wäl' iyyän däy-wän iman-net jənnəj-a-wa t-ija Mässinäy. Isərəset hak iyyän iman-net dat-amidi-net s-a-wa ilän əmmək. A-wa s-käwän-ikfä Mässinäy turhajät n-iji-net, äjät-t s-a-wa dār-ogdäh immun-nawän.

⁴ Wädden taxəssa n-ägg-adəm tiyyät ɣas mäšan, əjjətnät tizunawen-net, hakd a-wen-däy, wär t-təlla təzunt tolähät d-tamidit-net älxidmät, hak iyyät d-a-wa tənfa.

⁵ Əmmək-wen-däy a-s näkkäneḍ-i omännen s-Mässinäy, nəjjət, mäšan däy-təssəba n-tassayt-nänäy d-Älmasex, nämoos šund tiyyät taxəssa s-hak iyyän däy-näx-däy änimäṭṭaf d-amidi-net.

⁶ Mässinäy, däy-ännuɣmät-net, ij'-anäy isuf s-hak iyyän-däy izlay d-wa n-amidi-net. A-wen-däy a fäl wa ijräwän ɣur-Mässinäy məjrad s-ila s-ad-t-isuxəl i-äddinät, ixṭəbet s-älxal wa ihälän ebre n-immun.

⁷ Wa ijrāwān ḡur-Mässināḡ turhajāt n-ad-idhəl äddināt wi iyyädnen, ijlöyet dāḡ-a-wen; wa isāḡren, isāḡret s-sārho.

⁸ Wa ijrāwān turhajāt n-a-s e-d immöjrad, isəsmäḡ ulhawān n-imidiwān-net, išləwet-t a-wen; wa ijrāwān turhajāt n-ihuk, wār-itəməjruzet a-wa ikfa; wa ikfä Mässināḡ turhajāt n-ad-izar i-äddināt, ijlöyet dāḡ-a-wen. Wa n-āmadhal n-tiläqqiwen, idhəlet-tänāt s-ulh äsriiwān.

Akuyəd dāḡ-təlməssexəya

⁹ Tārha ta n-tidət, wār ḡəddār, akəḡāt d-a-wa läbasān, əjlöyāt hullan dāḡ-amışəl n-a-wa olāḡān.

¹⁰ Nəmārhat hullan jer-iman-nāwān šund ānḡatān, nəsemḡarāt, zāzrāt äddināt wi iyyädnen iman-nāwān.

¹¹ Ədgəzāt dāḡ-a-wa hām, äyyāt fälla-wān sendad, ukasāt dāḡ-älxidmāt n-Emāli s-ənniyāt imdan.

¹² Isəddəwətet-kāwān ätḡāma wa kāwān-äsjar Mässināḡ, ijjəšet-kāwān äššābarāt afäl kāwān-tärmäs tissust, əjlöyāt dāḡ-tamädilt n-Mässināḡ.

¹³ Iməššəddəjan wi tärmas tāmāḡatert, ədhəlāt-tān, səmməjurerāt wi kāwān-dd-tisənen.

¹⁴ Ədəlāt Mässināḡ i-äddināt-wi kāwān-ḡazzābnen, ärhāt-asān älxer, wār hasān-jem terk tettert.

¹⁵ Ahrāt tedāwit d-wi äddiwätnen, tahərəm imeḡḡawān d-wi hallänen.

¹⁶ Nəmənnəkāt jer-iman-nāwān s-älxal, wār tətteräm a-wa dār-wār togdehäm wāla a-wa wār tāmoošām, sārəsāt iman-nāwān, wār jem iman-nāwān äddināt s-wār t-illa a-s wādden əssanān-t.

¹⁷ Wār zəlām tāllābāst s-tāllābāst i-āwadəm, mašälāt a-wa olāḡān i-äddināt iket-nāsān.

¹⁸ A təkās talḡa, tāqqal-kāwān-dd, iməlet älxer jere-wān d-äddināt iket-nāsān.

¹⁹ Ayətma-i əkneḡ tārha, wār təkkesäm əḡa i-iman-nāwān, sāḡləfāt talḡa-nāwān i-Mässināḡ ed Emāli iman-net innä dāḡ-əlkəttab-net:

«Näkk a hawān-e-ikkəsān əḡa,

näkk a hawān-e-ikkəsān älxär.»

²⁰ Olās daḡ, inn'-anāḡ mäjrad n-Mässināḡ:

«Ašänjo-näk wa inäqq laz, šäkš'-e;

kunta äffud, säsw'-e ed afäl has-jed a-wen,

ad-t-tānḡ tākrakiḡt wārāt təzley

d-a-s tahəst a jed fäll-əḡäf-net.»

²¹ Wār toyyed tāllābāst təkraš fälla-k ašäl, änn-ak, mišəl a-wa olāḡān i-ad-təkrəšād ašäl fäll-tāllābāst.

13

Asjəd i-a-wa innä əlxəkum

¹ İlzam hak āwadəm ad-āmašäl a-wa s-omär əlxəkum ed wār t-təlla təmmənəya warāt ärori n-äkall-i-dāḡ s-wādden a-wa la dāḡ-tārna Mässināḡ a dd-ifal; ənta daḡ a tāt-əssiibdādān.

² Təssəba n-a-wen-dāḡ a fäl ere issəkfärän iman-net i-əlxəkum n-əddəwəl, ilmədet a-s wār-izley d-a-s tənna n-Mässināḡ a-s änmäšräy. Ere daḡ wa änmäšräyän i-a-wa innä Mässināḡ, ijmaḡ-t äššäk a-s, tāborit n-äššäreḡa n-Mässināḡ a-s irha ad-tiḡəw fälla-s.

³ Äwadəm wa itamašälän a läbasān, a ässirmāḡän älqallitän, māšan wa itamašälän a olāḡān, wār t-e-särmāḡän. Kunta tārhed ad-wār kāy-issärmāḡ əlxəkum, adiš mašäl a-wa fälla-k irha, dihen, ad-ḡur-s təkrəšād tisənen.

⁴ Elxəkum, tänfo-näk a fäl t-dd-ixläk Mässinäx, məšan afäl wär käy-išla ar a-wa läbasän, adiş uksađ-t ed wädden bännan a fäl iţtaf tāborit ta n-äşşärexa. A-wen älmäxna-net, a-s, ilkam ad-dd-isənnəfiləl Mässinäx ađkär-net fäll-wi tamaşalnen a-wa läbasän.

⁵ Uf'awän ad-tamaşaläm a-wa fälla-wän irha əlxəkum wädden xas fäl tuksəda n-ad-fälla-wän isiđəw Mässinäx ađkär-net, änn-ak daş, i-ad-wär t-illa fäw a dəş-təşşakäm iman-näwän.

Anmärh jer-iman-nänäx

⁶ Təssəba n-a-wen-däş a fäl xaymät təzzaläm tiwse ed käl-tiwse-i dəş-wän tät-tattärnen, wär-izley d-a-s Mässinäx a-s äxdamän.

⁷ Hak äwadəm, äkfät-t a-wa fälla-wän ila jer-tiwse wäla äddäyyät wäla tuksəda wäla semxar.

⁸ Ayətma-x, wär käwän-iräwwäset äwadəm wäl' iyyän a säl tärha. Ere wa s-ha tärha n-äddinät ulh-net, äzizäbbät ämişəl n-a-wa fälla-s ifräđ alämär iket-net.

⁹ Wädden ätwännä:

«Wär jed əzzəna,

wär jed iman,

wär tokeräd,

wär täsdärhänäd a ila äwadəm wär led»,

d-a-wa säl a-wen.

Alämärän-win-däş, äsdäw-tän-dd iket-däş-näsän wa innän:

«Äj i-änhäraj-näk

tärha-ta-däş jed i-iman-näk.»

¹⁰ Tärha, ere wa s-ha ulh-net, wär mad-ixşəd härät i-änhäraj-net. Äwadəm daş wa s-ha tärha n-äddinät wi iyyädnen ulh-net, şund xas äzizäbbät a-wa innä Mässinäx dəş-alämär.

Aşäl wa dd-imiddəw əlxəllas, ohäz-dd

¹¹ Mäjräd-wa-däş, äjät-as ənniyät ed təh'-iwän tijya n-äzzäman a nəha, äbas ija ässaşät n-eđəs, ənkärät-dd. Aşäl wa n-əlxəllas, äbas ujəj, ojär ihəz wa dd-ija aşäl-i-däş uhən aşäl wa d-tomänäm.

¹² Ehäd iglä, tifawt, täsmäqqät-dd, nəkkəset-in fäll-iman-nänäx a-wa osäxän härät d-tihay, nasäxet d-a-wa ohärän härät d-ännur.

¹³ Närjəşet şund tarähut a fäll-anäx ijan, tumaset tämudre-nänäx, tämudre şäddiijät s-wär t-illa a nətajj dəş-ufär, najəjet iba n-asəgdah dəş-härät d-tesäse n-asməd d-asri wa n-kəşşəf d-asəmmäđəs n-iman-nänäx d-härät n-kənis-kənisän iyyäđ wären ənfa härät d-tismiten.

¹⁴ Tumaset-awän tämudre ta iţtaf Emäli YisaÄlmasex şund asälso äynayän, älsät-t. Wär täsbäläläm erk derhanän n-tixəswen-nänäx, tiyyəm-tän ännihäđän dəş-wän.

14

Nəməşmārät jer-iman-näwän

¹ Ayətma-x, äwadəm wa s-rəkkəm immun-net, arät-as ifassän-näwän, wär has-jem erk mäjräd.

² Ellan-t äddinät ordanen a-s wär t-illa amənsi s-wädden äddooben tetäte-net, əllan-t daş iyyäđ s-rəkkəm immun-näsän wären tət ar isudar wi n-işəkraş.

³ Ämära, wär-isämäđrayet wa s-a ijräw-däş, ad-t-äks, wa iyyäđän igdälän i-iman-net tetäte n-imənsiwän iyyäđ; wär-isäwaret daş wa wärän itətt härät iyyän uđlem ere wa s-a ijräw-däş, ad-t-äks ed ij'-as Mässinäx edägg ənta-däş.

⁴ Ak käyy fäw-i isawarän akli n-iyyan udlem, mi tämoosäd? Ajän wädden jer-ibdad wäla oða, mässi-s a iqqal a-wen, ma täkkuuläd? Elmöd a-s ad-ibdöd föll-iman-net ed Emäli-i t-illän ila tärna n-ehel-net.

⁵ Iyyäd äddinät, ija xur-sän a-s ill'-e ašäl ufän iyyän, ija xur-iyyəd a-s, a-di, wär-özleyän härät; äyyät hak äwadöm d-a-wa orda, igdäh xas ad-ikna ukəs n-äššäk dāx-a-wa iha.

⁶ Wa äzinämäzläyän išilan, ittaf älxal-wa dāx-ašäl-wa, izənnəmözloyet-tän i-ad-isəmyär Emäli s-a-wen; ere dāx wa s-a ijrāw, ad-t-äks, isəmyäret Mässināx ed a ijrāw-dāx, ad-irəš i-Mässināx isuf-win-dāx t-ija. Ere dāx wa s-ill'-e a wär-itətt, isamxar Emäli dāx-a-wen-dāx ed ənta dāx, itumay i-Mässināx a-wa has-ija.

⁷ Wär t-illa dāx-nāx ere wärän idder ar i-iman wi-net xas, wär t-illa dāx ere madän-ämmät i-iman wi-net xas.

⁸ Xas kunta nəddar, Emäli a-s nəddar, kunta dāx nämmut, ənta a-s nämmut. A-wen-dāx a fäl jer-nəddar wäla nämmut, Emäli a hanāx-ilän.

⁹ Wär t-ihā äššäk a-s Älmasex ämmut, inkär-dd jer-inəmmuttan i-ad-ixkəm föll-inəmmuttan hakd-dāx d-äddinät wi əddärnen.

¹⁰ Adiš, käyy, ma s-çallämäd äñña-k, samäçrayät-t? Iket-dāx-nänāx, ilkam ad-dd-nəbdöd dat-Mässināx i-ad-hanāx-išräx?

¹¹ A-wen-dāx a dāx-hanāx-ässewäl əlkəttab n-Mässināx a-s innä:

«Innä Emäli:

Näkk əddarāx,

wär t-illa ägg-adəm s-wädden ilkam ad-dat-i irkāx,

ilkam ad-hi-aməlän iket-dāx-näsän.»

¹² Ašäl-en n-tebädde dat-Mässināx, hak ägg-adəm d-a-wa has-jän imojjan-net.

Nəbdəwet d-amsəwär n-udlem jer-iman-nänāx

¹³ Näyyet anməšrax jer-iman-nänāx, əttəfät ənniyät n-ad-wär jem dat-äñña-wän a t-isijärtäqqilän wäla a t-e-isiçəwən dāx-immun-net.

¹⁴ Dāx-a-wa ordeç, a-wen dāx torda sār-i dd-falät Emäli Yisa, əkkasāx dāx äššäk dāx-a-wen, wär t-illa fäw a itamäksen xəramän, mäšan afäl issəxräm äwadöm härät i-iman-net, adiš, xəram-as.

¹⁵ Kunta käyy, təssəba n-a itakkän emm-näk a fäl mad-šənnəmšrəyäd äñña-k, adiš, əndek tārha dāx-a-wen? Wär täšnämäšrəyäd äñña-k dāx-təssəba n-a itakkän emm ed ənta-dāx, təssəba-net a dāx-ämmut Älmasex.

¹⁶ Wär hawän-itumaset härät tārham əssəbab fäl käwän-tizəmən äddinät, əbdəwät dār-s

¹⁷ ed, isälan wi n-Təmmənəya n-Mässināx, wädden isälan n-tetäte d-tesäse xas, isälan n-iqqud d-älxer d-tedəwit s-tärna n-Unfas Šaddijän.

¹⁸ Ere wa itamašalän erhet n-Älmasex s-a-wen-dāx, ad-ijrəç älxal-net i-Mässināx, əqqəsän-as dāgg-adəm.

¹⁹ Ayətma-x, nədgəçet dāx-umāx n-älxer d-anmədhal jer-iman-nänāx i-ad-nəşşuhət dāx-immun-nänāx.

²⁰ Wär-itumaset a itakkän emm əssəbab inaxxäsän a-wa ija Mässināx dāx-ulh n-äñña-k. Äduuttät a-s wär t-illa härät s-wädden šaddij mäšan hakd a-wen-dāx uf'-ak, ad-tajələd härät uhən, ad-siçəwäd äñña-k dāx-abäkkad.

²¹ Uf'-ak ad-təyyəd fölla-k isan hakd-dāx asməd d-a-wa säl a-wen iket-net äddooben ad-işənməšrəy äñña-k.

²² A-wa dāx-təkkasäd äššäk, əttəf-t jere-k d-Mässināx, igdäh dihen-dāx. Tənçəd i-ere wa wärän iššek iman-net dāx-ijitän-net.

²³ Ere wa ässokän härät emm-net uhən-däx išsak iman-net, äwadəm-en, asidəw ɣas a itajj iman-net däx-äššäreɣa n-Mässinäx. A ij' äwadəm-däx, däx-išsak iman-net, abäkkad.

15

Zäydärät fäll-wi s-fäsus immun-näsän

¹ Näkkäned-i äššohätnen däx-immun-nänäx s-Mässinäx, nəšmäret i-wi s-rökkəm wa-näsän. Wär nətumaset äddinät wären zənəzjumut ar däx-iman wi-näsän ɣas,

² änn-ak, nədgəzət däx-a-wa infän äddinät wi iyyädnen i-ad-əşşuhun däx-immun

³ fäl-a-s Älmasex ya, wädden iman wi-net ɣas a däx-äznäzjamät. Isälan-net ənta-en-däx a däx-innä əlkəttab:

«Innä Mässinäx:

Äddinät wi käy-gaggärnen,
näkk, a gaggärän.»

⁴ Əlkəttabän wi ärəwnen, a-wa däx-sän iktäbän iket-net, iktab i-ad-hanäx-umas isəkta hanäx-samätarnen i-ad-nəšmär däx-alkum i-Mässinäx, ismađän ulhawän-nänäx, nəkrəš ätṭäma itbatän.

⁵ Mässinäx-i ihakkän əššəmurät däx-alkum-has, isasmađ ulhawän, äddoobät ad-sär-näx dd-arəw tanmənnak jer-iman-nänäx, naläh d-Ÿisa Älmasex.

⁶ Afäl ija a-wen, ad-nəṭṭef iyyän n-ənniyät, nəqqayəm nətəmmal Mässinäx-i n-Abba-i dd-izjār Emäli-nänäx Ÿisa Älmasex.

Ÿisa, tamətəte iket-net a-s dd-osa

⁷ Nəməqbolät jer-iman-näwän s-əmmək wa s-käwän-iqbäl Älmasex i-ad-itwəsəmyār isəm n-Mässinäx.

⁸ Təssanäm a-s Älmasex, Mässinäx a t-dd-äšmašälän s-käl-Älyähud i-ad-tän-isəlməd a-s ärkəwälän wi ijjäš ibda i-imɣarän-näsän ənta a ɣur-dd-əmdän, ənta a-s tasəṭbat-näsän, Mässinäx daɣ, wär-irəzz däx-tənna-net.

⁹ S-tizarät, käl-Älyähud a-s dd-osa, təzzaɣ, əlkämän-asän äddinät-wi iyyädnen wären ämoos dägg-Älyähud. A-wen, ij'-e Mässinäx i-ad-t-aməlän inəzzulam däx-təssəba n-təhanint-net s-əmmək wa s-tän-innä əlkəttab n-Mässinäx a-s innä:

«Ad-käy-amələx jer-tiwsaten,

itwəsəmyār isəm-näk.»

¹⁰ Iktab daɣ a-s:

«Ya tiwsaten!

Ahärmät tedäwit d-tamətəte ta n-Emäli.»

¹¹ Iktab daɣ a-s:

«Ya tiwsaten! Aməlmät Emäli iket-däx-näkmät,

əzzəjmät iməslan-näkmät, taməlmät-t.»

¹² Isälan n-a-wen-däx a däx-innä ännäbi Saya:†

«Ilkam ad-ikrəš Yasa ahäya,

ad-immukəl fäll-tiwsaten n-äddunya iket-däx-näsnät,

ad-umas ätṭäma-näsnät.»

¹³ Ikf'-iwän Mässinäx-i s-ənta ɣas a isajarän ätṭäma, isanäflay däx-tedäwit d-älxer däx-äddimmät n-immun-näwän i-ad-imɣar ätṭäma-näwän sār-s s-tärna n-Unfas Šäddijän.

Äddälil n-täkarde n-Buləs

† 15:12 15:12 A-wa ännäbi dd-äzzarän i-Ÿisa, äloläy däx-isälan-net əssayät timađ n-awätay dat-tiwit-net.

14 Ayətma-ğ, əkkasəğ aššək a-s tøjlayäm däğ-a-wa häm, wär t-illa musnät hin-tođanäm, täddoobem dağ ad-tənməkəfəm äddäbaratan jer-iman-näwän däğ-isälan n-immun.

15 Mäšan hakd a-wen-däğ, ijjäš-ahi-dd derhan n-ad-käwän-dd-səktoğ härätän iyyäd s-hi-ikfa Mässinäğ turhajät-näsän d-iba n-tasäja n-ad-hawän-tän-in-səssiwəđäğ.

16 Ənta a hi-äsnäfränän däğ-ännuymət-net i-ad-umasəğ akli n-ŸisaÄlmasex ixdamän jer-äddinät-wi wären ämoos dägg-Älyähud i-ad-tän-säsläğ Älənžil n-Mässinäğ əntäneđ-däğ, umasän šund takute äššišdəj Unfas Šäddijän, takute has-təjrazät.

17 Abäraj-in, tassaxt d-Ÿisa Älmasex ed Mässinäğ a hi-ijän däğ-ämašal-wa-däğ.

18 Kunta hannäyäm a-s häläğ mäjräd, ärheey ad-təlmədäm a-s a-wa jänney iket-net, jänney-t däğ-isälan n-a-wa ija Älmasex s-iman wi-nin jer-inəzzulam† i-ad-ämašälän erhet n-Mässinäğ.

19 A-wen ij'-e Mässinäğ s-a-wa xatṭäbäğ d-a-wa tadjäğ. Ässewäd fäll-a-wen a-s ikf'-ahi turhajät s-tärna n-Unfas-net amišəl n-ijitän n-Mässinäğ d-härätän ässuksäđnen äqqannen eğäf. A dd-fäläğ Yärussäläm har äkall wa n-İlirya, wär t-illa edägg s-wädden jeğ däğ-s isälan n-Älənžil n-Älmasex.

20 Däğ-iji n-isälan-en, jeğ ittus i-iman-in n-a-s wär səllənžey ar idäggan wi s-käla wär əslen i-isəm n-Älmasex ed, wär-ärheey ad-ädyäğ fäll-ässas ässinta äwadəm dat-i.

21 Jeğ a-wen däğ-ənniyät n-ad-ämašäläğ a-wa innä əlkəttab n-Mässinäğ a-s innä:

«Wi s-wär käla əslän i-isəm-net,
ad-t-ənhəyän;
wi s-wär käla əslän i-isälan-net,
ad-t-əjrahän.»

22 Ənta-den-däğ a ija a-wa-däğ, a-wa hi-ikkäsän ad-käwän-in-asäğ.

Derhan wa ija Buləs n-ad-äkk Roma

23 Ämära, hannäyäğ a-s äbas hi-itṭaf härät däğ-idäggan-win-däğ, wär-ärheey ɣas ämära ar ad-käwän-in-äkkäğ ed a ilan iwətyan äsidärhänäğ a-wen,

24 ənhəyäğ-käwän afäl əkkeey äkall wa n-İsbanya. Dihen, afäl əkkäsäğ tenere-näwän, ad-hi-təjəm äddäbara s-hin-äwwäđäğ siha s-əkkeey.

25 Iket-di d-itäj a-wen-däğ, əkkeey Yärussäläm, äwwayäğ tirjit i-iməššeddəjan wi t-əllänen dihen, tärmäs tāmāğatert.

26 Əssäğläfän-ahi iməššeddəjan wi hənən älkänisäten ti hənən tajiwen ti n-Masidunya d-Akaya tasəssiwit jan i-älməssexitän wi n-käl-Älyähud tärmäs tāmāğatert däğ-Yärussäläm.

27 A-wa jän, wädden äwadəm a hasän-t-äšhäššälän, a tän-dd-ikkasän, änihäja dağ a-wa jän ed kunta imumənän wi n-käl-Älyähud, əntäneđ a äzozäyən Mässinäğ i-inəzzulam, änihäja s-ämära-däğ d-tän-tärmäs tāmāğatert, käwäneđ a hasän-tät-itakkäsän s-a-wa tətṭäfäm.

28 Afäl hin-ässawäđäğ isälan-win-däğ har jeğ tasəssiwit-ten-däğ jer-ifassän n-käl-Yärussäläm, ad-käwän-in-əmmäräğ təzzar akəyäğ s-İsbanya.

29 Əssanäğ a-s a-s käwän-in-e-asäğ, ad-hi-umas a-wen imraš äjjootnen sār-i dd-oraw Älmasex.

30 Ayətma-ğ, jeğ-awän idəm Emäli-nänäğ Ÿisa Älmasex d-tärha ta ija Unfas Šäddijän däğ-ulhawän-nänäğ, d-ad-täqqayməm hin-təddaläm Mässinäğ, tahərəm dār-i anmäny wa heğ

† 15:18 15:18 – Ÿur-käl-Älyähud, ere wärän ämoos ägg-Älyähud s-aläšäl meğ ere wärän ilkem i-äddin-näsän, iket-net, änäzzalim a ämoos. A-wen-däğ a fäl tiwsaten ti iyyäđnen iket-näsän, ti n-inəzzulam. — Ašäl-i-däğ, änäzzalim, äkafär (ere wärän issen s-Mässinäğ).

³¹ i-ad-dd-əzjārəχ ifassän n-inämäšrayän wi hänen Älyähudəyät, tumas tadhəlt ta äwwäyəχ i-iməšseddəjän wi hänen Yärussalam əssəbab n-tedäwit.

³² Afäl otäs Mässinäχ a-wen, a-s kəwän-in-mad-asəχ, əjrazän-ahi iman-in, əjrəwəχ ya s-ad-əjəχ išilan n-təsonfat χur-wän.

³³ Oyyey-kəwän d-älxer n-Mässinäχ. Amin!

16

Timtär d-tihulawen

¹ Ässiχläfäχ-kəwän Fibya ta n-wälätma-nəχ dəχ-əddin, tədhal s-a äjjeen älkänisät ta n-aχrəm wa n-Sinkərya.

² Afäl ašäl wa d-kəwän-in-tosa, səbbärəkät-tät s-asəbbärək wa dər-äniihäjjän iməšseddəjän ilä Emäli, a-s tämyätär-dəχ, äkfät-as-t. Särho-net, ijmađ-t äššäk a-s ännufläyän dəχ-s äddinät äjootnen hey näkk iman-in.

³ Tähuuläm-ah'-in Briska d-Akilas-i n-imadhalän-in dəχ-älxidmät wa nəha i-
YisaÄlmasex.

⁴ Iräš-asän Mässinäχ; jän iman-näsän dəχ-miši i-ad-hi-ədhəlän. A-wen, wädden näkk χas a t-ijannen, jannen-t dəχ imumənän wi hänen älkänisäten ti n-tiwsaten ti iyyädnen.

⁵ Tähuuläm-ah'-in älkänisät ta täžžammaχät dəχ-ehän-näsän.

Tähuuläm-ah'-in Ibäntus-i əkney tärha, ənta-en-dəχ a äzzarän s-immun s-Älmasex dəχ-teje ta n-Azya.

⁶ Tähuuläm-ah'-in Märyäma, tədgəz hullan dəχ-älxidmät wa ha fälla-wän.

⁷ Tähuuläm-ah'-in Idrinikus d-Yunya-i n-käl-äkall-in, kälä dər-sän ohärəχ takärmüt. Meddən, a-wa ätiwäsəmyärnen jer-inəmmušal, äzzarän-ahi immun s-Älmasex.

⁸ Tähuuläm-ah'-in Änbliyatus-i əkney tärha dəχ-Emäli.

⁹ Tähuuläm-ah'-in Urban wa n-ämadhal-in dəχ-a-wa hey i-Älmasex, ähuuləχ-in Stakis-i əkney tärha.

¹⁰ Tähuuläm-ah'-in Äbbelis, änhäynähäy dəχ-immun-net, məšan, itbat.

Tähuuläm-ah'-in ehän wa n-Aristubul.

¹¹ Tähuuläm-ah'-in Haruddin-i n-ašəqqay-in.

Tähuuläm-ah'-in imumənän wi ila Emäli əzzəχnen ehän wa n-Narsisus.

¹² Tähuuläm-ah'-in Trifina d-Trifusa, ədgəznät hullan dəχ-a-wa hänät i-Emäli.

Tähuuläm-ah'-in Bärsidya ta n-wälätma-nəχ dəχ-əddin-i əkney tärha dəχ-Emäli, tədgəz ənta-dəχ hullan dəχ-a-wa ha i-Emäli.

¹³ Tähuuläm-ah'-in Rufus, ähaləs n-nefran n-Emäli a ämoos.

[Tähuuläm-ah'-in dəχ ma-s-i wärät təzley d-ta-nin.]

¹⁴ Tähuuläm-ah'-in Asinkiritus d-Fälχun d-Armis d-Bätrubbas d-Irmis d-ayətma-wi əzzəχnen χur-sän.

¹⁵ Tähuuläm-ah'-in Fäylalug d-Yulya.

Tähuuläm-ah'-in Nere d-wälätma-s ənta d-Olinbas d-iməšseddəjän iket-näsän wi t-əllänen χur-sän.

¹⁶ Nəməjjät jer-iman-nəwän isofan n-tärha təmdat, ähuulnät-kəwän-in älkänisäten n-Älmasex iket-dəχ-nəsnät.

Timtär

¹⁷ Ayətma, äsimätärəχ-kəwän d-ad-tagəžäm iman-nəwän dəχ-əddinät-wi dd-tirəwnen təbəđdawt jere-wän, tattärän ere äšnämäšrayän. Äddinät-en, wär-əlkemän i-a-wa kəwän-nəssəχra, sənnəməjjät iman-nəwän dər-sän s-iyät.

¹⁸ Wädden Älmasex-i n-Emäli-nänäx a-s äxdamän, a ästäräjjen dāx-tisatten-nāsän xas a-s əmmaxän. Ekkan jer-äddinät wi s-wär ikna immun-nāsän tenəŋe, takärrasän-tän s-tāzude n-iləs d-tiläqqad.

¹⁹ Kāwāneḏ, äjjəyhän äddinät iket-dāx-nāsän a-s tössanäm a-wa hām, sajadām i-mājrād n-Mässināx. Äddiwex hullan dāx-isālan-nāwän, siwəḏät härwa fäll-a-wen, tumasām iməssorha tamašalnen a-wa olāxän, wär tosexām fāw härät d-a-wa läbasän.

²⁰ Elməḏät a-s Mässināx-i n-Mässi-s n-älxer, šik dāx a-s-e-ilkāz Iblis daw-iḏarän-nāwän, ikf'-iwän Emäli-nänäx Yisa ännuxmät-net.

²¹ Ähuul-kāwän-in Timoti-i n-āmadhal-in, ähuul-kāwän-in Lisyus d-Yasun d-Sosibātrus; dāgg-ākall-in əntāneḏ-dāx.

²² Näkk Tärtəyas-i isaktab Buləs tākarḏe-ta-dāx, ähuulāx-kāwän-in dāx-idəm n-tassaxt ta nəja d-Emäli.

²³ Ähuul-kāwän-in Gayəs-i xur-tizəbbux, ənta daḡ a xur-tažəmmaḡ älkānisät. Ähuul-kāwän-in Irastus wa n-ānazraf n-aḡrəm, ähuul-kāwän-in aŋŋa-nāx Kartus. [

²⁴ Ikf'-iwän Emäli-nänäx YisaÄlmasex ännuxmät-net. Amin!]

Təmmal i-Mässināx

²⁵ Təmmal i-Mässināx-i ilän tärna n-ad-kāwän-isəşşuhət dāx-immun-nāwän s-əmmək wa s-t-xaṭṭābāx dāx-Älənžil-i ämoosän mājrād n-Yisa Älmasex. Älənžil, isālan-net, kāla ämoosän əddāraj māšan, äsnāfaläl-tän-dd Mässināx.

²⁶ Ašäl-i, isālan-en, əlmädän sār-sän äddinät, əktābän-tän daḡ ännābitän s-a-wa s-hasän-omār Mässināx-i n-Amāxlol. A-wa s-kāla iffār dd-änfalälän, äsnāfaläl-t-dd Mässināx i-ad-isəlməd tiwsaten ti n-inəzzulam[†] s-Älənžil, amənnät s-Yisa, ämašäl-nät erhet n-Mässināx.

²⁷ Mässināx xas a-s Ämusän. Naməlet isəm-net härkuk dāx-äddimmät n-YisaÄlmasex. Amin!

[†] 16:26 16:26 – Xur-käl-Älyähud, ere wärän ämoos ägg-Älyähud s-alāşäl meḡ ere wärän ilkem i-äddin-nāsän, iket-net, änäzzalim a ämoos. A-wen-dāx a fäl tiwsaten ti iyyäḏnen iket-nāsän, ti n-inəzzulam. — Ašäl-i-dāx, änäzzalim, äkafār (ere wärän issen s-Mässināx).

Täkarde ta täzzarät iktäb Buləs i-käl-Kurənta

Äšajəš

¹ A-wa näkk, Buləs, wa dd-iğra Mässinäx dāx-erhet-net, i-ad-umasāx ānāmmašul n-ŶisaĀlmasex, hawān-in-iktabān näkk d-Sustin-i n-ānḡa-ḡ dāx-āddin.

² Nəktab-awān-in kāwāneḡ-i n-iməššeddəjan hānen ālkānisāt ta n-aḡrəm wa n-Kurənta, nəktab-in dāx i-iməššeddəjan wi iyyādnen ḡarrānen isəm n-Emāli Ŷisa Ālmasex, edāgg hān-dāx, Emāli-nāsān a-s wa-nānāx.

³ Nāhuul-kāwān-in, nəttar s-Mässināx-i n-Abba-nānāx d-Emāli-nānāx Ŷisa Ālmasex a kāwān-ikfān ānuḡmāt d-ālxer.

Tāmayit n-Buləs i-Mässināx dāx-təssəba n-käl-Kurənta

⁴ Āmmoyāx i-Mässināx, timələx-t hak ašāl dāx-təssəba n-ānuḡmāt wa sār-wān-dd-torāw tassaxt ta jām d-ŶisaĀlmasex,

⁵ wār t-illa fāw a-s wādden ikf'-awān-t; ikf'-iwān musnāt n-mājrād, ikf'-iwān dāx musnāt n-erhet-net.

⁶ Hannāyāx a-s isālan n-Ālmasex wi fāl hawān-nājjəyh, təslām-asān, təjrahām-tān, əntāmān dāx-ulhawān-nāwān.

⁷ Dāx-isālan n-isuf wi itājj Unfas Šaddijān i-dāgg-adəm, wār t-illa dāx-sān-i hin-toḡanām, təjrawām-tān iket-dāx-nāsān; diha t-təllām ašāl-i-dāx, wār tāqqelām ḡas ar i-uḡəl n-Emāli-nānāx Ŷisa Ālmasex-i

⁸ āddooben ad-kāwān-isəntəm dāx-immun-nāwān, itḡəf-kāwān i-ašāl wa n-tebādde dd-mad-iqqəl Ŷisa Ālmasex, wār t-illa udlem kāwān-iwarān.

⁹ Mässināx-i kāwān-dd-iḡrān s-iman-net i-ad-tārtəyām d-Rure-s Ŷisa Ālmasex-i n-Emāli-nānāx, āmaḡdal a āmoos.

Bādḡo-bādḡo wa ijān dāx-ālkānisāt ta n-Kurənta

¹⁰ Ayətma! Əttarāx dāx-wān dāx-idəm n-Emāli-nānāx ŶisaĀlmasex d-ad-tahərəm iyyān n-əmm, wār itəmmalet bādḡo-bādḡo wāl' iyyān jere-wān, ājāt hārāt iket-net s-iyyāt tayətte d-iyyān n-ənniyāt.

¹¹ A-wen janneḡ-awān-t, ayətma-ḡ, fāl-a-s, jan dāx-i āddināt n-ehān wa n-Kəluwi isālan ādduuttātne n-a-s, əllan-t ikənnasān dd-orawnen tibəḡḡawen jere-wān.

¹² Əgley har əsley fāw a-s ḡur-wān dihen, əllan-t iyyād jannānen: «Nākkāneḡ, a-wa fāl-igla Buləs a fāl-nəgla.» Iyyād jannen: «Nākkāneḡ, Ābbāloš a nāssof», jannen dāx iyyād: «Aa, nākkāneḡ ḡas, Bəḡrus a-s nəlka», jannen dāx wi iyyādnen: «Fāw, nākkāneḡ, Ŷisa a-s nəlka.»

¹³ Uhen kāwāneḡ, ma kāwān-ijrāwān? Ajān Ālmasex, ibḡa meḡ āzun? Ajān Buləs a ātwāšlābān dāx-təssəba n-ibākkāḡān-nāwān? Ajān, isəm wa-nin Buləs a-s tāt-wāsālmāḡām dāx-aman?

¹⁴ Āmmoyāx i-Mässināx a-s, wār t-illa ere dāx-wān āssilmāḡāx, kunta wādden, Krisbus d-Gayəs

¹⁵ i-ad-wār ijənn āwadəm wāl' iyyān a-s isəm wa-nin a-s ātwāšlāmaḡ dāx-aman.

¹⁶ Ānšāt-ahi-dd, əkteḡ-dd a-s näkk a issəlmāḡān käl-ehān wa n-Stifanas. Ḋarāt āddināt-win-dāx, wār-əssenāx fāl ere āssilmāḡāx dāx-aman ḡur-wān ed, näkk,

17 wädden asəlmaḡ n-äddinät dāḡ-aman a fäl hi-dd-äšmašäl Älmaseḡ, änn-ak, äšmašäl-ahi-dd i-ad-səllənžəḡ äddinät, wädden s-a iglan s-tayətte ta säḡren dāgg-adəḡ i-ad-wär fənnəzāḡ häřät dāḡ-tärna ta häť tamättant ta ija Älmaseḡ fäll-tajəttewt.

Tärna n-Mässināḡ ta təhäť tajəttewt ta fäll-ämmut ḡisa

18 Tidəť, älxuťbät wa ihälän ebre n-isälan n-tamättant ta ija ḡisa fäll-tajəttewt, ämoos i-wi halläknen mälayāḡna mäšan, näkkäneđ-i dd-iḡlās Mässināḡ, ämoos-anāḡ tärna ta t-dd-fälät.

19 Dāḡ-isälan n-a-wen-dāḡ a dāḡ-innä əlkəttab n-Mässināḡ:

«Ad-āḡšədāḡ iḡafawän n-iməssorha, səbboťtəläḡ musnät n-käl-musnät.»

20 Šämad isälan-den-dāḡ, ma s-äddooben iməssorha tənna-net? Ma s-äddooben käl-musnät iji-net? Ma s-äddooben inəsdebbärän n-äddunya-ta-dāḡ tənna-net? Mässināḡ iman-net a issəťbätän a-s särho n-äddunya-ta-dāḡ, mälayāḡna ḡas

21 fäl-a-s, šämad äddunya-ta-dāḡ, ənta hakd särho-net, indär-as ad-təzzəḡ Mässināḡ-i s-a-wa ija iket-net, särho a-s t-ija, ijrāz-as ad-iḡləs imumənän s-immun sär-s, a-wen, jan-t wi sär-s wären omen, mälayāḡna.

22 Ənhəywät ḡas, käl-Älyāhud, wär-ošelän ḡas ar đarät ahänay n-ijitän n-Mässināḡ, käl-Älyunan† əntäneđ, särho wa n-fälšäfa a đarät ošalän,

23 mäšan, näkkäneđ, Älmaseḡ wa ätwäšlābän fäll-tajəttewt a nəxaťtāb, ämoos a-wen i-käl-Älyāhud a-s wär-ərhen məsällät-net, ämoos i-inəzzulam† mälayāḡna.

24 Hakd a-wen-dāḡ, ämoos i-äddinät-wi dd-iḡrā Mässināḡ s-iman-net i-ad-tän-iḡləs, jer-i n-käl-Älyāhud wäla i n-käl-Älyunan, tärna d-särho wa tän-isalmandän s-Mässināḡ.

25 A-wa dd-ifälän Mässināḡ wär jen äddinät häřät, ojar särho wa t-ihän, uhən wa ihän dāgg-adəḡ iket-dāḡ-näsän, a-wa dd-ifälän Mässināḡ wär jen dāgg-adəḡ häřät, ojar äššahät wa t-ihän, wa ihän dāgg-adəḡ iket-dāḡ-näsän.

26 Səjrähät ḡas, ayəťma, əmmək wa s-kāwän-dd-iḡrā Mässināḡ s-iman-net. A-s kāwän-dd-iḡra, wär dāḡ-wän əjjəťän iməssorha s-a-wa əđkādän dāgg-adəḡ s-särho, wär kāwän-hen daḡ iməšsuha wäla ilällan s-əjut,

27 mäšan a-wa-dāḡ ämoosän dat-tiťtawen n-äddunya-ta-dāḡ mälayāḡna, ənta a äsnäfrän Mässināḡ i-ad-iqqəḡn iḡafawän n-iməssorha, a-wa-dāḡ wär jen käl-äddunya häřät, a äsnäfrän i-ad-tän-isəmmäxəlxəl sär-s.

28 Häřätän-win-dāḡ, wär-əssəfrärän, əlkähän, wären əla idəm data-sän, a äsnäfrän Mässināḡ i-ad-tän-isəmmäđrəy sär-sän.

29 A-wen, ij'-e Mässināḡ i-ad-wär-isəkif äwadəḡ wäl' iyyän iman-net data-s.

30 Ənta-en-dāḡ a kāwän-osāḡän d-ḡisaÄlmaseḡ-i hawän-dd-ämoosän särho wa dd-ifälän Mässināḡ d-iqqud; idəm-net a dāḡ-kāwän-iššəšdāj Mässināḡ, äsdärfät-kāwän-dd dāḡ-ibäkkādän-nāwän

31 s-əmmək wa s-tän-innä əlkəttab a-s innä:

«Ere s-äsriwän iman-net-dāḡ, israwnet dāḡ-təssəba n-a-wa has-ija Mässināḡ.»

† 1:22 1:22 Itawann'-asän: Gəriktän. (Les Grecs dāḡ-Təfränsit). Əzzaḡän Erobbā dāḡ-äkall wa itawänna: Gəris (La Grèce dāḡ-Təfränsit). Tawalt-näsän: Tälyunanit. † 1:23 1:23 — ḡur-käl-Älyāhud, ere wärän ämoos ägg-Älyāhud s-alāšäl meḡ ere wärän ilkem i-äddin-näsän, iket-net, änäzzalim a ämoos. A-wen-dāḡ a fäl tiwsaten ti iyyäđnen iket-näsän, ti n-inəzzulam. — Ašäl-i-dāḡ, änäzzalim, äkafär (ere wärän issen s-Mässināḡ).

2

A-wa ibdān fālšāfa ta n-dāgg-adəm d-tānāfalilt ta n-Māssināx

¹ Ayətma, ašāl wa d-kāwān-in-osex i-ad-hawān-ājāx isālan n-əddāraj wa dd-āsnāfalāl Māssināx, wār hawān-jex iman-in ere ojarān āddināt wi iyyāḍnen musnāt n-mājrād, wāla ere tān-ojarān sārho.

² A-wa əkkāsāx əllex jere-wān, wār t-illa anəzjum hi-dd-ijjašān kunta wādden wa n-ad-hawān-ājāx isālan n-isəm n-ŶisaĀlmasex d-tamāttant ta ija fäll-tajəttewt; a-wa sāl a-wen-dāx, wār hawān-əjješāx isālan-net.

³ Āsrākkāmāx-awān iman-in, jex tarəmmex-ta-dāx fāl aškəḍkəḍ a tājāx,

⁴ a-wa ənney d-a-wa äxṭābāx, wār-insa fäll-musnāt n-mājrād wāla fäll-tihusay-net s-əmmək wa s-tājjān dāgg-adəm a-wen i-ad-ākkārrāsān imidiwān-nāsān, ānn-ak, a-wa hawān-ənney, tārna ta ihākk Unfas Šāddijān a fäll insa

⁵ i-ad-āns immun-nāwān fäll-tārna ta n-Māssināx wādden fäll-sārho n-tayətə wa n-dāgg-adəm.

⁶ Āduuttāt a-s āddināt wi ərhanen afāham d-tikawt n-s-data dāx-immun, āmoos-asān a-wa hawān-nəxaṭṭāb sārho māšan sārho-wen-dāx, wār-ohər hārāt d-sārho wa fäll-təgl' āddunya wāla wa fäll-əglān iməşşuha n-āddunya-ta-dāx-i s-a ijan-dāx, ilkam ad-tāt-iba.

⁷ Nākkāneḍ, sārho wa dd-ifālān Māssināx a-s nəxaṭṭāb, a-wen, əddāraj a-s kāla t-āmoos s-ašāl-i-dāx, āsnāfalāl-dd Māssināx ālmāxna-net; ənta-den-dāx a-wa hanāx-dd-āsmājnāt Māssināx hārwa wār dd-tāxlek āddunya i-ad-nəkrəš idəm xur-s.

⁸ Wār t-illa dāx-iməşşuha n-āddunya-ta-dāx-i ijrawān sārho-wen-dāx ed ənnār sār-s əssanān, wār təyyən Emāli-i n-māssi-s n-ānnur ātiwāşlāb fäll-tajəttewt.

⁹ Āmoos a-wen a əssiitbātān a-wa innā əlkəttāb n-Māssināx a-s innā:

«A-wa s-wār kāla t-tənhāy tiṭṭ,
wār kāla has-təslā taməzzujt,
wār kāla dd-ijjāš ulh n-āgg-adəm
fāl təmyāre n-tihusay-i-dāx ija,
ənta-den-dāx a-wa dd-āsmājnāt Māssināx
i-imārhan-net.»

¹⁰ A-wen, āsnāfalāl-anāx-t-dd Māssināx s-tārna n-Unfas-net, ənta-i s-wār t-illa a-s wādden isafāyk'-e-hi-dd, isafāyk-dd wāla a-wa ikittəw Māssināx.

¹¹ Ēndek xas dāx-dāgg-adəm-i issanān inəzjam n-amidi-net? Wār t-illa ere tān-issanān kunta wādden ənta iman-net, əmmək-wen-dāx dāx a-s, wār t-illa ere issanān a-wa ihān inəzjam n-Māssināx, kunta wādden Unfas n-Māssināx iman-net.

¹² Nākkāneḍ, wādden unfas wa n-āddunya a nəjraw, Māssināx a hanāx-ikfān Unfas-net i-ad-nəlməd s-isuf wi āhuuskātnehan hanāx-ija.

¹³ A-wen-dāx a fāl a-wa nəxaṭṭāb, wādden sārho iglan fäll-tayətə ta n-dāgg-adəm, sārho hanāx-ihakk Unfas Šāddijān a-s nətamājrad, nəsaḡra āddināt a-wa āmoos Unfas Šāddijān s-əmmək wa s-irha Unfas Šāddijān iman-net ad-nəsiwəl dāx-isālan-net.

¹⁴ Āwadəm wa iglān fäll-iman-net, wār-iha Unfas Šāddijān ulh-net, wār-āddoobāt ad-ijrāh a-wa innā Unfas n-Māssināx ed wār t-ija hārāt, wār-āddoobāt ad-ijrāh isālan-en ed hārātān wi n-Unfas n-Māssināx, tārna n-Unfas Šāddijān a-s tān-ijarrāh āwadəm.

¹⁵ Āwadəm wa s-iha Unfas Šāddijān ulh-net, ijraw musnāt n-hārāt iket-net, issan ebāḍḍi n-hārātān, wār t-illa ere t-madān-işənnəməşrəy.

¹⁶ Ēnta-den-dāx a-wa āsdāttāt Māssināx a-s innā:

«Mi issanān a-wa ihān inəzjam n-Māssināx
bārşey ad-has-umas enəşdebbār?»

Näkkäneḍ-i omänneren, ikf'-anəḡ Älmaseḡ ənniyät wa t-ihän.

3

Bäḍḍo-bäḍḍo, i läbasän

¹ Ayətma-ḡ, a-wa hawän-janneḡ, wär hawän-t-jənnəḡ s-əmmək wa s-t-mad-ännəḡ i-äddinät dəḡ-änniihäḍ Unfas Šəddijän, änn-ak, jeḡ-awän-in məjrad wa mad-əjəḡ i-äddinät əglanan fäll-derhan n-iman-näsän, ed ija ḡur-i a-s dəḡ-isälan-wi-dəḡ n-immun, tämoosäm aratan härwa.

² A-wen-dəḡ a fäl məjrad wa hawän-in-tajjəḡ, ämoos sār-i a-s šund axx, wädden imənsiwän əzzaynen, ed wär täddobem aləmaḡ-net, älwäxla a-s hannəyəḡ a-s har ašäl-i-dəḡ, wär has-täddobem härät, ed wädden Unfas Šəddijän a dəḡ-wän ännihäḍän.

³ Käwäneḍ dəḡ har ämära-dəḡ, wär t-illa a käwän-izlayän d-inəzzulam† ed hak iyyän dəḡ-wän, osam fäll-amidi-net, kannäsäm jer-iman-nəwän. Əntäneḍ-den-dəḡ härätän wi käwän-əšlanan äsidättätnen a-s wär təzleyäm d-äddinät əglanan fäll-derhan n-iman-näsän.

⁴ Wädden, afäl dd-iggäd iyyän dəḡ-wän ad-ijanna: «Näkk Buləs a-s əlkaməḡ», ijann'-as wa iyyäḍän: «Aa fəw, näkk Äbbäloš a-s əlkaməḡ», ajän wädden ənta-den-dəḡ a wa äsidätten a-s təṭṭafäm älxal n-äddinät əglanan fäll-derhan n-iman-näsän.

⁵ Uhən Äbbäloš-i-dəḡ fəw, mi ämoos? Näkk dəḡ Buləs, mi ämoosəḡ? Ənhəywät! Näkkäneḍ, wär nämoos ḡas ar inaxdimän n-Mässinəḡ hawän-dd-ija əssəbab i-ad-kəwän-in-nəsəssiḡəd isälan n-immun sār-s, wär hanəḡ-iha dəḡ ere s-wädden a-wa itamašal iket-net, Emäli a t-ikfän turhajät n-amišəl-net.

⁶ A-wa ämešäləḡ, oläh ḡas d-ahəšk s-näkk a t-äddomen, äddomeḡ-t məšan, Äbbäloš, a t-issəswän, issədwäl-t-dd Mässinəḡ.

⁷ A-wen-dəḡ a fäl wa äddomen hakd wa issəswän, wär-ämoosän wäla, änn-ak Mässinəḡ-i dd-issədwälän a-s härät.

⁸ Wa äddomen hakd wa issəswän, wär t-illa a-s änimajärän ed hak iyyän dəḡ-sän, ad-t-əkf Mässinəḡ älxəqq n-tide-net.

⁹ İket-nänəḡ, Mässinəḡ a dār-nänniixdäm, käwäneḍ a-s ašəkrəš-net wa dəḡ-ixdäm, käwäneḍ dəḡ a-s ehän-net wa itədday.

A-wa iwärän imäsəḡran

¹⁰ Dəḡ-a-wa hi-dd-iqqälän näkk, ikf'-ahi Mässinəḡ ännuymət n-ad-alähəḡ d-älbänna n-emässärho issanän älxidmət-net, əkneḡ asəns n-ässas n-ehän, osä-dd dār'-i älbänna iyyän, ikräs fälla-s. Hakd a-wen-dəḡ, ənta da a-wa dār-kəwän-äsimätärəḡ: hak äwadəm-dəḡ, əjet ənniyät i-əmmək wa s-itədday fäll-ehän-en

¹¹ ed wär t-illa ere äddoben asəns n-ässas säl wa s-išwār insä, a-wen a t-ämoosän ḡisa wa n-Älmaseḡ.

¹² A-wen-dəḡ a fäl ässas-en, jer-ikras fälla-s äwadəm s-orəḡ wäla s-azrəf wäla s-timəḡwanen ti n-tilällaten länen älqim, wäla s-isəḡerän wäla s-aləmmoz wäla s-ajäbäl,

¹³ hak äwadəm-dəḡ, ilkam ad-dd-infiləl a-wa ämešäl ed, ad-t-dd-isəffukkār ašäl wa ilkämän fäl-a-s ašäl-en, ähijäljäl efew wa išəšdajän härät iket-net i-ad-dd-infiləl a-wa ämešäl hak äwadəm.

¹⁴ Wa s-dd-äqqimän ijitan-net, wär tän-ikša efew, ad-ijrəw älhäk-net,

† 3:3 3:3 — ḡur-käl-Älyähud, ere wärän ämoos äḡḡ-Älyähud s-aləšäl meḡ ere wärän ilkem i-äddin-näsän, iket-net, änäzzalim a ämoos. A-wen-dəḡ a fäl tiwsaten ti iyyäḍnen iket-näsän, ti n-inəzzulam. — Ašäl-i-dəḡ, änäzzalim, äkafār (ere wärän issen s-Mässinəḡ).

¹⁵ wa s-ikša efew ijitan-net, ad-ifut. Tidət, ad-ixləs məšan, ad-aläh əlxəllas-net d-i n-ere fäll-intäs efew, ixläs-dd dəx-s.

¹⁶ Ajän, wär tessenäm a-s kəwəneḍ a-s ehän n-ämudd wa šaddijän n-Mässinäx? Izzaḡ Unfas Šaddijän dəx-ulhawän-nəwän.

¹⁷ Elmədät a-s ere əsmädäsän meḡ ere iḡšädän ehän n-ämudd-en-dəx, ad-t-ihlək Mässinäx fäl-a-s ehän n-Mässinäx, šaddiij. Ehän-en daḡ, kəwəneḍ a t-əmoosän.

¹⁸ Wär dəx-wän itəkərraset wäl' iyyän iman-net, i dəx-wän ordän iman-net tayətte s-timtär ti fäll-təgl' äddunya, əsimätärəx-t d-ad-äj iman-net enəbbeddəl i-ad-t-äkf Mässinäx tayətte ta n-tidət

¹⁹ fäl-a-s, musnät wa tätiläl äddunya, əbbuddəl dat-Mässinäx. A-wen-dəx a fäl iktab dəx-əlkəttab n-Mässinäx a-s:

«Imusänän n-äddunya-ta-dəx, tikərras-nəsän a-s tän-irammas Mässinäx.»

²⁰ Iktab daḡ a-s:

«Issan Emäli a-wa ihän inəzjam n-imusänän n-äddunya-ta-dəx, musnät-nəsän, wär sār-s izley d-əho əhohän.»

²¹ Ayətma, wär täjjät fella-nəwän dəx-əwadəm wäl' iyyän bärşey ad-jannem: əlkaməx i-məndam wa wəla wa, ed wär t-illa fəw a-s wädden, ikf'-awän-t Mässinäx,

²² jer-nəkk Buləs, wəla Əbbəloš, wəla Bətrus wəla äddunya wəla təmudre, wəla taməttant, a-wa t-illän əməra-dəx hakd a-wa ilkəmən. A-wen-dəx iket-net, i-nəwän,

²³ məšan, kəwəneḍ, il'-iwän Əlmasex, Үisa Əlmasex ənta, i n-Mässinäx.

4

A-wa iwärän inəmmušal dat-Mässinäx

¹ Ayətma-x, nəkkəneḍ-i n-inəmmušal, eklan n-Əlmasex a nəmoos, ikf'-anəx Mässinäx turhajät n-ad-nəwwəkkäl əddəraj wa s-dd-əsnəfaläl əlməxna-net.

² Əməra, äddinät əwwikkälnen härät, wär t-illa a dəx-sän ətiwərhän a səl iqqud dəx-a-wa əxləfän.

³ Dəx-a-wa hi-dd-iqqälän, wär-əkkuləx dəx-a-wa dəx-i jannem kəwəneḍ, wəla dəx-a-wa dəx-i jannen äddinät wi iyyəḍnen, wär-ədgezəx dəx-almud n-ak, a-wa fäll-i itawənnen i olaḡän meḡ i läbasän.

⁴ Wär t-illa a dəx-əşşakəx iman-in, hakd a-wen-dəx, wädden a fäll-i ikkasän uḍlem, Emäli a-s eməşşerrəx-in.

⁵ A-wen-dəx a fäl hawän-janneḡ, wär təswäräm əwadəm wäl' iyyän uḍlem a ikkäs əzzəman n-a-wen wär dd-iwwəḍ. Əyyät a-wen i-aşäl wa dd-mad-ass Emäli-i he-ijən ənnur-net fäll-a-wa täjjän äddinät dəx-tihay, isənnəfiləl-dd a-wa ihän ulhawän n-äddinät. Aşäl-en, hak əwadəm, ad-ijrəw xur-Mässinäx təmmal ta dār-ənihəjja.

⁶ Ayətma-x, ədkäləx-awän-dd isəlan-in nəkk d-Əbbəloš i-ad-umas a-wen əlmital wa s-kəwän-safhaməx a-s: «Wär itəkətt əwadəm wäl' iyyän jənnəj a-wa ənnän əlkəttabän n-Mässinäx.» A-wen-dəx a fäl wär-itəbərəjet wäl' iyyän dəx-wän dəx-tənnə n-a-s əssof iyyän dəx-nəx amidi-net.

⁷ Käyy daḡ-i itabərəjən s-a-wen, ma led wär len äddinät wi iyyəḍnen? Ma led fəw s-wädden Mässinäx a hak-t-ikfän? Şamad daḡ a-wa led iket-net, Mässinäx a hak-t-ikfän, adiş ma dəx-tabərəjad şund a-s wädden Mässinäx a käy-ikfän.

⁸ Ayətma, kəwəneḍ ya, əru d-təyyəwənäm, tärzəxäm, təssəntäm fəw təmmənukəla, əbas sār-nəx təmiḡatərəm. Kunta tidət-dəx a-s təmnakäläm, tanəmmirt, adiş, nahret dār-wän təmmənukəla-ten-dəx.

⁹ Näkkäned-i n-inəmmušal, s-tənnəd, ij'-anəx Mässinäx adday n-äddinät, noläh d-äddinät s-äru d-täxtäs tamättant-näsän, nämoos i-äddinät hakd ənjalosän taliwen dāx-sabäryadän.

¹⁰ Nämoos äddinät wären əjreh härät dāx-təssəba n-isəm n-Älmasex, məšan kud-dāx wär nəjreh härät, käwäned ya təmdam, tässorhem dāx-tassaxt ta jām d-Älmasex; nəbrar, nätiwälkäh məšan, käwäned təmoosäm iməşsuha, ässimxärän-käwän äddinät.

¹¹ Har ämära-dāx, isimnənniḍ-anəx laḗ d-fad, irmas-anəx xəlləl, nəjarrāw tiwit, nämitänjär siha d-siha,

¹² hak ašäl təffay tide-nänəx fäl əşsuhu n-älxidmät wa nəha s-ifassän-nänəx i-ad-nəkkəs ayäna fäll-iman-nänəx. Wi hanəx-gaggärnen, nəlaqqän-asän iman-nänəx, wi hanəx-xazzäbnen, nəšammär-asän,

¹³ wi xaššādnen ismawän-nänəx, nəzazad-asän məjrad; nämoos xaş dat-äddinät šund ännikal hin-ifarräḍ äwadəm, har ämära-dāx, wär t-illa ere hanəx-ässifrärän.

Isəmmäqq d-äddäbaratän n-abba i-aratän-net

¹⁴ Ayətma, wär hawän-in-əkkebäx isälan-wi-dāx i-ad-käwän-səkmoy iman, wäla i-ad-käwän-səkkurəkəḍäx, änn-ak, äddäbaratän šund wi itäj abba isamätarän möddana-s a hawän-in-tajjāx, ed tidət-dāx a-s, aratän əkney tärha a təmoosäm.

¹⁵ Ämära, kud-dāx lam məraw afdän n-imäsəxran käwän-saxranen isälan n-Älmasex, iyyän n-abba a lam, näkk a t-ämoosän ed näkk a käwän-in-ässawädän isälan n-Älənžil-i käwän-osaḗän d-Älmasex.

¹⁶ A-wen-dāx a fäl, äsimätäräx-käwän d-ad-hi-tättäläläm.

¹⁷ Dāx-isälan n-a-wen-dāx a fäl sār-wän-in-äšmašäläx Timoti-i n-rure-x əkney tärha, iḗdal hullan dāx-alkum-net i-Emäli, afäl käwän-in-osa, ad-käwän-dd-isəktəw tašniwen ti s-əlkaḡäx i-Ḣisa Älmasex d-əmmək wa s-tänät-salmadäx i-älkänisäten iket-dāx-näsnät.

¹⁸ Iyyäḍ dāx-wän ordan a-s wär-ilkem ad-käwän-in-äqqaläx, itajj dāx-sän a-wen-dāx aḍu,

¹⁹ änsət ənniyät-näwän, kunta irḍa Mässinäx s-a-wen, ad-käwän-in-äkkäx šik, dihen äddinät wi xur-ija a-s wär-ilkem ad-käwän-in-äqqaläx, ad-ənhəyäx a-wa äddoben

²⁰ fäl-a-s Təmmənəya n-Mässinäx, Mässinäx a tät-isatbatän dāx-imojjan-näwän wädden täzude n-məjrad d-milxaw n-iləs.

²¹ Ma tärham dāx ämära? Ak ma täsofäm ad-käwän-in-äkkäx äwwayäx täborit meḗ ad-käwän-in-äkkäx d-ənniyät äzedän?

5

Asəmmäḍəs n-iman okäyän ämaku

¹ Ayətma! Ma ämoos erk älxal wa fälla-wän nəsall? Ätiwäsla a-s ih'-iwän äwadəm ittafän erk älxal, erk älxal s-käla wär-ätwäsla wäla jer-inəzzulam,† ed itawänna a-s ih'-iwän ähaləs itihren asəftäx d-hänne-s n-ti-s.

² Ḣas käwäned, ija xur-wän xorəzzəma ogdähän d-a-wen-dāx, uhən-dāx, häläm ad-tabärajäm, äniihäja a-s iba a təttafäm, isnanän iman-näwän, təkkəsəm-in äwadəm wa äməšälän täkunt togdähät d-a-wen-dāx jere-wän.

³ Tidət, wär t-əlley xur-wän məšan, a-wen wär hin-ikkes a-s ham inəzjam-in, äwadəm wa äməšälän täkunt-ten-dāx, äru t-əssəḍlämäx šund xaş əlley jere-wän.

† 5:1 5:1 — Ḣur-käl-Älyähud, ere wärän ämoos ägg-Älyähud s-aläşäl meḗ ere wärän ilkem i-äddin-näsän, iket-net, änəzzalim a ämoos. A-wen-dāx a fäl tiwsaten ti iyyäḍnen iket-näsnät, ti n-inəzzulam. — Ašäl-i-dāx, änəzzalim, äkafär (ere wärän issen s-Mässinäx).

⁴ Ämāra, žammäxät s-isəm n-Emāli-nānāx Ÿisa, tøjəm ɣas šund a-s näkk iman-in a t-illan jere-wän, ad-fälla-wän dd-izəzzubbət Emāli-nānāx tärna-net,

⁵ tøjəm dihen äwadəm wa ämešälän tākunt-ten-däx däx-ifassän n-Iblis i-ad-umas a-s kud-däx, təhläk taɣəssa-net, ašäl wa ilkämän dd-mad-ass Emāli, ad-ijjəš älžännät.

⁶ Təluše n-ibərajän han-kāwän! Ajän wär tössenäm a-s takmöttet n-täzza əndərrät a sakafät ejel äjjeen.

⁷ Abäkkad-wen-däx, oläh d-täzza ta tärəwät, əkkəsät-t-in jere-wän i-ad-tišdajäm šund a-wa ija ejel äynayän. Älmasex a-s Faska-nānāx, ənta a hanäx-dd-ija Mässināx Ašəɣol wa n-tenäšše n-ibäkkadän.

⁸ A-wen-däx a fäl, azəmmäx-nānāx, wär-ija fäll-täzza tärəwät, nəbdəwet d-a-wa ärəwän läbasän hanäx-išlän d-amsud, umaset azəmmäx-nānāx a ijan fäll-tijəlwen ti wär ha täzza, a-wen älmäxna-net a-s, nənmənnət tidət jer-iman-nānāx s-ənniyät šaddijän.

⁹ Däx-täkarde-nin ta säl ta-däx, əktabäx-awän-in a-s əbdəwät iman-nāwän d-ere isamədasän iman-net.

¹⁰ A-s hawän-in-əktäbäx a-wen, wär-otesäx ɣas äddinät wi samədasnen iman-näsän, wäla wi n-imārhan n-azrəf, wäla wi tamašalnen taxərbənit, wäla wi n-imäkrädän, wäla wi n-imäššanämän däx-äddunya-ta-däx, ed dihen, ad-hawän-iqqəl äššil, ad-təzjəräm äddunya-ta-däx.

¹¹ A hawän-ənnex, əbdəwät iman-nāwän, wär särtayät härät d-äwadəm ijannen ämoos äñña-wän däx-äddin, a-s ija a-wen, isamədas iman-net, meɣ təšl'-e taxərbənit, meɣ ämoos emäššanäm, meɣ ägg-ännämima, meɣ emäsaw n-asməd, meɣ itihäx; äwadəm itamašalän härätän-win-däx, wär dār-s toheräm wäla äkoss.

¹² Wädden näkk a iwar asədlam n-äddinät wi n-ajäma wären əzzey Mässināx, Mässināx a-s ilkam ad-tän-išräx mäšan, älməssexitän wi hänen ammas n-älkänisät, kāwänəḏ a iwar ad-tän-täxtäläm, səssiɣədäm-tän.

¹³ Äddinät wi n-ajäma wären ämoos älməssexitän, Mässināx a-s ilkam ad-tän-išräx, isədləm-tän, mäšan, kāwänəḏ, innä əlkəttab n-Mässināx: «Əkkəsät enälläbäs jere-wän.»

6

Amumən, wär-isərrəwrəw i-amidi-net s-əlxəkum

¹ Ənd'-e-d-il' älmäxna n-a-s e-d iɣšād iyyän däx-wän härät i-änña-s, ad-äyy-wen älžəmaɣät wa n-iməššeddəjän-i s-änihäjja ad-däx-sän äj isälän, ašəl, isərrəwrəw-as s-äššərəɣa wa n-inəzzulam† i-ad-has-əkkəsän tekəriḏt.

² Meɣ kāwänəḏ, wär tössenäm a-s iməššeddəjän a he-əšräxnen käl-äddunya-ta-däx? Kunta daɣ däx-təssəba-nānāx näkkänəḏ-i-däx a-s ilkam, ad-išräx Mässināx äddinät, mafäl hawän-indar ad-təjrəwäm äddäbara jer-iman-nāwän i-härät wärän färor.

³ Ajän wär tössenäm a-s wäla änjälösän, ilkam ad-tän-nəšräx äb' ätṭäma n-ad-hanäx-indar ad-nəjrəw äddäbara i-talɣa wärät färor jat fäll-äröri n-äkall-wa-däx.

⁴ Kunta ill'-e a ikkan jere-wän, kāwänəḏ-i n-imumənän, ma tattärän isälän n-a-wen s-käl-äššərəɣa wären oher härät d-älkänisät?

⁵ Äsikärakad a-wa jäm, ɣas kāwänəḏ, älžəmaɣät-nāwän imda, äbä-dd däx-s enəsdebbär iwar sārho ikkän jer-əssin äññatän jer-ikka härät.

⁶ Wär kāwän-əjrehäx! Ma n-əmmək n-ad-itišk iyyän däx-wän i-amidi-net s-inəzzulam, iɣäššād isəm-net.

† 6:1 6:1 — Ÿur-käl-Älyähud, ere wärän ämoos ägg-Älyähud s-aläšäl meɣ ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyäḏnen iket-näsnät, ti n-inəzzulam. — Ašäl-i-däx, änəzzalim, äkafär (ere wärän issen s-Mässināx).

⁷ Äyyät-ahi ad-käwän-səlmədäx a-s uşşad-wen-däx toyym ikka jere-wän, ənta a ässiitbätän iba n-iqqud-näwän. Uhen käwäned, ma ja tazidert-näwän? Kunta idläm-käwän äwadəm, ma hawän-ikkasän ad-fälla-s təşbäräm?

⁸ Yas, käwäned, tokäyäm-dd a-wen har ämära-däx, wär t-illa ere s-wädden, issan s-iba n-iqqud-näwän, käwäned-di-däx a iwar udlem ed tihäxäm ayətma-wän.

⁹ Ajän wär tessenäm a-s äddinät wi wären oged, xäram-asän ujəş n-Təmmənəya n-Mässinäx? Wär säswadät iman-näwän: inämmädäsän, iməşşänämän,[†] iməzzəna, meddən wi sasalahnen iman-näsän d-tiðedən, meddən wi tinmökkönen jer-iman-näsän,

¹⁰ imäkrädän, käl-taxärbənit, iməswan n-asməd, käl-tinawen d-wi tihäxnen, xäram-asän ujəş n-Təmmənəya n-Mässinäx.

¹¹ Əntäned-den-däx härätän wi s-täkkilem ibda, tamaşalän-tän iyyäd däx-wän mäşan, aşäl-i-däx, tärridäm-dd däx-a-wen, išşəşdäj-käwän Mässinäx, ikf'-iwän idəm s-isəm n-Emäli-nänäx YisaÄlmasex s-tärna n-Unfas Şaddijän n-Mässinäx-i hanäx-ilän.

Tuksəda n-Mässinäx, wär tidaw d-tämudre däx-ännihäd abäkkad

¹² Əjrawäx s-härät iket-net, mäşan wädden härät iket-net a infan härät, wär t-illa a-s wädden əjrawäx sär-s mäşan, wär-e äyyäx härät wäl' iyyän ännihäd däx-i.

¹³ Iyyäd däx-wän, jannen: imənsiwän, täsa a takkän, täsa daş, imənsiwän a-s dd-täxläk, tidət a-wen, mäşan, əlmədät a-s täsa hakd imənsiwän, ilkam ad-tän-iba. Taşəssa, wär tänhäjja d-ad-tät-isamädas äwadəm ed taşəssa, ti n-Emäli, Emäli daş, i n-taşəssa, ənta a ilan s-ad-däx-s ännähäd.

¹⁴ Mässinäx daş-i dd-issənkärän Emäli Yisa jer-inəmmuttan, ənta daş a-s ilkam ad-hanäx-dd-isənkär jere-sän s-tärna-net.

¹⁵ Ajän wär tessenäm a-s taşəssa-näwän, aşrut n-ta n-Älmasex a tämoos? Yas ənd'-e-d-il' əmmək ad-idkəl äwadəm aşrut la taşəssa n-Älmasex, asäx-t d-taşəssa n-tälkäxbat? Xäşa!

¹⁶ Meş, ajän, wär tessenäm a-s ere ohärän isəftax d-tälkäxbat, ämoos dār-s tiyyät taşəssa ed iktab a-s:

«Ähaləs, afäl osäx d-tamədt, ämoosän tiyyät taşəssa.»

¹⁷ Emmək-wen-däx daş a-s ere ikfän iman-net i-Emäli, ad-dār-s ahär iyyän n-ənniyät.

¹⁸ Ayətma, jawädät i-asəmmädəs n-iman-näwän. Abäkkad ämeşäl äwadəm-däx, wär-ohər härät d-taşəssa-net, mäşan, ere isamädasän iman-net, han-t iman-net.

¹⁹ Meş ajän, wär tessenäm a-s taşəssa-näwän ämära, ənta a-s ehän n-ämudd wa mäqqärän däx-izzaş Unfas Şaddijän wa käwän-ikfa Mässinäx, ikräş-käwän, äbas lam iman-näwän.

²⁰ Äsdärfät-käwän Mässinäx s-älqim mäqqärän, a-wen-däx a fäl, səmyärät-t däx-ənniyät-näwän hakd-däx tişəswen-näwän. [Däx-isälan n-a-wen-däx a fäl iktab a-s: Taşəssa hakd ənniyät, i n-Mässinäx.]

7

Isälan n-adubən d-iba-net d-aməzzi

¹ Ämära, ad-hawän-dd-äqqələş isəstanän wi hi-jäm däx-täkarde ta hi-dd-təktäbäm. Däx-a-wa ordex, ufa ad-äqqayəm ähaləs wär-ädobän

² mäşan, i-ad-wär-itidəw äwadəm däx-asəmmädəs n-iman-net, hak ähaləs, ikrəşet hənne-s, təkəşet daş hak tamədt ähaləs-net.

³ Äkfet ähaləs hənne-s älxaqq wa fälla-s la, täkfet daş tamədt älxaqq wa fälla-s ila ähaləs-net.

[†] 6:9 6:9 Iməşşänämän (eməşşänäm): Äddinät wi şabbädnen äşşänämän.

⁴ A-wen-däx a änihäjjän fäl-a-s, wädden tamädt a tännihäđät däx-taxəssa-net, ähaləs-net a däx-s ännihäđän; wädden dağ ähaləs a ännihäđän däx-taxəssa-net, hänne-s a däx-s tännihäđät.

⁵ Wär-igäddälet wäl' iyyän iman-net i-wa iyyäđän kunta wädden ad-tänimärđäm s-a-wen i-härät n-äzzäman i-ad-təkfəm iman-näwän i-tamädilt n-Mässinäx. A-wa säl a-wen, uday fäw, ad-igdəl iyyän iman-net i-amidi-net i-ad-wär käwän-jämmäđ tanämagizt, ijrəw sär-wän Iblis tašləlt s-käwän-äžžurräb, isiđəw-käwän däx-abäkkäđ.

⁶ Mäjräd wa hawän-in-jeğ ämära-däx, əssəyasa wädden alämär.

⁷ Ənnär sär-i täqqal näkk ɣas, iket-di, ännäx i-e d t-illäm ähaləs ad-där-i aläh iba n-adubən mäšan, hak äwadəm, wär-e äj ar a-wa dər-t-äskälläf Mässinäx: äwadəm iyyän, ijrəw a-wa, a-s ija a-wen, iyyän dağ ijrəw härät iyyän säl wa ijrəw amidi-net.

⁸ Ämära, äddinät wi wären ädobän, əntäneđ d-tinuđäfen, ənneɣ-asän: kunta äddoben ad-əjən a-wa jeğ, adiš, äqqaymənet wär-ädobänän, ikna

⁹ mäšan, kunta hannäyän a-s, wär-äddoben ad-ännähäđän däx-iblis-näsän, adiš dubənnət, ed ufa, ad-idubən äwadəm, uhən ad-t-äj derhan-net däx-a t-e-išəkšən temse.

¹⁰ Äddinät wi ädobännen, omaräx-tän, änn-ak, Emäli a tän-omarän s-a-wen, wädden näkk, wär bäđdəwet tamädt d-ähaləs-net,

¹¹ kunta dağ fäl-t, adiš wär tiləset adubən, tətätret əmmək s-tät-dd-ässəyäl ähaləs-net; ähaləs dağ ənta, wär hin-itəyyet hänne-s.

¹² Äddinät wi iyyäđnen, ənneɣ-asän, näkk dağ a hasän-ijannen, wädden Emäli: afäl ädobän amumən tamädt wärät tämoos tamumənt, wär tät-in-itəyyet a tökkäs tärđa s-taximit ɣur-s,

¹³ kunta dağ ädobän ähaləs wärän ämoos amumən tamumənt, wär tättäret tamumənt-en efel-net a ikkäs ähaləs-en ird'-as s-taximit ɣur-s,

¹⁴ fäl-a-s, tamädt-en, täddoobät ad-tumas əssəbab wa t-madän-äj däx-tabarät n-Mässinäx, išdaj. Ähaləs dağ wa n-amumən s-wär tämoos hänne-s tamumənt, äddoobät ad-umas əssəbab wa madän-äj hänne-s däx-tabarät n-Mässinäx. Afäl wär jem a-wen, har təbđäm, wär mad-ärməsän aratan-näwän zäbo olaɣän.

¹⁵ Jer-ähaləs wa wärän omen wäla tamädt ta wärät tomen, afäl äbas irha iyyän däx-sän taximit ɣur-amidi-net, adiš, ijrəwet-as tekle, dihen, wär t-illa uđlem iwarän amumən wäla tamumənt ed Mässinäx-i hanäx-dd-iɣrən s-iman-net, älxer jer-iman-nänäx a-s hanäx-dd-iɣra.

¹⁶ Kämm-i n-tamädt, ma təssanäd kunta wädden kämm a madät-tumas i-ähaləs-näm əssəbab wa s-t-mad-iɣləs Mässinäx? Käyy dağ-i n-ähaləs, ma təssanäd kunta wädden käyy a madän-umas əssəbab wa s-mad-iɣləs Mässinäx hänne-k?

Hak äwadəm, äqqaymet däx-taxärha-net

¹⁷ Darät-a-wen dağ, hak äwadəm-däx, ittəfet tämudre ta t-ikfa Emäli, hak äwadəm, ittəfet tämudre ta iha a-s t-dd-iɣrə Mässinäx s-iman-net; ənta-den-däx a-wa säɣreɣ däx-älkänisäten iket-däx-näsnät.

¹⁸ Kunta iyyän däx-wän a-s dd-ätwäɣra, wär-ämeläy, wär-itättäret ad-isəmmiləy iman-net; kunta dağ käyy a-s käy-dd-iɣra Mässinäx tämeläyäd, adiš, wär hak itumaset a-wen asäkor.

¹⁹ Jer-amili wäla iba-net, wädden a-wen a infan härät, härät a t-infan, amišəl n-alämärän n-Mässinäx.

²⁰ Hak iyyän däx-wän, ittəfet əmmək wa s-t-dd-iɣrə Mässinäx s-iman-net.

²¹ Kunta a-s käy-dd-iɣrə Mässinäx, akli a tämoosäd, wär tämmujrəzäd tumast-näk; mäšan kunta ill'-e əmmək s-təjrəwäd iman-näk, äj'-e.

²² Akli daɣ wa dd-iɣrā Emāli s-iman-net, āmoos eläll-net; wa n-eläll daɣ dd-iɣrā Emāli s-iman-net, āmoos āmāra, akli n-Ālmasex.

²³ Wār toyyem äddināt āsikālen-kāwān ed Emāli-i kāwān-dd-iɣrān s-iman-net i-ad-kāwān-isəddārfət, a ilan ālqim a-s kāwān-āslällāt.

²⁴ Ayətma, hak iyyān dāɣ-wān-dāɣ, āqqaymet dāɣ-əmmək wa s-t-dd-iɣrā Mässināɣ s-iman-net, ɣaymāt təlcamām i-Mässināɣ.

Edāwānne i-timawaɗen d-äddināt wi s-kāla wār-ädobānān

²⁵ Dāɣ-isālan n-timawaɗen ti wāren əzzey meddən d-ti s-kāla wār-ädobānāt, wār ɣur-i t-illa alāmār hi-ikfa Emāli hasnāt, māšan, ad-kāwān-sənnəmhələɣ dāɣ-isālan-nāsnāt, äjāɣ-awān daɣ asənnəmhəl n-āhaləs ijrawān ɣur-Mässināɣ s-a-wa ijānna tidət, ed Mässināɣ a dd-ifal a-wen.

²⁶ Ēnta da a-wa hawān-janney: ordeɣ a-s dāɣ-təssəba n-tirəmmaɣ ti t-əllänen āmāra-dāɣ, ufa i-hak āwadəm-dāɣ, ad-āqqayəm dāɣ-taɣārha-ta-dāɣ-t-dd-iɣrā Emāli.

²⁷ Ak kāyy, osaɣ-kāy hārāt d-tamädt? Wār tətterād aməzzi. Ak kāyy, wār kāy-oseɣ hārāt d-iyyāt? Adiš, wār tətterād adubən

²⁸ māšan, hakd a-wen-dāɣ, kud tädobānād-dāɣ, wār tofed abäkkad; tämawaɗt daɣ ta wārāt təzzey meddən täsofāt ad-tədubən, afäl ja a-wen, wār tof' abäkkad. A ärheɣ ad-təssanām a-s təlcam tissust s-äsofāɣ ad-kāwān-əkkəsāɣ dāɣ-taɣdārt-net i-ad-has-täsidāwām iket-di dd-tiɗəw fälla-wān.

²⁹ Ayətma, ajilal n-äddunya a nəha, a-wen-dāɣ a fäl ɣur-ašäl-i-dāɣ, wa ädobānān, idgəzət hullan dāɣ-älxidmāt n-Emāli wa iha šund wār-ädobān,

³⁰ wa s-äsninān iman-net, idgəzət hullan dāɣ-älxidmāt n-Emāli wa iha šund ɣas wār t-illa a t-ijrawān; wa äsriwān, idgəzət hullan dāɣ-älxidmāt n-Emāli wa iha šund ɣas a-s wār-iddəwət; wa izānšen, idgəzət hullan dāɣ-älxidmāt n-Emāli wa iha šund ɣas wār t-illa a izānša;

³¹ wi rabbāxnen dāɣ-äddunya-ta-dāɣ, əjənet iman-nāsān šund a-s wār t-illa a dāɣ-s əjrawān ed äddunya-ta-dāɣ d-a-wa tāt-ihān, ilkam ad-t-iba.

³² Wār kāwān-isärməɣet hārāt. Idgəzət wa wārān ädobān dāɣ-hārātān wi n-Emāli, wen ənta, a itājj-dāɣ, ad-t-āj i-ad-izəjrəz iman-net i-Emāli

³³ māšan, wa ädobānān, hārātān n-äddunya-ta-dāɣ a dāɣ-idgəz, a itājj-dāɣ, ad-t-āj dāɣ-umaɣ n-ad-izəjrəz iman-net i-hānne-s,

³⁴ ad-änimāntaş ənniyāt-net ebre n-hānne-s d-ebre n-Mässināɣ. Ēmmək-wen-dāɣ daɣ a-s tamädt wārāt tädobān meɣ tämawaɗt wārāt təzzey meddən, tiɣəswen-nāsnāt d-ənniyātān-nāsnāt, ebre n-älxidmāt i-Emāli ɣas a-s orakān māšan, tamädt tädobānāt, wār zənnəzjumət ɣas ar dāɣ-äddunya-i-dāɣ d-əmmək s-təzəjrəz iman-net i-āhaləs-net.

³⁵ A-wa hawān-ənnex, tənfo-nāwān a dāɣ-hawān-t-ənnex, wār hawān-əgdələɣ adubən, ānn-ak, a ärheɣ, ad-təlcamām i-Emāli s-ulh imdan, təjəm tämudre wār ih' anməntaş, tämudre, tässiitbātāt tüksəɗa-nāwān i-Mässināɣ.

³⁶ Kunta inhāy abba n-talyaɗt elle-s har tokāy adubən har has-āmoos a-wen a āsikārakāɗān, kunta ijrawā äddābara s-təja elle-s ehān, äjet-as-t, wār-ofa abäkkad.

³⁷ Āwadəm wa irhān adubən, idubənet māšan daɣ, afäl dd-inkār abba innā, wār t-āšhāššäl āwadəm s-a-wen, a-s täqqaymet elle-s wāla adubən, äjet-as a-wa t-dd-ijjāšān, ikna.

³⁸ Abba, wa irdān s-ad-tāj elle-s wārāt təzzey meddən ehān, ija a iknan, wa āqqimān daɣ wār-äsdobān elle-s, ija a ufān a-wa ija-wənnin.

³⁹ Tamädt a ikkās āhaləs-net iddar, wār has-t-illa adubən iyyān sāl-wen-dāɣ ha, māšan, afäl t-āba, idubənet-tāt ere wa s-tārha, täjet ɣas a-wen s-ālmāɣna ilkamān i-Emāli.

⁴⁰ Hakd a-wen-däx, təndəd i-tamədt ta təqqimət wär toles adubən. Ənta-den-däx məjrəd wa s-ərhex ad-hawän-t-in-səssiwəđäx däx-isälan-wi-däx, ordey dağ a-s a-wa ənney, iha erhet n-Unfas Şəddijän n-Məssinäx iket-net.

8

Isälan n-isan wi itəkkat əwadəm i-əşşänämän

¹ Ayətma! Däx-a-wa dd-iqqälän isälan n-isan wi itəkkat əwadəm i-əşşänämän, ənta da a-wa hawän-janneş däx-sän: musnät, iket-nänäx nəla däx-s härät məşan, musnät, isabəraj, a-s ija a-wen, tərha, sartay;

² ere ordän iman-net musnät, ilmədet a-s wär-əzzəbbät almud härwa

³ məşan, əwadəm wa irhän Məssinäx s-ulh imdan, wen ənta, izzay-t Məssinäx.

⁴ Däx-isälan n-isan wi əmoosnen takute i-əşşänämän, əşşänämän, wädden wəla a əndərrän, Məssinäx, ənta ças, wär-ila amidi.

⁵ Tidət, han härätän əjootnen işənnawän d-əkall jan əddinät imälan fäll-iman-näsän, ordan dağ əddinät a-s a-wen-däx tidət

⁶ məşan, çur-näx nəkkəneđ, wär t-illa a səl Məssinäx, ənta a-s Abba-nänäx, ənta a dd-ixläkän a-wa t-illän iket-net, ənta a hanäx-ilän; wär t-illa ar iyyän n-Emäli, Çisa Əlmasex, idəm-net a däx-dd-ixläk härät iket-net, ənta dağ a hanäx-iyyəfän təmudre.

Işşaki n-iman

⁷ Məşan, kud-däx nəssan a-s əşşänämän wädden härät-däx, əddinät, wär-ogdehän musnät. Iyyəd, əynayän s-əlçibadət n-əşşänämän, a-wen-däx a fäl ed əksän isan ikat əwadəm i-əşşänämän, ad-əşşəkän iman-näsän a-s jan a əmmidäsän.

⁸ Dərət-a-wen dağ, wädden amənsi a hanäx-e-izənnəmihezän d-Məssinäx; isan-win-däx, jer-təksed-tän wəla, wär käy-ifneş, wär käy-əssewəđ a-wen s-wəla a əndərrän.

⁹ Əjät ənniyät i-iman-nəwän, wär t-illa a-s wädden xälal-awän məşan, a təttäm-däx, wär-itumaset a əddoben ad-isiđew ere wärän ikna əşşuhu däx-immun-net däx-abəkkəđ.

¹⁰ Kunta käyy-i ijrähän härät, inhay-käy ere wärän ikna ujrəh n-härät təqqiməd təttəd däx-ehän n-əşşänämän, wädden ad-käy-işşək, arəw-dd sār-s a-wen-däx ad-əks ənta-däx isan-win-däx ikət əwadəm i-əşşänämän?

¹¹ Dihən, ad-umas ujrəh-nək i-härät əssəbab n-tanməşrayt i-əñña-k wa wärän ikna ujrəh n-härät s-ənta däx-əmmut-as Əlmasex s-əmmək wa s-hak-əmmut käyy-däx.

¹² Ere əssođän əñña-s däx-tanməşrayt şund-ten-däx, ad-däx-s ədmənän iman-net ed a-wa ija abəkkəđ, toyyäm-t dağ kəwəneđ, ij'-e. Ere dağ wa ijän a-wen, Əlmasex a-s itajj tihäyyen, itirəm-t.

¹³ A-wen-däx a fäl kunta amənsi a madän-umas əssəbab n-tanməşrayt i-əñña-k, adiş səxrəm-t i-ad-wär-itumas a-wen, tanməşrayt i-əñña-k däx-əddin.

9

Əlfäyda d-əlxidmət wa ihän tumast n-ənəmmaşul

¹ Ayətma, nəkk-i-däx, wädden əjrawäx iman-in. Ajän wädden, ənəmmaşul a əmoosəx? Ajän wädden ənhayəx Emäli-nänäx Çisa s-tiyyəwen-in? Ajän wädden kəwəneđ iman-nəwän a-s təsətbat n-a-wa əxdäməx i-Emäli.

² Kud-däx ija çur-iiyyəd a-s wädden ənəmmaşul a əmoosəx, ənihəjja a-s wädden kəwəneđ ed kəwəneđ-di-däx a-s təsətbat n-tənnəmuşəla-nin dat-Emäli.

³ Əddinät dağ wi hi-tizəmmen, sawarän-ahi bahu, əlwižab-in hasän da:

⁴ wädden nəkkəneđ nəjraw s-ad-nəks, nəşew s-əmmək wa s-t-täjjän əddinät wi iyyəđnen?

⁵ Meḡ əndek diha d-ətiwänna a-s wär näddobät ad-nədubən härät dāḡ-šätma-nāḡ ti n-tälmässexiten, nidaw dār-snät dāḡ-isikilän-nänāḡ s-əmmək wa s-t-jän inəmmušal wi iyyädnen d-ayətma-s n-Ÿisa d-Bəṭrus?

⁶ Meḡ näkk d-Bärnäbbas ḡas a iwar älxidmät s-ifassän-nänāḡ i-ad-nəṭṭəf tāmudre n-iman-nänāḡ?

⁷ Mi s-käla inhäy əssärdasi ihan əlyəskär wäla timḡal, meḡ mi s-käla äddomät ašəkrəš äqqayəm wär dāḡ-s ikša? Mi s-käla idän ehäre, äqqayəm wär-əzoḡäj, isəw?

⁸ A-wa hawän-janneḡ, wädden älyadät dd-əkkasän dāḡg-adəm dāḡ-iḡäfawän-näsän, änn-ak, alämär wa n-Mosa a tän-innän.

⁹ Iktab dāḡ-Äṭṭäwrät a-s:

«E-d jed awdes dāḡ-tijenen n-älkäma

i-ad-dāḡ-snät išəbbäḡtəš i-ad-hak-ibḡəw tiblalen d-ahošär,

wär has-jed äkinbäb.»

Ak tordam a-s Mässināḡ-i-dāḡ, iwdesän a dāḡ-idḡaz s-əmmək-wen-dāḡ?

¹⁰ Näkkäneḡ-i-dāḡ n-inəmmušal a-s iha isälan-nänāḡ. Tidət-dāḡ a-s dāḡ-təssəba-nänāḡ a fäl dd-äzzäbbät alämär-wen-dāḡ ed äwadəm äddomen ašəkrəš-net, ähhuuššäl-t ḡas ad-ijar äṭṭäma n-ad-has-t-dd-izjär härät.

¹¹ Näkkäneḡ, näxṭäb-awän mäjräd n-Mässināḡ, ämoos a-wen šund ašəkrəš näddoomät, ajän afäl dd-izjär härät ifassän-näwän sār-nāḡ, ajän a-wen a iqqanän eḡäf ḡarät älxer n-Mässināḡ wa nəja dāḡ-ulhawän-näwän?

¹² Kunta ill'-e ere s-käwän-iwar älxäqq-net, ajän wär t-nojer sār-wän? Mäšan, hakd a-wen-dāḡ, wär käwän-iha i näzzilzäm d-härät, änn-ak, näqbäl härät iket-net i-ad-wär nəja täsahayt wäl' iyyät i-Älənžil n-Älmasex.

¹³ Ajän, wär təssenäm a-s äddinät wi äxdammen dāḡ-ehän n-ämudd wa mäqqārän, ehän-en-dāḡ a hasän-iṭṭafän tāmudre? Meḡ, ajän wär təssenäm a-s äddinät wi ḡarräsnen i-tikutawen fäll-tasəskärt ta n-tikutawen, a-s äḡräsän-dāḡ, lan dāḡ-s ejadär?

¹⁴ Emmək-wen-dāḡ ḡay a fäl omär Emäli a-s äddinät wi xaṭṭäbnen Älənžil, əddärnet s-Älənžil.

¹⁵ Näkk, wär t-illa äzuk fälla-wän jeḡ. Akätab ḡay wa hawän-in-tajjāḡ ämära-dāḡ, wär hawän-t-in-təjjāḡ fäl-a-s innin ärheḡ dāḡ-wän härät, wär t-illa a dāḡ-wän ärheḡ, änn-ak, äsidäwät-ahi hullan a-wa s-hawän-äxṭäbäḡ Älənžil wär t-illa a dāḡ-wän əttarāḡ, äsofäḡ fäw tamättant uhən ad-dāḡ-i ikkəs äwadəm tedäwit-ten-dāḡ n-a-s wär t-illa a dāḡ-wän əttarāḡ a-s hawän äxṭäbäḡ Älənžil.

¹⁶ Asəllənži wa təjjāḡ i-äddinät, wär təttärāḡ ad-hi-umas abäraj, änn-ak, färəḡ a hi-ämoos, amäskoy näkk afäl äqqimāḡ wär-äxṭebäḡ Älənžil.

¹⁷ Ənnär älxuṭbät wa təjjāḡ, ämoos a təjjāḡ dāḡ-izəjraz n-iman-in, adiš, äniihäjja d-ad-əjrəwāḡ älxäqq n-tide-nin mäšan, wädden a-wen a ijän, Mässināḡ a hi-ijän dāḡ-a-wen, ənta a hi-issäḡläfän ämašal-wen-dāḡ.

¹⁸ Ma sār-i dd-issäḡsäl a-wen-dāḡ? Adiš, emärked-in ḡur-Mässināḡ a t-ämoosän ad-salänḡeḡ äddinät dāḡ-a-s, wär t-illa a dāḡ-sän rammäsäḡ i-ad-umasän isälan-en, a əjrawän bännan.

Ässagḡäh Buləs iman-net d-äddinät iket-dāḡ-näsän

¹⁹ Näkk, wär t-illa ere s-ämoosäḡ akli-net mäšan, hakd a-wen-dāḡ, wär t-illa ere s-wädden äsräsäḡ iman-in data-s i-ad-umas a-wen, əssəbab n-əlyəllas n-təššəm n-äddinät.

²⁰ Käl-Älyähud, jeḡ-asän iman-in äḡḡ-Älyähud i-ad-səjədən i-a-wa hasän-janneḡ, utabän, iyləs-tän Mässināḡ; wi əḡlänen s-a-wa tənän Äṭṭäwrät, jeḡ-asän iman-in ere iglan fäll-a-wa tənna Äṭṭäwrät kud-dāḡ ädduuttät a-s wädden ənta a tännihädät

däx-a-wa fäll-öglex; a-wen, jex-t i-ad-səjedən i-a-wa hasän-xaṭṭäbäx, utabän, ixləs-tän Mässinäx.

²¹ Äddinät wi wären əssen fäll-Mässinäx, əssalähäx iman-in dār-sän, a-s ija a-wen, näkk, ijmaḍ-t əššäk a-s əssanäx s-Mässinäx ed əlqanun wa n-Älmasex a fäll-öglex. A-wen, jex-t i-ad-səjedən i-a-wa xaṭṭäbäx, utabän, ixləs-tän Mässinäx.

²² Äddinät wi rəkkəmnen, jex-asän iman-in iyyän däx-sän i-ad-äxləsän əntänəḍ-däx, əlxal hi-ijjäš əgg-adəm-däx, ad-has-səsilähäx iman-in dār-s i-ad-umas a-s emäremar jex-däx, ad-ixləs Mässinäx iyyäḍ däx-sän.

²³ Jex a-wen-däx iket-net däx-təssəba n-Älənžil i-ad-əjrəwäx näkk-däx ejädär-in.

Tabillānt a ijarrāwän tärna

²⁴ Ajän, wär təssenäm a-s äddinät wi timšəšijnen däx-eḡäryär, ošalän iket-däx-näsän mäšan, iyyän däx-sän ɣas a madän-ijrəw əlhäk wa fäll-igla azzal. Däx-isälan wi n-immun, ašəlät käwänəḍ-däx i-ad-təjrəwäm əlhäk-wen-däx.

²⁵ Təssanäm a-s käl-azzal, wär t-illa arākan d-asəmənənnəḍ s-wädden tajjän-t i-tiɣəswen-näsän i-ad-ənnəḥädän däx-snät. Əntänəḍ-i išla a-wen-däx, əlhäk wärän-e əhaj a däx-sän ilkamän, a-s ija a-wen näkkənəḍ, əlhäk wa mad-nəjrəw, afäl nəjläy däx-azzal wa n-immun-nänäx, ixlal.

²⁶ A-wen-däx a fäl näkk, ošaläx mäšan, wädden azzal n-derhan n-iman-in ɣas a jex s-tənnəḍ əwadəm ənikäfnäkäfän siha d-siha, wär-issen a iha, näkk, wär šəšləyäx,

²⁷ ənnihädäx däx-iman-in hullan, wär-əlkemäx ɣas i-a-wa fäll-i tärha taɣəssa-nin, ənn-ak, Mässinäx a oyyey a däx-i ənnähäd i-ad-əmašäläx erhet-net däx-a-s əksuḍäx ad-əbas heɣ azzal-wen-däx ḍarät əlxuṭbät wa jex i-äddinät.

10

Älmital dd-izjarän äzzäman wa əkkäsän käl-Işrayil däx-tenere

¹ Ayətma, wär ärheɣ ad-təzhaläm däx-isälan n-a-wa irmäsän imɣarän-nänäx ibda däx-tenere. Äzzäman-en, təllay jənnəj-sän tejäräkt, sasaxad-tän, ijrəw-asän Mässinäx ad-əjləyän ejärew wa səmmän,

² oläh a-wen d-a-s ätiwäsälmäɣän däx-tejäräkt-en d-ejärew wa səmmän däx-idəm n-tassayt ta jän d-ənnäbi Mosa,

³ äzzäbbät-dd Mässinäx fälla-sän amənsi n-taləmmizt dd-ifalän išənnawän, əkšän,

⁴ əswän däx-aman wi fälla-sän dd-äzzäbbät Mässinäx. Aman-en, taḍayt dd-falät išənnawän a dd-əzjarän, tärjäš ḍära-sän e-s əkkän däx; taḍayt-en, tamätart n-Älmasex a tämoos.

⁵ Hakd a-wen-däx, tunjäy təššəm-näsän amišəl n-erhet n-Mässinäx, əbjänjänän fälla-s, hän-dd-i əjjootnen däx-sän əmmuun däx-tenere-en-däx.

⁶ Härätän-win-däx, əlmitalän a hanäx-əmoosän i-ad-wär nəjješ əlxal wa əjjäšan, i-ad-wär nəsedärhən a-wa läbasän əsdärhänän.

⁷ Əbḍəwät d-əlxibadät n-əššanämän, wär jem a-wa jän iyyäḍ däx-sän ed ätwänn'-anäx:

«Täqqima tamətte, təkšä, təswä, təbdad ad-dalläl dat-əššanämän-net.»

⁸ Wär nəsamädaset iman-nänäx šund a-wa jän iyyäḍ däx-sän; win-hi əntänəḍ, ihläk däx-sän Mässinäx sənätät timərwen d-kəraḍ n-efäḍ n-əhaləs däx-iyän n-ašäl.

⁹ Wär nətirmet Älmasex šund a-wa jän iyyäḍ däx-sän, ed wi jänen a-wen, əkšänät-tän taššälen.

¹⁰ Wär təbjänjänäm šund a-wa jän iyyäḍ däx-sän ed, təssanäm a-s, os'-en-dd ənjälös wa itṭäfän tamättant, ilhästän iket-däx-näsän.

11 A-wa tän-irmäsän, ifäqqän n-a-wa äddoben ad-hanäx-irməs a ämoos i-ad-näj ənniyät i-iman-nänäx. Isälan-wi-däx, əktäbän i-ad-hanäx-səfhəmän härät näkkäneḍ-i hänen ajilal n-äddunya.

12 A-wen-däx a fäl ere ordän iman-net tebädde, äjet ənniyät i-ad-wär-oḍa.

13 A-s käwän-äzzurräb Iblis-däx, ənta a-s itizärrub dägg-adəm iket-näsän, Mässinäx Ämaydal a ämoos, wär käwän-e-äyy äzzurräb-käwän Iblis s-a t-illän jənnəj-tädabit-näwän, änn-ak, e-d käwän-äzzurräb-däx, ad-käwän-äkf day tädabit n-äşşabarät s-dd-təntäşäm iman-näwän däx-a-wen.

Imumənän, wär xəbbədän äşşänämän

14 Ayətma wi əkney tärha, jawädät i-älxiabadät n-äşşänämän,

15 meddən əjrahnən härät a-s ässewäläx, a-wen-däx a fäl zənnəzjumətät hullan däx-a-wa hawän-janney.

16 Afäl älwäqq wa d-nətiħär amənsi wa šäddijän n-Emäli, afäl älwäqq wa d-nəsass däx-alkas wa šäddijän i-ad-numay i-Mässinäx, ajän wädden ənta-den-däx a-wa isidəttun tartit-nänäx d-Älmasex s-tärna n-aşni-net. Ajän wädden tajəlla ta nətuzan jer-iman-nänäx i-ad-hanäx-dd-səktəw tamättant ta ija Yisa däx-təssəba n-ibäkkadän, tamättant-ten-däx inhäy däx-taxəssa-net, a hanäx-təssärtäyät dər-s.

17 Šämäd wär t-illa ar tajəlla tiyyät, a-wen a t-ämoosän taxəssa n-Älmasex, a-wen-däx day a-s näkkäneḍ, kud nəjjət-däx, nämoos tiyyät taxəssa däx-təssəba n-tassaxt-nänäx dər-s.

18 Əkyədät xas däx-käl-Işrayil, xur-sän wi tattänen isan n-tikutawen ti jänen i-Mässinäx, osaxän day däx-təssəba n-takute-ten-däx d-Mässinäx ed asəxrəs wa fäll-xarräs takute, i n-Mässinäx.

19 Ma tordam, ma əkkex däx-a-wen? Tordam a-s isan ikat äwadəm i-äşşänämän, ämoosän härät? Mex äşşänämän iman-näsän fəw, ak härät? Wär-ämoosän wəla a əndərrän,

20 änn-ak, a ärhex, ad-käwän-səlmədäx a-s a ikat äwadəm i-äşşänämän-däx, wädden Mässinäx a-s t-ikät, alşinän a-s t-ikät. Äywa! Näkk, wär-ärhex ad-taxəm härät d-alşinän.

21 Wär täddobem ad-sassäm däx-alkas wa käwän-dd-isakten tanəxla ta ija aşni n-Emäli Yisa däx-təssəba n-ad-təjrəwäm tenäşşe n-ibäkkadän-näwän, taləsäm day darät-a-wen, tesäse däx-alkas wa däx-sassän inaxbadän n-alşinän ässaḡät wa d-tän-xabbädän. Wär täddobem ad-təksəm tajəlla ta käwän-dd-saktet taxəssa n-Yisa-i ämmun i-ad-təjrəwäm tenäşşe n-ibäkkadän-näwän, taləsäm day darät-a-wen tetäte n-tajəlla ta tättän inaxbadän n-alşinän ässaḡät wa d-tän-xabbädän.

22 Mex, käwäneḍ, a tärham ad-asəm Emäli fälla-wän? Tordam a-s täddobem ad-təxləsäm däx-äşşar-net afäl t-ijjäs aḍkär fälla-wän?

Atsəmyar n-Mässinäx däx-härät iket-net

23 Wär t-illa a-s wädden nəjraw sər-s məşän, wädden härät iket-net a infan härät.

24 Wär däx-wän itämməxət wäl' iyyän i-tənfa ta n-iman-net ənta xas, änn-ak, izəzəret tənfa ta n-imidiwän-net ta n-iman-net.

25 Isan təjrəwäm nazzän däx-ässuk-däx, a ämoosän-däx, äksät däx-sän kunta wär tän-əkrehän ulhawän-näwän

26 ed əlkəttab n-Mässinäx, innä:

«Äkall d-a-wa t-ihän iket-net, i n-Emäli.»

27 Afäl käwän-dd-äsməjarät ere wärän ämoos amumən, afäl t-təkkäm, amənsi hawän-dd-issəskär-däx, äksät däx-s, wär t-kərrähnet ulhawän-näwän

²⁸ māšan, afäl kăwän-ixtäl äwadəm, inn'-awän: «Hewät, isan-di, i n-teyxse ikat äwadəm i-äşşänäm, wär tän-təkšem dăx-tössəba n-äwadəm wa hawän-illäxən i-ad-wär täxşedäm iman-net.»

²⁹ Wăr hawän-ənnex a-wen dăx-tössəba n-ağăşad n-iman wi-năwän, änn-ak, ənnex-awän-t dăx-tössəba n-ad-wär täxşedäm iman n-äwadəm wa kăwän-ikkăsän dăx-taydärt d-ad-wär təşşekäm iman-năwän đarät a-wa.

Ëssanăx a-s ad-hi-ənnən iyyäd dăx-wän: «Ajän näkk, mafäl təyyăx äwadəm ikmam-ahi dăx-tărha n-iman-in, dăx-tössəba n-a-s ikrah a-wa tajjăx?

³⁰ Näkk a-wa dăx-ämmoyăx i-Măssinăx älwăqq wa d-tattăx, əndek a-wa ijrăwän i-äwadəm ad-ijjəş ti-nin fäll-amənsi s-işwăr ämmoyăx i-Măssinăx dăx-tössəba-net?»

³¹ Ämăra, ənnex-awän: jer-tattäm wăla sassäm, a tăjjäm-dăx, äjät-t dăx-derhan n-ad-səmxăräm Emăli.

³² Wăr tumasät i-äwadəm wäl' iyyän əssəbab n-tanməşrayt jer-ämoos ägg-Älyăhud wăla ägg-Älyunan† wăla amumən.

³³ Tălălät-ahi, wăr tējjäx făw a dăx-hi-əşşakän äddinät, wădden tənfa n-iman-in xas a đarät oşalăx, änn-ak, dăx-a-wa tăjjăx iket-net, äzizărăx tənfa n-äddinät wi iyyăđnen ta-nin i-ad-tän-ixləs Măssinăx.

11

A-wa ätwännän i-tiđeden dăx-isălan n-aswăr

¹ Tălălät-ahi s-əmmək wa s-ättilălăx Älmasex.

² Ayətma, ämmoyăx-awän əmmək wa s-hi-kittəwäm hak aşäl, hannăyăx dăx a-s a-wa kăwän-əssăxrăx d-a-wa dăr-kăwän-ăsmätărăx, tamaşălăm-t iket-net.

³ Ämăra, ärhex ad-kăwän-in-səjrăhăx hărät iyyän: Ÿisa a ixkamän dăx-hak ähaləs, ähaləs a ixkamän dăx hănnə-s, Ÿisa dăx Măssinăx a dăx-s ixkamän.

⁴ A-wen-dăx a fäl e-d itəddal ähaləs Măssinăx, meş ijrăw xur-Măssinăx məjrăd s-ila s-ad-t-äffässăr i-äddinät, wăr-ităjjet a-wen injađ ed asəmmăđri a itajj Ÿisa-i n-ämănokəl-net.

⁵ Tamăđt dăx, e-d təddal Măssinăx, meş e-d tějraw xur-Măssinăx məjrăd s-la s-ad-t-tăffässăr i-äddinät, wăr la s-ad-tăj a-wen wăr tăswăr ed tamăđt wărät tăswăr, asəmmăđri a tadj ähaləs-net ed wăr təzley d-ere äsităbălbălän; asəttəbəlbəl ya, äsikărakăđ fäll-tamăđt.

⁶ A-wen-dăx a fäl tamăđt ta wărät tărha aswăr, adiş şəjwəşet dăx, māšan, kunta ija xur-wän a-s äsikărakăđ ad-şəjwəş tamăđt meş tăstăbălbăl, adiş, uf'-as ad-səwăr.

⁷ Ähaləs ənta, wăr-ämşatăr s-ad-injađ e-d itəddal Măssinăx ed Măssinăx, ixlăk-anăx dăx-milhaw wa-net i-ad-t-nəsəmxăr, a-s ija a-wen, semşar wa ila ähaləs, hănnə-s a dd-ifal,

⁸ ed aşäl wa dd-ixlăk Măssinăx äddunya, wădden ähaləs, a dd-iknän dăx-tamăđt, änn-ak tamăđt a dd-təknät dăx-ähaləs.

⁹ Wădden ähaləs a dd-iknän dăx-tössəba n-tamăđt, änn-ak, tamăđt a dd-təknät dăx-tössəba n-ähaləs.

¹⁰ Dăx-tössəba n-a-wen-dăx d-dăx-tössəba n-änjălosän wi äsijăđnen hak ässağăt, a fäl iwar tamăđt ad-tăsiwăr eğăf-net i-ad-tăssikna s-a-wen-dăx a-s tăqbal a-s ill'e jənnəj-s ähaləs-net.

¹¹ Măšan, hakd a-wen-dăx dăx, näkkăneđ-i s-aşäl-i-dăx, nosăx d-Emăli s-immun wa săr-s nəja, ähaləs, wăr t-illa ar s-tamăđt, tamăđt dăx, wăr t-təlla ar s-ähaləs

¹² fäl-a-s, aşäl wa dd-ixlăk Măssinăx äddunya, ähaləs a dăx-dd-ikkăs tamăđt māšan, aşäl-i-dăx, wăr t-illa ähaləs s-wădden tamăđt a t-torăwăt. A-wen iket-net, Măssinăx ad-dd-ifal.

† 10:32 10:32 Gərik (Grec) dăx-Təfrănsit.

¹³ Ejrähät-in ɣas kăwăneđ iman-năwăn: ak, ähuuskăt ad-dd-təjjəš tamăđt wărăt tăswär älzămaɣăt n-imumənän təddalnen Măssinăɣ, ad-t-təddal ənta-dăɣ?

¹⁴ Ajăn wădden, a-wa hanăɣ-ıɣlăyăn iket-net, isakn'-anăɣ a-s wăr dd-osenăt tişəkkađ fäll-ăhaləs? İläš fälla-s a-wen

¹⁵ măšan, tamăđt ənta, a-wa hanăɣ-ıɣlăyăn iket-net, ässiikn'-anăɣ a-s tişəkkađ, tamăđt a fäll-ăhusknăt ed Măssinăɣ a has-tănăt-ıkfăn i-ad-tudabăt ad-təštär iman-net.

¹⁶ Äywa, kunta han-kăwăn äddinăt ha tamădašt dăɣ-isălan-wi-dăɣ, əlmədnet a-s wăr t-illa agna nəzzay səl wa-dăɣ, wăr t-illa daɣ agna əzzaynăt älkănisäten n-Măssinăɣ ti iyyăđnen səl wa-dăɣ.

Isălan n-amənsi wa šăddijăn

¹⁷ Ämăra, ässiilmădăɣ-kăwăn a-s wăr ɣur-i lem tisenen ed, əsley a-s kăwăneđ, e-d tazămmaɣăm, wăr tinɣəymim i-ad-təhələm s-data, änn-ak, a-wa kăwăn-isahalăn s-ider ɣas a fäl tazămmaɣăm.

¹⁸ S-tizarăt, əsley a-s e-d tazămmaɣăm i-älɣibadăt, tiɣunawen a tajjäm, əflasăɣ a-s a-wen, ija dăɣ-s härăt,

¹⁹ ed băđđo-băđđo, ähhuuššäl ɣas i-ad-itwənhəy wi s-itbăt a-s tidət a-s əlkamăn.

²⁰ Əsley a-s tazămmaɣăm măšan, azəmmăɣ-năwăn i-ad-tahərəm amənsi wa n-tasăktot šăddijăn n-Emăli, wăr-itəjj s-älmăɣna

²¹ fäl-a-s, e-d iwwăđ älwăqq wa n-tetäte n-amənsi-en, hak iyyăn dăɣ-wăn, ad-idəw dăɣ-a-wa dd-iwwăy ad-t-itatt, umas a-s aɣil-năwăn iyyăn, älluɣ, a-s ija a-wen, aɣil wa iyyăđän, äyyiwăn har dăɣ-s ikkäs fəw asməd ənniyăt.

²² Ma jăn ihănan-năwăn təkšəm-dd, təswəm-dd dăɣ-săn təzzar təkəkəm-dd älkănisăt n-Măssinăɣ? Meɣ kăwăneđ, wăr təssəməɣăräm älkănisăt ta n-Măssinăɣ? Meɣ a tărham ad-səmmăđrəyăm äddinăt wi kăwăn-hănen wăren la härăt? Ak əndek ɣas a-wa s-tărhäm ad-hawăn-tăn-ännăɣ dăɣ-a-wen? Ak a tărham ad-hawăn-əqqəsăɣ? Xăram-awăn!

Tasăktot ta šăddijăt

(Mătti 26:26-29; Marqəs 14:22-25; Luqa 22:14-20)

²³ Ämăra, a-wa hi-issăɣra Emăli a-s ärheɣ ad-hawăn-t-in-səssiwəđăɣ: Ehăđ wa dăɣ-ıla Emăli ɤisa s-ad-ättărmăs, idkäl tajjəlla,

²⁴ ämmoy i-Măssinăɣ təzzar, äzun-tăt jer-inəttulab-net, inn'-asăn: tajjəlla-ta-dăɣ a-s taɣəssa-nin ta mad-ăkfăɣ dăɣ-idăggan-năwăn. ɤăymăt tazămmaɣăm, tuɣanăm-tăt jer-iman-năwăn i-ad-hi-dd-kittəwăm.

²⁵ Əssəmdän tetäte ɣas, ijă a ənnin-dăɣ daɣ i-kara wa n-tesăse, idkäl-t, innă: «A-wa ihăn kara-wa-dăɣ a-s tasăktot n-ärkăwăl n-tassaɣt wa äynayăn madăn-iməl jer-i dăr-wăn afäl inɣäl ašni-nin dăɣ-təssəba-năwăn. E-d t-təswăm-dăɣ, ɣaymăt hi-dd-kittəwăm,

²⁶ e-d təzəmmăɣăm-dăɣ har tohăräm tajjəlla d-kara-wa-dăɣ, isălan n-tamăttant n-Emăli a tajjäm har ašäl wa dd-mad-iqqəl.»

A-wa wărăn il' əmmək

²⁷ A-wen-dăɣ a fäl ere ikšăn tajjəlla-ta-dăɣ dd-siktəwăt taɣəssa n-Emăli, meɣ ere iswăn kara-wa-dăɣ dd-isiktəwăn ašni-net, dăɣ-a-s, wăr-ıkfə a-wen semɣar, asəffătı ɣas a itajj dăɣ-taɣəssa d-ašni n-Emăli-i ikfa i-əɣəllas n-dăgg-adəm.

²⁸ A-wen-dăɣ a fäl hak äwadəm-dăɣ, izəjjəzzet iman-net, ikkəset abăkkađ dăɣ-tămudre-net təzzar, ijrəw s-ad-ăkš tajjəlla n-Emăli, isəw daɣ kara-net

²⁹ fäl-a-s, ere ikšăn tajjəlla n-Emăli meɣ iswă kara-net dăɣ-a-s wăr-omen a-s a-wa taɣəssa n-Emăli d-ašni-net, äwadəm-en, ilmədət a-s əđmanăn dăɣ-s iman-net.

³⁰ Däx-təssəba n-a-wen-däx fäw a fäl käwän-han äddinät ässilmädnät turhənnawen d-inəbdan, iyyäð fäw, ämmun.

³¹ Afäl nädox i-iman-nänäx, wär hanäx mad-iwär udlem dat-Mässinäx.

³² Mäšan, kud hanäx-iwär udlem däx-äššärexa n-Emäli-däx, ija a-wen däx-ittus n-ad-naḡəd, dihen, wär mad-nahär d-äddunya uješ n-temse.

³³ Ayətma, e-d təžžəmmäxäm i-ad-təkšəm tajəlla ta dd-siktut taḡəssa n-Emäli, zəžžidärät, nəmäqqəlät jer-iman-näwän,

³⁴ kunta ih'-iwän ere älluzän, äkšet-dd ḡur-ehän-net təzzar, i-ad-wär-itumas ažəmmäx-näwän a fälla-wän dd-isiðəwän äššärexa n-Mässinäx.

Harätän wi iyyäðnen hin-oyyex wär tän-ənnex, ad-hawän fälla-sän ədwənnex afäl käwän-in-osex.

12

Isuf wi itäjj Unfas Šəddijän i-dəgg-adəm

¹ Ayətma, ämära, däx-isälan n-isuf wi itäjj Mässinäx s-tärna n-Unfas Šəddijän i-äddinät wi omännen s-Älmasex, wär-ärheḡ ad-däx-sän təžhaläm.

² Təssanäm a-s ibda a-s tänimäšräyäm i-Mässinäx, äššanämän ḡas a ḡarät tošaläm siha d-siha, a-s ija a-wen, wär t-təlla täfert täddobet ad-dd-təzjār imawän-näsän.

³ A-wen-däx a fäl ärheḡ, ad-hawän-älläḡeḡ a-s, wär t-illa ere s-ihä Unfas Šəddijän ulh-net dd-e-iggədän, ad-ijanna: «Ilḡän Mässinäx ḡisa», wär t-illa daḡ ägg-adəm äddooben tənna n-a-s: «ḡisa a-s Emäli» ar s-ad-t-dd-intaj Unfas Šəddijän s-tənna n-a-wen.

⁴ Isuf n-Mässinäx wi itäjj i-dəgg-adəm s-tärna n-Unfas Šəddijän, əjjətän ännuyän-näsän mäšan, Unfas ənta iyyän ḡas;

⁵ imašalän wi issäḡläf Mässinäx i-dəgg-adəm s-tärna n-Unfas-net, əjjətän, əzlayän mäšan, a-wen, wär hin-ikkəs a-s Emäli iyyän a ihakkän a-wen;

⁶ tədabit daḡ ta ihakk Mässinäx i-asəssiwoð n-imašalän-win-däx, təbða s-äwadəm-äwadəm mäšan, Mässinäx iyyän a isarḡasän a-wen-däx iket-net i-äddinät iket-näsän.

⁷ Hak amumən-däx, ijraw ḡur-Unfas Šəddijän tədabit tiyyät s-ixdäm a infan imumənän wi iyyäðnen.

⁸ Äwadəm iyyän, ijraw ḡur-Unfas Šəddijän tədabit n-tənna n-mäjräd ilan ujhəh, iyyän ijraw ḡur-Unfas Šəddijän təlḡuləma, a-wen iket-net, Unfas-en-däx n-iiyyän a t-ihakkän.

⁹ Äwadəm iyyän, ihakk'-e Unfas immun, äkf iyyän tədabit n-ad-izizuy imarhinän,

¹⁰ äkf iyyäð tədabit n-tijawt n-tikunen, äkf iyyäð tədabit n-asəssiwoð i-äddinät isälan fälla-s dd-äzizäbbät Mässinäx, äkf iyyän musnät jer-äddinät, iyyäð tədabit n-asiwəl n-awalän wären ätwässan, äkf daḡ iyyäð tədabit n-ättäfässir n-awalän-en-däx.

¹¹ Unfas Šəddijän-en-däx a itajjän härätän-win-däx iket-däx-näsän. Hak äwadəm-däx d-tədabit ta s-irha ad-has-tät-äkf, hak äwadəm-däx, wär-ässaläh a-wa t-ikfä d-a-wa ikfä amidi-net.

Imumənän əjjətän mäšan, ämoosän tiyyät taḡəssa

¹² Äyyät-ahi ad-käwän-äkfäḡ älmital s-käwän-əssəfhəməḡ edəgg wa-däx: wädden taḡəssa n-äwadəm-i-däx, tiyyät ḡas mäšan, tämmuzjäl, tartit n-izəmmuzjal-en-däx iket-näsän a-s taḡəssa. Ənta-den-däx daḡ a-wa nəja däx-tassaḡt-nänäx d-Älmasex,

¹³ iket-nänäx, iyyän n-Unfas a dāx-nätwäsälmaḡ i-ad-nasāx, numas tiyyät taḡəssa. A-wen, wār sār-s əzleyän käl-Ālyāhud wāla käl-Ālyunan† wāla eklan wāla ilāllan ed iket-dāx-nāsān, Unfas-wen-dāx n-iiyän a əjrawān.

¹⁴ Taḡəssa ya, wār tāmoos azāmmāzjul iyyän ḡas, əjjətān izəmmuzjal-net.

¹⁵ Afāl dd-iggād aḡār, inna: «Nākk, wār hi-təla taḡəssa ed wār-āmoosāx āfuss», ajān ikkās-t a-wen dāx-tumast n-azāmmāzjul n-taḡəssa?

¹⁶ Kud dd-təggād daḡ taməzzujt, tənnā: «Nākk, wār hi-la taḡəssa ed, wār-āmoosāx tiṭṭ», ajān a-wen ikkās-tāt dāx-tumast n-hārāt dāx-taḡəssa?

¹⁷ Ənnār tāmoos tāḡəssa iket-net tiṭṭ, ma s-mad-isəl āgg-adəm hārāt? Ənnār tāmoos taḡəssa iket-net taməzzujt, ma s-mad-isunsəj āwadəm hārāt?

¹⁸ Wādden əmmək-wen-dāx daḡ a-s dd-ixlāk Māssināx taḡəssa, ānn-ak a-s tāt-dd-ixlāk, hak azāmmāzjul n-taḡəssa-dāx d-edāgg wa s-has-irha dāx-taḡəssa.

¹⁹ Ənnār azāmmāzjul iyyän ḡas a t-illan, iket-di, wār t-təmmil taḡəssa.

²⁰ Dāx-təssəba n-a-wen-dāx a fāl, taḡəssa, əjjətān izəmmuzjal-net māšan, taḡəssa ənta, tiyyät ḡas.

²¹ A-wen-dāx a fāl wār tāddobāt, ad-dd-təggəd tiṭṭ, tānn i-āfuss: «Nākk, wār dāx-k leḡ əššāxəl», wār-āddobāt daḡ eḡāf, ad-dd-iggəd, ānn i-ıḡarān: «Wār sār-wān āmḡatārāx.»

Hak azāmmāzjul n-taḡəssa-dāx, iṭṭaf amidi-net

²² Wādden, hannāyām a-s izəmmuzjal n-taḡəssa-nänāx wi wār nəkna asəfrar, əntāneḡ-en-dāx a hanāx-ənfanen s-hārāt,

²³ ija ḡur-nāx a-s izəmmuzjal n-taḡəssa-nänāx wi nəkna məlkāhaw, əntāneḡ, a nəkna asəbbələl, wi s-hanāx-āsikārakāḡ wāla ad-nāḡār ismawān-nāsān, əntāneḡ-en-dāx a nəkkan aṡatar.

²⁴ Wi iwār sārho, wār nāmḡatār s-aṡatar-nāsān fāl-a-s Māssināx iman-net-i dd-iknān taḡəssa, ij'-asān āddābara fāl iwār sārho iṡrutān wi ifāl.

²⁵ A-wen ij'-e Māssināx i-ad-wār kənnəs taḡəssa d-iman-net, dihen, hak azāmmāzjul-dāx, ākkuul dāx-amidi-net.

²⁶ A-wen-dāx a fāl e-d āsnin edāgg iyyän dāx-taḡəssa, taḡəssa iket-net daḡ a tāsniināt, e-d irxām daḡ edāgg iyyän dāx-taḡəssa, taḡəssa iket-net a madāt-tisraw.

²⁷ Kāwāneḡ, a-s taḡəssa n-Ālmasex, hak iyyän dāx-wān-dāx, āmoos azāmmāzjul-net iyyän.

²⁸ A-wen-dāx a fāl dd-āšmašāl Māssināx inəmmuṡal s-tizarāt dāx-ālxidmāt-net wa n-ālkānisāt, issəlkām-asān-dd ānnābitān, əlkāmān-asān ālyulam, əlkāmān-asān āddināt wi lānen tādabit n-iji n-tikunen, əlkāmān-asān wi lānen tādabit n-azuzi n-imarhinān, əlkāmān-asān wi ha tārha n-ad-ədhəlān imidiwān-nāsān d-wi lānen tādabit n-asəssiḡəd-nāsān d-wi lānen tādabit n-mājrād n-awalān wāren ātwāssan.

²⁹ Ənhəywāt, wādden āddināt iket-dāx-nāsān a-s inəmmuṡal, wādden iket-dāx-nāsān a-s ānnābitān, wār āmoosān iket-nāsān ālyulam, wādden iket-nāsān a əjrawnen tādabit n-tijawt n-tikunen

³⁰ wāla azuzi n-imarhinān wāla mājrād n-awalān wāren ātwāssan wāla tādabit n-āttāfāssir-nāsān.

³¹ Šāmad isālan-den-dāx, adiṡ, ārheḡ dāx-wān ad-səddārhenām isuf n-Unfas Šāddijān wi ufānen, win-dāx a-s lam s-ad-tədgəzām dāx-umāx-hasān. Āyyāt-ahi ad-kāwān-səlmədāx a-wa ufān dāx-a-wen-dāx iket-net.

† 12:13 12:13 Itawann'-asān: Gəriktān. (Les Grecs dāx-Təfrānsit). Əzzaḡān Erobbā dāx-ākall wa itawānna: Gəris (La Grèce dāx-Təfrānsit). Tawalt-nāsān: Tālyunanit.

13

Tärha ta n-tidət

¹ Kud-irha siwələx awalän wi n-dägg-adəm hakd-däx wi n-änjəlosän, kunta ämmuukkän a-wen, afäl wär-äsdäwäx a-wen d-tärha n-ulh təmdat, wär izley məjrad-in d-eməsli n-təzoli tāssewälät bannän meyx tefelt n-darox təzyakät.

² Kud-irha fäw umas a-s wär t-illa məjrad n-Mässinäx s-wädden äzizəbbät-t-dd fäll-i i-ad-t-in-səssiwəđäx äddinät, kud-irha fäw, wär t-illa əddəraj s-wädden əssanəxt, kud-irha äzizəbbəx musnät, kud-irha leyx immun wa isahanen idəxän, afäl wär-äsdäwäx a-wen d-tärha n-ulh təmdat, wär-əmoosäx wäla a əndərrän.

³ Kud-irha, ärməsäx ehäre-nin iket-net, äjəxt takute i-tiləqqiwen, kud-irha fäw äjəx i-Eməli alkum-wa-däx s-wär-äkkuläx a-s ärxəx dəx-efew dəx-təssəba-net, afäl wär-äsdäwäx a-wen d-tärha n-ulh təmdat, wädden wäla a əndərrän.

⁴ Äwadəm wa s-ha tärha təmdat ulh-net, he tazidert, ooləx, wär-itisəm fäl a ikfa Mässinäx wär t-ikfa, wär-itəbəri, wär-ässakäy,

⁵ wär itəjj a iləšan, wär-igla fäl derhan n-iman-net, ismə, ilamməz-in a äjjeen,

⁶ wär-itəqqəs i-a wärän oxed, tidət a t-isadəwen,

⁷ inašš, iflas, ijar ätəma, işbär.

⁸ Tärha, wär-ilkem ad-tät-äba, təlluləya dəx-isəlan n-Mässinäx, ad-təmdəw; awalän wi wären ätwässan, ad-tän-iba, musnät ad-imdəw

⁹ ed musnät, hakd-däx təlluləya dəx-isəlan n-Mässinäx, hak iyyän dəx-nəx ila dəx-s härät

¹⁰ məšan, afäl dd-osa a-wa imdän, ad-imdəw a-wa dərrusän, ijješ a-wa imdän edəgg-net.

¹¹ A-s nämoos aratan, məjrad n-aratan a nətəjj, inəzjam n-aratan a nətəf, tayətə n-ara a-s nərjaš məšan, nämoos meddən xas, noyy'-in fälla-nəx a-wa län aratan.

¹² Tidət-dəx a-s äməra-dəx, wär nannufläy dəx-ahənay n-härätän wi n-Mässinäx ed ahənay-nənəx, oläh d-ahənay wa itəjj äwadəm i-iman-net dəx-tiset wəššärät, wär-əddobät s-iyət ad-dəx-s inhəy iman-net iket-net məšan, əšäl wa n-tebädde, ad-nənhəy Mässinäx s-tiṭtawen-nənəx, nəzzəy-t s-əmmək wa s-hanəx-izzäy əšäl-i-dəx.

¹³ Iket-di d-itəjj a-wen, əllan-t kərad härätän əxlalnen: immun, ätəma d-tärha məšan, toojär-tän tärha iket-dəx-nəsän.

14

Isuf wi itəjj Unfas i-äddinät

¹ Ayətma! Təjjəšet tärha təmdat ulhawän-nəwän, ärhät isuf wi itəjj Unfas Šəddijän i-dəgg-adəm hullan wi n-asəssiwəđ n-məjrad dd-äzizəbbät Mässinäx fälla-wän i-äddinät.

² Äwadəm wa äddooben ad-isiwəl awalän wären ätwässan, Mässinäx a-s itaməjrad wädden dəgg-adəm, wär t-illa ere t-ifhamän ed, Unfas a t-dd-intəjjan i-ad-isiwəl əddərajän-wi dəx-əssewäl.

³ Äwadəm wa fäll-dd-əzzəbbät Mässinäx məjrad hin-ässawəđ dəgg-adəm, dəgg-adəm a-s itaməjrad i-ad-tän-isəşşuhət dəx-immun, isəmmətär-tän, isəsməd ulhawän-nəsän.

⁴ Wa isawalän awalän wären ätwässan, iman-net xas a iniffəw, isişuhut-tän s-a wa ijanna məšan, wa fäll-dd-əzzəbbät Mässinäx məjrad hin-ässawəđ dəgg-adəm, älkənisät iket-net a iniffəw, isişuhut-tät.

⁵ Ayətma, derhan-in a-s ad-siwələm iket-nəwän awalän wären ätwässan məšan, əsofəx ad-təjrəwäm tədabit n-ad-hin-sasawəđäm äddinät məjrad fälla-wän dd-äzizəbbät Mässinäx ed wa ijrəwän turhajät-ten-dəx, ojär wa isawalän awalän wären

atwässan hullan afäl wär-äddobät wa isawalän awalän-en, ad-äffässär a-wa ijänna i-ad-isəşşuhət sär-s älkänisät.

⁶ Ayətma, kud kəwän-in-əkkey ämära, ad-hawän-sawaläx awalän wären ätwässan, ma s-mad-infəw a-wen? Wädden ufa ad-kəwän-səfhəmäx a hi-dd-äsinäfaläl Mässinäx mex ad-hawän-siwəḍäx musnät mex ad-kəwän-in-səssiwəḍäx mäjräd fäll-i dd-äzizäbbät Mässinäx mex ad-hawän-t-säxräx?

⁷ Ədkələxet-dd xas älmital fäl härät wär iha unfas şund taḡänibt mex tehärdänt, afäl emäslı wa takkäsän, wär ija ewet olaḡän, əndek a-wa he-äj äwadəm ibḍəw emäslı wa n-taḡänibt d-wa n-tehärdänt?

⁸ Täsinsäyt daḡ ta dd-ḡarrät əlxəskär s-tebädde, afäl wär tät-äshäḍ äwadəm s-əmmək-net, ma ämoos əssärdasi wa dd-e-ibdədän i-amjär?

⁹ Emmək-wen-däx daḡ a-s, mäjräd wa täjjäm, afäl wär-issəfhäm, mi madän-ijrah a-wa jännem? Ad-talähäm xas d-ere ässewälän däx-aḍu.

¹⁰ Awalän, əjjətän däx-äddunya mäşan wär t-illa-i s-wädden il' älmäḡna,

¹¹ afäl wär-əssenäx älmäḡna n-iyyän däx-sän, ad-umasäx älzahil i-wa t-ämmijrädän, umas-ahi näkk-däx wa t-ämmijrädän, älzahil.

¹² ḡas, şamad kəwänəḍ təknam tärha n-ajäräw n-isuf wi ihakk Mässinäx i-dägg-adəm s-tärna n-Unfas Şaddijän, adiş, əmmäḡät däx-sän i-wi ufänen sişuhutnen älkänisäten.

¹³ A-wen-däx a fäl, äwadəm wa ijrəwän däx-Mässinäx turhajät n-ad-ämmäjräd awalän wären ätwässan, ittäret daḡ däx-Mässinäx ad-t-äkf turhajät n-ättäfässir-näsän

¹⁴ fäl-a-s, e-d təddaläx Mässinäx däx-awal wär-əssenäx, Mässinäx a ḡabbädäx s-ənniyät-in mäşan a-wa jänneḡ, näkk iman-in, wär sär-i ila ujreh.

¹⁵ Adiş, ma änihäjjän? Äddoobeḡ ad-ədələx Mässinäx däx-mäjräd wärän ätwässan s-tärna n-Unfas Şaddijän mäşan, a-wen, wär hin-ikkes a-s äddoobeḡ ad-t-ədələx s-tayətə-nin däx-mäjräd əfhamän äddinät, äddoobeḡ ad-amələx Mässinäx däx-awal wärän ätwässan mäşan a-wen wär hin-ikkes a-s äddoobeḡ ad-t-amələx s-tayətə-nin s-älmäḡna əjrahän äddinät.

¹⁶ Afäl wär jeḡ a-wen har ḡabbädäx Mässinäx däx-mäjräd wärän ätwässan, əndek əmmək wa s-mad-əkawənän äddinät wi hänen älzämaḡät n-imumənän hi-äsijädnen, ənnən-ak: «Amin!» a-s wär t-illa a əfhamän däx a-wa ənneḡ?

¹⁷ Kud-däx tittar n-tämayit i-Mässinäx a täjjäx s-a-wen, wär-idhel a-wen amumən wa hi-äsijädän i-ad-işşuhət däx-immun-net ed wär-issen a jänneḡ.

¹⁸ Näkk, ämmoyäx i-Mässinäx, ojaräx-kəwän iket-nəwän mäjräd däx-awalän wären ätwässan

¹⁹ mäşan, e-d heḡ älkänisät, ässofäx ad-ännäx səmmosät tifer saḡranen härät däx-erhet n-Mässinäx uhən ad-ännäx märaw afdän n-tifer däx-iməjridän wären ätwässan s-wär t-illa ere tän-ifhamän.

²⁰ Ayətma-x, iwşarät, təyyəm tumast n-aratän; tidət, däx-isälan wi hälnen ebre n-tälläbäst, umasät şund aratän mäşan, däx-isälan n-a-wa ihälän ebre n-tayətə ta n-almud n-erhet n-Mässinäx, umaşät meddən əmdanen.

²¹ Iktab däx-älämär n-Mässinäx a-s, innä Mässinäx:

«Tamətə-ta-däx,

ad-sär-s dd-şəmmişələx äddinät ämmijrädnen

awal säl wa tamäjräd,

ad-has-ämmäjrädäx s-idlay n-imäjarän

mäşan hakd a-wen-däx iket-net, wär hi-mad-səjəd.»

²² A-wen, ässiilmäd-anäx a-s awalän wi wären ätwässan, iji n-Mässinäx dd-äsisawäy i-ad-umas aşämöl wädden i-imumənän, änn-ak i-wi wären omen, a-s ija a-wen,

asiwəl dəχ-mäjräd dd-äzizäbbät Mässinäχ fäll-äwadəm, imumənän a-s ämoos aşamol wädden äddinät wi wären omen.

²³ Essənät χas afäl täžžimmäχ älkänisät iket-net, ad-tamäjrädän äddinät wi tät-hänen iket-näsän s-awalän wären ätwässan, äddinät wi s-a äynayän d-omänän, ma he-ənnən dəχ-a-wen? Meχ day ma dəχ-wän-e-ənnən wi wären omen? Wädden ad-hasän-talähäm χas d-inəbbuddal iket-dəχ-näwän?

²⁴ Mäšan, afäl mäjräd fälla-wän dd-äzizäbbät Mässinäχ a hin-sasawađäm äddinät, kud fälla-wän dd-ijjäš äwadəm wärän omen wäla-i s-a äynayän d-omän, ämzäyyen-dd d-mäjräd n-Mässinäχ wa siχuläm, ad-əlmədän a-s tidət a dəχ-tässewäläm, əššəkän iman-näsän, əlmədän day s-ibäkkadän-näsän

²⁵ ed, ad-dd-isəffukkär mäjräd wa jəm a-wa iffärän dəχ-ulhawän-näsän. Dihen, äwadəm-en, ad-irkäχ dat-Mässinäχ, iχbəd-t, äjjayh day a-s tidət-dəχ a-s ill'e Mässinäχ jere-wän.

Hak härät-dəχ, äjet s-älxal

²⁶ Ayətma-χ, əndek äddäbara? Ärheχ dəχ-wän a-s e-d təžəmmäχäm, kunta, ih'-iwän ere irhan iji n-təmmal i-Mässinäχ dd-təjmadät a-wa iχra dəχ-Äzzäbur, meχ ere irhan ad-isäχär äddinät, meχ-i s-dd-äsinäfaläl Mässinäχ härät, meχ-i ijrawän χur-Mässinäχ turhajät n-ad-ämmäjräd awal wärän ätwässan, meχ-i χur-s ijrawän turhajät n-ad-älläχät älmäχna n-mäjräd wärän ätwässan, äjät härätän-win-dəχ iket-näsän dəχ-ənniyät n-ad-səşşuhum älkänisät.

²⁷ Wi tamäjrädnen awalän wären ätwässan, əgdähän əssin meχ kərəđ, əmzizärnet s-mäjräd, ämlet-t ere itafässarän a-wa jännen,

²⁸ afäl wär t-illa ere iffəssärän a-wa jännen, adiš susəmmnet dəχ-älkänisät, ämmäjrädet hak iyyän dəχ-sän i-Mässinäχ dəχ-iman-net.

²⁹ Äddinät wi fäll-dd-äzzäbbät Mässinäχ mäjräd hin-ässawađän äddinät, mäjrädnet dəχ-sän əssin meχ kərəđ s-eməzəzar, səjədnet-asän äddinät wi iyyäđnen, zəjjəznet-tän hullan i-ad-əbdəwän a-wa oläχän dd-ifälän Mässinäχ d-a-wa dd-əkkäsän äddinät-en dəχ-iyäfawän-näsän.

³⁰ Afäl dəχ-wän-in-isasawađ iyyän i-tamətəte mäjräd fälla-s dd-äzizäbbät Mässinäχ har dd-inkär iyyän s-dd-äsinäfaläl Mässinäχ härät s-irha tənna-net, isusəmet wa äzzarän i-ad-ämmäjräd wa dd-işräyän.

³¹ Täddobem s-eməzəzar, ad-hin-səssiwəđäm tamətəte mäjräd fälla-wän dd-äzizäbbät Mässinäχ i-ad-säχrəm imumənän iket-näsän, səmmətäräm-tän

³² fäl-a-s ännäbitän, änihäjjä ad-t-illa ənniyät-näsän daw-wa n-ännäbitän wi iyyäđnen.

³³ Hak härät-dəχ, äjet s-älxal ed Mässinäχ, älxer wädden tämsäršär.

Dəχ-isälan n-tiđedən ämära, ärheχ dəχ-wän, ad-təjəm a-wa jänät älkänisäten n-iməşşeddəjän,

³⁴ susəmmnet dəχ-älkänisät, ed wär hasnät t-illa mäjräd dəχ-s, änn-ak sərəsnet iman-näsän, səjədnet ed a-wen-dəχ a innä alämär n-Mässinäχ.

³⁵ Ti dəχ-snät lät asəstan, täqqəlet ehän-net təzzar səstənet ähaləs-net fäl-a-s iläš fäll-taməđt, ad-tämmäjräd dəχ-älkänisät.

³⁶ Ajän käwəneđ, ija χur-wän a-s mäjräd n-Mässinäχ, käwəneđ ad-dd-ifäl? Meχ ija χur-wän a-s käwəneđ χas a fäll-t-dd-äzzäbbät?

³⁷ Kunta ih'-iwän ere ordan a-s ənta ännäbi a ämoos, meχ orda s-ijraw χur-Unfas Şäddijän, a wär-əjrewän äddinät wi iyyäđnen, adiš, ilmədət day a-s a-wa-dəχ hawän-in-əktäbäχ, alämär dd-ifälän Emäli a ämoos.

³⁸ Ere dd-iggädän innä a-wen bahu, wär t-in-təjrehäm, Mässinäχ a fäl wär-issen.

³⁹ Ayətma-γ, ədgəzät dəγ-asəssiwəđ n-əddinät i-məjräd fälla-wän dd-əzizəbbät Məssinəγ, wär təgdələm i-əddinät wi iyyəđnen məjräd dəγ-awalän wären ätwässan
⁴⁰ məšan, əjät a-wen iket-net s-əneđam d-əlخال.

15

Isälan n-tanäkra n-γisa Älmasex jer-inəmmuttan

¹ Ayətma-γ, ärheəγ əməra ad-kəwän-dd-səktoγ a-s Älənzil wa s-hawän-jəγ isälan-net, tomänäm sār-s, tətəfäm-t, itəf dəγ təmudre-nəwän hak ašäl,

² Älənzil-en, ənta a-s əssəbab n-əlyəllas-nəwän afäl has-jäm uđəf s-əmmək-wa-dəγ s-hawän-t-in-əssawəđəγ, afäl wär has-jem a-wen, ad-umas immun-nəwän, i n-bännan.

³ Ayətma-γ, a-wa əγreγ a kəwän-əssəγrəγ nəkk-dəγ. A-wa kəwän-əssəγrəγ dəγ, eγäf-net da:

Inn'-anəγ əlkəttab n-Məssinəγ a-s Älmasex, əmmut dəγ-təssəba n-ibəkkađän-nənəγ;

⁴ inn'-anəγ dəγ əlkəttab n-Məssinəγ a-s ijjəš azəkka məšan, ašäl wa s-kərađ đarät taməttant-net, inkär-dd jer-inəmmuttan,

⁵ issəknä iman-net i-Bətrus, đara-s inəttulab wi n-məraw d-əssin,

⁶ đara-sän əntəneđ, issəknä iman-net i-imumənän okəynen səmmosät timəđ n-əwadəm s-təššəm-nəsän, təddar kud-dəγ aγil-nəsän iyyän, əba-t,

⁷ đara-sän, issəknä iman-net i-Yaqub, təzzar ənhəyän-t dəγ inəmmušal iket-nəsän.

⁸ Đara-sän iket-dəγ-nəsän, ənfaläl-ahi-dd nəkk-dəγ Buləs, nəkk-i n-aγri

⁹ ed, nəkk a-s wa əndərrän n-əjijal dəγ-inəmmušal, wär-ənhəjjəγ fəw d-ad-itwənn nəkk ənəmmašul fäl təmγəre n-əlyizabät-i-dəγ əssəknəγ əlkənisät n-Məssinəγ.

¹⁰ Məšan, a-wen, wär hin-ikkəs a-s, Məssinəγ a hi-ijän dəγ-ənnuγmät-net a-wa əmoosəγ ašäl-i-dəγ, ənnuγmät dəγ wa fäll-i ija, wär hin-inγel bännan, ed, ašäl-i-dəγ, əddoobəγ ad-ənnəγ a-s ojarəγ inəmmušal iket-nəsän əlxidmət məšan, əlxidmət-en, wədden nəkk a t-ijän, ənnuγmät n-Məssinəγ-i dəγ-i ixdämän a t-ijän.

¹¹ Jer-nək wəla inəmmušal wi iyyəđnen, hərät iyyän a hawän-nəxtəb, ənta-den-dəγ dəγ a-wa s-tomänäm.

Isälan n-tanäkra n-imumənän jer-inəmmuttan

¹² Kunta nəkkəneđ nənn'-awän a-s Älmasex, inkär-dd jer-inəmmuttan, adiš ma isawännen iyyəđ dəγ-wän a-s wär təlkem tanäkra jer-inəmmuttan?

¹³ Kunta tidət-dəγ a-s wär t-təlla tanäkra jer-inəmmuttan ašäl ilkämän, adiš Älmasex-dəγ, wär dd-inker jere-sän.

¹⁴ Kunta dəγ Älmasex wär dd-inker jer-inəmmuttan, adiš əlxuđbat-nənəγ, taxxalen γas, wär t-illa a infa, adiš, immun-nəwän dəγ sār-s, wär t-illa a infa.

¹⁵ Kunta inəmmuttan wär-ilkem ad-dd-ənkərän, adiš, terk tjuhawen a nəmoos, nənnə bahu ed nənnə issənkär-dd Məssinəγ Älmasex jer-inəmmuttan, a-s ija a-wen, wär t-dd-issənkär jere-sän.

¹⁶ Afäl γas inəmmuttan, wär dd-nəkkərän dəγ-taməttant, adiš, Älmasex dəγ, wär dd-inker jere-sän.

¹⁷ Kunta dəγ γisa Älmasex, wär dd-inker jer-inəmmuttan, adiš immun-nəwän sār-s, wär infa hərät ed tənsam hərwa daw-əzük n-ibəkkađän-nəwän.

¹⁸ Kunta dəγ a-wa tordäm tidət, adiš, wi s-a-s tən-əba-dəγ omanän s-Älmasex, adiš əba-tän bännan, wär hasän t-illa əttəma wäl' iyyän.

¹⁹ Kunta daḡ aṭṭama-nānāḡ wa nəjār dāḡ-Ālmaseḡ, imdā-dd dāḡ-äddunya-ta-dāḡ ḡas, adiš, iməskay näkkäneḡ dāḡ-dägg-adəm, wār t-illa ere hanāḡ-ojārān təla n-tāhanint.

²⁰ Ayətma-ḡ, Ālmaseḡ, tidət-dāḡ a-s inkār-dd jer-inəmmuttan, ənta a dd-issənkār Mässināḡ s-tizarät i-ad-hanāḡ-isəfləs a-s inəmmuttan wi iyyädnen, ilkam əntäneḡ-dāḡ ad-dd-ənkārān.

²¹ Emmək-wa-dāḡ s-āhaləs iyyän ad-dd-orāwän tamättant s-dägg-adəm iket-nāsän, əmmək-wen-dāḡ daḡ, a-s āhaləs iyyän-dāḡ ḡas ad-dd-orāwän a-s təlkam tanākra n-äddinät iket-nāsän jer-inəmmuttan.

²² Dägg-adəm, təlkam dāḡ-sän tamättant iket-nāsän ed Adəm ad-dd-əzjarān iket-dāḡ-nāsän; əmmək-wen-dāḡ daḡ a-s mad-əjrəwän äddinät iket-nāsän wi ärtäyнен d-Ālmaseḡ tämudre täynayät täḡlalät.

²³ Āmāra, tanākra n-inəmmuttan, ad-täj s-emäzezar: Ālmaseḡ a dd-inkārān s-tizarät jer-inəmmuttan i-ad-umas ädḡimmana i-äddinät wi has-əlkämnen, ḡara-s, ad-dd-ənkārān äddinät wi sār-s omānnen, win, tanākra-nāsän, ad-täj ašäl wa dd-mad-iqqəl Үisa.

²⁴ Үur-a-wen-dāḡ, ad-mad-təmdəw äddunya. Ālwäqq-wen-dāḡ ad-mad-isuk Үisa Iblis äkall ənta d-a-wa ila dāḡ-alšinän d-tärna d-äššahät, äkf dihen Təmmənəya iket-net Abba Mässināḡ.

²⁵ Үisa, ähhuuššäl ad-iṭṭaf Təmmənəya hundāḡ har äj Mässināḡ išənja-net daw-iḡarān-net, ikrəš fälla-sän ašäl.

²⁶ Ašänjo-net wa s-mad-išrəy, tamättant

²⁷ fäl-a-s, iktab dāḡ-əlkəttab n-Mässināḡ a-s:

«Ikf'-e Mässināḡ ašäl fäll-härät iket-net.»

Tidət, Mässināḡ ija härät iket-net daw-iḡarān n-Ālmaseḡ, māšan, kunta ija Mässināḡ härät iket-net daw-iḡarān n-Үisa, Mässināḡ ənta iman-net, wār-iha härätän wi mälnen daw-iḡarān n-Үisa.

²⁸ Afäl ija Mässināḡ e d t-illäm härät daw-iḡarān n-Ālmaseḡ, dihen, Үisa iman-net a madän-äj iman-net daw-tanhaḡt n-Mässināḡ i-ad-titbat təmmənukəla n-Mässināḡ fäll-e d t-illäm härät d-e d t-illäm ägg-adəm.

²⁹ Zənnəzjumətät ḡas dāḡ-mäjräd-wa-dāḡ: kunta wār təlkem tanākra dāḡ-inəmmuttan, adiš äddinät wi titwəsəlmiḡnen dāḡ-təssəba n-tasäktot n-ayətma-sän wi äba, ma s-tän-išilləw a-wen a-s əssänän a-s wār təlkem tanākra jer-inəmmuttan? Ma tordam, mafäl šalḡašän iman-nāsän?

³⁰ Uhen kunta inəmmuttan-i-dāḡ, wār dāḡ-sän təlkem tanākra, adiš, näkkäneḡ-i-dāḡ, ma dāḡ-nəḡḡaz, nətajjäš hak ašäl miši bännan-bännan?

³¹ Hak ašäl, əkkeḡ edes i-tamättant. Ayətma-ḡ, a-wa hawän-jänneḡ ija əddəttu-wa-dāḡ fäl kəwāneḡ a-s mad-äbbäräjäḡ dat-Үisa Ālmaseḡ-i n-Emäli-nānāḡ.

³² Kunta näkk erhet n-dägg-adəm ḡas a-s əlkamāḡ, wār hi-t-illa aṭṭama n-a-s təlkam tanākra jer-inəmmuttan, adiš ma s-hi-infa akənnas wa jeḡ d-iwäḡsan dāḡ-aḡrəm wa n-Ifäsus? Šamad wār təlkem tanākra jer-inəmmuttan, adiš, «Näkšet, nəsweet ed ašəkka, wār dāḡ-nāḡ ilkem ar tamättant.»

³³ He kəwāneḡ, wār təssəswädäm iman-nāwän!

«Erk amidi jed,

ad t-tumasäd.»

³⁴ Iqqəlet-kəwän-dd ənniyät, əbdəwät d-abäkkəḡ ed a-wen-dāḡ a äniihäjjän fäll-äddinät äksuḡnen Mässināḡ. Tidət-dāḡ a-s han-kəwän äddinät wären əzzey Mässināḡ, a-wen janneḡ-awän-t i-ad-dāḡ-wän äjjäḡ tasäja.

Taḡəssa ta täynayät mad-əkrəšən imumənän

³⁵ Ʒissanäx a-s məjrad-wa-däx, afäl has-əslän iyyäd, ad hi-ənnən: «Ʒndek əmmək wa s-mad-dd-ənkärän inəmmuttan? Ma dər-mad-taläh taḡəssa ta dar-mad-dd-ənkärän?»

³⁶ Iba n-tayətə yaden! Ajän wär təssenäd a-s afäl täddomed tablalt ämära-däx, wär-ilkem ad-hak-dd-tässidwäl ar s-ad-tämmät təzzar.

³⁷ A-wa mad-təddumud, wädden ənta a dd-madän-idwəl, jer-tablalt n-älkäma wäla tiyyät n-allonän wi iyyädnen, tablalt-net ḡas a täddomed wädden ahəšk-net iket-net a täddomed.

³⁸ Hakd a-wen-däx, tablalt-ten-däx täddomed, ad-tät-äkf Mässinäx turhajät n-ad-dd-sədwəl a-wa s-irha s-ad-t-dd-sədwəl, hak ädomm-däx, ikf'-e əzzənəf-net.

³⁹ A-wa iwärän ärori n-äkall, wär-oleh tiḡəswen iket-net, taḡəssa ta n-dägg-adəm, təzlay d-ta n-irəzzejän, təzlay d-ta n-igdaḡ, təzlay d-ta n-imänan.

⁴⁰ Ʒəmmək-wen-däx daḡ a-s t-əllanät tiḡəswen n-härätän wi əlläynen däx-işənnawän d-tiḡəswen n-härätän wi wärnen ärori n-äkall; təssanäm a-s härätän wi əlläynen däx-işənnawän, wär olehän d-wi rajjäşnen fäll-ärori n-äkall.

⁴¹ Asmäqqi wa n-täfukt, izlay d-təmölle n-ewär, täfukt d-ewär daḡ, asmäḡmäḡ-näsän, izlay d-wa n-etran; etran iman-näsän, əllan-t iyyäd ojärnen imidiwän-näsän asmäḡmäḡ.

⁴² A-wen-däx a dər-toläh tanäkra jer-inəmmuttan. A-s tajişän äddinät azəkka, olähän d-tablalt äddomät äwadəm, ad-tənbəl, tämmät təzzar. Afäl dd-täsfäqqät, tədwäl, äbas däx-s ilkam märkähaw, inəmmuttan daḡ a-s dd-mad-ənkärän, wär fälla-sän təla tamättant tärna.

⁴³ A-s tajiş tablalt ider n-äkall, wär färor, wär t-illa ere fälla-s issanän; inəmmuttan daḡ a-s tajişän azəkka, wär t-illa äşşahät tän-ihan mäşan, a-s dd-mad-ənkärän, əḡnayän äşşahät şund tablalt-ten-däx s-ad-dd-tifäqqut, la mänhoy.

⁴⁴ Enəmmettən, a-s itajiş azəkka, ämoos tafəkka wär-iha unfas mäşan, a-s dd-mad-inkär, ih'-e unfas. Ʒəmmək-wa-däx s-əllanät tiḡəswen iha unfas wa tänät-ässodärän, əmmək-wen-däx daḡ a-s mad-əməlnät tiḡəswen ässodär Unfas Şäddijän n-Mässinäx.

⁴⁵ Däx-isälan n-a-wen-däx fäw a fäl innä əlkəttab n-Mässinäx a-s:

«Adəm a-s ähaləs wa dd-ixläk Mässinäx s-tizarät,

ixläk-t-dd ḡas,

ija däx-s Mässinäx unfas,

ämoos äwadəm han iman»

mäşan, Ʒisa-i n-Adəm wa dd-işräyän, Unfas Şäddijän-i ihakkän tämudre a t-ikfän tämudre.

⁴⁶ Wädden taḡəssa ta täynayät ihäkk Unfas Şäddijän a dd-täzzarät, änn-ak taḡəssa ḡas ta ikarräş ägg-adəm a dd-täzzarät, təlkäm-as ḡarät a-wa taḡəssa ta täynayät ihäkk Unfas Şäddijän.

⁴⁷ Adəm-i dd-äzzarän fäll-ärori n-äkall, äzarəz n-äkall a däx-dd-ikna; ij'-e a-wen ere ila ärori n-äkall-i-däx mäşan, Ʒisa-i n-ähaləs wa iyyädän, işənnawän a dd-ifäl.

⁴⁸ Äddinät wi wärnen ärori n-äkall, olähän d-ere wa tän-dd-äşhäyāwän dd-iknän däx-äzarəz n-äkall mäşan, ähaləs wa dd-ifälän işənnawän, äddinät wi ila əkkänen älzännät, ähhuşşäl ad-där-s alähän ənta-en-däx dd-ifälän işənnawän.

⁴⁹ Ʒəmmək daḡ wa-däx a-s ämära-däx, noläh d-ere wa hanäx-äşhäyāwän dd-iknän däx-äzarəz n-äkall, əmmək-wen-däx daḡ a-s ilkam däx-näx ad-naläh näkkänəḡ d-ere wa dd-ifälän işənnawän.

⁵⁰ Ayətma, əlmədät a-wa ihälän ebre n-taḡəssa d-aşni, wär-e ikus Təmmənəya n-Mässinäx ed taḡəssa-ta-däx, təlkam däx-s tamättant, äywa, a däx-təlkam tamättant, wär mad-ijjəş tämudre ta täḡlälät dd-malät.

⁵¹ Ʒnta da əddäraj wa s-käwän-salmadäḡ; wädden iket-däx-nänäx a maden-ənhəy eḡəs wa n-tamättant, änn-ak, ad-əmmuttəynät tiḡəswen-nänäx iket-däx-nänäx.

⁵² A-wen, ad-äj däx-tamazäyyat n-ewet n-täsinsäxt, fäl ešäfälli n-titt, afäl ija a-wen, ad-dd-ənkärän inəmmuttan däx-tizəska d-tixəswen äynaynen fäll-wär təla tamättant tärna. Tanakra n-inəmmuttan-ten-däx, ad-təmzəyyət d-amutti n-tixəswen-nänäx näkkəneḍ-i əddärnen i-ad-äbas fälla-snät la tamättant tärna

⁵³ fäl-a-s, ähhuuššäl a-s taḡəssa-nänäx ta-däx fäll-la tamättant tärna, wär t-illa ar ad-äbas fälla-s la tamättant tärna, ähhuuššäl daḡ a-s taḡəssa-nänäx ta-däx tamättet, wär t-illa ar ad-tiynəy, tumas taḡəssa s-äbas fälla-s la tamättant tärna.

⁵⁴ Afäl tämmuttäy taḡəssa-nänäx ta n-ämära-däx, tämoos taḡəssa täynayät, ilsa a-wa wärän irəkkäh a-wa irakkähän, ilsa a-wa fäll-wär la tamättant tärna, dihen, ad-itbət a-wa innä əlkəttab n-Mässinäx a-s innä:

«Tamättant, töttəlmäz-in, tamättant tämmut!»

⁵⁵ Ätwännä daḡ:

«Onin tamättant, ya tamättant, əndek tärna-näm?

Ma ja tistant ta s-təddajäd äddinät a ija a-wa-däx, naqqäd-tän sär-s?»

⁵⁶ Abäkkəḍ a ikfän tamättant tistant-ten-däx s-hanäx-näqq. Alämär wa n-ännäbi Mosa s-hanäx-indär ad-nəmašäl a-wa innä a ikfän abäkkəḍ tärna ta s-hanäx-isikəw äkall.

⁵⁷ Tidət ənta-den-däx mäšan, ənhəywät, näkfet Mässinäx-i hanäx-ikfän tärna fäll-abäkkəḍ semyar däx-idəm n-Emäli-nänäx ʿYisaÄlmasex.

⁵⁸ A-wen-däx a fäl, ayətma-i əkneḡ tärha, əbdədät fäll-iman-nəwän, təntəmäm däx-immun-nəwän, ədgəzät hak ašäl i-ad-ihəl älxidmət wa häm i-Emäli s-data däx-a-s təssanäm a-s tiluyyaḡ-nəwän, wär-e umasnät bännan dat-Emäli.

16

Tirjit n-käl-Kurənta i-imumənän wi əzzäyən Yärussälam

¹ Ayətma! Däx-isälan n-a-wa s-tärhäm ad-t-sədwəm i-ad-sär-s tədhələm iməššeddəjän wi hänen Yärussälam, äjät ḡas a-wa däx-s ənnəḡ i-älkänisäten ti n-teje ta n-Gälasya.

² Hak älxad-i n-ašäl äzzarän däx-əssəboḡ, äjet hak äwadəm a-wa s-irha s-edes s-a-wa dār-ogdäh ajärəw-net, dihen, wär hi-mad-täqqələm har hin-asäḡ təzzar ad-tattäräm asdu n-härät siha d-siha.

³ Afäl käwän-in-oseḡ, ad-sənnəfrənäm jer-iman-nəwän meddön wi s-tärhäm, dihen, ad-tän-äkfäḡ tikarḍiwen tan-əḍmannen təzzar, sukäḡ-tän-in Yärussälam d-tirjit-nəwän.

⁴ Kunta daḡ ənhäyäḡ a-s wär hi-t-illa ar ad-där-sän idawäḡ, adiš, ad-hi-ilzəm a-wen.

A-wa inna Buləs i-käl-Kurənta däx asikəl wa ikittəw

⁵ Ilkam däx-i ad-käwän-in-äkkäḡ mäšan, ad-əmmäräḡ teje ta n-Masidunya təzzar.

⁶ Däx-a-wa kittəwäḡ, ärheḡ ad-äjäḡ äzzəman ḡur-wän, səssikəyäḡ iha miši tajrəst ḡur-wän, tədhələm-ahi däx-asikəl-in s-idäggan wi iyyäḍnen.

⁷ Wär-ärheḡ ad-käwän-in-əmmäräḡ ḡas akəyäḡ, änn-ak, ärheḡ ad-ähajäḡ ḡur-wän kunta irḍa Emäli s-a-wen.

⁸ Iket-di, ad-äqqaymäḡ däx-aḡrəm wa n-Ifäsus har däx-s səssikəyäḡ ämudd wa n-Fantäkawt,

⁹ hannäyäḡ a-s amer-ahi däx-s emm hərəwän s-hin-ässawädän isälan n-Älənžil, ärhan äddinät äjjootnen məsällät n-isälan-en kud-däḡ wär-äba išənja s-wär-ijreḡ a-wen.

¹⁰ Afäl käwän-in-osa Timoti, äjät ənniyät i-ad-wär t-issärmäḡ härät jere-wän, iyyän n-əššəḡəl i-Emäli a nəha näkk d-ənta ḡur-wän,

¹¹ wär t-iläkkähet äwadəm wäl' iyyän dāχ-wän, änn-ak, särxəsät-as asikəl-net i-ad-hi-dd-iqqəl šik dāχ-älxer ed, näkk hakd ayətma-nāχ dāχ-äddin wi iyyäḍnen, näqqal-as.

¹² Dāχ-a-wa dd-iqqälän isälan n-änḡa-nāχ, Äbbäloš, öttärāχ dāχ-s hullan ad-hin-nidaw sär-wän näkkäneḍ d-ayətma-nāχ dāχ-äddin, māšan, s-tənnəd χas, wär ija fäll-a-wen ämära-dāχ, afäl ijraw s-a-wen, ad-kāwän-in-äkk önta-dāχ.

Isəmməterän d-ajilal n-mäjräd

¹³ Ayətma-χ, ählät iman-nāwän dāχ-immun, umasät meddön ömdanen, šuhötät.

¹⁴ Zäzrät tärha dāχ-härät iket-net.

¹⁵ Äsimätärāχ-kāwän d-ad-təssanäm härät i-Stifanas d-eχewən-net, öntäneḍ a äzzarnen s-immun s-Ÿisa dāχ-teje ta n-Akaya, ixdäm hullan i-ad-idhəl iməššeddöjän. Ayətma, ärheχ dāχ-wän

¹⁶ ad-sajadäm i-äddinät šund-win-dāχ, öntäneḍ hakd d-äddinät wi iyyäḍnen ödgäznen dāχ-älxidmät n-Mässinäχ.

¹⁷ Təjraz-ahi tābošajt ta sär-i dd-ija Stifanas d-Furtinatus d-Akäyyäkos, önhäyāχ-tän χas, oläh-ahi d-a-s kāwäneḍ a hannäyāχ,

¹⁸ əssənsän önniyät-in s-ömmək wa s-əssənsän wa-nāwän. Əjraznet-awän meddön šund-win-dāχ, səmχärät-tän.

¹⁹ Ähuulän-kāwän-in imumənän wi hänen älkänisäten ti n-Azya. Ähuul-kāwän-in Akilas d-Briska d-älkänisät ta tazämmayät dāχ-ehän-näsän. Ähuulän-kāwän-in hullan hullan dāχ-idəm n-tassayt ta nəja d-Emäli Älmaseχ.

²⁰ Ähuulän-kāwän-in ayətma-wän dāχ-äddin wi t-öllänen diha-dāχ iket-näsän. Afäl täχrä m täkarḍe-ta-dāχ, nəməjjät jer-iman-nāwän isofan janen s-tärha təmdat.

²¹ Näkk dāχ Buləs, ähuulāχ-kāwän-in. Hannäyäm-t edägg wa-dāχ dāχ-täkarḍe, näkk iman-in a t-iktäbän.

²² Ilχän Mässinäχ ere wärän irha Ÿisa Älmaseχ. «MARANATA», a-wen älmäχna-net: Emäli, əqqəl-dd šik.

²³ Ikf'-iwän Emäli Ÿisa älxer-net.

²⁴ Oyyeχ χur-wän iket-dāχ-nāwän tärha-nin dāχ-idəm n-tassayt ta nəja d-Ÿisa Älmaseχ. Amin!

Täkarde ta s-sänatät iktäb Buləs i-käl-Kurənta

Äšajəš

¹ A-wa näkk, Buləs, wa ija YisaÄlmasex änämšašul dāx-erhet n-Mässināx hin-iktabän näkk d-Timoti wa n-ənḡa-nāx dāx-äddin i-älkänisät n-Mässināx ta häť ayḡrəm wa n-Kurənta.

Nāhuul-kāwän-in, nāhuul-in daḡ iməššeddəjan wi əzzāḡnen äkall wa n-Akaya,

² ikf'-iwän Mässināx-i n-Abba-nänāx d-Emäli Yisa Älmasex ännuḡmät d-älxer.

Tāmayit i-Mässināx

³ Näkfet Mässināx-i n-Abba n-Emäli-nänāx YisaÄlmasex semḡar, naməlet-t ənta-i n-mässi-s n-tāhanint, isasmaḡän ulhawän-nänāx dāx-tersəmmawen ti hanāx-rammäsnen,

⁴ i-ad-nudabät näkkäneḡ-dāx, asəsmāḡ n-ulhawän n-äddinät wi tärmas tissant, arəw-dd sär-sän a-wen-dāx, tālawit n-ulh tolähät d-ta hanāx-ikfa Mässināx.

⁵ Emmək-wa-dāx s-a äjjeen dāx-a-wa hanāx-irammäsän, irammäs-anāx dāx-təssəba n-a-wa s-hanāx-ila Älmasex, əmmək-wen-dāx daḡ a-s ikann Mässināx asəsmāḡ n-ulhawän-nänāx dāx-təssəba n-tassaḡt ta nəja d-Älmasex.

⁶ A-wen-dāx a fäl a-wa hanāx-irammäsän näkkäneḡ dāx-tissant, wär-ämoos ḡas ar a sär-wän dd-oraw Mässināx i-ad-ismaḡän ulhawän-nāwän, tāḡləsäm. Äššahät daḡ wa hanāx-ihakk Mässināx, i n-ad-kāwän-nədhəl kāwäneḡ-dāx i-ad-tudabem äššäbarät dāx-a-wa hanāx-irmäsän s-ašäl-i-dāx, irmas-kāwän kāwäneḡ-dāx.

⁷ Nəkkas äššäk dāx-isälan-nāwän ed, nəflas a-s a-wa hanāx-irmäsän dāx-tissant šund ḡas kāwäneḡ a irmäs, a-wa nəjrāw daḡ näkkäneḡ dāx-tālawit, nohar-t dār-wän.

⁸ Ayətma! Elmədät a-s äkall wa n-Azya, nənhay dāx-s älyizabät ässuksädän, izbäb-anāx dāx-s a hanāx-irnan här näḡel fāw a-s sämdo-nänāx, osä-dd.

⁹ Nəkkäs ätḡäma dāx-iman-nänāx šund ḡas a-s tamättant a hanāx-tätiwäḡtäsät mäšan, a-wen, otäs-t Mässināx i-ad-umas a-s fella-nänāx ənta, wädden iman-nänāx, ed Mässināx, ila tärna n-ad-dd-isənkär inəmmuttan;

¹⁰ ənta a hanāx-dd-intäsän dāx-tamättant-ten-dāx tässuksädät, ənnär wädden a-wen, äru d-nəssəmnda. Nəflas daḡ a-s ənta ḡas a hanāx-e-agəzän dāx-e d t-illäm äššar.

¹¹ Nəssan a-s tədhäläm-anāx s-tittar-nāwän, ədhalän-anāx daḡ äddinät äjjootnen hanāx-təddalnen Mässināx, tittar-nāwän iket-dāx-nāwän, a sär-nāx-dd-orāwnen ännuḡmät n-Mässināx, ämoos a-wen-dāx əssəbab wa fäl tiimələn äddinät äjjootnen tiḡusay n-Mässināx, dāx-təssəba n-a-wa hanāx-ija.

Äddälil n-isikilän n-Buləs

¹² Kunta ill'-e a-s näddoobät ad-sär-s näbbäräj, wär t-illa a ämoos kunta wädden a-s wär t-illa a dāx-nəššak iman-nänāx, tajuhe-ten-dāx a hanāx-salmaßät a-s a-wa nəjä dāx-äddunya hakd a-wa nəjä jere-wän iket-net, oḡad. A-wen wädden a dd-ifalän särho-nänāx, Mässināx a t-ijän dāx-ännuḡmät-net, ənta-i hanāx-ikfän turhajät n-iji n-a-wen s-älxal räqqiisän dāx-iman šäddijnen d-tidət.

¹³ Nārha ad-təssanäm a-s dāx-tikardiwən-nänāx, a-wa ilän ujreh s-ənta a ḡarräm ḡas a dāx-hawän-nəssewäl, wär hawän-nəssewäl dāx-a säł a-wen-dāx, əflasāx daḡ a-s, ad-iwwaḡ härät fäll-ujreh-nāwän dāx-isälan-win-dāx.

¹⁴ Ämära, wädden härät iket-net a sār-wän ilan ujreh; a-wen-däx a fäl ašäl-i-däx, nämoos abäraj-näwän, mašan afäl dd-osa ašäl wa issəbdäd Emäli-nänäx Yisa, ašäl-wen, käwänəḏ a he-umasnen abäraj-nänäx.

Äddälil wa fäl wär-oles Buləs uyəl n-Kurənta

¹⁵ Təssəba n-tafləst-ten-däx hawän-jəx a fäl hi-dd-ijjäs s-tizarät derhan n-ad-käwän-in äkkäx i-ad-tumas tedäwit-näwän, tedäwit təmdat,

¹⁶ ed däx-derhan-in, äxeläx ad-käwän-in-əmmäräx təzzar, akəyəx s-teje ta n-Masidunya, aləsäx-käwän-dd day umär afäl tät-dd-fäläx i-ad-hi-tarəjam däx-asikəl-in s-teje ta n-Älyähudəyät.

¹⁷ Kunta a-wa äsdärhänäx, wär-ija, ajän, ija xur-wän a-s, wär-əjleyäx däx-a-wa hawän-ənneḡ? Meḡ ajän tordam a-s derhan-in, a dd-əkkašäx xas däx-eḡäf-in šund a-wa täjjän dagg-adəm s-ad-hak-änn iyyän: Eyya, igləw, iqqəl-käy-dd a əndərrän darät-a-wen, änn-ak: Äbo?

¹⁸ Mässinäx a hi-äjjəyhän däx-a-wa hawän-nəjanna, wär käla hawän-nəssärtäy tidət d-bahu.

¹⁹ A-wen, janneḡ-awän-t fäl-a-s YisaÄlmasəx-i n-Rure-s n-Mässinäx-i s-hawän-nətajj isälan-net näkk d-Sillas d-Timoti, wär ämtälla əyya-net d-äbo-net, tidət xas a ijanna.

²⁰ Enta-en-däx, a däx-äsdättät Mässinäx a-wa s-ija ärkäwäl-net, a-wen-däx a fäl, a nəttär däx-Mässinäx-däx, isəm-net a däx-nəjanna: «A|scMIN|d», i-ad-itwəsəmxär Mässinäx däx-təssəba-net.

²¹ Mässinäx iman-net a hanäx-osäxän s-äşşahät dār-wän d-Älmasəx-i hanäx-ijän inəmmušal-net ašäl wa d-hanäx-äsnäfrän.

²² Enta day a hanäx-işşəşwälän s-eşwäl šund wa itäjj äwadəm i-təla-net, ija day Unfas-net däx-ulhawän-nänäx i-ad-itbat a-s ənta a hanäx-ilän, nəkkəs äşşäk däx-marušät wa hanäx-itwär s-ilkam ad-hanäx-t-äkf.

²³ Mässinäx a hi-äjjəyhän wädden ägg-adəm, inḡ'-ahi day kunta bahu a hawän-janneḡ, wär t-illa a hi-ikkasän ad-käwän-in-äkkäx däx-Kurənta ar iba n-tärha n-ad-änxəsäx iman-näwän,

²⁴ fäl-a-s, däx-isälan wi n-immun, wär-iha ənniyät-nänäx ad-fälla-wän nəfrəḏ a-wa wäla a-wa, ed nəkkəs äşşäk a-s immun-näwän, itbat, änn-ak, a-wa hanäx-işlän, işl'-anäx fäl-a-s innin, nārḡ'-awän älxer.

2

Inəzjam wi itḡäf Buləs i-käl-Kurənta

¹ Ärheḡ däx-iman-in, ad-wär käwän-in-tiləsäx uyəl i-ad-äxşədäx iman-näwän

² ed kunta näkk-i-däx a dd-iqqälän xaşşädäx-awän iman, mi hi-e-isəddəwen? Kunta käwänəḏ-i n-əssəbab n-tedäwit-in, äxşädäx iman-näwän, əndek əmmək wa s-hi-e-səddəwem?

³ A-wen-däx fäw a dd-oräwän a-s ässofäx ad-hawän-in-əktəbäx, uhən ad-käwän-in-äkkäx näkk iman-in, ed əssanäx a-s afäl käwän-in-əkkeḡ s-əmmək-wa-däx, ad-äxşədän iman-in fälla-wän ed əkkasäx äşşäk a-s tedäwit-in, a-s tedäwit-näwän.

⁴ Täkarḏe-ta-däx, kattäbäx-awän-tät-in mašan, ärmäsnät-ahi tirəmmaḡ, osas ulh-in, jəx tisanant ta n-imeḡḡawän däx-təssəba-näwän mašan hakd a-wen-däx, akätəb wa hawän-jəx, wädden i n-ad-äxşədäx iman-näwän, änn-ak, i-ad-təlmədäm fäll-tärha-i-däx mäqqarät hawän-jəx.

Änsät i-äwadəm wa ämmujräžän a-wa läbasän ämešäl

⁵ Ämāra, äwadəm wa sār-wän dd-äwwayän uşşad n-iman-wen-däx, wädden näkk yas a-s işşad härät, işşad-awän-t daş käwāneḍ, änn-ak, ännäxet: işşad iman n-təşşəm-nāwän, māşan, wār-ärheş ad-səşşəjreş mäjräd däx-isālan n-a-wa işşad.

⁶ Äwadəm-en-hi, igdäh-as ämāra uḍlem-wen-däx t-täswär təşşəm-nāwän, ed täsmäqqām fälla-s.

⁷ Ämāra d-ämmujrāz a-wa ija, ätub, adiş, äjät-t-dd s-iman-nāwän, tənşəm-as, səsməḍām ulh-net i-ad-wär t-näqq tämujriş tojārät ta t-tärmäsät s-tizarät.

⁸ Ettaräş däx-wän, ad-t-səknəm tärha t-tässiilmädät a-s täkkulām däx-s.

⁹ Täkarḍe ta hawän-in-əktäbäş, ti s-kāwän-tirəmäş i-ad-əlmədäş ak fāw tamaşalām a-wa hawän-janney meş.

¹⁰ Elmədät a-s ere s-tənşäm-däş, ənşex-as. Ere daş wa s-ənşeeş, kunta ill'-e ere hi-işşadän härät, ämiyatärän s-ad-has-änşäş, ilmədet a-s ənşex-as-in däş-təssəba-nāwän, ənşex-as daş däş-təssəba n-Älmasex.

¹¹ Afäl nətajj a-wen, wār sār-näş dd-mad-ijrəw Iblis taşləlt s-hanäş-ikkärräs ed tiddas-net, wār hanäş-ədrejnät.

Äzzāman wa ija Buləs däş-ayrəm wa n-Tärwas

¹² Äzzāman wa d-əjjäşäş ayrəm wa n-Tärwas i-ad-däş-s äxtəbäş Älənžil n-Älmasex, orä-hi däş-s Emäli emm hərəwän, issärşäs-ahi iji n-isālan däş-idäggan äjjootnen

¹³ māşan, hakd a-wen-däş, wār-insa ənniyät-in, fäl-a-s wār däş-s in-ogeşäş Titus-i n-əñña-näş däş-äddin, a-wen-däş a fäl fäläş ayətma däş-äddin wi t-əllänen dihen, okäyäş s-teje ta n-Masidunya.

Yisa Älmasex ihakk aşäl fäll-Iblis

¹⁴ Təmmal i-Mässinäş-i ihakkän aşäl fäll-Iblis, däş-äddimmät n-Älmasex-i dār-nosaş, ənta daş a hanäş-ikfän turhajät n-ad-nətajj isālan n-Älənžil i-äddinät däş-edägg iket-net, isālan a-wen s-aşäl-i-däş, jän abyänşəl wa täjjän aḍutän äzednen.

¹⁵ A-wen-däş a fäl näkkäneḍ-i ila Älmasex, nämoos i-Mässinäş şund aḍutän-win-däş äzednen ikna tärha, a-wen-däş daş a nämoos i-äddinät wi hānen tabarät ta n-əlxəllas hakd wi hānen tabarät ta n-əlhəllak

¹⁶ māşan äddinät wi hānen tabarät ta n-əlhəllak, aḍu wa hasän-nämoos, erk aḍu dd-itirəwän sār-sän tamättant, a-s ija a-wen, äddinät wi iyyäḍnen, nämoos-asän, aḍu äzedän dd-itirəwän sār-sän tämudre täşlalät.

Ässiistänäş-kāwän: mi s-əgdähän iman-net däş-älxidmät ogdähän d-a-wen-däş?

¹⁷ Näkkäneḍ, wār noleh d-äddinät wi iyyäḍnen jānen mäjräd n-Mässinäş mamāla s-əbbäşärän; Mässinäş a hanäş-ijän däş-a-wa hanäş-işlän iket-net, a-wa hanäş-issäşläf daş, nətajj'-e s-ənniyät şäddijän dat-Mässinäş däş-təssəba n-tassaşxt ta nəja d-Älmasex.

3

Tihusay n-ärkäwäl n-tassaşxt wa äynayän

¹ Edäwänne-wa s-iket hawän-t-jeş, ajän idəm äynayän a nətattär şur-wän? Äbo! Meş ajän näkkäneḍ, nämiyatär s-täkarḍe əktabän dägg-adəm tässiilmädät a-s inəmmuşal s-tidət a nämoos? Əllan-t äddinät ämiyatärnen s-a-wen i-ad-səlmədän a-wa ämoosän māşan, näkkäneḍ, wār däş-wän närha a-wen.

² Täkarḍe-nänäş, käwāneḍ-di-däş. Täkarḍe a-wa, təktabät däş-ulhawän-nänäş, əssanän sār-s dägg-adəm, şarrän-tät daş iket-däş-näsän.

³ Älmasex a iktäbän täkarḍe-ten-däş däş-ulhawän-nänäş, ij'-anäş näkkäneḍ imawayän-net i-ad-tät-näj däş-ifassän-nāwän māşan, täkarḍe-en, wädden adäloş a-s

təktab, änn-ak, Unfas n-Mässinäx-i n-Amäxlol a tät-iktäbän, wädden isəllam n-tihun a fäll-tät-iktäb, ulhawän n-dägg-adəm a dāx-tät-iktäb.

⁴ Nəkkas äššäk dāx-tärna n-Mässinäx ta hanāx-ikfa dāx-äddimmät n-Älmasex.

⁵ Wār nəhel wäla-dāx ad-nänn a-s, a-wa-dāx hanāx-išlän, išl'-anāx s-tärna dd-nəkkas dāx-iman-nänāx, änn-ak, Mässinäx a hanāx-ikfän turhajät n-tädabit n-iji-net,

⁶ ənta a hanāx-ikfän turhajät n-ad-numas inaxdimän n-ärkäwäl n-tassayt äynayän wärän äshätäl fäll-alämär wa n-Mosa änn-ak fäll-tärna n-Unfas Šäddijän:

Alämär, tamättant

Unfas, tämudre.

Älənžil a isidorän wädden alämär

⁷ Alämär wa s-janney dd-itiirəwän tamättant s-ägg-adəm, äzzäbbät-t-dd Mässinäx fäll-ännäbi Mosa, iktab fäll-isəllam n-tihun. Ija dāx-s Mässinäx älxurmät ijan tihusay s-indär wäla-dāx i-käl-Išrayil ad-dāx-s əjən wäla-dāx härät n-ässayät əndärrän n-akäyad fäl төssəba n-ännur-i äsmäxmäxän fäll-idəm n-ännäbi Mosa, uhən-dāx ännur-en, wār-əhoja äsimäxmäx fälla-s.

⁸ Kunta älxurmät n-ässayät-wen-dāx əndärrän, ija tihusay ogdähnen d-a-wen-dāx, äb' ätṭäma n-təmyäre n-tihusay ti ija ämašal wa dd-ässawäḍ Unfas n-Mässinäx-i s-ənta ad-ähaj.

⁹ Yas, kunta, alämär-wen-dāx, wärän sār-nāx dd-itiirəw ar tamättant, ila älxurmät ogdähän d-a-wen-dāx, äb' ätṭäma n-təmyäre n-älxurmät wa mad-äj alämär-i hanāx-itajjän äddinät lanen idəm dat-Mässinäx.

¹⁰ A-wen-dāx fäw a fäl älxurmät-wen-dāx dd-äzzarän, äba-hin älxurmät-net ed osä-dd-i t-iknan mijraw,

¹¹ fäl-a-s, kunta a-wa t-illän s-ilkam ad-t-iba, ila älxurmät ogdähän d-a-wen-dāx, äb' ätṭäma n-älxurmät wa mad-ikrəš a-wa s-ənta a iḡlalän.

¹² Ätṭäma ogdähän d-wen-dāx a fäll-näsifälla, a-wen-dāx a fäl ozja ənniyät-nänāx,

¹³ wār noleh d-ännäbi Mosa-i s-älwäqq wa d-fälla-s dd-äsmäxmäx ännur n-Mässinäx, äškänbäš-as i-ad-wār hənneyän käl-Išrayil a-s äsmäxmäx wa ija idəm-net, ifannäz-in s-a əndärrän a əndärrän.

¹⁴ Äşyärän käl-Išrayil ulhawän-näsän, a-wen-dāx a fäl har ašäl-i-dāx, ed ḡarrän əlkəttab wa n-ärkäwäl n-tassayt wa ärəwän, indar-asän afāham-net ed olāh-asän əlkəttab-en d-a hasän-ilsa härät, s-əmmək-wa-dāx s-äškänbäš ännäbi Mosa idəm-net i-ad-wār t-hənneyän äddinät. Ämära, a-wa ilsän tiṭṭawen n-äddinät hasän-igdälän ujhəh, wār t-illa ujhəh-net ar s-tartit d-Älmasex.

¹⁵ Ijmaḍ-t äššäk a-s har ašäl-i-dāx, kud-äḡrän əlkəttabän wi iktäb ännäbi Mosa-dāx, ad-tän-asən, wār hasän-len ujhəh ed, ilsa härät tiṭṭawen n-ulhawän-näsän,

¹⁶ mäšan äddinät wi əkfänen iman-näsän i-Emäli, äbas äşikänbäš härät i-idmawän-näsän.

¹⁷ Emäli, Unfas a ämoos, ere s-iha Unfas n-Emäli ulh-net, a-di, ijraw iman-net.

¹⁸ Näkkäneḍ daḡ-i s-ämära-dāx, äbas äşikänbäš härät i-idmawän-nänāx, ere dāx-nāx ikyädän dāx, ad-inhöy šund dāx-tiset älxurmät n-Emäli mäšan, ilkam ad-təmmuttəy talḡa-nänāx, äkf'-anāx Unfas n-Emäli älxurmät ojärän wa-dāx nəjrāw ämära-dāx.

4

Älxidmät wa iha Buləs ənta d-imidiwän-net

¹ Šämad Mässinäx, oḡän-anāx tāhanint-ta-dāx fäl ija ämašal ogdähän d-a-wa-dāx dāx-ifassän-nänāx, adiš, kuyədät-anāx,

² nəbqəwet d-a-wa əsikərakədən tamaşalən əddinət dəx-ufər, wər nətəttəret tikərras n-əwadəm, wər nəseməskil məjrəd n-Məssinəx, tidət xas a nəjanna i-əddinət dat-Məssinəx i-ad-əlmədən a-s a-wa hasən-nəjanna iket-net tidət.

³ Kunta dəx Ələnzil, əllan-t əddinət s-iffar əlməxna-net, a-di wi əkfənen iman-nəsən i-əlhəllak a-s əttunkäl,

⁴ əniməşrəyən i-Məssinəx, əsdəryəl-tən Iblis-i əminakälən fäll-əddunya-ta-dəx, igdäl-asən ahənay n-ənnur wa məqqārən əsməxməxən ihən isəlan n-Ələnzil-i hanəx-isalmanın s-əlxurmət n-ənnur wa ihən Əlmasex-i s-əwadəm wa t-inhəyən, inhəy Məssinəx.

⁵ Wədden isəlan n-iman-nənəx a nəxəttəb i-ad-hanəx-in-əjrəhən əddinət, isəlan n-Əlmasex a nəxəttəb. Dəx-təssəba-net ənta-en-dəx a fäl nəja iman-nənəx eklan-nəwən,

⁶ ed Məssinəx-i innən əşəl əzzarən:

«Əməlet ənnur i-ad-iba tihay»,

ənta-en-dəx, a dd-ijən ənnur wa s-əmərə-dəx, əsiməxməx dəx-ulhawən-nənəx i-ad-nudabət ahənay n-tihusay n-ənnur wa əsiməxməxən fäll-idəm n-Əlmasex.

Əlxizabət wa inhəy Buləs ənta d-imidiwən-net

⁷ Hərət-wen-dəx, ij'-anəx-t Məssinəx, məşən hakd a-wen-dəx ufa ad-nəssan nəkittəw a-s wər t-illa a nəmoos. Wər nəmoos xas ar şund hərət ilan əlqim itwarən dəx-iləkkan s-rəqqiis terəzze-nəsən i-ad-itbət a-s tərna ta n-Məssinəx, wədden ta n-iman-nənəx a-s nəxdam i-Məssinəx.

⁸ Əzbəbən-anəx əddinət siha d-siha məşən, wər nəlfəzzət, nəşşəwwəş məşən, wər nəkkəs əttəma;

⁹ əstəxəynən-anəx əddinət məşən, wər dəra-nəx iqqel Məssinəx, indər-asən ad-hanəx-ərməsən; təggatən-anəx s-əkall məşən, indər-asən ad-hanəx-in-səmdun, issəbdəd-anəx-dd Məssinəx.

¹⁰ Hak əssayət-dəx, ərhan-anəx əddinət təsəmmə n-taməttant şund ta ija Yisa məşən, intəş-anəx-dd Məssinəx dəx-sən i-ad-əlmədən a-s təmudre-ta-dəx ija Yisa, a nəja nəkkəned-dəx, şamad iddar, adiş, nəddar nəkkəned-dəx dəx-təssəba-net.

¹¹ Əşerəkken xas dəx-əddunya-ta-dəx taməttant-nənəx dəx-təssəba n-alkum-nənəx i-Yisa. Tidət, təbrar təxəssa-nənəx, məşən, nəddar; əmoos a-wen a əssiitbətən i-əddinət təmudre ta ija Yisa dəx-ulhawən-nənəx.

¹² Ərhan taməttant-nənəx dəx-təssəba n-əlxuṭbət wa nətəjj məşən, hakd a-wen-dəx, orəw-dd sār-wən a-wen-dəx hanəx-təjjən, təmudre təynayət.

¹³ Nəttaf xas ənniyət wa s-innə ənnəbi iyyən dəx-əlkəttab n-Məssinəx:

«Omanəx s-Məssinəx, a-wen-dəx a fäl

əmmijrədəx dəx-isəlan-net.»

Əməra, immun şund-wen-dəx a nəttaf nəkkəned-dəx, nomən xas, ad-nəxəttəb isəlan-net.

¹⁴ Nəkkəs əşşək a-s Məssinəx-i dd-issənkərən Eməli Yisa jer-inəmmuttan, ilkam ad-hanəx-dd-isənkər jere-sən, isəbdəd-anəx nəkkəned hakd kəwəned edes-has dat-Məssinəx.

¹⁵ A-wa hanəx-işlən iket-net, kəwəned a he-infəw i-ad-imxar ənnuxmət n-Məssinəx, iwwaqən-dd fälla-wən əddinət əjjootnen, ijatən wi tiimələn Məssinəx.

A-wa t-illən ad-t-iba, işrəy-t-dd a-wa ixlälən

¹⁶ A-wen-dəx a fäl, kuyədət-anəx ed nəssan a-s kud-dəx əşəl-i-dəx, tikməmməd təxəssa-nənəx s-a əndərrən a əndərrən, hak əşəl-dəx itiwwaq-dd, a əynayən fäll-tiyənəy n-ulhawən-nənəx.

¹⁷ Hārät n-aḡāna wa nəhannāy āmāra-dāḡ, tazidert, ilkam ad-t-iba, išrøy-t-dd älxurmät iḡlalän, äsinäflāyän wārän il' asuḡel.

¹⁸ Wār-inābbājet a-wa inabbājän tiṭṭawen n-dāgg-adəm tiṭṭawen-nānāḡ, änn-ak, nāknet akāyad dāḡ-a-wa wārän ila mänhoy t-illän ḡur-Mässināḡ fäl-a-s, a-wa ilän mänhoy, ad-t-iba, a-s ija a-wen, a-wa t-wārän ila t-illan ḡur-Mässināḡ, iḡlal hārük.

5

Isālan n-tāmudre ta täynayät d-tayəssa ta täynayät təlkmät

¹ Ämāra, nəssan a-s tayəssa-ta-dāḡ nəha tolähät ḡas d-ehäket, ilkam ad-tumas šund ebāršāj māšan, nəssan a-s ašäl wa n-sämdo n-hārät iket-net, a-s e-āj, äsimājnät-anāḡ-dd Mässināḡ ehäket äynayän dāḡ-išənnawän. Wen ənta, wädden a əknan ifassän n-ägg-adəm, Mässināḡ iman-net a t-dd-iknän, iḡlal dāḡ.

² Ämāra, noḡar dāḡ-ehäket-wa-dāḡ, nāsிடārhan ad-nəddək ḡur-Mässināḡ i-ad-nəjjəš ehäket wa n-tiḡəswen ti äynaynen,

³ s-afäl ašäl wa tänät-nəjjäš, ad-ābas nəzzaf.

⁴ A nəkka nəzzaḡ dāḡ-tayəssa-ta-dāḡ, ad-noḡar, nāsnin hak ašäl māšan, wädden arurəd a nəja ad-hanāḡ-ikkəs Mässināḡ dāḡ-äddunya-ta-dāḡ, änn-ak a nārha, ad-fälla-nāḡ-in-ikkəs tayəssa ta tärəwät s-hak ašäl tamättat, äj ta täḡlälät dāḡ-edägg-net.

⁵ Mässināḡ iman-net a hanāḡ-dd-ixlākän i-a-wen, ənta-i hanāḡ-ikfän Unfas-net i-ad-umas tasətbət d-äddimmana n-ärkäwäl wa hanāḡ-ijjāš.

⁶ Äsikayäd-anāḡ a-wen-dāḡ hak ašäl ed, nəssan a-s a nəkka nəha tayəssa-ta-dāḡ, ad-nujəj Emäli.

⁷ Tidət, wär t-nəhənnəy s-tiṭṭawen-nānāḡ ämāra-dāḡ māšan, nākkäned immun wädden a-wa hannāynät tiṭṭawen-nānāḡ a fäl nāsifälla.

⁸ Nəflas hullan a-wa s-nomän māšan, nāssoof ad-nāhan, nəzjār tayəssa-ta-dāḡ, nəddək edes i-Emäli.

⁹ A-wen-dāḡ a fäl jer-näqqima dāḡ-tayəssa-ta-dāḡ wāla nəzjar-tät, nəjrəzet i-Emäli dāḡ-hārät iket-net,

¹⁰ fäl-a-s ähhuuššäl, ad-dd-nəbdəd iket dāḡ-nānāḡ dāḡ-edägg n-äššərəḡa wa n-Älmasex i-ad-hanāḡ-išrāḡ. Dihen, hak äwadəm d-a-wa has-jän imojjan-net. Wa ämešälän a-wa olāḡän, ad-ijrəw marušät-net, wa s-a-wa läbasän dāḡ ḡas a ämešäl, ad-ijrəw älhäk-net.

Älmasex a-s əssəbab n-tanməzalt jer-Mässināḡ d-dägg-adəm

¹¹ Šāmad nəssan a-wa s-itawānna tuksəḡa n-Emäli, nətattār dāḡ ad-təjjəš tuksəḡa-ten-dāḡ ulhawän n-dägg-adəm, Mässināḡ, wär has-tədrej talḡa-nānāḡ, norda dāḡ a-s käwäned, dāḡ-ulhawän-nāwän, təssanäm fälla-nāḡ.

¹² A-wa hawän-nəjanna, wär hawän-t-nəjənn fäl-a-s innin nārha ad-hanāḡ-in-təjrähäm, änn-ak, nəjann'-awän-t i-ad-tudabem abāraj dāḡ-təssəba n-a-wa nāxdäm jere-wän, dihen, ad-təlmədäm a-wa mad-tənnəm i-wi tabārajnen dat-äddinät, a-s ija a-wen, wär šäddijän ulhawän-nāsän.

¹³ Kunta iyyäd ija ḡur-sän a-s iba n-tayətə a hanāḡ-irmasän, wär-iḡšed hārät a-wen ed älxidmät n-Mässināḡ wa nəha, a hasän-ijrəwän tənna n-a-wen; kunta dāḡ, jän-anāḡ äddinät əssannen a-wa hän, a-wen, tänfo-nāwän.

¹⁴ Älxidmät wa nəha, təntaj-anāḡ sār-s tārha ta mäqqārät hanāḡ-ija Älmasex, a-wen-dāḡ a fäl nədgaz. Nəkkas äššäk a-s ənta-i n-iyän, ämmut dāḡ-təssəba-nāwän, ämoos a-wen-dāḡ a-s šund iket-dāḡ-nānāḡ a ämmutnen dāḡ-a-wa ämoosän amišəl n-erk hārätän wi nətamašal ibda.

¹⁵ Däx-təssəba-nänäx iket-nänäx a fäl ämmut i-ad-umas a-s äddinät wi ikfa tämudre ta täynayät, ad-äbas ärjašan däx-derhan n-iman-näsän, änn-ak, ärjašan s-a-wa fälla-sän irha Älmasex-i ämmun, inkär-dd jer-inəmmuttan.

Tämudre ta täynayät ihäkk Älmasex

¹⁶ Aşäl-i, äbas nədkađ äwadəm wäl' iyyän s-a-wa s-t-ədkäđän dägg-adəm. Ibda a-wen-däx a-s nədkađ Älmasex iman-net mäšan ämära, wädden tayette-ten-däx a-s nəgla.

¹⁷ E-d osäx äwadəm d-Älmasex-däx, ämoos äwadəm äynayän, a-wa n-ibda ibbədäy; ənhəywät-t, härät iket-net, äynay-dd sär-s.

¹⁸ A-wen, Mässinäx-i hanäx-äzmäzälän d-iman-net s-Älmasex a t-ijän, ijä day aşäl-i-däx ämaşal-wen-däx n-azəmmäzəl n-dägg-adəm d-Mässinäx däx-ifassän-nänäx.

¹⁹ Däx-təssəba n-tärna n-Älmasex-en-däx, ad-ija Mässinäx tanməzalt dār-s d-äddinät iket-däx-näsän, ənta a ijjäšan ärkəwäl wa n-ad-äbas hasän-e-iyyəf udlem-näsän, ij'-anäx näkkəneđ-däx inəmmejrədän äwwikkälnen tanməzalt-net.

Ämaşal wa n-azəmmäzəl n-dägg-adəm d-Mässinäx

²⁰ Ämära, näkkəneđ a-s älzəmaşät n-imawayän n-isälan n-älxer n-Älmasex şund ɣas a-s Mässinäx iman-net a itamäjrädän i-dägg-adəm däx-təssəba-nänäx; a-wen-däx a fäl däx-wän nətattär, nəj'-awän isəm wa n-Älmasex, ehäff, mäzälät d-Mässinäx iket-di.

²¹ Ƴisa-i s-wär käla ofa abäkkəđ, ij'-e Mässinäx däx-edägg n-inäsbäkkəđän i-ad-nasäx dār-s, nəkrəş idəm dat-Mässinäx.

6

Aşäl-i-däx a-s aşäl wa n-tätubt

¹ Näkkəneđ, Mässinäx a dār-nännixdäm, a-wen-däx a fäl käwän-näsımätär d-ad-wär hin-täsbätäläm ännuymät n-Mässinäx-wa käwän-ikfa

² ed Mässinäx iman-net innä:

«Esley i-tittar-nəwän,
aşäl wa əssəbdädäx i-ad-kəwän-äxləsäx osä-dd ɣas,
ogəzäx-kəwän.»

Ämära, aşäl-en n-əlyəllas issəbdäd Mässinäx, osä-dd, ənta-da-däx nəha aşäl-i-däx.

³ Näkkəneđ, wär t-illa a nətəjj i-ad-nəkkəs äwadəm däx-tuksəda n-Mässinäx, i-ad-wär-ijərrəw äwadəm a läbasän innä däx-ämaşal wa nəha.

⁴ A-wa nətəjj iket-net, nətəjj'-e i-ad-itbət dat-äddinät, a-s inaxdimän dd-äşimaşäl Mässinäx a nämoos. A ijän-däx, nəbdad fäll-iman-nänäx, wär t-illa aɣəna s-wädden nəhannäy-t jer-älxizabät, wäla tissust, wäla tirəmmax mäšan, nəşbar däx-a-wen-däx iket-net.

⁵ Əjjäşnät-anäx tiwit, nəjjäş tikärmuten, ożayän-anäx äddinät, ehäđ d-aşäl nəlluyyäx ed nəşɣal, dehiyyän fəw wär nəjərrəw s-eđəs, nətəjj išilan wär t-illa a nəksə.

⁶ Məšan, şəddij tämudre-nänäx, tämudre n-äddinät əzzaynen Mässinäx. Hanäx-tazidert, noolaɣ, idhal-anäx Unfas Şəddijän, nərha äddinät s-ulh imdan.

⁷ Nəxaṭṭab məjräd n-Mässinäx s-tidət-net d-tärna-net, iqqud a-s härät däx-imutaj wi s-nəkannäs d-işənja-nänäx, ənta a nəja təkoba hakd aɣər.

⁸ Däx-a-wa nəha, ässiimɣərän-anäx iyyäđ, əlkähän-anäx iyyäđ; təmmälän-anäx iyyäđ, gaggərän-anäx iyyäđ; jan-anäx iyyäđ inəsbuha, a-s ija a-wen, wär t-illa a dd-izajjərän imawän-nänäx səl tidət;

⁹ Jan-anäx iyyäd äddinät wären ätwässän, a-s ija a-wen, nəkna atwəzzi; ija xur-
iyyäd a-s nässijja-hin fäw māšan, wär nämmut härwa, äxtasän-anäx tamättant
māšan, nəddar härwa.

¹⁰ Jan-anäx iyyäd iməskay māšan, härkuk naddiwät; jan-anäx iyyäd tiläqqiwen
māšan, nətirəw-dd ärrəzäx s-äddinät äjjootnen; jan-anäx iyyäd äddinät s-wär t-illa
a lan uhən-däx, wär t-illa a hin-noḡan.

Ulhawän olwanen

¹¹ Ayətma-x wi n-käl-Kurənta, wär t-ih' äššäk a-s nor'-awän imawän-nänäx i-tidət,
nor'-awän daḡ ulhawän-nänäx, wär t-illa fäw a hawän-nəffar;

¹² änn-ak, ulhawän-wi-di-däx-näwän a hanäx-wären-olwa, ənnär wädden a-wen,
olwan-awän wi-nänäx hullan hullan.

¹³ Šämad ilyadän-in a tämoosäm, äyyät-ahi ad-hawän-äjäx mäjräd wa he-äj abba
i-aratän-net: äjät-anäx a-wa hawän-nəja, arät-anäx ulhawän-näwän s-əmmək wa
s-hawän-nora wi-nänäx.

Ännur d-tihay ya, wär t-illa a osaxän

¹⁴ Wär toseḡäm iman-näwän d-äddinät wi wären oher härät d-Emäli. Ma ohar
a-wa oläḡän d-a-wa läbasän, meḡ ma ohar ännur d-tihay?

¹⁵ Ma tämoos tassaxt ta t-töllät jer-Älmasex d-Iblis meḡ jer-amumən d-änäzzalim?

¹⁶ Ma ohar ehän wa šäddijän n-Mässinäx d-äššanämän. Elmədät a-s näkkäneḡ a-s
ehän n-ämudd wa šäddijän n-Mässinäx. Mässinäx-i iddarän innä:

«Ad-əzzäḡäx jere-sän,
ədhələx-tän e-s əkkän-däx,
umasäx-asän Mässinäx, umasän əntäneḡ tamətte-nin.»

¹⁷ A-wen-däx a fäl innä Emäli:

«Ezjärät-dd jer-inəzzulam,
əbḡəwät iman-näwän dār-sän,
wär ḡesäm a ämμιḡäsän.

Afäl jäm a-wa fälla-wän ärheḡ,
ad-käwän-dd-äjäx s-iman-in,
səbbələḡ-käwän,

¹⁸ umasäx-awän Abba,
tumasäm məddana-x d-ešše-x.

Näkk-i n-Emäli-i ilän tärna a innän a-wen.»

7

¹ Ənhəywät ḡas ayətma-x wi əkney tärha, šämad näkkäneḡ a-s ija Mässinäx
ärkäwälän-win-däx, adiš, nəbḡəwet d-asəmməḡəs n-tiḡəswen-nänäx d-ənniyätän-
nänäx, nišdajet, tännähəḡet däx-näx tuksəḡa n-Mässinäx.

A-wa dd-oräwän tedäwit ta ija Buləs

² Ayətma, arät-anäx ulhawän-näwän, äjät-anäx edägg. Wär t-illa ere naddiḡwät,
wäl' ere nässok' äkall, wäl' ere näkkirräs i-ad-näks ehäre-net.

³ A-wa hawän-janneḡ, wär teḡalät janney-awän-t i-ad-käwän-səḡləmäx, ham
ulhawän-nänäx, nəj'-awän tärha-ta-däx s-wär hanäx-e-ibḡəw a säl tamättant.

⁴ Əjrawäx s-mäjräd däx-isälan-näwän, ämoos-ahi daḡ abäraj ad-fälla-wän
äbbäräjäx, əssənsän isälan wi fälla-wän əsleḡ ənniyät-in har jeḡ tedäwit-ta-däx hin-
tästəwät wäla däx-tersəmmawen ti nənhäy.

⁵ A hin-näwwäḡ teje ta n-Masidunya-däx har ašäl-i-däx, wär käla nəja härät n-
ässaḡät n-täsonfat. Iwwäḡwäx-anäx älyizabät siha d-siha, əknäsän-anäx äddinät,
närmäḡ fäll-iman-nänäx hakd-däx fäll-tiḡəswen-nänäx,

⁶ māšan issəsməḍ Mässināḡ-i n-enəssesməḍ n-talḡiwen ulhawān-nānāḡ, ed nəha a-wen-dāḡ, a-s hanāḡ-dd-osa Titus.

⁷ Āsdāwāt-anāḡ ass-net, āsdāwen-anāḡ daḡ isālan-nāwān wi dāḡ-nāḡ ija. Illāḡāt əmmək wa s-t-tāsbälälām, ija dāḡ-nāḡ isālan n-awnaf wa hanāḡ-jām, illāḡāt-anāḡ daḡ tisanant ta jām dāḡ isālan n-a-wa ijān; iglā har hanāḡ-innā a-s ašrut wa-nin a tārmāsām dāḡ-isālan-win-dāḡ har āmāra, nākk a fäll-təknašām d-išənja-nin. Ēsley i-isālan-en-dāḡ ḡas, āssakāyāḡ dāḡ-tedāwit.

⁸ Ēssanāḡ a-s ikm'-iwān a-wa s-kāla hawān-t-in-əktābāḡ māšan, wār t-āmmujrāzāḡ, kud-dāḡ āmmujrāzāḡ-t, hannāyāḡ a-s wār tāhoja tisanant-nāwān.

⁹ Āmāra, āddiweḡ dāḡ-isālan-nāwān māšan, wādden tisanant ta kāwān-tārmāsāt a hi-tāsidāwet, ānn-ak, tātubt ta jām s-Mässināḡ sār-wān-dd-orāw mājrād wa hawān-in-jeḡ a hi-āsīdāwen.

¹⁰ Tisanant ta s-Mässināḡ a tāt-dd-orāwān sār-nāḡ, wār la imujraz ed tiirəw-dd sār-nāḡ tābəḍḍawt d-a-wa lābasān nətamašal, nāḡləs, a-s ija a-wen, tisanant ta s-āddunya a sār-nāḡ-tāt-dd-orāwān, ten, ušreyān-net, əlhəllak ḡas.

¹¹ Tidət, ikm'-iwān a-wa hawān-əneḡ māšan, āmoos a-wa sār-wān dd-orāw a ihan erhet n-Mässināḡ. Ēnhəywāt kāwāneḍ iman-nāwān ālxal wa āhusken tārmāsām āmāra, təššākām iman-nāwān, tākrakāḍām, tārmāḡām, tāsdārhanām ad-hi-taləsām ahānay, tārdām iket-nāwān dāḡ-armuḍ a-s āwadəm wa āmešālān təluše-ten-dāḡ jere-wān, inmənəhəyet d-imojjan-net; ənta-den-dāḡ a-wa issətbātān a-s ənta a iwar uḍlem, wādden kāwāneḍ.

¹² Ārheḡ ad-təssanām a-s tākarḍe ta iyyāḍāt hawān-in-əktābāḡ, wār tāt-in-əkṭebāḡ dāḡ-təssəba n-āwadəm wa ānmāšrāyān wāla wa ittəḍlāmān, ānn-ak, əktābāḡ-awān-tāt-in dāḡ-təssəba n-əddəḡuzāt wa jām fälla-nāḡ s-Mässināḡ a-s əssəḡab-net.

¹³ Āmāra-dāḡ, issəsməḍ a-wa jām ulhawān-nānāḡ, təssewāḍ daḡ tedāwit ta ija Titus fäll-ta-nānāḡ, ikkās-anāḡ dāḡ-tāqqān n-eḡāf dāḡ-isālan-nāwān,

¹⁴ əbbārājāḡ data-s dāḡ-isālan-nāwān, ənhāyāḡ a-s a-wa āhusken has-əneḡ fälla-wān, wār t-āmmujrāzāḡ ed wār-ābbuggāt. Tidət d-tārha ḡas a kāwān-nəssəkna, nosa daḡ a-s a-wa nənna i-Titus dāḡ-isālan-nāwān, tidət.

¹⁵ Ašāl-i, e-d dd-iktā asəbbələl wa t-jām a-s kāwān-in-osa d-əjjəluyāt d-semḡar wa jām dāḡ-amišəl n-a-wa hawān-nəjanā, ad-kāwān-itiməl s-tārha.

¹⁶ Tedāwit-ten-dāḡ ija, a jeḡ nākk-dāḡ, ed əssanāḡ a-s āddoobeḡ ad-fälla-wān səffəllāḡ, əfləsāḡ-kāwān dāḡ-hārāt iket-net.

8

Isālan n-tirjit i-imumənān wi n-teje ta n-Masidunya

¹ Ayətma-ḡ, nārha ad-hawān-nāj isālan n-ānnuḡmāt wa ikfa Mässināḡ ālkānisāten ti hānen teje ta n-Masidunya.

² Wār t-illa āḡizabāt s-wādden ənhāyān-t māšan, wār-ifneḡ a-wen təmḡäre n-tedāwit-nāsān, lāqqəwān māšan wār-āšḡārān ifassān-nāsān i-imumənān wi wāren əṭṭef hārāt.

³ Ājjəyhāḡ a-s jān a-wa āddooben, ānn-ak, jān fāw a okāyān a-wa āddooben, āmoos a-wen a tān-dd-ifalān, wādden a-s tān-āšihāššāl āwadəm.

⁴ Ēntāneḍ iman-nāsān a dd-ifāl ənniyāt-wen-dāḡ, tilāqqad fāw a hanāḡ-jān fäll-tārha-i-dāḡ jān n-ad-ədhəlān iməššeddəjān-wi hānen Yārussālam.

⁵ Tanəmmirt-nāsān, jān a okāyān a-wa tān-norda. Emāli a əkfān iman-nāsān, əkfān-anāḡ daḡ iman-nāsān dāḡ-erhet n-Mässināḡ.

⁶ Isālan n-a-wen-dāḡ jām a fāl nāsmātār Titus i-ad-kāwān-in-iqqəl, isəmdəw a-wa issənta jere-wān, awəy-dd tirjit ta s-tābokām i-imumənān.

⁷ Tidət-däx a-s wär t-illa a-s wädden äsnäfläy-käwän Mässinäx däx-s, jer-immun wäla musnät wa n-tayette wäla musnät n-mäjräd, wäla äddägažät däx-iji n-isälan-net wäla tärha təmdat. A-wen-däx a fäl isälan-wi-däx n-tirjit i-imumənän, əjləyät däx-sän hullan.

⁸ A-wa dār-käwän-äsimätäräx, wär-ärheç ad-hawän-umas tähaššilt. Isälan ças n-armuđ wa s-əkfänät älkänisäten ti iyyäđnen a däx-wän tajjäx i-ad-təjləyäm käwäneđ-däx, sətbətäm tärha ta jəm i-ayətma-wän wi iyyäđnen.

Älmital wa hanäx-dd-oyyä Älmaseç

⁹ Təssanäm iman-näwän təmçäre n-ännuçmät wa käwän-ikfä Emäli-nänäx Çisa Älmaseç däx-təssəba-näwän, ənta-i n-amärrəzäx, äsläqqäw iman-net i-ad-tärzäçäm käwäneđ, däx-əlläqqu-net.

¹⁰ Äddäbara-nin hawän da: səmdəwät-in a-wa ähusken təssəntäm; ənhađ, käwäneđ a äzzarnen s-ajäräw n-ənniyät-wa-däx, käwäneđ daç a äzzarnen s-iji-net.

¹¹ A-wen-däx a fäl ärheç a-s a-wa däx-təssəntäm äddägažät, sämdät-t-in s-tädabit-näwän.

¹² Ere ikfän härät i-Mässinäx s-ulh imdan, ikf'-e s-ənniyät n-a-wa ila wädden a wär-ila, ad-ijräz älxal-net i-Mässinäx, Mässinäx daç, wär däx-näx-e ittär a wär nəla, wäla a wär näddobät.

¹³ Wär hawän-jənnəç, käykäyät-dd a-wa təttaşfäm i-ad-səyyəwənäm äddinät iyyäđ, fäw, änn-ak, a tattäräx ad-tagdähäm iket-däx-näwän däx-a-wa läm.

¹⁴ Tidət, ašäl-i, käwäneđ, äsnäfläy-käwän Mässinäx, a-wen-däx a fäl däx-wän tattäräx ad-tədhäläm ayətma-wän wi tärmas tämäçatert ed äddobät a-s ašəkka, ad-təbrəjwəl talça, umas a-s win-däx tədhäläm ašäl-i-däx, a he-isənnəfləy Mässinäx, a-s ija a-wen, käwäneđ, tärmas-käwän tämäçatert. Dihen, əntäneđ a iwar ad-käwän-ədhälän.

¹⁵ Ənta-den-däx migdähaw wa s-hawän-jänneç däx-hanäx-ässewäl əlkəttab n-Mässinäx a-s innä:

«Wa dd-äjlaben a äjjen, wär-ässakäy,
wa s-a-əndärrän daç a dd-äjlabät,
wär fälla-s in-äba härät.»

Asikəl n-Titus d-imidiwän-net s-açrəm wa n-Kurənta

¹⁶ Näm moy i-Mässinäx ed issəjläy Titus däx-isälan-näwän s-əmmək wa s-däx-sän-əjləyäç näkk iman-in.

¹⁷ Titus iman-net a irđän s-ad-käwän-in-äkk, nəttär däx-s daç ad-käwän-in-äkk šik, ija daç fäll-a-wen.

¹⁸ Däx-isälan n-asikəl wa sār-wän-in-ija, näsidäw-t-in d-änçan-näx iyyän däx-äddin s-wär t-illa älkänisät s-wädden tajäyha fäll-tihusay n-älxidmät-wa t-išlän däx-efes n-Älənžil.

¹⁹ Wädden däx-təssəba n-a-wen-däx ças a fäl sār-wän-t-in-näsidäw d-Titus, ənta-en-däx daç a äsnäfrännät älkänisäten i-ad-isärtəy tirjiten iket-di d-tuzannät. Älxidmät-wen-däx, nəh'-e i-ad-itwəsəmyär isəm n-Emäli, nəsbətət tärha n-tadhəlt ta s-närha ad-tät-näj i-ayətma-näx.

²⁰ Däx-isälan n-tasəsiwit-ta-däx, açrəf äjjeen a-wa, a-wen-däx a fäl wär närha ad-hanäx-iššək äwadəm däx-isälan n-əmmək wa s-t-nəttäç hundäx har ašäl wa d-e-ijjəš ifassän n-məssaw-s

²¹ ed, närha amišəl n-a-wa oläçän dat-Emäli hakd-däx dägg-adəm.

²² Meddən-wi hin-näšmašäl sār-wän, näsidäw-tän-in daç d-änçan-näx iyyän nəkna azəjjəzz, nənhäy a-s äwadəm irhan tadhəlt n-äddinät wi iyyäđnen, a-wen-däx a fäl t-noyya, ikk'-iwän-in. Ijläy hullan däx-derhan n-ad-käwän-in-äkk, ikn'-iwän daç tafləst, ijlay hullan däx-derhan n-amišəl n-erhet n-Mässinäx.

²³ Ämära, taḡalift-nāwän Titus wa n-amidi-nin dār-oharəḡ älxidmät, taḡalift-nāwän meddөн wi iyyäḡnen dār-nänniixdäm dār-s äddewnen. Iket-nänəḡ käwäneḡ-di-dəḡ a-s näxdam. Meddөн wi n-əssin dār-äddew Titus, älkänisät a tän-in-täšimašälät i-ad-äxdəmän jere-wän, səmḡärän isəm n-Älmasex.

²⁴ Säknät-tän tärha təmdat i-ad-umas a-wen tajuhe i-älkänisäten-ti tän-dd-äšmašälnen, əlmədnät a-s wär-äbbuggät abəraj wa fälla-wän nətajj.

9

Tadhəlt n-imumənän wi n-Älyähudəyät

¹ Dəḡ-isälan n-tadhəlt ta təkät iməššeddəjän wi hənən teje ta n-Älyähudəyät, əjrähəḡ-in a-s wär-ämḡatärəḡ ad-hawän-siwələḡ dəḡ-isälan-net,

² ed diha t-təlläm, təjlayäm hullan dəḡ-a-wen. Iwwäy-dd sār-i fäw a-wen ad-käwän-amələḡ dat-imumənän wi əzzəḡnen teje ta n-Masidunya; ənnəḡ-asän a-s: imumənän-wi hənən teje ta n-Akaya, wa-dəḡ n-ənhaḡ jan əmmək i-ad-ədhələn imumənän wi əzzəḡnen Älyähudəyät. Hannäyäm ämära a-s əjjəluyät-nāwän, oräw-dd derhan s-äddinät äjjootnen n-ad-arəjän əntäneḡ-dəḡ.

³ A-wen, wär hin-ikkəs a-s ämära, äšimašäləḡ-in sār-wän härät dəḡ-ayətma-nəḡ iyyäḡ dəḡ-äddin i-ad-wär-itəbəggut a-wa fälla-wän ənnəḡ. A-s käwän-in-tisən, əjrəwnet-käwän təknam dəḡ-asdu i-ad-titbat təmmal ta käwän-jəḡ dəḡ-isälan n-azrəf-wa-dəḡ.

⁴ Äksuudəḡ a-s afäl käwän-in-əkkeḡ, näkk d-härät dəḡ-imumənän wi n-Masidunya, har käwän-in-nosa wär täsdäwäm, ad-hi-umas a-wen täkrakiḡt, umas-awän-tät käwäneḡ-dəḡ ḡarät təmmal ta käwän-jəḡ hasän.

⁵ Təssəba n-ad-wär ija a-wen-dəḡ a fäl hi-dd-ijjäs ənniyät n-ad-əttärəḡ dəḡ-ayətma-win-dəḡ n-käräḡ, ad-hi sār-wän-in-izarän, sədəwən tirjit ta s-jäm ärkäwäl-net i-ad-təmdəw talḡa-ten-dəḡ iket-di d-käwän-in-tisəḡ. A-wen a madän-isətəbət a-s a-wa jäm, wädden äwadəm a käwän-äšhäššälän sār-s, änn-ak, ämoos a jam d-iman-nāwän dəḡ-tedäwit.

Äfuss wa ihakkän, wär has-e-iba a ikfä

⁶ Əlmədät a-s äwadəm wa äddomen a əndärrän, wär-e aləy a äjjeen, mäšan, wa äddomen a äjjen, ad-aləy a äjjeen.

⁷ Hak äwadəm, äkfət a-wa issəbdäd dəḡ-ulh-net, wär-itumaset a-wa ihakk a dəḡ-äzikänzär, wäla a t-ähhuuššälän ed Mässinäḡ, äwadəm ḡas wa ihakkän s-ulh äsriiwän a has-ijrazän.

⁸ Mässinäḡ a äddoben ad-käwän-äkf a ojarän a-wa s-tämiḡatäräm, isənnəfləy-käwän i-ad-tudabem käwäneḡ-dəḡ ad-tədhələm äddinät wi iyyäḡnen, təjrəwäm imärkedän,

⁹ s-əmmək wa s-tän-innä əlkəttab n-Mässinäḡ a-s innä:

«Äfuss n-emässärho wa izzäyän ihuk, wär käla has-äba a ikfa, imärkedän-net äḡlalän.»

¹⁰ Mässinäḡ a ihakkän idommän i-anäsdamu, isajat fälla-s isudar, ənta dəḡ a he-isənnäḡfəsän ajärəw-nāwän i-ad-tudabem amišəl n-imärkedän.

¹¹ Mässinäḡ a äddoben asəbbələl-nāwän dəḡ-a-wa itḡäf ähusken i-ad-ämerän ifassän-nāwän i-äddinät. Dəḡ-a-wen-dəḡ a-s afäl hin-nässawäḡ azrəf-wa-dəḡ n-tadhəlt məssaw-s, ad-amələn äddinät äjjootnen Mässinäḡ dəḡ-təssəba n-tadhəlt ta käwän-dd-fälät.

¹² Ijmaḡ-t äššäk a-s azrəf n-tadhəlt wa mad-təkfəm, ad-ikkəs iməššeddəjän äjjootnen dəḡ-timḡutar-näsän, arəw-dd a-wen-dəḡ dəḡ s-ad-amələn äddinät äjjootnen Mässinäḡ.

¹³ Tihusay n-a-wen-däx jām a he-isətbətān tārəddawt ta jām s-Älənžil n-Älmasex d-amışəl wa täjjām i-erhet n-Mässināx. Afäl jām a-wen har t-ənhäyān äddinät, ad-aməlān Mässināx, umayān-as däx-tössəba n-tadhəlt ta jām i-imumənān d-äddinät wi iyyädnen ed wār hasān-täsyārām ifassān-nāwān.

¹⁴ Əntāneḍ day ämära, däx-tössəba n-təmyäre n-ännuymät wa käwān-issəknä Mässināx, təddalān-awān Mässināx i-ad-kāwān-səlmədān s-tārha ta käwān-jān.

¹⁵ Ämära ayətma, naməlet Mässināx fäl tihusay n-isuf wi hanāx-ija wāren la milhaw.

10

Mäjräd wa ija Buləs i-ad-isəddəttət tənnəmuşəla-net

¹ Ayətma-x, näkk Buləs, ənnān däx-wān iyyäḍ e-d t-əlley xur-wān, ad-sərəsəy iman-in; e-d käwān-ujəjäx, ad-əhhuləsəy. Ämära, härät iyyān a däx-wān ärheyx däx-idəm n-təzude d-milxaw-i ija Älmasex:

² wār hi-täshäššälām ad-kāwān-in-äkkäx səlmədäx-kāwān a-s həläx. Äddinät wi ordanen a-s a-wa hanāx-išlān, a dd-nəkkas xas däx-iyäfawān-nānāx, əlmədnet a-s afäl-tān-in-oseyx, wār tān-e-äyyäx s-äkall, ad-tān-səlmədäx a-wa ämoosəy.

³ Tidət a-s dāgg-adəm xas a nāmoos māšan, itbat a-s anmänyx wa nəha, wār t-nəha s-imutaj dd-təkna tayətte n-əgg-adəm,

⁴ ed təzoli ta s-nəknäs, wādden a dd-ikna ägg-adəm, Mässināx a hanāx-tāt-dd-iknān i-ad-nəknəs s-əşşahät wa-net, nudabät teräzze n-iyallan wi əşşohätnen idäy Iblis,

⁵ nəсібəggut əttəkəbru wa sabdadān dāgg-adəm i-ad-əgdəlān i-äddinät muzəyät n-Mässināx. Nətattār ad-ännähäḍ Mässināx däx-ənniyät n-hak ägg-adəm i-ad-ämaşäl erhet n-Älmasex.

⁶ Afäl itbät a-s käwāneḍ, təmdam-dd däx-amışəl n-a-wen-däx, ijmaḍ-t äşşäk a-s äddinät wi wāren təmişil a-wen, ad-ənmənhəyān d-iman-nāsān.

⁷ Səjrähät däx-tidət, wār təkkelām əwadəm wäl' iyyān s-a-wa fälla-s hannäyām, kunta ih'-iwān ere iflasān s-təla ta t-ija Älmasex, adiš, ilmədət xur-iman-net a-s, əmmək wa s-t-ila Älmasex, a-s hanāx-ila näkkäneḍ-däx

⁸ ed älxikmät wa hanāx-ikfä Emäli, ikf'-anāx-t i-ad-nəşşuhət, wādden i-ad-nəhəl ider, a-wen-däx a fäl a-wa fäl tabərəjāx, wār hi-ämoos təkrakiḍt ed Emäli, a dd-ifal.

⁹ Wār teyalät a-s däx-tikarḍiwen-in, wār təttārāx xas ar asərmaḡ-nāwān;

¹⁰ əsley a-s ənnān iyyäḍ däx-wān: wa Buləs, tikarḍiwen-net xas a däx-ihäl, isimäqqəw fälla-nāx māšan, e-d t-illa jere-nāx, ad-t-izjār aḍu, iqqəl äkall.

¹¹ Äddinät wi jännänen a-wen, əlmədnet a-s afäl tān-in-nosa, ad-tān-nəsəlməd a-s a-wa-däx nəkattāb däx-tikarḍiwen-nānāx e-d t-nəlla xur-wān, ənta day a nətamaşäl jere-wān.

¹² Äddinät-en jānen iman-nāsān härät, ijmaḍ-t äşşäk a-s wār nətəttār ad-nədkəl wāla ad-nəsənnəfäqq iman-nānāx dār-sān, ämoosān äddinät wār-işla ar utār n-asəgdah n-iman-nāsān jer-iman-nāsān, irmas-tān iba n-tayətte.

¹³ Näkkäneḍ, wār nəḍəkkəl iman-nānāx s-əmmək-wen-däx, wār nətəjj a sāl a-wa s-hanāx-ikfa Mässināx turhajät n-iji-net, ənta day a hanāx-ijrāwān s-ad-kāwān-in-näkk.

¹⁴ Aşäl day wa d-kāwān-in-nosa nāwway-awān Älənžil, wār nəja jere-wān a-s wādden Mässināx a hanāx-ikfān turhajät-net. Təssanām day a-s näkkäneḍ a sār-wān-in-əzzarān i-ad-hawān-nāj isālan n-Älənžil n-Älmasex.

¹⁵ Ämära, wār nətəbəriy s-a wārān ämmukkān ija əwadəm iyyān data-nāx. Däx-a-wa nəkkās nāxdam jere-wān, wār nāxdem fäll-a ässinta ägg-adəm. Darät-a-wen

daḡ, nəjar ätṭäma n-a-s afäl mäqqār immun-nāwän s-Mässināḡ, ad-timḡar daḡ tākost ta nəla jere-wän däḡ-a-s nogaz tākost ta hanāḡ-issäḡläf Mässināḡ.

¹⁶ Dihen, ad-nudabät axätab n-Älənžil däḡ-tajiwen ti hawän-in-əllanen, wär nārha fāw, ad-nəḡəs edägg idas äwadəm data-nāḡ i-ad-wär nəbbäräj fäll-a ija äwadəm iyyän data-nāḡ.

¹⁷ Ere itabärajän däḡ, äbbäräjet däḡ-a-wa ija Emäli.

¹⁸ Təssəba n-a-wen-däḡ a fäl innä əlkəttab n-Mässināḡ:
«Abäraj wa ijä äwadəm i-iman-net,
uf'-e wa has-ijä Mässināḡ.»

11

Tumast n-änämmaşul wa n-tidət

¹ Ayətma, əşbärät ämära härät n-iba n-tayətte hi-dd-ifalän, əyya, əşbärät fäll-i a əndärrän

² fäl-a-s, jeḡ-awän tārha ta n-tismiten, tismiten daḡ s-Mässināḡ a dd-falnät. Ija ḡur-i a-s Älmaseḡ a dār-kāwän-äsdobänāḡ i-ad-tumasäm şund tämutärt şäddijät wärät təzzey meddən s-wär t-illa fāw əlḡib tät-iwarän, ärheey daḡ ad-täqqayməm däḡ-təşədje-ten-däḡ.

³ Māşan, ässirmäḡ-ahi a-s, tassayt ta n-tidət jäm d-Älmaseḡ, äbas däḡ-s təjlayäm. Hannäyāḡ a-s tārham, ad-təşləyäm i-tabarät s-əmmək wa s-has-təşläy Xəwwa-i təkkärräs taşşält, täşnämäşräy-tät.

⁴ Əjrähäḡ-in a-s afäl kāwän-in-osa ere hawän-ixaṭṭäbän isälan n-Ḳisa wärän oher härät d-a-wa hawän-näxtäb, meḡ ere hawän-ijän isälan n-unfas wärän oher härät d-Unfas wa ihän ulhawän-nāwän, meḡ ere hawän-ijän isälan n-Älənžil säl wi hawän-nəja, şik-däḡ a-s hasän-tirəm timəzzujen-nāwän, təyyəm-t s-mäjräd.

⁵ Əyya, ija ḡur-wän a-s äddinät wi jäm inəmmuşal mäqqornen, ojärän-ahi tumast n-änämmaşul. Tazidert! Wär t-illa a-s hi-øjärän.

⁶ Tidət, ämmukkän a-s ojärän-ahi ällifaz n-mäjräd māşan, däḡ-isälan wi n-musnät, əssanāḡ a-wa heḡ, nəssəkn'-awän-t s-älxalän äjjootnen, nəsdättät-t data-wän s-a-wa nənän d-a-wa nəjä.

⁷ Təssanäm a-s aşäl wa äzzarän d-hawän-näxtäb isälan n-Älənžil n-Mässināḡ, bännan a-s hawän-t-näxtäb meḡ ämmukkän a-s a-wa jeḡ a-s hawän-äsräsäḡ iman-in i-ad-timḡaräm kāwäned, i läbasän; ak ajän əlxer wa hawän-jeḡ, iqqäl emänkäs?

⁸ Əgleḡ fāw har älkänisäten tiyyäd a hi-ədhälnen däḡ-älxidmät wa jeḡ jere-wän, əfnäzäḡ-tänät i-ad-kāwän-siwədəḡ kāwäned.

⁹ A-wa əkkäsäḡ əlley jere-wän, tidət-däḡ a-s ämḡatäräḡ māşan, wär t-illa ere s-käla has-ämoosäḡ äzuk, wär-ärheey daḡ ad-t-umasäḡ i-äwadəm wäl' iyyän aşäl-i-däḡ wäla aşəkka. Təssanäm a-s ayətma däḡ-äddin dd-falnen Masidunya a hi-ədhälnen äzzäman-wen-däḡ.

¹⁰ Aşäl-i, ənta-den-däḡ abäraj-in, wär t-illa ere s-əkşey ehäre-net. A-wen äddoobey ad-däḡ-s äbbäräjäḡ däḡ-äkall wa n-Akaya iket-däḡ-net. A-wen, täsiidättät-t tidət ta n-Älmaseḡ hi-hät.

¹¹ Ma hi-äswännän a-wen-däḡ? Ak iba n-tārha-nāwän? Äbo, Mässināḡ a issanän a-s ärheey-kāwän.

¹² A-wa jeḡ jere-wän, ad-t-aləsäḡ iji. Dihen, äddinät wi tabärajnen a-s wär dār-sän nəzley, ad-ənmənhəyän d-iman-näsän ed, wär mad-əjrəwän fälla-nāḡ əlḡib s-hanāḡ-äkkulmen.

¹³ Äddinät-win-däḡ, inəmmuşal n-bahu a ämoosän, erk inaxdimän ässiijbärnen tumast n-inəmmuşal n-Älmaseḡ s-bahu ḡas.

¹⁴ A-wen, wär-iqqen eḡäf ed Iblis iman-net dehiyyän itajj-dd iman-net dat-äddinät älmät änjälos n-ännur äwwayän tidət,

¹⁵ wär-iqqen adiṣ eḡäf kunta inaxdimän-net, sajbarän tumast n-inaxdimän oḡadnen dat-Mässinäḡ; ajilal-näsän, imojjan-näsän.

A-wa ibḡän Buləs d-inəmmušal wi n-bahu

¹⁶ İnneḡ-awän härwa a-s wär-iteḡalet äwadəm, irmas-ahi iba n-tayətte mäšan, kud-däḡ ija ḡur-wän a-s a-wen-däḡ a ijan, säjdät-ahi, təyyəm-ahi ad-äbbäräjäḡ a n-bännan.

¹⁷ Mäjrad wa hawän-in-tajjjäḡ ämära-däḡ, wädden mäjräd ija Emäli däḡ-emm-in, änn-ak, mäjräd šund wa he-äj ere irmas iba n-tayətte a hawän-in-tajjjäḡ.

¹⁸ Ellan-t äddinät äjjootnen tabärajnen s-a-wär ih' älfäyda, äyyät-ahi näkk-däḡ, ad-äbbäräjäḡ a n-bännan.

¹⁹ Təjraw-ahi täkunt-näwän! Käwäneḡ-i ənnänen lam tayətte, šik-däḡ a-s riḡḡum s-a-wa hawän-jannen äddinät wi irmäs iba n-tayətte käwän-in-tisənen.

²⁰ Tännufläyäm däḡ-əkkəlu-hasän, əntäneḡ-i käwän-tihäḡnen, saməḡḡayän-käwän, əlkähän-käwän, sattäḡän-awän dat-äddinät.

Tinfusen ti ärmäsnen Buləs

²¹ Jan-awän tanhaḡt, ed näkkäneḡ, nəkkas-awän äššahät däḡ-iman-nänäḡ, wär nəhel ad-hawän-näj šund a-wen. Mäjrad n-ere irmas iba n-tayətte a hawän-tajjjäḡ i-ad-käwän-səlmədäḡ a-s äddoobeḡ näkk-däḡ əhhuləs-wen-däḡ.

²² Kunta äddinät wi käwän-takärrasnen ənnän əntäneḡ ḡäbranitän a ämoosän, ämoosäḡ-t näkk-däḡ, kunta däḡḡ-Işrayil a ämoosän, ämoosäḡ-t näkk-däḡ, kunta ihäyawan n-Ibrahim a ämoosän, ämoosäḡ-t näkk-däḡ.

²³ Kunta inəmmušal n-Älmasex a ämoosän, ämoosäḡ-t, ojä räḡ-tän daḡ tumast-net. Äyyät-ahi ämära ed edäwänne n-ere s-äba eḡäf-net a hawän-tajjjäḡ. Äddinät wi tordäm härät, kunta tiluyyaḡ, ojä räḡ-asän-tänät; kunta tikärmuten, ojä räḡ-tän ahänay-näsnät; wär tän-iha-i inhayän tiwit ti ənhäyäḡ, wär tän-iha-i ijjašän miši wa əjjäšäḡ. Däḡ-idäḡḡan äjjootnen, əjjäšäḡ miši-wa-däḡ fäl däroḡ hin-ässijjäḡ.

²⁴ Səmmos ihändäḡḡan, salalän-ahi käl-Älyähud tiwit ti n-käraḡät timərwen d-təzza wär dd-išərrəy äwadəm.

²⁵ Har käraḡ ihändäḡḡan, hakkän-ahi käl-Roma tiwit s-ebärtäk wa səmmän, käla hi-əkfan äddinät səmməjori n-tihun, har käraḡ ihändäḡḡan ḡaššäd turäft n-aman ta heḡ fäll-əjärew wa səmmän, okäy fäll-i ehäḡ d-ašäl heḡ ammas n-aman.

²⁶ Äsekäläḡ fäll-iḡarän s-iḡärman äjjootnen, dehiyyän a əndärrän ḡas a hin-äqḡiimän, əksən-ahi aman, dehiyyän inaxtafan a fäll-i oḡänen, dehiyyän äddinät-wi-däḡ n-tumast-in, dehiyyän inəzzulam† a fäll-i oḡänen i-ad-hi-änḡən. Wär t-illa aḡäna wär-ənheyäḡ däḡ-iḡärman wäla däḡ-tinariwen wäla fäll-ijərwan, hakd-däḡ miši wa sär-i dd-tirəwän wi jannänen s-bahu a-s älməssexitän a ämoosän.

²⁷ Wär t-illa aləḡḡeš wär-ənheyäḡ, ənhäyäḡ aḡäna, jän-ahi ihəḡan n-iba n-eḡəs, jeḡ išilan n-laḡ d-fad, itikəy fäll-i äzzäman d-wär jərrəwäḡ a əkšəḡ, äskäbäybäy-ahi esäməḡ, ḡäluläḡ.

²⁸ Ill'-e a äjjeen s-äddobeḡ tənna-net mäšan, ufa ad-susəməḡ kud-däḡ a-wen-däḡ iket-net, irn'-e sär-i a-wa s-hak ašäl-däḡ, əjrawän-ahi inəzjam n-älkänisäten.

²⁹ Amumən irmäs härät-däḡ, ad-äjjäḡ adəḡaḡ-wa-däḡ s-šund näkk a irmäs a-wa t-irmäsän, afäl əsleḡ-i däḡ-sän oḡan däḡ-tanməšrayt, ad-ärḡ ulh-in däḡ-təssəba-net.

† 11:26 11:26 – ḡur-käl-Älyähud, ere wärän ämoos äḡḡ-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-däḡ a fäl tiwsaten ti iyyäḡnen iket-näsnät, ti n-inəzzulam. — Ašäl-i-däḡ, änäzzalim, äkafär (ere wärän issen s-Mässinäḡ).

³⁰ Näkk, kunta ill'-e a tadjäx abäraj, wär t-illa a ämoos kunta wädden iba n-ässhät-in.

³¹ Mässinäx-i n-Abba n-Emäli Yisa-i änihäjjan d-təmmal härkuk a äjjöyhän a-s tidət a janney.

³² Ašäl iyyän d-hey ayrəm wa n-Dämašaq, issəbdäd gəfär, wa äsmänakäl Aritas-i n-ämänokal n-äkall, ejhän n-älgomitän däx-imawän n-ayrəm iket-net i-ad-hi-äxtəfän, səttärməsän-ahi

³³ mäšan, jän-ahi imumənän wi t-əllänen dihen däx-deke hərəwän, ästärarän-ahi s-fənetär ihan aɣalla wa fäll-idäy ayrəm, əmmək-wen-däx a däx-əzjäreɣ ayrəm, äɣläsəɣ däx-äššar n-gəfär.

12

Tänäfalilt d-asrəs n-iman wa ija Buləs i-iman-net

¹ Ayətma, əttəkəbru, ma t-ihan? Wär t-illa! Äyyät-ahi ämära ad-hawän-äjäx härät däx-isälan n-a-wa ənhäyäx d-a-wa hi-dd-äsnäfaläl Emäli.

² Əzzayäx ähaləs n-älməssexi immədkälän s-ašəna wa s-käraɗ a ilan märaw iwətyan d-əkkoz. Ähaləs-en, wär-əssenäx kunta ənta iman-net a osän edägg-en, meɣ anfiləl a has-dd-ija a-wa inhäy, a-wen, Mässinäx a t-issanän,

³ əssanäx ɣas a-s ähaləs-en-däx, osa ašəna wa s-käraɗ, iqqäl-dd. Kunta ənta iman-net a t-osän, meɣ Mässinäx a has-dd-äsnäfalälän a-wa inhäy, wär t-əssenäx, Mässinäx a t-issanän.

⁴ Ähaləs-en-däx, älwäqq wa d-osa älzännät, ašəna wa s-käraɗ, islä i-isälan-i-däx ähuuskätnen s-wär t-illa ägg-adəm ijrawän s-asuɣəl-näsän fäl tihusay-i-däx jän.

⁵ Ähaləs šund wa-däx, ädoobey ad-äbbäräjäx däx-isälan-net mäšan, a-s təkäsäm a-wen-däx, wär t-illa a däx-e-äbbäräjäx kunta wädden iba n-ässhät-in.

⁶ A-wen-däx a fäl kud-ärhey ad-ədkäläx iman-in däx, wär hi-ija a-wen ere wärän ijreh härät, wär-ämoosäx enəbbeddəl ed a-wa he-ännäx iket-net, a-s mad-t-tasəm, tidət. Wär təberijäx ed wär-ärhey ad-hi-idkəɗ äwadəm ar s-a-wa jänney d-a-wa täjjäx. A-wa säl a-wen, mälayäɣna.

A-wa äswär Mässinäx Buləs

⁷ Tinfilal-ti-däx ähuuskätnen s-hi-ikfa Emäli turhajät n-ahänay-näsnät, ädoobätntät ad-hi-səssəffənnəynät mäšan, i-ad-wär təjjäx a-wen, ija däx-i Mässinäx äɣib hi-olähän d-asənnan ihan aɗär n-äwadəm, äɣib olähän d-tewete n-änjəlos n-İblis i-ad-wär səffənnəyäx.

⁸ Har käraɗ ihändäggan, təddaläx Emäli i-ad-hi-ibdəw d-äɣib-wen-däx,

⁹ mäšan, inn'-ahi: «Buləs, igdäh-ak ännuymät-in ed ɣur-i, dədi-däx d-lämmed äwadəm, ad-t-ikann ässhät-in uɗəf.» A-wen-däx a fäl äsoofäx, əbbäräjäx däx-iba n-ässhät-in i-ad-fäll-i ikən Ämasex asəns n-tärna-net.

¹⁰ A-wen-däx a fäl iba n-ässhät hi-irmäsän-däx, jer-wa n-tirəbbaɗ, wäla tissusen wäla wa n-äɣizabät wäla tirəmmax, a hi-irmäsän-däx däx-təssəba n-Ämasex, äsidawät-ahi ed dihen-däx iman-net d-əbraräx, ad-tumasäx emäššehi.

A-wa ämoosän abäraj i-Buləs

¹¹ Ənhöywät! Käwäned a hi-äshäššälnen d-ad-hawän-in-äjäx mäjräd wa itäj ere irmas iba n-tayətə; käwäned a-s äniihäja a-s timələm-ahi dat-äddinät wi s-tordam a-s ojarän-ahi tumast n-inəmmušal. Əssanäx a-s wär t-illa a ämoosäx mäšan, wär t-illa a-s hi-ufän äddinät wi jəm inəmmušal täskakäm däx-išənnawän.

¹² Ämära, ijitän wi satbatnen tumast n-änəmmašul, jän jere-wän: əššumorät, ijitän n-Mässinäx, härätän äsuksəɗnen, tikunen, ämešäläx a-wen-däx iket-net jere-wän.

¹³ Lăḡātāt-ahi ḡas a jeḡ dăḡ-ălkănisăten ti iyyădnen wăr jeḡ ḡur-wăn săl wa n-a-s unjăyăḡ ad-hawăn-umasăḡ âżuk; kunta a-wen, ikm'-iwăn, adiş, ânsăt-ahi-dd.

¹⁴ Ămăra, năkk da âbokăn ad-săr-wăn-in-ăjăḡ asikəl-in wa s-kăraḡ, măşan əlmədăt a-s wăr kăwăn-in-əkkeḡ i-ad-hi-təkfəm hărăt ânn-ak, əkkeḡ-kăwăn-in ed tojărăm săr-i ehăre, a âmoos-dăḡ. Ajăn wădden abbatăn a-s ânihăjja ad-əţţəfăn tămudre i-aratăn-năsăn a əkkăn măḡrəyăn wădden aratăn a iwar a-wen.

¹⁵ S-iman wi-nin năkk, wăr t-illa a leḡ hawăn-ənkażăḡ ed diha t-əlleḡ, âsidăwăḡ i-ad-kăwăn-ăkfăḡ wăla-dăḡ tămudre-nin. Ak, ajăn kăwăned tărha ta măqqărăt hawăn-jeḡ, wăr săr-wăn dd-torew ar iba n-tărha-nin?

¹⁶ Təssanăm a-s wăr kăwăn-iha făw ere äddoben ad-ăjăyăh a-s kăla has-âmoosăḡ âżuk. Adiş, ma âsihălăn iyyăḡ jannen: wa Buləs, imsăd, amsud daḡ ḡas a-s ikşa ehăre-nănăḡ.

¹⁷ Lăḡātāt-ahi ḡas dăḡ-medden wi săr-wăn-in-ăşmaşălăḡ i kăwăn-ikkan s-tăkkărzăzzăl i-ad-ăks ehăre-năwăn?

¹⁸ Năkk a âsmătărăn Titus d-ad-kăwăn-in-akk ənta d-ăŋŋa-ḡ dăḡ-ăddin wa s-hawăn-jeḡ isălan-net. Ak, ajăn a-s kăwăn-in-osăn, əksăn ehăre-năwăn? Năkk hakd Titus, iyyăn n-ənniyăt a nəţţăf jere-wăn, iyyăn n-emm a nohăr dăḡ-a-wa nămeşăl iket-net.

Inəzjam n-Buləs

¹⁹ Tăkarde-ta-dăḡ, wăr hawăn-tăt-in-nəkkeb făl-a-s innin nărha ad-năkf iman-nănăḡ tidət. A-wa nənnă iket-net, Măssinăḡ a dat-tăn-nənnă dăḡ-təssəba n-tassayt ta nəja d-Ălmasex. Ayətma-ḡ, ittus n-măjrăd wa hawăn-in-jeḡ, i n-ad-təşşuhum dăḡ-immun-năwăn.

²⁰ Ăssiirmăḡ-ahi a-s afăl kăwăn-in-oseḡ, ad-kăwăn-in-asăḡ wăr hem âlxal wa dăr-kăwăn-əzzăyăḡ, əkrukəḡdăḡ; a-wen, âlmăḡna-net a-s âssirmăḡ-ahi ad-kăwăn-in-asăḡ, əllan-t ikənnasăn d-tismiten d-akfor d-tărha n-anmijar d-mawmaw d-əhhuləs d-asənnăxəmbəl n-ăddinăt jere-wăn.

²¹ Ăssiirmăḡ-ahi a-s afăl kăwăn-in-oseḡ, ad-hi-isărəs Măssinăḡ, isăkn'-ahi a-s han-kăwăn äddinăt äjjootnen s-har âmăra-dăḡ, wăr-âmmujrăzăn a-wa jăn, utabăn; ad-hi-umas a-s şund iba a əţţafăḡ dăḡ-təssəba n-ıyyăḡ dăḡ-wăn s-har âmăra-dăḡ, əkfan iman-năsăn iba n-təşədje d-erk âlxal, d-asəmmăḡdəs n-iman-năsăn.

13

A-wa ikittəw Buləs afăl ikka Kurənta

¹ Năkk-da-hi âbokăn âmăra ad-săr-wăn-in-ăjăḡ asikəl-in wa s-kăraḡ. Ere itəggar uḡlem-dăḡ, ad-t-iwăr s-a-wa ənnănăt sănatăt meḡ kăraḡăt tijuhaben ed a-wen-dăḡ a iḡtăs əlkəttab n-Măssinăḡ.

² A-s săr-wăn-in-jeḡ asikəl-in wa s-əssin, əllăḡeḡ-awăn a-s äddinăt wi âmeşălnen abăkkaḡ hakd wi iyyădnen, əlmədnet a-s kud-dăḡ ujejăḡ-tăn âmăra-dăḡ, afăl hin-oseḡ, wăr hasăn-e-səlmăḡdăḡ iman-in

³ ed, wădden tənnăm tărham ad-səbbuyənăm kunta Ălmasex a-s âmoosăḡ enəmmejrəd-net meḡ. Sollanăt, işwar təkkaşăm âşşăk dăḡ-a-wen. A-wa əkkăsăḡ âxdamăḡ jere-wăn, ijmaḡ-t âşşăk a-s wădden Ălmasex ibrarăn a tənăyăm, səjrahăt ḡas dăḡ-ăşşahăt wa s-ihă ulhawăn-năwăn i-ad-təkkəsăm âşşăk a-s tidət-dăḡ a-s âşşohăt.

⁴ Tidət a-s ibrar aşăl wa d-ätwăşlăb făl-tajəttewt măşan, təssənkăr-t-dd tărna n-Măssinăḡ jer-inəmmuttan. Năkkăned-i dăr-s osăḡnen, nəbrar măşan, nohăr dăr-s tămudre ta tăşşohet ija s-tărna n-Măssinăḡ ta dd-e-tənfiləlăt jere-wăn.

⁵ Zəjjəzzät ɣas iman-nāwän: ak ma dār-ogdäh immun-nāwän? Äqqələt-in iman-nāwän, zəjjəzzəm-tän. Ak ajän wär hənnəyäm a-s ƳisaÄlmaseɣ, izzaɣ dəɣ-ulhawän-nāwän. Wār-äyeläɣ han-kāwän äddinät wären äddin,

⁶ ija ɣur-i näkk a-s təssanäm a-s inəmmušal n-tidət a nämoos, tənhayäm-t a-wen,

⁷ nəttar dəɣ-Mässinäɣ ad-təbdəwäm d-e d t-illäm a läbasän. Issan Mässinäɣ a-s wär nārha fäw, ad-kāwän-nəšəhhəššəl s-tərəddawt n-a-wa nämoos, wär nārha ɣas ar ad-kāwän-išləw a-wa oläɣän, kud-dəɣ wär hanäɣ-təkfem tidət.

⁸ A-wa ämoosän tidət, wär t-dd-nəkka d-härät, wär näddobät ɣas ar tənna-net.

⁹ Äsidäwät-anäɣ abror wa nəja, igdäh ɣas a-s kāwäned, täšsohem, tittar-nänäɣ dəɣ-Mässinäɣ, ad-tumasäm meddən əmdanen, šäddijnen.

¹⁰ Ənta-den-dəɣ äddälil wa fäl hawän-in-əssəktäbäɣ təkarde-ta-dəɣ ašäl-i-dəɣ; derhan-in a-s, afäl kāwän-in-oseɣ, uday ad-kāwän-säknäɣ ežäwe wa äddobey ed, tädabit ta hi-ikfa Emäli, ti n-ad-kāwän-səbdədäɣ, təşşuhum, wädden ti n-ad-kāwän-sidəwäɣ.

Isəmməterän d-tihulawen

¹¹ Dərät-a-wen dəɣ, ayətma-ɣ, dəwätät, umasät meddən əmdanen, išdajät, nəmsəkkuyədät jer-iman-nāwän, ətəfät iyyän n-ənniyät, nəmhirejät dəɣ-älxer i-ad-kāwän-idhəl Mässinäɣ-i dd-ijän tārha d-älxer.

¹² Nəməjjät jer-iman-nāwän tārha təmdat. Ähuulän-kāwän-in iməššeddəjän wi t-əllänen diha-dəɣ.

¹³ Issənsä fälla-wän Emäli ƳisaÄlmaseɣ ännuɣmät, ikf'-iwän Abba tārha-net, osäɣ-kāwän Unfas Šäddijän iket-dəɣ-nāwän. Amin!

Täkarde ta iktäb Buləs i-käl-Gälasya

Äşqjəş

¹ A-wa näkk Buləs wa s-tumast-net i-änammaşul wär dd-təfel tārha n-ägg-adəm, wär has-dd-issəbäb dağ ägg-adəm wäl' iyyän, Mässinäğ-i n-Abba dd-issənkärän YisaÄlmasex jer-inəmmuttan d-Yisa Älmasex iman-net a hi-äsnäfränän i-ämaşal-wen-däğ.

² Ähuuläğ-käwän-in, näkk d-ayətma-ğ wi çur-i-t-əllänen dār-oharäğ immun s-Emäli Yisa Älmasex a hawän-in-əktabnen käwäneđ-i hänen älkänisäten ti n-Gälasya.

³ Ettaräğ s-Mässinäğ-i n-Abba-nänäğ d-Emäli-nänäğ Yisa Älmasex a käwän-ikfän ännuğmät d-älxer.

⁴ Yisa Älmasex, iman-net a ikfa i-ad-nəjrəw tenäşşe n-ibäkkadän-nänäğ, iştäf-anäğ däğ-a-wa läbasän fäll-təglä äddunya, äzzehäz-anäğ-dd d-iman-net, ənta-den-däğ a-wa ihan erhet n-Abba-nänäğ Mässinäğ-i

⁵ änihäjän härkuk d-təmmal. Amin!

Täqqän n-eyäf n-Buləs däğ-isälan n-käl-Gälasya

⁶ Käwäneđ ya təjraw-ahi täkunt n-armuđ wa dār-täqqäläm darät wa käwän-dd-iğrən s-ännuğmät-net i-ad-təlkəmäm i-Älənžil iyyän säl wa-net.

⁷ Äyyät-ahi ad-käwän-səlmədəğ a-s wär t-illa ar iyyän n-Älənžil, a t-ämoosän wa n-Älmasex. He käwäneđ, wär toyyem erk äddinät wi tattärnen tikärras-näwän, samäskalän-awän Älənžil wa n-iiyyän iha əlçəllas.

⁸ İnneç-awän: ere käwän-dd-osän, kud-irha umas iyyän däğ-näğ wäla änjälos dd-ifalän işənnawän, ad-hawän-ixatğtäb Älənžil säl wa hawän-näğtäb, inçäy-t Mässinäğ.

⁹ A-wen, äru d-hawän-tän-nənnä, nəjann'-awän-t dağ ämära, ere hawän-ixğtäbän Älənžil säl wa n-iiyyän hawän-näğtäb, təqbäläm, inçäy-t Mässinäğ.

¹⁰ Ämära, ajän dägg-adəm a-s tattäräğ ad-əkrəşäğ idəm data-sän meç Mässinäğ? Fäw! Meç tordam a-s tattäräğ ad-çəjrəzäğ iman-in i-dägg-adəm? Fäw! İnär tattäräğ ad-çəjrəzäğ iman-in i-dägg-adəm, wär tumasäğ akli ixdamän i-Älmasex.

İmmək wa s-ikfä Mässinäğ tənnəmuşəla Buləs

¹¹ Ayətma, əlmədət a-s Älənžil wa hawän-äğtäbäğ, wädden a dd-ikkas ägg-adəm däğ-eyäf-net,

¹² wädden äwadəm a hi-t-issäqbälän, wäla äwadəm a hi-t-issäğrən, YisaÄlmasex iman-net a hi-t-dd-äsnäfalälän i-ad-t-əfhəmäğ.

¹³ Darät-a-wen dağ, han-käwän isälan n-a-wa s- kälä t-heç ibda a-s əlkamäğ i-äddin wa n-käl- Älyähud. Äqquzäbey älkänisät n-Mässinäğ s-a-wa äddobey iket-net, wär t-illa a äsidärhänäğ ar ad- tät-in-aləmäğ fäll-äröri n-äkall.

¹⁴ Äzzäman-en, ojaräğ imigdähän-in däğ-tumast-in uđəf n-äddin wa n-käl- Älyähud, ojaräğ-tän s-a äjjeen däğ-tārha n-igguç n-älçadatän wi hanäğ-dd-oyyän imärawän-nänäğ.

¹⁵ Mäşan, Mässinäğ, däğ-tārha ta hi-ija, äsnäfrän-ahi härwa wär-əweç, osä-dd aşäl wa issəbdäd i-a-wen ças, iğr'-ahi-dd s-iman-net däğ-ännuğmät-net i-ad-umasäğ akli-net,

16 äsmäqqäs-ahi d-Rure-s wa dd-ifälän išennawän i-ad-äjäx isälan-net i-inəzzulam.† Ija a-wen ɣas, əglex, wär t-illa ere dāx-əttarāx äddābara n-a-wa wāla a-wā.

17 Wār-əkkeɣ wāla Yārussālam i-ad-dāx-s ənməzzəyāx d-meddən wi hi-äzzarnen s-tumast n-inəmmušal, əkkeɣ ākall wa n-arabän, təzzar, äqqäläx-dd aɣrəm wa n-Dāmašaq.

18 Šamad okayän kārəḍ iwətyan ɗarät-a-wen-dāx, ad-əkkeɣ Yārussālam, änməzzəyāx d-Bəṭrus-i ɣur-äzzubbeɣ har jeɣ mārəw išilan d-səmmos.

19 A-wa sāl ənta-en-dāx, wār-ənheyāx dāx-inəmmušal ar Yaquub wa n-əñṇa-s n-Ÿisa.

20 Isälan-wi-dāx hawän-in-kattābāx, Mässināx a-s tajuhe-nin, tidət wādden bahu.

21 Fälāx dihen ɣas, əkkeɣ tajiwen ti n-Surya d-Silisi.

22 A-s itäjǰ a-wen-dāx, wär kāla ənhäyän älməssexitän wi əzzäɣnen teje ta n-Älyähudəyät idəm-in,

23 mäsällät ɣas a jän n-a-s ähaləs wa s-kāla itiɣəzzəbut älkänisät, ənta-da-dāx ämāra s-ənta iman-net a ixaṭṭābän immun wa s-kāla itattär ad-t-in-aləm fäll-ārori n-ākall.

24 Ad-timələn Mässināx dāx-təssəba n-a-wa hi-ija.

2

Ämašal n-Buləs s-aɣrəm wa n-Yārussālam

1 Mārəw iwətyan d-əkkoɣ ɗarät-a-wen-dāx ad-oläsäɣ ajozi s-Yārussālam äddeewāx äsihe-wa d-Bärnābbas d-Titus.

2 Ajozi-nin daɣ s-Yārussālam, Mässināx a hi-t-dd-äsnāfalälän, jeɣ-t. Əžžəmmäɣäx dihen d-inušämän n-älkänisät ta t-təllät dihen, äsoɣäläx-asän isälan n-Älənžil wa xaṭṭābāx i-inəzzulam,† əffəsärāx-asän s-iyän-iyän isälan n-a-wa jeɣ d-a-wa hi-išlän iket-net i-ad-wār-itumas älxidmət wa s-išwār jeɣ-t, a jeɣ bännan.

3 Jeɣ-där-sän anəfham-wa-dāx fäl wār-äšhāššälän wāla dāx-Titus-i dār-i äddewän asəmmili n-iman-net ed əssanän a-s ägg-Älyunan† a ämoos.

4 Wār t-illa fāw ere dd-iḍkalän isälan n-amili wāla iba-net har jere-näɣ dd-älmamäsän käl-Älyähud iyyäḍ jannänen s-bahu a-s älməssexitän a ämoosän, ad-tattärän asəmmili-net māšan, nəlmäd šik a-s a-wa inaramän hanāx-dd-əjjašnen i-ad-zəjjəzzən ajärəw n-iman wa hanāx-ikfa ŸisaÄlmasex a-s nomän sār-s. Nəlmäd a-s wār təttärän ɣas ar ad-nāj äššäk dāx-əlləllu wa nəjrāw, aləsän-anāx asəkkəlu i-alāmār wa n-ännäbi Mosa.

5 Äddinät-en-dāx, wār hasän-noyya iman-nänāx s-ākall, nəssəkfär-asän iman-nänāx, nunjäy s-a-wa säɣren i-ad-täqqayməm kəwāneḍ təṭṭafäm Älənžil-i ämoosän tidət ta s-tärḍäm.

6 Dāx-tayimit-nänāx-ten-dāx, ad-ənnän meddən wi n-inušämän n-imizärän, kud-dāx, s-iman wi-nin, wār-äkkuläx d-a-wa ämoosän ed Mässināx, wār-iḍəkkəl äddinät s-əḍḍəkud wa dāx-tän-jän imidiwän-näsän, hək d-a-wen-dāx, wār t-illa äššäk jan dāx-a-wa säɣreɣ,

7 änn-ak, ärḍän iket-dāx-näsän a-s näkk, ikkəlläf-ahi Mässināx axəṭab n-Älənžil i-inəzzulam-i wären əja amili härät s-əmmək wa s-ikkəlläf Bəṭrus d-a-wen i-käl-Älyähud-i ɣur-ämoos amili härät.

† 1:16 1:16 – Ƴur-käl-Älyähud, ere wärän ämoos ägg-Älyähud s-aläšäl meɣ ere wärän ilkem i-äddin-näsän, iket-net, änäzzalim a ämoos. A-wen-dāx a fäl tiwsaten ti iyyäḍnen iket-näsnät, ti n-inəzzulam. — Ašäl-i-dāx, änäzzalim, äkafär (ere wärän issen s-Mässināx). † 2:2 2:2 – Ƴur-käl-Älyähud, ere wärän ämoos ägg-Älyähud s-aläšäl meɣ ere wärän ilkem i-äddin-näsän, iket-net, änäzzalim a ämoos. A-wen-dāx a fäl tiwsaten ti iyyäḍnen iket-näsnät, ti n-inəzzulam. — Ašäl-i-dāx, änäzzalim, äkafär (ere wärän issen s-Mässināx). † 2:3 2:3 Gərik (Grec) dāx-Təfränsit.

⁸ Ɖfhämän iket-näsän a-s tärna n-Mässinäx ta hi-jät dāx-tənnəmušəla n-Älənžil i-inəzzulam, ənta daɣ a jät Bətrus dāx-tənnəmušəla-net i-käl-Älyähud.

⁹ Dāx-edāwänne-nin d-inušämän, irða Yaqub d-Bətrus d-Exya-i ämoosnen imizārän wi əššämnen n-älkänisät a-s näkk-dāx, ikf'-ahi Mässinäx turhajät n-ad-äjäx isälan n-Älənžil-net i-inəzzulam. Ƴur dihen-dāx ad-där-näx jän näkk d-Bärnäbbas ifassän n-älxer, nänmärða dār-sän i-ad-näkk näkkəneḍ inəzzulam, əkkən əntəneḍ käl-Älyähud.

¹⁰ Hārät iyyän a dār-hanāx-äsmätärän, ənnän-anāx: «Wär hin-təttəwäm tiläqqiwen n-älkänisät ta häť Yärussälam». Ämoos a-wen-dāx dāx-näx əttärän a dāx-əkney əjjeluyät ḍarät-a-wen.

Äsmäqqa Buləs fäll-Bətrus

¹¹ Təglä tanfust hundäx har ašäl wa dd-osa Bətrus aɣrəm wa n-Intyuš. Indär-ahi dihen anəfham dār-s ed iwar-t uḍlem dāx-a-wa ija

¹² fäl-a-s iket-di dd-tisən meddən dd-äšimašäl Yaqub, itihär imənsiwän d-älməssexitän wi wären ämoos dāgg-Älyähud məšan, osän-dd inəmšašälän n-Yaqub ɣas, imäl ənta s-edes šund käla wär-inhey älməssexitän-win-dāx, äbas dār-sän itihär wäla imənsiwän a-wa-dāx has-təja tüksəða n-a-wa he-ənnən käl-Älyähud wi jännänen ifraḍ amili fäll-äddinät iket-näsän.

¹³ Ɖnhäyän käl-Älyähud wi iyyäḍnen n-älməssexitän a-wa ija Bətrus ɣas, əlkämän-as əntəneḍ-dāx har dd-iha ilkam-asän Bärnäbbas iman-net dāx-təlmənufäɣa ta ijjäš Bətrus.

¹⁴ Ɖnhäyāx a-s ifraɣ Bətrus i-tidət n-a-wa inna Älənžil ɣas, äxtäläx-t dat-äddinät iket-näsän, ənney-as: kunta käyy-i n-ägg-Älyähud təlkamäd i-agna wa s-əlkamän inəzzulam, ənd'-e-d-il' əmmək ämära-dāx, ad-təttäräd dāx-inəzzulam ad-ilälän agna wa n-käl-Älyähud?

Immun s-Ƴisa Älmasex ɣas a iɣalläsän ägg-adəm

¹⁵ Tidət, s-aläšäl-dāx, dāgg-Älyähud a nämoos, wär hanāx-iha ašni n-tiwsaten ti n-inəzzulam wären əssen s-alämär n-Mässinäx

¹⁶ məšan, hakd a-wen-dāx, nəssan a-s äwadəm, immun s-ƳisaÄlmasex ɣas a t-ihakkän idəm dat-Mässinäx wädden amišəl n-a-wa innä alämär wa n-ännäbi Mosa kud-irha ittaf-t iket-dāx-net. A-wen-dāx, a fäl näkkəneḍ-dāx, nomän s-Ƴisa Älmasex i-ad-hanāx-äkf immun-nänāx sār-s idəm dat-Mässinäx wädden imärkedän-nänāx ed wär t-illa äwadəm madän-ijrəw idəm ɣur-Mässinäx fäl-a-s innin ämešäl a-wa innä alämär wa n-ännäbi Mosa.

¹⁷ Näkkəneḍ, Älmasex a-s nətattär ad-hanāx-ijrəw idəm ɣur-Mässinäx məšan, kunta hakd a-wen-dāx iket-net, äffukkär-dd a-s nämoos inäsbäkkəḍän, ajän a-wen älmäɣna-net a-s Älmasex a hanāx-ässəḍän dāx-ibäkkəḍän-win-dāx? Xäša!

¹⁸ Ädduuttät a-s afäl dd-äqqäläx alämär wa n-ännäbi Mosa wa äbboḗäläx, ad-janney i-iman-in, äddoobey amišəl-net, a-di, uḍlem ɣas a sawaräx iman-in ed a-wen wär-ämmukkän.

¹⁹ Alämär, iman-net a hi-madän-änx i-ad-äbas əddaräx i-alämär, änn-ak, Mässinäx a-s əddaräx.

²⁰ Näkk, ohäräx d-Älmasex atwəšləb wa ätwäjjä fäll-tajəttewt, kunta ämära əddaräx, äbas näkk a iddarän, Älmasex a iddarän dāx-taɣəssa-nin. Tämudre-nin dāx-äddunya-ta-dāx, jey-tät dāx-təssəba n-immun wa jey s-Rure-s n-Mässinäx-i hi-ijän tärha-ta-dāx fäl ämmut dāx-təssəba-nin i-ad-äɣləsāx.

²¹ A-wen-däx a fäl wär-ärdey sibəttuläx ännuymät wa hi-ikfa Mässinäx ed ädduuttät a-s önnär ihakk amişel n-alämär wa n-Mosa idəm xur-Mässinäx, adiş Älmasex-i-däx, ämmut bännan.

3

Älyädalät wa ilän älfäyda xur-Mässinäx

¹ Ya käl-Gälasya! Ajän käwäneḍ iba n-tayette a käwän-irmäsän? Mi käwän-äkrakäwän i-ad-täqqäläm ḍarät ʿİsa-i s-hawän-nəffəssär äddälil wa fäl ätwäşlāb fäll-tajəttewt?

² Sastanäx-käwän ämära: amişel n-a-wa innä alämär meyx immun s-Älənžil-i s-täşjadäm a käwän-ikfän Unfas Şäddijän?

³ Ajän käwäneḍ irmas-käwän iba n-tayette ogdähän d-a-wen-däx! ʿİnd'-e-d-il' ömmək a-s a-wa tössentäm s-tärna n-Unfas Şäddijän, täsbätṭäläm-t-in har dd-täqqäläm ämära, täsifälläm fäll-iman-näwän?

⁴ ʿYas käwäneḍ a-wa-däx dd-tokäyäm iket-net däx-immun-näwän, wär t-illa a käwän-ikfa däx-tayette? Wär il' ömmək a-wen!

⁵ Ak Unfas Şäddijän wa käwän-ikfa Mässinäx d-tikunen ti ija jere-wän, ma tordam, mafäl ija a-wen-däx iket-net jere-wän? Ak ajän tordam a-s amişel-näwän i-alämär n-ännäbi Mosa a fäl hawän-ija a-wen meyx a-wa s-innin tomänäm s-Älənžil-i s-täşjadäm?

⁶ ʿİktəwät-dd mäjräd wa innä Mässinäx fäll-ännäbi Ibrahim a-s innä:

«Omän Ibrahim s-Mässinäx,
ikräş data-s idəm.»

⁷ Älmäxna n-a-wen a-s äddinät wi omännen s-Mässinäx a-s aratän n-Ibrahim wi n-tiḍət.

⁸ Äru d-ätwäktäb däx-əlkəttab n-Mässinäx n-a-s ilkam ad-amənän inəzzulam† s-Mässinäx, äkf'-en immun-näsän-en-däx idəm dat-Mässinäx. Äru d-ija Mässinäx i-Ibrahim isälan n-älxer-wi-däx a-s has-innä:

«Ad-äjäx älbäraka däx-tiwsaten
iket-däx-näsnät däx-äddimmät-näk.»

⁹ A-wen-däx a fäl ere omänän s-ʿİsa-däx, ad-däx-s äj Mässinäx älbäraka wa ija däx-Ibrahim.

¹⁰ Däx-isälan n-äddinät wi järnen äṭṭäma n-a-s amişel-näsän i-alämär wa n-ännäbi Mosa a tän-madän-iḅləs, əlmədnet a-s iwar-tän uḍlem dat-Mässinäx, ed iktab däx-əlkəttab n-Mässinäx a-s:

«Iḅän Mässinäx äwadəm wärän
itəmişil hak ässaḅät a-wa önnän
färəḍän wi hänen alämär wa n-ännäbi Mosa.»

¹¹ Wär t-illa äwadəm mad-äj alämär ämaydal dat-Mässinäx ed iktab a-s:

«Immun a ihakkän ägg-adəm idəm dat-Mässinäx
i-ad-äj tämudre ta fälla-s irha Mässinäx.»

¹² Nəssan a-s immun, wär-oseyx härät d-alämär ed iktab daḅ däx-əlkəttabän a-s ere ämeşälän s-iqqud färəḍän n-alämär wa n-Mosa iket-net, ad-iddär sār-sän.

¹³ Iwar-anäx uḍlem dat-Mässinäx ed indär-anäx ad-nämaşäl a-wa innä alämär mäşan, osä-dd Älmasex xas, äsdärfät-anäx däx-tilxant ta hanäx-äswär, idkäl-tät fäll-iman-net, ämmut i-ad-näḅləs ed iktab a-s:

† 3:8 3:8 — ʿYur-käl-Älyähud, ere wärän ämoos ägg-Älyähud s-aläşäl meyx ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyäḍnen iket-näsnät, ti n-inəzzulam. — Aşäl-i-däx, änäzzalim, äkafär (ere wärän issen s-Mässinäx).

«Ilyän Mässinäx äwadəm
ätiwäsläbän fäll-tajöttewt.»

¹⁴ Tamättant ta ija Yisa fäll-tajöttewt, ij'-et i-ad-ənmiwəḏän inəzzulam dəx-idəm-net d-älbäraka wa s-ijjäs Mässinäx ärkäwäl-net i-Ibrahim, nəjrəw dəx näkkäneḏ-i sār-s omännən Unfas Šaddijän dəx-təssəba n-Yisa Älmasex.

Ärkäwäl wa ijjäs Mässinäx i-Ibrahim

¹⁵ Ärheex ayətma ämära, ad-hawän-äffässäräx isälan-wi-däx s-älmital iglan fäll-agnatän wi dəx-nänäx: təssanäm a-s ed iktäb ähaləs tākärḏe dəx-ija isälan n-əmmək wa s-mad-tuzan tākasiṭ ta dd-mad-äyy, afäl issəmda akätab-net, ixfäl-tät, ad-äbas t-illa ere äddooben asiwəḏ wäla afänaz n-a-wa s-išwār iktäb-t.

¹⁶ Emmək-wen-däx dəx a-s ijjäs Mässinäx ärkäwälän-net i-Ibrahim d-ahäya-net. Ejrahät-in a-s wār-innä əlkəttab:

«Ad-där-k əjjəšäx ärkäwäl käyy d-ihäyawän-näk.»

A innä: «Käyy d-ahäya-näk», i-ad-əlməḏän äddinät a-s äwadəm iyyän ɣas a-s iha Mässinäx ti-net, a t-ämoosän Älmasex.

¹⁷ Ämära, älmäɣna n-a-wen, ənta da: Mässinäx, ijjäs d-Ibrahim ärkäwäl n-tassaxt, šamad okaynät əkkoḏät timaḏ d-käraḏät timərwən n-awätay ad-dd-äzzäbbät Mässinäx alämär wa n-ännäbi Mosa fäll-käl-Älyähud, ämära, alämär-wen, wār-äddobät ad-hin-ikkəs ärkäwäl wa s-išwār ijjäs-t Mässinäx s-tizarät.

¹⁸ Ənnär ija a-wen, adiš, ma ija ärkäwäl wa s-išwār ijjäs-t Mässinäx i-Ibrahim? Nəssan a-s Ibrahim, issətbät Mässinäx ärkäwäl wa has-ijjäs, wädden s-alämär mäšan s-tənnä-net ed Mässinäx iman-net a has-innä:

«Ad-käy-äkfäx ännuxmət-in.»

Äddälil wa fäl dd-äzzäbbät Mässinäx alämär

¹⁹ Alämär, adiš, ma infa? Alämär, temähidət hanäx-salmaqät a-s näkkäneḏ-i-däx, inäsbäkkäḏän a nämoos ämiixatärnen s-tenäšše hundäx har ašäl wa dd-mad-ass ahäya n-Ibrahim wa s-ätwänna ed ənta-en-däx a-s ijjäs Mässinäx ärkäwäl-wen-däx. Alämär-en, təssanäm a-s änjälösän a t-dd-äwwäyən s-ännäbi Mosa-i t-dd-äwwäyän s-tamətəte ta jer-imäl d-Mässinäx.

²⁰ Däx-ärkäwäl wa ijjäs Mässinäx d-Ibrahim, wār t-illa ere imälän jere-s d-Ibrahim ed Mässinäx, ənta ɣas a ijjäsän ärkäwäl-wen-däx i-Ibrahim wäla əssəbab wäl' iyyän.

²¹ A-wen ak älmäɣna-net a-s alämär wa n-ännäbi Mosa, ill'-e a-s änimäšräy i-ärkäwäl wa ijjäs Mässinäx? Äbo, wār-ämmukkän a-wen ed ənnär t-illa alämär äddooben ihuk n-älžännät, əjrəwän-t äddinät, äj'-en alämär-en-däx äddinät əjrawnen idəm dat-Mässinäx

²² mäšan, illäxät-anäx əlkəttab n-Mässinäx a-s äddunya iket-net a t-təllat daw-tärna n-abäkkäḏ, ämoos a-wen a itbatän dəx-təssəba n-ad-əjrəwän äddinät wi omännən s-Yisa Älmasex a-wa s-hasän-ijjäs Mässinäx ärkäwäl-net.

²³ Ämära, dat-äzzäman wa dd-issärɣäs Mässinäx immun s-Yisa Älmasex, alämär wa n-ännäbi Mosa a dəx-näx änniihäḏän, nämoos-as šund käl-takärmüt ikna uḏəf dəx-tišəm-net, änniihäḏ dəx-näx hundäx har ašäl wa dd-äsnäfaläl Mässinäx immun s-Älmasex.

²⁴ A-wen, isalmaqät-anäx a-s alämär wa n-ännäbi Mosa, taɣəlift a hanäx-ija; iɣlaf-anäx i-äzzäman wa dd-mad-ass Älmasex i-ad-hanäx-äkf immun-nänäx idəm ɣur-Mässinäx.

Ušreyän n-immun s-Mässinäx

²⁵ Ämära-däx d-nəjjäs äzzäman wa n-immun, äbas fälla-näx ila änaɣlaf-en tärna

²⁶ ed xur-ašäl-wa-däx d-tomänäm, tämoosäm aratan n-Mässinäx däx-tössöba n-ÿisa Älmasex,

²⁷ ənta-i s-isəm-net a däx-tätwäsälmäxäm däx-aman, ämoos a-wen a ässiitbätän tassaxt-näwän där-s, tärmäsäm day älxal wa irmas Älmasex.

²⁸ Ämära-hi, äbas izlay wa n-ägg-Älyähud d-wa n-Älyunan, äbas izlay wa n-eläll d-wa n-akli, äbas izlay ähaləs d-tamäqt ed tämoosäm iket-däx-näwän iyyän n-äwadəm däx-tössöba n-tassaxt-näwän d-ÿisa Älmasex.

²⁹ Ȳas, šamad Ȳisa Älmasex a kəwän-ilan, adiš tämoosäm ihäyawän n-Ibrahim, ad-təjrəwäm täkasit ta s-hawän-ijjäs Mässinäx ärkəwäl-net.

4

Azäjor n-əkkəlu s-ajəraw n-iman

¹ Ärheey day däx-edägg-wa-däx, ad-kəwän-äknäx asəssəjrah n-a-wa s-ärheey tənna-net: wädden ara s-ilkam ad-ikus ti-s, a ikka wär-ikreš tayətte, wär-izley d-akli n-mässi-s kud-däx wär t-ih' äššäk a-s a-wa ila abba-net däx-ehäre iket-net, i-net.

² A ikka ämoos ara əndärrän, ad-ila imännähädän d-älwäkilän has-janen ənniyät ənta hakd a-wa ila iket-net. Ad-ija a-wen-däx hundäx har ašäl wa d-ikkäs abba-net äššäk a-s rure-s, ämoos ähaləs ilan tanhaqt ämära.

³ Šund a-wen-däx a fälla-näx ijan näkkäneḍ-däx, noläh d-aratan s-käla äkkilen i-tärna ta fäll-təgl' äddunya

⁴ mäšan, täwwäḍ-dd täqqän ta issəbdäd Mässinäx Ȳas, äšmašäl-dd sār-näx Rure-s toraw tamäqt i-ad-izzäx jere-näx, ämašäl ənta-däx a-wa innä alämär wa n-käl-Älyähud,

⁵ a-wen, ij'e Mässinäx däx-tössöba n-ad-isəddärfət äddinät wi əzzäxnen daw-alämär-wen-däx, äkf'-anäx day näkkäneḍ turhajät ta n-tumast n-aratan-net.

⁶ Tidət-däx a-s aratan-net a tämoosäm ed tasətbat n-a-wen, a tät-ämoosän, Unfas Šäddijän n-Rure-s n-Mässinäx wa ija däx-ulhawän-nänäx. Unfas-net-en-däx a hanäx-ijräwän s-ad-nəxarr Mässinäx s-isəm: Abba.

⁷ A-wen-däx a fäl, äbas tämoosäm eklan, änn-ak aratan n-Mässinäx a tämoosäm. Ȳas šamad aratan n-Mässinäx a tämoosäm, adiš, tämoosäm iməkkusa wi s-irh' älxer iket-net.

Isəmməterän wi ija Buləs i-käl-Gälasya

⁸ Ibda, a-s wär təzzeyäm Mässinäx, äššanämän-i n-mäläyäxna Ȳas a-s täkkilem, Ȳabbädäm-tän

⁹ mäšan, ašäl-i d-təzzeyäm Mässinäx, änn-ak, ännäxet, ašäl-i d-kəwän-izzäy Mässinäx, ənd'-e-d-il' əmmək n-ad-taləsäm ihuk n-iman-näwän i-mäläyäxnatän wi fäll-təgl' äddunya s-wär t-illa fäw a ənfan wäla a tän-ihan, adiš kəwäneḍ a tärham ad-täqqəläm əkkəlu-wa-däx dd-təzjəram?

¹⁰ Əjrahäx-in a-s təknam asəmxar n-uḍef n-išilan iyyäḍ d-orän iyyäḍ d-äzzämanän iyyäḍ d-iwətyan iyyäḍ,

¹¹ ässiirmäx-ahi hullan a-wa kəwän-išlän har ämmukkän fäw a-s ija xur-i a-s älxidmät wa jex jere-wän, äbboḧäl-in bännan.

¹² Ayətma! Asəlxad a kəwän-tajjäx ämära, täläläät-ahi ed äzzäman wa əkkäsäx əlley-t jere-wän, jex iman-in iyyän däx-wän, wär-ənheyäx day a hi-täxšadäm.

¹³ Təssanäm fäw a-s ašäl wa äzzarän d-kəwän-in-osex i-ad-hawän-äjäx isälan n-Älənžil, a-s kəwän-in-osex, ärhiinäx,

¹⁴ ja taḡəssa-nin töləmde-ta-däḡ fäl täsijälälhāy māšan, hakd a-wen-däḡ, wār hi-təkrehām, wār hi-täjlälhāyām, änn-ak, täsbärrākām-ahi šund ḡas änjālos n-Mässināḡ a kāwān-dd-osān, šund ḡas a-s näkk iman-in a-s ḡisaÄlmasex.

¹⁵ Ma ija älxer wa hi-tössəknām äzzāman-wen-däḡ? Ma kāwān-ijrāwān? Ajän tətṭəwām-in a-s äzzāman-en-däḡ d-kāwān-in-oseḡ, ärhiināḡ, tössəknām-ahi tārha-ta-däḡ fäl ənnār ämmukkān a-wen-däḡ, təkukkərem-dd tiṭṭawen-nāwān i-ad-hi-tānāt-təkfəm.

¹⁶ Ajän tidət ta hawān-jänneḡ, təj'-ahi ašanjo-nāwān?

¹⁷ Äddināt wi ədgāznen däḡ-asəmməskəl n-isālan wi hawān-nəja, wār teḡalāt äkkulān däḡ-wān, änn-ak tārha ḡas n-ad-kāwān-sənnəməjjəjān dār-i i-ad-hasān-təlkəmām a däḡ-ošālān.

¹⁸ Tidət, idgəzət əwadəm māšan, idgəzət däḡ-amišəl n-a-wa olāḡān. Näkk, ässofāḡ ad-tamašālām a-wa olāḡān s-älwāqq iket-net jer-əlleḡ ḡur-wān wāla wār ḡur-wān t-əlleḡ.

¹⁹ Ilyadān-in, ässiilmädäḡ-kāwān a-s ozarāḡ däḡ-tössəba-nāwān, ijmaḍ-t äššāk day a-s jeḡ tiṭzurt ta täjj tamāḍt jarrāwāt eḡäf-net, tiṭzurt day ta jeḡ, ad-tāt-əṭṭafāḡ hundāḡ har ašāl wa d-mad-ikən Älmasex äntum däḡ-ulhawān-nāwān.

²⁰ Äsiidārhanāḡ ad-t-əlleḡ ḡur-wān ässaḡāt-wa-däḡ i-ad-hawān-ājāḡ mäjrād sāl wa-däḡ fäl-a-s iqqan eḡäf-in fäll-təmyäre n-asəmmāxəlxəl-i-däḡ hi-ija a-wa kāwān-išlān.

Älmital dd-ätiwāḍkälän fäll-tanfust ta n-Sarāta d-ta n-Xäzrāta

²¹ Äyyāt-ahi ad-kāwān-səstənāḡ kāwāneḍ-i ədgāznen s-əmmək-wa-däḡ däḡ-utār n-amišəl n-a-wa innā alāmār wa n-ännābi Mosa. Ak ajän təknam fāw teḡäre n-a-wa innā?

²² Wādden, iktab däḡ-s a-s ikrāš Ibrahim əssin ilyadān, iyyān, ohar-t d-Xäzrāta ta n-taklit, wa iyyadān, ohar-t d-Sarāta ta n-telällit-i issäxläl.

²³ Ara wa ohār d-taklit, ohār-t dār-s s-əmmək-wa-däḡ s-itihār ähaləs d-tamāḍt ara māšan, ara wa ohār d-telällit, ämoos ara n-ärkāwāl wa ijjäš Mässināḡ i-Ibrahim.

²⁴ Tanfust-ta-däḡ jät fäll-tiḍəḍen-ti-däḡ n-sānatāt, la älmāḡna šəjreen, älmāḡna-net da: tiḍəḍen-ti-däḡ n-sānatāt, äniḡäqqānāt d-ärkāwālān wi n-əssin: Ärkāwālān-en, wa äzzarān, tamātart-net, Xäzrāta; a-wen ärkāwāl wa ijjäš Mässināḡ d-ännābi Mosa fäll-aḍaḡ wa n-Sāynay, wen ärkāwāl, a-wa t-dd-ijmäḍān däḡ-aratān iket-net eklan ed Xäzrāta-i n-ma-sān, taklit.

²⁵ Xäzrāta-en-däḡ a-s šund aḍaḡ wa n-Sāynay ihān äkall wa n-arabān, toolāh day d-aḡrəm wa n-Yārussālam-i s-ašāl-i-däḡ, mössaw-s iket-däḡ-nāsān, äkkiilen härwa i-alāmār-en-däḡ.

²⁶ Māšan, Yārussālam ta n-tidət t-təllāt ḡur-Mässināḡ däḡ-išənnawān, ənta a-s tamāḍt ta n-telällit n-anna-nānāḡ.

²⁷ A-wen-däḡ fāw a fäl iktab däḡ-isālan n-tamāḍt ta n-telällit a-s:

«Tamāḍt, kämm-i n-teməjjejrut, dāwāt,
sāqqələlət day kämm-i s-kāla
wār käm-tärmes tiṭzurt ta n-ajāraw n-eḡäf
ed ädduuttāt a-s tamāḍt ta tāt-wāksānāt,
fäl-a-s innin wār tətəy,
ad-tajār ta dār-ohār ähaləs-net aratān.»

²⁸ Ayətma, əlməḍāt a-s kāwāneḍ aratān dd-oraw ärkāwāl n-Mässināḡ a tämoosām šund əmmək wa s-ijjäš Mässināḡ ärkāwāl i-Ibrahim ḡas, ikrāš Isxaqq.

²⁹ S-əmmək-wa-däḡ s-ibda iwā-dd alyad wa təkraš Xäzrāta, idwāl ḡas, ad-isakna wa n-Sarāta aḡāna; əmmək-wen-däḡ day a ijan jer-äddināt har ašāl-i-däḡ.

³⁰ Ämära, ilyadän-win-däx n-össin, ma hanäx-innä elkøttab n-Mässinäx däx-isälan-näsän? Wädden iktab a-s innä Mässinäx i-Ibrahim:

«Søføl iman-näk taklit d-rure-s ed wär t-illa ømmøk s-ohär alyad wa n-taklit täkasit d-alyad wa n-telällit.»

³¹ Ayøtma, näkkäneð, anna-nänäx telällit wädden taklit.

5

Älmässexitän, øjräwän iman-näsän däx-tøssøba n-Älmasex

¹ Älmasex a hanäx-ijräwän iman-nänäx, nøjräw-tän dax s-älxal imdan. A-wen-däx a fäl, øhølat iman-näwän, wär jem iman-näwän toläs daw-äzük wa n-Iblis i-ad-has-täkkälem.

² Näkk Bulø, ønneø-awän: afäl täsmaläyäm iman-näwän s-ømmøk wa s-t-ifräð alämär, adiš, wär käwän-e-inføw Älmasex s-wäla a øndärrän.

³ Ärheø dax ad-økkøsäø äwadøm iket-net irhan ad-isømmiløy iman-net däx-tayðärt, afäl äsmaläy iman-net, ämoos-as färøð ad-ämasäl dax färøðän wi iyyäðnen øktäbnen däx-alämär.

⁴ Käwäneð-i tattärnen ad-käwän-äj amišøl n-färøðän n-alämär wa n-ännäbi Mosa äddinät lanen idøm dat-Mässinäx, ässiilmädäy-käwän a-s ibð'-iwän a-wen d-ÿisa Älmasex, äsiinämäjjäy-käwän d-ännuømät n-Mässinäx.

⁵ Näkkäneð-i omännen s-ÿisaÄlmasex, Mässinäx a ih' ätøama-nänäx i-ad-hanäx-äj imaødalän. Ätøama-en, näqqal-as s-tazidert ta ihakk Unfas Šäddijän-i s-ønta a ässixdämän immun-nänäx.

⁶ Äwadøm, afäl išwär irtäy d-ÿisa Älmasex, wädden amili wäla iba-net a infan härät, a-wa infän härät, immun d-asøtbat-net s-tärha-nänäx i-äddinät.

⁷ Änna säbxas yaden, uhøn käwäneð-i s-a ija a-wa-däx tosasäm däx-azzal wa n-immun s-ømmøk-wa-däx, ma käwän-dd-iwwäøän, igdäl-awän amišøl n-tidøt?

⁸ Erk ønniyät-wen-däx, wädden Mässinäx-i käwän-dd-iørän s-iman-net a dd-ifal,

⁹ ajän tøttøwäm-in a-s täzøa øndärrät a sakafät ejel n-älkäma äjjeen.

¹⁰ Näkk, ikf'-ahi Emäli däx-isälan-näwän tafløst n-a-s wär-e tøjøm øas ar inøzjam šund wi jeø mäšan, ärheø ad-tøssanäm a-s äwadøm wa itattärän uøøn n-iøäfawän-näwän, ilmødet a-s ad-t-irmøs Mässinäx ed anmøøri šund-wen-däx, wär sär-s izley Mässinäx äddinät.

¹¹ Ayøtma, däx-a-wa hi-dd-iqqälän näkk, ønnär isälan wi täjjäø, øfraðäø fäll-äddinät amili, adiš mafäl hi-tiøøzzuben käl-Älyähud bännan? Ènnär a-wen-däx a xaøtäbäø, iket-di, wär tumas tajøttewt ta fäll-ämmut Älmasex älmuxal i-äwadøm wäl' iyyän.

¹² Ärheø däx-äddinät wi käwän-šaškanen ad-käwän-økføn älyafyät kud-ärhan darät-a-wen, sømmøkøðmøkøðän iman-näsän.

A-wa ibðan ere iddarän i-tayøssa d-ere iddarän s-Unfas Šäddijän

¹³ Ayøtma, ajäraw n-iman-näwän a-s käwän-dd-iøra Älmasex s-iman-net, wär täjjät a-wen äsaru fäll-hakkäm iman-näwän abäkkäð, änn-ak, kunta ill'-e a däx-wän itanähäðän, umaset tanmødhalt jer-iman-näwän däx-tärha

¹⁴ fäl-a-s alämär wa n-ännäbi Mosa iket-net, äkiläwkäläw-t-dd mäjräd wa innän:

«Äj i-änhäraj-näk tärha-ta-däx jed i-iman-näk.»

¹⁵ Mäšan, afäl dd-täqqäläm tänifäqqäm d-iwäøsan, tinmødidäm, tinmøkšim jer-iman-näwän, dihen, äjät ønniyät i-ad-wär tønmelhisäm jer-iman-näwän.

16 Äyyät Unfas Šaddijän ad-ännähäd däx-wän, dihen, ad-äbas təlcamäm i-erk derhanän n-tiḡeswen-nāwän.

17 A-wa läbasän isadärhan ägg-adəm, iknas Unfas Šaddijän; Unfas Šaddijän day iknas a-wa läbasän isadärhan ägg-adəm. Wär kälä imda akənnas wa n-jere-sän, a-wen-däx a dd-orāwän a-s, wädden a dd-ijjāšän eḡäf n-āwadəm-däx, ad-t-äj.

18 Afäl Unfas Šaddijän a däx-wän ännihädän, wär däx-wän-e-ännähäd alämär wa n-ännäbi Mosa.

19 Erk imojjan wi läbasnen itamašal ägg-adəm, wär-əfferän, ätiwässanän, əntäned da: əlkäxbu, iba n-təšədje, asəmmäḡəs n-iman,

20 älḡibadät n-äššänämän, əkkəriku, amšənji, akənnas, tismiten, asjət n-aḡkär, tārha n-mijraw, bādḡo-bādḡo, ejhän-ejhän,

21 munkäzi, tesäse n-asməd, tāruf t-d-a äjjeen wärän izley d-a-wen-däx. Əkkasäx-kāwän däx-tayḡärt s-əmmək wa s-kälä hawän-t jeḡ, ənney-awän: äddinät wi tamašalnen härätän-win-däx, xāram-asän uješ n-Təmmənəya n-Mässinäx.

22 A-wa oläxän dd-itirəw Unfas Šaddijän s-ulh n-ägg-adəm ənta da: tārha, tedäwit, älxer, tazidert, tāhanint, miḡaw, immun,

23 täzude, tanhaḡt däx iman. Härätän-win-däx, wär tän-iha-i iknas alämär.

24 Äddinät wi əkfänen iman-näsän ḡisa Älmasex, əšlābän fäll-tajəttewt ta fäll-ätwäšlāb ḡisa derhanän-näsän wi läbasnen tän-əlwaynen.

25 Šāmad Unfas Šaddijän a däx-näx ännihädän, adiš, näyyet-t daḡ ad-ännähäd däx-tämudre-nänäx s-a-wa oläxän.

26 Wär nətumaset äddinät tabārajnen wälä tinməkənḡernən jer-iman-nänäx, wär-itisəmet wäl' iyyän fäll-a ila amidi-net wär ila.

6

Isəmməterän wi n-ajilal

1 Ayətma, ärheey däx-wän, kāwäned-i däx-ännihäd Unfas Šaddijän n-Mässinäx a-s, e-d tärmäsäm āwadəm iḡšadän härät, səssiḡədät s-ənniyät äzedän, wär t-täxweläm. Käyy daḡ-i t-isasaḡadän, äj ənniyät i-iman-näk i-ad-wär toḡed däx-abäkkad šund wa däx-oḡa.

2 Iḡkəlet hak iyyän däx-wän äḡuk wa ällinjät amidi-net, dihen, ad-tāmašäläm alämär wa n-Älmasex.

3 Ere ordän iman-net härät-däx, a-s ija a-wen, wär-āmoos wälä a əndärrän, ilmədet a-s iman-net ḡas a isaswad,

4 iššəkət āwadəm imojjan-net təzzar iššək wi n-āwadəm iyyän, dihen kunta ihannäy fäll-iman-net a ännihäjjän d-təmmal, adiš aməlet iman-net s-a-wen-däx, māšan, wär-itäjjet fāw əmmək s-äsnäfäqqa iman-net d-äddinät wi iyyäḡnen,

5 fäl-a-s, hak āwadəm ad-itwəsəstən d-äḡuk n-a-wa ämešäl.

6 Wi kāwän-saḡranen mäjräd n-Mässinäx, ifraḡ fälla-wän ad-där-sän tahərəm a-wa s-kāwän-irxäm Mässinäx iket-net.

7 Wär tākərrasät iman-nāwän, Mässinäx, wär t-itəjj āwadəm tekäškäšt, wär-e aləy āwadəm ar a-wa äddomät:

8 wa s-taḡəssa-net ḡas a-s ixdam derhan-net, ad-sär-s dd-arəw a-wa itamašal əlhəllak māšan, wa s-Unfas Šaddijän a-s itamašal derhan-net, ad-sär-s dd-arəw a-wen tämudre täḡlalät.

9 Wär hanäx-itäjjäšet sendad n-amišəl n-a-wa oläxän ed, afäl dd-tosa täḡḡän ta issəbdäd Mässinäx, kunta wär sämməd fälla-näx iji n-a-wa oläxän, ad-nəjrəw älxer n-a-wa nəjä.

¹⁰ A-wen-däx a fäl ämära, iket-di nøjraw s-a-wen, ihølet milxaw-nänäx ebre n-e d t-illäm äwadəm hullan ebre n-wi dār-nohär immun.

Ajilal n-mäjräd wa ija Buləs

¹¹ Ænhøywät tēššuhärt n-akätab däx-edägg-wa-däx i-ad-tølmødäm a-s näkk iman-in a hawän-in-iktäbän täkarðe-ta-däx.

¹² Äddinät wi tattärnen ad-hawän-øjøn amili färəð, øjrähät-ah'-in xas a wa tän-išlan, wär-ørhen ahänay n-a-xäna, a-wen-däx a fäl, wär helän ad-ønñen i-äddinät a-s ølxøllas wär-iha ar tajøttewt ta fäll-ämmut Älmasex.

¹³ Tøzzar day äddinät-en øtøafnen amili, øjrähät-in xas a-s øntäneð iman-näsän, wär tömišilän färəðän n-alämär iket-net, jan däx-sän nefran, wär fälla-wän øfreðän amili xas ar däx-tärha n-ad-äbbäräjän n-a-s øntäneð a ämoosnen øssøbab n-amili-näwän.

¹⁴ Näkk, wär t-illa a jex abäraj kunta wädden tidøt ta n-a-s Emäli-nänäx Yisa Älmasex, ämmut fäll-tajøttewt. Tamättant day ten-däx ija a tämoosät øssøbab wa fäl säri oläh a-wa-däx ihän äddunya-ta-däx šund a ämmun, olähäx-as day näkk d-ere ämmun.

¹⁵ Wädden amili wäla iba-net a-s härät, tumast n-äwadəm ässiynäy Mässinäx a-s härät.

¹⁶ Èttaräx s-Mässinäx, ad-äkf älxer-net d-tähänint-net i-e d t-illäm ere ilkamän i-a-wa ønneç, ijräw day a-wen i-e d t-illäm ere ihan Işrayil wa n-Mässinäx.

¹⁷ Èttaräx däx-wän, käwäneð ašäl-i-däx, ad-wär däx-wän itilø äwadəm asønän n-iman-in, øgdähän-ahi ibuyəsän-wi-däx äššišwälñen taçøssa-nin s-øntäneð a-s tajuhe n-a-s näkk, il'-ahi Yisa.

¹⁸ Ayøtma-x däx-äddin, ähuuläx-käwän-in, øttaräx day däx-Emäli-nänäx Yisa Älmasex, ad-äj ännuymät-net däx-ønñiyät-näwän. Amin!

Täkarde ta iktäb Buləs i-käl-Ifäsus

Äsqjəš

¹ A-wa näkk, Buləs, wa ija erhet n-Mässinäḡ änämmašul n-ḠisaÄlmasex hin-iktabän i-iməšseddəjän wi äḡdälne n-s-Ḡisa Älmasex əzzäḡne n-aḡrəm wa n-Ifäsus.

² Ähuuläḡ-käwän-in, ikf'-iwän Mässinäḡ-i n-Abba-nänäḡ d-Emäli Ḡisa Älmasex ännuḡmät d-älxer.

Tämajit i-Mässinäḡ i-əlyəllas wa ikfä dāḡ-idəm n-Ḡisa Älmasex

³ Təmmal i-Mässinäḡ-i n-Abba n-Emäli-nänäḡ ḠisaÄlmasex-i fälla-näḡ dd-əzzäbben s-tärna n-Unfas-net e d t-illäm ärräxmät ihan isənnawän itatäjrawän ḡur-Mässinäḡ dāḡ-idəm n-Älmasex.

⁴ Mässinäḡ a hanäḡ-äsnäfränän härwa wär dd-täxlek äddunya i-ad-numas data-s dāḡ-təssəba n-Älmasex iməšseddəjän, wär-iwer udlem wäl' iyyän.

⁵ Dāḡ-təssəba n-tärha ta hanäḡ-ija a fäl iḡtäs dāḡ-tihusay n-erhet-net s-ad-numas aratän-net dd-ija s-iman-net dāḡ-idəm n-Ḡisa Älmasex.

⁶ Ämära, naməlet-t dāḡ-təssəba n-təḡḡäre n-ännuḡmät-net-wa hanäḡ-ikfa bännan dāḡ-äddimmät n-Wa ikna tärha.

⁷ Tädarfit ta hä t ašni n-Rure-s, wa inḡälän a hanäḡ-ijräwän tenäšše n-ibäkkadän, äzzäbbät-dd fälla-näḡ ärrəzäḡ n-ännuḡmät-net ed,

⁸ äsnäfläy-anäḡ dāḡ-a-wen s-särho d-tayətə ta hanäḡ-ikfä i-ad-nəjrah erhet-net.

⁹ Iffəssär-anäḡ-dd əddäraj n-erhet wa s-dd-äsnäfaläl älmäḡna-net ašäl-i-dāḡ: a-wen, a t-ämoosän äddäbara ähuusken s-äru d-t-issəbdäd Mässinäḡ,

¹⁰ innä afäl dd-äddewän äzzämanän har dd-osa wa n-Älmasex, ad-dd-isədəw a-wa ihan isənnawän d-äkall, innukəl fälla-s.

¹¹ Dāḡ-təssəba-net ənta-en-dāḡ d-a-wa hanäḡ-ikittəw a fäl äru, härwa wär t-illa fäw a dd-ixlakän, ad-iḡtäs Mässinäḡ s-ad-hanäḡ-isənnəfrən dāḡ-erhet-net wa issəbdäd.

¹² Adiš, naməlet älxurmät n-a-wa hanäḡ-ija Mässinäḡ, näkkänəḡ-i järnen ätḡtämanänäḡ s-tizarät dāḡ-Älmasex.

¹³ Ənta-den-dāḡ a-wa jəm käwänəḡ-dāḡ, ed təsläm i-tidət ta ämoos Älənžil-i iḡalläsän, tomänäm sär-s, jəm a-wen ḡas, iššəšwäl-käwän s-Unfas Šaddijän-i s-hawän-ijjäs ärkäwäl-net.

¹⁴ Unfas Šaddijän a-s äddimmana n-täkasit ta hanäḡ-itwär Mässinäḡ. Ijjäs-anäḡ ärkäwäl n-a-s ašäl wa dd-e-isəmdəw sär-näḡ tädarfit-net, ad-äj jer-ifassän-nänäḡ imraš wi ähuuskätne hanäḡ-itwär, a-wen-dāḡ a fäl, naməlet älxurmät n-Mässinäḡ.

Tittar ti ijä Buləs i-käl-Ifäsus

¹⁵ Dāḡ-isälan n-a-wen-dāḡ, a fäl näkk-dāḡ, əjjäšan-ahi isälan n-immun-näwän s-Emäli Ḡisa d-tärha ta säknem iməšseddəjän,

¹⁶ ad-t-təddaläḡ hak ašäl, tumayäḡ-as dāḡ-təssəba-näwän.

¹⁷ Təddaläḡ Abba n-Emäli-nänäḡ Ḡisa Älmasex, ənta-i t-illän jənnəj-härät iket-net i-ad-käwän-äkf särho, isənnəfiləl-dd-hawän iman-net i-ad-t-təknəm muzəyät,

¹⁸ isəmmələwləw ulhawän-näwän s-ännur-net i-ad-təkkəsäm äššäk dāḡ-ätḡtäma wa käwän-äsjär a-s käwän-dd-iḡrä s-iman-net, təlmədäm dāḡ fäll-təḡḡäre n-täkasit ta s-irha ad-hawän-tät-uḡzan käwänəḡ d-iməšseddəjän,

19 d-təmxäre n-tärna ta s-wär t-illa a dār-togdäh ihäkk imumənän s-a-wa dār-ogdäh aššahät-net, tädabit-net d-tärna-net.

Tärna n-Mässinäx ta dd-täsnäfaläl tanäkra n-Ŷisa jer-inəmmuttan

20 Tärna-ten-däx, äšmašäl-tät-dd s-äššahät ašäl wa dd-issenkär Älmasex jer-inəmmuttan təzzar, äšxäym'-e daw-axil-net däx-išənnawän,

21 jənnəj-e d t-illäm ənjalos, d-e d t-illäm ämänokal, d-e d t-illäm härät ilan tärna däx-išənnawän, d-e d t-illäm amänay; ässajär isəm-net e d t-illäm isəm itawäxren däx-äddunya hakd-däx e d t-illäm isəm s-ilkam ad-däx-s ätiwäxra.

22 Ija härät iket-net daw-iðarän-net, ij'-e eḡäf n-älkänisät iket-net-i

23 tämoosät taḡəssa ta däx-izzäx ənta-i dd-äsnäfalälän Mässinäx-i ilsän äkall s-älmäxna imdan.

2

Ännuymät n-Mässinäx a iyalläsän

1 Kāwāneḡ ibda, tämmum dat-Mässinäx, a-wa-däx hawän-jän älyibän-nāwän d-ibäkkadän-nāwän.

2 Tätiläläm äzzāman-en a-wa fäll-təgl' äddunya, tamašäläm a-wa fälla-wän irha Iblis-i äminakälän fäll-alšinän-i əlläyən, ämiinakäl daḡ fäll-inämašrayän wi n-iməffelləgän.

3 Äddinät-win-däx, käla däx-sän näḡḡin näkkäneḡ-däx, nəlkam ḡas i-derhanän wi läbasnen n-tiḡəswen-nänäx d-erk inəzjam-nänäx; ässiitbät a-wen tumast-nänäx n-käl-äddunya wären əzley d-imidiwän-näsän. Wār hin-äqqima ḡas ar ad-fälla-näx dd-izəzzubbət Mässinäx aḡkär-net s-əmmək wa s-t-dd-mad-izəzzubbət fäll-äddinät wi iyyäḡnen t-wären äksuḡ.

4 Māšan Mässinäx, mäqqār tāhanint-net, ij'-anäx tārha-i-däx mäqqārät,

5 s-härwa nämmut dat-Mässinäx, a-wa-däx hanäx-jän uḡlemän-nänäx, ässodär-anäx näkkäneḡ hakd Älmasex ed ännuymät-net a kāwän-iyalläsän.

6 Däx-təssəba n-Ŷisa Älmasex-en-däx a fäl hanäx-dd-issenkär Mässinäx näkkäneḡ hakd ənta jer-inəmmuttan, äsnäxäym'-anäx dār-s däx-išənnawän.

7 A-wen, ij'-e däx-milḡaw-net i-ad-əlmədän äddinät fäll-təmxäre, d-əjut n-ännuymät wa ihän Ŷisa Älmasex s-wär-ilkem ad-istak.

8 Ännuymät n-Mässinäx äddewän d-immun sār-s a iyalläsän; a-wen, wädden ägg-adəm a dd-ifal, ihuk n-Mässinäx a ämoos.

9 Wār t-järrəwän imärkedän ämešäl äwadəm i-ad-wär-itəbəriḡ wäl' iyyän.

10 Mässinäx a dd-ifäl a-wen, ənta a hanäx-dd-ixläkän s-tiḡusay s-tärna n-Ŷisa Älmasex i-ad-nudabät amišəl n-imärkedän wi s-äru d-tän-dd-äsmäjnät Mässinäx i-ad-tän-nämašäl.

Tassaḡt ta täynayät t-təllät jer-imumənän däx-älkänisät

11 A-wen-däx a fäl ämära, wār hin-təttəwäm a-s käla tämoosäm inəzzulam,† jannen-awän käl-Älyähud-i ḡur-ämoos amili härät: «Ed-kärämeläy», kud-däx, amili-en, wār-ämoos ar härät n-tamənkiḡt dd-inakkäḡ äwadəm s-äfuss-net däx-taḡəssa.

12 Äzzāman-en-hi, wār t-illa a toharäm d-Älmasex, wār t-illa a tässirtäyäm d-tamətta ta n-käl-Işrayil, wār toheräm dār-sän ärkäwäl wäla ärkäwälän n-tassaḡt wi hasän-ätwäjjän, wäla äḡḡäma n-Mässinäx däx-äddunya wäla däx-älaxärät.

† 2:11 2:11 — ḡur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyäḡnen iket-näsnät, ti n-inəzzulam. — Ašäl-i-däx, änəzzalim, äkafär (ere wärän issen s-Mässinäx).

¹³ Ænta-den-däx a-wa däx-wän ijan mäšan, ašäl-i-däx, käwäneḍ-i s-käla tujəjäm, äzžeḥəz-käwän-dd Mässinäx iman-net s-ašni wa n-Älmasex inxälän, tosäxäm d-ÿisa Älmasex.

¹⁴ Ænta-en-däx a-s älxer-nänäx, ənta-i issärtäyän käl-Älyähud d-inəzzulam, ämoosnen ihənnin, sänatät tiwsaten, ij'-en iyyän n-äwadəm, ikkäs-in jere-sän ajəzzar wa ikkän jere-sän ed ikfa taḡəssa-net ašäl wa d-ämmut i-ad-hin-änd äxalla wa tän-ibḍän.

¹⁵ Tamättant-ten-däx ija a-s hin-issəmdä a-wa hin-äba däx-a-wa innä alämär wa n-ännäbi Mosa däx-isälan n-a-wa xälälän d-a-wa xäramän. Issärtäy ämära käl-Älyähud d-inəzzulam, imäl-t älxer jere-sän i-ad-umasän fäll-əssin-essän tiyyät tawset dār-s tosaḡät,

¹⁶ äzmäzäl äddinät d-Mässinäx d-je-iman-näsän s-tamättant ta ija fäll-tajəttewt, ij'-en tiyyät taḡəssa i-ad-äbas t-illa anməkšar jere-sän.

¹⁷ ÿisaÄlmasex, ašäl wa dd-osa, osä-dd i-ad-ixṭəb isälan n-Älənžil-i hawän-ih' älxer käwäneḍ-i n-inəzzulam-i änimäjjänen d-Mässinäx hakd-däx käl-Älyähud-i sār-s dd-əllanen;

¹⁸ ənta-en-däx a ikfän Unfas iyyän Šäddijän i-käl-Älyähud hakd inəzzulam i-ad-əjrəwän tabarät s-Abba.

¹⁹ Ämära, äbas tämoosäm iməjarän wäla äddinät əzzaḡnen äkall wär len, tohäräm äkall d-iməšseddəjän, tämoosäm d-ägg-ehän wa n-Mässinäx,

²⁰ tolähäm d-ibəlxan n-tihun wi s-ikräs ehän däx-a-s ässas n-ehän-en, a-wa äxtäbän inəmmušal d-ännäbitän a t-ämoosän; ÿisaÄlmasex iman-net a-s tähunt n-ehän ta n-aḡmār fäll-idäy ehän iket-net.

²¹ ÿisa-en-däx a fäl änimätṭäfnät tihun ti s-ikräs ehän i-ad-wär t-isidəw härät, ogdäh iket-net, itimḡar i-ad-umas ehän-en, ehän šäddijän däx-izzay Emäli.

²² Käwäneḍ daḡ-i n-imumənän, tänimätṭäfäm dār-s, i-ad-tumasäm ehän däx-izzay Mässinäx s-Unfas-net.

3

Buləs a-s änämmašul n-Mässinäx s-inəzzulam

¹ A-wen-däx a fäl, näkk Buləs, ašäl-i-däx, ämoosäx u-takärmüt däx-təssəba n-ÿisaÄlmasex-i hi-ijän änämmašul hawän käwäneḍ-i n-inəzzulam,

² äšmašäl-ahi-dd sār-wän Mässinäx däx-ännuḡmät-net i-ad-käwän-in-səssiwoḍäy isälan-net,

³ ənta-i hi-dd-äsnäflälän əddäraj wa s-hawän-odašäy isälan-net a ənḍärrän däx-armuḍ,

⁴ mäšan afäl täḡräm təkarḍe-ta-däx, ad-təjrähäm a-wa-däx s-hawän-ässewäläx ed näkk, Älmasex a hi-issəfhämän älmäḡna n-əddäraj-wen-däx.

⁵ Isälan-wi-däx, əzzurəyatän ti hin-okäyenen, wär tänät-dd-izjer ägg-adəm s-dd-äsinäfaläl Mässinäx älmäḡna-näsän-has mäšan, ašäl-i-däx, issəlmäd älmäḡna-näsän s-tärna n-Unfas Šäddijän i-inəmmušal-net wi n-iməšseddəjän d-ännäbitän.

⁶ Əddäraj-en-hi, älmäḡna-net a-s inəzzulam hakd käl-Älyähud, iyyän n-ajäräw a jän ḡur-Mässinäx, ämoosän tiyyät tawset, ohärän iket-däx-näsän d-ÿisa Älmasex ärkäwäl wa s-ätwäjjän isälan-net däx-Älənžil.

⁷ Näkk-i, ij'-ahi Mässinäx s-tärna n-ännuḡmät-net akli-net, wa ixatṭäbän isälan n-Älənžil,

⁸ näkk-i n-adday je-imešseddəjän, ikf'-ahi Mässinäx ännuḡmät-net i-ad-äjäy i-inəzzulam isälan n-təḡḡäre n-ärrezäx wa ihän Älmasex,

⁹ äffäsäräx-asän iket-däx-näsän isälan n-öddäraj wa s-käla ättunkäl iket-di dd-ixalläk Mässinäx äddunya, s-ašäl-i-däx, änfaläl-dd älmäxna-net.

¹⁰ Isälan-en, äsnäfaläl-tän-dd Mässinäx i-ad-tumas älkänisät əssəbab wa s-lammädän imänokalän d-käl-äššahät wi əzzäxnen isənnawän s-tihusay d-əjut wa ija sārho n-Mässinäx.

¹¹ A-wa s-äru t-issəbdäd Mässinäx däx-isälan-win-däx, ämešäl-t Emäli-nänäx Yisa Älmasex-i

¹² hanäx-ijräwän däx-təssəba n-immun wa sār-s nəja, anmihaz d-Mässinäx s-ənniyät t-iflasän.

¹³ A-wen-däx a fäl däx-wän ärheex, ad-wär hawän-igəddəl aḡāna wa hannäyāx akuyəd, änn-ak, umaset-awän a-wen əssəbab n-aḡkul n-iḡäfawän-näwän.

Təmyäre n-tārha ta ija Yisa Älmasex i-tamətə-net

¹⁴ A-wen-däx a fäl rakkäxäx dat-Abba i-ad-t-ädələx,

¹⁵ ənta-i s-wär t-illa ejädäš iwarän isənnawän wäla äkall s-wädden iḡarr isəm-net,

¹⁶ təddaläx-t ənta-i s-irzäx ännuxmət-net, wär t-illa a-s wädden ill'-e jənnəj-s i-ad-käwän-isəššuhət däx-iman-näwän s-tärna n-Unfas-net,

¹⁷ ikən immun s-Älmasex antum däx-ulhawän-näwän, təkənəm daḡ anmārḡ jer-iman-näwän,

¹⁸ tudabem käwänəḡ d-iməššeddəjan iket-näsän ujreh n-tārha-net-i-däx mäqqärät: tārha daḡ jat tähhərut d-təššəjrət d-aḡkul d-atrəjji-i-däx s-wär t-illa fäw a tät-madän-iktəl.

¹⁹ Təddaläx Mässinäx i-ad-təkənəm ujreh n-tārha n-Älmasex-i-däx mäqqärät tojərät a-wa s-äddoobät eḡäf n-ägg-adəm ad-t-dd-isäxləy, iḡney Mässinäx ulhawän-näwän s-a-wa iḡnäy wa-net.

²⁰ Mässinäx-i äddoben ad-äj a ojarän a-wa s-äddooben iḡäfawän-nänäx utär-net d-azənnəzjəmi däx-s, ənta-i äddoben ad-hanäx-idhəl s-tärna-net ta simrumirät ulhawän-nänäx,

²¹ tumaset təmmal ti-net däx-älkänisät, d-däx-təssəba n-Yisa Älmasex härkuk. Amin!

4

Tassaxt däx-alkum i-Yisa Älmasex

¹ Ayətma! Äsimätäräx-käwän näkk-i n-u-takärmüt däx-təssəba n-Emäli d-ad-təjəm tämudre tänihäjjät d-teḡäre ta käwän-dd-ija Mässinäx s-iman-net.

² Särəsät iman-näwän däx-härät iket-net, izadät, zäydärät, tənəməšmāräm jer-iman-näwän däx-tārha.

³ Äjät a-wa täddobem iket-net i-ad-təḡḡəfäm tassaxt ta n-iyyät däx-käwän-ija Unfas Šäddijän, ämlet älxer jere-wän.

⁴ Tiyyät taḡəssa a tämoosäm,

Unfas daḡ iyyän ḡas,

iyyän n-äḡḡäma

a käwän-äsjär Mässinäx a-s

käwän-dd-iḡrä s-iman-net;

⁵ Emäli iyyän,

immun iyyän,

atwəsəlmaḡ däx-aman daḡ iyyän.

⁶ Mässinäx, iyyän ḡas,

ənta a-s Abba n-e d t-illäm ägg-adəm,

ill'-e jənnəj-härät iket-net,

ässodär härät iket-net,
ih' ulhawän iket-näsän.

⁷ Däx-ännuxmät-net, hak äwadəm-däx, ij'-as isuf wi itäjj Älmasex i-äddinät i-ad-hin-səssiwəđän ämaşal-net.

⁸ A-wen-däx a fäl innä əlkəttab n-Mässinäx däx-isälan n-Ÿisa:
«A-s ikk' išənnawän,
irna imiksänän-net,
äşräwräw-tän ɗara-s
təzzar ija isuf wi s-irha i-dägg-adəm.»

⁹ Ma ämoos älmäxna n-täfert ta tənnät: «İkk' išənnawän»? Älmäxna-net a-s Ÿisa-i ijjäşän ider n-äkall, ənta ɗax a ikkän išənnawän.

¹⁰ Ənta-en-däx s-hawän-hex ti-net, ənta-i ijjäşän ider n-äkall, ənta ɗax a ikkän aşənnə wa hin-illan däx-işənnawän, ämnakäl fäll-härät iket-net.

¹¹ Ämära, däx-isälan n-isuf wi ijä, ənta iman-net a ijän iyyäđ inəmmuşal, iyyäđ ännäbitän, iyyäđ imällänžalän,† iyyäđ ärrabexän wi n-imännähäđän d-imäsäxran n-älkänisät.

¹² Isuf-win-däx, ij'-asän-tän i-ad-särxəsän i-iməşşeddəjän tadäwla, əkfən-tän imutaj wi s-amiyatärän i-ad-təhəl älkänisät-i tämoosät taɗəssa n-Älmasex s-data.

¹³ Dihen, ad-näj issux imdan däx-immun wa nohär, nəkən təməzzuyt n-Rure-s n-Mässinäx, numas äddinät äxradnen s-toläh tämudre-näsän d-ta n-Älmasex-i wär-iwer əlxib wäl' iyyän.

¹⁴ Ad-äbas nämoos aratan s-täşikwält n-teɗäre tän-dd-təmmärät-däx, ad-tän-täzzawät; näxləs däx-a-wa sälmadän dägg-adəm wi wären tətär ar ere äşnäməşräyän s-tikərras-näsän.

¹⁵ Numaset äddinät tinmənninen tidət täddeewät d-tärha i-ad-nədwəl, naläh d-Älmasex-i n-ämizär-nänäx.

¹⁶ Ənta-en-däx a-s əssəbab wa dd-isadawän äddinät i-ad-asəxən s-əmmək wa s-osäxän izəmmuz taɗəssa n-ägg-adəm. Taɗəssa, afäl hak tasläđt-net däx, işl'-eet a-wa tät-iwärän, ad-daggäl iket-net, togdäh, tosaɗ. A-wen-däx a fäl, nənmärhet i-ad-nəhəl s-data.

A-wa s-käla t-nämoos d-a-wa nämoos aşäl-i-däx

¹⁷ Ämära, a-wa, ənney-t, tiləsäx ɗax tənna-net däx-təssəba n-Emäli: wär tolehäm d-inəzzulam† -i wären əgla ar fäll-mäləyäxna n-älxal,

¹⁸ tihay a däx-ärjaşän, əžhalän, äqqrän ulhawän-näsän, tədraj-asän tämudre ta ihäkk Mässinäx.

¹⁹ Äsetän däx-təzzuləma d-iba n-täkrakıđt d-asəmmäđəs n-iman-näsän d-tärha n-ajärəw okäyän ämaku.

²⁰ Mäşan, käwäneđ, wädden erk älxal-wen-däx a käwän-issäxra Älmasex

²¹ kunta ənta a fäl təlmädäm, təlkämäm i-tidət ta käwän-issäxra Ÿisa.

²² Äyyät fälla-wän erk älxal wa s-käla t-tättiläläm, təbđəwäm d-derhanän n-tiɗəswen-näwän ed a-wen wär dd-itiirəw ar əlhəllak s-ägg-adəm.

²³ Äyyät Mässinäx ad-isəynəy inəzjam-näwän, äj'-iwän äddinät ärjaşnen s-tayətə təynayät,

²⁴ əkrəşät älxal wa ikarräş äwadəm ässiynäy Mässinäx, äxədät, işdajät, tənəm tidət däx-härät iket-net.

† 4:11 4:11 Isəm n-äddinät wi s-ämaşal-näsän, iji n-isälan n-Älənžil. † 4:17 4:17 – Ÿur-käl-Älyähud, ere wärän ämoos ägg-Älyähud s-aläşäl meɗ ere wärän ilkem i-äddin-näsän, iket-net, änäzzalim a ämoos. A-wen-däx a fäl tiwsaten ti iyyäđnen iket-näsnät, ti n-inəzzulam. — Aşäl-i-däx, änäzzalim, äkafär (ere wärän issen s-Mässinäx).

²⁵ A-wen-däx a fäl, əbdəwät d-bahu, ännət hak iyyän däx-wän tidət i-amidi-net ed ämära-däx, hak iyyän däx-näx, ämoos aşrut n-iiyyän.

²⁶ Afäl käy-ijjäs aḍkär, wär töyy aḍkär-näk ässoḍ'-ik däx-a išlayän, wär toyyed täfukt toḍa ha tösəmme n-a-wen ulh-näk,

²⁷ wär jem i-Iblis taşləlt s-käwän-oräm.

²⁸ Wa itikrən, wär-itiləset tikra, änn-ak, ixdəmet s-ifassän-net i-ad-ijrəw s-älxaqq n-tide-net, idhəl ənta-däx wa tärmäs tämäxatert.

²⁹ Wär dd-izəjjəret məjräd səmmän, a ämoos-däx, imawän-näwän, änn-ak, i däx-wän orän emm-net i-məjräd-däx, izjəret-t-dd a infan härät, iknan, wärän inxes iman n-äddinät wi has-äsijädnen.

³⁰ Wär zəzzäkänzärät Unfas Şəddijän n-Mässinäx-i s-käwän-işşəşwäl i-aşäl wa dd-e-isəmdəw sär-wän tädarfit ta s-innä.

³¹ Wär toyjem tösəmme wäla äšo wäla aḍkär wäla terk tettert wäla tigəggar, wär toyjem wäla däx-härätän-win-däx ikraş ekew däx-ulhawän-näwän. Əbdəwät d-tälläbäst a tämoos-däx.

³² İzadät jer-iman-näwän, nəmiḍənät tähanint, xaymät tinməñsim jer-iman-näwän s-əmmək wa s-hawän-in-inša Mässinäx däx-idəm n-Älmasex.

5

Ättäbeya n-äddinät hanen ännur

¹ Ayətma! Şəmad aratan n-Mässinäx ikna tərha a tämoosäm, adiş, tälälät-t.

² Tännähədet tərha däx-a-wa täjjäm iket-net s-əmmək wa s-hawän-tät-issəkna Älmasex-i ikfän iman-net, ämmut i-ad-umas takute lat älqim, s-ijraz aḍu-net i-Mässinäx.

³ A-wen-däx a fäl wär jere-wän dd-tätwäḍkalnet isälan n-äwadəm ikfan iman-net iba n-täkrakiḍt wäla asəmməḍəs n-iman-net wäla utär n-terşe tokäyät ämaku. A-wa härätän s-wär-änhäjja faw ad-dd-titwəxrin jer-iməşsedəjäñ.

⁴ Wär safälxaḡät, wär täjjät məjräd wärän ila älməxna, wäla tekäşkäşt wärät la äddälil, änn-ak, a täjjäm-däx, xaymät tumayäm i-Mässinäx ijitän-net.

⁵ Əlmədät a-s äddinät wi əkfänen iman-näsän iba n-täkrakiḍt d-wi saməḍasnen iman-näsän d-wi ha tərha n-härät-i wärät təzley d-älḡibadät n-äşşänämän; äddinät-en, xəram-asän ahänay n-Təmmənəya ta n-Älmasex d-Mässinäx.

⁶ Wär käwän-isəsəwədet əwadəm s-təzude n-iləs wärän infa härät ed anməşri şund-wen-däx ad-dd-itirəwän aḍkär n-Mässinäx fäll-äddinät wi unjäynen s-ämişəl n-tənna-net.

⁷ Äddinät wi tamaşalnen härätän-win-däx, wär tän-täsmədäwäm.

⁸ Käla häm käwəneḍ-däx tihay məşan, aşäl-i-däx, tosəxäm d-Emäli, adiş, əṭṭəfät älخال wa n-dəgg-ännur;

⁹ ännur daḡ, wär t-dd-izəjjär ar miḡaw, iqqud d-tidət.

¹⁰ Şəmad dəgg-ännur a tämoosäm, əlmədät a-wa ijrəzän i-Emäli, tamaşäläm-t.

¹¹ Wär tihrät härät d-mäləyəḡnatän wi tamaşalän käl-tihay, änn-ak, səffukkärät a-wa tamaşalän

¹² ed a-wa tän-işillun däx-ufär, əsikärakəḍ wäla edäwänne däx-s.

¹³ Wär täkärrasnet iman-näsän, ilkam ad-dd-isəffukkär ännur a-wa tän-işlän iket-net,

¹⁴ ed ännur, wär t-dd-izəjjär ar ännur. A-wen-däx a fäl ätwännä:

«Jäy! Käyy-i iṭṭäsän, ənkär-dd däx-eḍəs
Ənkär-dd jer-inəmmuttan wi jer-tənsed

i-ad-fälla-k isəmmələwləw Älmasex ännur-net.»

15 Äjät önnyät i-tämudre-nāwān, uday ad-tumasām äddināt wāren la tayette, umasāt imessorha.

16 Äjät ärramāt dāḡ-taḡrəst-nāwān, äyyät fälla-wān a-wa wār-ihā älfäyda ed, išilan läbasnen a fälla-nāḡ janen.

17 Wār tāmoosām äddināt irmas iba n-tayette, əjrähät erhet n-Emäli.

18 Wār sässät asməd har dāḡ-wān itakkās önnyät ed iba n-älxal a-wen, änn-ak, äyyät Unfas Šaddijän a dāḡ-wān ännähäd.

19 Nəmätṭəfät jer-iman-nāwān s-təmmalen dd-əzjarnen Äzzäbur, d-təmmalen kāwān-samätarnen d-isuhaḡ sār-wān dd-oraw Unfas Šaddijän. Aməlat Emäli s-ulh imdan.

20 Umayät härkuk i-Mässināḡ-i n-Abba a-wa hawān-ija iket-net dāḡ-isəm n-Emäli-nānāḡ ḡisa Älmasex.

21 Isərəset hak iyyän dāḡ-wān iman-net i-amidi-net dāḡ-təssəba n-tuksəda ta jām i-Älmasex.

Ehän n-älmässexitän

22 Tiḡeden! Särəsmät iman-näkmät dat-meddən-näkmät šund a-s Emäli a dat-täsräsmät iman-näkmät,

23 äniihäjjā a-wen fäl-a-s, ähaləs a-s ämizār n-hänne-s s-əmmək wa s-ämoos Älmasex eḡäf n-älkänisät-i tāmoosāt taḡəssa-net ta dd-iḡlās.

24 Emmək-wa-dāḡ s-täsiräs älkänisät iman-net dat-Älmasex, əmmək-wen-dāḡ day a-s lanāt tiḡeden ad-särəsnāt iman-näsnāt dat-meddən-näsnāt dāḡ-härät iket-net.

25 Meddən! Ärhet hak iyyän hänne-s s-əmmək wa s-irha Älmasexälkänisät-net-i s-ija tārha ta fäll tät-ikfä iman-net,

26 i-ad-tät-dd-isəbdəd dat-Mässināḡ, wār tät-iwer äḡib wäl' iyyän ed, ənta iman-net a tät-iššəšdäjän, ässiräd-tät s-mäjräd-net-i išašdajän,

27 i-ad-dd-təbdəd data-s təkna tihusay, täsisahäḡ ašäl, wäla äḡib wäla ešer wäla ankəmmi wäl' iyyän.

28 Emmək-wen-dāḡ day a-s lan meddən s-ad-əṭṭafän tiḡeden-näsän, əjən-asnāt tārha d-önnyät wa jän i-tiḡəswen-näsän. Tārha ta jed i-iman-näk, äjet i-hänne-k

29 ed wār t-illa ere iksanän iman-net, änn-ak, hak äwadəm ija önnyät i-taḡəssa-net, išakš'-et, isals'-et. Emmək-wen-dāḡ day a ija Älmasex i-älkänisät

30 ed näkkäneḡ-i sār-s omännen, nämoos tisləḡ n-taḡəssa-net.

31 A-wen-dāḡ a fäl innä mäjräd n-Mässināḡ:

«Ad-ifəl ähaləs ti-s d-ma-s, asäḡ d-hänne-s, umasän fäll-əssin-essän tiyyät taḡəssa d-iyyän n-äwadəm.»

32 Mäjräd-wa-dāḡ hawān-jeḡ dāḡ-isälan n-əddäraj wa tāmoos tassayt ta ija Älmasex d-älkänisät-net, əssanāḡ a-s wār räqqis ujreh-net

33 mäšan, ifraḡ fäll-hak ähaləs-dāḡ, ad-ärh hänne-s s-əmmək-wa-dāḡ s-irha iman-net; səmḡäret day hak tamäḡt, ähaləs-net.

6

Isälan n-a-wa dd-iqqälän imārawän d-aratän-näsän

1 Aratän! Sajadät i-imārawän-nāwān, ənta-den-dāḡ a-wa oḡädän fälla-wān irha Emäli.

2 Innä iyyän dāḡ-alämārän n-Mässināḡ:

«Səməḡär ti-k d-ma-k»;

alämär-wa-dāḡ, ənta a-s wa äzzarän äsdāw Mässināḡ d-ärkāwäl, innä:

3 «Afäl təssəməḡäräd ti-k d-ma-k,

ad-təjrəwäd älxer, təkərəšäd taḡrəst.»

⁴ Kăwăneḍ-i daḡ n-imărawăn, wăr tăzzăkănzărăm aratan-năwăn änn-ak, äjät-asăn asədwal dăḡ-tăn saḡrem, tadăbbarăm-asăn s-a-wa innă Emăli dăḡ-măjrăd-net.

Isălan dd-ăqqalnen eklan d-məssaw-săn

⁵ Eklan! Săjdăt i-imălan-năwăn, uksadăt-tăn, semyărăm-tăn s-ulhawăn šaddijnen šund ḡas a-s Ălmasex iman-net a-s jăm a-wen.

⁶ Udaḡ ad-tajjăm a-wa fälla-wăn ärhăn dihad kăwăn-hannăyăn ḡas šund a-s tărham ad-kăwăn-in-əjrăhăn äddinăt, änn-ak, äjät a-wa fälla-wăn ärhăn s-ulh irḡan, ed a-wen-dăḡ a fälla-wăn irha Măssinăḡ.

⁷ Äjät a-wa kăwăn-iwărăn s-ulh imdan šund a-s Emăli a-s t-tajjăm wădden dăgg-adəm.

⁸ Təssanăm a-s hak äwadəm, jer-akli wăla elăll, hak äwadəm-dăḡ, ad-t-ăkf Emăli a-wa has-jăn imojjan-net.

⁹ Kăwăneḍ daḡ-i n-məssaw-s n-eklan, tajjăt a olaḡăn i-eklan-năwăn, udaḡ ḡas ad-fälla-săn samahaḡăm ed təssanăm a-s kăwăneḍ hăkd eklan-năwăn, Emăli-năwăn wa n-tidət ih' išənnawăn, wăr təzleyăm data-s.

Imutaj n-akənnas wi ikfa Măssinăḡ i-imumənăn

¹⁰ Darăt-a-wen daḡ, ətṭəfăt tărna n-Emăli i-ad-kăwăn-isəşşuhət.

¹¹ Əjbəsăt, təḡkəläm əzzənəfăn n-imutaj n-amjăr wi kăwăn-ikfa Măssinăḡ i-ad-tudabem ehel n-iman-năwăn dat-Iblis d-tidămaten-net.

¹² Ămăra, anmăny wa nəha, təssanăm a-s wădden dăgg-adəm a dăr-t nəja, änn-ak, nəj'-e d-kăl-tărna d-kăl-əlxəkum d-kăl-tădabit wi n-ăddunya ärjăşnen dăḡ-tihay, nəj'-e d-a-wa-dăḡ iglăn făll-tăllăbăst d-alşinăn wi əllăynen dăḡ-ălhăwa.

¹³ Şămad isălan-den-dăḡ, adiş, əjbəsăt s-əzzənəfăn n-imutaj n-akənnas wi kăwăn-ikfă Măssinăḡ i-ad-tudabem ehel n-iman-năwăn, afăl fälla-wăn dd-oḡa erk aşăl, tudabem akənnas s-a-wa tətṭăfăm, wăr təjewăḡăm.

¹⁴ Əhəlăt iman-năwăn: tumaset-awăn tidət, taməntəka; umaset-awăn iqqud, əltăḡ-idmar wa wăr nəbbəjnət tidij,

¹⁵ əmmək-wa-dăḡ s-tăssirmăḡăm esel n-tifădelen-năwăn, əmmək-wen-dăḡ daḡ a-s hărkuḡ, ḡaymăt təsidăwăm i-iji n-isălan n-Ălənžil-i săr-wăn-dd-ăwwăyăn əlxer.

¹⁶ A tăjjăm-dăḡ, umaset immun s-Măssinăḡ aḡărh wa hin-itiwăḡăn fälla-wăn əssămăn wi əhijăljalnen s-kăwăn-itəjjar Iblis.

¹⁷ Umaset-awăn əḡəllas wa kăwăn-ikfa Măssinăḡ takənbut ta hin-tiwăḡăt fälla-wăn tisăwaten, əşləjăt takoba ta əmoos măjrăd n-Măssinăḡ-i kăwăn-ikfă Unfas Şăddijăn.

¹⁸ Təddalăt Măssinăḡ hărkuḡ s-tărna n-Unfas Şăddijăn, əjləyăt hullan dăḡ-a-wen-dăḡ, wăr toyyem sendad n-a-wen irmas-kăwăn, təddalăt Măssinăḡ i-iməşşeddəjăn iket-dăḡ-năsăn.

¹⁹ Ăḡəlăt-ah'-in Măssinăḡ nəkk-dăḡ a hi-issărḡăsăn măjrăd, udabəḡ asuḡəl n-isălan n-əddărəj wa əmoos Ălənžil s-ənniyăt ozjan.

²⁰ Ălənžil-en-dăḡ a-s əmoosăḡ əlwakil, kud-dăḡ aşăl-i-dăḡ, dăḡ-təssəba n-iji n-isălan-net a făl heḡ takărmut. Əttărăt-ah'-in ad-əjrəwăḡ iman-in i-ad-udabəḡ iji n-isălan-en s-a-wa ilăn əmmək d-esăwe.

Tihulawen ti n-tişrayăt

²¹ Dăḡ-a-wa dd-iqqălăn taḡărha-nin hăkd-dăḡ a-wa hi-işlăn, ad-dăḡ-wăn əj, Tuşik-i emărh-in n-ənjə-ḡ n-ămayḡdal dăḡ-ămaşal-wa-dăḡ hanăḡ-ija Emăli, isălan-in;

²² əşimaşălăḡ-t-in săr-wăn i-ad-hawăn-əj isălan-nănăḡ, isəsmăḡ ulhawăn-năwăn.

²³ Ähuuläx-käwän-in, ətтарäx day s-Mässinäx-i n-Abba d-Emäli ҮisaÄlmasex a käwän-ikfän älxer käwäneḍ hakd imumənän iket-däx-näsän, tənmärhəm jer-iman-näwän, iwwaḍ immun-näwän.

²⁴ İkfä Mässinäx ännuymät-net i-äddinät wi jänen tärha təmdat i-Emäli-nänäx Үisa Älmasex. Amin!

Täkarde ta iktäb Buləs i-käl-Fəlibb

Äşajəš

¹ A-wa Buləs d-Timoti, eklan n-ŶisaÄlmasex, hin-əktabnen i-e d t-illäm eməššeddəj n-Ŷisa Älmasex izzayän ayərəm wa n-Filəbb, nəktab-in dağ i-ərrabexän wi n-imännähädän n-älkänisät d-imadhalän-näsän.

² Nəhuul-käwän-in, ikf'-iwän Mässinäx-i n-Abba-nänäx d-Emäli Ŷisa Älmasex ännuymät d-älxer.

Təmayit d-tedäwit n-Buləs dəx-isälan n-käl-Fəlibb

³ E-d käwän-dd-əkter-däx, ad-dd-äqqələx ças tumayäx i-Mässinäx dəx-təssəbana-wän,

⁴ e-d t-däläx-däx, ad-has-äjäx tamädilt-hawän täddewät d-tedäwit

⁵ fäl-a-s çur-aşäl-i-däx d-käwän-in-ässawädäx isälan n-Älənžil har näkk-da-däx, käwäned a-s imadhalän-in wi n-tidət.

⁶ Ekkasäx äşşäk a-s Mässinäx-i käwän-dd-intäjän s-a-wa-däx oläxän, ənta a käwän-e-idhəlän s-amışəl-net s-särho hundäx har aşäl-wa dd-e-iqqəl ŶisaÄlmasex.

⁷ Inəzjam-in hawän-den-däx, ənta-den-däx dağ a-wa äniihäjän ed wär käla okäy aşäl s-wädden təjraw-ahi tenere-näwän ed, əmaşal-wa hi-issäyläf Mässinäx dəx-ännuymät-net, oharäx-t där-wän härwa wär heç takärmüt äzzäman wa d-xaṭṭäbäx Älənžil, əknasäx fälla-s bärşex aşäl-i-däx d-heç tişəm.

⁸ Mässinäx a äjjəyhän i-tärha ta mäqqarät hawän-jex, tärha-nin dağ hawän, tooläh d-ta hawän-ija Ŷisa Älmasex.

⁹ Tattäräx s-Mässinäx, ad-timçar tärha-näwän, təhələm s-data, təjrəwäm musnät wa n-tidət, äddewän d-särho

¹⁰ i-ad-tudabem təbəddawt jer-a-wa oläxän d-a-wa läbasän, i-ad-tişdajäm, tumasäm äddinät wär-iwer älçib, äqqalnen i-aşäl wa dd-e-iqqəl Älmasex.

¹¹ Ŷisa Älmasex-en-däx a käwän-e-idhəlän i-ad-tumas təmudre-näwän, təmudre dd-tirəwät iqqud ed a-wen-däx a ämoosän älxurmät d-təmmal i-Mässinäx.

Uşreyän n-a-wa s-ihä Buləs takärmüt

¹² Ayətma-ç, ärheç ad-təlmədäm a-s a-wa səmmän hi-irmäsän, ehel n-s-data n-Älənžil a dd-oräw dəx-ulhawän n-äddinät äjjootnen

¹³ fäl-a-s, aşäl-i-däx, jer-däx-ehän n-ämänokal wa mäqqarän wäla dəx-idäggan wi iyyädnen diha-däx, wär t-illa ere s-wädden issan a-s tişəm ti heç, təssəba n-isəm wa n-Älmasex a fäl tänät-heç.

¹⁴ Təşşəm n-ayətma dəx-äddin, təkkäs äşşäk dəx-alkum i-Ŷisa ed hannäyän tişəm ti-heç, ikf'-en a-wen-däx hi-irmäsän taholät täynayät d-iba n-tasäja dəx-iji n-isälan n-Mässinäx.

¹⁵ Tidət, äddinät iyyäd, erk ənniyät d-utär n-asəgdah n-iman där-i a tän-ijän dəx-iji n-isälan n-Älmasex məşan, a-wen, wär hin-ikkəs a-s äddinät iyyäd, ənniyät oläxän a-s xaṭṭäbän Älənžil.

¹⁶ Wi əntäned, ärhan a-wa hän, əjlayän dəx-s ed əssanän a-s Mässinäx a hi-äsnäfränän i-ad-sətbətäx i-äddinät tidət ta ämoos Älənžil.

¹⁷ Wi tattärnen asəgdah n-iman-näsän där-i dāx-iji n-isālan n-Ālmasex, erk ənniyät wa n-əjrähät-ah'-in a äwwayän, ordan a-s a-wen-dāx a fäll-i dd-e-isiwəḏän təsəmme d-erk əmmək wa heḡ dāx-tišəm-in.

¹⁸ Āmāra, ma iḡsad a-wen? Jer-s-isoran wāla s-tidət, Ālmasex, ad-titwəjjin isālan-net i-āddinät. Ēnta-den-dāx a-wa hi-āsidāwen, hak ašäl daḡ timḡar-dd tedāwit-in

¹⁹ ed əflasāḡ a-s a-wa hannāyāḡ dāx-älḡizabāt iket-net, i n-tānfo-nin. Ēssanāḡ a-s, ad-dd-əzjārāḡ a-wen-dāx iket-net ed, təddalām-ahi Mässināḡ, idhal-ahi daḡ Unfas n-Ḳisa Ālmasex.

²⁰ Ēkneḡ asəddārhen n-ad-āj a-wen-dāx ed, wār-əkkesāḡ äṭṭāma-net, a-wen-dāx a fäl, wār hi-āskārakād iji n-isālan-net. A-wa ärheḡ dāḡ-Mässināḡ a-s jer-ašäl-i-dāx wāla ašəkka, umaset derhan-in asəḡar n-isəm n-Ḳisa Ālmasex dāx-taḡəssa-nin jer-əddarāḡ wāla ämmuḡ

²¹ fäl-a-s ḡur-i, Ālmasex a-s tämudre-nin, tämoos-ahi tamättant täsonḏaḏt.

Ma ufän i-amumən jer-tamättant d-tämudre?

²² A hi-ikfa Mässināḡ dāx-taḡrəst-dāx, ad-əšḡalāḡ a ih' älfäyda i-Ḳisa Ālmasex, a-wen-dāx a fäl wār-əssenāḡ əndek a-wa he-sənnəfrənāḡ jer-tamättant d-tämudre;

²³ änimäntāšāḡ jer-härätän-win-dāx n-əssin: itajjāš-ahi-dd derhan n-a-s uf'-ahi, ad-əjmāḏāḡ äddunya, äkkāḡ diha t-illa Ālmasex, ənta-den-dāx daḡ a-wa ufän s-a äjjeen,

²⁴ māšan daḡ hannāyāḡ a-s, dāx-təssəba-nāwän, iššām-ah'-in, äqḡimāḡ əddarāḡ edes-hawän.

²⁵ Ēkkasāḡ äššāk a-s ad-əkkəsāḡ härwa äzzāman jere-wän i-ad-təhələm s-data, timḡar daḡ tedāwit n-immun-nāwän.

²⁶ Dihen, ašäl wa d-kāwän-in mad-äqḡələḡ, ad-hawän-umas ašäl n-tedāwit s-dd-tässibāb tassayt-nānāḡ d-Ḳisa Ālmasex fäl təssəba n-a-wa hi-ija.

Tämudre tämmittälät Ālənžil

²⁷ Təssəba n-a-wen a fäl, əṭṭəfät dat-äddinät tämudre tässitbätät alkum-nāwän i-Ālənžil wa n-Ālmasex; jer-äqḡalāḡ-kāwän-in wāla, umaset a-s sallāḡ a-s tətṭafäm Ālənžil s-äššahät, tətṭafäm iyyän n-ənniyät d-iyyän n-ulh, jam iyyän n-akənnas dāḡ-isālan n-immun s-Ālənžil.

²⁸ A ijän-dāḡ, wār kāwän-särmaḡnet išənja-nāwän s-wāla a ənḏärrän. A-wa tamašalän a-s tasətbat n-əlhəllak-näsän, a-s ija a-wen kāwänəḏ, tämudre-nāwän a salmadät s-əḡəllas wa kāwän-ikfa Mässināḡ, a-wen, Mässināḡ a t-ijän.

²⁹ A-wen, janneḡ-awän-t, i-ad-təssanäm a-s teḡäre ta hanāḡ-dd-ija Mässināḡ dāḡ-ännuḡmät-net s-Ālmasex, ij'-anāḡ-tät-dd i-ad-sār-s namən, nənhəy daḡ aḡāna dāḡ-təssəba n-isəm-net,

³⁰ tahərəm där-i daḡ kāwänəḏ, anmāḡ wa s-hi-tənhäyäm heḡ-t, heḡ-t daḡ har ašäl-i-dāḡ.

2

Tassayt d-asrəs n-iman jer-imumənän

¹ Āmāra, šāmad tinmədhilām jer-iman-nāwän dāḡ-təssəba n-tassayt ta jām d-Ālmasex, šāmad tänimäṭṭafäm jer-iman-nāwän dāḡ-tārha i-ad-tätṭəfäm iyyän n-əmm s-tārna n-Unfas, adiš, nəmärhät jer-iman-nāwän, tənməḏinäm tāhanint.

² Āmāra d-jām tartit jat s-iyyän n-ulh, kunta tārham ad-hi-ijrəz a-wa häm, adiš, nəməṭṭəfät jer-iman-nāwän, tənmärhəm jer-iman-nāwän, tumasām šund iyyän n-āwadəm, talāhäm d-äddinät oharnen iyyän n-ittus.

³ Wār täjjät a dāḡ-wār kəttəwäm ar iman wi-nāwän, wār säjarät iman-nāwän äddinät, änn-ak, sārəsät iman-nāwän, təjəm fāw äddinät wi iyyāḏnen jənnəy-wän.

⁴ Wār tošelām ɣas ɗarāt tənfa n-iman-nāwān, ānn-ak, immāɣet hak iyyān dāɣ-wān i-a-wa he infun tamətte iket-net.

Ālmital n-asrəs n-iman wa dd-oyya Ālmaseɣ

⁵ Tālālāt ənniyāt wa fäll-igla Ƴisa Ālmaseɣ, təgləm fälla-s kāwāneɗ-dāɣ.

⁶ Ēnta, a-wa āmoos Mässināɣ, āmoos-t iket-net māšan, wār-itter ad-has-tumas tumast n-Mässināɣ mältaɣ dāɣ-äkkermämmäy i-ad-isigdāh iman-net d-Mässināɣ s-äššil,

⁷ ānn-ak, oyyä a-wen-dāɣ iket-net, ijä-dd iman-net akli, oläh-dd d-dägg-adəm i-ad-där-sän aläh härät iket-net.

⁸ Āsräs iman-net i-ad-āmašäl erhet n-Mässināɣ, irɗa s-tamättant, tamättant ta səmmät n-tajəttewt.

⁹ Təssəba n-a-wen-dāɣ āmešäl, a fäl t-iɗkäl Mässināɣ jənnəj-härät iket-net, ikf'-e isəm t-illan jənnəj-ismawān iket-näsän.

¹⁰ A-wen, ij'-e Mässināɣ dāɣ-təssəba n-a-s ed ätwäɣra isəm wa n-Ƴisa, ad-data-s irkāɣ a-wa ihän išənnawān d-a-wa ihän äkall d-a-wa t-illän daw-äkall, iybəd-t;

¹¹ äjjayhən äddinät iket-dāɣ-näsän, a-s Ƴisa Ālmaseɣ, a-s Emäli; itwəsəmyār s-a-wen-dāɣ isəm wa n-Abba Mässināɣ.

Akuyəd d-amišəl n-erhet n-Mässināɣ

¹² Ayətma, kāwāneɗ-i əkneɣ tārha, mašälät məjräd n-Mässināɣ, səxdəmäm əɣəllas wa kāwān-ikfa Mässināɣ dāɣ-tuksəɗa-net d-asəmyar-net. A-wen äjät-t jer-əlleɣ-t jere-wān bäršəy ašäl-i-dāɣ d-wār ɣur-wān t-əlleɣ, əjləyät daɣ hullan dāɣ-a-wen-dāɣ ed

¹³ Mässināɣ iman-net i sār-wān dd-orāwān tārha d-tädabit n-iji n-a-wen a kāwān-e-idhəlän i-ad-tudabem amišəl n-erhet-net.

¹⁴ A täjjäm-dāɣ, äjät-t wāla abjənjən, wāla tekenzart.

¹⁵ Wār kāwān-itəggaret udlem wäl' iyyān, išdajät, umasät aratän n-Mässināɣ wār-iwer əɣib wäl' iyyān kud-dāɣ təzzaɣām jer-əzzurəyät təfraxät, tänimäšräyät i-Mässināɣ. Umasät i-äddinät šund ānnur āmilāwlāwān dāɣ-tihay s-əmmək-wa-dāɣ s-äsimäɣmäɣän etran dāɣ-išənnawān.

¹⁶ Äjät-asän isälan n-Ālənžil-i tətṭäfäm ihäkkän tämudre, dihen, afäl ašäl-wa dd-iqqäl Ālmaseɣ, ad-hi-umas alkum-nāwān-has täsonɗaɗt tässiitbätät a-s wār-äxdemäɣ, wār-ənheyäɣ ayāna bännan.

¹⁷ Təssəba n-a-wen a fäl wār hi-issärmäɣ fäw ad-inɣəl ašni-nin, ämmätäɣ fäw, umasäɣ šund takute täwweɗät fäll-immun-nāwān s-Mässināɣ. Äddiwəɣ, oharäɣ dār-wān daɣ tedāwit-ten-dāɣ.

¹⁸ A-wen-dāɣ a fäl dāwätät i-ad-där-wān ahäräɣ näkk-dāɣ tedāwit ta jām.

Imadhalän n-Buləs: Timoti d-Ibbafärodit

¹⁹ Kunta otäs Emäli Ƴisa s-a-wen, diha-dāɣ s-a əndərrän, jaräɣ äṭṭāma n-ad-sār-wān-in-šəmmişäläɣ Timoti i-ad-hanäɣ-dd-äj isälan-nāwān, ismaɗ ulh-in.

²⁰ Ēnta-en-dāɣ ɣas a dār-i oharän äddägaɣät wa jəɣ fälla-wān, wār ɣur-i t-illa daɣ ere säl ənta.

²¹ A-wa iyyädän däx-äddinät, əššaxəlän n-iman-näsän xas a däx-oşalän wädden däx-wi n-Ŷisa Älmasex.

²² Däx-a-wa dd-iqqälän Timoti, təssanəm kəwāneḍ iman-nāwän a-s ənaxdim s-tidət a əmoos; ikf' iman-net hullan i-iji n-isālan n-Älənžil, nəmoos näkk d-ənta şund abba d-rure-s.

²³ Ənta-en-däx a-s jarəx aṭṭāma n-ad-t-in-şəmmişəlāx sār-wän, afäl əlmädäx a-wa däx-i-dd-e-işrəyän.

²⁴ Əkkasəx əššāk a-s kunta otas Emäli a-wen-däx, wär-e əhajəx wär kəwän-in-osey näkk iman-in.

²⁵ Məşan, iket-di d-itəjj a-wen, əşimaşälāx-in sār-wän Ibbafərodit wa n-əñña-x däx-äddin dār-oharəx əlxidmət i-Ŷisa. Wär t-illa anməny əjjaşəx däx-iji n-isālan n-Älənžil s-wädden ənməjjaş-t dār-i, ənta-en-däx a sār-i dd-təşmaşälām, əwway-ahi tirjət-nāwän.

²⁶ Naqq'-e tenere-nāwän. Ikm'-e məsällät wa jəm n-a-s ərhin hullan.

²⁷ Tidət-däx a-s ərhin har əbas t-norda təmudre məşan, oḍän-as Məşsinəy təhanint, oḍän-ahi-tät näkk-däx i-ad-wär fäll-i dd-tiwwaḍ tissant tojərät ta hi-tärmasät əməra-däx.

²⁸ A-wen-däx a fäl t-in-əsrarädäx sār-wän i-ad-t-taləsəm ahənay, təddawem, təfnəz fäll-i tissant näkk-däx.

²⁹ Səbbərrəkät-t afäl kəwän-in-iqqäl, təjəm-as dəx əsəbbərrək wa dār-ənihəjja ere ila Emäli ed äddinät şund-win-däx a ənihəjjanen d-ad-tän-səmyäräm.

³⁰ Ənta-en-däx a däx-hawän-əsəwələx, ənney-awän, dəroḡ hin-əssijjä a-wa-däx has-ija əlxidmət i-Älmasex. Iglä har ijä iman-net däx-miši, ij'-ahi däx-idəggan-nāwän a-wa s-ənihəjja a-s kəwāneḍ a hi-t-ijän ənnär t-təllam edes-hahi.

3

Iqqud wa s-ənihəjja ittəf-t əwadəm ilkamän i-Älmasex

¹ Dərät-a-wen, ayətma-x, səddəwətet-kəwän tassaxt ta jəm d-Emäli. Wär hi-ikma ad-hawän-sənniləsəx məjräd wa s-əru d-hawän-in-əktəbəx däx-isālan-net. Tənfo-nāwän a ihan a-wen i-ad-taxədäm.

² Agəzät iman-nāwän däx-erk inaxdimän, olähän xas d-iyyädän ənsaynen, agəzät iman-nāwän däx-sän; agəzät iman-nāwän däx-erk äddinät-win-däx xur-ija s-bahu a-s amili a itajjan əwadəm däx-tamətə n-Məşsinəy.

³ Ənhəywät! Näkkəneḍ-i-däx a-s äddinät wi jänen amili wa n-tidət s-ənta Məşsinəy a-s əssəbab-net, nəxabbäd-t s-tärna n-Unfas, abəraj-nənəx ŶisaÄlmasex wädden fərəḍän wəla əlxadatän əssiibdädän dəgg-adəm.

⁴ Ənnär t-illa ere äddooben ad-isəffullət iman-net fäll-fərəḍän wəla əlxadatän əssiibdädän dəgg-adəm, adiş näkk a he-izarän s-əlxəllas. Ləxätät-ahi xas ere hi-ojərän däx-isālan-win-däx?

⁵ Näkk, əmeləyəx əşäl wa s-əttam dərät tiwit-in, əgg-Işrayil wa n-tidət a əmoosəx, la-hi tawset ta n-Bənyamin, əmoosəx Ŷəbrani orawän Ŷəbranitän. Däx-a-wa əmoosän aləmār wa n-ənnəbi Mosa, kəla hey taggayt ta n-käl-faris;

⁶ wär t-illa ere hi-ojərän əjjəluyät wəla akfor, əqquzəbəx əlkənisät; däx-isālan n-a-wa ifräd aləmār fäll-əgg-adəm d-iqqud-has, wär t-illa uḍlem hi-iwarän.

Ŷisa a ha tənfo

⁷ Əməra, hərätän-win-däx jəx ibda abəraj, əbas dat-i əzlayän d-a wərän infa hərät däx-təssəba n-Älmasex,

⁸ əgley fəw har əşäl-i-däx, ija xur-i a-s wär t-illa a hi-infan s-hərät fäl təssəba n-azəzär-i jəx i-muzəyät wa jəx i-Ŷisa Älmasex-i n-Emäli-nin, uf'-ahi muzəyät-net

härät iket-net. Təssəba n-a-wen-däx a fäl əsserädäx ifassän-in däx-a-wa-däx s-käla hi-əmoos abəraj iket-net, əbas sār-i izlay d-ännikal ed wär t-illa a ärhex ar ad-təntəm təmudre ta n-Älmasex däx-ta-nin,

⁹ əqqaymäx day osaxäx dār-s hak ašäl, ättäjrəwəxet əsifälläx iqqud-in fäll-alkum-has ənta uhən iqqud i-alkum i-a-wa innä aləmār ed xur-Mässinäx, wär t-illa iqqud ilan idəm data-s säl wa ihäkk immun s-Älmasex.

¹⁰ Wär t-illa a əsidärhänäx a säl muzəyät-net ənta, əknäx day muzəyät n-tärna ta t-dd-təssənkärät jer-inəmmuttan, əhəräx dār-s tersəmmawen ti inhäy, alähäx dār-s taməttant ta ija

¹¹ ed a ijän-däx, jaräx ättäma n-ad-dd-aləsäx näkk-däx tanäkra jer-inəmmuttan, əjrəwäx təmudre ta täynayät.

Alkum i-Ÿisa har təmdəw äddunya

¹² A-wen janney-awän-t wädden i n-a-s innin əssəmdäx azzal wa hex, meyx day i n-a-s innin əsisəgdähäx däx-härät iket-net; əbo! Änn-ak, diha t-əllex, osasäx hullan däx-azzal-wen-däx i-ad-əjrəwäx marušät wa hi-itwär Mässinäx ed näkk, ijrəw-ahi ŸisaÄlmasex.

¹³ Ayətma-x, wär-ordeyx härwa a-s näkk-i-däx, härätän-win-däx, əzizəbbeyx-tän məšan, härät iyyän xas a iwwayän inəzjam-in: əkfey ərori-nin i-a-wa s-käla hi-išla ibda iket-net, wär t-illa a däx-ədgazäx ar a-wa t-illän dat-i.

¹⁴ A-wen-däx a fäl əjlayäx hullan däx-a-wa hi-išlän i-ad-əjrəwäx marušät wa hanäx-itwär Mässinäx däx-išənnawän s-hanäx-ija Mässinäx ərkəwäl-net däx-idəm n-Ÿisa Älmasex.

¹⁵ Ämära, näkkəneḍ-i əmoosnen meddən əmdanen däx-isəlan wi n-immun s-Mässinäx, nəttəfet əlxal-wen-däx hak ašäl, kunta day təll'e talxa təmiisəkkem, ədələt Mässinäx i-ad-arr tiṭṭawen-nəwän däx-isəlan-win-däx.

¹⁶ Hakd a-wen-däx, a ijän-däx, šamad nərmas tabarät-ten-däx toxadät, adiš nəjləyet däx-s, nəmsidəxet däx-tekle-nänäx.

Älmital wa dd-oyya Buləs

¹⁷ Ayətma-x, tələlət təmudre ta əttäfäx, səjrähäm day təmudre n-meddən-wi əlkəmnen i-älmital wa tän-nəkfä, tələləm-tän əntəneḍ-däx.

Išənja n-Älmasex

¹⁸ Əllan-t äddinät əjjootnen wären əja taməttant ta ija Älmasex fäll-tajəttewt härät. Äddinät-en, əru d-kəwän-əsmätäräx i-ad-hasän-təjəm ənniyät, ärhex day əməra ad-kəwän-aləsäx axətal fälla-sän. Əsninän iman-in a-s hawän-janney a-wa-däx.

¹⁹ İlkam däx-sän erk əjilal, əšləyän i-Mässinäx, ənnähəḍnät däx-sän tisatten-nəsän. A-wa s-käla inəqq, əbas tän-əsikərakəḍ, jän-t abəraj; wär-əlkemän inəzjam-nəsän ar i-a-wa fäll-təgl' äddunya.

Äkall-nänäx wa əynayän

²⁰ Win-äddinät, wär dār-sän noleh ed näkkəneḍ, əkall-nänäx wa əynayän, išənnawän a iha. Išənnawän-en-däx a-s ilkam ad-hanäx-tän-dd ifəl Eməli ŸisaÄlmasex-i n-Əmaylas-nänäx.

²¹ Ənta a iha ättäma-nänäx ed afäl dd-iqqäl, ad-fälla-näx-in-ikkəs tayəssa-ta-däx tärna taməttant, əkf'anäx tiyyät täynayät lat əlxurmät šund ta-net ed ila tärna s-innähəḍ däx-härät iket-net.

4

Isəmməterän wi ija Buləs i-käl-Fəlibb

¹ Ayətma-γ-i əkney tərha, naqq'-ahi tenere-nəwän ed tedawit-in d-abəraj-in a təmoosäm; ayətma-i əkney tərha, əknät uđəf n-Emäli.

² Iwədyā d-Sintəkya-i n-šätma-nəγ, əttarəγ dəγ-snät ad-əjənät əlxer jer-iman-nəsnät, ətəfnət iyyän n-ənniyät dəγ-alkum-nəsnät i-Emäli.

³ Käyy dəγ-i n-əmaydal wa n-tidət dəγ-əlxidmət-wa nohär, səlyən-tənät Iblis, tilaləd-asnät i-ad-ənməzəlnät. A-wa tiđeden hi-ədhälneñ hullan hullan dəγ-iji n-isälan n-Ələnžil, əntənəteđ d-Klima d-ayətma wi iyyəđnen dər-ənniixdəməγ, itbat a-s əktabən ismawän-nəsän dəγ-əlkənaš wa-dəγ əktabən ismawän n-əddinät wi əkkänen əlžännät.

⁴ Ayətma-γ, dəwätät härkuk dəγ-Emäli; a-wen, oləsəγ-t tənna, ənney-awän: dəwätät härkuk.

⁵ Əlmədnet əddinät iket-dəγ-nəsän s-təzude-nəwän ed Emäli ya, os'-iwän fəw.

⁶ Wər kəwän-itəšəwəšet härät wäl' iyyän, a-s təmyətäräm-dəγ, təlləyəm-t i-Məssinəγ s-tamədilt d-tittar əjlayneñ əddewneñ d-təmayit;

⁷ afäl jəm a-wen, ad-əj Məssinəγ əlxer dəγ-ulhawän-nəwän, əj'-asän igguz ojarən a-wa s-əddobät ənniyät n-əgg-adəm ad-t-dd-awəy, asəγ ulhawän-nəwän d-ənniyät-nəwän d-γisaƏlmasex.

⁸ Đarət-a-wen dəγ, ayətma-γ, a-wa ədduutten, a-wa ilän təmmal, a-wa oγədän, a-wa šəddijän, a-wa əmoosän isəsarha d-izəjraz d-a-wa ilän tənna d-a-wa ilän əlxal olaxän d-təmmal, əntəneđ-den-dəγ härätän wi s-ənnihəjja a-s jam-asän edəgg dəγ-ulhawän-nəwän.

⁹ Mašälät a-wa kəwän-əssəγrəγ d-a-wa tənəyäm fäll-i d-a-wa s-hi-təsləm har t-ənney d-a-wa jeγ iket-net. Afäl jəm a-wen, ad-kəwän-idhəl Məssinəγ, əkf'-iwän əlxer.

Təmayit ta ija Buləs i-käl-Fəlibb

¹⁰ Wər t-ih' əššək a-wen, əddiwen iman-in hullan dəγ-Emäli dəγ-təssəba n-əmmək wa s-hi-dd-təktäm, təssəlmədäm-ahi a-s wər hin-jeräm. Əssanəγ a-s əru d-təsdərhanəm iji n-a-wen, ənn-ak, əddäbara-net γas a wər təjrewäm.

¹¹ A-wen janney-awän-t wädden i n-a-s innin əmiγatärəγ s-härät, diha t-ölleγ, əzzayəγ ad-əjəγ ərramät dəγ-a-wa leγ dəγ-talxiwen iket-dəγ-nəsnät.

¹² Wər t-illa a-s wädden onanəγ-as, jer-əlləqqu wəla terše n-ehäre. Wər t-təlla talxa s-wädden ənhayəγ-tät, jer-tewwant wəla laz, wər sər-i təzley terše d-iba-net.

¹³ Wər t-təlla tanfust s-wädden, əštəfəγ-dd dəγ-s iman-in dəγ-təssəba n-tərna ta hi-ikfa Əlmasex.

¹⁴ Mašan, hakd a-wen-dəγ, a-wen, wər hin-ikkəs a-s irəš-awän Məssinəγ tadhəlt ta hi-jəm fäll-i təfnəzät timγutar.

¹⁵ Ya ayətma-γ wi əzzəγneñ aγrəm wa n-Fəlibb, təssanəm kəwəneđ iman-nəwän a-s, a-s əssəntəγ iji n-isälan n-Ələnžil, əzzəman wa dd-fäləγ teje ta n-Masidunya, a-wa-dəγ səl əlkənisät ta-nəwän, wər t-təlla əlkənisät dər-wän tolähät anufli dəγ-a-wa səγreγ, wər t-təlla dəγ ti hi-təđhalät s-əmmək wa s-hi-təđhəläm kəwəneđ.

¹⁶ A-wen, kəwəneđ γas a t-ijän ed härwa heγ aγrəm wa n-Təslonika, har əssin ihändəggan tirəjəm-ahi a-s əkkəsəγ timγutar-in.

¹⁷ Wädden ihuk-nəwän a đarət ošaləγ, ənn-ak, derhan a tattärəγ n-ad-ijatän imärkedän-nəwän ed ilkam, ad-təjrewäm imraš-nəsän γur-Məssinəγ.

¹⁸ Əlmədät a-s a-wa hi-dd-təssawəyäm, əjrawəγ-t iket-dəγ-net. A ija Ibbafərodit a-wa hi-dd-təssawəyäm dəγ-ifassän-in-dəγ, wər t-illa fəw a fäll-in əba wəla a hin-ođanəγ. Əmoos dat-i a-wa jəm a olähän d-ađutan n-nefran isihəwhəw əwadəm. Tirjit-nəwän-hahi, tooläh d-takute lat idəm dat-Məssinəγ, irđa sər-s, təjraz-as.

¹⁹ Mässi-ğ, Mässinäğ, wär t-illa a-s wädden ittaf-t, ənta-en-däğ a kăwăn-e-ikkəsän däğ-e d t-təlläm tāmăğatert s-a-wa dăr-togdäh terše-net i-ad-itwəsəmğăr isəm-net däğ-təssəba n-ŸisaĀlmasex.

²⁰ Imğaret isəm n-Mässinäğ-i n-Abba-nănăğ hărkuk. Amin!

Tihulawen

²¹ Tăhuulăm-in iməşşeddəjän n-ŸisaĀlmasex iket-däğ-năsän, ähuulăn-kăwăn-in dağ ayətma wi çur-i t-əllanen diha-däğ.

²² Ähuulăn-kăwăn-in dağ iməşşeddəjän iket-năsän, hullan wi äxdännen däğ-ehän wa n-Qäyşăr-i n-ämănokal n-äkall wa mäqqărän.

²³ Ija Emăli Ÿisa Ālmasex ännuğmät-net däğ-ənniyät-năwăn iket-däğ-năwăn. Amin!

Täkarde ta iktäb Buləs i-käl-Kuləs

Äšajəš

¹ A-wa näkk, Buləs, wa ija erhet n-Mässinäx änämmašul n-ŸisaÄlmasex. Ähuuläx-in näkk d-änŸa-x däx-äddin wa s-isəm-net Timoti

² ayətma-näx wi n-iməššeddəjän n-imaydalän däx-tassaxt d-Älmasex əzzäxnen ayrəm wa n-Kuləs. İkf'-iwän Abba-nänäx Mässinäx d-Emäli Ÿisa Älmasex ännuxmät-net d-älxer-net.

Təmayit d-tittar n-Buləs

³ Wär kälä hanäx-okäy ašäl d-wär nämmoy i-Mässinäx-i n-Abba n-Emäli-nänäx ŸisaÄlmasex däx-tittar ti has-nətäjj däx-təssəba-näwän.

⁴ Nətumay-as hak ašäl fäl-a-s, osän-anäx-dd isälan n-immun wa jəm s-Ÿisa Älmasex d-tärha ta n-tidət jəm i-iməššeddəjän.

⁵ A-wen, jəm-t ed təssanäm fäl ätṭäma wa käwän-äsjär Mässinäx-i ihän išənnawän. Ätṭäma-en, mäjräd wa n-tidət ämoos Älənžil a hawän-t-issəslän, tomänäm sär-s.

⁶ Älənžil daḡ wa s-käwän-in-əwwädän isälan-net, əmmək-wa-däx s-has-təsläm a-s titwəjjin isälan-net däx-äddunya iket-net, jarräwän äddinät təmudre ta täxlälät däx-təssəba-net. Emmək-wen-däx daḡ s-takkän isälan-en s-data xur-wän, xur-ašäl wa d-hasän-təsläm, təjrähäm əddəttu wa ija ännuxmät n-Mässinäx, əmmək-wen-däx daḡ a-s təhhalän s-data däx-ifäyyän n-äkall.

⁷ Älənžil wa s-təsläm, issäxr'-awän-t İbbafras wa n-emärh-nänäx dər-nohär əššäxəl, ənta-i n-ämaydal ixdəmän i-Älmasex däx-idəgğan-nänäx-hawän.

⁸ Ənta-en-däx a hanäx-ijän isälan n-tärha ta dd-iššənšär Unfas Šäddijän däx-uhawän-näwän.

⁹ Təssəba n-a-wen-däx a fäl näkkäneḡ-däx, xur-ašäl-i-däx d-hanäx-əjjäšän isälan-näwän-däx, wär kälä nässunfa däx-tamädilt n-Mässinäx-hawän, nətattär däx-s ad-käwän-äkf musnät imdan n-erhet-net, äkf'-iwän daḡ s-tärna n-Unfas Šäddijän sərho d-ujreh iket-net

¹⁰ i-ad-təlmədäm əmmək wa s-änihäjjä ad-sär-s təlkəmäm i-Emäli, təjrəzäm-as däx-härät iket-net. Dihen, ad-təkrəšäm ännux n-imärkedän iket-näsän, təhələm daḡ s-data däx-təməzzuyt n-Mässinäx,

¹¹ təşşuhum s-tärna n-älxurmät-net, tudabem tebädde däx-härät iket-net s-tazidert təddeewät d-tedäwit.

¹² Däwätät, tumayäm i-Abba-i käwän-ikfän turhajät n-ad-təjjəšäm ännur-net, tahərəm d-iməššeddəjän təkasit ta hasän-itwär däx-Təmmənəya-net.

¹³ Mässinäx, ohäx-anäx-dd däx-tärna n-tihay n-İblis, iwwäy-anäx s-Təmmənəya n-Rure-s wa ikna tärha.

¹⁴ İdəm n-Rure-s-en-däx a däx-dd-nəjräw əlləllu däx-tişəm n-İblis d-tenäšše n-ibäkkadän.

Wär t-illa a-s wädden uf'-e Ÿisa Älmasex

¹⁵ Mässinäx, wär-itətwənhay, a-wa ämoos iket-net, itawänhay däx-ŸisaÄlmasex-i n-Rure-s-i t-illän härwa wär t-illa a t-illan.

¹⁶ Təssəba n-tärna-net ənta-en-däx a däx-dd-ixläk Mässinäx härät iket-net, jer-a-wa ihän išənnawän wälä a-wa iwärän äkall, a-wa ilän mänhoy hakd a-wa t-wärän

ila; imännokalän, imännähädän, iməşşuha, imärnan, wär t-illa a-s wädden ənta a t-dd-ixlākän, ənta dağ a-s dd-ixlāk.

¹⁷ Ənta a dd-əzzarän i-härät iket-net, ənta dağ a iṭṭafän tämudre n-härät iket-net.

¹⁸ Ənta a-s eɣäf n-tağəssa ta tämoos älkänisät, ənta a issənsän itabbän n-əddunya, ənta a dd-əzzarän tanākra jer-inəmmuttan i-ad-wär-itiləs tamättant, umas əmizär dağ-härät iket-net.

¹⁹ Fäl-a-s, ijrəz i-Mässināğ, ad-izzāğ s-a-wa əmoos iket-net dağ-Rure-s Ƴisa.

²⁰ Ənta a dd-ija Mässināğ əssəbab i-ad-iğəmməzəl d-iman-net a-wa t-illän iket-net, jer-a-wa izzāğän isənnawän wəla a-wa izzāğän äkall; ašni n-Ƴisa wa inğälän a-s ätwəşlāb fäll-tajəttewt a-s əssəbab n-älxer jer-Mässināğ d-dägg-adəm-i dd-ixlāk.

²¹ Kəwəneđ dağ i s-ibda, jan-kəwän erk inəzjam-nəwän d-erk imojjan-nəwän, iməjarän d-isənja n-Mässināğ,

²² əzməzäl-kəwän Mässināğ əməra-dāğ d-iman-net s-tamättant ta ija Rure-s a-s dd-əmoos ägg-adəm fäll-əreri n-äkall. A-wen, ij'-e dağ-təssəba n-ad-tudabem tebädde data-s šəddijäm, wär kəwän-iwer əlğib wäl' iyyän, wär t-illa dağ uđlem kəwän-iwarän.

²³ A-wen, ad-itbət afäl wär dd-tärzem dağ-immun-nəwän, təkənəm antum dağ-s i-ad-wär kəwän-əsnəmājəj hərät wäl' iyyän d-äṭṭama wa kəwän-əşjərän isälan n-Älənžil wi s-təsläm; isälan-en-hi, wär t-illa ere s-wädden, isl'-asän. Näkk dağ, Buləs, ij'-ahi Mässināğ əmaway n-isälan n-Älənžil.

Älğizabät wa ihannäy Buləs d-täbbillänt ta ija i-ad-täkk älkänisät s-data

²⁴ Ayətma-ğ, əməra-dāğ, əsidəwät-ahi a-wa hannäyāğ dağ-tersəmmawen fälla-wän ed oläh sār-i d-a-s näkk -i-dāğ a hin-isimdun əlğizabät wa hin-ođän Älmasex; ärdeğ s-ahänay n-əğana-wen-dāğ dağ-təssəba n-älkänisät-i tämoosät tağəssa n-Älmasex.

²⁵ Älkänisät-en-dāğ a-s əmoosāğ ənaxdim ed, ikkəlläf-ahi Mässināğ dağ-turhajät-net d-ad-kəwän-səğrāğ s-ujreh məjräd-net iket-net,

²⁶ səlmədəğ-kəwän s-əddəraj wa s-käla ättunkäl iwətyan fäll-iwətyan i-əddunya iket-dāğ-net məšan, ašäl-i-dāğ, əsnəfaläl-t-dd Mässināğ i-iməşseddəjän-net

²⁷ wi əsnəfrän i-ad-tän-isəlməd s-təməğare n-ərrəzāğ, d-älxurmät n-a-wa s-käla t-iffär i-tiwsaten iket-dāğ-nəsnät. Əddəraj-en-hi s-ašäl-i-dāğ ənfaläl-dd, əlməğna-net da: Älmasex dağ-ulhawän-nəwän, a-di, təjjäšäm təməğare n-ənnur n-Mässināğ.

²⁸ Älmasex-en-dāğ a-s nəxaṭṭāb isälan-net, nətakkäs hak ägg-adəm dağ-tağdärt, nəsağra hak ägg-adəm s-sārho ilan uğreh i-ad-dd-nəşəbdəd hak ägg-adəm iğrad, imda dağ-tassağt-net d-Älmasex.

²⁹ Təssəba n-a-wen-dāğ a fäl ədgağāğ dağ-älxidmət wa heğ, əbbiillänāğ s-tärna ta hi-ikfa Älmasex ed tärna-net a fäl əsifällāğ dağ-a-wa heğ iket-net.

2

¹ Ayətma-ğ, ärheəğ ad-təssanäm fäll-eğəwe wa ija amjār wa heğ fälla-wän, kəwəneđ d-käl-Ləwdisa, d-əddinät wi iyyəđnen s-wär käla ənhäyän idəm-in.

² A-wa heğ, heğ-t fälla-sän əntäneđ-dāğ i-ad-ismadän ulhawän-nəsän, tasəğäm dağ-tärha s-iyyän n-ənniyät, ənnufləyän dağ-ərrəzāğ n-ənnuymät n-Mässināğ, äkf'-en musnät imdan i-ad-udaben uğreh n-əddəraj n-Mässināğ wa s-käla ättunkäl s-ašäl-i-dāğ ənfaläl-dd əlməğna-net; a-wen a t-əmoosän Älmasex.

³ Ənta-en-dāğ a ħur-dd-imdə ərrəzāğ wa n-sārho hakd-dāğ tayətte.

Hewät fälşəfa ta n-bahu

⁴ A-wa, janneğ-awän-t i-ad-wär kəwän-isəswid əwadəm wäl' iyyän s-təğude n-iləs

⁵ fäl-a-s, kud-kāwān-ujəjəx dəx-taxəssa-nin-dəx, ărtayəx dăr-wān s-ənniyăt-in ed tartit ta tāhuusket jām jer-iman-nāwān d-antum wa ija immun-nāwān dəx-tassaxt d-Ălmasex, ij'-ahi asəddəwi wa fäl sār-i, šund xas, əlley-t xur-wān, hannəyəx-kāwān.

Tihusay n-tāmudre ta ikarrāš ăwadəm irtayān d-Ŷisa Ălmasex

⁶ Ămāra, ayətma-x, šāmad tidət-dəx a-s tărđam s-Emāli ŶisaĂlmasex, adiš, ăjăt-as alkum itbatān.

⁷ Ăjet alkum-nāwān-has antum wa tājjan ikewān n-ahəšk dəx-ăkall, umaset asəxăr wa təjrāwām a əsišahen immun-nāwān dəx-a-s tāsidadwām a-wen hărkuk d-tāmayit.

⁸ Agəzăt iman-nāwān, wăr kāwān-isəswadet ăwadəm wāl' iyyān s-tiddas n-fālšāfa dd-ikkas dəx-exăf-net wāla s-bahutān əsihătālne fāl-agna dd-əknan dăgg-adəm i-iman-nāsān, wāla s-a-wa fāl-təgl' ăddunya, a-s ija a-wen, wăr t-illa a osax a-wen d-Ălmasex.

⁹ Wăr hasān-təsjadām. Măssinəx, a-wa ămoos, əsbayān-anəx-t-dd iket-net dəx-Ŷisa Ălmasex.

¹⁰ A-wen-dəx a fäl, a hin-tođānām-dəx, ill'-awān-t xur-Ălmasex-i ăminakālān fāl-iməşsuha d-imārnan iket-dəx-nāsān.

¹¹ Ɛnta-en-dəx a xur-təjrāwām amili ăynayān wārān oleh d-wa tājjan ifassān n-dăgg-adəm, ed amili wa s-Ălmasex iman-net a t-itajjan i-inəttulab-net, ălməxna-net a-s, ad-təjrəwām tārna fāl-abăkkađ, təkrəšām ašāl fāl-erk imojjan-nāwān.

¹² Kāwāneđ dəx i omānnen s-tārna n-Măssinəx ta dd-təssənkărăt Ŷisa jer-inəmmuttan, əlmədāt a-s atwəsəlmax wa tăt wăjjām dəx-aman, ălməxna-net a-s tohărām dăr-s tamăttant. Azənjəz dəx wa dd-jām đarăt aləmax-nāwān dəx-aman, ălməxna-net a-s tohărām d-Ălmasex tanăkra ta dd-ija jer-inəmmuttan i-ad-dăr-s tărtəyām.

¹³ Kāwāneđ-i s-ibda jan-kāwān erk ijitān-nāwān šund inəmmuttan dat-Măssinəx, əsisalāhān-kāwān d-inəzzulam† wāren əmeləy; ašāl-i-dəx, dəx-idəm n-Ălmasex, issənkăr-kāwān-dd Măssinəx dəx-tamăttant, ikf'-iwān tāmudre təynayăt; inš'-anəx năkkāneđ hăkd kāwāneđ ibăkkađān-nānəx.

¹⁴ Ălkađ wa itwārān s-ənta a fäl əktabān udlemān-nānəx dəx-isālan n-anməşri-nānəx i-fərəđān d-alāmār n-Măssinəx, oməs-t-in Ŷisa, ikkās-t-in s-iiyăt s-tārna n-atwəşləb wa ətwăjja fāl-tajəttewt.

¹⁵ Ăzzāman wa d-ămmut Ŷisa fāl-tajəttewt, ikrāš tārna fāl-iməşsuha d-imārnan, ikšăf-tān dat-tiţtawen n-ăddunya iket-net, ija iğunān dəx-errawān-nāsān, iwăt-tān data-s.

Tăbəđđawt d-a-wa fāl-təgl' ăddunya

¹⁶ A-wen-dəx a fäl wăr kāwān-isəwaret ăwadəm wāl' iyyān udlem dəx-isālan n-a-wa tătām wāla a-wa săssām; dəx-isālan n-ašāl n-ămudd s-wăr təlkemām, wāla dəx-iba n-udəf n-tebădde n-orān; wāla dəx-isālan n-ašāl n-əssəbət-i n-təsonfat s-wăr təlkemām.

¹⁷ Hărātan-win-dəx iket-dəx-nāsān, taliwen n-a dd-imalān a ămoosān. Ămāra tidət ənta tosă-dd, a tăt-ămoosān, Ălmasex.

† 2:13 2:13 — Ŷur-kāl-Ălyāhud, ere wārān ămoos ăgg-Ălyāhud s-alăşāl mex ere wārān ilkem i-ăddin-nāsān, iket-net, ănəzzalim a ămoos. A-wen-dəx a fāl tiwsaten ti iyyăđnen iket-năsnăt, ti n-inəzzulam. — Ašāl-i-dəx, ănəzzalim, ăkafăr (ere wārān issen s-Măssinəx).

¹⁸ Wār toyyem äwadəm wäl' iyyän isiləbbudän taḡəssa-net, älmät əmmək-wen-däḡ a-s isaras iman-net dat-Mässinäḡ, wäla i iḡabbädän änjälosän, ija däḡ-wän tasäja fäl-a-s innin itajj a wär təjjəm. Äddinät wi isilləw a-wen, sakafän iman-näsän, jannen s-bahu a-s a-wa tän-išlän, Mässinäḡ a hasän-t-dd-äsnäfalälän däḡ-täharjit, wär hasän-täsjädam fäl-a-s inəzjam-näsän, wär-əglen ar fäll-a-wa fäll-təgl' äddunya.

¹⁹ Äddinät-en, wär-änmättafän d-Älmasex-i ämoosän eḡäf-wa ihakkän taḡəssa a-wa s-tämiḡatär, ənta-en-däḡ a-s əssəbab n-tassaḡt ta t-təllät jer-izəmmuz d-ažarän, isadwal-tät Mässinäḡ s-əmmək wa s-irha.

²⁰ Šamad ämära, toharäm d-Älmasex tamättant däḡ-isälan n-a-wa fäll-təgl' äddunya, mafäl təyyəm dägg-adəm sawarän-käwän färədən wi təggarnen äddinät əglanan fäll-a-wa fäll-təgl' äddunya?

²¹ Jannen-awän: «He käwäneḡ, wär tədkeläm härät wa, i läbasän; wär täkräbbem härät-wədi, ixäramän; wär dešäm härät-wen, wär-oleḡ»,

²² jannen a-wen-däḡ a-s ija a-wen härätän-win-däḡ iket-däḡ-näsän, wädden wäla a əndärrän ed wär t-illa a ənfan afäl išwär ikš'-en äwadəm. Dərät-a-wen daḡ, färədən-win-däḡ, wär-ämoosän ḡas ar a saḡren dägg-adəm, wädden Mässinäḡ a dd-falän.

²³ Äduuttät a-s färədən-ənnin-däḡ, äniḡäqqän d-a isawaḡän sərho fäll-ägg-adəm, ässiiktän-dd älyibadät dd-ifalän ulh d-asiinən n-taḡəssa d-tanhaḡt däḡ-s mäšan, wär t-illa a-s ənfan ägg-adəm irhan ad-ikrəš tärna fäll-erk derhanän wi ännihäḡnen däḡ-taḡəssa-net.

3

Tämudre ta täynayät tatäjrawät däḡ-ḡisa Älmasex

¹ Šamad tidət-däḡ a-s toharäm d-Älmasex tanäkra ta dd-ija jer-inəmmuttan, adiš, əmmäḡät i-a-wa hawän-itwär Mässinäḡ däḡ-išənnawän-i däḡ-äqqiima Älmasex, ämiinakäl daw-aḡil n-Mässinäḡ,

² äḡləbnet-käwän härätän-win-däḡ hänen išənnawän, təyyəm fälla-wän azənnuzjəm däḡ-wi n-äddunya.

³ Käwäneḡ, ḡur-ašäl wa d-tomänäm s-ḡisa Älmasex, tämoosäm šund äddinät ämmuutnen däḡ-isälan n-a-wa fäll-təgl' äddunya, tämudre ta täynayät tərjäwäm, toohar d-ta n-Älmasex atunkəl ḡur-Mässinäḡ.

⁴ A-wen-däḡ a fäl ašäl wa dd-mad-infiləl Älmasex-i ämoosän tämudre-näwän, ad-där-s dd-təmzəyyim anfiləl däḡ-älxurmät-net.

⁵ Təssəba n-a-wen-däḡ a fäl däḡ-wän ärheḡ ad-təbdəwäm d-erk imojjan-näwän iket-däḡ-näsän, əbdəwät d-a-wa isamäḡasän tiḡəswen-näwän d-iba n-təšədje d-derhan dərḡalän d-derhan äsisakäyän, tärha n-härät-i wärät təzley d-älyibadät n-äššänämän.

⁶ Təssəba n-härätän-win-däḡ a fäl dd-izizəbbut Mässinäḡ äššar-net [fäll-äddinät wi has-änimäšräyən].

⁷ Härätän-win-däḡ a-s käla tän-tamašäläm käwäneḡ-däḡ a-s təttafäm tämudre-ten-däḡ

⁸ mäšan, ämära, əbdəwät dər-sän iket-däḡ-näsän, wär tän-tolesäm amišəl. Äyyät fälla-wän adkär d-tukəse n-ulh d-tälläbäst d-tizmiten, wär säfälyḡät,

⁹ wär tinmənnit bahu jer-iman-näwän käwäneḡ-i əbdänen d-tasna-näwän ta-däḡ ännihäḡ abäkkäḡ d-timašalen-net,

¹⁰ ed ämära, təlsäm tasna ta täynayät-i s-Mässinäḡ-i n-Ämaxlak-nänäḡ a hawän-tät-ikfän, isaynay-tät daḡ härkuk däḡ-təssəba n-ad-t-təknəm muzəyät, taləhəm dər-s.

11 Däx-tasna ta-hi täynayät, wär-izley wa n-Älyunan d-wa n-ägg-Älyähud; wär-izley wa ämeläyän d-wa wärän ämeläy; wär-izley wa n-änäzzalim d-wa n-älzahil; wär-izley eläll d-akli, äbas t-illa ar Älmasex, önta a-s härät däx-härät iket-net.

Yaymät tinmædhiläm jer-iman-näwän

12 Šamad äddinät äsinäfrän Mässinäx a tämoosäm, ij'-iwän imöšseddöjän s-tötbat tärha ta hawän-ija, adiš, nömöddönät tähanint käwäneḍ-däx jer-iman-näwän, tönmædhäläm jer-iman-näwän, isäröset hak iyyän iman-net dat-amidi-net, izadät jer-iman-näwän, tönmözözzöydäräm,

13 tönmöšmäräm, tönmöšmäm jer-iman-näwän; ere s-iḡšäd äñña-s härät-däx, äñšet-as-in s-ömmök wa s-hawän-inša Emäli.

14 Äjät jönnöj-a-wen-däx iket-net anmärh imdan jere-wän ed önta a dd-itiiröwön tartit tömdat.

15 Äyyät älyafyät wa ihäkk Älmasex ad-ännähäḍ däx-ulhawän-näwän ed önta a käwän-dd-iḡrän s-älḡafyät-wen-däx, issärtäy-käwän i-ad-tumasäm tiyyät taḡössa, tumayät i-Mässinäx.

16 Ijatet mäjräd wa n-Älmasex jere-wän s-särho, tönmökföm tayötte, tönmökkösäm däx-tayḍärt s-särho imdan, tamäläm Mässinäx s-ulhawän ömdanen, tumayäm-as s-tömmalen dd-özjarnen ölköttab wa n-Äzzäbur d-tömmalen janen fäll-tuksöḍa n-Mässinäx d-isuhaḡ dd-oraw sär-wän Unfas Šäddijän i-ad-sär-sän tamäläm Mässinäx.

17 A jännem d-a tadjäm-däx, äjät-t däx-derhan n-ad-sömḡäräm isöm n-Emäli Ḳisa däx-a-s tumayäm i-Abba Mässinäx däx-tössöba n-isöm wa n-Ḳisa.

Ejadäs wa n-älmässexitän

18 Tiḍeden! Särösmät iman-näkmät dat-meddön-näkmät s-a-wa änihäjjän ed a-wen-däx a ijrazän i-Emäli.

19 Meddön! Ärhet hak iyyän däx-wän hänne-s, wär tössösmämäm fälla-snät.

20 Aratän! Säjdät i-imärawän-näwän däx-härät iket-net ed a-wen-däx a ijrazän i-Emäli.

21 Abbatän! Wär täzzäkänzäräm aratän-näwän i-ad-wär fälla-wän wär-änxesän iman-näsän.

22 Eklan! Säjdät i-wi käwän-länen däx-äddunya-ta-däx däx-härät iket-net, wädden dihad käwän-hannäyän ḡas däx-ittus n-ad-käwän-amölän, änn-ak, jer-hannäyän-käwän wäla, äknät öššäḡöl-näwän s-ulh ijlayän däx-tuksöḍa n-Emäli.

23 Əššäḡöl häm-däx, äjät-t s-önniyät imdan šund Emäli a-s täxdamäm wädden dägg-adöm,

24 älhäk wa s-ilkam ad-t-töjröwäm, itwar-awän-t Emäli däx-išönnawän. Älmasex a-s Emäli, umasät eklan-net

25 fäl-a-s, ere iyḍärän däx-a-wa iha, ilkam däx-s ad-ijröw älxäqq n-tayḍärt-net ed Mässinäx ya, wär-izley äddinät.

4

1 Mössaw-s n-eklan! Äjät i-eklan-näwän a-wa öläḡän d-a-wa öḡädän däx-a-s tössanäm a-s käwäneḍ-däx, lam Mässi-wän, iha älzännät, däx-išönnawän.

Inföšet Älönzil fäll-äröri n-äkall

2 Töddalät Mässinäx härkuk, öjlöyät hullan däx-a-wen, äkfät Mässinäx semḡar, tumayäm-as.

3 Töddalät-anäḡ-in näkkäneḍ-däx i-ad-hanäḡ-ijröw Mässinäx tašlölt s-näxtäb i-äddinät isälan n-Älönzil, nösefhöm-tän öddäräj n-Älmasex wa hasän-ättunkälän

s-ašäl-i-däx, änfaläl-dd älmäxna-net ed däx-tössəba n-iji n-isälan-en-däx a fäl hex tišəm.

⁴ Təddalät-ah'-in Mässinäx i-ad-xatṭäbäx isälan-en-däx s-əmmək iknan asəjrah ed a-wen-däx a hi-iwarän.

⁵ Iwäret-käwän särho jer-äddinät wi n-ajäma wären əzzey ҮisaÄlmasex, tašləlt təjrawäm-däx, äjät-asän isälan-net; təyyəm fälla-wän a-wa wär-iha älfäyda.

⁶ E-d tazäwwabäm i-äddinät däx-isälan n-Үisa Älmasex, äjät-asän mäjräd äzedän, ilan temde, təlmədäm daḡ a-wa jännem i-häk äwadəm.

Tihulawen d-ajilal n-mäjräd

⁷ Däx-a-wa hi-dd-iqqälän näkk, isälan-nin, ad-däx-wän tän-äj äñña-x wa əkney tärha Tušik. Nohar näkk hək ənta älxidmät wa hanäx-issäxläf Emäli, äjjəyhäx a-s ixdal däx-a-wa itäjj iket-net.

⁸ Näkk iman-in a hawän-t-in-ässokän i-ad-hawän-äj isälan-nänäx, isəsməd ul-hawän-näwän.

⁹ Äsiidäwäx-t-in d-Unazəm wa n-älkänisät-näwän, äñña-x n-ämaydal əkney tärha a ämoos ənta-däx. A däx-wän əjən isälan n-a-wa ijän diha-däx iket-net.

¹⁰ Ähuul-käwän-in amidi-nin Aristarəq-i dər-oharəx takärmüt, ähuul-käwän-in daḡ Marqəs wa n-ara n-meddən n-Bärnäbbas. Ənta-en-däx a-s äru d-käwän-äsmätärəx dər-s, a-s hawän-ənnex, afäl käwän-in-osa, səbbəlälät-t.

¹¹ Ähuul-käwän-in Үisa wa itawäxren s-isəm Istus. Meddən-wi-däx n-kəraḡ җas däx-dəgg-Älyähud wi n-älməssexitän, a hi-ədhälnen a ija a-wa-däx däx-älxidmät wa heḡ i-ad-tətbət Təmmənəya n-Mässinäx; ijmaḡ-t äššäk a-s əknän asəsməd n-ulh-in.

¹² Ähuul-käwän-in Ibafras wa n-änaxdim n-Älmasex, ənta-däx, i n-älkänisät tədi-däx-näwän. Itajəynan härkuk dat-Mässinäx i-ad-təbdadäm däx-immun, wär t-illa älxib käwän-iwarän i-ad-təlmədäm erhet n-Mässinäx iket-net.

¹³ Äjjəyhäx i-əddəgozät wa ija däx-tössəba-näwän käwäned d-käl-Läwdisa d-käl-Irabolis.

¹⁴ Ähuul-käwän-in Luqa wa n-läxtur nəkna tärha, ähuul-käwän-in daḡ Dimas.

¹⁵ Tähuuläm-anäx-in ayətma-näx wi hänen aḡrəm wa n-Läwdisa, tähuuläm-in daḡ Ninfa d-älkänisät ta tazämmaḡät däx-ehän-net.

¹⁶ Afäl җur-wän tätwäxra təkarde-ta-däx, äjät əmmək fäl tätwäxra daḡ däx-älkänisät ta n-käl-Läwdisa, təḡrəm daḡ ta tän-dd-madät-təfəl sär-wän.

¹⁷ Ännät-ahi i-Aršibb, ənnex-as: «Hekäyy! Äj ənniyät i-ämašal wa käy-issäxläf Emäli, aḡəd däx-s.»

¹⁸ Edəgg-wa-däx däx-təkarde-ta-däx, näkk iman-in Buləs a t-iktäbän s-äfuss-in: «Näkk, Buləs, ähuuläx-käwän-in.» Kittəwät-dd a-s näkk ya, takärmüt a heḡ.

Issənsä fälla-wän Mässinäx ännuḡmät-net. Amin!

Täkarde ta täzzarät iktäb Buləs i-käl-Täslonika

Äşajəş

¹ A-wa näkk, Buləs, hin-iktabän näkk d-Silwan d-Timoti i-älkänisät n-Mässinäx-i n-Abba, osäx d-Emäli YisaÄlmasex hät ayrəm wa n-Täslonika. Nähuul-käwän-in, nöttar dāx-Mässinäx ad-käwän-äkf ännuymät d-älxer.

² Hak aşäl-däx nämmoy i-Mässinäx dāx-təssəba-nāwän, e-d t-nədäl-dāx, ad-hawän-t-nədəl käwäneḍ-dāx.

Tihusay n-immun n-käl-Täslonika

³ E-d nədäl Abba-nänäx Mässinäx-dāx, ad-dd-nəktəw əmmək wa s-tässixdämäm immun-nāwän d-anmärh wa n-tidət jām jer-iman-nāwän d-akuyəd wa jām dāx-ätṭama wa käwän-äsjär Emäli-nänäx YisaÄlmasex.

⁴ Ayətma-näx! Nəssan a-s, Mässinäx, irh'-iwän, äsnäfrän-käwän i-ad-tumasäm tamətte-net.

⁵ Isälan n-Älənžil wi käwän-in-nässawäḍ, tärna n-Unfas Šaddijän a-s hawän-tän-in-nässawäḍ wädden s-mäjräd xas, a-wen, tənhayäm-t käwäneḍ iman-nāwän, nämeşäl-t data-wän i-ad-käwän-infəw s-härät.

⁶ Təttəläläm-anäx, təttəläläm dāx Emäli, wär hawän-təgdəl tizzurt ta tənhayäm ad-təqbəläm mäjräd n-Mässinäx s-tedawit ta ihäkk Unfas Šaddijän.

⁷ A-wen-dāx fəw, a dd-orāwän aşäl-i-dāx derhan s-älməssexitän wi əzzäyñen teje ta Masidunya hakd wi əzzäyñen teje ta n-Akaya n-ad-ättälälän əntäneḍ-dāx, älxal-nāwän.

⁸ Älxidmät wa ija mäjräd n-Emäli xur-wän, ikräş mawmaw-wa-dāx fäl t-əslän wäla äddinät wi hänen teje ta n-Masidunya d-ta n-Akaya. Əssäxlayän-dd isälan n-immun-nāwän s-Mässinäx äkall iket-net har äbas nämiḡatär fəw aşäl-i-dāx s-asuxəl-näsän.

⁹ Wär t-illa ere s-wädden isixul isälan n-asəbbärrək wa hanäx-jäm d-əmmək wa s-tomänäm s-Mässinäx a-s täqqäläm ḍarät äşşänämän i-ad-tamaşäläm erhet n-Mässinäx-i iddärän äddutten,

¹⁰ täqqäläm s-äşşahät ämära i-uḡəl n-Yisa-i n-Rure-s n-Mässinäx dd-issənkar jer-inəmmuttan dd-e-ifələn išənnawän i-ad-hanäx-ixləs dāx-aḍkär n-Mässinäx wa ilkämän.

2

Ämaşal d-älxidmät n-Buləs dāx-Täslonika

¹ Ayətma-x, təssanäm käwäneḍ iman-nāwän a-s asəbbärrək wa hanäx-jäm a-s käwän-in-nosa, wär-ämoos bännan.

² Təssanäm a-s dat-ass-nänäx-hawän, nənhay aḡana d-əmmädri dāx-ayrəm wa n-Fəlibb mäşan, Mässinäx xas a dāx-nəjar ätṭama, ikf'-anäx turhajät s-hawän-näxtäb Älənžil kud-dāx wär t-illa əmmək s-wädden əttärän äddinät ad-hanäx-əgdəlän s-a-wen.

³ A-wa dār-käwän-nəsmätär wädden i n-ad-nəşənnəməşrəy äwadəm, wär t-nəja d-erk ənniyät wäla s-tikärras n-äddinät,

⁴ änn-ak, Mässinäx a hanäx-äzjəzzän təzzar, issäxläf-anäx ämaşal wa n-Älənžil-net-i s-dāx älxuṭbät wa has-nətäjj, Mässinäx-i izajəzzen ulhawän-nänäx a-s nārha ad-has-nəjrəz, wädden dāgg-adəm.

⁵ Mässināx a hanāx-ājəyħān, wādden mājrad n-tikārras wāla-i n-utār n-tetāte n-ehāre n-iyān dāx-wān s-milxaw n-iləs a hawān-nəja, a-wen tössanām sār-s.

⁶ Wār nətter tēmmal n-dāgg-adəm jer-kāwāneḍ wāl' iyyāḍ sāl kāwāneḍ.

⁷ Ğnār nārha a-wen, nādooḅāt ad-kāwān-nəsəlməd a-s inəmmušal n-Ālmasex a nāmoos, māšan, wār hanāx-dd-ijješ ənniyāt-wen-dāx, ānn-ak, āzzāman wa nəkkas jere-wān tārha šund ta tājj anna i-aratān-net d-asəbbələl wa hasān-tājj a kāwān-nəssəkna.

⁸ Nəj'-awān tārha-ta-dāx fāl nāsdārħān ad-kāwān-in-nəsəssiwəd Ālənžil n-Mässināx, nāmmāt daḡ dāx-idāggan-nāwān, kunta a-wen-dāx a iħan erhet n-Mässināx fāl tössəba n-təmyāre n-tārha-i-dāx hawān-nəja.

⁹ Ayətma, əktəwāt-dd əşşuhu n-ālxidmāt d-tiluyyax ti nənħay jere-wān a-s hawān-nəxattāb Ālənžil n-Mässināx, ehāḍ d-ašāl nāxdam s-ifassān-nānāx i-ad-wār nətumas āzuk i-wāl' iyyān dāx-wān.

¹⁰ A-wen, tājjəyħām-as, ājjəyħ'-as daḡ Mässināx. A-s t-nəlla xur-wān, nəttāf jere-wān tāmudre ta tājjān imumənān šaddijnen, tāmudre toxadāt, wār t-illa ālyib fāw hanāx-iwarān.

¹¹ Tössanām a-s hak iyyān dāx-wān-dāx, nəj'-as šund a-wa mad-āj abba i-məddana-s.

¹² Hak ašāl, nəsamātar-kāwān i-ad-təkuyədām, tətṭəfām tāmudre tāniihājjāt d-teḡāre ta kāwān-dd-ija Emāli s-iman-net i-ad-dār-s tärtəyām dāx-Təmmənəya-net d-ālxurmāt-net.

Ālənžil, tidət-dāx a-s mājrad n-Mässināx

¹³ Nāmmoy i-Mässināx, nāmmoy-as daḡ hak ašāl ed xur-ašāl-i-dāx kāwān-in-nāssawāḍ mājrad-net, tāqbālām-t, wār t-jem mājrad dd-ifalān dāgg-adəm, ānn-ak, jān-t mājrad n-Mässināx iman-net, a-wen-dāx daḡ a āmoos ed ixdam s-āşşahāt dāx-ūlhawān-nāwān kāwāneḍ-i sār-s omānnen ašāl-i-dāx.

Isālan n-ālyizabāt

¹⁴ Ayətma, a-wa irmāsān ālkānisāten n-Mässināx ti hānen teje ta n-Ālyāhudəyāt osāxnen d-ŶisaĀlmasex a kāwān-irmāsān kāwāneḍ-dāx ed kāwāneḍ-dāx, āqquzzāben-kāwān käl-ākall-nāwān s-əmmək wa s-əntāneḍ-dāx, āqquzzāben-tān käl-Ālyāhud.

¹⁵ Käl-Ālyāhud, əntāneḍ a ānyānen ānnābitān s-tizarāt, ānyān daḡ Emāli Ŷisa, ašāl-i, nākkāneḍ a tiḡəzzəbun, ānimāşrāyān i-Mässināx, wār t-illa daḡ ere s-wādden āşşunjen-t,

¹⁶ gaddālān-anāx ad-nāj i-inəzzulam† isālan i-ad-tān-iḡləs Mässināx, okāyān ibākkāḍān-nāsān āmaku. Ilkam ad-dd-izəzzəbbət Mässināx aḍkār-net fālla-sān.

Āzuy Buləs i-käl-Täslonika

¹⁷ Ayətma, tidət, ibḍ'-anāx āssaḡāt, tujəjām tiṭṭawen-nānāx māšan, ham ulhawān-nānāx. Wār t-illa a-wa-dāx wār nəja i-ad-kāwān-naləs ahānay ed naqq'-anāx tenere-nāwān.

¹⁸ Nəttār a-wa-dāx he-nāj nākk'-iwān-in; nākk Buləs, har əssin ihāndāggan, tattārāx ad-kāwān-in-ākkāx māšan, igdāl-anāx Iblis s-a-wen.

¹⁹ Şāmad isālan-den-dāx, əndek āttāma-nānāx? Ğndek əssəbab n-tedāwit-nānāx? Ğndek abāraj-nānāx? Kāwāneḍ a hanāx-āmoosān a-wen-dāx iket-net ašāl wa dd-mad-iqqəl Emāli-nānāx Ŷisa.

²⁰ Tidət-dāx a-s kāwāneḍ a-s abāraj-nānāx, kāwāneḍ a-s əssəbab n-tedāwit-nānāx.

† 2:16 2:16 — Xur-käl-Ālyāhud, ere wārān āmoos āgg-Ālyāhud s-alāşāl meḡ ere wārān ilkem i-āddin-nāsān, iket-net, ānāzzalim a āmoos. A-wen-dāx a fāl tiwsaten ti iyyāḍnen iket-nāsnāt, ti n-inəzzulam. — Ašāl-i-dāx, ānāzzalim, ākafār (ere wārān issen s-Mässināx).

3

Ašəmmišəl wa ija Buləs Timoti s-Täslonika

¹ Ayətma, təndär-anəx taɣimit wäla isälan-nəwän, a-wen-dəx a fäl nässof ad-näqqayəm näkkäneḍ dəx-aɣrəm wa n-Atinya,

² nəšəmmišəl-in sār-wän äŋŋa-nəx Timoti-i dār-nohär älxidmət-nänəx i-Mässinəx dəx-isälan n-asəssiwəḍ n-Älənžil n-Älmasex i-ad-kəwän-isəşşuhət dəx-immun-nəwän, isəsməḍ ulhawän-nəwän.

³ Wār-itəggädet älxizabät wa hannäyäm ašäl-i-dəx d-ənniyät n-wäl' iyyän dəx-wän, isinhəynəhəy immun-nəwän, təssanäm a-s älxizabät iha a-wa s-hanəx-dd-iɣra Mässinəx s-iman-net, nəjet fälla-s.

⁴ Äzzäman wa nəkkäs ɣur-wän, nəkkäs-kəwän dəx-tayḍärt n-a-s ad-näqquzzəbät s-işekkelän n-tersəmmawen äjjootnen. Mäjräd-wen-dəx hawän-nəja, itbät, ənta-da-dəx hannäyäm ija ašäl-i-dəx.

⁵ Indär-ahi ad-ähajəx əşbarəx iba n-isälan-nəwän ɣas, äşmaşäləx-in sār-wän Timoti i-ad-hi-dd-ilməḍ isälan n-immun-nəwän ed, ässiirməx-ahi hullan a-s ämmukkän, äžžurräb-kəwän Iblis dəx-utär n-asəbbuttəl n-älxidmət wa äşşohen nəja ɣur-wän.

Äsdäwen isälan n-käl-Täslonika Buləs

⁶ Ässiilmädəx-kəwän a-s Timoti iket hi-dd-osa, ifal-kəwän-dd, ija dəx-nəx isälan n-älxer n-a-wa dār-ogdäh immun d-anmärh wa jäm jer-iman-nəwän. Illəxät-anəx dəx a-s wār hanəx-təkyeḍäm ed tenere-nəwän ta hanəx-tärməsät, tärmas-kəwän kəwäneḍ-dəx.

⁷ Ärheəx ayətma-ɣ, ad-hawän-älləxəx a-s isälan-nəwän-win-dəx s-nəslä, äsdätten-anəx immun-nəwän, ämoos-anəx a-wen a ässisməḍän tirəmmaɣ d-tersəmmawen ti hanəx-ärmäsnen.

⁸ Ämära-dəx, wār-izley d-a-s nofray i-iman-nänəx, nakkärän-dd dəx-tamättant ed nəslä, a-s həläm iman-nəwän dəx-alkum-nəwän i-Emäli.

⁹ Əndek ɣas təmɣäre n-təmayit ta s-näddobät ad-tät-nəj i-Mässinəx i-ad-tagdäh d-tedəwit-i-dəx nəja a-s nəsla isälan-n-immun-nəwän?

¹⁰ A-wen-dəx a fäl, ehəḍ d-ašäl, nətajəynan dat-Mässinəx i-ad-hanəx-äkf turhajät n-ad-kəwän-naləs ahänay i-ad-sār-wän-in nəsemdəw a-wa hin-osär immun-nəwän.

Derhan n-Buləs i-käl-Täslonika

¹¹ Daləx Mässinəx-i n-Abba-nänəx, daləx-t ənta d-Emäli-nänəx ɣisa dəx-ad-hanəx-isəfrär tabarät s-kəwän-in-nəkka,

¹² daləx-t i-ad-isiwəḍ tärha jer-iman-nəwän, isənnəfləy ulhawän-nəwän dəx-tärha n-e d t-illäm ägg-adəm, tagdäh tärha-nəwän d-ta hawän-nəja,

¹³ işşuhət immun-nəwän, işdajän ulhawän-nəwän, ifəl-kəwän e d t-illäm uḍlem dat-Abba-nänəx Mässinəx ašäl wa dd-mad-iqqəl Emäli-nänəx ɣisa Älmasex, äddeew d-iməşşeddəjan-net iket-dəx-näsän. [Amin.]

4

Uḍəf n-tämudre dəx-tännihäd təşədje

¹ Dərät-a-wen dəx, ayətma, nəttar dəx-wän, nəsimätär-kəwän dəx-idəm n-Emäli ɣisa d-ad-təttəfäm tämudre təjrazät i-Mässinəx, nəssəlmäd-kəwän taɣərha n-tämudre-ten-dəx, nəjrah-in a-s tamaşäläm a-wa kəwän-nəssəɣra məšan, nərha dəx-wän, ad-siwəḍäm hərwa dəx-a-wen.

² Isəmməterän wi sār-nəx dd-fälnen Emäli ɣisa Älmasex kəwän-in-nəssawəḍ, təssanäm-tän.

³ Erhet n-Mässināḡ a t-āmoosān, ad-təhələm s-data dāḡ-təšədje, təbdəwām d-e d t-illām a kāwān-isamāḡdasān.

⁴ Hak āwadəm-dāḡ, təgdāhet-as hānne-s, tətṭəfām tāmudre təjrazāt, tässimḡarāt Mässināḡ.

⁵ Wār toyyem erk derhanān əlwayān-kāwān, šinməšrəyān-kāwān šund a-wa täjjān inəzzulam†-i wāren əzzey Mässināḡ,

⁶ wār-itākārraset wāl' iyyān dāḡ-wān amidi-net, wār-iḡällāmet wāl' iyyān dāḡ-wān āḡḡa-s dāḡ-isālan əkkanen hānne-s wāla əkkanen adubən-net. Āru d-hawān-nənnā, nolās-t, a-s ere itajjān a-wen, ilmədet a-s ilkam ad-dāḡ-s dd-ikkəs Emāli əlxaqq-net.

⁷ Mässināḡ, wār hanāḡ-dd-iḡra s-iman-net i-ad-nəsamāḡdas tiḡəswen-nānāḡ, ānn-ak, i-ad-nəṭṭəf tāmudre dāḡ-tānnihād təšədje.

⁸ A-wen-dāḡ a fāl ere unjāyān s-asjəd i-isəmməterān-wi-dāḡ, wādden āgg-adəm a-s unjāy s-asjəd-has, Mässināḡ-i kāwān-ihakkān Unfas Šaddijān-net daḡ a-s unjāy s-asjəd-has.

⁹ Āmāra ayətma-ḡ, dāḡ-isālan wi n-anmārḡ jer-iman-nāwān, wār tāmḡatārām s-ere hawān-in-iktābān i-ad-kāwān-isəmmətār d-a-wen ed, Mässināḡ iman-net a kāwān-isəlmādān anmārḡ jer-iman-nāwān.

¹⁰ Ādduuttāt daḡ a-s tārha-ten-dāḡ tətṭāfām, təssəknām-tāt i-e d t-illām əlməssexi izzaḡān teje ta n-Masidunya māšan, hakd a-wen-dāḡ, nəttar dāḡ-wān ad-siwəḡām fälla-s hārwa.

¹¹ Əjləyāt dāḡ-tārha n-təməzzuḡt dāḡ-əlxeḡ, əjjəšāt əššəḡəl-nāwān, əxdəmāt s-ifassān-nāwān, āyyāt fälla-wān sendad, ənta-den-dāḡ a-wa dār-kāwān-nəsīmātār

¹² i-ad-tətṭəfām əlxal əssimḡarān əddināt wi n-ajāma wāren āmoos əlməssexitān i-ad-ābas tāmooosām əzuk i-āwadəm wāl' iyyān.

Isālan n-tanākra jer-inəmmuttan

¹³ Ayətma! Wār nārha ad-təžhalām dāḡ-isālan n-ayətma-nāḡ dāḡ-əddin wi s-ašāl-i-dāḡ, han eḡəs wa n-iba, wār ḡāššādnet iman-nāwān šund a-wa jān wi n-əddināt wi iyyādnen s-wār dd-ixlek äṭṭāma dāḡ-Mässināḡ.

¹⁴ Kunta nəflas a-s ḡisa, āba-t māšan, inkār-dd jer-inəmmuttan, adiš, nəfləset daḡ a-s ilkam ad-dd-isənkār Mässināḡ jer-inəmmuttan imumənān wi āba i-ad-əmələn edes-has.

¹⁵ Āmāra, dāḡ-isālan-win-dāḡ, edāwānne wa hanāḡ-ija Emāli, ənta a hawān-nəsiḡul: ätwānn'-anāḡ a-s nəkkāneḡ-i dd-mad-agəḡ uḡəl n-Emāli nəddar, wār mad-nəšwār əddināt wi hānen eḡəs wa n-iba ahānay-net,

¹⁶ ānn-ak, ašāl-en, ad-isiwəl Emāli s-afälla təzzar, ilkəm-as eməsli n-āmānokāl n-ānjələsān, təwət ḡara-s təsinsəḡt ta n-Mässināḡ, ifəl-dd Emāli ḡisa iman-net əlwāqq-wen isənnawān, ənkārān-dd ya əddināt wi s-a-s tān-āba-dāḡ omanān s-Ālmasex,

¹⁷ ḡarāt-a-wen, nəkkāneḡ-i dd-ogāz əlwāqq-wen-dāḡ nəddar, ad-dār-sān nahār aməḡkəl fäll-tijärāken s-isənnawān, nəlkəḡ i-Emāli iket-nānāḡ, nārtəy dār-s dihen hārkuḡ.

¹⁸ Isəsməḡet hak iyyān dāḡ-wān ulh n-amidi-net s-isālan-wi-dāḡ.

5

Isālan n-uḡəl n-Emāli ḡisa

¹ Ayətma, āmāra, dāḡ-isālan n-āzzāman wāla əlwāqq wa d-mad-āj a-wen, wār tāmḡatārām s-ad-hawān-in-iktəb āwadəm dāḡ-isālan-win-dāḡ;

† 4:5 4:5 — ḡur-kāl-Ālyāhud, ere wārān āmoos āgg-Ālyāhud s-alāšāl meḡ ere wārān ilkem i-əddin-nāsān, iket-net, ānəzzalim a āmoos. A-wen-dāḡ a fāl tiwsaten ti iyyādnen iket-nāsnāt, ti n-inəzzulam. — Ašāl-i-dāḡ, ānəzzalim, ākafār (ere wārān issen s-Mässināḡ).

² tössanäm käwäneḏ iman-nāwän a-s ašäl wa dd-itaqqäl Emäli, ad-dd-iḏəw fäll-äddinät s-əmmək wa s-dd-itidəw emäkräḏ fäll-äwadəm s-tišrayät n-ehäḏ.

³ Ad-äqquimän äddinät jannen: «Älyafyät ija, xayy, täzude n-tämudre, wär fälla-näx ija härät», har fälla-sän dd-iḏəw älmässiḃät ijan armuḏ ässuksäḏän, olähän d-əjadäl wa dd-täjǰ tizzurt fäll-tamäḏt lat ənniyät, wär däx-sän dd-e-iḡləs äwadəm.

⁴ Ayətma, käwäneḏ, wär käwän-iha ere ihan tihay har fälla-wän dd-iḏəw ašäl-en šund emäkräḏ,

⁵ dägg-ännur wädden dägg-ehäḏ wäla dägg-tihay a tämoosäm, wär t-illa a iffarän däx-a-wa täjjäm.

⁶ A-wen-däx a fäl wär hanäx-irämmäset eḏəs šund äddinät wi iyyäḏnen, näjet ənniyät, nəṭṭəfet älxal däx-härät iket-net.

⁷ Äddinät wi taṭṭäsnen, s-ehäḏ a-s taṭṭäsän, wi sassänen asməd, itakkäs däx-sän ənniyät, ehäḏ a-s tājǰän a-wen,

⁸ näkkäneḏ, dägg-ännur a nämoos, nəṭṭəfet älxal däx-härät iket-net, umaset-anäx immun d-tärha šund aḡärh ilsan taḡəssa-nänäx, umaset-anäx əlḡəllas wa s-nəjār äṭṭäma-net šund takənbut n-täzoli tigəzät eḡäf n-äwadəm däx-tisäwaten

⁹ fäl-a-s Mässinäx, wär hanäx-äsnäfrän i-temse, änn-ak, äsnäfrän-anäx, i-ad-hanäx-ijrəw əlḡəllas däx-idəm n-Emäli-nänäx ḲisaÄlmasex.

¹⁰ Däx-tössəba n-a-wen-däx a fäl ämmut Ḳisa Älmasex däx-idäggan-nänäx i-ad-där-s nahär tämudre jer-nämmut wäla nəddar.

¹¹ Ḳas, hak iyyän däx-wän däx, isəsməḏet ulh n-amidi-net, tənmedhəläm jer-iman-nāwän s-əmmək-wədi-däx s-kāwän-išla a-wen ämära-däx.

Isəmməterän d-ajilal n-mäjräd

¹² Darät-a-wen, ayətma, imizärän wi käwän-ikfa Emäli, tiləyyoḡnen däx-asənnəmhəl-nāwän däx-tabarät-net, əssənät däx-sän,

¹³ äkfät-tän semḡar d-tärha däx-tössəba n-a-wa äxdämän jere-wän; iməlet älxer jere-wän.

¹⁴ Ayətma, näsmätär-kāwän d-ad-täḡtələm äddinät wi ämišäršärnen wären ərha älxidmət s-äššahät-näsän, səkkuyəḏät wi ha tasäja, ədhələt wi lämməḏnen, zəzzidärät fäll-äddinät iket-näsän.

¹⁵ Äjät ənniyät i-iman-nāwän; wär zələm təlläbäst s-tälläbäst, änn-ak, asəsät härkuk däx-amišəl n-a-wa oläḡän jer-jere-wän käwäneḏ wäla jere-wän d-äddinät wi iyyäḏnen.

¹⁶ Däwätät härkuk,

¹⁷ äḏələt Mässinäx härkuk,

¹⁸ umayät i-Mässinäx däx-härät iket-net, ənta-den-däx a-wa fälla-wän irha Mässinäx däx-tassaḡt-nāwän d-ḲisaÄlmasex.

¹⁹ Wär təkteläm älxidmət n-Unfas Šäddijän däx-ulhawän-nāwän,

²⁰ wär täsfättem daḡ a-wa hawän-jannen äddinät wi ikfa Mässinäx mäjräd-net i-ad-hawän-t-in-səssiwəḏän,

²¹ äknät azəjjəzz n-a-wa hawän-jannen iket-net, təṭṭəfäm däx-s a-wa oläḡän, təšləyäm i-bahu,

²² uḏayät i-a-wa läbasän, a ämoos-däx.

Tihulawen n-Buləs

²³ Mässinäx-i n-Mässi-s n-älxer iman-net a daläḡ i-ad-kāwän-išəšḏəj təmdam, əttaräḡ däx-s ad-agəz ənniyät-nāwän d-iman-nāwän d-tiḡəswen-nāwän i-ad-wär käwän-itəwwer uḏlem wäl' iyyän har ašäl wa dd-mad-iqqəl Emäli-nänäx ḲisaÄlmasex.

²⁴ Mässinäḡ-i käwän-dd-iḡrăn s-iman-net, oḡad, ənta daḡ a käwän-e-agəzăn dăḡ-e d t-illăm äššar.

²⁵ Ayətma, ädələt-anăḡ-in Mässinäḡ näkkäneḡ-dăḡ.

²⁶ Nəməjjät jer-iman-năwăn isofan janen s-tărha təmdat.

²⁷ Ettarăḡ dăḡ-wăn dăḡ-idəm n-Emăli, ad-tăḡrəm tăkarḡe-ta-dăḡ i-ayətma dăḡ-ăddin iket-dăḡ-năsăn.

²⁸ Ikf'-iwăn Emăli-nănăḡ ḶisaĂlmasex ännuḡmăt-net. Amin!

Täkarde ta s-sänatät iktäb Buləs i-käl-Täslonika

Äšqjəš

¹ A-wa näkk, Buləs, hin-iktabän näkk d-Silwan d-Timoti i-älkänisät n-Mässinäx-i n-Abba-nänäx d-Emäli Yisa Älmasex ta hät ayrəm wa n-Täslonika.

² Nähuul-käwän-in, nöttar däx-Mässinäx-i n-Abba-nänäx d-Emäli Yisa Älmasex ad-käwän-äkf ännuymät d-älxer.

Äššärexa wa ilkämän afäl dd-iqqäl Älmasex

³ Ayətma, hak ašäl nämmoy i-Mässinäx däx-tössəba-näwän, äniihäjja a-wen ed itəhhal immun-näwän s-data, tiwwaḍ daḡ tərha ta tänimäjjäm jer-iman-näwän.

⁴ A-wen-däx a dd-oräwän a-s wär t-təlla älkänisät n-Mässinäx s-wädden nətabäraj-as däx-isälan-näwän, ed kud-däx, wär t-illa älyizabät wäla talxa wär tənheyäm, təšbäräm, wär-ifneḡ a-wen wäla a ənḡärrän däx-akuyəd-näwän wäla immun-näwän.

⁵ Hakd a-wen-däx, ayətma-x, a-wa käwän-irmäsän a ämoos-däx, asəddəttu ḡas a ämoos n-a-s ilkam ašäl däx-mad-išräx Mässinäx s-iqqud. Älyizabät käwän-irmäsän-däx, wär-ämoos ḡas, ar a käwän-isininəjjin d-ujəš n-Təmmənəya n-Mässinäx ed Təmmənəya-net a fäl hannäyäm a-wa hannäyäm.

⁶ Itbat a-s Mässinäx-i oḡadän, wär-e äyy ere käwän-itaxəzzäben ässunfa, ässilkäm däx-s.

⁷ İlkam ad-käwän-äkf täsonfat, käwäned-i hannäyən älyizabät ašäl-i-däx, äkf'anäx-tät näkkäned-däx ašäl wa dd-e-infiləl Emäli Yisa ifal-dd isənnawän, äddeew d-änjälösän wi n-iməşsuha.

⁸ Ad-dd-iqqəl däx-ammäs n-efew ähijäljälän, isəj əḡa däx-äddinät wi has-äsḡärnen ulhawän-näsän, unjäyən ämişəl n-a-wa innä Älənžil n-Emäli-nänäx Yisa.

⁹ Äddinät-en, təlkam däx-sän tisanat səmmät d-teräzze täḡlalät jat däx-anməjjaj d-Emäli d-tärna n-älxurmät-net. Wär däx-sän ilkem ad-t-ənhayän.

¹⁰ Ašäl-en dd-mad-ass Emäli, ad-səḡärän iməşseddəjän wi sār-s omännen älxurmät-net ed äsidäwät-tän ass-net. Käwäned, äddinät-en, ham-tän ed tomänäm s-isälan wi hawän-näxtäb.

¹¹ Ayətma, a-wen-däx daḡ a fäl hawän-nətattär s-Mässinäx hak ašäl, nətattär däx-s ad-täqqayməm tətḡafäm tabarät ta däx-käwän-ija, tənhejj tämudre-näwän d-teḡäre ta käwän-dd-ija Mässinäx s-iman-net, idhəl-käwän s-tärna-net i-ad-tamašäläm a-wa oläḡän iket-däx-net, umas immun-näwän, immun ih' älfäyda.

¹² Emmək-wen-däx a däx-mad-itwəsəḡär Emäli-nänäx Yisa däx-tämudre-näwän, təkərəšäm idəm data-s däx-ännuymät n-Mässinäx d-Emäli-nänäx Yisa Älmasex.

2

Isälan n-uxəl n-Yisa Älmasex

¹ Ayətma, hakd a-wen-däx ämära, däx-isälan n-uxəl n-Emäli-nänäx Yisa Älmasex d-ažəmmäx wa s-ilkam ad-t-nənməjj dār-s, nənn'-awän:

² tazidert, wär-itəḡḡädet äwadəm wäl' iyyän d-ənniyät-näwän, wär säryasät i-äwadəm wäl' iyyän aḡāšad n-iman-näwän s-a has-dd-änifälälän wäla s-a nənna wäla s-täkarde hawän-in-nəktab däx-nənna a-s ašäl n-uxəl n-Emäli äru dd-osa.

³ Wār kăwăn-isăswadet äwadəm s-wăla a ɛndărrăn făl-a-s ašăl wa n-uxəl n-Emăli, iket-di d-ităjj, ad-irməs iba n-ăddin ässuksăđăn äddinăt äjjootnen təzzar ass-dd u-tanməşrayt wa s-itawăna Äddăžžal† he-ihlök Măssinăx.

⁴ Ǝnta-en-dăx a-s ämakšar n-e d t-illăm a ititwăybidăn. Dăx-tanməşrayt-net, ad-iglew har äqqayəm dăx-ehăn n-ămudd wa măqqărăn, isigdăh iman-net d-Măssinăx.

⁵ Ajăn tətəwăm-in a-wa hawăn-ənney a-s t-ölley xur-wăn.

⁶ Təssanăm a-wa t-in-itəfăn, a ikkäs day wār dd-ăwweđ ašăl-net, wār dd-e-ass.

⁷ Təmyäre n-əddăraj n-iba n-ăddin-net ixdam dăx-ăddunya-ta-dăx, afăl has-dd-təssəlwas tărna ta t-in-təttafăt fälla-năx, ad-dd-infiləl a-wa t-išlăn, os'-iwăn făw.

⁸ Afăl dd-osa anămăşray-wen-dăx, ad-has-dd-ilkəm Emăli Ƴisa-i t-in-e-isăhəđăn s-tărna-net, ikkəs dăx-s älfăyda iket-net s-tiyyăt tashəđt n-emm-net.

⁹ Ähaləs wa t-illăn đarăt-a-wen-dăx, ad-t-ăkf Iblis tărna s-mad-itajj ijităn ässuksăđnen, tikunen d-tišušab s-issəswăd tamətte,

¹⁰ wār t-təlla təllăbăst d-iba n-iqqud s-wădden ad-t-äj i-ad-isəswəd äddinăt wi hănen tabarăt n-tanməşrayt s-əlhəllak xas a hasăn-iqqalăn, äşxărăn ulhawăn-năsăn i-tidət ta lăt s-ad-tăn-tăxləs.

¹¹ Dăx-təssəba n-a-wen-dăx, a făl hasăn-išlăy Măssinăx, oyy'-en ođăn dăx-a-wa tăn-itakărrasăn, išinməşrəy-tăn.

¹² Ilkam ad-ənmənhəyăn d-ăššărexa ed ässofăn bahu tidət, ässofăn fărrăx, iqqud.

Tămayit d-tittar

¹³ Ayətma-x, iwar-anăx hak ašăl ad-numay i-Măssinăx dăx-təssəba-năwăn. Emăli iman-net a kăwăn-issəlmădăn s-tărha-net, äsnăfrăn-kăwăn Măssinăx, ixlăs-kăwăn s-tărna n-Unfas Šăddijăn, iššəşđăj-kăwăn i-ad-tumasăm tamətte-net ed tomănăm s-tidət.

¹⁴ Ixr'-iwăn-dd s-iman-net i-ad-təsləm i-Ălənžil wa hawăn-năxtăb, təjrəwăm ejăđăr-năwăn dăx-ălxurmăt n-Emăli-nănăx ƳisaĂlmasex.

¹⁵ Ayətma! A-wen-dăx a făl əkfărăt i-Iblis, äknăt uđəf n-ălyadatăn wi kăwăn-nəssăyra s-imawăn-nănăx hakd-dăx s-tikarđiwen ti hawăn-in-nəktăb.

¹⁶ Emăli-nănăx Ƴisa Ălmasex hakd-dăx Măssinăx-i n-Abba-nănăx, tətbat tărha-năsăn hanăx, ɛntăneđ a hanăx-əkfănen dăx-ănnuxmăt-năsăn turhajăt n-ad-năkk s-data, nəhləyləy hărkuk dăx-ăttăma ädduutten.

¹⁷ Nəttar dăx-Măssinăx ad-iđnəy ulhawăn-năwăn tărha n-tikawt n-s-data, ija dăx-wăn älbăraka n-ad-tamašalăm a-wa olăxăn dăx-ijităn-năwăn hakd-dăx dăx-măjrăd-năwăn.

3

Derhanăn n-Buləs i-käl-Täslonika

¹ Ayətma, tasămdot n-măjrăd-nănăx da: təddalăt-anăx-in Măssinăx i-ad-ihəl măjrăd n-Emăli s-data šik dăx-idăggan iket-năsăn, səmyărăn äddinăt măjrăd-en s-əmmək wa s-t-tăssimyarăm kăwăneđ.

² Ädəlăt-anăx-in Măssinăx i-ad-hanăx-ixləs dăx-erk imojjan n-erk äddinăt d-inăllăbăsăn ed wădden äddinăt iket-năsăn a ɛttafnen immun.

³ Emăli, oxad, ɛnta-en-dăx a kăwăn-e-isəşşuhun dăx-immun-năwăn, agəz-kăwăn dăx-Iblis-i n-Anămsod.

⁴ Emăli a ih' ättăma-nănăx dăx-isălan-năwăn, nəkkas äššăk a-s a-wa đăr-kăwăn-năsmătăr, tətəfăm-t, ad-t-təknəm day uđəf.

⁵ Ij'-iwăn Emăli dăx-tabarăt, ässewăđ Măssinăx tărha-net dăx-ulhawăn-năwăn, ija dăx-wăn akuyəd dăx-tazidert šund ta hăt Ălmasex.

† 2:3 2:3 Ämakšar, ašănjo d-eməkkennəs n-Ălmasex.

Äxdämät, äyyät fälla-wän sendad

⁶ Ayətma, näsimätär-käwän hullan dāx-isəm n-Emäli-nänäx YisaÄlmasex i-ad-sənnəməjjəjäm iman-näwän d-ere ijannen ənta əŋŋa-wän dāx-äddin, a-s ija a-wen, unjay s-ad-itṭəf älḡadatän wi käwän-nəssäxra, unjay s-älxidmät s-ifassän-net, tämišäršär tämudre-net.

⁷ Tä mudre ta tättälälät a-wa käwän-nəssäxra, tössanäm-tät; tössanäm a-s, a-s t-nəlla jere-wän, wär hanäx-təzzeyäm d-a-wärän oḡed.

⁸ Wär t-illa ere s-nəkša əsink-net bännan, ehäḡ d-ašäl näxdam s-əššahät-nänäx, tidət, nälluyyāx mäšan, wär t-illa fäw ere s-nəmoos əzuk.

⁹ A-wen, nəj'-e, wädden i n-a-s innin wär-ənhäjjä d-ad-nəkš isinkawän-näwän mäšan, nässof ad-wär nəja a-wen, i-ad-hanäx-tättäläläm käwänəḡ-dāx, təlmədäm a-s älxidmät, a iwarän hak ägg-adəm.

¹⁰ Äzzäman wa nəkkäs jere-wän, nəkna azəzzəwi fälla-wän tənna n-a-s: «Äwadəm wa wärän irha ad-ixdəm, adiš, wär-itättet.»

¹¹ Käwänəḡ, nəsla a-s han-käwän äddinät ämišäršärnen wären ərha ad-äxdəmän, tajjäšan isälän wären tän-dd-äqqel.

¹² Äddinät-en, närha ad-nəsəmmäqq fälla-sän, nəsəmmətär-tän: nəj'-asän isəm n-Emäli YisaÄlmasex idəm n-ad-äxdəmän s-əššahät-näsän, əyyənət sendad i-ad-udaben uḡəf n-tämudre n-iman-näsän.

¹³ Käwänəḡ-i n-ayətma-x, wär käwän-išälḡašet amišəl n-a-wa oläxän.

¹⁴ Isəmməterän wi hawän-nətäjj dāx-täkarḡe-ta-dāx, ere sār-sän unjayän, əzzəyät-t, širəšäm fälla-s i-ad-ikrukäḡ,

¹⁵ wär t-jem ašanjo-näwän, səmmäqqät fälla-s šund əŋŋa-wän.

Tittar d-tihulawen

¹⁶ İkf'-iwän Emäli-i n-Mässi-s n-älxer, älxer s-əjut hak əssaḡät, idhəl-käwän Emäli iket-dāx-näwän.

¹⁷ Tihulawen-ti-dāx, näkk iman-in, Buləs a hawän-tänät-in-iktäbän s-äfuss-in; ešwäl-in daḡ, dāx-tikarḡiwen-in iket-dāx-näsnät da-dāx.

¹⁸ Ähuuläx-käwän-in, əttaräx dāx-Emäli-nänäx YisaÄlmasex ad-käwän-äkf ännuḡmät iket-dāx-näwän. Amin!

Täkarde ta täzzarät iktäb Buləs i-Timoti

Äšajəš

¹ A-wa näkk, Buləs, wa s-omär Mässinäx-i n-Ämaɣlas-nänäx d-ŸisaÄlmasex-i iha ätṭäma-nänäx, tumast n-anämmašul-net.

² Ähuuläx-käy-in Timoti käyy-i n-rure-x wa n-tidət däx-immun.

Ikf'-ik Mässinäx-i n-Abba-nänäx d-Emäli-nänäx Ÿisa Älmasex ännuymät, tärha d-älxer.

Agəzät iman-näwän däy-inämäšrayän

³ Timoti, a-s käy-fäläx, əkkeɣ teje ta n-Masidunya, äsmätäräx-käy d-ad-täqqayməd däx-aɣrəm wa n-Ifäsus, səmmäqqəd fäll-äddinät wi t-hänen saɣranen tijəttewen animäšräynen i-tidət ta tädduttet,

⁴ i-ad əyyən fälla-sän tinfusen ti n-ibda wären ənfa härät d-tamädašt däx-äṭṭarexän n-imɣarän wären dd-itirəw ar təšəjrət n-mäjräd. Wär t-illa a dd-isaxsal a-wen-däx däx-amišəl n-erhet n-Mässinäx wäla däx-ehel n-s-data däx-immun.

⁵ Däx-a-wa s-käy-omäräx, ənneɣ-ak, əṭṭəfnət äddinät jer-iman-näsän tärha təmdat d-ad-wär t-illa a däx-əššakän iman-näsän d-immun wär ha təlmənuḞäɣa.

⁶ Härätän-win-däx, əšläyän-asän äddinät äjjootnen, əššəškän iman-näsän s-taxxalen.

⁷ Äddinät-en, ərhan tumast n-älɣulam n-alämär wa n-ännäbi Mosa, a-s ija a-wen, a-wa jännen s-ɣur-sän ija a-s wär t-illa ere hasän-t-ojarän musnät, hakd-däx a-wa säɣren äddinät, wär t-illa a däx-s əjrahän əntäneḞ iman-näsän.

⁸ Alämär wa n-Mosa, wär t-ijrew härät, olaɣ iket-net afäl t-itamašal äwadəm s-älmäɣna.

⁹ Nəssan a-s alämär, a ämoos-däx, wär dd-äzzubbät i-äddinät oɣadnen, änn-ak, osä-dd i-inälläbäsän d-iməffelləgän d-äddinät wi wären äddiin d-inäsbäkkadän d-inämäšrayän d-ikufar d-imäjjan n-iman n-imärawän-näsän d-imäjjan n-iman n-äddinät

¹⁰ d-wi samäḞasnen tiɣəswen-näsän d-meddən wi tajjänen meddən tiḞeḞen, d-wi hin-žanšanen äddinät d-inəsbuha d-imärzan n-ärkäwäl d-e d t-illäm ägg-adəm animäšräyän i-tijəttewen n-teɣäre ta n-tidət tädduttet təjrawäm, əntäneḞ-den-däx äddinät wi s-dd-äzzäbbät Mässinäx alämär-net.

¹¹ Teɣäre-en-hi, isälan n-Älənžil-wi hi-issäɣläf Mässinäx a ha. Ənta-en-däx Ḟay a hanäx-itajjän isälan n-älxer d-tänoflayt ta hanäx-t-töllät ɣur-Mässinäx-i n-Mässi-s n-älxurmät.

Tämajit n-Buləs i-Mässinäx

¹² Ämmoyäx i-Emäli-nänäx ŸisaÄlmasex ənta-i hi-ikfän äššahät wa s-ämyätäräx, ifläs-ahi i-ad-hin-səssiweḞäx ämašal wa där-hi-äsnähäja,

¹³ wär hi-itṭef eɣa n-a-wa s-käla ämoosäx äkafär d-älmuxäzzäb n-enälläbäs s-äkkus ašni-net mäšan, tätwaḞän-ahi tähanint ed a-wa ämešäläx, älzähalät d-täɣart n-ulh a däx-t-ämešäläx.

¹⁴ A-wen iket-net, ojar-t sär-i ännuymät wa mäqqärän fäll-i issənsä Emäli-nänäx, äsnäfläy-ahi däx-immun d-tärha ta dd-tirəw tassaxt d-Ÿisa Älmasex.

¹⁵ A-wa mäjräd itbatän s-änihäjjä ad-sär-s iqbəl e d t-illäm ägg-adəm: YisaÄlmasex, ijjäš-dd äddunya i-ad-iyləs inäsbäkkadän s-näkk Buləs a-s wa äzzarän, dāx-sän ojarän iket-dāx-näsän.

¹⁶ A-wen-dāx a fäl hi-ođän Mässināx tähanint i-ad-umasāx älmital i-äddinät wi iyyädnen n-a-s Yisa Älmasex, h'-e tazidert n-a-s ere sär-s omänän, ad-ijrəw tämudre täxlalät. A-wen hi-ija, äddoobät daḡ ad-t-āj i-e d t-illäm ägg-adəm.

¹⁷ A-wen-dāx a fäl näkfet härkuk Mässināx semḡar d-älxurmät, ənta a-s Ämänokal wa n-Ämaḡlal, wär fälla-s la tamättant tärna, wär-itətwənhəy, ənta a-s Mässināx wa n-iiyän. Amin!

Əhəl iman-näk dāx-immun

¹⁸ Alyaḡ-in Timoti, a-wa s-ärheḡ ad-kāy-səmmətärāx dār-s, wär-izley d-mäjräd wa s-kāla t-innä Mässināx i-äddinät i-ad-hak-t-ənnən, ənnän-ak-tän daḡ. Umaset mäjräd-wen-dāx hak-ätwännän a kāy-äsinämänḡän dāx-älxidmät wa ähuusken hed i-ad-äkk s-data.

¹⁹ Ətṭəf immun, wär-itəmmalet a dāx-təššakäd iman-näk, əhläkän äddinät äjjootnen wären ja a-wen, änmäšräyän i-immun;

²⁰ äddinät en-dāx, ih'-en Himni d-Älxadə-i jeḡ dāx-ifassän n-Iblis, änmänhäyän d-iman-näsän i-ad-əlmədän a-wa ihän asəkkufär.

2

Tajjät älhimmät

¹ Dat-härät iket-net, äsimätärāx-kāwän d-ad-tədələm Mässināx, təjəm älhimmät, täjjäynänäm-t, tumayäm-as i-ad-aḡən tähanint i-e d t-illäm ägg-adəm.

² Adələt Mässināx i-imänokalän d-käl-əlxəkum i-ad-ozja äkall, ija dāx-s älxeḡ, nətṭəf tämudre täddiinät, tässiimḡarät Mässināx.

³ Tittar-tin-dāx ähuskätnen a əjraznen i-Mässināx-i n-Ämaḡlas-nänāx-i

⁴ irhan əlxəllas n-e d t-illäm ägg-adəm, əzzəyän tidət iket-dāx-näsän.

⁵ Mässināx, iyyän ḡas, wär dd-ija daḡ ar iyyän n-əssəbab s-äzmäzäl iman-net d-dägg-adəm, a t-ämoosän YisaÄlmasex-i dd-ämoosän ägg-adəm.

⁶ Ikfä iman-net i-ad-isəddärfət e d t-illäm ägg-adəm dāx-ibäkkadän-net, ənta-den-dāx əmmək wa s-äjjəyha älwäqq wa dd-täwwäḡ, täqqän ta issəbdäd Mässināx n-a-s irha əlxəllas n-äddinät iket-dāx-näsän.

⁷ Dāx-təssəba n-a-wen-dāx a fäl hi-ija Mässināx ämaway n-isälan-net d-anämmašul; tidət a janney wädden bahu, Mässināx a hi-dd-äšmašälän i-ad-säḡrāx inəzzulam† immun d-tidət ta-net.

⁸ A-wen-dāx a fäl dāx-wän ärheḡ kāwäned-i n-meddən, ad-təddaläm Mässināx dāx-edägg iket-net, täjjäm älhimmät dāx-ḡakkäläm ifassän šäddiijnen, wäla aḡkär wäla abjənən.

A-wa ätiwättärän dāx-tiḡeden

⁹ Tiḡeden daḡ, ärheḡ dāx-snät, ad-əjənät a-wen-dāx. Ärheḡ dāx-snät ad-tajjänät isəlsa tänät-wären-əkšef, isəlsa tänät-əštarnen; udaḡ ad-sasahāḡnät ašäl i-ad-tänät-in-əjrähän äddinät, wär täjjänet i-iḡäfawän-näsnät asəssəkən s-izzəwät älqim-net, wär täjjänet orāx wäla timāḡwanen okäynen ämaku wäla isəlsa s-ikna älqim-näsän eḡəwe,

† 2:7 2:7 – ḡur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änäzzalim a ämoos. A-wen-dāx a fäl tiwsaten ti iyyädnen iket-näsnät, ti n-inəzzulam. — Ašäl-i-dāx, änäzzalim, äkafär (ere wärän issen s-Mässināx).

¹⁰ änn-ak, zəzjærnet-dd tihusay n-imärkedän wi änihäjjänen d-tiðeden jannänen äksudnät Mässinäx.

¹¹ Älwäqq wa n-älxuṭbät n-mäjräd n-Mässinäx dəx-älkänisät, susəmnet dəx-a-s äsidäwnät a-wen d-asjød d-asrəs n-iman;

¹² əgdäläx-asnät ad-xaṭṭäbnät meḡ ad-tanähäḍnät dəx-meddөн d-a-wa s-län s-ad-t-əjөн dəx-älkänisät, susəmnet.

¹³ Mässinäx, Adəm a dd-ixlāk s-tizarät təzzar, issəlkäm-as-dd Xəwwa.

¹⁴ Wädden Adəm a ikkäräs Iblis s-tizarät i-ad-inməšrəy, änn-ak, tamädt a äšnämäšräy; tänmäšräy s-a-wen-dəx ja i-mäjräd n-Mässinäx.

¹⁵ Hakd a-wen-dəx, a-wen wär hin-ikkes a-s ad-tumas anna, təkroš aratan, iḡləs-tät Mässinäx. Säðewet immun-net d-tärha təmdat d-tämudre šäddijät, təštarät.

3

Tumas n-emännähäḍ n-älkänisät

¹ A-wa mäjräd änihäjjan: ere irhän tumast n-ärrabex-i n-emännähäḍ n-älkänisät, ilmødet a-s äsidärhän ämašal ällullen.

² A-wen-dəx a fäl, emännähäḍ n-älkänisät, ilzam ad-:

Wär t-iwer uḍlem,

umaset ähaləs n-iyyät tamädt,

ere ilan älxal d-esäwe,

inhøjjet d-semyar,

ijjəšet-t amäjaru,

umaset ere äddoben asəḡər n-äddinät,

³ wär-itumaset emäsäw n-asmød wäla ere ih' äjad;

umaset ere äzedän, ägg-älxer,

wär-itumaset emärh n-azrəf.

⁴ Umaset ere ännihäḍän hullan dəx-ehän-net

d-ere s-äsijädän aratan-net,

ässiimḡärän-t dəx-härät iket-net

⁵ fäl-a-s ere s-indar ad-ännähäḍ dəx-əjadäš-net,

əndek əmmək wa s-mad-udabät täzert

i-älkänisät n-Mässinäx?

⁶ Wär-itumaset ere s-iket omän i-ad-wär t-irəmməs əttəkəbru,

isəddärḡəl-t, iḍəw dəx-uḍlem

wa dəx-oḍa Iblis iman-net.

⁷ Umaset ere ilan tajuhe tähusket

dat-äddinät wi n-ajäma wären ämoos älmässexitän,

dihen, wär mad-itwəlkäh,

wär mad-iḍəw dəx-tändärbaten n-Iblis.

Imadhalän n-ärrabexän

⁸ Imadhalän n-ärrabexän-i n-imännähäḍän n-älkänisät, ilzam-tän ad-:

Tän-iwar särho,

wär tumasnet äddinät n-əssin ilsawän,

əkrəšnet tənna tətbatät,

wär säsakaynet tesäse n-asmød,

wär tämmäḡnet i-terše n-azrəf s-taxərbənit,

äsikärakäḍ a-wen.

⁹ İddäraj n-immun wa tän-issəlmäd Mässinäx dəx-mäjräd-net,

əṭṭəfnet-t dəx-a-s wär t-illa

a dəx-əššakän iman-näsän.

¹⁰ Zəjjəzzənet-tän äddinät,
itwəlməd a-s wär t-illa udlem tän-iwarän təzzar,
əjjəšän ämašal-wen-däx.

¹¹ Tiḏeḏen daḡ, iwaret-tänät sārḥo, wär tänät-itəjjəšet ännämima, əkrəšnet älxal ähuusken, äḡdəlnet daḡ-härät iket-net.

¹² Imadhalän n-emännähäḡ n-älkänisät, hak iyyän, iyyät tamäḡt, nähäḡnet daḡ-aratän-näsän d-ijəḏšan-näsän.

¹³ Äddinät-win-däx, wi išla ämašal-näsän s-iqqud, ad-ətwəsəmyārän, ad-äbas tän-ha tasəja daḡ-təssəba n-immun-näsän d-tassayt ta jän d-ḲisaÄlmasex.

Äddäraj wa dd-änfalälän

¹⁴ Timoti, täkarḡe-ta-däx, kattäbäḡ-ak-tät-in daḡ-a-s jaräḡ äṭṭäma n-ad-käy-in-asäḡ šik

¹⁵ mäšan, kunta wär-otes Mässinäḡ a-wen har hin-ähöjəḡ fälla-k, ärheḡ ad-hak-tilal täkarḡe-ta-däx i-ad-təlmədäd älxal wa s-led s-ad-t-təṭṭəfäd, səssiḡədäd sār-s tamətte ta n-imumənän n-Mässinäḡ, a-wen a t-ämoosän älkänisät n-Mässinäḡ-i iddärän, ənta a-s tämankayt ta təbnät fäll tidət, wär t-illa daḡ a daḡ-s tät-madän-ikkəs.

¹⁶ Tidət n-Mässinäḡ ta s-ärḡän äddinät daḡ-isälan n-əddäraj wa n-immun, timäqqärät, a-wen a t-ämoosän a-s:

Ḳisa Älmasex,
änfaläl-dd daḡ-äddunya, ämoos-dd ägg-adəm,
ənhäyän-t daḡ dägg-adəm,
illäḡät Unfas Šäddijän s-idəm wa ikräš dat-Mässinäḡ,
äjjunfän daḡ-s änjälosän,
ätwäjjän isälan-net i-inəzzulam,†
omänän sār-s äddinät iyyäd,
imməḡkäl s-išənnawän s-edägg wa n-älxurmät.

4

Älyulam wi sayranen bahu

¹ Ämära, daḡ-isälan-wi-däx n-ajilal n-äddunya, Unfas Šäddijän iman-net a innän, ad-əkfen äddinät iyyäd iman-näsän iba n-äddin, əltəḡän iyyäd tän-saswadnen. Äddinät-en, a-wa säḡren, a sār-sän dd-orawän alšinän,

² imäsäḡran n-inəsbuha n-älmunafəḡän s-ässiikwäl əjut-i-däx jän ibäkkadän-näsän ulhawän-näsän,

³ ad-əzzənän s-imumənän əssannen a-wa ämoosän tidət, säxrəmän-asän adubən, əgdələn-asän tetäte n-imənsiwän iyyäd, a-s ija a-wen, härätän-win-däx, Mässinäḡ a tän-dd-ixläkän i-tänoflayt n-imumənän i-ad-tän-əkšən daḡ-tämayit-has.

⁴ A-wa dd-ixläk Mässinäḡ, olay iket-net, wär t-ihä fäw a xäramän, umayet ḡas äwadəm i-Mässinäḡ təzzar äkšet a-wa s-irha tetäte-net

⁵ fäl-a-s, wär t-illa amənsi s-wädden, äššiišdäj-t mäjräd n-Mässinäḡ d-tittar.

Änaxdim wa ufän dat-Ḳisa Älmasex

⁶ Timoti, fässär i-ayətma-k daḡ-äddin härätän-wi-däx, afäl jed a-wen, ad-tumasäd änaxdim n-ḲisaÄlmasex ifranän, sətbətäd käyy-däḡ a-s a-wa innä mäjräd wa ihakkän immun a-s təddaräd, təssanäd daḡ a-wa ənnänät tijəttewen ti n-teḡäre n-tidət ta tädduttet.

† **3:16 3:16** – Ḳur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änəzzalim a ämoos. A-wen-däḡ a fäl tiwsaten ti iyyäḡnen iket-näsnät, ti n-inəzzulam. — Äšäl-i-däḡ, änəzzalim, äkafär (ere wärän issen s-Mässinäḡ).

⁷ A-wen-däx a fäl hak-jannex, wär säjad i-tinfusen ti n-käl-äddunya d-ti n-käl-ibda siḡulnät timḡaren, mälayäḡna ḡas a-wen wärän oher härät d-Mässinäḡ.

⁸ Käyy, šəmmişəl äššahät-näk däx-isälan wi n-äddin ašəšrah n-taḡəssa, wär-infa s-a äjjen, a-s ija a-wen, asəšsuhu n-iman däx-äddin, infa s-a äjjeen ed ere äddiinän, ijrāw ḡur-Mässinäḡ ärkäwäl n-tämudre däx-äddunya hakd-däx älxärät.

⁹ A-wa hak-jannex, mäjräd änihäjjän d-ad-itwäqbəl iket-däx-net.

¹⁰ Tidət, nosas däx-älxidmät, nəha amjār äššohen ed ätṭäma-nänäḡ, Mässinäḡ-i iddärän a iha, ənta a-s Ämaylas n-e d t-illäm ägg-adəm hullan imumənän.

¹¹ Entäneḡ-den-däx isälan wi s-led s-ad-tän-saḡred, səmmətäräd äddinät dār-sän i-ad-tän-əknən ujreh.

¹² Wär käy-iläkkähet äwadəm fäl-a-s innin mädrəyäd, änn-ak, ətṭəf dat-imumənän töttəläl däx-mäjräd d-älxal d-tärha d-immun d-təšədje n-ulh.

¹³ Iket-di d-käy-in-tisäḡ, ḡarr əlkəttabän n-Mässinäḡ dat-äddinät, xaṭṭäb-asän-tän, tafässaräd-asän-tän.

¹⁴ Wär toyyed isuf wi hak-ija Unfas Šäddijän i-ad-tudabed s-älxidmät-näk, isuf-en, Mässinäḡ a hak-tän-ikfän, əlläḡen-ak sār-sän daḡ äddinät s-inna Mässinäḡ a-wen, äswär-käy daḡ älzämaḡät wa n-inušämän ifassän-näsän i-ad-däx-k äj Mässinäḡ älbāraka.

¹⁵ Härätän-win-däx s-hak-ənnex, ärdəl-tän, ədgəz däx-sän i-ad-dd-ibbuyən ehel-näk s-data dat-äddinät iket-näsän.

¹⁶ Hekäyy! Äj ənniyät i-iman-näk, təjəd-t daḡ i-a-wa säḡred äddinät, kuyəd däx-tazidert däx-a-wen. Afäl jed a-wen, ad-täḡləsäd iman-näk, täḡləsäd daḡ iman n-äddinät wi hak-äsijädnen.

5

A-wa iwärän Timoti däx-isälan n-täzert i-imumənän

¹ Timoti! Wär täsnärḡämäd fäll-ere wäššärän, änn-ak, äj'-as mäjräd šund wa mad-təjəd i-abba-näk. Imawaḡän əntäneḡ, äj'-asän mäjräd wa mad-təjəd i-ayətma-k,

² təjəd i-timḡaren mäjräd wa mad-təjəd i-matte-k, təjəd daḡ däx-təšədje i-timawaḡen asəmmətär wa mad-təjəd i-šätma-k.

Isälan əkkanen tadhəlt ta dār-äniihäjjänät tinuḡäfen

³ ḡayəm tössanäd däx-tinuḡäfen, hullan ti n-tiläqqiwen s-wär t-illa ere lanät tänät-idhālän.

⁴ Afäl la tänuḡäft aratan meḡ ihäyawän, əlmədnet dat-härät iket-net a-s dat-Mässinäḡ, əntäneḡ-en-däx a iwar älxäqq n-imärawän-näsän. Emmək-wen-däx a-s mad-əzələn i-imärawän-näsän d-imärawän n-imärawän-näsän asədwal wa tän-jän. Ənta-den-däx daḡ a-wa ijrüzän i-Mässinäḡ.

⁵ Tänuḡäft ta wärät təla ere dār-s, täqqimä-dd ənta ḡas, təzzaḡ d-iman-net, täjet ätṭäma-net däx-Mässinäḡ, täqqaymet tattär däx-Mässinäḡ ehäd d-ašäl i-ad-tät-ikkəs däx-tämäḡatert.

⁶ Mäšan, tänuḡäft ta wärät töttär ar izəjraz n-iman-net, əlməd a-s wär təzley d-ere äba kud-däx töddar.

⁷ Entäneḡ-den-däx härätän wi s-led s-ad tän-dd-suktəwäd äddinät i-ad-ətṭəfnät tinuḡäfen tämudre-ten-däx i-ad-wär tänät-itizəm äwadəm wäl' iyyän.

⁸ Ämära, ere hin-ijjārän imärawän-net hullan wi t-oräwnen, ilmədət a-s äkkuddäl immun, išsam-as-in ämära wäla-däx änäzzalim.

⁹ Ämära, tänuḡäft ta tärhät ad-təjjəš tiḡəḡen ti tədhäl älkänisät, wär has-t-illa a-wen ar s-ad-təla säḡisät timərwen n-awätay d-ad-wär käla təja ar iyyän n-adubən ḡas.

¹⁰ La daḡ s-ad-tätiwäzzäy s-imärkedän wi tamašal d-asədwal olaḡän i-aratän-net d-ad-tät-ih' amäjaru d-ad-tät-iha älxidmät i-iməšseddöjän d-ad-kann härät i-tiläqqiwen, d-ad-tamašal a-wa olaḡän iket-net.

¹¹ Wär täqbeläd s-tadhölt n-tinuḡäfen ti mädroynen fäl-a-s afäl tänät-dd-iqqäl iblis-näsnät, ad-əšlönät i-tabarät ta n-Älmasex, umas a-s wär t-illa a ihan ənniyät-näsnät kunta wädden adubən äynayän.

¹² Enta-den-däḡ əmmək wa s-sawarnät uḡlem iman-näsnät ed ärkäwäl wa jänät i-Älmasex n-a-s ənta ḡas a-s mad-əddärnät, äxdəmnät-as, äqqälänät sär-s.

¹³ Afäl jänät a-wen, wär t-illa a tänät-išillun kunta wädden tikawt jer-ihänan, d-sendad, a-wen daḡ, ojar-t a-wa s-wär tänät-išla ar aggay n-tinawen, wär t-illa a-s wädden hanät-t kud-däḡ wär tänät-iqqel a-wen, wär tänät-äskärakäd asəffəlyäḡ.

¹⁴ Däḡ-tuksəḡa n-a-wen-däḡ a fäl tänuḡäft əndärrät, ässofäḡ-as ad-taləs adubən, təkroš aratan, tännähäd däḡ-əjadäš-net s-särho i-ad-wär fälla-näḡ jarrəwän fäw išənja-nänäḡ tašləlt s-hanäḡ-əssədlämän.

¹⁵ A-wa jänneḡ, janneḡ-t fäl-a-s a äjjeen däḡ-tinuḡäfen-tin-däḡ mädroynen, äru d-änmäšräynät i-tabarät n-Mässinäḡ, əlkämnät i-Iblis.

¹⁶ Afäl t-təlla tamäḡt hat n-älkänisät təla tinuḡäfen däḡ-ehän-net, tədbəlet-tänät ənta iman-net, wär tumasnet äzük i-älkänisät i-ad-tudabät älkänisät dihen ad-kann härät i-ti wären däḡ-snät ila ere hasnät-iknän härät.

Semyar wa dār-ānihäjjän imizārän n-älkänisät

¹⁷ Imizārän n-älkänisät wi əknänen issus däḡ-älxidmät-näsän s-särho, sənnəḡfəsät-asän semyar hullan wi s-əntäneḡ a ännuḡtäfnen d-älxidmät wa izzəwen ämoos älxuḡbät d-asəssäḡär n-imumənän.

¹⁸ Däḡ-isälan n-a-wen-däḡ fäw a däḡ-innä əlkəttab n-Mässinäḡ:
«E-d šišbäḡtišäd awdes däḡ-əttäḡam
i-ad-t-iddəš, wär has-jed äkinbäb.»

Innä əlkəttab daḡ a-s:

«Hak äanaxdim, äniihäjja d-älxaqq n-tide-net.»

¹⁹ Wär täqbeläd a ätiwännän fäll-änušäm n-älkänisät ar s-ad-ila sänatät meḡ kərəḡät tjuhawen.

²⁰ Inušämän wi änmäšräynen, äḡtəl-tän dat-älkänisät iket-net, tälläḡed a-wa däḡ-änmäšräyän i-ad-äj a-wen tuksəḡa däḡ-äddinät wi iyyäḡnen, uksaḡän əntäneḡ-däḡ amišəl n-abäkkad šund-wen-däḡ.

²¹ Ettaräḡ däḡ-k fäll-Mässinäḡ d-ḡisaÄlmasex d-änjälösän wi ənnəfrännen d-ad-tamašaläd härätän-wi-däḡ s-iqqud, wär tän-täsnämajaräd, wär sär-sän täzmäzläyäd daḡ äddinät.

Isəmməterän n-Buləs

²² Wär täsrarädäd aswär n-ifassän-näk eḡäf n-äwadəm wäl' iyyän i-ad-has-təjəd älhimmät, ijješ älxidmät wa n-älkänisät; hekäyy, wär tihär d-äddinät ibäkkadän-näsän, ḡayəm təḡḡafäd iman-näk härkuk däḡ-təšədje.

²³ Wär səss aman ḡas, sass daḡ dehiyyän a əndärrän däḡ-aman n-läḡnəb äxxiimärnen i-ad-käy-infəw a-wen däḡ-tanännäḡat ta käy-rammäsat d-turhənnawen ti iyyäḡnen käy-jarräwnen.

²⁴ Äddinät iyyäḡ, ibäkkadän-näsän, äñifalälän harwa wär dd-əmməḡkälän isälan-näsän mäšan, iyyäḡ, tahajen wi-näsän eḡstarän hundäḡ har ašäl wa dd-e-əbboqqen dat-äddinät iket-näsän.

²⁵ A-wen-däḡ daḡ a jan imärkedän wi tamašalän äddinät, wär təhijin wär-ätwänhäyän, kunta daḡ wär-ätwänhäyän šik, wär mad-ähajən eḡstarän.

6

Səmyərnet eklan məssaw-sən

¹ Älmässexitän wi äkkilätne i-äwadəm, iwar-tän s-ad-əknan asəmyar n-məssaw-sən. Afäl jän a-wen, wär mad-isəkkufär äwadəm isəm n-Mässinäx, wär mad-azəmän dağ äddinät a-wa käwän-nəsağra.

² Wi s-mässi-sän älmässexitän a ämoosän, uday ad-unjəyän s-asəmyar-näsän fäl-a-s innin oharän dār-sän ämära temidət ta n-tassayt d-ÿisaÄlmasex, iwar-tän s-ad-tajjän s-ənniyät älxidmət wa dāx-tän-jän məssaw-sən ed wi tän-ässiixdämnen, imumənän irha Mässinäx a ämoosän.

Isälan n-älyulam wi n-bahu d-imärhan n-ehäre

³ Ənta-den-dāx a-wa s-leed s-ad-t-sayred äddinät, samätaräd-tän dār-s. Əllan-t äddinät sağranen bahu wärän oher härät d-tidət n-mäjräd n-Emäli-nänäx ÿisaÄlmasex, wär əlkemän dağ i-asəğär wa äddewän d-äddin-nänäx,

⁴ äddinät-en, äsidärğälän-tän ibərajän. Älzuhal tässiirhän tārha n-tamädašt d-amšəkki n-mäjräd a ämoosän. Ənta-den-dāx a-wa dd-itiirəwän tismiten d-imšəwəllitän d-təkkufära d-tordawen läbasnen,

⁵ d-tamädašt wärät möddəw jer-äddinät s-təfray tayətə-näsän. Wär-əssenän tidət, jan äddin əsarə s-əbbəğärän.

Tārha n-azrəf tokäyät əmaku, sajraw härät

⁶ Tidət lab a-s uđəf n-äddin itirəw-dd s-äwadəm ärrəzəğ məqoorän afäl wär-əzoz a-wa t-ikfä Mässinäx;

⁷ wär t-illa a dd-nəwway a-s dd-nəjjəš äddunya-ta-dāx, wär t-illa dağ a-s nəddobät aggay-net əşäl wa d-tät-nəjammäd.

⁸ A-wen-dāx a fäl, kunta nəla a nəksa d-a nəlsa, igdəh-anəğ a-wen-dāx.

⁹ Äddinät wi wären ərha ar ad-äbbəğärän, ad-ətuirəmən s-a äjjeen, irməs-tän Iblis s-tändərbət n-derhanän äjjootnen läbasnen dāx-wär-itidəw ar emeskel. Wär t-illa a sār-sän dd-išaşray a-wen-dāx kunta wädden säbxas d-əlhəllak.

¹⁰ Tārha n-azrəf tokäyät əmaku, sajraw härät ed, ənta a-s ekew n-e d t-illäm älməşşibät, ođän dāx-s äddinät äjjootnen, änməşrəyän i-immun, orəwän-dd s-iman-näsän tidij n-tersəmmawen äjjootnen.

Isəmməterän wi ija Buləs i-Timoti iman-net

¹¹ Ämära, Timoti, käyy-i n-u-Mässinäx a-s ämmijrädəğ: jawäd i-härätän-win-dāx, əmməğ i-uđəf n-äddin d-immun d-tazidert, uday i-a-wa käy-əssəğrəğ iket-net, əbdəw iman-nək d-a-wa läbasän. Əttär iqqud d-älyğadalät dāx-tuksəda n-Mässinäx, ətəf immun d-tārha d-tumast n-äwadəm əzedän.

¹² Əknəs amjər wa ufän dāx-imjərän ihälän ebre n-äddin i-ad-təjrəwäd təmudre ta təğlälät s-käy-dd-iyrä Mässinäx. Äj isälan-win-dāx käyy-dāx i-ad-sətbətäd immun dat-tijuhawen äjjootnen.

¹³ Ämära, əfradəğ fälla-k dat-Mässinäx-i ihakkän təmudre i-härät iket-net d-ÿisaÄlmasex-i äjjəyhän dāx-isälan n-tihusay n-a-wa ämoos dat-gəfär, Bunəs Bilatəs.

¹⁴ Ağəz iman-nək dāx-älğib iket-net d-a xəramän iket-net, ətəf iman-nək dāx-təşədje härkuk i-ad-togağäd a-wa fälla-k ifräd Mässinäx har əşäl wa dāx-dd-mad-infiləl Ämänokal-nänäx ÿisa Älmasex.

¹⁵ Əşäl-en, ad-hanəğ-t dd-isuğəl Mässinäx-i t-illän jənnəj härät iket-net, ənta-i yur-t-təlla tänoflayt ta n-tidət, ənta-i n-Emäli n-imänokalän, ənta-i n-Emäli n-imälan,

¹⁶ Өnta җас а иҗлалән, вәр фәлла-с ла тамәттәнт тәрна, izzaҗ дәҗ-әnnur s-wär hanäҗ-t-illa äggaḍ-net fäl tәмҗәre d-tihusay-net, вәр t-illa ere s-käla t-inhäy, вәр-ilkem daҗ ere äddoben ahänay-net; umaset semҗar d-tärna, i n-Mässinäҗ härkuk. Amin!

A-wa iwarän imärrözäҗän

¹⁷ Ämära, änn i-imärrözäҗän n-äddunya-ta-däҗ, ad-өjөн өnniyät, вәр дәkkälnet iman-näsän, вәр täjjanet fella-näsän дәҗ-ärrözäҗ-näsän ed a ijän-däҗ, ilkam ad-imdөw, änn-ak, өjөнet äтtämä-näsän дәҗ-Mässinäҗ-i hanäҗ-ihakkän härät iket-net s-tänoflayt i-tänoflayt-nänäҗ.

¹⁸ Änn'-asän, ad-өjөн imärkedän i-ad-ärzäҗän дәҗ-imärkedän, uzannet d-äddinät wi iyyäḍnen төla-näsän, өjөнet isuf janen s-ulh irḍan s-a-wen.

¹⁹ Afäl jän a-wen, ad-өtwärän i-iman-näsän дәҗ-äddunya ta dd-malät ärrözäҗ n-imärkedän, өjrөwän daҗ tämudre ta n-tidөt täҗlälät.

Ajilal n-mäjräd

²⁰ Ya Timoti, өkөн uḍөf n-a-wa käy-issäҗläf Mässinäҗ, өslөy i-imөjridän wi өglänen fäll-iba n-äddin, өbdөw d-anmөntaš n-mäjräd d-äddinät wi s-älmät өssanän, a-s ija a-wen, вәр t-illa a өssanän.

²¹ Äddinät iyyäḍ, ija җur-sän a-s äzizäbben musnät, ere төnhäyäd ija a-wen, a-di, äbas ohar härät d-immun.

Ähuuläҗ-käwän-in, oyyeҗ-käwän d-ännuҗmät n-Mässinäҗ. Amin!

Täkarde ta sänatät iktäb Buləs i-Timoti

Äšajəš

¹ A-wa näkk, Buləs, wa n-änämmašul n-ŶisaÄlmasex dāx-erhet n-Mässināx. Ēnta a hi-äswärän iji n-isälan n-tämudre ta s-ijjāš ärkāwāl n-ad-tät-äkf i-dāgg-adəm dāx-idəm n-Ŷisa Älmasex.

² Ähuulāx-käy-in Timoti käyy-i n-rure-x dāx-äddin ökney tärha. Ikf'-ik Abba Mässināx d-Emäli-nänāx Ŷisa Älmasex ännuymät, tähanint d-älxer.

Isəmməterän wi ijä Buləs i-Timoti

³ E-d dälāx Mässināx-dāx jer-ehäd wäla ašäl, ad-käy-dd-əktox, umayāx-as dāx-tössəba-näk, äxbədəx-t s-ulh mällän šund a-wa jän imärawän-in ibda.

⁴ E-d dd-əktox imeṭṭawän-näk-dāx, ad-hi-tānx tenere-näk, səddärhənāx ahänay-näk i-ad-äknāx tedāwit.

⁵ Kittəwāx dāx tidət n-immun-näk, immun təṭṭaf s-tizarät ma-s n-ma-k Lāwwisa hakd-dāx ma-k Anisa, əkkasāx dāx äššäk a-s təṭṭafād-t käyy dāx-ašäl-i-dāx.

⁶ A-wen-dāx a fäl dāx-k ärheç, ad-dd-sudərəd isuf n-Mässināx wi hak-ija dāx-ännuymät-net, ašäl wa d-käy-äswärāx ifassän-in, dälāx-ak Mässināx

⁷ fäl-a-s, Unfas Šäddijän wa hanāx-ikfä Mässināx, wär hanāx-itəjj iməjjeṭṭän, änn-ak, ikf'-anāx-t i-ad-hanāx-äkf tärna, d-tärha d-tanhaṭt dāx-iman-nänāx.

⁸ Wär täkrakädäd tumast n-tajuhe n-Emäli-nänāx, wär täkrakädäd dāx a-wa s-ämoosāx u-takärmüt ihan tišəm dāx-tössəba-net, änn-ak, nahret s-tärna n-Mässināx aṡāna wa hannäyāx dāx-tössəba n-Älənžil.

⁹ Mässināx a hanāx-iṡläsän, iṡr'-anāx s-tihusay s-iman-net wädden dāx-tössəba n-imärkedän nämešäl, änn-ak, dāx-tössəba n-a-wa issəbdäd dāx-erhet-net d-dāx-tössəba n-ännuymät wa hānāx-ikfä dāx-idəm n-ŶisaÄlmasex härwa wär dd-täxlek äddunya.

¹⁰ Ännuymät-wen-dāx, äsnäfaläl-t-dd ämära ass n-Ämaylas-nänāx Ŷisa Älmasex-i iddāšän tärna n-tamättant, ässäsamāxmāx-dd fälla-nāx tämudre ta täṡlälät šäddijät s-itäjj Älənžil isälan-net.

¹¹ Dāx-tössəba n-Älənžil-en-dāx a fäl hi-dd-iṡrā Mässināx s-iman-net, ij'-ahi ämaway n-isälan-net d-änämmašul d-älṡalim

¹² dāx-tössəba-net a fäl hannäyāx tersəmmawen-ti-dāx, māšan, hakd a-wen-dāx, wär hi-äskärakäd a-wen ed əssanāx ere wa s-omänāx, əkkasāx dāx äššäk a-s ila tärna s-ogäz a-wa hi-issäṡläf iket-net hundāx har ašäl wa n-tebädde.

¹³ Ēkən uṭəf n-tifer ti n-tidət käy-əssāṡrāx, umaset a-s əntänätəd a ännihädnen dāx-tämudre-näk, mašäl-tänät dāx-a-s tänät-täsidāwäd d-immun d-tärha-i dd-tirəw tassayt d-ŶisaÄlmasex s-äwadəm.

¹⁴ Tayälift-näk a-wa ähuusken käy-issäṡläf Mässināx, agəz-t s-tärna n-Unfas Šäddijän wa dāx-nāx izzāṡän.

¹⁵ Təssanäd a-s äddinät wi n-teje ta n-Azya, jārän-ah'-in iket-dāx-näsän hullan Fiṡilus d-Hirminus.

¹⁶ Dalāx Emäli d-ad-aṭən tähanint i-ehän wa n-Unizifur, issəsmäd ulh-in dāx-älwäqqän äjjootnen, wär has-ämoos dāx a-wa s-əheç tišəm dāx-takärmüt täkrakiṭt.

¹⁷ A-s dd-oseṡ aṡrəm wa n-Roma, immāṡ-t iket-net, wär-ässunfa har hi-ijrāw.

¹⁸ Ettaräx däx-Emäli ad-has-aḍen tähanint ašäl wa n-tebädde, төssanäd käyy iman-näk a-s inf'-ahi s-a äjjeen däx-aḡrөm wa n-Ifäsus.

2

Tumast n-änaxdim iyradän

¹ Ҳас, käyy-i n-rure-ḡ däx-äddin, sөşşuhөt iman-näk härkuk däx-ännuḡmät wa ihän ҮisaÄlmasex.

² A-wa käy-өссäḡräx dat-tijuhawen äjjootnen, säḡr'-e käyy-däx i-imumөнән n-imaydalän äddoobätnen өntäneḍ-däx, ad-t-säḡrөн i-iyyäd.

³ Aläh d-өссärdasi ifranän n-Үisa Älmasex, өḍkөл käyy-däx šund a-wa jeḡ folät-näk däx-tersөmmawen ti inhäy.

⁴ Эссärdasi ya, e-d irha ad-ijrөz i-өлxөkum wa t-ijän däx-өлḡөskär, ad-äbas izinөzjumөt däx-tämudre ta wärät tämoos ta n-өлḡөskär afäl išwär ijjäš ejhän ikkan edägg n-akөnnas.

⁵ U-ašөšrah, wär mad-inžäx ar s-ad-ilkam i-färөḍän wi fäll-igla ašөšrah iket-däx-näsän.

⁶ Änäsdamu wa osäsän däx-älxidmät ḡas a madän-alөy ašөkrөš-net s-tizarät.

⁷ Zөnnөzjumөt hullan hullan däx-härätän-win-däx hak-өнneḡ ed, ad-käy-äkf Emäli turhajät n-afäham-näsän iket-däx-näsän.

⁸ Ҳayөm kittөwäd ҮisaÄlmasex wa n-ahäya n-ännäbi Dawөd dd-issөnkär Mässinäḡ jer-inөmmuttan s-өmmөk wa s-tän-innä Älөнžil-i xaḡḡäbäḡ.

⁹ Däx-tөssөba n-Älөнžil-en-däx a fäl hannäyäḡ äḡizabät har dd-äqqäläḡ heḡ ämära-däx tišөm šund änäsjafa mäšan, hakd a-wen-däx-däx, mäjräd n-Mässinäḡ өnta, wär-iha tišөm.

¹⁰ A-wen-däx a fäl өšbaräḡ härät iket-net däx-tөssөba n-äddinät wi äsnäfrän Mässinäḡ däx-ittus n-ad-өнmiwädän өntäneḍ-däx d-өлḡөllas wa ihäkk Үisa Älmasex d-älxurmät wa iḡlälän där-äddew.

¹¹ A-wa mäjräd änihäjjän:

«Ҳisa Älmasex, afäl tamättant ta ija, nohär-tät där-s, adiš, ad-där-s nahär day tanäkra ta dd-ija jer-inөmmuttan.

¹² Afäl nөšbär däx-a-wa hanäḡ-irammasän, ad-där-s nahär төmmөнukөla mäšan, afäl t-näkkuddäl, ad-hanäḡ-ikkuddөл өnta-däx.

¹³ Afäl wär näḡdel näkkäneḍ, өnta iḡdal härkuk ed wär-äddobät ad-iqqөл ḍarät төnna-net.»

Isөmmäqqq däx-isälan n-akuddөл n-immun

¹⁴ Härätän-wi-däx a-s led s-ad tän-dd-siktөwäd i-äddinät härkuk, өttär däx-sän däx-idөm n-Mässinäḡ ad-өbḍөwän d-anmөntaš n-tifer ed wär t-illa ad-dd-išašray a-wen kunta wädden өlhөllak n-äddinät wi has-sajadnen.

¹⁵ Käyy, äj a-wa täddobed iket-net i-ad-dd-tөbdөdäd dat-Mässinäḡ tämoosäd ähalөs has-ijrazän dd-ässimdän ämašal-wa däx-t-ija, umas änaxdim wär-äskärakäd älxidmät wa iha, änaxdim hin-isasawädän s-iqqud, mäjräd wa ämoosän tidөt.

¹⁶ Jiwөḍ i-idäwännitän wi өšläynen i-äddin dd-wären šөšrөy härät, wi wär-өšlenät ar taxxalen-tin-däx, iba n-äddin ḡas a dd-e-itidөwän fälla-sän.

¹⁷ Imөjridän-näsän olähän ḡas d-abuyөs ijjašän, itihraw. Älžämaḡät n-äddinät-win-däx, ih'-e, Himnayus d-Filitus,

¹⁸ jän anmөjjaj d-tidөt wa-däx fäl, jannen tanäkra jer-inөmmuttan, äru d-tөja; өmmөk-wen-däx a-s takkäsän äddinät iyyäd däx-immun

¹⁹ māšan, ässas wa s-išwār issəns'-e Mässināḡ, intam dāḡ-edägg-net. Æntāned da išəkkelān n-akātab wi t-wārnen:

«Emāli, izzay äddināt-net»,

iktab fälla-s daḡ a-s:

«Ere innān a-s il'-e Emāli, adiš, isənnəməjjajet iman-net d-iba n-iqqud.»

²⁰ Ehān ähuusken mägqorān, wādden han-t ikassān n-orāḡ d-i n-azrəf, han-t daḡ iyyād əknanen s-ahəšk d-i əknanen dāḡ-tālayt. Ikassān wi n-orāḡ d-wi n-azrəf, i n-išilan wi n-imjora, wi n-ahəšk d-tālayt, i n-imənsiwān wi n-hak ašāl.

²¹ Afāl ittāf āwadəm isālan-wi-dāḡ s-iket tān-jeḡ, iššəšdāj iman-net, ad-umas šund ākoss ilan ālqim, ākoss šaddijān, itwar mās-si-s i-ašāl wa n-imjora. Ākoss-en, infa mās-si-s ed äddoobāt ad-sār-s ixdəm a-wa olāḡān iket-net.

²² Jiwəd i-derhanān wi tisəsnen ere əndārrān, əmmāḡ i-iqqud d-immun d-tārha d-ālyafyāt d-äddināt iket-nāsān wi ḡabbādnen Emāli s-ulh šaddijān,

²³ sənnəməjjəj iman-nāk d-mätlofāt d-taxxalen wāren dd-itirəw a sāl ikənnasān jer-äddināt.

²⁴ Akli n-Emāli, umaset emārḡ, wādden eməkkennəs, umaset ere äddooben äsəḡər n-äddināt, ere išmārān inällābāsān;

²⁵ iwar-t s-ad-itajj i-äddināt wi t-äddukrätnen älwižabān ähuuskätnen ed iha miši s-ad-tān-ākf Mässināḡ turhajāt n-ad-səmməskəlān erk əzzənəf wa hān, utabān, əzzəyān tidət,

²⁶ dihen, ad-tān-dd-əqqəlān iman-nāsān, ad-ābas ällilān erhet n-Iblis, isiḡəw-tān dāḡ-tāndārboten-net.

3

Išmal n-ajilal n-äddunya

¹ Timoti, əlməd a-s dāḡ-išilan-wi-dāḡ n-ajilal n-äddunya, əlkamān äzzāmanān sāmumnen,

² ad-ännāhād munkāzi dāḡ-äddināt, əjən azrəf amidi, səffənnəyān, ijješ-tān əttəkəbru, səkkufārān, umasān inəbbudar; ad-ābas tān-ha tāmayit, ad-ābas ässimḡārān a-wa ila Mässināḡ,

³ ad-ābas tān-ha tārha wāla tāhanint, ad-ijatnāt tižmiten dāḡ-sān, ad-əmsāršārān, ikwalān ulhawān-nāsān, əksənān a-wa olāḡān,

⁴ ad-umasān imaydarān d-imənhaj äzziwāt əttəkəbru wa tān-äsidārḡālān, səmmidəwān izəjraz n-iman-nāsān uhən Mässināḡ,

⁵ ad-saknen äddināt älmät a-s ətṭafān äddin māšan, hakd a-wen-dāḡ, unjayān s-a-wa ihakkān äddin äššahāt-net. Sallād-ahi, äddināt-win-dāḡ, ajəj-tān.

⁶ Iyyād dāḡ-sān, wār tān-išla ar tikawt jer-ihānan i-ad-səswədən s-tāzude n-iləs tiḡəḡen wāren əla tayətte s-wār-intem immun-nāsnāt, tənḡay daḡ tānudre-nāsnāt, wār t-illa erk derhan ḡarāt wār-ošelnāt,

⁷ ärhanāt härkuk almud māšan, indar-asnāt fāw, ad-əlmədnāt wāla ad-ənnufləynāt dāḡ-musnāt n-tidət.

⁸ Emmək-wa-dāḡ s-ämyānnan Yanis d-Yinbris tidət i-ännābi Mosa, əmmək-wen-dāḡ daḡ a-s tattārān meddən-en-dāḡ asəbbəggu n-tidət. Meddən-en, tayətte-nāsān, təfraz, wār-ibded immun-nāsān fäll-hārāt

⁹ māšan, wār mad-əkkən ijəj ed ad-ənhəyān äddināt iket-nāsān əbbuddəl wa dāḡ-oḡān, oškān s-əmmək wa s-ənhəyān äddināt iket-nāsān ibda išk wa ijə Yanis d-Yinbris.

Antum wa iwārān Timoti dāḡ-mājrad n-Mässināḡ

¹⁰ Käyy, tärđaläd a-wa käy-əssäxřäx, wär has-təşleyäd siha wäla siha, tətəläläd tämudre-nin, təssanäd härätän wi s-ännuyäx iji-näsän d-immun-in d-tazidert-in d-tärha-nin d-akuyəd däx-tazidert,

¹¹ täjjəyhäd i-älɣizabät d-tersəmmawen ti hi-ärmäsnen däx-aɣrəm wa n-Intyuş, d-wa n-İkanyun, d-wa n-Listra. Təssanäd a-s hak iyyän däx-idäggan-win-däx, ənhäyäx däx-s älyizabät mäšan, ikkäs-ahi-dd däx-sän Emäli iket-däx-näsän.

¹² Elmədnet äddinät wi ärhänen uđəf n-äddin i-ad-sətbətän tassaxt-näsän d-Ÿisa Älmasex a-s ad-ənhəyän älyizabät

¹³ mäšan, äddinät wi n-inälläbäsän n-inəsbuha, ad-äsetän härkuk däx-tälläbäst d-ahälak, saswadän, tinməşəswidän day əntäneđ jer-iman-näsän.

¹⁴ Käyy, ağız iman-näk, əkən uđəf n-a-wa täxred, təfləsäd a-s ädduuttät ed təssanäd ere wa hak-tissäxřän.

¹⁵ İlkəttabän wi šäddijnen täxred härwa mäđriyäd, əntäneđ a äddobätnen ad-käy-səwrən sərho wa ihakkän əlyəllas s-immun s-ŸisaÄlmasex.

¹⁶ İlkəttabän, iket-däx-näsän, Mässinäx a tän-dd-äzzäbben s-tärna n-Unfas-net i-ad-tän-ha tənfa, toläs, däx-isälan n-texäre d-asəbbəggu d-asəmmäqq d-asəssiğəd i-ad-əlmədän äddinät iqqud dat-Mässinäx,

¹⁷ udabät u-Mässinäx amişəl n-e d t-illäm emärked ijrazän i-Mässinäx.

4

Iji n-isälan n-mäjräd n-Mässinäx

¹ Ettäräx däx-k däx-idəm n-Mässinäx d-idəm n-ŸisaÄlmasex-i s-ənta a madän-işräx äddinät wi əddärnen hakd wi ämmutnen d-däx-idəm n-aşäl wa n-uɣəl-net d-idəm n-Təmmənəya-net:

² xaṭṭāb mäjräd n-Mässinäx, äj a-wen s-älwäqq iket-net jer-təjrawäd sār-s wäla; səssiğəd, äxtəl, səmmətär äddinät. Sədəw a-wa säxred d-tazidert təmdat.

³ Wär t-ih' əşşäk a-s ilkam äzzäman d-äbas əşmərän äddinät i-asjed i-tijəttewen n-texäre ta n-tidət tädduttet, änn-ak, ad-ilalän izəjraz n-iman-näsän, əkfən iman-näsän älyulam s-takärkarän timəzzujen-näsän, jannen-asän a hasän-ijrazän,

⁴ ad-əṭṭubbun timəzzujen-näsän, usafän tinfusen tidət

⁵ mäšan, käyy, əkrəş älxal däx-härät iket-net, əşmār i-älɣizabät, äj ämaşal wa n-amällänžal,† səllənžət äddinät, äj a-wa käy-iwäran s-sərho.

Ajilal n-mäjräd

⁶ Däx-a-wa hi-dd-iqqälän näkk, ässağät n-tekle-nin, ohäz-dd, älwäqq wa d-leɣ s-ad-äkfäx tämudre-nin i-ad-tumas takute i-Mässinäx, iwwäđ-dd.

⁷ Änmänxäx däx-amjār wa ufän däx-imjārän, əssəmdäx temäşejt ta heɣ, əṭṭäfäx immun;

⁸ ämära, iqqäl-ahi älhäk n-tärənnawt ta jeɣ, älhäk-en, a t-əmoosän, korona, a-wen, takənbut n-əlyəllas ta n-oräx hi-mad-äkf Emäli wa n-eməşşerräx oɣädän aşäl wa n-tebädde, wädden day näkk ɣas a-s tät-mad-äkf, ad-tät-äkf i-e d t-illäm ere iknan tärha n-aşäl-wen-däx dd-e-infiləl Ÿisa.

⁹ Ass-ahi-dd šik

¹⁰ fäl-a-s Dimas, ijär-ah'-in fäl tärha n-wälät-äddunya, ikk' aɣrəm wa n-Täslonika. Kribus ənta, ikkā teje ta n-Gälasya, Titus ikkā ta n-Dälmasya.

¹¹ Wär dd-äqqima ɣur-i a säl Luqa. Idaw-dd d-Marqəs afäl dd-gilləwäd fäl-a-s ämiixatäräx sār-s hullan i-ad-hi-ilal däx-ämaşal wa heɣ.

¹² Äşmaşäläx Tuşik s-aɣrəm wa n-İfäsus,

† 4:5 4:5 — İsem n-awadəm wa ikkäläf Mässinäx däx-älkänisät d-älxuṭbät n-Älənžil. — Afäl əjjetän a hasän-itawännen: Imällänžalän.

¹³ afäl dd-gilləwäd, əmmär-ahi-dd abärnuš wa oyyeḡ ḡur-Qarfäs dəḡ-aḡrəm wa n-Tärwas, əmmär-ahi-dd dəḡ-əlkəttabän-in, hullan wi n-ilämawän.

¹⁴ Älxader wa n-enhäḡ, wär hi-oyya härät, ijräw-as Emäli älhäk n-a-wa ämešäl.

¹⁵ Hekäyy! Äj'-as ənniyät käyy-dəḡ ed ikna eket hullan dəḡ-akənnas n-a-wa nəsaḡra.

¹⁶ Dəḡ-tebädde-nin ta täzzarät dat-äššäreḡa, wär t-illa fäw ere hi-idhalän, həläḡ iman-in, jārän-ah'-in äddinät iket-dəḡ-näsän. Ettarəḡ dəḡ-Mässinäḡ, ad-wär hasän-ittef a-wen.

¹⁷ Kud-dəḡ jārän-ah'-in äddinät, idhəl-ahi Emäli, ikf'-ahi äššahät, äsdabät-ahi ad-äxtebäḡ isälan-net i-inəzzulam,† ikkäs-ahi-dd dəḡ-emm n-ahär.

¹⁸ Enta dəḡ a hi-e-agəzän dəḡ-e d t-illäm äššar, iḡləs-ahi i-ad-əjjəšäḡ Təmmənəya-net dəḡ-išənnawän, wär hi-äkränkarät ešš. Äqqamet-as älxurmät härkuk. Amin!

Tihulawen

¹⁹ Tähuuläd-ah'-in Briska d-Akilas d-ehän wa n-Unizifur.

²⁰ Iräštän, äqqiim-in dəḡ-aḡrəm wa n-Kurənta, oyyeḡ-in Trufim ärhiin dəḡ-aḡrəm wa n-Milati,

²¹ ass-ahi-dd šik. Ähuul-käy-in Ibbulu d-Badi d-Linus d-Klodya d-ayətma-k dəḡ-äddin iket-dəḡ-näsän.

²² Äqqima Emäli d-ənniyät-näk, ikf'-iwän ännuxmət-net. Amin!

† 4:17 4:17 – ḡur käl-Älyähud, ere wärän ämoos ägg-Älyähud s-aläšäl meḡ a fäl tiwsaten ti iyyäḡnen iket-näsnät, ti n-inəzzulam. — Äšl-i-dəḡ, änäzzalim, äkafär (ere wärän issen s-Mässinäḡ).

Täkarðe ta iktäb Bulös i-Titus

Äšqjəš

¹ A-wa näkk, Bulös wa n-akli n-Mässinäx, d-änänmašul n-ŸisaÄlmasex. Mässinäx a hi-dd-iyrän s-iman-net i-ad-əlmədän wi äsnäfrän immun sär-s, əzzəyän tidət-net, ətəfän tämudre täddiinät,

² əjrən ätəma n-tämudre ta täxlälät s-ijjäs Mässinäx-i wärän irəzə dəx-təna-net ärkäwäl-net, härwa wär dd-täxlek äddunya.

³ Tosä-dd täqqän ta issəbdäd i-a-wen ɣas, äšmašäl-ahi i-ad-äxəbəx a-wa s-äru sär-s omär Mässinäx-i n-Ämaɣlas-nänäx dəx-mäjräd-net.

⁴ A-wen-däx a sär-i dd-oräwän, ad-hak-in-əktəbəx käyy Titus-i n-alyaɣ-in itbätän dəx-immun wa nohär. Ähuuläx-käy-in, ətтарäx s-Mässinäx-i n-Abba-nänäx d-Ÿisa Älmasex-i n-Ämaɣlas-nänäx a käy-ikfän ännuɣmät d-älxer.

A-wa dār-äsmätär Bulös Titus

⁵ Äzzäman wa d-käy-in-oyyeɣ dəx-äkall wa n-Kritus, äsmätäräx-käy d-ad-hin-səmdəwäd a-wa hin-äqquimän dəx-əššäxəlän n-älkänisät, sənnəfrənäd jer-imumənän dəx-hak aɣrəm, inušämän jänen ənniyät i-älkänisät s-əmmək wa s-käy-omäräx s-a-wen.

⁶ Ənneɣ-ak, änušäm, umaset ere wär-iwer uɖlem wäl' iyyän, ähaləs n-iyyät taməɖt, umasnet aratan-net imumənän wären ämoos inəbbudar.

⁷ Änušäm ijan ənniyät i-älkänisät, wär-ufa ad-t-iwar uɖlem ed ənta a issäɣläf Mässinäx tamətə-net. Wär-itumaset anäkfor, eməkkenzär, emäsaw n-asməd, eməkkənəs, wär-isädärhanet terše n-ehäre s-taxərbənit,

⁸ umaset ere ih' amäjaru, isəmmidəwet amišəl n-a-wa oläxän, umaset emässärho, ere oɣadän, itəfet tämudre šäddijät, ännähəɖet dəx-iman-net.

⁹ Intəmet hullan dəx-uɖəf n-mäjräd n-Mässinäx-i wär-ih' äššäk s-əmmək wa s-ätwäsəɣra ašäl äzzarän i-ad-udabät ənta-dəx asəmmətär n-äddinät dəx-isälan n-tijəttewen ti n-teɣäre ta n-tidət tädduttet, isəbbugət inämäšrayän.

Imäsəɣran n-bahu

¹⁰ Inämäšrayän ya, hekäyy! Əllan-t s-əjut jer-älməssexitän wi n-käl-Älyähud, wär səjədän i-a-wa hasän-itawännen, äsijätän mäjräd wärän infa härät d-tikärras n-äddinät.

¹¹ Səssuɖəf-tän imawän-näsän fäl-a-s, šinməšrəyän tihusay n-timəzzaɣ n-ihänan əmdanen, saɣren a wärän il' əmmək i-ad-äbbäxärän s-taxərbənit.

¹² Təɣla tanfust dəx-isälan-näsän har innä faw iyyän dəx-wi jän ännäbitän-näsän: «Onin käl-Kritus-i wären ošel ar dəx-bahu, iket n-iwäɣsan,

wär kəttəwäm ar a jäm dəx tisatten-nawän uhən-dəx wär käla təɣnäm.»

¹³ Ijmaɖ-t äššäk a-s a-wa fälla-sän ätwännän, tidət. Dəx-təssəba n-a-wen-dəx a fäl ärheɣ fälla-k a-s i dəx-sän tənähäyäd ifraɣ, äxtəl-t i-ad-itbət immun-net.

¹⁴ Wär läkkämnet i-tinfusen n-käl-Älyähud ti n-ibda wäla alkum i-älɣadatän n-äddinät wi ənkärnen tidət, ässofän bahu tidət.

15 Äwadəm wa s-šaddij ulh-net, šaddij-as daḡ härät iket-net; mäšan äddinät wi n-inämäšrayän s-ämmiḍäsän ulhawän-näsän, wär t-illa a data-sän šaddiijän ed ənniyät-näsän hakd-däḡ ammas n-ulhawän-näsän, ämmiḍäs.

16 Jannen s-imawän-näsän, əzzayän Mässinäḡ a-s ija a-wen, tikəddulän-t s-imojjan-näsän, äsikarakəḍän, iməffelləḡän n-imänkarän wär t-illa fäw a olayän s-äddoben amišəl-net.

2

Tämudre ta tänihäjjät d-tuksəḍa n-Mässinäḡ

1 Däḡ-a-wa käy-dd-iqqälän käyy Titus, wär säḡra äddinät ar tidət n-tijəttewen n-teḡäre ta n-tidət tädduttet.

2 Änn i-imḡarän, ad-ännähəḍän däḡ-iman-näsän, nəhöjjənet d-semḡar, jarrähän, šaddij immun-näsän, ärhan äddinät, əşbarän.

3 Änn i-timḡaren, ad-əjənät šund a-wen-däḡ, wär tänät-itäjjäset ännämima, wär säsakaynet däḡ-tesäse n-asməd, umasnet tinəsdebbären n-a-wa oläḡän;

4 səmmətärnet tiḍeḍen ti məḍroynen s-iket ädobännät d-tärha n-meddən-näsnät d-aratän-näsnät,

5 səlmədnet-tänät taḡimit təştarät däḡ-ihənan-näsnät, d-iba n-tikra i-meddən-näsnät, d-uḍəf n-ihənan-näsnät s-särho, d-milḡaw d-asrəs n-iman dat-meddən-näsnät i-udaḡ ad-ijrəw äwadəm äsarü, s-oḡäm məjrad n-Mässinäḡ däḡ-isəlan n-adubən.

6 Änn šund a-wen-däḡ i-imawaḍän, səmmətär-tän d-ad-tän-iwar särho däḡ-härät iket-net.

7 Käyy daḡ-i n-ämizär-näsän, umas-asän däḡ-a-wa täjjäd ere hasän-təha tətəlal, säḡrä äddinät tijəttewen ti n-teḡäre ta n-tidət tädduttet s-ulh šaddiijän, nəhöjj d-semḡar,

8 tajj məjrad oḡadän wär ha tamḡənnant i-ad-əkrukəḍän imiksänän, iba-hasän taşləlt s-hanäḡ-oḡämän.

9 Eklan, änn'-asän: sajadät härkuk i-mössaw-wän, tajjät-asän a-wa fälla-wän ärhän, wär hasän-täşmäşakkem məjrad,

10 wär däḡ-sän tikərät härät, əfləsnet-kəwän härkuk i-ad-səḡärän äddinät a-wa innä Mässinäḡ-i n-Ämaḡlas-nänäḡ.

Tädarfit ta dd-äsnäfaläl Mässinäḡ

11 Ännuḡmät wa iḡalläsän, äsnäfaläl-t-dd Mässinäḡ i-e d t-illäm ägg-adəm.

12 Ännuḡmät-net en-däḡ a hanäḡ-isälmadän a-s, iwar-anäḡ ad-nəbḍəw d-iba n-äddin d-azzal ḍarät wälät äddunya, nəṭṭəfet däḡ-äddunya-ta-däḡ, tämudre täddiinät, toḡadät däḡ-särho.

13 A-wen-däḡ a hanäḡ-iwarän iket-di dd-itis älxer wa məqqärän s-nəjär äṭṭäma-net, a t-ämoosän: uḡəl n-ḲisaÄlmasex-i n-Mässinäḡ wa məqqärän ilän älxurmät, ənta a-s Ämaḡlas-nänäḡ.

14 Ənta-en-däḡ a ikfän iman-net, inḡäl ašni-net, ämmut däḡ-idəḡḡan-nänäḡ i-ad-hanäḡ-dd-ikkəs däḡ-e d t-illäm iba n-iqqud, iššəşdəj-anäḡ, ij'-anäḡ tamətte-net tədgazät hak ašäl däḡ-iji n-imärkedän.

15 Isəlan-wi-däḡ, səmmətär sär-sän äddinät, säḡər-asän-tän, täḡtələd-tän sär-sän s-əmmək wa s-t-e-äj ere äzzarän i-äddinät, wär käy-iläkkəhet äwadəm.

3

Asjed i-käl-əlxəkum

¹ Səktəw-dd imumənän a-s iwar-tän ad-sajadän i-imizärän n-äkall d-käl-əlxəkum-net, mašälnet a-wa fälla-sän ätiwärhän, əjənet hak ašäl fäl amišəl n-a-wa oläxän.

² Wär tižəmnet äwadəm wäl' iyyän, wär kännəsnet, umasnet dägğ-älɣafyät s-əžedän ulhawän-näsän i-äddinät iket-näsän.

³ Wär hin-təttəwäm a-s ibda, näkkäneḍ-däx kälä nämoos älžuhal s-wär t-illa a ässimyärän, nänimäšräy i-Mässinäx, noška, wär t-illa erk derhan d-Iblis s-wädden ännihäd däx-näx, wär hanäx-išla ar tälläbäst jer-iman-nänäx d-derhan n-a ila äwadəm wär nəla.

⁴ Mäšan, ašäl wa dd-äsnäfaläl Mässinäx-i n-Ämaɣlas-nänäx miɣaw-net d-tärha-net i-dägğ-adəm, iɣläs-anäx däx-äššarän-win-däx.

⁵ Iɣläs-anäx, wädden a-s innin ill'-e a oɣadän nāmesäl, änn-ak, iɣläs-anäx däx-təssəba n-təmyäre n-tāhanint-net, iššəšdäj-anäx s-tärna n-Unfas Šäddijän i-ad-numas äddinät äynaynen; ikf'-anäx tämudre täynayät.

⁶ Mässinäx a fälla-näx-dd-äzzäbben Unfas Šäddijän s-tānoflayt däx-idəm n-Ämaɣlas-nänäx, ɣisaÄlmasex.

⁷ A-wen, ij'-e däx-ännuɣmät-net i-ad-numas s-tärna-net äddinät data-s lanen idəm, numas iməkkusa-net wi äsjär ätṭäma n-tämudre ta täɣlälät-i s-nəjār ätṭäma-net.

⁸ A-wa mäjräd änihäjjän, ärheex daɣ ad-t-sənniləsäd hullan i-äddinät i-ad-sär-səssanän, ədgəžän wi n-imumənän däx-iji n-imärkedän, ənta-den-däx a-wa ähusken infän dägğ-adəm iket-näsän s-härät.

⁹ Hekäyy! Wär tänmäntäšäd mäjräd d-äwadəm wäl' iyyän ed wär t-illa a infa a-wen. Äyy fälla-k abäraj däx-ätṭarexän d-härät n-iməjridän wären əzley d-taxxalen, wär täsjätäd mäjräd d-amsiwi-net wärän oher härät däx-isälan n-alämär wa n-ännäbi Mosa, wär t-illa a-s infa a-wen-däx, əšləy-as, mälayäɣna ɣas.

¹⁰ E-d tənähäyäd ere änimäšräyän, itattärän bädḍo-bädḍo jer-äddinät, äj'-as aɣätal wa äzzarän, təjəd-as daɣ wa s-əssin. Afäl unjäy s-asjəd-hak, səssijəj-t iman-näk

¹¹ ed təssanäd a-s äwadəm šund-wen, äbas təha tüksəḍa n-Mässinäx ulh-net, imməntäl i-iman-net, oräw-dd sär-sän əlhəllak.

Ajilal n-mäjräd

¹² Afäl sär-k-in äšmašäläx Artimas meɣ Tušik, wär täjj a fäl wär hi-dd-tosed, äqqaläx-ak däx-aɣrəm wa n-Nikabolis ed dihen-däx ad-kittəwäx ad-səssikəyäx tajrəst.

¹³ Ədhəl Zenas wa n-änabdid ənta d-Äbbäloš, udaɣ faw ad-əmyutärän s-härät däx-asikəl-näsän.

¹⁴ Wär-änhäjja ad-ämoosän imumənän, äddinät s-äqqurän ifassän-näsän, əlmədnet iji n-a-wa oläxän i-ad-ijjəš ärramät tämudre-näsän dat-Mässinäx.

¹⁵ Ähuulän-käy-in äddinät wi ɣur-i t-əllänen iket-däx-näsän, tähuuläd-in daɣ imärhan-nänäx wi dār-nohär äddin iket-näsän.

Issənsa Mässinäx fälla-wän ännuɣmät iket-däx-näwän. Amin!

Täkarde ta iktäb Buləs i-Fälyamon

Äšajəš

¹ A-wa näkk, Buləs, wa ihän takärmüt däx-tössəba n-ŶisaÄlmasex d-əŋŋa Timoti i-Fälyamon wa n-eməššerək-nänäx nəkna tärha.

² Nəktab-ak-in käyy d-älkänisät ta täzzämməxät däx-ehän-näk, nəhuul-in Afya ta n-wälätma-näx däx-äddin d-Aršib wa n-amidi-nänäx däx-amjār wa nəha.

³ Ähuuläx-käwän-in iket-näwän, ətтарäx day s-Mässinäx-i n-Abba-nänäx d-Emäli ŶisaÄlmasex a käwän-ikfän ännuxmät d-älxer.

Təmayit n-Buləs däx-isälan n-Fälyamon

⁴ E-d däläx Mässinäx-däx, ad-käy-dd-əktoḡ, ad-has-tumayäx däx-tössəba-näk.

⁵ Əjjäšan-ahi isälan n-tärha ta jed i-iməššeddəjän iket-däx-näsän d-immun-näk s-ŶisaÄlmasex.

⁶ Tattäräx s-Mässinäx ad-umas immun wa hanäx-əssiirtäyän näkk d-käyy a ih' älfäyda, ihakkän musnät n-a-wa s-näddoobät ad-t-näxdəm i-Älmasex.

⁷ Əkneey tedawit, əŋŋa-x däx-äddin, olwan iman-in däx-tössəba n-tärha ta käy-hät s-ənta a-s tössəsmädäd ulhawän n-iməššeddəjän.

A-wa irha Buləs däx-Fälyamon

⁸ Ämära, kud-däx däx-tössəba n-a-wa hanäx-osaxän, əjrawäx turhajät ḡur-Älmasex n-ad-fälla-k əfrädäx a-wa mad-təjəd,

⁹ äsoofäx ad-ḡur-k ətтарäx idəm däx-tössəba n-tärha ta n-jere-näx, näkk Buləs-i n-amḡar s-ašäl-i-däx, heḡ takärmüt däx-tössəba n-Ŷisa Älmasex.

¹⁰ Äsimätäräx-käy d-alyaḡ, Unažəm† wa dd-äwwäyäx s-immun s-ŶisaÄlmasex däx-takärmüt-ta-däx heḡ.

¹¹ Tidət, ibda, wär hak-t-iha härät mäšan ašäl-i-däx, ih'-ahi-t härät näkk hakd käyy.

¹² Näkk a sār-k-t-in-əssiglän, wär t-əzleyäx d-iman-in,

¹³ äsdärhänäx ad-ḡur-i äqḡayəm i-ad-hi-idhəl däx-edägg-näk näkk-i ihän takärmüt däx-tössəba n-Älənžil,

¹⁴ mäšan, wär-ärheḡ ad-äjäx a-s wär tärdeḡ, wär-ärheḡ ad-umas älxer-näk a käy-ähhuuššälän, äsoofäx, ad-dd-ifal ulh-näk.

¹⁵ Iha miši s-ajmuḡ wa käy-dd-ija har ija härät n-äzzəman, i n-atwitas n-ad-käy-in-iqqəl härkuk,

¹⁶ wädden šund akli, imäl jənnəj-a-wen, ämoos ämära, əŋŋa-näx nəkna tärha däx-äddin. Tidət-däx a-s jeeḡ-as tärha təmdat mäšan, käyy a iwar ad-has-təjəd tärha toojərät ta has-jeḡ ed ämära-däx, ämoos akli-näk, ämoos day älməssexi.

¹⁷ ḡas kunta tətḡafäd-ahi däx-edägg n-əŋŋa-k däx-äddin har əjud-i, səbbärrək-t s-əmmək wa s-hi mad-səbbärrəkäd.

¹⁸ Kunta ill'-e-t a hak-iḡšad, wälä ill'-e a t-tärwasäd, näkk a t-iḡmanän.

¹⁹ Zəjjəzz hullan edägg-wa-däx däx-täkarde-ta-däx, näkk iman-in Buləs a t-iktäbän s-äfuss-in. Əḡmanäx-ak day a-s näkk a hak-madän-izəl fälla-s, wär-ämḡatäräx day s-ad-käy-dd-səktoḡ a-s käyy iman-näk, leeḡ-käy, iwar-käy älxəqḡ-in ed näkk-i-däx a ija Mässinäx əssəbab wa käy-dd-äwwäyän s-təməzzuyt n-ŶisaÄlmasex.

† 1:10 1:10 Unažəm däx-Tälyunanit, älmäḡna-net: Wär infa härät.

²⁰ Үас, әнҗа-җ, өттарәх дәх-к ад-һи-төјөд идәм дәх-төссөба н-Емәли. Афәл-һи јед а-вен ад-сөсмөдәд улһ-ин дәх-төссөба н-Әлмасех.

²¹ Ғфласәх а-с ад-һи-сөјөдөд, а-вен-дәх а фәл һак-ин-өктәбәх, әккасәх даҗ әшшәк а-с ад-һи-төјөд а ојәрән а-ва дәх-к таттарәх.

²² Дәрәт-а-вен, сөммүјнөт-аһ'-ин едәгг дәх-әззуббөх афәл кәwән-ин-өсөх ед јарәх әтәтәма н-ад-һин-өтwөyyәх дәх-төссөба н-титтар-нәwән.

Tihulawen

²³ Äһuul-käy-ин Ibbafрас wa н-амиди-нин дәр-оһарәх такармут дәх-төссөба н-ҮисаӘлмасех.

²⁴ Äһuulән-käy-ин даҗ имидiwән-ин Marqәs d-Aristarәq d-Dimas d-Luqa.

²⁵ Äһuulәх-kәwән-ин, өттарәх дәх-Емәли ҮисаӘлмасех ад-әј әннуҗмәт-нет дәх-өниyyәт-нәwән. Amin!

Täkarde ta n-Yäbranitän

Yisa a ija Mässinäx enommejräd-net

¹ Mässinäx ibda, wär t-illa äzzäman d-älmäxna s-wädden imməjräd dāx-s i-imārawān-nānāx s-imawān n-ännābitän

² māšan, dāx-äzzāmanān-wi-dāx n-ajilal n-äddunya, Rure-s a-s imməjräd. Rure-s en-dāx a ija amākkasu n-hārät iket-net, s-tārna-net ənta-en-dāx a-s dd-ixlāk äddunya.

³ Ənta a-s ännur n-älxurmät n-Mässinäx, ānifāqqa d-Mässinäx dāx-hārät iket-net. Tārna n-mājräd-net a-s iṭṭaf, ihal a-wa ihān äddunya iket-net. Ənta a ijrāwān i-dāgg-adəm əmmək s-šaddijān dāx-tilušawen n-abākkaḍ, təzzar ikk' išənnawān, āqqima dihen daw-aḡil n-Mässinäx-i n-ämānokāl ilān tārna iket-net.

Yisa, ojar ānjālosān

⁴ Rure-s n-Mässinäx, ojar ānjālosān; təmxāre n-tifut-i tān-ija a fāl ijrāw isəm ojarān wa-nāsān.

⁵ Əndek xas dāx-ānjālosān-i s-kāla has-ätwānnā?

«Kāyy a-s Rure-x, xur-ašāl-i-dāx, nākk a-s Abba-nāk.» Wār t-illa! Əndek daḡ-i s-kāla has-ätwānnā?

«Ad-hak-umasāx Abba, tumasād Rure-x.» Wār t-illa!

⁶ Māšan, Rure-s n-Mässinäx-i n-teḡāfādde, ašāl wa t-dd-āšmašāl s-äddunya, innā: «Ärkāxnet data-s ānjālosān n-Mässinäx iket-dāx-nāsān.»

⁷ Ämāra, dāx a-wa dd-iqqālān ānjālosān, ənta da a-wa fälla-sān innā Mässinäx: «Änjālosān, inəmmušal-in, eklan-nin; jan armuḍ wa ja tāšikwält, olāhān d-efew āhijäljälān.»

⁸ Māšan, Rure-s n-Mässinäx ənta, inn'-as:

«Kāyy a-s Mässinäx, təmmənukəla-nāk, tāxlal; wi hānen Təmmənəya-nāk, tāxkamād fälla-sān s-iqqud;

⁹ ijraz-ak a-wa oḡādān, wār səggədād dāx-a-wa läbasān. A-wen-dāx a fāl kāy-āsnāfrān Mässinäx-i n-Māssi-k, ikn'-ik asəddəwi, āssof kāyy imidiwān-nāk.»

¹⁰ Olās daḡ innā Mässinäx dāx-isālan n-Rure-s:

«Emāli, s-alāšāl dat-hārät iket-net, kāyy ad-dd-ibnān ākall, ifassān-nāk a-s dd-tāxlākād išənnawān.

¹¹ Išənnawān d-ākall, ilkam ad-tān-iba, iyyən-kāy-dd hed edāgg-nāk; ilkam ad-əjən amənd wa n-ebārdāy

¹² taḍhəd-tān-in šund abārnuš, səmməskəlād-tān-dd šund temāslit isamāskal āwadəm, māšan, kāyy, wār tēmiskilād,

hed edägg-näk,
täxlal taxröst-näk.»

¹³ Endeک ɣas dāɣ-änjālos-i s-kāla has-innä Mässināɣ a olāhān d-a-wa innä i-Rure-s a-s has-innä:

«Eyyāw, ɣayəm daw-aɣil-in
hundāɣ har kāy-äkfāɣ tārna fäll-išənja-näk,
äjāɣ-tān isəkkukal dawa-k.»

¹⁴ Ak, änjālosän-i-dāɣ fāw ma äqqalän? Ajän wādden unfasän ija Mässināɣ inəmmušal has-äxdammen išamašal i-ad-ahāɣān tinahāɣen i-äddinät wi s-irha Mässināɣ ad-tän-iɣləs dāɣ-ibäkkadän-näsän?

2

Təmyäre d-tihusay n-əlyəllas wa ikfä Mässināɣ dāgg-adəm

¹ A-wen-dāɣ a fäl əlyəllas wa hanāɣ-ikfa Mässināɣ, nəjləyet dāɣ-s i-ad-wär hanāɣ-itəzəwit emānän wa n-tanməšrayt sār-nāɣ dd-e-arəwän əlhəllak.

² Dāɣ-äzzāman hin-okayän, mäjräd wa jän änjālosän i-imārawän-nänāɣ, itbät, wi dāɣ-sän änmäšräynen, hakd wi unjäynen s-asjəd i-mäjräd-wen-dāɣ, änmānhäyän d-iman-näsän s-a-wa dār-ogdāh a-wa äɣšādän.

³ Əlyəllas wa hanāɣ-ikfa Mässināɣ, Emāli iman-net a sār-nāɣ dd-äzzarän, ij'-anāɣ isālan n-təmyäre-net. Dara-s, äsdätten-anāɣ-t inəmmušal wi äjjihänen i-a-wa innä. Ak əlyəllas ogdāhän d-a-wen-dāɣ, afäl has-in-näšbäššād, ma tillan daɣ hanāɣ-e-iɣləsän dāɣ-äššar wa ilkāmän?

⁴ Äddinät wi hanāɣ-äjjihänen s-əlyəllas-wen-dāɣ, äsdättät Mässināɣ a-wa ənnän s-ijitän n-Mässināɣ d-ännuyän n-härätän ässuksädnen wi ämešälän, ij'-asän daɣ Unfas Šäddijän isuf wi itäj i-äddinät dāɣ-erhet-net.

⁵ Ənhəywät! Äddunya ta dd-malät s-hawän-nəha isālan-net, dāgg-adəm a dāɣ-s-e-izarän wādden änjālosän.

⁶ Isālan n-a-wen-dāɣ a dāɣ-innä əlkəttab n-Mässināɣ dāɣ-edägg iyyän:

«Mässināɣ! Ak ägg-adəm-i-dāɣ, ma ämoos, kittəwäd-t-dd?

Ak ma iqqal rure-s n-Adəm, danäd-t?

⁷ Tidət-dāɣ a-s jed-t daw-änjālosän

i-härät n-äzzāman dāruusän,

təkfəd-t älxurmät d-semɣar,

⁸ jed-t jənnəj-härät iket-net.»

Dāɣ-tārna ta ikfa Mässināɣ i-ägg-adəm fäll-härät iket-net, wär t-illa a hin-oyya s-wādden ij'-e jənnəj-s mäšan, hakd a-wen-dāɣ, nəhannāy a-s ämära-dāɣ, wādden härät iket-net a fäll-ila tārna, härät ilkamän a-wen.

⁹ Ƴisa, ämära-dāɣ, ij'-e Mässināɣ i-härät n-äzzāman dāruusän daw-änjālosän i-ad-ämmät dāɣ-ännuymət n-Mässināɣ dāɣ-təssəba n-ibäkkadän n-äddinät iket-dāɣ-näsän. A-wen-dāɣ a fäl ašäl-i-dāɣ, ij'-as Mässināɣ älxurmät d-semɣar əlhäk.

¹⁰ Wär t-illa a tillan s-wādden Mässināɣ a t-ittafän s-emel. Ənta a irhän ad-inhəy Ƴisa tersəmmawen, imdəw-dd sār-s semɣar iket-net, umasän äddinät äjjootnen aratan n-Mässināɣ, əjrəwän älxurmät ed täxlās-tän tārna n-Ƴisa-i

¹¹ iššəšdājän dāgg-adəm dāɣ-ibäkkadän-näsän, ohär dār-sän Abba. A-wen-dāɣ a fäl wär tän-ässajär iman-net, iglä har tän-iɣarr s-isəm: «Ayətma-ɣ.»

¹² Təssəba n-a-wen-dāɣ a fäl innä Ƴisa i-Mässināɣ, iktab a-wen dāɣ-əlkəttab, innä:

«Mässināɣ! Ad-äjāɣ isālan-näk i-ayətma-ɣ,

Amələɣ-kāy dāɣ-ammās n-idäggan wi dāɣ-tažəmmaxän.»

¹³ Oläs daɣ innä:

«Äsifälläɣ fäll-Mässināɣ»,

təzzar ässewäd fäll-a-wen:

«Mässinäx, tamətte ta hi-təkfed,
näkk d-ənta da, näžžimmäx data-k.»

¹⁴ Ƴisa, əlxəllas n-dägg-adəm a-s dd-osa, a-wen-däx a fäl ənta-däx, ämoos-dd ägg-adəm. Osä-dd, ämmut; tamättant-net-en-däx a t-təkfät ašäl fäll-Iblis-i ännihäđän däx-tamättant,

¹⁵ ikkäs-dd äddinät iket-näsän däx-əkkəlu wa däx-tän-ja tuksođa n-tamättant.

¹⁶ Ƴisa, wädden änjəlosän a-s dd-osa i-ad-hasän-ahäx tinahäxen, ihäyawän n-ännäbi Ibrahim a-s dd-osa.

¹⁷ A-wen-däx a fäl ämoos-as tähaššilt, ad-dd-umas ere olähän d-ayətma-s däx-härät iket-net, umas U-tikutawen wa mäqqārən s-ha tähanint ulh-net, ämašäl a-wa fälla-s irha Mässinäx i-ad-əjrəwän xur-Mässinäx tenäšše n-ibäkkəđän-näsän.

¹⁸ Ƴisa, ittär Iblis a-wa däx he-äj iżžurrəb-t, idgəz-t hullan mäšan, indär-as ad t-isidəw. A-wen-däx a-s ašäl-i-däx, ädoobät ad-ahäx tinahäxen i-wi itizərrub Iblis.

3

Ƴisa, ojar ännäbi Mosa

¹ Təssəba n-a-wen-däx a fäl, ayətma-x, käwəneđ-i dd-i-xrə Mässinäx s-iman-net, ij'-iwän iməššeddəjan, zəjjəzzät təmudre ta ittaf Ƴisa, xaymät t-dd-kittəwäm, ənta-i n-änämmašul d-U-tikutawen mäqqārən hanäx-itajjan isəlan n-tijəttewen ti fäll-igla immun-nänäx.

² Äsnäfrän-t Mässinäx, ixdäl däx-älxidmət wa t-issəxläf s-əmmək wa s-ibda, ixdäl ännäbi Mosa däx-ehän-net.

³ Məšan, semxar wa dər-äniihäjja Ƴisa, ojərnät tisenen-net wa n-Mosa s-a äjjeen ed ere wa idäyän ehän, ojərnät tisenen-net ehän wa idäy.

⁴ A-wen älməxna-net a-s, ehän, a ämoos-däx, ägg-adəm n-älbänna xas a t-idäyän mäšan, Mässinäx ənta, wär t-illa a t-illan s-wädden ənta a t-idäyän.

⁵ Ännäbi Mosa, akli n-Mässinäx, ənta a äsnäfrän i-ad-izar i-tamətte däx-älxidmət wa ija däx-ehän n-Mässinäx; a innä Mässinäx-däx, ənta a iwar ad-t-in-isəssiwäd tamətte.

⁶ Məšan Älməsex ənta, äzzär-t Mässinäx däx-ehän-net, ij'-e jənnəj-härät iket-net ed ənta a-s Rure-s. Ašäl-i-däx, näkkəneđ a-s ehän n-Mässinäx-wen-däx a nəkkäs wär nəja äššək däx-immun-nänäx, əsihələyläy-anäx ättäma wa hanäx-əsjar.

⁷ Isəlan n-a-wen-däx a däx-imməjrad Unfas Šəddijän a-s innä:

«Ašäl-i-däx, afäl təsläm i-məjrad dd-ifalän Mässinäx,

⁸ wär has-təsxəräm ulhawän-nəwän

šund a-wa jän imərawän-nəwän-i

hi-jänen təmmaz n-tihäyyen däx-tanəzruft.

⁹ Äzzəman-en orəmən-ahi imərawän-nəwän,

kud-däx wär t-illa iji n-Mässinäx

s-wädden jəx-t data-sän har əkkəzät timərwən n-awätay.

¹⁰ Ijjaš-ahi fälla-sän ađkär, ənnəx-asän:

<Əfraxän ulhawän-nəwän hahi,

tabarät ta s-əxeläx, ad-tät-tərməsäm, tunjäyäm sər-s.>

¹¹ A-wen-däx a fäl, a-wa däx hi-ija ađkär-näsän,

həđäx-asän kud ilkam

ad-əjjašän äkall wa däx-hasän-kittəwäx i-təsonfat.»

Əjləyät däx-immun-nəwän

¹² Ayətma-x, äjät ənniyät i-iman-nəwän; wär-itətəjrawet wäl' iyyän däx-wän s-ləbas wəla-i s-əqqur ulh-net, igdal-as a-wen-däx əsjəd i-təna n-Mässinäx-i iddärən.

¹³ Mässinäḡ a innä: «Ašäl-i-däḡ», a-wen-däḡ a fäl hak iyyän däḡ-wän, äqqaymet hak ašäl isamatär amidi-net i-ad-wär-äsḡär wäl' iyyän däḡ-wän ulh-net, itidəw däḡ-abäkkad.

¹⁴ Äduuttät ämära a-s nämeedäw d-Älmasex a nökkäs nøjlay däḡ-alkum-has s-ömmök wa s-sär-s nomän ašäl äzzarän.

¹⁵ Inn'-anäḡ ölkəttab n-Mässinäḡ:
«*«Ašäl-i-däḡ»,
afäl təsläm i-mäjrad dd-ifalän Mässinäḡ,
wär has-täsḡäräm ulhawän-näwän
šund a-wa jän imärawän-näwän ibda
a-s has-änmäšräyän.»*

¹⁶ Ämära, ma ämoosän äddinät-win-däḡ əslänen i-mäjrad n-Emäli mäšan änmäšräyän-as? Wär t-illa a ämoosän ar tamətte-tədi-däḡ dd-izzəzjār ännäbi Mosa äkall wa n-Mişra.

¹⁷ Mi fäll t-ijjäs adkär har ijä ökkozät timərwen n-awätay? Äddinät wi di-däḡ ofänen abäkkad s-ašäl-i-däḡ, äba-tän, ənsänät tifəkwen-näsän däḡ-tanəzruft.

¹⁸ Mi s-ihä Mässinäḡ ti-net a-s ihäd innä: «Wär-ilkem ad-əjjašän äkall wa däḡ-hasän-kittəwäḡ i-täsonfat?» Äddinät-wi-däḡ fälla-s äffulägnen, a-s ihä ti-näsän.

¹⁹ A-wa isalmad-anäḡ a-s äddinät-en, təḡart n-ulhawän-näsän a hasän-igdalän ad-əjjəšän äkall wa n-täsonfat.

4

Täsonfat ta ihakk Mässinäḡ

¹ Mässinäḡ iman-net a hanäḡ-ijjäsän ärkäwäl n-a-s ilkam ad-ḡur-s nøjrəw täsonfat, adiš näjet ənniyät i-iman-nänäḡ; wär käwän-itäjjäšet wäl' iyyän inkazän i-iman-net ujəš n-äkall-wen-däḡ n-täsonfat.

² Älənžil-wa-däḡ s-nəsla a-s əslän imärawän-nänäḡ mäšan, wär tän-infa s-härät, äsjädän-asän mäšan wär sär-s omenän i-ad-tän-infəw s-härät.

³ Nəzlay dār-sän näkkäneḡ-i omänneren s-ḡisa ed nøjjäs täsonfat ta hanäḡ-ikittəw Mässinäḡ a-s innä i-imärawän-nänäḡ ibda: «Ijjäs-ahi fälla-sän adkär, häḡäḡ-asän a-s wär-ilkem ad-əjjašän äkall wa däḡ-hasän-kittəwäḡ i-täsonfat.» Wen-mäjrad, a-s t-ija Mässinäḡ, ixlak-dd a-wa t-illän iket-net.

⁴ Ill'-e edägg däḡ-ölkəttab n-Mässinäḡ innän fäll-ašäl-wen-däḡ n-əssa:
«Ašäl wa s-əssa,
ässunfa Mässinäḡ däḡ-a-wa t-išlän iket-net.»

⁵ Ätwännä daḡ a-s:

«Äkall wa s-hasän-əjjäšäḡ ärkäwäl-net,
wär däḡ-sän ilkem ad-t-əjjašän i-täsonfat.»

⁶ Äddinät wi äzzarnen s-mäsällät n-Älənžil, wär əjješän täsonfat-net ed unjäyän s-asjed-has. Mäšan, wär hin-ikkəs a-wen a-s əllan-t iyyäd he-ijjəšnen täsonfat-ten-däḡ.

⁷ A-wen-däḡ a fäl issəbdäd Mässinäḡ ašäl iyyän daḡ s-ijä isəm: «Ašäl-i-däḡ.» Okäy äzzäman-wen-däḡ s-a äjjeen, oläs daḡ mäjrad-wen-däḡ atwənn s-əmm n-ännäbi Dawəd, ätwänn'-anäḡ, innä Mässinäḡ:
«Afäl təsläm i-mäjrad dd-ifalän Mässinäḡ ašäl-i-däḡ,
wär has-täsḡäräm ulhawän-näwän.»

⁸ Äkall wa s-ijjäs Mässinäḡ ärkäwäl-net i-käl-ibda, ənnar ijraw Yešwa i-taməttenet ujəš-net i-ad-däḡ-s sunf, wär-itəmḡutor Mässinäḡ s-ad-äj isälan n-ašäl n-täsonfat ilkamän.

⁹ Täsonfat šund-ten-däḡ a təlcamät däḡ-tamətte ta n-Mässinäḡ.

¹⁰ Äwadəm wa ijjäšan täsonfat ta dd-ijä Mässinäx, ad-ijrəw täsonfat dāx-a-wa t-išlän iket-net šund əmmək wa s-ässunfa Mässinäx dāx-a-wa t-išlän ənta iman-net.

¹¹ A-wen-dāx a fäl, rurədät-anāx ujəš n-täsonfat-ten-dāx, wär hanāx-itäjjäšet äwadəm wäl' iyyän hin-ođan fäl-a-s innin unjäy s-asjed i-a-wa innä Mässinäx šund a-wa jän imärawän-nänāx ibda.

¹² Mäjräd n-Mässinäx, ihakk tämudre, ila tärna, ojar tākoba n-əssin imawän əmsädnen amsud, ibiddəw iman d-unfas, itakk jer-izəmmuz d-axäräbba; wär t-illa derhan wäla anəzjum ihan ägg-adəm s-wädden ihannäy-t, issan sār-s.

¹³ Wär t-illa fäw a ihan äddunya idrajän i-Mässinäx. Wär t-illa a dd-ixlakän s-wädden izzaf data-s, ənta-en-dāx dağ a-s ilkam a data-s dd-nəbdəd iket-dāx-nänāx, iffukkär-dd a-wa nämešäl iket-net.

Yisa a-s U-tikutawen wa mäqqärän

¹⁴ Šamad, wär t-ih' äššäk a-s nəla U-tikutawen ijan təmxäre-ten-dāx, iräs išənnawän, ikkä wa dāx-sän-in-illan, ämoos-anāx änaabdid xur-Mässinäx, a-wen a t-ämoosän Yisa-i n-Rure-s n-Mässinäx, adiš, näknet uđəf n-tijəttewen n-immun-nänāx.

¹⁵ U-tikutawen wa mäqqärän nəla, wädden-i s-wär ha tähanint ulh-net wäla-i wärän äddobät ad-hanāx-idhəl dāx-iba n-äššahät-nänāx. Äžžurräb-t Iblis s-əmmək wa s-hanāx-itižärrub dāx-härät iket-net mäšan, wär t-illa abäkkad əmešäl.

¹⁶ Wär hanāx-isärməxet härät, nahəzet-in tasəqqaymut n-Mässinäx ta n-ännuymät s-ənniyät ozjan i-ad-hanāx-ađən tähanint, äkf'-anāx ännuymät, ilal-anāx älwäqq wa d-nämxyatär s-tidət-dāx s-a-wen.

5

¹ U-tikutawen wa mäqqärän, jer-tamətə ta n-käl-Işrayil a dāx-dd-itanäfran, isäxdəm-t Mässinäx, umas änaabdid n-dägg-adəm jere-sän d-Mässinäx. A-wa ihakk ägg-adəm i-Mässinäx, hagd tikutawen ti itäj i-Mässinäx, u-tikutawen a iwar ad-iket a-wen i-Mässinäx i-tenäšše n-ibäkkadän.

² U-tikutawen wa mäqqärän, äddobät ad-ađən tähanint i-wi əzhälne i-a-wa innä alämär d-wi has-tinməšriynen ed ənta iman-net ägg-adəm šund əntəneđ.

³ A-wen-dāx a fäl t-iwar ənta iman-net ad-ikkəs takute fäll-iman-net i-ibäkkadän s-tizarät s-əmmək wa s-itəkkat fäll-äddinät wi iyyäđnen i-ad-əjrəwän tenäšše.

⁴ Wär t-illa äwadəm äddooben ad-dd-iggəd xas, äj iman-net u-tikutawen wa mäqqärän, ed Mässinäx a dd-iğarrän äwadəm s-a-wen, s-əmmək wa s-dd-iğra ibda Harun s-iman-net.

⁵ Älmasex dağ, wär dd-igged xas, ijä iman-net ämänokal n-käl-tikutawen, Mässinäx a t-ikfän turhajät-ten-dāx ed iğr'-e-hi-dd, inn'-as:

«Käyy a-s Rure-x,

xur ašäl-i-dāx,

näkk a-s Abba-näk.»

⁶ Oläs dağ innä Mässinäx dāx-edägg iyyän dāx-əlkəttab:

«Tumast-näk n-u-tikutawen wa mäqqärän,

täxlal ed təlcam i-ta n-Mälkässäddiq.»

⁷ Äzzäman wa ikkäs Yisa fäll-ärori n-äkall-i-dāx, ikkas äššäk n-a-s Mässinäx ila tärna s-t-iyłäs-dd dāx-tamättant; a-wen-dāx a fäl ijjəynän Mässinäx, ittär dāx-s älhimmät s-äššahät, iyłäs-t Mässinäx, iqbal tittar-net ed äsräs iman-net data-s.

⁸ Yisa, tidət, Rure-s n-Mässinäx a ämoos mäšan a-wen wär fälla-s in-iwwex ahänay n-ağana.

⁹ Šamad əmešäl a-wa fälla-s irha Mässinäx iket-net ad-ijrəw turhajät n-ad-umas i-äddinät wi has-sajadnen Ämaxlas wa tän-ihakkän əlxəllas iyłalän.

¹⁰ Mässinäḡ a t-ijän U-tikutawen wa mäqqārän ilkamän i-tumast ta n-Mälkässäddiq.

Ehel n-s-data dāy-immun

¹¹ Ayətma! Ill'-e a äjjeen s-nārha ad-hawän-tän-nänn dāy-isālan-wi-dāy māšan wär hanāḡ-lämmid asəssəjrah-nāwän ed wär-irmeḡ ujreh-nāwän.

¹² Kāwāneḡ-i s-ašäl-i-dāḡ, ānihājja s-arū d-tāmoosām imusānän sayranen, nəhannāy a-s härwa-dāḡ tāmiḡatārām s-ere kāwän-issāḡrān tijəttewen ti äzzarnen n-mājrād n-Mässinäḡ. Tolāhām härwa d-aratän tattāḡnen, wär täddobem tetäte n-imənsiwän äzzaynen.

¹³ Äwadəm ya itattādän, amärkəs a āmoos; amärkəs daḡ, təssanām a-s wär t-illa a ijrah dāḡ-tämudre bāršəḡ ad-ilməḡ a-wa oḡādän.

¹⁴ Imənsiwän wi äzzaynen, äddinät āḡradnen lanen tayətə s-əbḡän a-wa olāḡän d-a-wa läbasän a tän-tattänen.

6

¹ A-wen-dāḡ a fäl tijəttewen ti äzzarnen, räqqisnen fäll-nätt teḡäre dāy-isālan n-Älmaseḡ, nakəyet-tänät s-a-wa hanāḡ-itajjän meddön āḡradnen. Tijəttewen-en-hi, a tänät-āmoosän: tätubt dāḡ-timašalen ti wären ənfa härät, immun s-Mässinäḡ,

² itwəsəlmixän dāḡ-aman, isālan n-asəwār n-ifassän iḡāfawän n-äddinät i-ad-dāḡ-sän ijän älbāraka, tanākra jer-inəmmuttan d-isālan n-ašäl wa n-tebādde.

³ Ämära, nəhəlet data-nāḡ; a-wen-dāḡ daḡ a he-nāj kunta irdä Mässinäḡ.

Udayät i-anməšri

⁴ Ämära, äddinät wi s-ora ännur n-mājrād n-Mässinäḡ tiṭṭawen-näsän, äkräbben tiḡudawen ti ihäkk Mässinäḡ, osāḡän d-Unfas Šäddijän,

⁵ äžžorräben täzude ta ija mājrād n-Mässinäḡ, əlmädän s-təmyäre n-äddunya ta dd-malät,

⁶ māšan hakd a-wen-dāḡ iket-net, əqqälän ḡara-s, oḡän dāḡ-erk imojjan-näsän wi n-ibda, a-di, äbas hasän-t-təlla tämujriṭt tän-dd-siḡulät Älmaseḡ ed a-wa jän, wär-izley d-a-s atwəšləb äynayän a tajjän i-Rure-s n-Mässinäḡ, tajjän-t isəḡsa dat-äddunya iket-net.

⁷ Äkall, wädden, e-d t-iwät ajəna har dāḡ-s äddomät äwadəm härät, ad-dd-isədwəl teyəšše tənfat äddinät wi t-əjyäknen māšan, Mässinäḡ ad-dd-izizəbben ärräxmät-net fäll-äkall-en.

⁸ Afäl wär dd-isədwəl äkall-en ar isənnanän d-tabəḡḡənt, adiš, wär-infa härät, wär has-in-äqqima ar ad-t-ilḡən Mässinäḡ, isəntəs terk teyəšše ta dd-issədwäl.

⁹ Ayətma-i nəkna tārha, a hawän-ija mājrād wa hawän-nətājji dāḡ-täkmə-dāḡ, insa ənniyät-nänāḡ dāy-isālan-nāwän, wär nəkkes äṭṭāma, ed nəssan a-s ašrut wa olāḡän a warām, ənta-den-dāḡ daḡ ašrut wa ih' əlḡəllas.

¹⁰ Mässinäḡ, oḡad dāḡ-a-wa itājji iket-net, wär hin-ittəwa a-wa kāwän-išlän d-tārha ta jām i-iməšseddəjan; a-wen jām-t, ənta-den-dāḡ daḡ a-wa kāwän-išlän har ašäl-i-dāḡ.

¹¹ Derhan-nänāḡ hawän da: Ədgəzät dāḡ-a-wa hām härkuk i-ad-kāwän-äkf Mässinäḡ a-wa ih' äṭṭāma-nāwän imda.

¹² Äyyät fälla-wän sendad, tälälät immun d-akuyəḡ wa jän äddinät wi omännen s-Mässinäḡ s-ijjāš ärkāwäl n-ad-tän-äkf a-wa s-hasän-innä.

Ärkāwäl wa ijjāš Mässinäḡ i-imumənän a iha äṭṭāma wa n-tidət

¹³ Äzzāman wa d-ijjāš Mässinäḡ ärkāwäl i-ännäbi Ibrahim, inhäy a-s wär t-illa ere t-illan jənnəj-s s-has-ihäḡ ḡas, ihäḡ-as s-iman wi-net, inn'-as:

¹⁴ «Ibrahim, haḡāḡ-ak a-s ad-dāḡ-k äjāḡ älbāraka, tətəy əzzurəyät-nāk.»

¹⁵ A-wa innä Mässināx i-Ibrahim, äzzäydär-as, iqqäl-as, ijräw-t daḡ.

¹⁶ Dägg-adəm äzzāman-en, e-d itəhhaḍ āwadəm i-iyjän, ad-əjən tahuḍe s-ere tän-ojārän; tahuḍe daḡ ten-däḡ a he-tumasät äḍḍimmana n-ärkäwāl wa änmäjjäšan.

¹⁷ A-wen-däḡ a fäl Mässināx iman-net, irha ad-isəkən iməkkusa wi təkka tənfa n-ärkäwāl wa hasän-ijjäš, issəlmäd a-s wär-ilkem ad-irza däḡ-tənna-net, a-wa innä, ad-äj.

¹⁸ Əllan-t əssin ijitan s-wär-ilkem ad-sär-sän iqqal Mässināx wäla ad-äbbuggät a-wa innä: ärkäwāl wa ijjäš d-tahuḍe ta ässewäḍ fäll-a-wen i-ad-isədduttət ärkäwäl-en.

A-wen-däḡ a fäl näkkäneḍ-i əjräwnen tinahäḡen ḡur-Mässināx, mäjräd-wa-däḡ, äsikoyäd-anäḡ s-ässhät i-ad-nəjrəw ätṭäma wa hanäḡ-äsjar Mässināx.

¹⁹ Ätṭäma daḡ wa-hi, oläh d-asəmdi wa ässhohen n-ti n-äho, intam däḡ-ulhawän-nänäḡ, wär-ijənn bahu. A-wen-däḡ a fäl ärido wa ibḍän edägg wa šäddijän d-wa iknän təšədje däḡ-ehän n-ämudd wa mäqqārän, ämer'-anäḡ ämära i-ad-nəjjəš har ammas-net.

²⁰ Edägg-en-hi, äzzar-anäḡ sär-s Yisa, ämoos U-tikutawen wa mäqqārän iḡlälän, ilkamän i-tumast ta n-Mälkässäddiq.

7

Tumast ta n-Yisa, täñifäqqa d-ta n-Mälkässäddiq

¹ Mälkässäddiq, ənta a-s käla ämoos ämänokal n-aḡrəm wa n-Saləm, ənta a-s u-tikutawen n-Mässināx-i iknän aḍkul. Däḡ-äzzāman-net ad-ijäḍ Ibrahim imänokalän n-ikallän iyyäḍ, irz'-en-dd. Älwäqq wa dd-iqqäl Ibrahim ifal-dd akənnas, ilkäḍ-as Mälkässäddiq, ittär-as däḡ-Mässināx a däḡ-s ijän älbäräka.

² Däḡ-a-wen-däḡ ad-t-ikfa Ibrahim tämukäst n-a-wa ila däḡ-ehäre. Mälkässäddiq, älmäḡna n-isəm-net: «Ämänokal n-iqqud»; aḡrəm daḡ wa n-Saləm-i fäll-äminakal, älmäḡna-net: «Ämänokal n-älxer.»

³ Mälkässäddiq, wär hanäḡ-jen əlkəttabän isälan n-abba-net wäla anna-net wäla ätṭarex-net; wär-ätwässän əmmək wa s-iwa wäla əmmək wa s-ijmäḍ äddunya, ätiwässän ḡas a-s oläh d-Rure-s n-Mässināx ed tumast-net i-u-tikutawen, täḡlal.

⁴ Ähaləs-i-däḡ, tidət-däḡ a-s i mäqqārän. Təmyäre-net a dd-toräwät a-s wäla Ibrahim-i n-amḡar n-amäzzaḡ, ikkäs-as tämukäst n-a-wa dd-ohäḡ däḡ-akənnas iket-net.

⁵ Dägg-Lewi-i n-käl-tikutawen, innä alämär wa n-ännäbi Mosa, əntäneḍ a he-ramməsnen timukäsen n-tamətte ta n-käl-Işrayil-i n-temiḍt-näsän kud-däḡ iket-däḡ-näsän ijəllan n-Ibrahim a dd-əzjarän.

⁶ Mälkässäddiq ənta, kud-däḡ, wär-ih' ätṭarex wa dd-itran tumast n-u-tikutawen, irmäs däḡ-Ibrahim-i s-ijjäš Mässināx ärkäwāl, tämukäst, oläs daḡ ḍarät-a-wen, ittär däḡ-Mässināx a ijän älbäräka däḡ-Ibrahim.

⁷ Wär t-ih' äššäk a-wen a-s āwadəm wa ojārän, a itajjän älbäräka däḡ-wa ojär.

⁸ Dägg-Lewi i-n-käl-tikutawen, tidət, əntäneḍ a rammäsnen timukäsen mäšan dägg-adəm ḡas a ämoosän fäll-la tamättant tärna, a-s ija a-wen, Mälkässäddiq-i irmäsän tämukäst fäll-Ibrahim, ənnän-anäḡ əlkəttabän a-s iddar härkuk.

⁹ Näddoobät fäw ämära-däḡ ad-nänn a-s dägg-Lewi-i rammäsnen tämukäst, əntäneḍ iman-näsän, əkkasän-tät i-Mälkässäddiq ed ikkäs-as-tät Ibrahim-i tän-dd-äshäyāwän.

¹⁰ A-wen, ma t-ijän? Ij'-e a-wa s-a-s itäj a-wen-däḡ, iha Lewi tiktukar n-ti-s Ibrahim äzzāman wa d-ämnoqqäs d-Mälkässäddiq.

Yisa, ojär Lewi wa n-U-tikutawen

11 Alämär wa ikfä Mässinäx tamøtte ta n-käl-Işrayil, tikutawen ti täjjän käl-Lewi-i n-käl-tikutawen, a fäl igla. Ənnär əjrawnät tikutawen-tin-däx tenäşşe n-ibäkkadän, iket-di, wär-itəmxutor Mässinäx s-asəssiwi n-u-tikutawen iyyän dər-sän izlayän ijan alädäb wa n-Mälkässäddiq, änn-ak, ad-äqqayəm-wen-däx ilkämän i-Lewi-i dd-ijmäđän alädäb wa n-Harun.

12 Ämära, şamad imməskäl älxal wa n-käl-tikutawen, adiş, ähhuuşşäl day ad-ämməskäl alämär wa tän-dd-iqqälän.

13 Emäli-i s-hawän-nəha ti-net, isälan-net hakd-däx tawset ta dd-izjär, wär tät-iha ere s-käla iqqäl u-tikutawen; wär t-illa ere ihan temiđt-net s-käla äshaha ađutän wi n-tikutawen däx-edägg wa däx-raqqänät.

14 Äduuttät a-s Emäli-nänäx, tawset ta n-Yähuda ad-dd-izjär. Äzzäman day wa d-imməjräd ännäbi Mosa däx-isälan n-käl-tikutawen, wär dd-iđkel isälan n-tawset ta n-Yähuda.

Yisa, u-tikutawen wa mäqqärän ixlälän

15 Tumast n-Yisa i-u-tikutawen, tämoos a iglan fäll-tumast ta n-Mälkässäddiq; ässiitbät a-wen a-s ənta d-Lewi, wär-olehän.

16 Tumast-net i-u-tikutawen, wädden erhet n-ägg-adəm a tät-dd-oräwän; ijräw-tät s-äşşahät n-tämudre-net ta täxlälät.

17 Äjjøyha Mässinäx däx-isälan-net däx-əlkəttab a-s innä:
«Ad-käy-äjäx u-tikutawen ixlälän
iglan fäll-tumast ta n-Mälkässäddiq.»

18 Alämär wa dd-äzzarän, izjär-in ed wär-ila tärna s-iyläs äddinät däx-ibäkkadän-näsän, wär t-illa älfäyda t-ihan.

19 Alämär wa n-ännäbi Mosa, indär-as ad-sär-näx dd-isəmdəw təşədje, a-wen-däx a fäl ämära, nəkräş ättäma ufän wa hanäx-äsjär alämär. Ənta-den-däx a-wa hanäx-ikfän turhajät d-ad-nənmihäz d-Mässinäx.

20 Dərät-a-wen day, Mässinäx iman-net a ihädän n-a-s ad-umas Yisa u-tikutawen wa mäqqärän. Tahuđe şund ten-däx, wär t-illa u-tikutawen s-käla has-tät-ija.

21 A-wen-däx a fäl aşäl wa d-ämoos Yisa u-tikutawen, ihäd-as Mässinäx, inn'-as:
«Näkk Emäli a ihädän, a-wa ənney day wär-ilkem ad-sär-s äqqaläx: ad-tumasäd u-tikutawen ixlälän.»

22 Ämära, Yisa a-s tasətbət n-tassayt ta nəja d-Mässinäx, ənta a hanäx iđmänän ärkäwäl n-tassayt ufän wa n-ibda.

23 Käl-tikutawen, əjjətän, nəssan a-s wär tän-iha-i ähojän däx-tumast n-u-tikutawen, ed təgdal-asän tamättant a-wen.

24 Yisa ənta, iddar härkuk. A-wen-däx a fäl tumast-net i-u-tikutawen, wär-ilkem ad-t-təjmađ täxläl.

25 A-wen-däx a fäl äddinät wi jänen Yisa əssəbab n-tassayt-näsän d-Mässinäx, ilə tärna s-tän-dd-iyläs däx-e d-tilläm abäkkad ed härkuk iddar, itəddal-asän day Mässinäx.

26 Ijmađ-t äşşäk a-s ämänokal n-käl-tikutawen şund-wen-däx a-s nämiyatär itəmmälän jere-näx d-Mässinäx. Yisa, äddoobät a-wen ed şäddiij, wär t-illa išşaki t-iwarän, wär-il' älyib, ibđ'-e Mässinäx d-inäsbäkkadän, iđkäl-t s-diha dd-əmdän išənnawän.

27 Wär-ämyatär day şund a-wa jän käl-tikutawen wi iyyäđnen-i s-ämoos färəđ ad-təkkatän fäll-ibäkkadän-näsän hak aşäl təzzar, əkətän fäll-wi n-tamøtte. Yisa ənta, ikf'-iman-net s-iiyyät, takute ta ija təgdäh härkuk, äbas təlcam day tiyyät säl ten-däx.

²⁸ Äddinät wi ija Ättäwrät wa n-ännäbi Mosa käl-tikutawen wi mäqqornen, hantän äddinät rëkkəmnen māšan, mäjräd wa ija Mässinäx a-s ihäd darät a-s dd-äzzäbbät alämär, mäjräd-wen-däx a-s əssəbab wa dd-orāwän a-s ämoos Rure-s n-Mässinäx u-tikutawen wa mäqqārän iylalän s-wär t-illa älyib t-iwarän.

8

Isälan n-ÿisa, U-tikutawen wa mäqqārän d-ärkawäl n-tassaxt wa äynayän

¹ Ämära, edägg-wa-däx, äknät-t ujreh, ila tənfa: «U-tikutawen wa mäqqārän nəla, wär t-illa a dār-änifäqqa; äqqiima däx-išənnawän daw-axil n-Mässinäx i-ilän tärna.»

² Ämašal wa t-iwarän, itajj'-e däx-edägg wa šaddijän ihän ehän n-ämudd wa mäqqārän n-tidət, wen ənta, Emäli a t-idäyän, wädden dägg-adəm.

³ Käl-tikutawen wi mäqqornen, äsmänakäl-tän Mässinäx i-ad-hakkän, təkkatän fäll-iman wi-näsän; a-wen-däx daχ a fäl u-tikutawen wa mäqqārän nəla, ähhuuššäl-as ənta-däx ad-ikət härät i-Mässinäx.

⁴ Ənnär iwar ÿisa ärori n-äkall, iket-di, wär-itumas u-tikutawen ed fäll-ärori n-äkall-i, əllan-t äddinät wi tajjänen a-wen s-əmmək wa s-t-ifräç alämär

⁵ māšan äddinät-en, a-wa tän-išlän, taliwen n-a-wa dār-olähän išənnawän a ämoos fäl-a-s ännäbi Mosa iman-net, a-s has-innä Mässinäx ad-idəy ehäket wa šaddijän n-tämoqqest, inn'-as:

«Əqqən ehäket olähän d-wa käy-əssəknäx fäll-taçaxt.»

⁶ Ämašal wa ufän izläyän d-wen-däx, ijräw-t ÿisa, fäl-a-s, ämoos ämära, änaiddid n-ärkawäl n-tassaxt ufän wa äzzarän.

⁷ Ənnär wär-ih' älyib ärkawäl n-tassaxt wa äzzarän, wär-itəməskil ijješ-dd iyyän äynayän edägg-net.

⁸ Äsmäqqa Mässinäx fäll-tamətte-net, inn'-as:

«Əlkamän išilan däx-e-äjäx d-ehän wa n-käl-Işrayil d-ehän wa n-käl-Yähuda ärkawäl n-tassaxt äynayän.

⁹ Ärkawäl izlayän d-wa jeχ d-täy-sän

ašäl wa tän-dd-ärmäsäx s-äfuss,

əzzəzjäraχ-tän-dd Mişra.

Jeχ dār-sän ärkawäl-wen-däx māšan, ärfädän-t;

jän a-wen χas, əšläyäχ-asän.

¹⁰ Afäl okäyän äzzäman,

ad-ahäräχ ärkawäl d-ehän wa n-Işrayil;

ärkawäl-en, ənta da a-wa fäll-ibdäd:

ad-äjäχ tijəttewen n-alämärän-in däx tiyətwen-näsän,

əktəbäχ-tänät fäll-ulhawän-näsän,

umasäχ Mässinäx-i n-Mässi-sän, umasän tamətte-nin.»

¹¹ Ad-äbas-tän-iha wäl' iyyän ämiyatärän s-ad-isäyär ägg-äkall-net, wäla i-he-innən i-ənna-s: «Uksaq Emäli» fäl-a-s ad-hi-əzzəyän iket-däx-näsän, χur-wa əndärrän har tawədäd wa wäššärän;

¹² ad-hasän-in-änšäχ älyibän-näsän iket-däx-näsän, itawäχ-in daχ ibäkkadan-näsän iket-däx-näsän.

¹³ A-wen-däx ija Mässinäx a ässiilmädän a-s ärkawäl n-tassaxt wa äynayän ufa wa ärəwän ed wäššar. Härät-i-däx daχ, e-d wäššar, išwar t-in-äba.

9

Tassaxt ta täynayät t-təllät jer-imumənän d-Mässinäx

¹ Ärkäwäl wa äzzarän, ila alämärän-net tiḡednen tamøtte dāḡ-isälan n-älḡibadät d-edägg wa s-irha Mässināḡ ad-t-tāḡbød tamøtte dāḡ-s.

² Edägg n-älḡibadät äzzāman-en, a has-itawānnen: ehäket wa n-tāmuqqest. Ehäket-en, ija sānatät tiḡunawen: tāzune ta s-itizar āwadəm, isəm-net: edägg wa šäddijän. Ğnsanät dāḡ-s tisəskar n-imämmälän əzwaynen d-tasəskärt tiyyät fäll-ənsanät tijəlwen n-tikutawen i-Mässināḡ.

³ Illa-hin i-edägg-en, ill'-e ärido wa s-əssin ḡarät t-illa edägg wa s-itawānna: Wa iknän təšødje.

⁴ Insa äkoss n-orāḡ wa dāḡ-rāqq matälxer ta n-älḡibadät. Dāḡ-ammās n-edägg wa iknän təšødje, tənsa takbat ta n-ärkäwälän n-tassaḡt s-ilsa orāḡ ifäyyän-net. Takbat-en n-ärkäwäl, ənta a iha äkoss n-orāḡ wa iha mana,† talimmizt n-Mässināḡ ta dd-äzzäbbät fäll-käl-Işrayil äzzāman wa d-əzzāḡän tanəzruft. Tənsa dāḡ-s tāborit ta dd-tənşärät s-käla tät-itḡäf Harun d-isəllumän n-tihun wi fäll-iktab a-wa innä Mässināḡ.

⁵ Jənnəj-takbat-en, äşşiiwārän əssin änjələsän n-älxurmät janen tele s-afrewän-näsän i-ashär n-takbat ta n-ärkäwäl. A-wen a isalmadän tamøtte s-älxurmät n-Mässināḡ d-emel-net. Ashär n-takbat n-ärkäwäl en-dāḡ a fäll inaqḡäl ašni n-tikutawen i-tenäşşe n-ibäkkadän-näsän. Mäšan, wär hawän-e-əjjəşāḡ asiḡən n-härätän wi hānen edägg-en ämära.

⁶ Ğmmək-wen-dāḡ a-s ənsan härätän dāḡ-ehäket wa n-tāmuqqest. Edägg wa äzzarän, tajjäšan-t käl-tikutawen hak ašäl i-ad-əjən älxidmät-näsän

⁷ mäšan edägg wa iknän təšødje, u-tikutawen wa mäqqārän ḡas a ilan s-ujəš-net iyyän n-ašäl dāḡ-awätay, wär has-t-illa dāḡ ujəš n-edägg-en ar s-ad-ässiḡäl ašni dāḡ-təssəba n-ibäkkadän wi-net hakd-dāḡ dāḡ-təssəba n-inməşriyän wi s-wär totes tamøtte amişəl-näsän.

⁸ Ğnta den-dāḡ dāḡ əmmək wa s-hanāḡ-isalmad Unfas Šäddijän a-s dāḡ-äzzāman-en a ikkäs ehäket n-tāmuqqest-wen-dāḡ ill'-e, wär tämera tabarät s-edägg wa iknän təšødje.

⁹ Ämoos a-wen tele dd-tässiktät äzzāman-wa-dāḡ nəha, isalmad-anāḡ a-wen a-s äddinät wi sənḡalnen ašni wäla wi tajjänen tikutawen ti iyyädnen, wär hasän-ijrew a-wen iba n-işşaki n-iman-näsän wäla təšødje n-ulhawän.

¹⁰ Älḡibadät-näsän, insa fäll-älḡadatän n-dägg-adəm har ašäl wa d-isimtəttəy Mässināḡ härät iket-net. Älḡadatän-en, ənsan fäll-älwällatän d-isälan n-a-wa s-ila āwadəm s-ad-t-äks d-a-wa s-ila s-ad-t-isəw.

Aşəşdaj wa itäjj ašni n-Ÿisa i-ägg-adəm

¹¹ Iḡla a-wen-dāḡ s-əmmək-en-dāḡ har dd-osa äzzāman wa d-äsmättäy Mässināḡ talḡa, işräy-dd a äynayän. Osä-dd Älmasex, ənta a-s ämänokal n-käl-tikutawen wa hanāḡ-ijräwän a-wa s-hanāḡ-ijjäš Mässināḡ ärkäwäl-net, ənta a ijjäšan ehän n-ämudd wa ojarän ufän wa äzzarän ikräs ägg-adəm; wen-hi, wär t-la dāḡ äddunya-ta-dāḡ dd-tätwäxläkät.

¹² Ehän-en-hi, iyyän n-ujəš a has-ija Älmasex, wär t-ijješ s-ašni n-işulay wäla iwdesän, ašni-net ənta iman-net a inḡälän i-ad-hanāḡ-işəşdəj, nəjrəw tenäşşe n-ibäkkadän təmdat.

¹³ Äddinät wi änmäşräynen, təšødje ta fälla-sän ifräḡ alämär, ašni n-işulay d-iwdesän d-iməkkärora n-iwan a fälla-sän inaqḡälän i-ad-işdajän dāḡ-ibäkkadän-näsän,

† 9:4 9:4 A-wa isəm n-amənsi wa dd-äzzäbbät Mässināḡ fäll-käl-Işrayil äzzāman wa d-hän tanəzruft. Itawänn'-as dāḡ-Tälyunanit: Mana; itawänn'-as dāḡ-Tämaşḡt: Taləmmizt n-Mässināḡ.

14 äb' ätṭäma n-ämära-i s-ašni n-Älmasex-i ojarän a-wen a hanäx-iššəšdäjän däx-ibäkkadän-nänäx. Tärna n-Unfas Šäddijän-i ixlälän a t-ikfän tädabit ta s-ikf' iman-net, ämoos takute wär iwer älyib. Ašni-net ənta-en-däx a äddooben ad-hanäx-ikkəs däx-iššaki n-iman-nänäx d-erk imojjan wi wär hanäx-iha a säl tamättant, nudabät älxidmät i-Mässinäx-i iddarän.

15 A-wen-däx a fäl ärkäwäl n-tassaṭt wa äynayän, Yisa a ämmun i-ad-umas änabdid-nänäx dat-Mässinäx i-ad-iṅləs dägg-adəm däx-ibäkkadän wi ämešälän däx-ärkäwäl wa äzzarän, əmmək-wen-däx a-s ikfa Mässinäx äddinät wi dd-iyrä d-wi s-ijjäs ärkäwäl turhajät n-ad-əjrəwän ḡur-Mässinäx täkasit täḡlalät.

16 Ämära, isälan n-täkasit a nəha. Täkasit ya, nəssan a-s wär t-illa əmmək s-täzun ar s-ad-iba äwadəm wa itətwəkusun təzzar dihen, ad-e-tuzan s-a-wa innä.

17 Älmäḡna n-a-wen a-s a ikk' äwadəm iddar, wär dd-iḡəkkəl iyyän isälan n-əlkənnaš wa n-täkasit, har t-iba təzzar.

18 A-wen-däx a fäl ärkäwäl n-tassaṭt wa äzzarän, wär t-illa a infa däx-äzzamän-net ar s-ašni wa sänḡalän äddinät.

19 Äzzäman wa n-ännäbi Mosa, iffəssär i-tamətəte tijəttewen n-alämär n-Mässinäx təzzar iḡkäl ašni n-iwdesän d-išulaḡ d-älxärer wa šäggäḡän, issärtäy a-wen-däx iket-net d-aman, təzzar änfäsnäfäs sār-s s-tisiḡsedən əlkəttab wa n-alämär hakd tamətəte iket-net.

20 Innä i-tamətəte ḡarät-a-wen: «Ənta da ašni n-ärkäwäl n-tassaṭt ta dār-wän ija Mässinäx i-ad-tumasäm tamətəte-nin.»

21 Änfäsnäfäs daḡ Mosa ḡarät-a-wen ehäket wa n-tämuqqest d-ikassän wi n-älyibadät iket-näsän s-ašni.

22 Ašni, izzəwät a t-illan wär-išəšdəj, a ikka daḡ ašni wär-inḡel, wär t-təlla tenäšše n-ibäkkadän.

Takute ta ija Yisa, wär t-illa a dār-tänifäqqa

23 Härätän-wi-däx dd-nokäy iket-däx-näsän, taliwen a ämoosän äniḡäqqänen d-härätän wi hänen išənnawän, a-wa ihän ehän wa n-tämuqqest, ašni a t-išašdäjän, əmmək-wen-däx daḡ a-s härätän wi hänen išənnawän, äniḡatärän əntäneḡ-däx s-ad-tän-šəšdəj takute tojarät ta jät fäll-ärori n-äkall.

24 Älmasex, wädden ehän n-ämudd dayän ifassän n-dägg-adəm äniḡäqqän d-wa ihän išənnawän a ijjäs, änn-ak, ehän n-ämudd wa n-tidət ihän išənnawän a ijjäs i-ad-umas änabdid-nänäx dat-Mässinäx.

25 ḡur-käl-Älyähud, U-tikutawen wa mäqqärän, wär has-t-illa ar iyyän n-ujəš däx-awätay i-edägg wa iknän təšədje-i s-a-s t-itajjäs daḡ, äwway ašni mäšan, Älmasex, wär-äniḡatär s-ad-itajjäs dihen hak awätay; iyyän n-ujəš a has-ija, iknä-dd əššäḡəl.

26 Ənnar wär ija a-wen, adiš, ad-dd-tənta äddunya har ašäl-i-däx, wär has-təgdeh tiyyät tamättant; adiš, ähhuuššäl-as ad-wär t-itəffil aḡäna mäšan Älmasex, däx-ajilal n-äddunya-i-däx, iyyän n-ass ḡas a dd-ijä, ikfä iman-net, ämoos takute ta jarräwät tenäšše n-ibäkkadän.

27 Dägg-adəm, tiyyät tamättant a hasän-täqqalät, ḡara-s tebädde dat-Mässinäx.

28 Däx-isälan n-a-wen-däx a fäl, Älmasex, ikf' iman-net s-iyjät i-ad-dd-ikkəs dägg-adəm äjjootnen däx-ibäkkadän, wär däx-s təlkem tiyyät säl-ten-däx. Ilkam däx-s ad-dd-äj ass wa s-əssin mäšan äsihe-wa, wädden däx-isälan n-tenäšše n-ibäkkadän, äddinät wi has-äqqälnen a-s dd-e-ass i-ad-tän-iḡləs.

10

Ašni n-Yisa, ojar wa n-irəzzejän

¹ Ämära, härätän-wi hanäx-issəkna Mässinäx dāx-alämär-net, taliwen änifäqqänen d-tidət a ämoosän. Wär hanäx-sənnəfliyän dāx-ujreh n-a-wa dār-olähän. A-wen-dāx a fäl äddinät wi järnen ätṭäma-näsän dāx-a-wa innä alämär, indār-as ad-tän-äj äddinät äyradnen ed hak awätay-dāx, sanalasän tikutawen-tin-dāx.

² Tikutawen-tin-dāx əslänen äddinät, ənnar jarräwnät tenäšše n-ibäkkadän i-äddinät s-iyyät, iket-di, iba-tänät-in; ad-äbas tänät-sanalasän; ad-äbas əššakän äddinät iman-näsän abäkkad.

³ Mäšan tikutawen-en-hi, hak awätay-dāx, siktunät-dd tamətte ibäkkadän-net

⁴ fäl-a-s, wär t-illa əmmək fäw s-hin-omäs ašni, jer-wa n-iwdesän wäla wa n-išulaḡ, ibäkkadän n-äddinät.

⁵ A-wen-dāx a fäl Älmasex, a-s dd-ijjäš äddunya, innä i-Mässinäx:
«Wär hak-təjrəz takute ta jät s-ašni wäla ta wärät ja sār-s, mäšan təkfed-ahi taḡəssa s-äddoobəx ad-tät-äktäx.

⁶ Wär hak-əjreznät tikutawen ti räqqänen har tänät-akš efew, wäla ti jarräwnen tenäšše n-abäkkad.»

⁷ Ənhäyāx a-wen ḡas ənnəx:
«Mässinäx, näkk da!
Oseḡ-dd i-ad-äjāx erhet-näk.»

⁸ Innä ḡisa ḡarät-a-wen:
«Wär hak-təjrəz takute ta jät s-ašni wäla ta wärät ja sār-s, wär hak-əjreznät tikutawen ti räqqänen har tänät-akš efew, wäla ti jarräwnen tenäšše n-abäkkad.»
Ənta-den-dāx a-wa innä ḡisa kud-dāx ill'-e a-wa ifrəd Mässinäx dāx-isālan n-tikutawen.

⁹ Oläs daḡ ḡisa innä:
«Mässinäx, näkk da!
Oseḡ-dd i-ad-äjāx erhet-näk.»

Ikkäs-in ḡisa s-a-wen-dāx əlḡibadät wa äzzarän, iššəšräy t-dd i äynayän.

¹⁰ Dāx-erhet n-Mässinäx a dāx-hanäx-iššəšdāj Älmasex s-iyyät, iššəšdāj-anāx s-iman-net wi ija takute.

¹¹ Käl-tikutawen iket-näsän, iqḡal-asän äššil hak ašäl ad-əbdadän ḡarräsän i-tikutawen ti s-kāla tänät-jän oläsän wären šəšdij dāx-ibäkkadän.

¹² Mäšan ḡisa ənta, ikfa taḡəssa-net s-iyyät, ämoos takute ta takkäsät ibäkkadän, äqqima ḡarät-a-wen härkuk daw-aḡil n-Mässinäx,

¹³ iqḡal dihen i-ad-ətwəjjən išənja-net iket-näsän daw-iḡarän-net.

¹⁴ Ikfa tiyyät takute, təgdäh harkuk i-äddinät wi iššəšdaj.

¹⁵ A-wen-dāx a hanäx-äsdättät Unfas Šäddijän fäl-a-s innä Emäli s-tizarät:

¹⁶ «Ənta da arkäwäl-in n-tassaḡt wa dār-sän mad-ahäräḡ ḡarät išilan-win-dāx:
<Afäl tän-əkfeḡ fārəḡän-in, ad-tän-əktəbāḡ fäll-ulhawän-näsän d-ənniyätän-näsän.> »

¹⁷ Inna daḡ ḡarät-a-wen:
«Ad-äbas dd-ḡakkälāḡ isālan n-ibäkkadän-näsän, itawāḡ-in s-iyyät tinməšriyen-näsän.»

¹⁸ Tenäšše ya, e-d ja, ad-äbas təlcam takute n-ašni tiyyät dāx-təssəba n-abäkkad.

Isəmmäqq d-isəmməterän

¹⁹ Ayətma-ḡ, ämoos-anäḡ ašni n-Ḳisa takute tətbatät s-ənta a hanäḡ-torät emm n-ehän wa n-Mässinäḡ wa iknän təšədje,

²⁰ or'-anäḡ tabarät täynayät ha tämudre t-təllat ɗarät ärido, a-wen a t-ämoosän taḡəssa-net.

²¹ Ämära, nəla U-tikutawen ifranän ixkämän fäll-ehän n-Mässinäḡ.

²² Ḳas nahəzet-t-dd s-ulhawän ädduuttänen d-immun imdan, dəḡ-a-s ärridän ulhawän-näwän dəḡ-inəzjam wi läbasnen, ärridnät tiḡəswen-näwän dəḡ-aman šaddijnen, wär t-illa fäw a dəḡ-nəššak iman-nänäḡ.

²³ Wär nətäqqälet s-ɗarät, wär nəsisumet dəḡ-isälan n-äṭṭäma-nänäḡ ed ere wa hanäḡ-ijjäšan ärkäwäl-wen-däḡ, emärkäwäl, wär-iräzz dəḡ-tənna-net.

²⁴ Nənməjjet ənniyät jer-iman-nänäḡ, nənməsəmmətäret tärha jer-iman-nänäḡ d-imärkedän.

²⁵ Wär nəzäjjäret älzämaḡät wa nəha s-älyibadät n-Mässinäḡ šund a-wa täjjän iyyäɗ, änn-ak, nəmsəkkuyədet jer-iman-nänäḡ, hullan ämära-däḡ d-nəhannäy a-s dd-ohäz ašäl wa n-uḡəl n-Emäli.

²⁶ Afäl nofa abäkkad dəḡ-erhet n-iman-nänäḡ ɗarät a-s nəlmad tidət iket-net, äbas t-təlla takute täddoobet ad-hin-taməs abäkkad-nänäḡ,

²⁷ ad-äbas-hanäḡ-in-äqqim ḡas ar asəmmoqqəl i-äššäreḡa wa dd-imalän d-efew wa ähjäljälän he-iksən inämäšrayän.

²⁸ Təssanäm a-s e-d änmäšräy äwadəm i-Äṭṭawrät ta n-Mosa, wär has-t-təlla təhanint, igdäh ḡas ad-dd əzjärnät sänatät tjuhawen meḡ käraɗät i-ad-ämmät älwaqq-wen-däḡ.

²⁹ Emmək-wen-däḡ daḡ a-s, äwadəm wa äfkälfäkälän Rure-s n-Mässinäḡ, äsmäɗräy-t meḡ äsbännän ašni-net wa hanäḡ-iššəšdäjän, sār-näḡ dd-oräwän ärkäwäl n-tassaḡt d-Mässinäḡ, meḡ daḡ, wär-issəfrär Unfas wa n-ännuḡmät, ajän wädden äwadəm-wen-däḡ, änihäjja d-tisnant tojärät, ta ɗär-änihäjja wa änmäšräyän i-a-wa innä alämär wa n-ännäbi Mosa.

³⁰ Näkkäneɗ, nəzzay wa innän:

«Eḡa, i-nin, ukəs n-älxär, ḡur-i.»

Inna daḡ:

«Emäli a-s ilkam ad-išräḡ tamətte-net.»

³¹ Asuksäɗ ija ejäɗäl dəḡ-ifassän n-Mässinäḡ-i iddärän.

Akuyəɗ dəḡ-immun

³² Ektəwät-dd a-s ibda, käla təzzäḡäm tihay, təbbəlänäm dəḡ-a-wa ämoosän immun-näwän, tənähäyäm aḡana,

³³ əkwärän-käwän äddinät, äqquzäben-käwän, jän-käwän isəɗsa dat-tamətte; äddinät wi tənähäyäm hannäyän aḡana-wen-däḡ, täwwäḡäm-asän timudda.

³⁴ Wi hänen tikärmuten dəḡ-təssəba n-Ḳisa, täḡ'iwän təhanint-näsän, ohäḡän dəḡ-wän isənja a-wa tətṭäfäm, mäšan, wär-ifneḡ a-wen tisrawt-näwän s-Mässinäḡ ed təkkasäm äššək a-s a-wa ihän ifassän-näwän, ufa a-wen-däḡ iket-net ed iḡlal.

³⁵ A-wa fäl täsifälläm, äknät-t uɗəf ed əjjətän imraš-net.

³⁶ Härwa-däḡ, əšmārät dəḡ-amisəl n-erhet n-Mässinäḡ, afäl jäm a-wen, ad-sār-wän dd-isäḡsəl Mässinäḡ ärkäwäl wa hawän-ijjäš.

³⁷ Innä əlkəttab n-Mässinäḡ a-s:

«A əndärrän, a əndärrän ḡas a hin-äqqimän ass-dd wa s-ätwännä ilkam ad-dd-ass, os'-iwän fäw!

³⁸ Äddinät wi oḡäɗnen dəḡ-zäbo-nin, ad-hasän-ijrəw immun-näsän tämudre ta n-tidət mäšan wi əšläynen i-zäbo-en, wär-ilkem ad-hi-ijraz älxal-näsän.»

³⁹ Näkkäned, wär nəha äddinät wi šalläyner, hakkänen iman-näsän i-əlhəllak, änn-ak, nəha wi taṭṭafnen immun i-ad-tän-iḡləs Mässinäḡ.

11

Isälan n-immun d-imumənan wi n-ibda

¹ Immun, älmäḡna-net a-s a-wa dāḡ-ijär äwadəm äṭṭäma, ad-has-umas šund a-s insa data-s; meḡ daḡ, a-wa-dāḡ wär-ihənnəy s-tiṭṭawen-net, ad-has-umas šund äsiḡäläläk dāḡ-s.

² Immun-wen-dāḡ a ikfän imḡarän-nänäḡ idəm ḡur-Mässinäḡ.

³ Immun a hanäḡ-issəfläsän a-s äddunya-ta-dāḡ, mäjräd n-Mässinäḡ a has-dd-issəbäbän. A-wen-dāḡ a fäl a-wa nəhannäy dāḡ-äddunya, wär dd-izjer a ilan mänhoy.

⁴ Immun a ijrāwän i-Xäbälla ad-äj i-Mässinäḡ takute tufät ta n-änḡa-s, Kayin. Təssəba n-immun-net-en-dāḡ a fäl t-ässidän Mässinäḡ dāḡ-äddinät wi oḡädnen, iqbäl takute-net. Tidət, Xäbälla, äru t-äba mäšan, har ašäl-i-dāḡ, ixatṭäb-anäḡ s-immun-net.

⁵ Immun a-s əssəbab wa fäl imməḡkäl Inuk s-išənnawän har əjud-i iddar. Wär t-oles äwadəm ahänay ed, iḡkäl-t Mässinäḡ. Dat-aməḡkəl-net, Mässinäḡ iman-net a innän, ijrāz-as Inuk.

⁶ Immun, wär t-illa iba-net ed ere t-wärän ila, wär t-ill' əmmək fäw s-ijrāz i-Mässinäḡ. A-wen-dāḡ a fäl ere wa irhän anmihaz d-Mässinäḡ, ämoos-as immun färəd, ifləs a-s Mässinäḡ ill'-e, ənta daḡ a ḡur-t-əllan imraš i-wi has-tammäḡnen.

⁷ Immun a ikfän Nox taflest s-Mässinäḡ a-s has-ijä isälan n-a-wa dd-imalän wär ihənnəy. Tuksəḡa-net i-Mässinäḡ a sār-s dd-orāwän ad-ikən turäft n-aman ta mäqqārät dāḡ-e-iḡləs ənta d-əjadāš-net. Immun-net ad-dd-äsfäkkärän terk timaşalen n-tamətə, äḡḡin dāḡ-äddinät wi oḡädnen, ämoos ya älgəlli n-äddunya, ässoḡ'-et dāḡ-äššareḡa wa n-Mässinäḡ.

⁸ Immun a dd-orāwän akiwən wa ija Ibrahim i-Mässinäḡ a-s t-iḡrā, ibdäd, ikk' äkall wa s-has-innä ad-t-ikus iket-di d-ilämmäd ma tämoos tamdujt ta ih' äkall-wen-dāḡ.

⁹ Immun a t-äzozäḡän dāḡ-ihəktan šund amäjar dāḡ-äkall wa s-has-ijjäš Mässinäḡ ärkäwäl-net. Taməzzuyt-ten-dāḡ ijä, a ijä Isxaqq d-Yaqub-i dār-s ohärnen täkasit n-ärkäwäl wa has-ijjäš Mässinäḡ.

¹⁰ A-wen, ma t-ijän? Ij'-e a-wa s-ij' Ibrahim ənniyät-net dāḡ-aḡrəm wa n-tidət s-intäm ässas-net, s-Mässinäḡ iman-net a t-dd-iknän dāḡ-anəzjum-net, ibn'-e-dd ənta iman-net.

¹¹ Immun daḡ a ijrāwän i-Saräta kud-dāḡ wäššar, tämoos teməjjejrut ad-təkrəš ənniyät, təkrəš ihäyawän ed tomän a-s Mässinäḡ-i has-ijjäšän ärkäwäl, wär-irāzz dāḡ-tənna-net.

¹² Immun a ijrāwän i-Ibrahim šämad wäššar, wär has-in-äqqima ar tamättant, ad-ikrəš ihäyawän janen əjut wa jän etran d-tiblalen n-äkall dāḡ-asälim n-əjärew wa səmmän, wär t-illa ere äddooben asidən-näsän.

¹³ Äddinät-wi-dāḡ, äba-tän əṭṭafän immun iket-dāḡ-näsän härwa wär-əjrewän ärkäwäl wa hasän-ijjäš Mässinäḡ mäšan, wär sār-sän izley d-a-s t-ənhayän, əlläfän-as dāḡ-ijəj, əddəwen, əlmädän a-s əntänəḡ imäjarän n-iməssukal a ämoosän fäll-ärori n-äkall-i-dāḡ.

¹⁴ Əntänəḡ-i äddoobätnen tənna n-a-wen-dāḡ, salmadän-anäḡ a-s äkall äynayän a-s əmmaḡän ed,

¹⁵ ənnar jan tärha n-härät dāḡ-äkall wa dd-fälän, iket-di, əqqəlän-t ḡas

¹⁶ mäšan, wär jen a-wen ed äkall ufän wa dd-fälän a-s əmmaḡän; a-wen a t-ämoosän, äkall ihan išənnawän. Ənniyät-wen-dāḡ əṭṭafän a fäl hasän-irḡa Mässinäḡ, wär t-äskärakəḡ a-wa s-t-jän-t Mässi-sän ed, əntänəḡ a-s idäy aḡrəm wa hasän-itwär.

17 Immun a ijräwän i-Ibrahim ašäl wa t-oyäs Mässinäx i-ad-has-ikət Isxaqq, rure-s wa n-yyän t-ikfä. Mässinäx a t-omärän s-ad-äj a-wen, a-s ija a-wen, dat-a-wen, ijjäš-as ärkäwäl, inn'-as:

18 «Isxaqq a he-isətəyən əzzurəyät ta he-iwär isəm-näk s-hak-əjjäšəy ärkäwäl-net.»

19 Ijä Ibrahim a-wa has-innä Mässinäx ed ikkas äššäk a-s kud-däx äba Isxaqq, ila Mässinäx tärna s-t-dd-issenkär jer-inəmmuttan. Ənta-den-däx a-wa ämoosän əssəbab wa fäl t-dd-äsoxäl Mässinäx rure-s iket-di d-t-itəkkat Ibrahim ed inhäy Mässinäx a-s wär unjäy s-a-wa s-has-innä. Ämoos a-wen, tangalt n-a ilkamän.

20 Immun a ijräwän i-Isxaqq ad-ittär däx-Mässinäx a ijän älbäräka däx-məddana-s, Yaqub d-Iso, däx-iwətyan wi əlkämnen.

21 Immun a ijräwän i-Yaqub ässağät wa d-ijamməd äddunya ad-dd-isəhhətəl s-täborit-net, irkəx, təzzar ittär däx-Mässinäx a ijän älbäräka däx-hak iyyän däx-məddana-s n-Yusəf-i n-rure-s.

22 Immun a ijräwän i-Yusəf a-s dd-tohäz tamättant-net ad-älläxät i-käl-Işrayil s-ilkam ad-əzjären äkall wa n-Mişra, omär-tän s-ad-hin-əmmärän iğäsən n-tafəkka-net s-äkall wa əkkän afäl t-äba.

23 Immun a ijräwän i-imärəwän n-Mosa ad-t-əffärän har kərəd orän dərät tiwit-net ed ənhäyän tihusay ti ija rure-sän, wär tän-issärməx əlhäm n-Firğäwna-i dd-izzəzjären alämär däx-isälan n-tamättant n-aratän wi n-eyyan n-käl-Işrayil.

24 Immun a ijräwän i-Mosa šamad ämoos əhaləs ad-unjäy s-ad-itawəğrə s-isəm: rure-s n-elle-s n-Firğäwna,

25 ässof ad-ahär ağäna d-tamətte n-Mässinäx, uhən tämudre jer-inämäşrayän däx-tänoflayt wärät la uşreyän.

26 Inhäy a-s ufa ağäna wa ohar əwadəm d-Älmasex uhən ärrəxmät n-Mişra fäl-a-s, ənniyät-net, ij'-e däx-imraš wi dd-malənen wädden däx-a-wa t-illän data-s.

27 Immun-net a has-ijrəwän ad-wär has-təgdəl tuksəda n-ämənokal efel n-Mişra, ikna tebädde fäll-iman-net däx-a-wa iha, ikyad ɣas däx-Mässinäx-i wärän itətəwənhəy.

28 Immun a has-ijrəwän ad-ikət Faşka ta dd-saktet azəjor n-käl-Işrayil i-əkkəlu, omär-tän s-ad-səwərən ašni n-işxal imawän n-ihənan-näsən i-ad-wär-iğəşšəd ənjälös wa itəfän tamättant härät i-tiğəffaddiwen-näsən.

29 Immun a ijräwän i-käl-Işrayil ad-ərəsän ejərew wa səmmän šəggəğän, əjläyän-t šund äkall äqqurän a fäll-ärjaşän; a-s əttärän käl-Mişra ad-əjləyän ejərew dərät-a-wen, ämləmmälät-dd fälla-sän, əksän-tän aman.

30 Immun a ijräwän i-käl-Işrayil asiðew n-əğalla wa ifräjän aɣrəm wa n-Žərriko šamad jan əssa išilan tiğləyğələyän-t.

31 Immun a ijräwän i-Rahab ta n-tälkəxəbat ad-wär toher tamättant d-inämäşrayän wi n-äkall-net, ənta a täsməjaret inaramän wi dd-əzzarnen i-ad-zəjjəzzən aɣrəm wa təzzəğ.

32 Ma säl a-wen? Iket iyyän däx s-äddoobəx ad-hawän-dd-ədkələx isälan-net, məşən hannäyəx a-s osäs-ahi-dd əlwəqq. Ənnär wädden a-wen, siwələx-awän däx Žədyon d-Bäräyka d-Samsun d-Yäfti d-Dawəd d-Sumäyla d-ännəbitän wi iyyädnen.

33 Immun-näsən a tän-ikfän ašäl fäll-əddəwəlän əmdanen, ärzän-tän; əkfän iman-näsən iqqud, ənhäyän tişətat n-ärkäwälän wi hasən-ijjäš Mässinäx, ätwəjären-in iyyəd däx-sän i-ehran məşən, əğlāsän-dd däx-sän;

34 ännunnäzen iyyəd däx-sän däx-efew məşən, wär tän-issärɣa; iyyəd, əğlāsän-dd däx-imawän n-tikobawen; ijməd äşşahät iyyəd däx-sän məşən, iqqäl-tän-dd. Iyyəd əbbärədän däx-amjər har data-sän oşälän aɣhanän wi dd-jädnen äkall-näsən.

³⁵ Tideden tiyyäd, issenkär-asnät-dd Mässinäḡ äddinät-näsnät äba, äsḡarrawen iyyäd däḡ-sän mäšan, wär-ötterän ad-äḡləsän iman-näsän däḡ-a-wen, ässofän tamättant i-ad-dd-alösän tanäkra ḡur-Mässinäḡ.

³⁶ Jän äddinät iyyäd däḡ-sän tekäškäšt, äslälän iyyäd däḡ-sän tiwit s-ebärtäk, jän tišəm däḡ-iyyäd, jārän-in iyyäd däḡ-takärmüt.

³⁷ Iyyäd, äḡḡän-tän s-sämmäjori n-tihun, iyyäd käškäši a-s tän-öbläjän, jän iman n-iyyäd s-täkoba; tämudre-näsän iket-net, jän-tät däḡ-amtənjär, wär-ölsen a säl ilämawän n-tihatten d-ulli; ənhäyän iyyäd əlläqqu läbasän, äqquzzäben-tän äddinät, äsmädräyän-tän.

³⁸ Han a-wen-däḡ iket-net, a-s ija a-wen, wär tänhäjja äddunya-ta-däḡ fäw d-ad-tənhöy äddinät janen miḡaw-wa-däḡ; iyyäd däḡ-sän, äwwäyän tinariwen, əzzäḡän iḡayän d-isəlwan d-unan.

³⁹ Äddinät-wi-däḡ, ijräw-asän immun-näsän idəm dat-Mässinäḡ kud-däḡ, ärkäwäl wa hasän-ijjäš, wär sār-sän dd-ixsel.

⁴⁰ A-wen, ma t-ijän? Adiš fäl-a-s innin itwar'-anäḡ Mässinäḡ iket-nänäḡ a ufän a-wen, irha ad-där-sän nəmzəyyət ujəš n-ärkäwäl-wen-däḡ hasän-ijjäš.

12

Yisa Älmasex a-s älmital i-imumənän

¹ Ämära, näkkäneḡ-i-hi, šamad äzzar-anäḡ älzämaḡät n-imumənän ijan əjut-wen-däḡ, adiš, nəbḡəwet d-e d t-illäm a äddoben ad-hanäḡ-umas äzuk däḡ-akuyəd däḡ-immun, närsiyet-in fälla-näḡ e d t-illäm abäkkad hanäḡ-iltayän, nərurədet ämašal wa hanäḡ-issäyläf Mässinäḡ, nəsmäret däḡ-a-wa nəhannäy.

² Näjet asäwaḡ-nänäḡ iket-net däḡ-Yisa-i s-ənta a-s ekew n-immun-nänäḡ, ənta a has-itḡafän tämudre har ašäl wa dd-e-iqqəl. Yisa, oyy'-in tedäwit ta ila, ätwäšläb fäll-tajəttewt, iqbäl ad-äj tamättant täsikärakädät. A-wen-däḡ a fäl ašäl-i-däḡ, äqqiima daw-aḡil n-Mässinäḡ.

³ Zənəzjumətät ḡas däḡ-Yisa, təktum-dd əmmək wa s-t-ənkärän inäsbäkkadän d-aḡäna wa inhäy mäšan, išmär i-a-wen-däḡ iket-net, dihen wär fälla-wän-e-tämmät taḡəssa-näwän, wär-e ismaḡ ašni-näwän.

Ere käy-irhan a käy-isasayadän

⁴ Akənnas wa häm d-abäkkad, wär sār-wän dd-iwwey härwa tamättant,

⁵ təttəwäm-in a-s Emäli, asəmmətär wa itäj abba i-ara-net a hawän-ija, ənta a innän:

«Alyaḡ-in, wär käy-isäḡafet asənnəmənhöy

wa käy-itäj Emäli d-iman-näk,

wär käy-izäzzäkänzaret asənnəmhəl wa hak-itäj,

⁶ ed Emäli, isasayad ere irha,

ara wa dd-ija s-iman-net a isinmənhöy d-iman-net.»

⁷ Əsmärät däḡ-tisnant ta s-Mässinäḡ a tät-dd-oräwän sār-wän ed ənta asənnəmənhöy käwän-ija d-iman-näwän däḡ, itḡaf-käwän šund amäräw d-aratän-net, i n-ad-tayədäm. Ḋarät-a-wen daḡ, əndek ḡas ara wa wär-inäqq ti-s?

⁸ Afäl wär käwän-isənnəmənhöy Mässinäḡ d-iman-näwän s-əmmək wa s-isinmənhöy aratän-net iket-näsän d-iman-näsän, adiš wädden aratän-net a tämoosäm, ikzewän a tämoosäm.

⁹ Əktəwät-dd abbatän-nänäḡ-i hanäḡ-tadäbbarnen, wädden naqqän-anäḡ mäšan ajän a-wen a hin-ikkasän semḡar wa hasän-nəja? Änihäjja a-s ojar semḡar wa nəja Abba-nänäḡ-i ihän išənnawän wa tän-nəja ed ənta tämudre ta täḡlälät a hanäḡ-ihakk.

10 Abbatän-nänäx, tadjän däx-näx tiwit wären tēhijj s-əmmək wa s-ärhän a-wen māšan, Mässinäx ənta, asənnəmənəhəy hanäx-ija d-iman-nänäx däx, i n-tənfa-nänäx i-ad-nišdaj s-əmmək wa s-šəddij ənta iman-net.

11 Ädduuttät a-s tiwit, a ämoosnät-däx, wär-ämoosnät əssəbab n-tedäwit i-ere wa itämätten, änn-ak tekenzart a sār-näx dd-tirəwnät māšan afäl ijräh äwadəm äddälil wa fäll-itamättat, ušreyän-net, älxer d-tämudre toxadät.

12 A-wen-däx a fäl, äjät äššahät däx-ifassän-näwän, təkkesäm tisas däx-ifaddän-näwän, tēhələm s-data,

13 ärjəšät däx-zäbo wa oxadän i-ad-əššuhun idarän n-wi jänen ađar däx-immun-näsän.

Wär täsboṭṭäläm ännuymät n-Mässinäx

14 Ämlet-t älxer jere-wän d-äddinät, tišdajäm ed ere wärän šəddij, wär-ilkem ad-inhay Emäli.

15 Nəməssənät härät jer-iman-näwän i-ad-wär dd-inəttəš wäl' iyyän däx-wän iman-net däx-ännuymät n-Mässinäx, wär toyem təsəmmə naššär-dd däx-ulhawän-näwän, tumas-awän əssəbab n-ikənnasän d-tagərsät jer-äddinät,

16 wär käwän-itäjjäšet enämmäđäs wälä äkafär šund a-wa ija Iso-i äsmälkäwän tumast-net n-amäqqar tellext,

17 təssanäm a-s đarät-a-wen, ihall, itattär däx-ti-s ad-has-ittär, äj däx-s älbäraka i-ad-t-ikus māšan, unjäy-as s-a-wen, ämmujräz a-wa ija kud-däx wär t-illa a sār-s dd-ässiysäl a-wen.

Ärkäwäl n-tassayt wa ärəwän d-wa äynayän

18 Käl-Işrayil äzzäman-wen-däx d-əzzäxän tanəzruft, ärheey ad-käwän-səssəjrähäx a-s tassayt ta jäm d-Emäli YisaÄlmasex, wär toleh d-ta s-kälä tät-jän əntäned däx-tanəzruft. Däx-äzzäman-näsän, əzzağän edes i-tađayt s-ere irhän eđes-net däx-ad-tät-idəs, tađayt-en, iraqq däx-s efew, äğlaynät-tät tijäräken käwalnen d-tihay d-ađu äššoohen. A-wen iket-net, wär fälla-wän ija käwäned,

19 wär təslem i-täsinsäyt ta n-eməsli äššoohen d-eməsli wa ässuksädän s-əslän hasän-ijän asärmağ wa däx fäl härän timəzzujen-näsän i-ad-äbas has-sallän.

20 Issärmäx-tän hullan a-wa s-ätwänna: «Ere idäsän tađayt-däx, jer-ämudär wäl' ägg-adəm, ämmätet s-sämmäjori n-tihun.»

21 A-wa ənhäyän, ij'-asän asärmağ-wa-däx fäl ännäbi Mosa-i hasän-äzzarän, ija tarəmmeyt ta-däx fäl dd-iha ças äşikäđkəđ.

22 Käwäned, wär fälla-wän ija a-wa tän-irmäsän ed tađayt ta n-Sayon s-dd-mäläm edes-has, ayərəm wa n-Mässinäx, a-wen a t-ämoosän, Yärussälam ta n-išənnawän däx-əzzäxän afdän fäll-afdän n-änjəlosän əzhanen,

23 təjjäšäm älžämağät n-tiğaffaddiwen s-əktabän ismawän-näsnät däx-išənnawän; ašäl-i, tohäzäm-dd Mässinäx i-išarräğän äddinät iket-däx-näsän, tärtäyäm däx-iiyän n-edägg d-iman n-imumənän wi hin-äwwäđnen dihad izzağ Mässinäx. Əntäned-en-hi, ašäl-i-däx, wär t-illa älçib tän-iwarän.

24 Tärtäyäm d-Yisa-i ämoosän änadid n-ärkäwäl n-tassayt wa äynayän, imäl jere-näx d-Mässinäx, infäs-käwän s-ašni-net wa iknän mijraw n-wa n-Xäbälla.

25 Äjät ənniyät, wär täzmäzzajäm iman-näwän i-ere wa hawän-ämmijradän. Käl-Işrayil wi unjäyən s-asjəd-has, äsođä-dd fälla-sän älmäššibät, ças, šamad ənta-den-däx a-wa tän-ijräwän, əndek əmmək wa s-e-näğləs näkkäned afäl nunjäy s-asjəd i-Mässinäx-i hanäx-ämmijradän däx-išənnawän.

26 Äzzäman-en, ij' eməsli n-Mässinäx əşşuhu wa däx fäl äššäkəđkəđ äkall, māšan äməra, ijjäš Mässinäx ärkäwäl däx-innä: «Äsihe wa dd-imalän, wädden äkall ças a he-iškəđkəđän, išənnawän iman-näsän ad-əškəđkəđän.»

²⁷ Ma ämoos älmäḡna n-«äsihe wa dd-imalän»? A-wen a hanäḡ-ikkasän däḡ-taḡdärt n-a-s äddunya-ta-däḡ d-a-wa tät-ihän iket-net, ilkam ad-iškəḡkəḡ, iba-t i-ad-wär dd-itäḡiməy ar a-wa iknän antum, wärän itənhəynəhəy.

²⁸ Šämad Təmmənəya ta däḡ-näḡ təlkaḡät, ja antum ogdahän d-a-wen-däḡ, adiš numayet i-Mässinäḡ, naməlet-t s-a-wa has-ijräžän däḡ-semḡar d-tuksəḡa-net.

²⁹ He käwänəḡ! Mässinäḡ-i hanäḡ-ilän, oläh d-efew itattän.

13

Isəmməterän i-imumənän

¹ Nəmārḡät jer-iman-näwän šund äḡḡatän.

² Ijḡəšet-käwän amäjaru, wär hin-təšleläḡm fäl a-wen; wi ijḡäš amäjaru, däḡ-äzzäḡman hin-okayän, äsmäjaren äḡḡalosän däḡ-a wär-əssenän.

³ ḡaymät kittəwäm äddinät wi hānen tikarmuten šund ḡas a-s toharäm dār-sän takārmüt-ten-däḡ. ḡaymät daḡ kittəwäm wi irammäs äḡḡizabät šund a-s tiḡəswen-näwän a irmas äḡḡizabät-wen-däḡ.

⁴ Səḡḡärät adubən, tənhirəḡəm däḡ-təšəḡje. Wär itikāret ähaləs i-hāne-s, wär tikāret daḡ tamāḡt i-ähaləs-net ed asəmmäḡəš n-iman-näsän a-wen. Hewät! Mässinäḡ, ässiilkäm däḡ-iməzzəna d-iməkkərukaḡ.

⁵ Wär täḡḡäḡet tārha n-ažrəf d-ənniyätän-näwän, wär täžozäm a-wa läḡm ed Mässinäḡ, innä:

«Wär käy-e-əžḡələḡ,
wär käy-e-äyyäḡ d-iman-näk.»

⁶ A-wen-däḡ a fäl wär nəkkəs äḡḡāma, näkoyäd, näddobät fäw ad-nänn däḡ-härät iket-net:

«Emäli a-s ämadhal-in, ma äksuḡäḡ?
Ma s-äddobät ad-hi-t-iḡšəḡ äḡḡ-adəm?»

Asḡəd i-imizärän

⁷ Ektəwät-dd imizärän-näwän wi n-ibda käwän-in-ässawäḡḡnen mäjräd n-Mässinäḡ, əḡḡəfät a-wa dd-oyyän, tättäläläm immun-näsän.

⁸ ḡisaÄlmaseḡ, a-wa ämoos əḡḡəšel, ämoos-t ašäl-i-däḡ, ämoos-t daḡ härkuk.

⁹ Säjdät, wär toyyem äddinät šiškin-käwän s-älmät teḡäre täynayät wärät toher härät d-mäjräd n-Mässinäḡ. Səšḡuhətät ulhawän-näwän däḡ-ännuḡmät n-Mässinäḡ. A-wen, uf'-awän asəšḡuhu n-iman-näwän däḡ-uḡəf n-iba n-tetäte n-imənsiwän s-äddinät wi əḡḡäfnen iba n-tetäte-näsän, wär t-illa ad-dd-äššišräy a-wen sār-sän.

¹⁰ ḡur-näḡ näkkänəḡ-i n-käl-Älyähud, käl-tikutawen wi ḡarräsnen i-tikutawen däḡ-ehäket n-tämoḡḡest, wär hasän-t-təlla tetäte n-a-wa s-äḡräsän.

¹¹ Taḡsiwen ti s-itiwəy U-tikutawen wa mäḡḡärän ašni-näsnät s-edäḡḡ wa iknän təšəḡje i-ad-ətwənšən ibäkkäḡän n-tamətte, asäḡḡ a titwəjḡin isan-näsnät däḡ-edäḡḡ hin-äššinkäšän fäll-amäzzaḡ.

¹² A-wen-däḡ a fäl ḡisa, inḡäl ašni-net illa-hin i-aḡrəm sihen i-ad-išəšəḡəḡ tamətte däḡ-ibäkkäḡän.

¹³ Ämära, näkkänəḡ-däḡ, nəlkəmet-as s-edäḡḡ-en-däḡ, nahəret dār-s əmmäḡḡri wa inhäy.

¹⁴ Äddunya-ta-däḡ, wär däḡ-s nəla aḡrəm iḡlalän, änn-ak, aḡrəm wa ilkämän, ufän a ḡarät nošal.

¹⁵ Näkfet s-isəm wa n-ḡisa i-Mässinäḡ hak ašäl təmmalen äḡḡbadnen isəm-net. Takute-nänäḡ has-den-däḡ.

¹⁶ Wär hin-təttəwäm tanməḡḡhalt d-anməkkas n-tämäḡatert jer-iman-näwän ed əntänätəḡ-den-däḡ tikutawen ti əjräžnen i-Mässinäḡ.

Älxeŕ wa ihän amişel n-a-wa innä Mässiñäx

¹⁷ Säjdät i-a-wa hawän-jannen imizärän-näwän, xaymät-hasän bälluhäm ed entäneḍ a dāx-ässiḍmän Mässiñäx iman-näwän, ilkam dāx ad-tän-isəstən d-isālan n-iman-näwän. Afäl hasän-sajadäm, ad-hawän-əjən ənniyät s-iman əsriwnen, wär-e zəkkənzärän. Afäl wär jem a-wen, käwäneḍ a ikma.

¹⁸ Ettärät-anäx-in dāx-Mässiñäx. Dāx-a-wa hanäx-dd-iqqälän, wär t-illa a dāx-nəşşak iman-nänäx. Wär t-illa a näsidärhän ar tekle dāx-iqqud dāx-härät iket-net.

¹⁹ Ettärät-ah'-in hullan dāx-Mässiñäx i-ad-hin-ətwəyyäx, äqqələx-käwän-in şik.

Ajilal n-mäjräd

²⁰ Daläx Mässiñäx-i n-Mässi-s n-älxeŕ, daläx-t ənta-i dd-issənkärän jer-inəmmuttan Amäḍan-nänäx wa mäqqärän Emäli Ÿisa-i s-hanäx-ikfä əşni-net ärkäwäl n-tassaxt täynayät d-Mässiñäx.

²¹ Idhāl-käwän Mässiñäx iket-dāx-näwän i-ad-tudabem amişel n-a-wa oläxän iket-net, tamaşaläm erhet-net, təjəm härkuk a has-ijrazän dāx-isəm n-Ÿisa Älmasex-i əniihäjjän d-semxar härkuk. Amin!

²² Ayətma! Wär-ətteräx ad-hawän-şəşşəjreḡ mäjräd dāx-isəmməterän-wi-dāx hawän-in-əktäbäx i-ad-wär käwän-kəmmun iman.

²³ Elmədät a-s əñña-näx dāx-äddin Timoti, ätwäyy-dd; os'-ahi-dd xas, näddew-in sār-wän.

²⁴ Tähuuläm-anäx-in imizärän-näwän d-iməşşeddəjän iket-dāx-näsän. Ähuulän-käwän-in ayətma-wän wi n-imumənän əzzäxnen İtali.

²⁵ Issənsa Mässiñäx ännuymət-net fälla-wän iket-dāx-näwän. Amin!

Täkarde ta iktäb Yaqub

Äšqjəš

¹ A-wa näkk Yaqub wa n-akli n-Mässinäx d-Emäli YisaÄlmasex hin-ähuulän märawät tiwsaten d-sänatät ti ömmähäšnen jer-ikallän.

Utär n-immun d-särho däx-Mässinäx

² Ayətma-x, ärheex däx-wän a-s talxa käwän-tärmäsät-däx, a tämoos-däx, tumaset-awän əssəbab n-tedäwit

³ ed äduuttät a-s tissust tənähayäm däx-təssəba n-immun-näwän däx, ad-sär-wän dd-arəw a-wen əššəmurät,

⁴ mäšan, wär-e äj a-wen ar s-ad-təşbaräm hullan i-ad-tumasäm meddən əmdanen s-wär t-illa a däx-šaḡšadän.

⁵ Wa däx-wän wär-iwer särho, ittäret-t däx-Mässinäx-i ihakkän äddinät iket-näsän bännan wäla imoqqan, ad-t-ijrəw;

⁶ mäšan ittäret s-immun däx-wär ij' äššäk wäl' iyyän fäl-a-s ere ijan äššäk däx-a-wa ittär däx-Mässinäx, wär-izley d-tinäzzämären n-əjärew wa səmmän äzziwät aḡu, itaggäd dār-snät siha d-siha.

⁷ Wa ijan a-wen, wär-itəjjaret ätṭäma n-ad-ijrəw härät xur-Emäli

⁸ ed äwadəm šund-wen, änimäntäš, ija əssin ulhawän, wär t-illa a däx-itbat.

Ärrəzäx wa ilän idəm dat-Mässinäx

⁹ Ere däx-wän läqqəwän-däx ijrəzet-as a-wen ed dat-Mässinäx, irzax

¹⁰ mäšan wa däx-wän irzäxän, ijrəzet-as əlläqqu-net dat-Mässinäx ed ənta hakd ehäre-net togdäh taḡrəst-näsän d-ta n-täboyt-i

¹¹ s-e-d tädwäyläl täfukt, täkkus, ad-särx teyəšše, tətərkət-in täboyt-net, iba-hin asmäxmäx n-tihusay-net. Aləsu šund-wen-däx a hin-mad-äj ere əsifällän fäll-ehäre-net ənta hakd a-wa itamašal.

Isəswidän n-äddunya i-ägg-adəm

¹² Təndəḡd i-äwadəm wa išmārän däx-talxa fälla-s dd-təzzubbet-däx ed afäl tät-dd-izjār, ad-t-äkf Emäli, korona, a-wen, takənbut n-təmmənukəla ta s-ijjäs ärkäwäl-net i-wi t-ärhanen, a-wen, a t-ämoosän tämudre ta täylälät.

¹³ I däx-wän ätwarämän, wär-ijännet Mässinäx a hi-orämän fäl-a-s Mässinäx wär-itətwirəm s-a läbasän, wär sār-s itirəm daḡ äwadəm wäl' iyyän,

¹⁴ änn-ak, hak äwadəm-däx erk derhan-net a has-itumasän särmas wa t-inattäšan, isidəw-t däx-erk əmmək,

¹⁵ ḡarät-a-wen, e-d ässakäy erk derhan däx-äwadəm, ad-sär-s dd-arəw abäkkəḡ; abäkkəḡ daḡ ənta, e-d dd-imda s-äwadəm, ad-sär-s dd-arəw tamättant dat-Mässinäx.

¹⁶ Ayətma-x wi əkney tärha, wär säswadät iman-näwän.

¹⁷ Wär t-əllen isuf olaḡnen wäla-i əfrannen s-wädden isənnawän a dd-falän xur-Mässinäx-i n-Abba dd-ixläkän e d-t-illäm ännur, ənta-i wärän itəməskil, wär-oleh d-tele-i timtəttiyät.

¹⁸ Ənta a hanäx-dd-ixläkän däx-erhet-net s-tärna n-mäjräd-net-i äduutten i-ad-numas tiḡäffaddiwen n-a-wa dd-ixläk.

Asjəd i-Mäjräd n-Mässinäx d-amışəl n-a-wa oläxän

¹⁹ Ayətma-i əkney tärha, säjdät: əttaräx däx-hak iyyän däx-wän, ad-əsijät asjəd, wär-äroräd mäjräd, wär-issärmäḡ aḡkär

²⁰ fäl-a-s ere s-irmäd adkär-net, wär-itəmišəl iqqud wa n-erhet n-Mässinäx.

²¹ A-wen-däx a fäl əbdəwät iman-nāwän d-a-wa kəwän-isamədasän d-älxalän wi kəwän-salbasnen, täqbəläm s-ənniyät əzedän məjräd n-Mässinäx wa issəntäm dəx-ulhawän-nāwän äddooben ad-kəwän-ixləs dəx-temse.

²² Umasät äddinät tamašalnen məjräd n-Mässinäx wädden äddinät has-sajadnen, ɣas saswadäm iman-nāwän s-erk inəzjam

²³ fäl-a-s ere isajadän i-məjräd wär t-itəmišəl, oläh ɣas d-ere ikyädän iman-net dəx-tiset,

²⁴ ifäl-tät ɣas ittəw'-in əlwäqq-wen-dəx a-wa dər-oläh, äqqima wär-əsmättäy talɣa fäll-iman-net;

²⁵ məšan əwadəm wa äjjunfän dəx-alämär wa ifränän n-Mässinäx, alämär wa isadärfen, ittäf a-wa s-t-omär, tənḏəḏ-as.

²⁶ Ere ordän a-s äddiin, a-s ija a-wen, wär-innähäḏ dəx-iləs-net, iman-net ɣas a itakärras; äddin-net, wär t-illa

²⁷ fäl-a-s dat-Abba Mässinäx, äddin wa n-tidət wär-iwer əlxib, a t-əmoosän: uḏəf n-ijuhelän, tadhəlt n-tinuḏəfen dəx-timɣutar-nəsnät d-ad-wär käy-əsməḏäs a-wa fäll-təgl' äddunya.

2

Iba n-ažəmmäzli jer-äddinät

¹ Kəwäned-i n-ayətma-ɣ omännen s-Eməli-nänäx ɣisaÄlmasex-i ilän əlxurmät, wär täzmäzläyäm äddinät.

² Nəjet əlmital n-a-s kunta ijjäš-dd əhaləs ilan ehäre, əmdan issəkəḏ-net s-tiḏhoten n-orəx, äzzizməy, əlzəməxät-nəwän, a-s ija a-wen dəx, ijjäš-t-dd iyyän n-taläqqe;

³ kunta dəx-a-wen, təjrähäm-in wa iknän əzəzmi, təggädäm-dd sər-s, tənnäm-as: «Mändam, ərhuj-ak, ɣayəm diha, nufləy»; a-s ija a-wen, wa n-taläqqe ənta, tənnäm-as: «Jäy, käyy əbdəd-in sidi-dəx meɣ əyyäw ɣayəm daw-iḏarän-nänäx»,

⁴ afäl jəm a-wen, wädden ənta-den-dəx a-wa isəlmadän s-ažəmmäzli wa tinməjjim jer-iman-nəwän, tinməšreɣäm jer-iman-nəwän s-erk inəzjam.

⁵ Ayətma-i əkneɣ tərha, səjdät-ahi: äddinät wi s-ɣur-äddunya läqqəwän, əntäned a-s irzəx Mässinäx immun-nəsän, ij'-en iməkkusa n-Təmmənəya ta s-ijjäš ərkəwäl-net i-wi t-ərhanen.

⁶ ɣas mafäl lakkähäm tiläqqiwen? Ajän wädden käl-ehäre-i-dəx tässimɣaräm a kəwän-əšihənšarəḏnen, šikkun-awän s-əššərəɣa?

⁷ Ajän wädden əntäned a jänen isəm wa əhusken kawän-ikfa Mässinäx tekäškäšt.

⁸ Innä əlkəttab n-Mässinäx:

«Äj i-ənhəraj-nək tərha ta-dəx jed i-iman-nək»,

ənta-den-dəx alämär wa n-Təmmənəya n-Mässinäx, ere t-əmešälän, əmešäl tihusay.

⁹ Əlmədät a-s afäl täzmäzläyäm äddinät, ad-tifum abəkkaḏ, abəkkaḏ dəx ere t-ofän, ad-t-isəwər alämär uḏlem, iḏḏan dəx-inəməšrayän.

¹⁰ Ädduuttät a-s ere əmešälän a-wa innä alämär iket-net har ənməšräy i-tajəttewt-net tiyyät, a-di alämär iket-net a-s ənməšräy.

¹¹ Fäl-a-s Mässinäx-i innän:

«Wär jed əzzəna»,

ənta dəx a innän:

«Wär jed iman»,

ɣas kunta käyy täqqimäd wär jed əzzəna uhən-dəx, jed iman, a-di hərät iyyän, tənimešräyäd hərwa i-alämär.

¹² ɣas tajjät iməjridän d-timašalen n-äddinät əssannen s-alämär wa isadärfen a-s ilkam ad-tän-išräx;

13 äššäreḡa daḡ wen, ašäl wa d-e-äj, wär dāḡ-s-e-tətwiḡən tāhanint i-ere wa s-kāla wär tāt-oḡen i-äddinät ed ere wa s-oḡän Mässināḡ tāhanint, wär t-issärmāḡ äššäreḡa-net.

A-wa dd-itirəw immun wa n-tidət s-ägg-adəm

14 Ayətma-ḡ, ak ma s-infa ägg-adəm, ad-itabāraj s-oman s-Mässināḡ, a-s ija a-wen, wär ila imärkedän äsidättätnen a-wen? Ak ajän orda s-ad-t-iḡləs immun-wen-dāḡ?

15 Kunta lam wälätma-wän meḡ äḡḡa-wän ḡälulän, älluḡ,

16 ma s-infa a dd-iggəd ḡas iyyän dāḡ-wän, änn'-asän: «Iḡläs-kāwän Mässināḡ dāḡ-esämeḡ d-laz, təḡläm dāḡ-älxer»? A-s ija a-wen, tənsam fäll-ehäre, māšan, wär t-illa a-s tän-təḡḡäläd dāḡ-a-wa s-ämiḡatärnät tiḡəswen-näsän.

17 Emmək-wen-dāḡ daḡ a-s immun s-Mässināḡ wärän dd-itirəw s-äwadəm imärkedän, ämmut.

18 Iha miši a-s ämära, ad-hi-änn iyyän dāḡ-wän: «Käyy led immun māšan wär-äddew d-imärkedän, a-s ija a-wen, näkk, leeḡ-tän.» Wa dāḡ-wän ordän a-wen, ənneḡ-as: «Səkən-ahi a-wa ässitbätän immun wärän äddew d-imärkedän, ad-hak-sətbətāḡ näkk immun-in s-imärkedän-in.

19 Ak täsitāḡrāfäd a-s Mässināḡ iyyän? Ikna, māšan, əlməd a-s alšinän dāḡ-omanän s-a-wen, äšišäkäḡkäd-tän.

20 Eyyaa, käyy-i n-älžahil wär ih' älfäyda, äyy-ahi ad-käy-səfhəmāḡ, a-s immun warän äddew d-imärkedän, wär t-illa a infa.»

21 Ajän wädden amḡar-nänāḡ Ibrahim, ašäl wa d-iqbäl ad-ikət i-Mässināḡ rure-s Isxaqq, tämašalt-ten-dāḡ ija, a t-ikfän idəm data-s?

22 Wädden hannäyäd a-s immun äddeew härkuk d-imärkedän wi t-satbatnen!

23 Enta-den-dāḡ a-wa isatbatän a-wa innä əlkəttab a-s innä:

«Omän Ibrahim s-Mässināḡ,
a-wen-dāḡ a t-ikfan idəm ḡur-s,
iwär-t isəm: Amidi n-Mässināḡ.»

24 Wädden, hannäyäm a-s ägg-adəm, imärkedän ad-t-hakkänen idəm dat-Mässināḡ wädden immun ästikän.

25 Emmək-wen-dāḡ daḡ a-s təkrāš Rahab ta n-tälkäxbat idəm dat-Mässināḡ; təja tämašalt tähuusket ašäl wa d-təffär inaramän wi n-käl-Işrayil dd-oyäsnen äkall-net, təffär-tän, təj'-asän daḡ äddäbara tän-issəjmädän äkall härwa wär tän-irmes əlxəkum n-äkall-en.

26 Säjdät: əmmək-wa-dāḡ s-taḡəssa wär hen iman, tämmut, əmmək-wen-dāḡ daḡ a-s immun wärän ila imärkedän, ämmut.

3

Nännähədet dāḡ-ilsawän-nänāḡ

1 Ayətma, wär kāwän-täjjäšnet älḡulam äjjootnen fäl-a-s näkkäneḡ-i n-älḡulam, ilkam dāḡ-nāḡ äššäreḡa ojarän wa n-äddinät wi iyyädnen təsəmme.

2 Wär hanāḡ-iha ere s-wädden išaḡšad dāḡ-mäjräd māšan, wa äddooben dāḡ-nāḡ, ad-äqqayəm wär-išāḡšid dāḡ-mäjräd, ähaləs imdan ännihädän dāḡ-iman-net a ämoos.

3 Tənhayäm a-s afäl ija äwadəm aḡäba dāḡ-əmm n-ebäje, ad-t-oḡad, ännihäd dāḡ-taḡəssa-net iket-net,

4 zənnəzjumətät dāḡ-əd-tin-äho, a dār-togdäh tiyyät təmyäre d-a dār-ogdäh aḡu wa tāt-imahhālän, härät n-taḡäya əḡdärrät a-s tāt-oḡad wa tāt-äššesälän, itannäd-tät siha s-irha.

5 A-wen-dāḡ daḡ a dār-oläh iləs, mətki māšan, itabāraj s-a äjjeen, temäntäst əḡdärrät māšan, ənta-da-dāḡ he-səntəsät äroj imdan.

⁶ Iləs daḡ, oläh d-efew, wär t-illa eḡḡənəf n-tälläbäst t-dd-wärät töffil, iha tisläd-nänäḡ, isamälsa fäll-taḡəssa-nänäḡ iket-net, ässintäs fälla-näḡ efew wa n-žohännäma, ässintäs daḡ tämudre-nänäḡ.

⁷ Wär t-illa eḡḡənəf n-tawäqqast wäla n-igdaḡ wäla n-izlulam wäla n-imudärän wi n-aman s-wädden itinən, ässenän-t daḡ ägg-adəm

⁸ mäšan, iləs, wär t-illa ere äddoben ad-t-isinən, tagäršät a ämoos, ihäräynän-net, ässäm dd-wär-išärrøy äwadəm, härkuk ḡas ämiḡälḡäl.

⁹ Iləs a-s nətiməl Abba-nänäḡ Emäli, ənta daḡ a-s nəsawar tilḡant dägg-adəm-i dd-ixläk Mässinäḡ däḡ-milhaw-net.

¹⁰ Emm iyyän, zajjärnät-dd tittar ti oläḡnen hakd ti läbasnen. Ayətma, wär-itäjjet däḡ-wän a-wen.

¹¹ Ak käla tənähayäm terəst s-dd-zazjar titṭ-net aman äzednen d-i äkosämnen?

¹² Ayətma-ḡ, ajän ahəšk n-ašar, təggarän-t aratan n-eḡḡäytun meḡ ahəšk n-läḡnəb, təggarän-t aratan n-ašar? Terəst daḡ täkosämät, wär tät-dd-e-eḡḡärän aman äzednen.

Särho wa n-tidət

¹³ Əndek däḡ-wän wa n-emässärho, ilän tayətte? Adiš, isäknet a-wen s-älxal-net d-imärkedän däḡ-wär-itter aḡkul n-iman-net ed a-wen-däḡ a-s ašämöl wa n-särho.

¹⁴ Mäšan, kunta käwäned ässiismämnät tismiten ulhawän-näwän, täsidawäm a-wen d-asəgdah n-iman-näwän d-äddinät, wär jem a-wen abäraj, wär jem bahu tidət

¹⁵ fäl-a-s, särho-wen, wädden Mässinäḡ-i ihän išənnawän a dd-ifal, i n-äddunya-i-däḡ, i n-ere ilkamän i-derhan n-iman-net d-Iblis

¹⁶ fäl-a-s edägg meḡ ulh ässiismämnät tismiten d-asəgdah n-iman, änimahäz d-amšəndaw d-e d t-illäm erk ämašal.

¹⁷ Särho wa dd-ifälän Mässinäḡ, äzizär təšədje, iqgal ägg-älxer, olay, išmä, təh'e tähanint, äsijät imärkedän wär henät timudda wäla təlmənuḡaḡa.

¹⁸ Äddinät wi ədgaḡnen däḡ-umäḡ n-älḡafyät, saḡsalän-dd s-iman-näsän däḡ-älḡafyät, timaşalen hasän-əjrawnen idəm ḡur-Mässinäḡ.

4

Tiyyät-i-däḡ Mässinäḡ meḡ Iblis

¹ Əndek siha s-dd-han imjärän d-ikənnasän wi käwän-hänen? Ajän wädden erk derhanän wi təggasnen däḡ-ulhawän-näwän?

² Sadärhanäm a äjjeen wär jərrəwäm, wär t-jərrəwäm ed tämoosäm išənja n-imäjjan n-iman s-ihə munkäzi ulhawän-näsän, täsidawäm a-wen d-amjər d-akənnas. Wär jərrəwäm a-wa tattäräm däḡ-Mässinäḡ ed tajjäm-as erk utär

³ meḡ daḡ a-wa tattäräm wär t-jərrəwäm ed a-s t-tattäräm, tattäräm-t s-erk ənniyät däḡ-wär kəttəwäm ḡas ar tänoflayt n-iman-näwän.

⁴ Iməzzəna yaden! Ajän wär təssenäm a-s tärha n-a-wa fäll-təgl' äddunya, isakaḡ d-Mässinäḡ? Ere daḡ wa ijän äddunya tamidit, ij'-iman-net, ašanjo n-Mässinäḡ.

⁵ Ajän täḡeläm a-wa innä əlkəttab, bənnan a fäl tän-innä:

«Osamäḡ fäll-unfas wa jeḡ däḡ-ulhawän-näwän, wär-əqbeläḡ fəw oharäḡ-tän d-iyyän.»

Məjräd-wen-däḡ, Mässinäḡ a t-ijän.

⁶ Mäšan a-wen iket-net, ojar-t ännuḡmät wa hanäḡ-ihakk. Inn'-anäḡ əlkəttab:

«Mässinäḡ, ikfär i-wi äkkubrätnen, ihakk ännuḡmät i-wi data-s sarasnen iman-näsän.»

⁷ Särəsät iman-näwän dat-Mässinäḡ, əkfärät i-Iblis ad-käwän-ajəj.

⁸ Zihəzät-dd iman-näwän Mässinäḡ, ad-käwän-dd-ahəz. Ya inəsbäkkadän, šəšdəjät ifassän-näwän, šəšdəjät ulhawän-näwän käwäned-i jänen äššək däḡ-a-wa häm.

⁹ Səlläqqəwät iman-näwän, isnanät, tət̄təfäm iba, šursəm; tumaset tađäzza-näwän uđəf n-iba, təjəm tedäwit-näwän, tisanant.

¹⁰ Särəsät iman-näwän dat-Emäli i-ad-käwän-iđkəl.

Äyyät fälla-wän anmizəm jer-iman-näwän

¹¹ Ayətma-ğ, wär tänmazämäm jer-iman-näwän. Ere itizəmən äñña-s, isawar-t uđlem, alämär a itizəm, isawar-t uđlem; alämär ya, wär-täddobed ad-fälla-k ila tärha n-ämašal, sawaräd-t dağ uđlem.

¹² Mässinäğ ғas a-s älwakil d-älqallı, inaqğ, isidur. Käyy-š, ma täqqaläd, sawaräd uđlem änhäraj-näk?

Särəsät iman-näwän dat-Mässinäğ

¹³ Darät-a-wen dağ, käwäneđ-i jännanen: ašäl-i meğ ašəkka, ad-nässakäl s-ayrəm mändam, näj'-in däğ-s awätay n-mamäla däğ-närbäx.

¹⁴ Xäxx-däğ, iməskay, ajän tössanäm a-wa hawän-itwär ašəkka? Ajän käwäneđ fäw, ma täqqal tämudre-näwän? Ajän wädden, wär tämoosäm ar tahälähälayt äwway ađu s-e-d dd-təzjär, šik-däğ a-s hin-layyäm.

¹⁵ A äniihäjjän, ad-tənnəm: kunta irđa Emäli s-a-wen, kunta nəddar näğlas, ad-näj a-wa d-a-wa.

¹⁶ Mäšan ämära-däğ, wär t-illa a kawän-išlan säl ibärajän sär-wän dd-orawän erk inəzjam-näwän, əlmədät a-s abäraj šund-wen-däğ, wär-oley.

¹⁷ Əkkasäğ-käwän däğ-tayđärt a-s ere issanän a-wa ihä emärked, äqqima-däğ, wär t-ija, ofa abäkkad.

5

Käl-ehäre, wär täsfälläm fäll-ehäre-näwän

¹ Äywa, käwäneđ-i n-käl-ehäre, älhät, šursəm däğ-tössəba n-älmäššibatän wi fälla-wän dd-madän-iđəw.

² Ehäre-näwän wa irkähän, tattänät-t tiwəkkawen, isəlsa-näwän, tatt'-en temedhe;

³ təkša tenekt ta s-ilkam ad-fälla-wän täjjäyh, säğ tiğəswen-näwän šund temse, oräğ-näwän d-azrəf-näwän ed täsbäkänäm i-iman-näwän ehäre n-tikunen däğ-išilan-wi-däğ s-əntäneđ a-s wi n-ajilal n-äddunya.

⁴ Ənhəywät inaxdimän wi dd-omädnen išəkraš-näwän, əntäneđ-da-däğ s-təkšam älxəqq n-tide-näsän, äsikälälän ämära hundäğ har täwwäđ tekälelt-näsän timəzzujen n-Emäli n-ajhanän wi n-išənnawän.

⁵ Fäll-ärori n-äkall-i-däğ, täsnäfläyäm iman-näwän däğ-izəjrağ d-tizudawen ti n-ulh d-tiğtawen, təknam tewwant, tət̄təwäm-in ašäl wa ilkämän,

⁶ täswäräm imayđalän uđlem, jäm iman-näsän, wär t-illa a hawän-äğšadän.

Tazidert

⁷ Ayətma-ğ, a ikkä Emäli-däğ wär dd-iqqel, təjješet-käwän tazidert. Zəjjəzzät ғas änasdamu, äzizäyđär, iqqal i-ašäl wa d-mad-äññ ašəkrəš-net. Tazidert ta t-təhät ašäl wa d-wätän ijənnawän wi äzzarnen, ənta dağ a t-hat a-s mad-əwətən wi əšräynen.

⁸ İttəfät käwäneđ-däğ tazidert-ten-däğ, səşşuhum ulhawän-näwän, təjbəsäm ed Emäli išwar dd-iqqal.

⁹ Ärheğ däğ-wän ayətma-ğ, ad-wär ijənn wäl' iyyän-däğ a läbasän fäll-amidi-net fäl-a-s älqallı wa ojarän išwar dd-osa, os'-iwän fäw.

¹⁰ Tälälät ayətma tazidert ta käwän-sahalät s-data däğ-tisanant šund a-wa jän ännäbitän-i hawän-jänen isälan n-Emäli.

¹¹ A-wen-däx a fäl nəjanna: təndəð i-wi dəx-wän həlneŋ iman-nəsän. Wadden təslam əşşəbarət wa ija Äyyuba dəx-tisnant ta t-tärməsət, təssanəm dəx s-uşreyän wi t-ikfa Emäli ed Emäli, miŋaw-net d-təhanint-net, wär len eket.

¹² Ärheç dəx-wän ayətma-ç, dat-härät iket-net, ad-wär təhhiðäm s-işənnawän wəla äkall wəla s-härät wäl' iyyän. Umaset əyya-nəwän, əyya i-a wa ämoosän tidət, umaset dəx äbo-nəwän, äbo i-a-wa ämoosän bahu i-ad-dd-wär-isiðəw Mässinäç äşşəreça-net fälla-wän.

Tänfo ta hət tamədilt n-Mässinäç

¹³ Ak oçar iyyän dəx-wän? Adiş idəlet Mässinäç. Ak əsriiw iyyän dəx-wän? Adiş, awəyet təmmal i-Mässinäç.

¹⁴ Ak ikna iyyän dəx-wän turhəna? Adiş, əçret-dd inuşəmən n-älkənisət, ədəlnet-as Mässinäç, əşwəynet-as s-əzzəyt s-isəm n-Emäli.

¹⁵ Afäl has-dälän Mässinäç s-ulhawän sār-s omannen, ad-içləs əwadəm-en, ijrəw əlafu. Kunta əmarhin, turhəna-net, abəkkaç a sār-s tət-dd-orawän, ad-has-t-in-əns Mässinäç.

¹⁶ Nəmənşət a-wa ikkən jere-wän, təçqiməm hak iyyän itəddal Mässinäç i-amidi-net i-ad-t-izuzəy fäl-a-s tamədilt n-ere ilan idəm dat-Mässinäç, la tədabit, təkna təla n-tənfa.

¹⁷ Wadden, təslam isəlan n-ənnəbi Үəli,† wär dār-s nəçley, ägg-adəm dār-näç olähən a ämoos, məšan ija i-Mässinäç tamədilt dəx-ijlay i-ad-wär iwet ajənna, ij' ajənna kərəç iwətyan d-səçdis oran, wär-iwet;

¹⁸ tokäy təçqän-ten ças, idäl Mässinäç i-ad-iwət ajənna, iks' äkall.

¹⁹ Ayətma-ç, afäl dəx-wän ənməşräy iyyän i-tidət har t-dd-əsoçäl dəx-s iyyän,

²⁰ əlmədət a-s ere dd-əsoçälän ənəməşray tabarət ta oyya, ad-t-içləs Mässinäç dəx-taməttant, əns-as-in əjut n-ibəkkaçän-net.

† 5:17 5:17 A-wa ənnəbi dd-əzzarən i-Үisa, əloläy dəx-isəlan-net əssayət timaç n-awätay dat-tiwit-net.

Təkarde ta təzzarət iktəb Bətrus

Əşjəş

¹ A-wa näkk Bətrus wa n-änəmnaşul n-ŶisaĀlmaseş hin-iktabän i-imumənän-wi äsnäfrän Mässinäş əmmähäşnen jer-ikallän wi n-Bəntu, Gälasya, Kafadusya, Azya d-Bitinya.

² Abba Mässinäş iman-net, dəş-təlluləya-net, a-s äru d-käwän-äsnäfrän, ikräş-käwän s-tärna n-Unfas-net, izläy-käwän-dd jer-timəttawen i-ad-tamaşaläm erhet n-ŶisaĀlmaseş-i käwän-işşəşdäjän s-aşni-net.

Ähuuläş-käwän-in, əttaräş s-Mässinäş, ad-käwän-isənnəfləy dəş-ännuymät d-älxer.

Ätṭäma wa mäqqārän äynayän äşjār Mässinäş imumənän

³ Naməlet Mässinäş-i n-Abba n-Emäli-nänäş ŶisaĀlmaseş. Təməşäre n-təhanint-net a dəş-dd-issənkär Ŷisa Ālmaseş jer-inəmmuttan, ikf'-anäş dəş-təssəba-net təmudre täynayät, äsdättät dəş ätṭäma wa hanäş-äşjār

⁴ i-ad-nəjrəw təkasit ta hät isənnawän itwār Mässinäş i-tamətte-net. Təkasit-en, hawän-itwār dəş-älzännät, wār şəşşəd, wār tät-isəmädış hārät, wār-inäxxəs ännur-net.

⁵ Mässinäş iman-net, dəş-təssəba n-immun wa sār-s jəm a käwän-e-agəzän s-tärna-net i-ad-təjrəwäm əlxəllas wa hawän-itwār dd-e-infiləlän aşäl wa d-e-təmdəw äddunya-ta-dəş.

⁶ Ənta-den-dəş əssəbab n-tedäwit ta jəm kud-dəş irammäs-käwän, ämära-dəş, älxizabät äjjeen käwän-ässikmän iman məşan, a-wa səmmän käwän-irmäsän, wār-e ähaj irmas-käwän.

⁷ Älxizabät-en, äddälil-net, i n-ad-itbat ekew n-immun-näwän-i ilän älqin ufän wäla oräş. Oräş iman-net, wār-ixlel, efew a dəş-t-itajj äwadəm i-ad-işdəj. Əmmək-wen-dəş dəş a-s käwäned, afäl wädden ad-inşəş immun-näwän s-älxizabät i-ad-ättälmäd a-wa dār-ogdäh immun-näwän. Afäl tidət-dəş a-s itbat immun-näwän, aşäl wa dd-e-iqqəl ŶisaĀlmaseş, a data-s təkrəşäm təmmal d-älxurmät d-semyar.

⁸ Ŷisa, tärham-t kud-dəş wār käla t-tənhäyäm s-tiṭṭawen-näwän, tomanäm sār-s dəş kud-dəş har ämära-dəş, wār t-tənhäyäm. A-wen-dəş a fäl əssəbab n-tedäwit-näwän, ija dəş-təməşäre s-wār t-illa mäjräd t-ässiifhämän.

⁹ Dəwätät ed əlxəllas a-s maruşät wa käwän-e-äkf Ŷisa ed tomänäm sār-s.

¹⁰ Əlxəllas wa käwän-ikfä Mässinäş, äru d-äsewälän ännäbitän dəş-isälan-net, əmmäşän hullan i-ad-əjrähän tisäşlay-net, wār t-illa əlkəttab wār-äsfäykän i-a-wen,

¹¹ wār t-illa a-s wädden jän-t i-ad-əlmədän äzzäman d-hārätän wi maden-äj dəş-a-wa hasän-dd-äsnäfaläl Unfas n-Ālmaseş-i izzäşän dəş-ulhawän-näsän. Ənta-en-dəş a tän-issəlmädän a-s Ālmaseş, ad-inhöy tersəmmawen, təzzar ijješ älxurmät.

¹² Ännäbitän-en, issəlmäd-tän Mässinäş a-s əlxəllas wa s-xaṭṭabän isälan-net, wädden äzzäman wa hän a dəş-dd-e-infiləl, änn-ak, inn'-asän, i näwän käwäned-i s-äxtäbän inəmmuşal isälan n-Älənşil s-tärna n-Unfas Şäddijän-wa dd-ifälän isənnawän. Älənşil-i-hi, wäla änjälösän äsidärhänän ajunf dəş-s məşan, wār-əjrewän turhajät n-a-wen.

Təmudre təksuudät Mässinäş

13 Təssəba n-a-wen-dəx a fäl, äsimätärəx-kəwän d-ad-təqqayməm təjbasəm, çaymät jam ənniyät, äjät ätṭäma-nəwän iket-net dəx-a-wa kəwän-e-äkf ʔisaÄlmasex ašäl wa dd-e-infiləl.

14 Mašälät a-wa fälla-wän irha Mässinəx, wär təkemäm i-erk derhanän wi n-ibda tamašäläm dəx-älzähalät,

15 änn-ak, təkəmet təšədje n-tämudre-nəwän i-ta n-Mässinəx ed ənta-i kəwän-dd-ixrän s-iman-net, šaddiij.

16 Mässinəx iman-net a innän dəx-məjräd-net:
«İšdajät ed näkk šaddiijəx.»

17 Šämad dəx-tittar-nəwän, çarräm Mässinəx s-isəm «Abba», adiš təjjəšet tuksəda-net ulhawän-nəwän, a təkam təddaräm təmoosəm iməjarän fäll-əröri n-äkall-i-dəx. Ənta, wär-əznäməzləy äddinät, ilkam, ad-išrəx hak əwadəm s-a-wa has-jän imojjan-net.

18 Təssanäm a-s wädden härätän wären ənfa härät šund əzrəf meç orəx a-s kəwän-dd-ikkäs Mässinəx dəx-terk tämudre ta dd-təträm,

19 änn-ak ašni ilan əlqim, ašni n-Älmasex-i ämmun šund Ašəçol šaddiijän s-wär t-illa əlyib t-iwarän a-s kəwän-ixläs.

20 Äru, iket-di fəw dd-xallək äddunya, äsnäfrän-t Mässinəx i-a-wen-dəx. Ašäl-i-hi, a-wen s-äru t-iktäb Mässinəx, äsnäfaläl-t-dd dəx-təssəba-nəwän dəx-išilan-wi-dəx n-ajilal.

21 Ənta-en-dəx a dd-orəwän immun-nəwän s-Mässinəx ed issənkär-t-dd dəx-tamättant, ikf'-e əlxurmät dəx-ittus n-ad-äns immun-nəwän d-ätṭäma-nəwän fäll-Mässinəx.

22 Ašäl-i, šämad, təmešäläm tidət, adiš, šaddiijäm. Orəw-dd sār-wän a-wen tərha jer-iman-nəwän wär təha təlmənufəça. Nəmərhäät härwa jer-iman-nəwän s-ulh imdan

23 ed tämudre ta täynayät kəwän-ikfa Mässinəx, wädden abbatän-nəwän wi n-äddunya-ta-dəx s-a ijän dəx-ilkam ad-tän-iba a hawän-tät-ikfän; məjräd wa ixlälän n-Mässinəx-i ihakkän tämudre a-s əssəbab-net

24 fäl-a-s innä əlkəttab n-Mässinəx a-s:
«Amäskoy ägg-adəm, wär-izləy d-teyəšše,
tayrəst-net, wär təzləy d-ta n-täboyt.
Teyəšše tiçar, täboyt ad-tidəw, tiçar-in ənta-dəx

25 məšan, məjräd n-Emäli ənta, ixläl.»

Äywa, məjräd-wen-dəx a hawän-ätwəjjän a-s təsläm i-isälan n-Älənžil.

2

Tamətte ta ila Mässinəx: tamətte təddarät, šaddiij

1 Ənhəywät, əbdəwät d-tälläbäst a təmoos-dəx, əbdəwät d-amsud d-təlmənufəça d-əmmunšəç d-tizmit jer-iman-nəwän.

2 Alähät d-imärkäsän s-härkuk ärhan tədəqt, ənsəyät kəwäned-dəx axx wa wär-inxes härät ämoos məjräd n-Mässinəx i-ad-kəwän-isəşşuhət, tədwələm dəx-immun, təxləsəm ed innä əlkəttab n-Mässinəx:

3 «Kəwäned, təkräbbem təzude ta ija alkum i-Emäli.»

4 Zəzzihəzät-dd iman-nəwän Emäli ed iddar. Ənta a-s təhünt ta n-açmər lät əlqim hakkät äşşahät i-ehän, unjəyän sār-s dəgg-adəm məšan, äsnäfrän-tät Mässinəx ed inhäy a-s ənta a tufät.

5 Ämərə, kəwäned-dəx, təmoosəm šund tihun əddarnen warnen təhünt-ten-dəx, umasät šund ehän wa šaddiijän izzəç Mässinəx, təmoosəm šund käl-tikutawen-net

äššiişdäj t-əkfanen iman-näsän i-ad-tamaşaläm erhet-net, ƣabbädäm-t däj-idəm n-a-wa hawän-ämoos Ƴisa Älmasex. Ənta-den-däj takute ta kăwän-warät i-ad-təkrəşäm idəm dat-Mässinäx.

⁶ Däj-isälan n-a-wen-däj a däj-innä əlkəttab, innä Mässinäx:

«Äsnäfränäx təhünt n-aƣmăr

ta təfränät lät əlqim

däj-aƣrəm wa n-Sayon.

Ənta a he-sänsäx s-tizarät i-ad-tumas ässas.

Ere fälla-s issəntämän immun-net-däj,

wăr-iha mişi n-ad-ilkam ad-ämmujräz.»

⁷ Kăwänəđ-i sār-s omännen, ad-tətwəsəmƣaräm məşan äddinät wi has-äsƣärnen ulhawän-näsän, iktab a-s:

«Təhünt-ta hin-järän əlbännatän,

a-s dd-təşräy tanfust,

ənta a təqqälät ta n-aƣmăr n-ässas n-ehän iket-net.»

⁸ Ätwänn'-anäx day a-s:

«Təhünt, a hasän-irassälän, tiđəwän.»

Rassäl-asän ed unjäjän omänän s-mäjrad n-Mässinäx, ənta-den-däj tetewärt-näsän, a-wen-däj a dār-änihäjjän.

⁹ Məşan kăwänəđ-i n-imumənän, ij'-iwän Mässinäx tamətte əsinäfrän i-iman-net, təmoosäm ejhän n-käl-tikutawen fäll-əminakäl, əddəwəl şäddijän, tamətte əsidärfät; ikkäs-kăwän-dd Mässinäx iman-net däj-tihay, ij'-iwän däj-ännur-net wa əhusken i-ad-tiimələm dat-äddinät təmƣäre d-tihusay n-ijitän-net.

¹⁰ İbda, wăr hem tamətte-net məşan, əşäl-i, təmoosäm tamətte n-Mässinäx; ibda, wăr hem wi s-odän təhanint məşan əşäl-i, odän-awän-tät.

Äyyät fälla-wän a-wa läbasän

¹¹ Ayətma-ƣ-i əkneƣ tärha, iməjarän d-iməhhujjaj a təmoosäm fäll-əröri n-əkall-wa-däj; a-wen-däj a fäl, əttaräx däj-wän ad-təyyəm erk derhanän wi n-ibda kăwän-saknasnen d-tumast-năwän ta təynayät.

¹² Ətəfät əlxal olaxän jer-inəzzulam† i-ad-səbbuggətnät tihusay n-tämudre-năwän a-wa-däj kăwän-sawarän uđlem n-a-s erk äddinät a təmoosäm, afäl tamaşaläm a-wa olaxän data-sän, ad-hasän-umas a-wen ännur i-ad-səmƣarän Mässinäx əşäl wa hasän-dd-e-infiləl.

Asjəd i-a-wa omär əlxəkum

¹³ Təssəba n-a-wen-däj hawän-iqqäl Emäli a fäl məşälät a-wa fälla-wän irha əlxəkum iket-net, sərəsät iman-năwän dat-ämänokal n-əkall ed ənta a ixkamän fäll-härät iket-net,

¹⁴ sərəsät iman-năwän dat-gəfär wa ija əmänokal n-əkall jənnəj-wän ed ənta a t-ikfän tärna ta s-iƣattäs əşşərəƣa, isawar uđlem iməşdəƣwa, itiməl wi tamaşalnen a-wa olaxän.

¹⁵ Erhet n-Mässinäx, itbat: məşälät a-wa olaxän i-ad-səssusəmäm erk äddinät wi əzhälnen wären əla tayətte.

¹⁶ Tidət-däj a-s lam iman-năwän məşan, wăr təjjät a-wen əsarü i-ad-tamaşaläm təlləbäst, änn-ak, a təjjäm-däj, əjät-t däj-a-s kittəwäm a-s eklan n-Mässinäx a təmoosäm.

¹⁷ Səmƣarät äddinät iket-näsän, ərhät ayətma-wän däj-äddin, uksadät Mässinäx, səmƣarät əmänokal n-əkall.

† **2:12 2:12** — Ƴur-käl-Älyähud, ere wärän ämoos ägg-Älyähud s-aləşäl meƣ ere wärän ilkem i-äddin-näsän, iket-net, ənəzzalim a ämoos. A-wen-däj a fäl tiwsaten ti iyyäđnen iket-nəşnät, ti n-inəzzulam. — Əşäl-i-däj, ənəzzalim, əkafär (ere wärän issen s-Mässinäx).

Isəmməterän i-ad-nəttəf təmudre ta ittəf Älmasex

¹⁸ Eklan! Sərəsət iman-nəwän dəx-tuksəda n-Mässinəx daw-məssaw-wän, uk-sadət, səmğarəm wi dəx-sän oləxnen, əzednen, hakd-dəx wi s-izzəwət əlxal-nəsän.

¹⁹ Irhuj-awän afäl əlyizabət wa hannəyäm amişəl n-erhet n-Mässinəx a t-dd-orəwän sər-wän wädden əddərora.

²⁰ Əndek isəm wa-ihän əbbərəd dd-oraw əddərora? Wər t-illa. Məšan, kunta əlyizabət-wa hannəyäm, tuksəda n-Mässinəx a sər-wän-t-dd-orəwän, adiş, irhuj-awän ed a-wen-dəx a he-isiwədən idəm-nəwän dat-Mässinəx.

²¹ Əlyizabət şund-wen-dəx a-s kəwän-dd-iğrə Mässinəx ed Älmasex ənta-dəx, inhəy əlyizabət, oyy'-awän-dd s-a-wen-dəx əlmital i-ad-t-tättäläləm.

²² «Älmasex, wər kəla ofa abəkkəq, wər kəla innə bahu»,

²³ ətwərbəq məšan, wər-irbeq;

inhəy tersəmmawen məšan

wər kəla dd-təzjər terk tettert emm-net,

änn-ak, əsoğäl talxa-net Mässinəx-i isərrəxən s-iqqud.

²⁴ Älmasex iman-net

a irdən s-ad-inhəy ağəna dəx-taxəssa-net,

ətwəşləb fäll-tajəttewt, əmmut

i-ad-iqkəl fäll-iman-net ibəkkədən-nənəx,

i-ad-numas şund inəmmuttan

dəx-isəlan wi n-ibəkkədən,

nəjrəw təmudre təynəyət,

nəttəf təmudre toxadət dat-Mässinəx.

Əllubbəq hullan dəx-taxəssa-net

i-ad-təzzəyäm dəx-turhənnə-nəwän

²⁵ fäl-a-s ibda, kəla təmoosəm şund tihatten

əssujjälən məšan əməra,

təqqäləm-dd Amədan wa idmənən iman-nəwän.

3

Timtär i-tiğeden d-meddən

¹ Tiğeden! Sərəset hak iyyət dəx-kmət iman-net dat-əhaləs-net, wər hasən-təsjetmət məjrəd, dihen, kunta ih'-ikmət ti s-wər-irdə əhaləs-net s-məjrəd n-Mässinəx, ad-t-dd-awəynət sər-s tihusay n-əlxal-nəkmət.

² Afäl jəmät a-wen, ad-ənhəyən d-iman-nəsän təşədje n-təmudre-nəkmət d-semğar wa hasən-jəmät dəx-tuksəda n-Mässinəx.

³ Wər toşelmət qarət tihusay-ti lənen mənhoj d-isəhhəska d-isəssəkna wi jänen s-izəban d-izərkan n-azrəf d-orəx d-isəlsa wi lənen əlqim,

⁴ änn-ak, səhhəskətmət ammas n-ulhawän-nəkmət, tihusay-tin-dəx a lanen əlqim iğlalən dat-Mässinəx, tin-dəx a dd-tirəwnen təzude d-ənniyət ozjan.

⁵ Tihusay-tin-dəx a-s kəla hasnət-tamməxənət timəşşeddəjen ti n-ibda jərnen əttəmə-nəsnət dəx-Mässinəx, əsijədnət i-meddən-nəsnət.

⁶ A-wen-dəx a-s kəla t-ja Sarəta-i s-fäl təmğərə n-semğar-i-dəx təja i-Ibrahim, təglə fəw har t-ğarr s-isəm: məssi-ğ. Aywa, əşəl-i-hi, kəməted, Sarəta-en-dəx a-s təmoosmət eşşe-s afäl tamaşalmət a-wa oləxən dəx-a-s, wər toyemət hərət wäl' iyyən iggad d-ənniyət-nəkmət.

⁷ Meddən! Əssənət hullan dəx-tiğeden-nəwän, wər hin-təttəwäm a-s tiğeden ya, rəkkəmnət fälla-wän, səbbəlälət-tənət ed timəkkusa a əmoosnət dər-wän oğdähnen

däx-täzunt ta hawän-ija Mässinäx ännuxmät-net, äjät a-wen i-ad-wär-itəmmil fäw härät inzayän tittar-näwän dat-Mässinäx.

Təhanint ta s-ənihəjja a-s ha ulhawän n-əlməssexitän

⁸ Darät-a-wen daḡ, ahärät iyyän n-ənniyät däx-härät iket-net, aret hak iyyän däx-wän ulh-net i-amidi-net jer-iman-näwän šund a-wa täjjän ayətma, nəmiḍənät təhanint, isərəset hak iyyän däx-wän iman-net dat-amidi-net,

⁹ wär zəlām tālläbäst s-tālläbäst, wär zəlām tarəbbeḍt s-tarəbbeḍt. E-d hawän-ixšād əwadəm härät, ännät-as: «Irəš-ak Mässinäx.» A-wen-däx a-s käwän-dd-ixrä Mässinäx s-iman-net i-ad-təkusəm marušät wa hawän-itwär.

¹⁰ Iktab däx-əlkəttab n-Mässinäx a-s:

«Əwadəm wa irhän təmudre iwar sərho d-taḡrəst, agəzət iləs-net däx-təna n-a läbasän, agəzət idlay-net däx-təna n-bahu.»

¹¹ Jawəḍät i-tālläbäst, mašälät a-wa oläxän, əməlet əlxer d-uḍəf-net härkuk jere-wän d-əddinät,

¹² fäl-a-s tiṭṭawen n-Eməli ənsanät fäll-wi data-s lanen idəm, isajad i-tittar-näsän məšan, inälläbasän əntəneḍ, ikfär-asän.

Ahənay n-əlyizabät fäl a-wa oläxän wədden a-wa läbasän

¹³ Mi hawän-e-ixšədän härät afäl amişel n-a-wa oläxän a däx-tədgazəm?

¹⁴ Təndəḍ-awän afäl erk əmmək wa hannäyäm, amişel n-a olaḡän a sār-wän-t-dd orəwän. Wär käwän-sərməyenet dəgg-adəm, wär təggədnet d-ənniyätän-näwän.

¹⁵ Ixkəmet Əlmasex däx-ulhawän-näwän, ənta a-s Eməli. Äṭṭəma wa käwän-əsjär Mässinäx, ḡaymät härkuk təsidəwäm i-ad-t-səsləm s-tazidert i-ere käwän-əssistänän däx-isəlan-net.

¹⁶ A-wen, äjät-t s-təzude təddeewät d-uksaḍ, wär-immalet a däx-təşşakəm iman-näwän, dihen, ad-səbbəggum əddinät wi fälla-wän jannänen bahu fäl-a-s innin il'iwän Əlmasex. Əṭṭəfät əlxal olaḡän däx-härät iket-net i-ad-əkrukəḍän imiksänän-näwän.

¹⁷ Kunta Mässinäx a dd-ifal a-wen, ufa erk əmmək irməsän əwadəm däx-a-s t-işla a olaḡän uhən-i t-irməsän däx-a-s t-işla a läbasän.

¹⁸ Ənhəywät, Əlmasex, inhäy aḡəna, əmmut s-iyyət i-ibəkkaḍän n-dəgg-adəm; wär t-illa udlem t-iwarän məšan, əmmut däx-təssəba n-inəsbəkkaḍän i-ad-tän-izənnəməzəl d-Mässinäx. Tidət-däx a-s əmmut däx-taḡəssa-net, məšan, əssoḡäl-t-dd Unfas Şəddijän unfas-net s-tärna-net, issənkär-t-dd jer-inəmmuttan.

¹⁹ S-tärna n-Unfas-en-däx a-s ixtəb isəlan n-Ələnzil i-əddinät-wi s-aşäl-i-däx han əlaxärät;

²⁰ əddinät-en, izzəydär Mässinäx fälla-sän a ikka ännəbi Nox ikarrəs turəft n-aman ta məqqärät məšan hakd a-wen-däx, əşḡärän-as ulhawän-nəsän har fälla-sän dd-oḍän aman wi n-ḍuf, əksän-tän iket-däx-nəsän, wär däx-sän dd-ixles a səl əttam əddinät.

²¹ Salläm, aman-win-däx fälla-sän-dd əffäynen, əmoosän tele n-atwəsəlmaḡ-näwän däx-aman. A-wen-däx a-s aşäl-i-däx, wa irḍän s-atwəsəlmaḡ, asətbat a itajj n-a-s tidət-däx a-s ixləs-t Mässinäx. Əlxəllas-en, wədden aşəşdəj n-taḡəssa s-aman a sār-wän t-dd-orəwän, änn-ak, əjjəlyüt däx-alkum i-Mässinäx s-iman şəddijnen, wär-ih' əşşək. A-wen əssəbab-net YisaƏlmasex-i dd-inkärän jer-inəmmuttan

²² təzzar, ikkə isənnawän, ixkəm däx-sän daw-aḡil n-Mässinäx. Aşäl-i, Əlmasex a daw-t-əllan ənjalosän d-imənokalän d-iməşşuha wi əzzəḡnen isənnawän.

4

Elyənät abäkkad dəy-tämudre ta täynayät təjrəwäm

¹ Үas šamad Älmaseх iman-net inhäy аҗана дəy-таҗəssa-net мәшан һакд а-wen-dəҗ, izzəydär, adiš, äjät käwäneд-dəҗ fäll-a-wen ed äwadəm wa ihannäyän älyizabät fäll-təssəba n-Älmaseх, asəlmad a itajj a-wen, a-s ənta-i-dəҗ, tidət-dəҗ a-s ibда d-abäkkad.

² A təkkäm təddaräm dəy-таҗəssa-ta-dəҗ, wär tättälälät erk derhanän-wi fäll-təgl' äddunya, änn-ak, mašälät erhet n-Mässinäy.

³ Igdäh-awän a-wa-dəҗ təkkäsäm dəy-iba n-tuksəda n-Mässinäy a-s tämoosäm inəzzulam.† Äzzäman-en, wär təmišiläm ar asəmmädəs n-iman-näwän, erk derhanän, tesäse n-asməd, tansit, iba n-asəgdah, älyibadät n-äššanämän d-a-wa olähän d-a-wen.

⁴ Ašäl-i, tämudre-näwän, tämoos täqqän n-eҗäf i-äddinät wi s-käla där-wän ohärän tämudre-ten-dəҗ ed təbdäm d-a-wa ɗarät ošalän əntäneд härwa, a t-ämoosän: asəmmädəs n-iman, asəssiki, təkkufära.

⁵ Ilkam ad-tän-išräy Mässinäy, ənta-en-dəҗ a-s ilkam, ad-išräy äddinät iket-dəҗ-näsän jer-wi äba һакд-dəҗ wi əddärnen.

⁶ A-wen-dəҗ a fäl wi äba s-ätwäjjän isälan n-älxer, ätwäšräyän dəy-isälan n-a-wa ämešälän fäll-ärori n-äkall ed a-wen-dəҗ a iqqalän i-dəgg-adəm iket-dəҗ-näsän. Ašäl-i, əddarän iket-dəҗ-näsän dat-Mässinäy s-tärna n-Unfas Šäddijän.

Tädabit ta ikfa Mässinäy imumənän

⁷ Ayətma, sämdo n-härät iket-net, ohäz-dd. Iwäret-käwän särho, äjät ənniyät i-iman-näwän, aғəzät iman-näwän. Wär käwän-in-išäšlalet härät wäl' iyyän i-ad-tudabem tamädilt n-Mässinäy.

⁸ Zäzrät tärha təmdat jer-iman-näwän i-härät iket-net fäl-a-s, tärha, timəs-in ibäkkadän äjjootnen.

⁹ Ijješet-käwän amäjaru wärän ija s-ažəžžänxəl n-tiṭṭawen wäla abjənjən.

¹⁰ Tädabit ta käwän-ikfa Mässinäy dəy-ännuymät-net, wär tät-inäkkäzet wäl' iyyän dəy-wän i-amidi-net, mašälät a-wen i-ad-tumasäm imäɗanän əfrannen n-a-wa käwän-issäxläf Mässinäy.

¹¹ Wa ikfä Mässinäy musnät n-mäjräd, ämmäjrädet s-a-wa innä Mässinäy, wa ijräwän s-ad-ixdəm i-imidiwän-net, ixdəmet s-äššahät wa t-ikfä Mässinäy. Səmxärät Mässinäy dəy-idəm n-ҮisaÄlmaseх dəy-härät iket-net, ənta a änihäjjän d-älxurmät ixlälän d-tanhaɗt täxlälät. Amin!

Tämudre täddiinät täddeew daҗ d-älyizabät

¹² Ayətma wi əkney tärha, wär täqqännet irrumän wi hannäyäm olähnen d-tukəse n-tahəst iҗäfawän-näwän, wär teyalät irmas-käwän a-wärän änhäjja,

¹³ änn-ak, umaset-awän a-wen əssəbab n-tedäwit ed a-wa käwän-irmasän, käla irmäs Älmaseх. Däwätät ämära-dəҗ där-s tohäräm tersəmmawen-tin-dəҗ i-ad-timyar tedäwit-näwän ašäl wa dd-e-infiləl Älmaseх dəy-älxurmät-net.

¹⁴ Təndəд-awän afäl käwän-rabbäɗän äddinät dəy-təssəba n-a-s il'-iwän Älmaseх, təndəд-awän ed dihen, a käwän-irmäsän-dəҗ, ad-fälla-wän isäns Mässinäy Unfas-net wa ilän älxurmät.

¹⁵ Wär käwän-itäjjäšet ere ihannäyän аҗана fäl-a-s innin ija iman n-äwadəm, wäla okar, wäla ija erk härät, wäla ijjaš isälan t-dd-wären iqqel.

† 4:3 4:3 — Үur-käl-Älyähud, ere wärän ämoos ägg-Älyähud s-aläšäl meҗ ere wärän ilkem i-äddin-näsän, iket-net, änäzzalim a ämoos. A-wen-dəҗ a fäl tiwsaten ti iyyäɗnen iket-näsnät, ti n-inəzzulam. — Ašäl-i-dəҗ, änäzzalim, äkafär (ere wärän issen s-Mässinäy).

16 Kunta ih'-iwän ere ititwəxəzzəben fäl-a-s innin älməssexi a ämoos, wär has-itumaset a-wen asäkor, änn-ak umaset-as a-wen əssəbab n-tämayit i-Mässinəx n-a-s t-iwar isəm-wen-dəx n-älməssexi.

17 Ässäreyə n-Mässinəx wa ilkämän, issəntä; tamətte-net daɣ a-s issəntä. Adiš šəmad näkkəneḍ-i-dəx a-s issəntä Mässinəx, əndek isəlan n-wi unjäynen omanän s-Älənžil n-Mässinəx? Ma dəx-sän ilkämän?

18 İktab a-s:

«Kunta wälə wa n-əməɣdal, šərnaš d-e-ıxləs, adiš, ma innä wa n-enälləbäs d-wa n-anəsbəkkad?»

19 A-wa-dəx a fäl ere dəx-wän ihannəyän aɣəna-dəx dəx-təssəba n-amışəl n-erhet n-Mässinəx, isəxləfet iman-net Ämaxlak-i n-Äməɣdal, wärän irəzz dəx-tənna-net. Wär kəwän-isälḍašet iji n-a-wa oləxän.

5

A-wa iwärän inušämän n-älkänisät

1 Inušämän, näkk-i n-ənušäm äjjəyhän i-tersəmmawen ti inhäy Älmasex, kəwäned a-s əssewäləx əməra. A əndərrän ɣas a hin-əqqimän iqqəl-dd ənta iman-net, itwənhəy älxurmät-net, ahərəx-t dər-s.

2 Ənta da a-wa dər-kəwän-əsimätərəx: taɣəlift-nəwän tahrut n-imumənän ta kəwän-issəyləf Mässinəx, äjät-as taməḍint ta mad-äj aməḍan i-tahrut-net, wär has-jem taməḍint kəwän-tähhuuššälät, änn-ak, umaset-awän a-wen a jam d-iman-nəwän dəx-erhet n-Mässinəx. Wär jem a-wen əssəbab n-akəraš n-ehəre wärän xälal, änn-ak, ədgəzät dəx-a-wen s-ulhawän əmdanen s-iqqud.

3 Wär tətteräm tanəya n-errawän n-imumənän wi kəwän-issəyləf Mässinəx, änn-ak, umasät-asän ere hasän-ha tətəläl.

4 Dihen, afäl əsäl wa dd-änfaläl Ämänokal n-iməḍanän wa məqqārən, ad-kəwän-əkf, korona, a-wen, takənbut n-təmmənukəla ta s-wär t-illa a inaxxəsän ini-net. Əntaden-dəx marušät-nəwän.

5 Kəwäned daɣ-i n-imawaḍän, səmɣərät inušämän-nəwän, sərəsät iman-nəwän jer-iman-nəwän ed iktab a-s:

«Mässinəx ikfär i-əddinät wi iha əttəkəbru məšan, wi data-s sarasnen iman-nəsän, ihakk'-en ännuɣmät.»

İsəmməterän i-imumənän

6 Sərəsät iman-nəwän daw-tärna n-əfuss n-Mässinəx i-ad-kəwän-iḍkəl dəx-əsäl wa issəbdəd i-a-wen,

7 sänisät fälla-s inəzjam-nəwän iket-dəx-nəsän ed ənta a kəwän-iḍmanän.

8 Äjät ənniyät, ɣaymät tokayäm. He kəwäned! Wär toyjem İblis-i n-əmakšar-nəwän əššisläl-kəwän-in, oläh ɣas d-ahər inijjəwän, or' emm, əɣiləyɣäləy, itamməx i-ere fäll-oda, ilməz-t-in.

9 İkfärät-as, səşşuhətät immun-nəwän s-Mässinəx ed təssanäm a-s tersəmmawen ti kəwän-ramməsnen əməra-dəx, ərmasnät daɣ ayətma-wän dəx-əddin säl kəwäned fäll-əröri n-əkall-i-dəx.

10 Älxizabät wa kəwän-irmasän, wär-e-əhəj irmas-kəwän ed Mässinəx-i n-Məssi-s n-ännuɣmät-i kəwän-dd-iɣrən s-iman-net, iɣr'-iwän-dd i-ad-dər-s tärtəyäm dəx-älxurmät-net wa ixlälän dəx-idəm n-ŸisaÄlmasex. Təssəba n-a-wen-dəx a fäl ənta iman-net a kəwän-e-isəşdəjän, isəbdəd immun-nəwän fäll-əssas intämän.

11 Tumaset tärna hərkuk ti-net. Amin!

Ajilal n-məjräd

¹² Silwan wa n-əŋŋa-ɣ n-əmaɣdal a əssəktəbəɣ tifer-ti-dəɣ i-ad-kəwən-səmmətərəɣ, təkuyədəm dəɣ-a-wa həm, təlmədəm a-s ənnuɣmət n-Məssinəɣ wa dər-kəwən-osəɣ d-iman-net, tidət.

¹³ Təhuul-kəwən-in əlkənīsət-ta əsnəfrən Məssinəɣ hət əkall wa n-Babilun, əhuul-kəwən-in dəɣ Marqəs-i n-rure-ɣ dəɣ-əddin.

¹⁴ Nəməjjət jer-iman-nəwən isofan n-tərha təmdat. Kəwəneɗ-i ila Əlmasex, ikf'-iwən Məssinəɣ əlxer-net iket-dəɣ-nəwən. Amin!

Təkarde ta s-sənətət iktəb Bətrus

Əşajəş

¹ A-wa nəkk Simyon Bətrus wa n-akli d-ənəmmaşul n-ŶisaĀlmasex hin-iktabən i-imumənən wi ikfa Ŷisa Ālmasex-i n-Mässinəx d-Āmaylas-nənəx immun ilan əlqim, omənən sār-s, noman sār-s nəkkəneq-dəx.

² Āhuuləx-kəwən-in, əsnədfəs fälla-wən Mässinəx d-Eməli-nənəx Ŷisa Ālmasex ənnuymət d-əlxer dəx-təssəba n-muzəyət wa n-tidət t-jəm.

Tirhujen ti lən əlməssexitən

³ Mässinəx, dəx-tərna-net, wər t-illa a-wa-dəx hanəx-ihakkən təmudre ta n-tidət təddiinət dəx-tuksəda-net s-wədden, ikf'-anəx-t. Issəlməd-anəx s-Eməli-i hanəx-dd-iyrən s-iman-net i-ad-hanəx-əkf dəx-ənnur-net d-əlxal-net.

⁴ Təssəba n-ənnur d-əlxal-wen-dəx a fəl hanəx-əssahər d-iman-net, ijjəş-anəx ərkəwələn n-nefran əjjootnen lanen əlqim i-ad-nəbdəw d-erk derhanən wi fəll-təgl' əddunya sār-s dd-tirəwnen əlhəllək, nəttəf əlxal wa-net.

⁵ A-wen-dəx a fəl kəwən-əsimətərəx d-ad-təjəm tədabit-nəwən iket-net i-ad-siwədam fəll-immun-nəwən amişəl n-a-wa oləxən, siwədam fəll-amişəl n-a-wa oləxən muzəyət n-Mässinəx; siwədam fəll-muzəyət n-Mässinəx, tanhaqt dəx-iman-nəwən,

⁶ siwədam fəll-tanhaqt dəx-iman-nəwən, ehel n-iman-nəwən dəx-əlxizabət; siwədam fəll-ehel n-iman-nəwən dəx-əlxizabət təmudre təddiinət,

⁷ siwədam fəll-təmudre təddiinət, anmərh jer-iman-nəwən şund ənqatən, siwədam fəll-anmərh jer-iman-nəwən şund ənqatən, tərha təmdat.

⁸ Afəl tamaşaləm tihusay-tin-dəx s-əjut, wər-e tumasəm əddinət wəren dd-səxsəl hərət, ənn-ak, ad-ijjəş əlbəraka tassayt-nəwən d-Eməli-nənəx ŶisaĀlmasex, təknəm-t muzəyət.

⁹ Wa wərən itəmmişil tihusay-tin-dəx, ilmədet a-s wər-izley d-adərxal d-asəffənəwnaw, ittəw'-in aşəsdaj wa t-ija Mässinəx dəx-ibəkkadən-net wi n-ibda.

¹⁰ Ayətma-x, şamad Mässinəx iman-net a kəwən-əsnəfrənən, əjləyət hullan dəx-alkum-has i-ad-itbat nəfran d-teyəre ta kəwən-dd-ija s-iman-net. Afəl təmudre-ten-dəx a təttafəm, wər-e təjjərtəqqäləm.

¹¹ Emmək-wen-dəx dəx a dəx-hawən-e-ikən Mässinəx arr n-imawən n-Təmmənəya ta təylələt dəx-ixkəm Eməli-nənəx d-Āmaylas-nənəx ŶisaĀlmasex.

A-wa innə Bətrus dəx-taməttant-net

¹² Hərətən-wi-dəx, siktoş-awən-tən-dd dəx-a-s, əssanəx a-s tən-təssanəm, təttafəm dəx tidət məşən hakd a-wen-dəx, indər-ahi fəw ad-wər hawən-tən-dd-əssəktəx.

¹³ Ija xur-i a-s a əkkəsəx əddarəx, iwar-ahi, ad-hawən-tən-dd siktoş i-ad-jam ənniyət

¹⁴ ed əssanəx a-s aşəl-in, ohəz-dd. İşwar əzjarəx əddunya-ta-dəx, əj a-wen s-əmmək wa s-əru hi-t-dd-əsnəfaləl Eməli-nənəx ŶisaĀlmasex.

¹⁵ A-wen-dəx a fəl ərhəx iket-di d-itəjj a-wen, ad-kəwən-dd-siktoş hərətən-win-dəx i-ad-fälla-sən jam wəla qarət taməttant-in.

Tajuhe ta ija Bətrus d-ənnəbitən wi iyyədən

¹⁶ Isälan wi hawän-in-nøja fäll-ass n-Emäli-nänäx YisaÄlmasex, wädden a insan fäll-tinfusen dd-näsinäxänbäl wäla dd-näsihäskät däx-ixäfwän-nänäx. Aa fäw! Tihusay n-a-wa hawän-nøjanna, a nønhay s-tittawen-nänäx,

¹⁷ näjjøyh i-semyar d-älxurmät wa t-ikfa Abba Mässinäx-i n-Mässi-s n-tihusay d-älxurmät, nøbdad a-s dd-ijmäð emäsli n-Mässinäx isønnawän innä:

«A-wa Rure-x wa n-yyän økney tärha, ønta xas a däx-äsriwän iman-in.»

¹⁸ Emäsli-en s-nøsla dd-ifälän isønnawän, nøsl'-as ašäl d-näddew d-Yisa fäll-taðayt ta šäddijät.

¹⁹ A-wen-däx a fäl, a-wa ønnän ännäbitän, nøflas-t, øfløsat-t käwäned-däx i-ad-käwän-infew s-a äjjeen ed ad-hin-ikkøs tihay fäll-ulhawän-näwän s-ømmøk wa s-hin-takkäs tefätelt tärmasät tihay, imlowløw edägg, isøšdøj ännur wa n-Älmasex ulhawän-näwän šund tatrit ta n-tifawt dd-täsimäqqet.

²⁰ Elmødät dat-härät iket-net a-s mäjräd wa jän ännäbitän, wär t-illa däx-ølkøttab n-Mässinäx ere äddooben ad-t-äffässär s-a-wa dd-ikkäs däx-eyäf-net xas

²¹ fäl-a-s, wär t-illa ännäbi n-Mässinäx dd-iggadän xas ittär tønna n-a-wär-innä Mässinäx, ed mäjräd wa jän ännäbitän däx-isälan n-Mässinäx, tärna n-Unfas Šäddijän a tän-dd-intäjän s-tønna-net iket-net.

2

He käwäned imäsägran wi n-bahu!

(Hudd 4-13)

¹ Däx-äzzäman hin-okayän, käla hän ännäbitän n-bahu iyyäð tamøtte ta n-käl-Işrayil s-ømmøk wa s-ašäl-i-däx, han-käwän imäsägran n-bahu iyyäð tikøddulnen Mässinäx-i n-ämänokal wa mäqqärän tän-ixläsän. Èkkäzzu a-s dd-silmumusän iman-näsän jere-wän, tiläqqad a-s saswadän äddinät i-ad-tän-šønnømešrøyän. Imojjan-näsän a tän-e-awøynen šik s-ølhøllak.

² Ad-hasän-ølkømän äddinät äjjootnen däx-asømmäðøs wa täjjän i-iman-näsän, søssøkkufärän-tän i-ad-øšløyän i-tabarät n-Mässinäx ta n-tidøt.

³ Imøkkorras-win-däx, ad-øttärän asøswad-näwän s-tinfusen øglanen s-azrøf, dd-økkasän däx-ixäfwän-näsän i-ad-sumømän a-wa läm. Äru d-issøbdäd Mässinäx ølhøllak-näsän, wär-e ähaj ðay wär-ija a-wen.

⁴ Èkkasäx-käwän däx-tayðärt: Mässinäx, wär-inya titawen-net fäll-änjäløsän wi änmäšräynen, änn-ak, ija däx-sän tišøm tøzzar ijär-tän-in s-yyät däx-tihay ti n-zøhännäma i-ad-øqqølän dihen i-äššärexa wa ilkämän.

⁵ Äddinät ðay wi n-ibda änmäšräynen i-Mässinäx däx-äzzäman wa n-Nox, wär tän-oyya Mässinäx s-ømmøk-wen-däx. Äsmäqqäs-dd fälla-sän aman wi n-ðuf dd-fälnen isønnawän d-äkall, øksän-tän. Wär däx-sän dd-ixles ar Nox d-äddinät n-käl-ehän øssa. Inhäy Mässinäx a-s äzzäman-wen-däx, Nox-en-däx xas a øxadän data-s, ixatðab iqqud s-Mässinäx.

⁶ Oläs ðay Mässinäx, alahas n-ixärman wi n-Sodoma d-Gomora, issøntäs-tän, ij'-en ezød fäl tømyäre n-anmøšri-i-däx jän i-ad-umas a-wen älmital i-inämäšrayän iket-däx-näsän.

⁷⁻⁸ Ilhäs-tän Mässinäx iket-däx-näsän, wär dd-oyya ar Lut-i n-ämaðdal. Jän käl-ixärman-en-däx asøssiki økayän ämaku. Ihannäy Lut, isall hak ašäl i-xorøzzøma wa tän-išlään, äsniinän iman-net fäl tømyäre n-tälläbäst-i-däx jän käl-ixärman-en-däx.

⁹ Isälan-win-däx, salmadän-anäx a-s äddinät wi äddiinnen, a jän däx-älxizabät-däx, ad-tän-dd-ixløs Emäli däx-s, mäšan, inämäšrayän øntäned, ašäl wa ilkämän, itwar-asän äššärexa ässuukšäðän.

¹⁰ Təlkam tissant n-əşşərəxa n-Məssinəx hullan dəx-əddinət wi wəren əlkem ar i-derhan n-iman-nəsən wa tən-isamədasən.

Iməsəxran n-bahu-win-dəx, wər-ərhen ad-fälla-sən ixkəm Eməli, əflasən iman-nəsən, hələn, wər tən-issərməx asəkkufər n-a-wa əssiməxər Məssinəx dəx-işənnawən

¹¹ s-wəla ənjalosən iman-nəsən-i ojarən iməsəxran n-bahu-win-dəx tərna hakd-dəx əşşahət, wər helən ad-ənnən a ləbasən wərən il' əmmək dat-Eməli.

¹² Əddinət-wi-dəx, wər-əzleyən d-təxsiwen wəren la tayətə, wəren əgla ar fəll a-wa hannəynət, irməs-tənət-dd əwadəm, iyrəs-asnət. Sikufərən i-a-wa s-wər-əssenən hərət, erk imojjan-nəsən a-s ilkam ad-tən-əjən dəx-hərət.

¹³ Əlkamət timzəl n-iba n-iqqud-nəsən. A-wa əskərakədən tamaşalən, tarəhut a-s t-tajjən, samədasən, samədrayən iman-nəsən. İsl'en a-wen-dəx, uhən-dəx, təzəmməxən dəx-imjora-nəwən, dəx-utər n-ad-kəwən-səkkərəkədən.

¹⁴ Wər t-təlla tamədt s-wədden lan-as ənniyət, ənsayən amişəl n-abəkkəq, taqqənən təndərbaten i-əddinət wi wəren əssen a han, şinməşriyə-tən; oşalən hərəkuk dəx-uməx i-azrəf s-təkkərzəzzəl, a-di, iməlyən dat-Məssinəx.

¹⁵ Əzjərən tabarət ta toxədət, əşşəşkən iman-nəsən. Əsofən alkum i-adəriş n-Balam əgg Bayor-i ijən a wərən itətwejj a-wa-dəx has-ija utər n-azrəf wərən xələl.

¹⁶ İxtəl-t Məssinəx dəx-anməşri wa ija. İgla fəw har has-imməjrad s-teşədt. Teşədt ya, wər təməjrid məşən əşəl-en, s-tərna n-Məssinəx, təssewəl-as şund əgg-adəm i-ad-wər-itəjj ənnəbi Balam əbbuddəl wa s-ikittəw iji-net.

¹⁷ Iməsəxran n-bahu-win-dəx dəx-hawən-əssewələx, wər t-illa a ənfan. Oləhən xəs d-terəst s-əqqurən aman-net, oləhən d-tijərəkən əzziwət ədu, şik-dəx a-s jammədnət mənhoy. Təlkam dəx-sən tissant səmmət dəx-tihay ti n-ələxərət.

¹⁸ Əzizədən ilsawən-nəsən kud-dəx taxxalen xəs a jannen, şinməşriyə əddinət wi s-iket dd-əzjərən ifassən n-əddinət s-ihənnin-dəx bahu a-s əlkamən, tattərən ad-tən-səswədən.

¹⁹ Tajjən-asən ərkəwəl n-ad-tən-səddərən s-bahu, a-s ija a-wen, əntəneq iman-nəsən əkkilen i-derhanən-nəsən wi tən-əzziwətən s-əlhəllək. Əywa, hak əgg-adəm, əkkilət i-a-wa fälla-s ilən tərna.

Iba n-uxəl s-dara

²⁰ Əddinət wi omənən s-Eməli-nənəx d-Əməxlas-nənəx YisaƏlməsex, əxləsən, a-wen, wər t-ih' əşşək. Təssəba n-a-wen-dəx əməra, a fəl əbas samədasən iman-nəsən s-a-wa fəll-təgla əddunya. Məşən ere wa oyyən iman-net dərat-a-wen təkrəş fəlla-s əddunya əşəl, ad-umas a-s talxa-net ta təşriyə, təşşəm-as ta təzzarət.

²¹ Ere wa ilmədən a-wa əmoosən tabarət ta n-iqqud təzzar oyy'-et i-ad-inməşrəy i-ələmər wa şəddijən issəbdəd Məssinəx, əwadəm-en, işşəm-as-in ad-wər-issen fəll-tabarət-ten-dəx hərwa dəx-tizaräten

²² ed ija xəs a-wa innə ozz, wa innən:

«İqqəl edi ebsan-net»,

məx wa innən:

«Ərrid-dd əlxənžər, iqqəl tərbəbbəz-net.»

3

İşmal n-uxəl n-Yisa Əlməsex

¹ Ayətma-x-i əkney tərha, təkarde-nin ta s-sənətət hawən-in-əktəbəx a-wa. A-wa hawən-in-əktəbəx dəx-snət iket-net, i n-ad-kəwən-səxərəx, səmmətərəx-kəwən i-ad-təkrəşəm tayətə ta ihəkk Məssinəx.

² Wār hin-təttəwām a-wa hawān-ənnān ānnābitān wi n-iməšseddəjān d-fārəḍān wi kāwān-ikfa Emāli d-Āmaylas s-hawān-jān inəmmušal-nāwān isālan-nāsān.

³ Hārāt wa āzzarān s-ārheḡ ad-sār-s təssanām, ənta da: dəḡ-ajilal n-āddunya-ta-dəḡ, ad-tāt-dd-əjjəšan āddināt kāwān-janen isəḍsa, wār tān-išla ar alkum i-tārha n-iman-nāsān.

⁴ Ad kāwān-dd-asən, ənnən-awān: «Ēyyaa, wādden a ija a-wa-dəḡ, jannem-anəḡ a-s ikf'-iwān Ḡisa ārkāwāl n-a-s imal-dd. Ēndek-t ya āmāra!» Jannen-awān: «Ḡur-imārawān-nānəḡ wi n-ibda, har ašāl-i-dəḡ, ālxal wa s-dd-tāxlāk āddunya, ənta a ha har āmāra-dəḡ, wār t-illa a dəḡ-s ifalān edəgg-net.»

⁵ Jannen a-wen-dəḡ māšan, otasān tetāwit n-a-s tārna n-mājrād n-Māssinəḡ a-s dd-ixlāk isənnawān d-ākall, ibḍa ākall d-aman, ibnā-dd ākall s-aman-en-dəḡ,

⁶ əmmək-wen-dəḡ a-s hin-omās Māssinəḡ a-wa iwārān ārori n-ākall iket-net dəḡ-āzzāman wa n-anji wa n-ḍuf.

⁷ Ašāl-i dəḡ, s-tārna n-mājrād-net en-dəḡ a-s ittaf isənnawān d-ākall i-efew wa hasān-iqqalān ašāl wa ilkāmān. Ašāl-en-hi, a-s ašāl wa n-āššəreḡa wa n-tidət d-tinmənhiyān ināmāšrayān d-iman-nāsān.

⁸ Ayətma-ḡ-i əkneḡ tārha, wār-ārheḡ ad-təžhalām fäll-hārāt iyyān: dat-Emāli, ašāl iyyān, wār-izley d-efāḍ n-awātay, efāḍ n-awātay dəḡ data-s, wār-izley d-iiyyān n-ašāl.

⁹ Ma əsihālān wi dəḡ-wān jānnanen a-s Emāli, irza dəḡ-tənnanet, āhoj'-in fällanəḡ? A-wen wādden a ijan. Emāli, aḡəzzidār fälla-nəḡ ḡas a ija, wār-irha ad-ihlək wāl' iyyān dəḡ-nəḡ, ānn-ak a irha, ad-utabān āddināt iket-dəḡ-nāsān.

¹⁰ Ašāl wa n-Emāli, ad-dd-āj ejəḍāl wa itājj emākrād fäll-āwadəm. Ašāl-en, isənnawān d-a-wa tān-ihān, ad-əjən anbārəqqəs əssuuksādān, ihjəljləl efew fäll-ārori n-ākall iket-net, ilyəm-in s-iiyyāt, ad-ābas t-illa a t-illan.

Sādəwāt i-ass n-Ālmasex

¹¹ Šamad hārātān-win-dəḡ, ilkam ad-tān-in-iba s-əmmək-wen-dəḡ, adiš, ətṭəfāt təmudre šəddiijāt təddiināt,

¹² təqqələm i-ašāl wa n-Māssinəḡ, sərməḍām-t fāw ed išwar-dd-osa. Ašāl-en, a-wa ihān isənnawān, ad-intəs iket-net, ilyəm-in a-wa iwārān ārori n-ākall.

¹³ Māssinəḡ, ijjāš-anəḡ ārkāwāl n-ad-dd-izəzzubbət isənnawān āynaynen d-ākall āynayān-hanəḡ, ənta-den-dəḡ a-wa iha ātṭāma-nānəḡ, nəqqal-as ed dihen, wār t-illa a səl iqqud.

Kuyədāt dəḡ-alkum i-Ālmasex

¹⁴ Ayətma-ḡ-i əkneḡ tārha, iket-di d-tajjān hārātān-win-dəḡ, ājāt a-wa təddobem iket-net i-ad-kāwān-dd-əgəz Ḡisa, šəddiijām, wār t-illa ālxib kāwān-iwarān, imal-t dəḡ ālxer jere-wān d-Māssinəḡ.

¹⁵ Ēlmədāt a-s əššābarāt wa kāwān-ija Emāli, i n-ad-təyləsām. A-wen, āru d-hawān-t-in-iktāb Buləs-i n-āḡḡa-nəḡ nəkna tārha, s-sārho wa t-ikfa Māssinəḡ.

¹⁶ A-wen-dəḡ dəḡ a itajj dəḡ-tikardiwən-net iket-nāsnāt ti-dəḡ əssewāl dəḡ-isālan-win-dəḡ. Tidət dəḡ a-s, a-wa ikattāb, han-t idəggan s-wār rəqqis ujreh-nāsān. A-wen-dəḡ a fāl mājrād-en itājj, e-d t-ārmāsān erk āddināt əžhalnen wāren əssen a hān, ad-safraḡān ālməḡna-net ed a-wen-dəḡ a tajjān i-a-wa ātwānnān dəḡ-əlkəttabān wi iyyādnen. Ēnta-den-dəḡ əmmək wa s-dd-tirəwān əlhəllak fäll-iman-nāsān.

¹⁷ Ayətma-ḡ-i əkneḡ tārha, nəkk ya ḡas, əkkəsəḡ-kāwān dəḡ-tayḍārt: əgəzāt iman-nāwān, wār toyem erk āddināt-win-dəḡ, āšināmāšrayān-kāwān dəḡ-erk ālxal wa hān, takkāsān-kāwān dəḡ-edəgg-wa dəḡ-kāwān-issəntām Māssinəḡ.

¹⁸ Ēdwəlāt, təhələm s-data dəḡ-ānnuḡmāt d-muzəyāt n-Āmaylas-nānəḡ ḠisaĀlmasex. Ēnta a ānihājjān d-ālxurmāt ašāl-i-dəḡ har aməḡlol! Amin!

Tăkarde ta tăzzarăt iktăb Exya

Ŷisa a-s Măjrăd wa isidurăn

¹ Wa t-illăn a-s wăr t-illa a t-illan ihakkăn tămudre ta tăxlălăt, nəsł'-as s-timəzzujen-nănăx, nənhay-t s-tiṭṭawen-nănăx, năzjəzz'-e, nəḏăs-t s-ifassăn-nănăx.

² Tămudre-ten-dăx, tănfalăl-anăx-dd, nənăy-tăt, nămoos tjuhawen-net i-ad-hawăn-năj isălan-net, təlmədăm a-s tămudre ta tăxlălăt s-kăla t-təlla xur-Abba, əsnăfalăl-anăx-tăt-dd.

³ A-wa nənăy d-a-wa s-nəsłă, nəsixul'-awăn-t i-ad-tahərəm dăr-năx kăwănəḏ-dăx tassaxt ta nohăr d-Abba d-Rure-sŶisaĂlmasex.

⁴ A-wen-dăx a săr-năx dd-orăwăn derhan n-ad-hawăn-in-nəktəb tăkarde-ta-dăx i-ad-tumas tedăwit-nănăx, tedăwit təmdat.

Măssinăx ənnur a əmoos.

⁵ Əntəneḏ da isălan wi s-nəsłă xur-Ŷisa Ălmasex hawăn-nəsixul: Măssinăx, ənnur, wăr t-illa a osax d-tihay.

⁶ Afăl nənna nosax dăr-s uhən-dăx năllil tihay, inəsbuha wăren oher hărăt d-tidət a nămoos.

⁷ Măšan, afăl nărjaš dăx-ənnur s-əmmək wa s-dăx-s izzăx ənta iman-net, dihen ad-tətbət tassaxt ta n-jere-năx năkkăneḏ-i n-imumənăn, isəşdəj-anăx daş ašni n-Rure-s, Ŷisa, dăx-e d t-illăm abăkkəḏ.

⁸ Afăl nənna wăr hanăx-werăn ibăkkəḏăn, iman-nănăx xas a nəsaswad, wăr nənna tidət.

⁹ Măssinăx, iydal, oşad: afăl săr-s dd-năsfăkkăr ibăkkəḏăn-nănăx, ad-hanăx-tăn-in-əns, isəşdəj-anăx dăx-e d t-illăm iba n-iqqud.

¹⁰ Afăl nənna wăr kăla-nămeşăl abăkkəḏ, ad-năj Măssinăx ənəsbahu ed wăla a-wa innă dăx-măjrăd-net, nəsibăggăt-t.

2

Ŷisa Ălmasex a-s ənabdid-nănăx

¹ Ilyadăn-in, isălan-wi-dăx, kattăbăx-awăn-tăn-in i-ad-wăr həkkəm iman-năwăn abăkkəḏ. Kunta daş oḏa iyyăn dăx-wăn dăx-abăkkəḏ, nəla ənabdid xur-Abba, a t-əmoosăn ŶisaĂlmasex-i oşadăn wăr-iwer abăkkəḏ.

² Ənta a ikfăn iman-net i-ad-hanăx-umas takute ta hanăx-jarrăwăt tenăşşe n-ibăkkəḏăn-nănăx; a-wen wădden năkkăneḏ xas a-s t-ija, ij'-e i-kăl-əddunya təmda.

Amişəl n-a-wa innă Măssinăx

³ Aşămol n-təməzzuyt-nănăx i-Măssinăx, a t-əmoosăn amişəl-nănăx i-fərəḏăn-net.

⁴ Ere innăn izzay Măssinăx uhən-dăx wăr iṭṭef alămărăn-net, ənəsbahu wărăn oher hărăt d-tidət a əmoos,

⁵ məšan, əwadəm wa itamaşalăn tənna n-Măssinăx, təmdă-dd tărha n-Măssinăx s-ulh-net, ənta-den-dăx a-wa isalmadăn a-s nosax d-Măssinăx.

⁶ Ere innăn osax d-Măssinăx hărăt, adiş, iṭṭefet amişəl n-erhet n-Măssinăx s-əmmək wa s-t-əmeşăl Ŷisa.

⁷ Imărhan-in, wădden isălan n-alămăr əynayăn a făl hawăn-in-kattăbăx, ənn-ak, alămăr s-əru-dăx, xur-eşaf n-hărăt iket-net, ill'-e; alămăr-en, a t-əmoosăn, məjrăd n-Măssinăx wa s-əru d-has-təslăm.

⁸ Hakd a-wen-däx, a-wen, wär hin-ikkas a-s alämär wa hawän-in-kattäbäx, alämär äynayän a ämoos. Alämär, s-tidöt-net, äsnäfaläl-tät-dd Ÿisa, täsnäfaläläm-tät-dd dax käwäneḍ fäl-a-s tihay, tilömnät-in, ad-dd-itimlowlöw ännur wa n-tidöt däx-edägg-näsnät.

⁹ Ere innän önta izzax däx-ännur wa n-Mässinäx, a-s ija a-wen, okäḍ d-änḡa-s däx-äddin, äwadöm-en, iha tihay härwa.

¹⁰ Ere wa irhän äḡa-s däx-äddin, ih' ännur, wär t-dd-e-ifäl a-s äšnämäšräy äḡa-s, isiḍöw-t däx-abäkkad

¹¹ mäšan, ere okäḍän d-änḡa-s däx-äddin, iha tihay, irjaš däx-tihay, wär-issen e-s ikka ed, ärmasnät-t tihay.

¹² Ilyadän-in, isälan-wi-däx, kattäbäx-awän-tän-in ed ibäkkadän-näwän, inš'-awän-tän-in Mässinäx däx-idöm n-isöm n-Ÿisa.

¹³ Käwäneḍ-i n-abbatän däx-äddin, kattäbäx-awän-in ed tözayäm

Wa t-illän härwa wär t-illa a t-illan, kattäbäx-awän käwäneḍ-i n-imawaḍän ed, təkrašäm ašäl fall-Iblis-i n-Anämsod.

¹⁴ Kattäbäx-awän-in käwäneḍ-i n-aratän-in däx-äddin ed, tözayäm Abba.

Əktabäx-awän käwäneḍ-i n-abbatän ed tözayäm Wa t-illän härwa wär t-illa a t-illan, əktabäx-awän-in käwäneḍ-i n-imawaḍän ed, iməşsuha ətḡafnen s-särho mäjräd n-Mässinäx däx-ulhawän-näsän a tämoosäm, təkrašäm ašäl fäll-Iblis-i n-Anämsod.

Tuksəḍa n-Mässinäx, wär tidaw d-tärha n-wälät-äddunya

¹⁵ Wär tärhem äddunya wäla a-wa la äddunya. Ere irhan äddunya, wär ha tärha n-Abba ulh-net

¹⁶ fäl-a-s, a-wa la äddunya iket-net, jer-əttəkəbru wa n-derhanän wi läbasnen n-taxəssa wäla əttəkəbru wa n-derhanän wi n-tiḡḡawen d-adkul n-iman däx-əttəkəbru wa dd-tirəw terše n-wälät äddunya, wädden Abba a dd-ifal, äddunya a dd-ifal.

¹⁷ Tidöt önta da: äddunya, ilkam iba-net önta d-izəjraz-net mäšan, äwadöm wa itamašälän erhet n-Mässinäx, iḡlal.

Imiksänän n-Älmasex

¹⁸ Ilyadän-in, ajilal n-äddunya a nəha. Wädden təslam a-s ilkam Äddäžžal† wa n-ämiksän n-Älmasex? Ärheex ad-käwän-səlmədäx härwa ämära-däx, a-s osän-dd äddäžžälän n-imiksänän n-Älmasex äjjootnen. Ənta-den-däx ašämol wa hanäx-isalmadän a-s ajilal n-äddunya a nəha.

¹⁹ Äddäžžälän n-imiksänän n-Älmasex-en, a-s t-əllan jere-näx wär t-illa a-s hanäx-han ed, ənnär ämoosän härät däx-näx, wär hanäx-həkkən iroriyawän-näsän. Ašäl-i, fälän-anäx i-ad-dd-infiləl a-s iket-näsän, wär-ämoosän härät däx-näx.

²⁰ Käwäneḍ iket-näwän, təssanäm a-wa ämoosän tidöt ed ikf'-iwän Wa n-Eməššeddəj, Unfas Šäddijän.

²¹ Ÿas, akätab wa hawän-in-jex, wär hawän-t-in-jex däx-tössəba n-a-s innin wär təssenäm tidöt, təssanäm-tät, təssanäm dax a-s wär t-illa əmmək s-dd-izjär bahu tidöt.

† 2:18 2:18 Ämakšar, ašanjo d-eməkkennəs n-Älmasex.

²² Ak äddäzzal-wa-däx n-ämiksän n-Älmalsex-i-däx fäw, mi t-ämoosän? Adiš ämoos-t ere wa innän a-s Yisa wädden ənta a-s Älmalsex, ənta-den-däx äddäzzal n-Älmalsex wa wärän irða s-Abba wäla Rure-s.

²³ Ere wa wärän irða a-s Yisa, Rure-s n-Mässinäx, wär-irða dax s-Abba; ere wa iqbalän Rure-s n-Mässinäx, iqbal dax Abba.

²⁴ Kāwāneḍ, a-wa s-təslām ašāl äzzarän d-tomänäm s-YisaÄlmalsex däx-ulhawän-nāwän, ətṭəfät-t. Afäl təṭṭäfäm däx-ulhawän-nāwän a-wa s-təslām ašāl äzzarän d-tomänäm s-Yisa, ad-tətbət tassaxt-nāwän d-Rure-s n-Mässinäx hakd Abba.

²⁵ Ənta da ärkāwāl wa hanäx-ijjäs Älmalsex, inn'-anäx: «Näkk, hakkäx-kāwän tāmudre ta täxlälät.»

²⁶ Yas, akātab wa hawän-in-jey, i n-ad-kāwän-səmmətäräx d-ad-təjəm ənniyät i-äddinät-wi tattärnen ašəšk-nāwän,

²⁷ səktəwäx-kāwän-dd dax a-s, Älmalsex, issänxäl Unfas-net fälla-wän. Yas, šamad iha Unfas-net ulhawän-nāwän, adiš wär tämṭatäräm s-ad-kāwän-isäxär əwadəm wäl' iyyän, änn-ak Unfas-en-däx a kāwän-madän-isäxär härät iket-net. A-wa isaxra dax ənta, ädduuttät a-s wär t-ihā bahu, yas, mašälät a-wa kāwän-issäxra Unfas däx-isälan n-tartit-nāwän d-Älmalsex.

²⁸ Ämāra-hi ilyadän-in, ṡaymät tosaṡäm d-Älmalsex i-ad nudabät tebädde data-s ašäl wa dd-mad-infiləl ed ad-hanäx-ijrəw nəṭṭaf immun, dihen, wär mad-nəmmujrəz, wär mad-nəkrukəḍ.

²⁹ Šamad təssanäm a-s Älmalsex oṡad, adiš, əlmədät dax a-s ere itamašalän a oṡadän iket-net, ara n-Mässinäx a ämoos.

3

A-wa dār-olāh əlxal n-äddinät əzzäynen Mässinäx

¹ Ənhəywät ṡas təmṡäre n-tärha ta hanäx-ija Abba, tärha ta t-täwwäyät har hanäx-ija isəm: «Aratän-nin,» ənta-den-däx dax a-wa nämoos. A-wen-däx a fäl wär hanäx-fəhhəmän käl-äddunya ed wär-əzzeyän Mässinäx.

² Imärhan-in, tidət-däx a-s aratän n-Mässinäx a nämoos ämāra-däx, māšan, a-wa s-ilkam ad-t-numas, wär dd-änfaläl härwa; nəssan ṡas a-s ašäl wa dd-mad-iqqəl Yisa, ad-dār-s naläh ed ad-t-nənhəy ənta iman-net s-əlxal wa iha ämāra-däx.

³ Ere ijärän äṭṭama n-a-wen-däx-däx, adiš, išəşdəjet iman-net s-əmmək wa s-Yisa iman-net, šäddij.

Iba n-ihuk n-iman-net i-abäkkəḍ, färəḍ

⁴ Ere itamašalän abäkkəḍ, ilmədet a-s änimäšräy i-alämär n-Mässinäx ed abäkkəḍ, tanməšrayt i-alämär n-Mässinäx.

⁵ Təssanäm dax a-s YisaÄlmalsex, osä-dd i-ad-ikkəs ibäkkəḍän fäll-äddinät, ənta, wär t-illa abäkkəḍ t-iwarän.

⁶ A-wen-däx a fäl ere osayän d-Yisa härät-däx, adiš, ibdəwet d-abäkkəḍ fäl-a-s ere wärän izzey Yisa, wär t-illa a ijarah däx-isälan-net, a ihakkän iman-net abäkkəḍ.

⁷ Ilyadän-in, wär kāwän-išinməšrəyet əwadəm wäl' iyyän. Ere itamašalän iqqud, oṡad ed Älmalsex-i s-ilkäm, oṡad,

⁸ māšan, əwadəm ikfan iman-net abäkkəḍ, Iblis a t-ilän, Iblis dax, ənta a äzzarän s-abäkkəḍ. Rure-s n-Mässinäx, Yisa, osä-dd i-ad-išäxšəd fäll-Iblis a-wa itamašal.

⁹ Əwadəm, e-d ämoos ara n-Mässinäx, ad-əbas olwa däx-abäkkəḍ ed ikf'-e Mässinäx tärna-net, ad-əbas ikfa iman-net abäkkəḍ ed ara n-Mässinäx a ämoos.

¹⁰ Ənta-den-däx a-wa ibḍän aratän wi n-Mässinäx d-wi n-Iblis. Ere wärän itəjj a oṡadän meṡ ere wärän irha äṅṅa-s däx-äddin iket-net, a-di, wär-ämoos ara n-Mässinäx.

11 Isälan wi fälla-näx dd-äzzubbätnen härwa s-tizarät, ätwänn'-anäx däx-sän: «Nëmärhät jer-iman-näwän.»

12 Wār nētilāhet d-Kayin-i däx-innähäd Iblis har ij'-iman n-änḡa-s. Mafäl ij'-iman-net? Ij'-iman-net fäl-a-s ənta Kayin, imojjan-net ilābasnen, a-s ija a-wen wi n-änḡa-s, i oḡadnen.

Tārha ta tänihäjjät jer-änḡatän

13 Ayətma-ḡ, mikḡaw wa dār-wän jän käl-äddunya, wār-itäqqānet iḡāfawän-näwän.

14 Näkkäneḡ, nössan a-s nönkär-dd däx-tamättant, nējjaš tämudre. Tä mudre-en, ašamol-net, tārha-ta nēja i-ayətma-näx däx-äddin. Ere wārän irha ayətma-s däx-äddin, enəmmettən härwa a ämoos.

15 Ere okäḡän d-änḡa-s däx-äddin iket-net, emäjj n-iman a ämoos, tössanäm a-s wār t-illa emäjj n-iman ijrawän tämudre ta täḡlälät.

16 ḲisaÄlmasex, ikfä tämudre-net däx-tössəba-nänäx. A-wen däx a fäl, näkkäneḡ-däx, iwar-anäx ad-näkf tämudre-nänäx i-ayətma-näx däx-äddin.

17 Afäl inhäy ähaləs n-amärrəzäx äḡḡa-s däx-äddin ämiḡatärän, wār has-oḡen tähanint, əndek əmmək wa s-mad-änn ha tārha n-Mässinäx ulh-net.

18 Ilyadän-in, wār bäddädet tārha-nänäx ḡur-mäjräd d-täzude n-iləs ḡas, tumaset tārha-nänäx, tārha n-tidət ässiitbätän imojjan-nänäx.

19 Emmək-wen-däx a-s mad-nəlməd a-s təl'-anäx tidət, əmmək-wen-däx daḡ a-s mad-ismaḡän ulhawän-nänäx dat-Mässinäx

20 fäl-a-s, kunta sawärän-anäx ulhawän-nänäx uḡlem, Mässinäx ojar ulhawän-nänäx, wār t-illa daḡ a has-idrajan.

21 Imärhan-in, kunta wār hanäx-äswärän ulhawän-nänäx uḡlem, adiš, wār t-illa a hanäx-madän-isärmäx dat-Mässinäx,

22 dihen ad-däx-s nöttär-däx, ad-hanäx-t-äkf ed nəḡḡaf alämärän-net, nətamašal a-wa irha.

23 Mässinäx, ənta da a-wa fälla-näx ifräd: namənet s-Rure-sḲisaÄlmasex, nənmärhet jer-iman-nänäx s-əmmək wa s-fälla-näx-t ifräd Älmasex.

24 Ere wa itamašalän alämärän n-Mässinäx, osax d-Mässinäx, osax dār-s daḡ Mässinäx; Unfas Šäddijän wa hanäx-ikfa a hanäx-isalmadän a-s nosax d-Mässinäx.

4

Bahu, wār-itäqqəl tidət

1 Imärhan-in, he käwāneḡ! Wädden ere dd-iggädän inn'-awän Mässinäx ad-t-dd-äšimašälän, təfləsäm-t. Arəmät-tän iket-däx-näsän təzzar, tössənäm tayətte-näsän Mässinäx a dd-təfal meḡ a dd-əkkašän ḡas däx-iḡāfawän-näsän. A-wen, janneḡ-awän-t i-ad-təlmədäm a-s äddunya-ta-däx, əbsayän däx-s ännäbitän n-bahu äjjootnen.

2 Ənta da tamätart ta käwän-madät-səlməd a-s äddinät-en, Unfas Šäddijän n-Mässinäx a tän-ihan meḡ: e d t-illäm äwadəm äjjəyhän a-s ḲisaÄlmasex osä-dd äddunya däx-taḡəssa n-ägg-adəm, Unfas n-Mässinäx a t-ihan,

3 mäšan, äwadəm iket-net äkkuddälän ass n-Ḳisa Älmasex i-äddunya iqqal ägg-adəm, wār t-ihä Unfas n-Mässinäx, Unfas wa n-äddäzzäl a t-ihan. Äddäzzäl n-Älmasex-en, təsläm a-s imal-dd, ässiilmädäx-käwän ämära a-s ijjaš-dd äddunya.

4 Käwāneḡ-i n-ilyadän-in, Mässinäx a käwän-ilän, təkrašäm daḡ tärna fäll-ännäbitän wi n-bahu fäl-a-s Unfas wa käwän-ihän irna Unfas wa ihän käl-äddunya.

5 Ännäbitän-en n-bahu, mäjräd wa n-äddunya a tajjän, täsijäd-asän daḡ äddunya ed, terše a tän-təja

⁶ māšan, näkkäneḍ Mässināḡ a hanāḡ-ilän. Ere wa äksuḍän Mässināḡ, ad-hanāḡ-isəjəḍ, ere wa wārän äksuḍ Mässināḡ, wār hanāḡ-mad-isəjəḍ. A-wen-dāḡ a hanāḡ-isalmaidän Unfas wa ilkamän i-tidət d-Unfas wa išənməšrəyän äddinät.

Mässināḡ, emārḥ

⁷ Imārhan-in, nənmārhet jer-iman-nänāḡ ed tārha Mässināḡ a dd-təfāl, ere wa s-təha tārha ulh-net, ara n-Mässināḡ t-izzayän a ämoos,

⁸ ere wa s-wār ha tārha ulh-net, wār izzey Mässināḡ ed Mässināḡ emārḥ.

⁹ Ēnta da əmmək wa s-hanāḡ-dd-äsnāfaläl Mässināḡ tārha ta hanāḡ-ija: äšmašäl-dd Rure-s wa n-iyän s-äddunya i-ad-hanāḡ-umas əssəbab n-tämudre.

¹⁰ Ēnta da a-wa äsidätten tārha ta hanāḡ-ija Mässināḡ: wädden näkkäneḍ a t-ärhänen s-tizarät, ənta a hanāḡ-irhän s-tizarät ed äšmašäl-dd sār-nāḡ Rure-s i-ad-umas takute hanāḡ-madät-təjrəw tenäšše n-ibäkkadän-nänāḡ.

¹¹ Imārhan-in, šamad Mässināḡ, ij'-anāḡ tārha togdähät d-a-wen-dāḡ, adiš, näkkäneḍ-dāḡ, iwar-anāḡ ad-nənmārḥ jer-iman-nänāḡ.

¹² Wār t-illa ere s-käla inhäy Mässināḡ māšan, afäl nänmārha jer-iman-nänāḡ, ad-dd-iddək ulhawän-nänāḡ, isənnəfiləl daḡ tārha-net dāḡ-nāḡ s-əmmək itbatän.

¹³ Unfas Šaddijän wa hanāḡ-ikfa Mässināḡ, ənta a hanāḡ-isalmaidän a-s nosaḡ d-Mässināḡ, osəḡ daḡ dār-nāḡ.

¹⁴ Mässināḡ, äšmašäl-dd Rure-s i-ad-umas Ämaylas n-äddunya. Ämoos a-wen a nənḥay s-tiṭṭawen-nänāḡ, nətilḡut daḡ sār-s.

¹⁵ Ere äjjəyhän a-s Ḳisa Rure-s n-Mässināḡ, osəḡ d-Mässināḡ, osəḡ dār-s daḡ Mässināḡ.

¹⁶ Näkkäneḍ, nəflas tārha ta hanāḡ-ija Mässināḡ ed, Mässināḡ emārḥ. Ere ämoosän emārḥ iket-net, osəḡ d-Mässināḡ, osəḡ dār-s daḡ Mässināḡ.

¹⁷ Afäl tətbat tārha-nänāḡ i-Mässināḡ dāḡ-ulhawän-nänāḡ, wār-mad-närmāḡ ašäl wa ilkamän fäl-a-s, ad-nāj dāḡ-äddunya-ta-dāḡ tämudre tolähät d-ta dāḡ-s ija Ḳisa.

¹⁸ Tārha d-tuksəḍa, wār tidawnät ed, tārha, wār təyy edägg i-tuksəḍa. Ḳas, ere s-wār ha ar tuksəḍa ulh-net, a-di tārha a wārät ha ulh-net ed, tuksəḍa wār təjj ar dāḡ-təssəba n-tisnant təlkamät.

¹⁹ Näkkäneḍ, ha tārha ulhawän-nänāḡ ed, Mässināḡ a hanāḡ-irhän s-tizarät.

²⁰ Ere innän: ärḥey Mässināḡ, a-s ija a-wen äššunjät äṅṅa-s dāḡ-äddin, a-di anəsbahu a ämoos fäl-a-s käyy, kunta äṅṅa-k wa t-illän dat-tiṭṭawen-nāk, hannäyäd-t, wār t-tārḥed, ma isalmaidän s-tārha-nāk i-Mässināḡ-i wār hənnəyäd?

²¹ Alämär wa hanāḡ-dd-oyyä ḲisaÄlmaseḡ, ənta da: «Ere innän irha Mässināḡ, adiš ärḥet daḡ äṅṅa-s dāḡ-äddin.»

5

Isälan n-immun wa wār-ihə äššäk

¹ Ere omänän a-s Ḳisa a-s Älmaseḡ, ara n-Mässināḡ a ämoos, ere irhän amärəw adiš ad-ärḥ daḡ arätän-net.

² Ēnta da a-wa hanāḡ-isalmaidän a-s nārḥa arätän n-Mässināḡ: tārha ta n-Mässināḡ d-amışəl n-alämärän-net.

³ Ere innän irha Mässināḡ, adiš, ämašälet daḡ alämärän-net; alämärän-net daḡ, wār sār-nāḡ jen ezəwe-wen-dāḡ.

⁴ E d t-illäm ara n-Mässināḡ, ässiynäy, äddoobät ad-ikrəš ašäl fäll-äddunya. Immun-nänāḡ a hanāḡ-ikfän tärna-ten-dāḡ fäll-äddunya.

⁵ Äddunya-ta-dāḡ, mi fälla-s madän-ikrəš ašäl kunta wädden ere wa omänän s-Ḳisa wa n-Rure-s n-Mässināḡ?

⁶ Үйса, Өнта а dd-äšmašäl Mässinäx s-äddunya i-ad-itwəsəlmäx däx-aman, inxäl ašni-net, ämoos takute. Wär dd-ijješ äddunya i-ad-itwəsəlmäx xas, ijjäš-tät-dd i-ad-itwəsəlmäx däx-aman, inxäl ašni-net i-ad-umas takute. A-wen, tajuhe hanäx-ija Unfas Šaddijän-i wärän ijənn a säl tidət.

⁷ Ämära, kărăđät tjuhawen a ässitbätnen a-wa ämoos Үйса:

⁸ Unfas n-Mässinäx, aman-wi-däx ätwäsälmäx d-ašni-net wa inxälän a-s ämmut. Tjuhawen-tin-däx, tikkäräden, iyyän n-emm a oharnät däx-a-wa ämoos Үйса.

⁹ Үнта-den-däx tajuhe ta ija Mässinäx fäll-Rure-s. Tajuhe ta n-Mässinäx, tojär ta n-dägg-adəm-i s-hanäx-räqqis ad-tän-nəfləs.

¹⁰ Ere omänän s-Rure-s n-Mässinäx däx, ad-isətbət tajuhe-ten-däx mäšan ere wa wärän omen s-tajuhe n-Mässinäx, ija Mässinäx anəsbahu ed, wär-omen s-tajuhe-ta ija Mässinäx fäll-Rure-s Үйса.

¹¹ Tajuhe-en, ätwänn'-anäx däx-s a-s: Mässinäx, ikf'-anäx tämudre ta täxlälät. Tämudre-en, ikf'-anäx-tät däx-idəm n-Rure-s,

¹² ere omänän s-Rure-s n-Mässinäx, ijraw tämudre-ten-däx, ere wärän sār-s omen wär tät-mad-ijrəw.

Ättäma wa hanäx-äsjär Үйса Älmasex

¹³ Isälan-wi-däx hawän-in-əktäbäx däx-täkarde-ta-däx, əktäbäx-awän-tän-in i-ad-käwän-səlmədäx käwäned-i omännen s-Rure-s n-Mässinäx Үйса a-s təjrawäm tämudre ta täxlälät.

¹⁴ Fella-nänäx xur-Mässinäx, Өнта da: Nəssan a-s Mässinäx, äsijäd-anäx, afäl a-wa däx-s nətattär, wär-änmäšräy i-erhet-net.

¹⁵ Šämad nəflas a-s äsijäd-anäx, e-d t-nədäl-däx, adiš, nəflas a-s a däx-s nəttär-däx, ad-hanäx-t-äj.

¹⁶ Ere däx-wän inhäyän äñña-s däx-äddin har ämešäl abäkkad wärän išəkš temse, ittäret-as däx-Mässinäx i-ad-has-änš, ad-has-änš. A-wen, өннех-tän fäll-ibäkkadän wi wären šəkš temse fäl-a-s, ill'-e abäkkad išaksen temse; wen, wär hawän-jөнney ad-tədələm Mässinäx däx-təssəba-net.

¹⁷ Iba n-iqqud, abäkkad mäšan, өllan-t ibäkkadän wären šəkš temse.

¹⁸ Nəssan a-s ara n-Mässinäx, wär ihəkk iman-net abäkkad ed, oğaz-t Rure-s n-Mässinäx i-ad-fälla-s wär-ikreš Iblis-i n-Anämsod ašäl.

¹⁹ Näkkäned, nəssan a-s Mässinäx a hanäx-ilän, nəssan dağ a-s äddunya-ta-däx iket-net, ännihäd däx-s Iblis.

²⁰ Nəssan a-s Rure-s n-Mässinäx, osä-dd äddunya, ikf'-anäx tayette-ta hanäx-madät-suksəd Mässinäx wa s-Өнта xas d-Rure-s ҮйсаÄlmasex a-s өssəbab n-tassaxt ta dār-s nəja. Үнта a-s Mässinäx, Өнта a ihakkän tämudre ta täxlälät.

²¹ Ilyadän-in, ağəzät iman-näwän däx-älyibadät n-äššanämän a ämoosän-däx. Amin!

Täkarđe ta s-sänatät iktäb Exya

Äšqjəš

¹ A-wa näkk wa n-änušäm hin-iktabän i-Kərya ta äsnäfrän Mässinäx ənta d-aratän-net wi s-tärha ta n-tidət a hasän-jex, wädden daɣ näkk ɣas a hasän-ijan tärha-ten-däx, irh'-en daɣ e d t-illäm ere issanän fäll-tidət ta dd-fälät Mässinäx.

² Tärha a-wen jat fäll-tidət ta häť ulhawän-nänäx, wär-ilkem daɣ ad-tän-təzjar.

³ Ähuuläx-käwän-in, əttaräx däx-Abba Mässinäx d-Rure-s, ƳisaÄlmasex, a käwän-ikfän ännuxmät, tähanint d-älxer i-ad-näqqayəm nətəf tidət-net d-tärha-net.

Tämudre täsidäwät tidət d-tärha

⁴ Äsidäwät-ahi hullan ahänay wa jex n-a-s härät däx-aratän-näm, əlkamän i-tidət s-əmmək wa s-hanäx-äsmätär Abba d-a-wen.

⁵ Ämära temärhit-in Kərya, ənta da a-wa däx-m ärhey: wär ham-in-kəttəbäx alämär äynayän, alämär wa ham-in-kattäbäx, äru d-fälla-näx t-dd-äzzäbbät Mässinäx, inn'-anäx: «Nəmärhät jer-iman-näwän.»

⁶ Tärha, amišəl n-a-wa innä Mässinäx, alämär daɣ wen-däx, äru d-has-təsläm, äddälil-net daɣ, i n-ad-tənmärhəm jer-iman-näwän.

Iməkkerrəsän wi hänen äddunya

⁷ Äddunya-ta-däx, əjjäšan-tät-dd iməkkorras äjjootnen wären əqbel a-s ƳisaÄlmasex, ijjäš-dd äddunya däx-taɣəssa n-ägg-adəm. Ere s-təsled ijanna a-wen-däx, təlmədäd a-s eməkkerrəs d-äddäžžal n-Älmasex a ämoos.

⁸ He käwäned! Wär-itäbäytalet älxidmät wa nəja jere-wän, änn-ak, əhəlät s-data däx-a-wa s-tomänäm i-ad-təjrəwäm marušät-net.

⁹ Ere änmäšräyän i-tənnä n-Älmasex, unjäy itəf teɣäre-net, əlmədät a-s änimäšräy i-Mässinäx mäšan, ere wa itämašalän tənna-net, itəf teɣäre-net, osax d-Abba, osax daɣ d-Rure-s.

¹⁰ Ere käwän-in-osän s-wädden teɣäre-ten-däx n-Ƴisa a iwway, wär has-torem ehän-näwän bäršex ad-där-s tahərəm isofan i-ad-täqqəsäm i-a-wa ijänna.

¹¹ Ere has-orän ehän-net, ad-där-s itinməjj isofan, ad-där-s ahär ibäkkadän-net.

¹² Ill'-e a äjjeen s-ärhey ad-hawän-t-in-əktəbäx mäšan, wär-äddobex ad-hawän-t-in-səssiwədəx s-älkaɣ d-täddäwät. Jaräx ätəma n-ad-käwän-in-asäx, ämmäjrädäx awän näkk iman-in, umas-anäx a-wen-däx iket-net əssəbab n-tedäwit təmdat.

¹³ Ähuulän-käm-in möddana-s n-wälätma-m däx-äddin ta n-diha-däx äsnäfrän Mässinäx. Amin!

Täkarde ta s-käradät iktäb Exya

Äsqjës

¹ A-wa näkk wa n-änušäm hin-iktabän i-Gayës wa s-tärha ta n-tidöt a has-jey.

² Emärh-in, öttaräx däx-Mässinäx ad-däx-k wär-ija härät, aläh ässexät-näk d-äššahät wa s-itəhhal immun-näk s-data.

³ Äsdäwät-ahi hullan ass wa hi-dd-jän ayətma-x däx-äddin käy-dd-falnen, omälän-ahi iket-däx-näsän iqqud wa jed däx-tidöt d-alkum wa jed i-tidöt.

⁴ Äywa, näkk, wär t-illa a sār-i irnan tedäwit n-ad-salläx a-s aratan-in däx-äddin, öjlayän s-iqqud däx-alkum i-tidöt.

Tihusay n-tämudre n-Gayës

⁵ Emärh-in, ijraz-ahi hullan a-wa ähusken täjjäd i-imumənän iket-däx-näsän har tawədäd wi n-imäjarän käy-in-tammärnen,

⁶ äjjöyhän iket-näsän dat-älkänisät-ta-däx-nänäx a-s äwadəm irhan äddinät a tämoosäd. Ärheey däx-k ad-hasän-tilaläd härkuk i-ad-udaben asikəl ässimxärän isəm n-Mässinäx

⁷ fäl-a-s, asikəl wa hän, isəm wa n-Älmasex a däx-t-han, unjäyän fäw s-ad-ärmösän tadhölt dd-falät inəzzulam.†

⁸ Iwar-anäx näkkäneḍ-i n-imumənän ad-nədhəl meddön šund-win-däx i-ad-där-sän nohar älxidmät näkkäneḍ-däx i-ad-tənfəš tidöt n-Mässinäx fäll-ärori n-äkall.

Iba n-sārho n-Dəyutrif

⁹ Käla hin-əktäbäx täkarde jəzzuulät i-älkänisät-näwän mäšan, igdäl Dutrif-i irhän täzert däx-härät iket-net asjöd i-a-wa jänney,

¹⁰ ässiilmädäx-käy a-s afäl hin-osex, ad-äläxey i-äddinät iket-däx-näsän tälläbäst ta itamašal d-tizmit ta hanäx-itäjj d-bahutän-wi hanäx-isawär. Təzzar daḡ, wär təmda tälläbäst-net dihen ḡas, ässewäd fäll-a-wen iba n-asəbbärrək n-imumənän-wi hin-tammärnen dihen, igdal daḡ i-imumənän-wi äboknen i-a-wen ad-tän-səbbärrəkän, däx-a-s däx-sän isamähaḍ, ijann'-asän: «Ere tän-äsəbbärrəkän, ad-t-əkkəsäx däx-älkänisät.»

¹¹ Emärh-in, täläw a-wa oläxän wädden a-wa läbasän. Ere itamašalän a oläxän iket-net, u-Mässinäx a ämoos mäšan, ere itamašalän a läbasän, wär-issen s-Mässinäx.

Sārho wa iwärän Dimitrus

¹² Däx-isälan n-Dimitrus, äjjöyhän äddinät iket-näsän fäll-milxaw-net, ilkam i-tidöt, äsidättänät timaşalen-net iqqud-net i-tidöt ta n-Mässinäx. Näkkäneḍ daḡ, näjjöyha a-s oḡad, təssanäd daḡ käyy a-s tajuhe-nänäx, tidöt.

Ajilal n-mäjräd

¹³ Ärheey ad-hak-ännäx härätän äjjootnen mäšan, wär-ärheey ad-hak-tän-äjäx s-täddäwat d-aḡänib

¹⁴ fäl-a-s, jaräx ätṭäma n-ad-käy-in-asäx šik, ədwənnex dār-k näkk iman-in.

¹⁵ Täqqimä-dd däx-älxer. Ähuulän-käy-in imidiwän-näk, tähuuläd-in daḡ imidiwän-nänäx s-iyän iyyän.

† **1:7 1:7** — Yur-käl-Älyähud, ere wärän ämoos ägg-Älyähud s-aläšäl meḡ ere wärän ilkem i-äddin-näsän, iket-net, änəzzalim a ämoos. A-wen-däx a fäl tiwsaten ti iyyäḍnen iket-näsnät, ti n-inəzzulam. — Ašäl-i-däx, änəzzalim, äkafär (ere wärän issen s-Mässinäx).

Täkarde ta iktäb Hudd

Äšajš

¹ A-wa näkk, Hudd, wa n-akli n-ŸisaÄlmasex n-änŸa-s n-Yäqub hin-iktabän i-äddinät wi dd-iyrä Mässinäx-i n-Abba s-iman-net, irh'-en, ogaž-tän däx-tössöba n-Ÿisa Älmasex.

² Äsnädfäs fälla-wän Mässinäx tähanint d-tenäšše d-älxer d-tärha-net.

Inösbuha

³ Imärhan-in, äsdärhänäx hullan ad-hawän-in-öktöbäx däx-isälan n-immun wa nohär, a-wen-däx a fäl hi-iqqäl äššil ad-hawän-in-öktöbäx täkarde-ta-däx i-ad-käwän-sömmötäräx i-ad-tənmänxəm däx-tössöba n-immun wa dd-äzzäbbät Mässinäx s-iyyät fäll-imöššeddejan.

(2 Bətrus 2:1-17)

⁴ Ektäbäx-awän-in fäl-a-s, əjjäšan-käwän-dd meddön n-ilämamasän n-inälläbäsän fäll-wär tössenäm s-äru d-ässewälän ölkötabän däx-äššärexa wa däx-sän ilkamän, safraxän älmäxna n-ännuxmät n-Mässinäx i-ad-hasän-ijrəw a-wen äsaru fäl äsmädasän iman-näsän, əmmək-wen-däx a-s äkkuddälän ŸisaÄlmasex-i n-Emäli n-Ämakraš-nänäx.

⁵ Kud-däx əssanäx a-s a-wa-däx hawän-ässewäläx, təknam-t musnät, ärheex ad-käwän-dd-səktoş əmmək wa s-dd-iyläs Emäli tamötte ta n-käl-Işrayil däx-äkall wa n-Mişra, wi unjäynen omänän sär-s, darät-a-wen, inx'-en kərəf.

⁶ Ektəwät-dd daş änjälosän wi dd-əzjärlen idäggan-näsän, ad-tattärän tärna tojärät ta əjrəwän, ogaž-tän Mässinäx däx-tihay ti n-ider ässuksädnen, han tišəm äxlalnen, äqqalän i-ašäl wa ilkämän mäqqärän.

⁷ Ektəwät-dd daş aşrəm wa n-Sodoma d-wa n-Gomora d-işärman wi n-edes-hasän, ökfän imuzäxän-näsän iman-näsän i-ölkäxbu, jan tanmöšrayt togdähät d-ten-däx jän änjälosän-win-däx, ad-tajjän idubnawän d-a-wärän il' əmmək, äzzäbbät-dd Mässinäx fälla-sän tisanant n-efew ixlalän. A-wa tän-ijrəwän, älmital a ämoos s-hanäx-ikkas Mässinäx däx-taxdärt.

⁸ Ilämamasän-winnin-däx s-hawän-janex, əntäneđ-däx a-wen-däx a tamašalän; iməhhurja əlwayän derhanän-näsän, samädasän iman-näsän, sifəttun däx-tärna n-Emäli d-änjälosän wi ikfa älxurmät.

⁹ Wen-härät wäla Mikaylu-i n-änjälos mäqqärän wär t-ija ed ašäl wa d-iknäs d-Iblis d-tinmöšəkin tafəkka n-ännäbi Mosa, wär t-ikwer Mikaylu, inn'-as şas: «Oyyex-käy s-Mässinäx.»

¹⁰ Mäšan, ilämamasän wi s-hawän-janex, wär tän-išla ar tigəggar n-a-wa s-əžhalän, sikuförän. A-wa əssänän, wär t-əssenän ar s-ulhawän-näsän šund taxsiwen, a-wen-däx daş a sär-sän dd-orəwän əlhəllak.

¹¹ Iməškay, jän tabarät ta ija Kayin, täšnämäšräy-tän tärha n-ažrəf šund a-wa ija Balam, ođä-dd fälla-sän älmäššibät däx-tössöba n-a wa s-äffullägän šund a-wa ija Äkori.

¹² Tämoos tähadra-näsän däx-imjora-nəwän a äsikärakəđän fäl-a-s ed tän-əjjäšan wär t-illa a äheräkken hasän-igdalän täzähhawt däx-wär köttəwän ar iman-näsän. Olähän d-tijäräken wär hen aman äwway ađu, olähän d-ihəškan wären tiirəw kud-däx s-äzzäman n-a-wen, olähän şas d-ihəškan ämmutnen ihənnin-däx s-afäl hin-əttəlbäyän, ad-əjən tamättant ta s-sänatät.

¹³ Änifäqqän d-tinäzzämären n-ējärew äššohätnen, wär tän-išla ar ejer data-sän n-täkuffe n-ijitän-näsän wi äsikarakädnen. Olähän d-etran n-iməššoraj, itwar-asän Mässinäx edägg härkuk däx-ehäđ wa ojarän täkkäwält däx-ihäđan.

¹⁴ Äru fälla-sän äloläy Inuk wa n-ahäya n-Adəm wa s-əssa a-s innä:
«Enhöywät Emäli,

imal-dd ənta d-timərwen n-afdän
n-änjälösän-net wi šaddijnen»

¹⁵ i-ad-išräx dägg-adəm iket-näsän, änx s-äššärexa-net e d t-illäm anäsbäkkad däx-təssəba n-e d t-illäm erk iji jan däx-əffullög wa jän fäll-Mässinäx d-e d t-illäm mäjräd läbasän jan äddinät-ənnin-däx s-wär t-illa a däx-ässimyarän Mässinäx.

¹⁶ Meddən-win-däx, härkuk əkmän-tän iman-näsän, saläqqawän iman-näsän i-ad-hasän-adənän äddinät tähanint, wär-əlkemän ar i-derhanän n-iman-näsän, wär tän-išla ar abərəj dat-äddinät d-təmmal n-äddinät i-ad-däx-sän dd-əkkəsän härat.

Ässas n-immun

¹⁷ Imärhan-in, käwäneđ, wär jem a-wen, xaymät kittəwäm a-wa s-äru d-hawän-t-ənnän inəmmušal n-Emäli-nänäx YisaÄlmasex a-s hawän-jannen:

¹⁸ «Däx-ajilal n-äddunya ad-dd-asən äddinät wären əlkem ar i-derhanän n-iman-näsän käwän-jänen isəđsa.»

¹⁹ Təbəđdawt xas a dd-tirəwän jer-äddinät, wär-əlkemän xas ar i-a-wa hannäyan, wär t-illa a oharän d-Unfas n-Mässinäx.

²⁰ Käwäneđ-i n-imärhan-in, xaymät binnəwäm käwäneđ iman-nəwän təmudrenəwän fäll-äddin-nəwän wa šaddijän, tajjäm əlhimmät s-tärna ta n-Unfas Šaddijän.

²¹ Səntəmät iman-nəwän däx-tärha n-Mässinäx däx-a-s təqqaläm i-ad-kəwän-äkf Emäli-nänäx Yisa Älmasex däx-təhanint-net təmudre ta təxlälät.

²² Adənät təhanint i-äddinät wi jänen ulhawän əssin,

²³ iyyäđ däx-sän, təddoobem ad-tän-dd-təntəšəm däx-temse, təxləsäm-tän; wi iyyäđnen, adənät-asän təhanint, təhanint tärtayät d-tuksəda. Udayät fəw i-anməđas dər-sän kud-däx anməđas d-isəlsa-näsän wi äsmäđäsän s-erk imojjan-näsän.

Təmmal i-Mässinäx

²⁴ I-Wa äddooben ad-kəwän-agəz däx-e d t-illäm iba n-iqqud, isəbdəd-dd-kəwän däx-əlxurmät n-idəm-net wär käwän-iwer əlxib, təknam tedäwit,

²⁵ i-Mässinäx-i s-ənta xas a t-illan, ənta-i n-Ämaylas-nänäx däx-idəm n-YisaÄlmasex wa n-Emäli-nänäx, əlxurmät d-təmyäre d-tärna d-əlxikmät härkuk däx-əzzəmanän iket-näsän jer-wi okäynen wi n-ämära-däx hakd wi dd-malənen. Amin!

Tänäfalilt

Äšqjəš

¹ A-wa tänäfalilt ta dd-äsnäfaläl Mässinäx i-ŶisaÄlmasex i-ad-isəlməd eklan-net isälan n-härätän wi s-išwar jan. Däx-təssəba n-a-wen-däx a fäl sār-i dd-äšmasäl Älmasex änjəlos-net, näkk Exya-i n-akli-net, i-ad-hi-isəlməd s-isälan-win-däx näkk-däx.

² A-wa s-äjjəyhäx iket-net, ənhäyäh-t, ämoosän mäjräd n-Mässinäx d-tidət ta hi-dd-äsnäfaläl Ŷisa Älmasex a hawän-siğuläh diha-däx.

³ Ere iğrän əlkəttab-i-däx däx-iktäb a-wa t-illän d-a-wa ilkämän, äsjäd i-a-wa däx-ässewäl, ad-itamašal a-wa innä, tənḏəḏ-as ed a əndərrän ɣas a hin-äqqimän i-ad-itbət a-wa innä.

Derhan n-Exya i-imumənan

⁴ A-wa näkk Exya, hin-iktabän i-älkänisäten ti n-əssayät hänen teje ta n-Azya. Ähuuläh-käwän-in, ikf'-iwän Mässinäx-i dd-äzzarän, ill'-e, ilkam, ännuymät d-älxer. Daläh unfasän wi n-əssa t-əllänen dat-tasäqqaymut n-Mässinäx ta n-təmmənukəla däx-ad-käwän-äkf ännuymät d-älxer.

⁵ Ikf'-iwän dağ ŶisaÄlmasex-i n-ämaɣdal n-emäjjäyh n-tidət dd-äzzarän tanäkra däx-tamättant, ənta-i n-Ämänokal n-a-wa t-illän däx-imänokalän iwarän ärori n-äkall, ännuymät d-älxer.

Ənta a hanäh-irhan, äsdärfät-anäh däx-ibäkkəḏän-nänäh s-ašni-net wa inğälän a-s ämmut däx-təssəba-nänäh.

⁶ Ənta a hanäh-ijän tawset n-käl-tikutawen, ij'-anäh däx-Təmmənəya-net i-ad-näxdəm i-Mässinäx-i n-Abba-net. Umaset älxurmät d-tärna, i-net härkuk! Amin!

⁷ Ənheywät-ak, imal-dd, äddeew d-tijäräken!

Ad-t-tənhəy e d t-təlläm tiṭṭ,

wäla äddinät wi däjnen tajəzzelt-net s-ajor.

Ad-šoršənät tiwsaten n-äddunya iket-däx-näsnät, əlhənät däx-təssəba-net.

A-wen, ad-äj, wär t-iha äššäk. Amin!

⁸ Innä Emäli Mässinäx-i ilän tärna iket-net: «*«Näkk a-s Tizarät, näkk a-s Tilkamät»*,† ənta a dd-äzzarän, ill'-e, ilkam.»

A-wa dd-äsnäfaläl Mässinäx i-Exya

⁹ A-wa näkk, Exya wa n-əñṇa-wän däx-äddin dār-wän oharän tizzurt d-Təmmənəya ta n-Mässinäx d-tebädde däx-älɣizabät däx-təssəba n-Ŷisa. Äzzäman wa d-əttärmäsäh, ämewäh, əjjäšäh takärmüt däx-awtəl wa n-Batmus däx-təssəba n-iqqud wa jeɣ däx-iji n-isälan n-mäjräd n-Mässinäx d-tajuhe ta täjjäh fäll-Ŷisa.

¹⁰ Ašäl iyyän n-älxad-i n-ašäl wa n-Emäli, irmäs-ahi Unfas Šaddijän, əsleɣ i-eməsli-i-däx äššoohen hi-olähän d-i n-täsinsäxt ḏar'-i

¹¹ hi-innän: «*Əktəb a-wa hännähäd däx-əlkəttab, səssiwəḏäd-t-in älkänisäten ti n-əssayät n-teje ta n-Azya hänen iğərman wi n-İfäsus d-Smirna d-Birɣamus d-Təyatir d-Sardas d-Filadäfyä d-Läwdisa.*»

¹² Äšnähšlämäh ḏar'-i i-ad-ənhəyäh ere wa hi-ässewälän. Əkyädäh, ənhäyäh əssayät tiftəl n-oräh

† **1:8 1:8** Däx-Tälyunanit, itawänna i-Tizarät: Älfa, itawänna i-Tilkamät: Omega.

¹³ jer-ibdad ere olähän d-ägg-adəm. Ilsä emäls has-t-illan ħur-iđarän, ijbäs s-taməntəka n-oräx.

¹⁴ Jan amzadän-net təmölle n-tikunen, olähän ħas d-täđuft wär-inxes härät, izajjār-dd ännur olähän d-imämmälän n-efew tiṭṭawen-net.

¹⁵ Jan iđarän-net asmäxmäx wa itäjj daroħ täššiišdäj tahəst təzzar izzəzzəwät-t äwadəm; oläh emäslī-net d-i n-aman n-anji ošalnen s-äššahät.

¹⁶ İṭṭaf əssa etran dāx-äfuss-net wa n-aḫil, təzjar-dd tākoba s-əmsädän imawän-net issənän emm-net, ija idəm-net asmäxmäx wa täjj täfukt n-tarähut.

¹⁷ Ənhäyāx-t ħas, heḫ-dd ođeḫ daw-iđarän-net šund ämmuḫ mäšan, äswär-ahi äfuss-net wa n-aḫil, inn'-ahi: «Wär tärmeḫäd, näkk a-s Tizarät, näkk a-s Tilkamät,†

¹⁸ näkk a-s wa iddarän. Tidət, ənhäyāx tamättant mäšan, näkk-da ämära, əddaräx amäḫlol. Näkk a iṭṭafän asäyar wa n-tamättant hakd-däx wa n-älaxärät.

¹⁹ A tənähäyäd-däx, jer-a-wa ijän d-a-wa itajjän d-a-wa ilkämän, əktəb-t iket-däx-net.

²⁰ Etran wi n-əssa hannäyäd dāx-äfuss-in wa n-aḫil d-əssayät tiftəl n-oräx ti hannäyäd, əddaraj mäšan älmäḫna-n-a-wen da: etran, əntäneđ a-s änjälösän n-älkänisäten ti n-əssayät; tiftəl ti n-əssayät, əntänäteđ a-s älkänisäten ti n-əssayät.»

2

Täkarđe ta təkkät älkänisät ta n-İfäsus

¹ Inn'-ahi Үisa:

«Əktəb i-änjälös n-älkänisät ta hät aḫrəm wa n-İfäsus, änn'-as:

‹Inn'-ak wa iṭṭafän əssa etran dāx-äfuss-net wa n-aḫil, irjäšan jer-əssayät tiftəl ti n-oräx:

² Wär hi-ədrejnät timaşalen-näk wäla tiluyyax-näk wäla tebädde-näk härkuk dāx-a-wa hed. Əssanäx a-s wär təşberäd erk äddinät; äddinät-wi jannänen s-bahu a-s əntäneđ inəmmušal-in a ämoosän uhən-däx wär ämoosän a-wen, torämäd-tän, täsfäkkäräd-dd a-s inəsbuha a ämoosän iket-däx-näsän.

³ Əssanäx a-s təbdadäd härkuk dāx-a-wa hed, tənähäyäd aḫäna dāx-təssəba n-isəm-in mäšan, təşbäräd, wär käy-ikkəs a-wen dāx-a-wa hed.

⁴ Hakd a-wen-däx, ikm'-ahi fälla-k härät iyyän: tärha tədi-hi täzzarät s-käla hi-tät-jed, äbas-hi-tät-jed, täqqäläd sär-s.

⁵ A-wen-däx a fäl, əktəw-dd adwəyləl wa s-käla t-jed dāx-dd-tođed, tutabäd, täqqəläd-in timaşalen-näk ti n-ibda. Afäl wär jed a-wen, he-käyy! Maläx-käy-in; afäl käy-in-ogäzäx wär tätubäd, ad-əkkəsäx tefätelt-näk dāx-edägg-net.

⁶ A-wen, wär hin-ikkəs a-s, ijraz-ahi fälla-k mikdaw wa jed d-timaşalen n-käl-Nikula-i dār-jed mikdaw wa dār-sän jeḫ.

⁷ Ere ilän timəzzujen-däx s-islä, isäjdət i-mäjräd wa itäjj Unfas Šäddijän i-älkänisäten.

Wa ikräšan tärna fäll-Iblis d-tändärbaten-net, ad-t-šäksäx aratan n-ahəšk wa n-tämudre ihän älžännät n-Mässinäx.» »

Täkarđe ta təkkät älkänisät ta n-Smirna

⁸ Ätwänn'-ahi qarät-a-wen:

«Əktəb i-änjälös n-älkänisät ta hät aḫrəm wa n-Smirna, änn'-as:

‹Inn'-ak wa n-Tizarät d-Tilkamät,† wa ämmun, iddar-dd,

⁹ əssanäx əmmək wa s-tätwarämäd d-əlläqqu-näk mäšan hakd a-wen-däx, käyy a-s ägg-ehäre wa n-tidət. Əssanäx fäll-tälläbäsen-ti käy-sawarän äddinät wi

† 1:17 1:17 Däx-Tälyunanit, itawänna i-Tizarät: Älfa, itawänna i-Tilkamät: Omega. † 2:8 2:8 Däx-Tälyunanit, itawänna i-Tizarät: Älfa, itawänna i-Tilkamät: Omega.

jannänen s-bahu a-s dāgg-Işrayil a ämoosän, a-s ija a-wen, wär ämoosän ɣas ar ehän n-äddin n-inaxbadän n-Iblis.

¹⁰ Wär käy-isärmæyet älyzabät wa käy-mad-sæknæn. Ad-äj Iblis i äjjootnen dāɣ-wän dāɣ-takärmüt i-ad-tän-iżzurræb s-a-wen-dāɣ, tøjem märaw išilan titwæżzurribäm dāɣ-tæssæba n-äddin-nāwän. Käyy, ætṭæf immun kud-dāɣ hak-t tamättant a-wen. Afäl dd-təzjæräd a-wen, ad-hak-äjäɣ älhäk, takænbut ta n-tämudre täɣlälät.

¹¹ Ere ilän timəzzujen-dāɣ s-islä, isäjdēt i-mäjräd wa itäj Unfas Şäddijän n-Mässinäɣ i-älkanisatän.

Wa ikräşän aşäl fäll-Iblis d-tändärbaten-net, wär-iha mişi n-ad-inhöy tamättant ta s-sänatät.> »

Täkarḍe ta tækkät älkänisät ta n-Birɣamus

¹² Ätwänn'-ahi daɣ:

«Ektæb i-änjälös n-älkänisät ta hät aɣræm wa n-Birɣamus, änn'-as:

<Inn'-ak Wa itṭäfän tækoba ta s-æmsädän imawän-net issenän:

¹³ Èssanäɣ diha d-təzzäɣäd, dihen-dāɣ ad-tækkäs tæmmænukæla n-Iblis ifæklan-net. Intibbas wa n-ämaksad-in n-ämaɣdal-in, ɣur-wän di-dāɣ d-izzäɣ Iblis ad-t-äba. Hakd a-wen-dāɣ, täqqimäd-dd käyy, tosaɣäd där-i, wär täkkuddäläd immun-näk.

¹⁴ Mäşan, ill'-e a ændärrän hi-ikman fälla-k: ællan-t ɣur-k äddinät ætṭafnen tayette ta n-Balam-i ittärän ad-äj äddäbara i-Balak i-ad-ækşøn käl-Işrayil isan n-taɣsiwen ämoosnen takute i-äşşänämän, ækfän iman-näsän i-iba n-täkrakidṭ, ad-zinnun ḍarät-a-wen.

¹⁵ Èllan-t daɣ ɣur-k äddinät s-əjraznät timaşalen ti n-inəṭṭulab wi n-Nikula.

¹⁶ A-wen-dāɣ a fäl, utab iket-di d-käy-in-tisäɣ æknəsäɣ erk äddinät wi käwän-hänen s-tækoba ta hät emm-in.

¹⁷ Ere ilän timəzzujen-dāɣ s-islä, isäjdēt i-mäjräd wa itäj Unfas Şäddijän i-älkänisäten.

Wa ikräşän aşäl fäll-Iblis d-tändärbaten-net, ad-t-äkfäɣ mana,† a-wen, amənsi n-taləmmiṭt wärän ätwäzzäy, äkfäɣ-t tazædt mällät fäll-iktäb isəm äynayän s-wär t-illa ere t-issanän säl ere wa ijräwän tazædt-ten-dāɣ.> »

Täkarḍe ta tækkät älkänisät ta n-Təyatir

¹⁸ «Ektæb i-änjälös n-älkänisät ta hät aɣræm wa n-Təyatir, änn'-as:

<Inn'-ak Wa s-itawänna Rure-s n-Mässinäɣ s-olähnät tiṭṭawen-net d-efew ähijäljälän s-äsimäɣmäɣän idarän-net şund daroɣ äzziizzäwen:

¹⁹ Èssanäɣ fäll-timaşalen-näk d-tärha ta jed i-äddinät d-iqqud wa jed dāɣ-immun sār-i d-əmmæk wa s-tədhäläd tiläqqiwen d-tebädde n-härkuk ta jed dāɣ-a-wa hed. Èssanäɣ a-s timaşalen-näk ti n-aşäl-i-dāɣ, ojärnät ti n-ibda

²⁰ mäşan, ikm'-ahi fälla-k a-wa-s täqbäläd i-tamäḍt ta-s isəm-net Yizabil jännet s-bahu tännäbit n-Mässinäɣ tajjät isälan-net a tämoos, taqqäl i-inaxdimän-in æssæbab n-tanməşrayt ed jarräw-asän s-bahu dāɣ-asəssäɣär-net, tetäte n-isän n-taɣsiwen ämoosnen takute i-äşşänämän, ad-zinnun ḍarät-a-wen.

²¹ Èkfey-tät äzzäman dāɣ-tätub mäşan tunjäy tæbḍa d-ælkäxbu-net.

²² Dāɣ-tæssæba n-a-wen-dāɣ a fäl tät-mad-äjräɣ fäll-isəftaɣ s-tisnant. Afäl daɣ wär-ätubän imidiwän-net wi där-tärtäy dāɣ-ælkäxbu, afäl wär-oyyen amişel n-a-wa hasän-janna, ad-tän-säknäɣ aɣäna ässuuksädän iket-dāɣ-näsän.

²³ Siwəḍäɣ fäll-a-wen-dāɣ iket-net tenäɣe n-aratän-net kæræf. Afäl ija a-wen, ad-əlmədnät älkänisäten iket-näsnät a-s näkk, näkk a issanän a-wa dāɣ-zinəzjumun

† 2:17 2:17 A-wa amənsi wa dd-äzzäbbät Mässinäɣ fäll-käl-Işrayil äzzäman wa d-hän tanəzruft. Itawänn'-as dāɣ Tälyunanit: Mana; itawänn'-as dāɣ-Tämaşäɣt: Taləmmiṭt n-Mässinäɣ.

dägg-adəm d-a-wa sadārhanän. Hak äwadəm, ad-has-äjäx älhäk wa dār-änihäjän ijitän-net.

²⁴ Enney i-äddinät wi iyyädnen hänen älkänisät ta n-aḡrəm wa n-Təyatir, wären ölkem i-a-wa jänn tamädt ənnin-däx, wär-əlmedän a-wa-s itawänna härätän wi n-Iblis ättunkälnen, wär käwän-äswäräx udlem wäl' iyyän.

²⁵ Äknät asəmmөгөгgi däx-immun wa tətṭäfäm har käwän-in-asäx.

²⁶ Wi n-imärnan ällilnen erhet-in har asäl wa ilkämän, ad-tän-səmmönukäläx fäll-tiwsaten,

²⁷⁻²⁸ äkfäx-tän təmmönukəla ta hi-ikfa Abba-nin, səmmönukäläx-tän fäll-tiwsaten,

ədnən-tänät s-äṣṣahät,

əjən-asnät atäxtäx wa itäj äwadəm i-aḡsis irazḡ.

Wa irnän, ad-t-äkfäx tatrit ta n-emäḡär.

²⁹ Ere ilän timəzzujen-däx s-islä, isäjdet i-a-wa ijänna Unfas Šaddijän i-älkänisäten!> »

3

Täkarḡe ta təkät älkänisät ta n-Sardas

¹ «Əktəb täkarḡe i-änjəlos n-älkänisät ta n-Sardas, tənnəd-as:

<Inn'-ak Wa ilän əssa unfasän wi n-Mässinäx d-əssa etran: Əssanäx fäll-timašalen-näk, täseḡäläd äddinät a-s təddaräd a-s ija a-wen, tämmuud.

² Äj ənniyät, sudär-dd a-wa däx-k dd-äqquimän iket-di d-hin-itamättat ənta-däx fäl-a-s, əjrähäx-in a-s imojjan-näk, wär tän-iha-i ilan idəm dat-Mässinäx.

³ Əktəw-dd a-wa tätwäsäḡräd d-əmmək wa s-has-təsled, tämašäläd a-wa hak-ätwännän, tutabäd. Afäl wär jed ənniyät, ad-käy-in-äḡdäräx šund emäkräd s-älwäqq d-wär-iha miši n-ad-jed fäll-a-wen.

⁴ Mäšan han-käwän iyyäḡ däx-Sardas di-däx wären äsmäḡäs imälsan-näsän. Win-hi, ad-əjən isəlsa mällölnen, idawän dār-i ed änihäjän d-a-wen.

⁵ Wa ikräšan asäl fäll-Iblis d-tändärbatən-net, ad-t-sälsäx ənta-däx isəlsa mällölnen, wär hin-e-aməsäx isəm-net däx-əlkəttab wa n-tämudre, äjjayhäx daḡ dat-Abba-nin d-änjəlosän-net a-s äwadəm-en, i-nin.

⁶ Ere ilän timəzzujen-däx s-islä, isäjdet i-mäjräd wa itäj Unfas Šaddijän i-älkänisäten!> »

Täkarḡe ta təkät älkänisät ta n-Filadälfya

⁷ «Əktəb i-änjəlos n-älkänisät ta n-Filadälfya, änn'-as:

<Inn'-ak Wa šaddijän, ädduutten, itṭafän äsäyar n-Təmmönəya ta n-ämänokal Dawəd, ənney: Äwadəm wa s-oreḡ ashär, wär t-illa ere äddoben aḡfal-net-has, wa s-t-äḡfäläx daḡ, wär t-illa ere s-ilkam ad-has-t-ora.

⁸ Əssanäx fäll-timašalen-näk, əssanäx a-s wär təkned əṣṣuhu mäšan hakd a-wen-däx, tətṭafäd mäjräd-in, wär täkkuddäläd isəm-in. A-wen-däx a fäl data-k oreḡ ashär s-wär t-illa ere äddoben ad-t-iḡfəl.

⁹ Ənhəy, ad-käy-äkfäx asäl fäll-ehän n-äddin wa n-Iblis ijännen s-bahu a-s ənta a han dägg-Älyähud wi n-tidət. Äddinät-en-hi, ad-hak-tän-in-sukäx, ärkäḡän data-k, səmḡärän-käy, isəlməd-tän a-wen s-tärha ta hak-jəx.

¹⁰ Käyy, tətṭafäd mäjräd-in, təbdadäd härkuk däx a-wa hed, a-wen-däx a fäl ad-käy-agəzäx näkk-däx däx-ässaxät wa n-tisnant ilkämän däx-äddunya iket-net i-ad-ətwəzzurrəbän dägg-adəm iket-näsän.

¹¹ Maläx-in šik, əhəl iman-näk däx-immun wa tətṭafäd i-ad-wär däx-k itihäx äwadəm wäl' iyyän takənbut ta n-təmmönukəla.

¹² Wa ikräšan ašäl fäll-Iblis d-tändärbaten-net, ad-t-äjäx tämankayt dāx-ehän n-ämudd wa mäqqārän n-Mässi-χ, Mässinäx, wär-ilkem ad-t-izjar. Äwadəm-en-hi, ad-fälla-s əktəbāx isəm n-Mässi-χ, Mässinäx, d-isəm n-aχrəm-net wa mäqqārän, a-wen, Yārussālam ta täynayät dd-e-təflət isənnawän. Äwadəm-wen-dāx, ad-fälla-s əktəbāx isəm-in wa äynayän.

¹³ Ere ilän timəzzujen-dāx s-islä, isäjdət i-mäjräd wa itäj Unfas Šaddijän i-älkänisäten!> »

Täkarde ta təkkät älkänisät ta n-Läwdisa

¹⁴ «Ämära, əktəb i-änjəlos n-älkänisät ta n-Läwdisa, änn'-as:

<A-wa näkk wa s-itawänna: Amin. Näkk a-s emäjjäyh n-Mässinäx wa n-ämaχdal, näkk a dd-əzzarän i-härät iket-net.

¹⁵ Ənnəx: əssanāx fäll-timašalen-näk, əssanāx a-s wär sämmedäd, wär täkkusäd; tiyyät-i-dāx, ismad meχ daχ ukas, ad-hak-in-iššəm a-wen

¹⁶ mäšan šamad, tällimzayed, wär täkkusäd, wär sämmedäd, ad-käy-in-äbsäx.

¹⁷ Janned: Näkk-i-dāx, äbbiχäräx, wär t-illa fäw a hin-ođanāx. Janned a-wen-dāx a-s ija a-wen, wär tössenäm a-s aχāna a hed. Amäskoy käyy, läqqəwäd, dāryäläd, χäluläd.

¹⁸ Äyy-ahi ad-käy-sənnəmhələx: žänš fäll-i oräx äššišdäj efew i-ad-tətbət terše-näk i-ehäre; žänš fäll-i isəlsa mällolnen i-ad-təštäräd; žänš fäll-i tiđrəbba n-asāfar wa n-tiřtawen, səssəfäräd i-ad-təknəd ahänay.

¹⁹ Əlməd a-s näkk, ere ärheχ a sasaχadāx, χattäläx-t i-ad-ilməd s-a-wen. A-wen-dāx a fäl utab, tukasäd dāx-alkum-hahi.

²⁰ Səjəd! Näkk da ibdädän dat-emm n-ehän, takäwkawäχ-t: ere hi-islän, or'-ahi, ad-fälla-s əjjəšäx, ahäräx dār-s, ahär dār-i.

²¹ Wa ikräšan tärna fäll-Iblis d-tändärbaten-net, ad-t-äkfäx turhajät n-ad-dār-s ənχəymäx fäll-tasäqqaymut-in ta n-təmmənukəla, s-əmmək-wa-dāx s-näkk iman-in, əkräšäx fälla-s tärna χas, änχaymäx d-Abba-nin fäll-tasäqqaymut-net ta n-təmmənukəla.

²² Ere ilän timəzzujen-dāx s-islä, isäjdət i-mäjräd wa itäj Unfas Šaddijän i-älkänisäten!> »

4

A-wa dd-änfalälän dāx-isənnawän

¹ Đarät härätän-wi-dāx, əkyädäx, ənhäyäx dāx-isənnawän ashär ämerän. Inn'-ahi emäsli-wənnin s-əsleχ hi-olähän d-täsinsäχt: «Awən-dd, ad-käy-säknäx ämära härätän wi əlkamnen.»

² İdkäl-ahi Unfas Šaddijän älwäqq-wen-dāx s-isənnawän, ənhäyäx dihen tasäqqaymut n-təmmənukəla fäll-äqqiim äwadəm.

³ Äwadəm-en, ij' asmäχmäx wa tajjänät tihun n-tilällaten ti s-itawänna žasəb d-sarədwan. Tasäqqaymut-net ta n-təmmənukəla, äχiläyχäläy-tät azännäzzäl ijan tihusay olähnen d-ti n-tekädäyt ta n-tasämäχmaχt s-itawänna žimrud.

⁴ Ənhäyäx daχ a-s tasäqqaymut-ənnin, äχiläyχäläynät-tät sänatät timərwen n-tasäqqaymut n-təmmənukəla d-əkközät fäll-äqqimän sänatät timərwen n-amχar d-əkköz ässimlälnen, jan iket-dāx-näsän, koronatän, a-wen, tikənbuten n-oräx.

⁵ Tasäqqaymut tənnin täzzarät, zäjjarän-tät-dd essamän d-imäslan d-ejjajän, ärčanät data-s əssayät tiftəl ti äššiwwärnen əssa unfasän wi n-Mässinäx.

⁶ Tasäqqaymut-ənnin-dāx daχ, ill'-e data-s a olähän d-əjärew wa səmmän s-dd-ässikta älmäχna-net təšədje ta n-täšoka. Tasäqqaymut, han-tät əkköz härätän əddarnen änimäχläynen ammas-net. Härätän-en-hi, ämoos data-sän hakd-dāx đarasän, tiđrurəjen.

⁷ Härätän-win-däx eoddärnen, wa äzzarän däx-sän, han-t ifäqqän n-ahär; wa s-össin, han-t ifäqqän n-esej; wa s-käraḍ, oläh idəm-net d-i n-äwadəm; wa s-əkkoz, oläh d-ejäft illayän.

⁸ Härätän ənnin n-əkkoz eoddärnen, hak iyyän däx-sän ila säḍis afrewän əlsanät tiṭṭawen däx-ammäs hakd-däx däx-afälla. Ehäḍ d-ašäl, eṭṭafän əsahäx jannen:

«Emäli Mässinäx,
käyy-i ilän tärna iket-net,
käyy-i t-illän, telled-t, təlcamäd:
Šaddiijäd, šaddiijäd, šaddiijäd!»

⁹ E-d jän əkkoz härätän-win-däx eoddärnen əsahäx-ənnin-däx-däx, timələn əlxurmät, samxarän, tumayän i-ere wa s-ənta a iḅlalän äqqimän fäll-tasäqqaymut ta n-təmmənukəla,

¹⁰ ad-ärkäxän imxarän wi n-sänatät timərwen d-əkkoz dat-wa äqqimän däx-tasäqqaymut ta n-təmmənukəla s-ənta a iḅlalän, aməlän-t, əkkəsän tikənbuten-näsän ti n-təmmənukəla, äjrən-tänät dat-tasäqqaymut, ənnən:

¹¹ «Emäli-nänäx, Mässinäx!
Täniihäjjäd d-əlxurmät
d-semxar d-tärna
ed käyy a dd-ixläkän härät iket-net;
ijjäš-dd a-wen ənniyät-näk xas, jed-t.»

5

Ašəxol n-Mässinäx

¹ Ənhäyäx ḍarät-a-wen däx-äfuss wa n-aḅil n-ere wa äqqimän fäll-tasäqqaymut ta n-təmmənukəla əlkəttab warän ikätəbän fäll-idmawän-net issənän, warän-t daḅ əssa izəzla has-əgdalnen amer.

² Oläsäx daḅ ahänay n-änjəlos däx-wi n-imärnan, ibdad, ijanna s-afälla: «Mi äddoben, änihäjja d-ad-ärz izəzla-wi-däx n-əssa, arr əlkəttab-wa-däx?»

³ Äbä-dd äwadəm däx-isənnawän d-äkall d-ider n-äkall äddooben arr-net, äba-dd wäla ere äddooben asəjrah däx-ammäs-net.

⁴ Ənhäyäx a-s äbä-dd äwadəm orän əlkəttab-ənnin-däx, wäla i issəjrähän däx-s, xas ad-sakäläläx.

⁵ Älwäqq-wen-däx ad-hi-innä iyyän däx-imxarän: «Susəm, wär təlhed! Ənhəy-t-ak ägg-Yähuda wa n-ahär n-ahäya n-ännäbi Dawəd, ikräš tärna, äddoobät teräzze n-izəzla wi n-əssa, arr əlkəttab.»

⁶ Ənhäyäx älwäqq-wen Ašəxol ibdadän däx-tasäqqaymut ta n-təmmənukəla änimäxläyän härätän wi n-əkkoz eoddärnen d-imxarän wi n-sänatät timərwen d-əkkoz. Ašəxol-i-hi, s-tənnəd iḅras, ila əssa iskawän d-əssayät tiṭṭawen. Tiṭṭawen-tin-däx a-s əssa unfasän wi dd-äšmašäl Mässinäx fäll-ärori n-äkall iket-net.

⁷ Irjäš-dd Ašəxol har dd-osa ere wa äqqimän fäll-tasäqqaymut ta n-təmmənukəla, irmäs fälla-s əlkəttab wa iṭṭäf s-äfuss-net wa n-aḅil.

Ätwamäl Ašəxol n-Mässinäx

⁸ Irmäs əlkəttab-ənnin-däx xas, ärkäxän härätän wi n-əkkoz d-imxarän wi n-sänatät timərwen d-əkkoz dat-Ašəxol, ad-t-timəlän, xabbädän-t. Hak iyyän däx-sän iṭṭaf tehärdänt d-alkas n-oräx idkarän əlxənfärän. Alkasän-ənnin n-oräx d-isəkkurora wi əḍnäyän, ämmittälän tittar n-älyibadät n-iməššeddəjan n-Mässinäx.

⁹ Äwwayän əsahäx äynayän däx-jannen:
«Ärhuj-ak ad-tärməsäd əlkəttab,
tärzəd izəzla wi n-əssa t-härnen

ed tämmud, jed iman-näk takute,
täsdärfed s-ašni-näk tamøtte s-ämära, ikräš-tät Mässinäḡ.
Tamøtte daḡ, han äddinät
n-e d t-tølläm tawset,
d-e d t-illäm awal,
d-e d t-tølläm tumast
d-e d t-illäm øddøwøl iwarän ärori n-äkall.

¹⁰ Jed-tän älzämaḡät n-käl-tikutawen ixdamän i-Mässinäḡ,
jed-tän däḡ-Tømmønøya-näk
i-ad-äxkəmän fäll-äkall.»

¹¹ Oläsäḡ daḡ akäyad, øsleḡ i-emäslī n-änjäløsän øknanen øjut, afdän fäll-timørwēn
n-afdan. Äxiläyḡäläyän tasäqqaymut ta n-tømmønukøla d-härätän wi n-økkøz
øddärnen d-imḡarän wi n-sänatät timørwēn d-økkøz.

¹² Eḡkälän imäslan-näsän, ad-jannen s-afälla:
«Ašäḡol wa iḡräsän i-ad-umas takute,
tärhuj-as tärna d-ärrøzäḡ d-särho d-äššahät
d-semḡar d-älxurmät d-tømmal.»

¹³ Eslēḡ daḡ i-a-wa dd-ixlākän iket-däḡ-net jer-a-wa ihän išønnawän d-a-wa iwärän
ärori n-äkall d-a-wa t-illän daw-äkall d-a-wa ihän ejärew wa sømmän, a-wa dd-
ätwäxlākän iket-net, išønnawän d-äkall, a-wen-däḡ iket-net, irmas äsahäḡ, ijanna:

«Tärhuj tømmal d-semḡar
d-älxurmät d-tärna täḡlalät
i-ere wa äqqimän fäll-tasäqqaymut
ta n-tømmønukøla d-Ašäḡol.»

¹⁴ Tømdä taswølt-ten-däḡ ḡas, øssøgdälän härätän wi n-økkøz øddärnen, ønnän:
«Amin!» Ärkäḡän imḡarän øntäneḡ-däḡ ässaḡät-wen, ad-ḡabbädän.

6

Ämer n-iḡøzla wi n-säḡdis

¹ Oläsäḡ, økyädäḡ; ønhäyäḡ Ašäḡol a-s irza azäzlo wa äzzarän däḡ-wi n-øssa
härnen ølkøttab. Eslēḡ i-iyyän däḡ-härätän wi n-økkøz øddärnen a-s iḡkäl emäslī-net
šund ejjaj, innä: «Eyyäw!»

² Innä a-wen ḡas, økyädäḡ: ønhäyäḡ ebäje mällän inay äwadøm iḡḡafän ässäm,
tätwäkf'-e korona, a-wen, takønbut n-tømmønukøla. Äwadøm-en, emärn, iglä daḡ
i-ad-ärn.

³ Irza Ašäḡol azäzlo wa s-øssin ihärän ølkøttab ḡas, øsleḡ i-wa s-øssin däḡ-härätän
wi n-økkøz øddärnen a-s innä: «Eyyäw!»

⁴ Enhäyäḡ ämära ebäje šäggäḡän dd-imalän, ijräw ähaløs wa t-inäyän tädabit n-ad-
ikkøš äḡafyät fäll-ärori n-äkall i-ad-ønmølhøsän äddinät jer-iman-näsän; ønta-i-hi,
ijräw täkoba šjreet.

⁵ Irzä Ašäḡol azäzlo wa n-käraḡ ḡas, øsleḡ i-wa s-käraḡ däḡ-härätän wi n-økkøz
øddärnen a-s innä: «Eyyäw!» Ekyädäḡ, ønhäyäḡ ebäje käwälän inay äwadøm iḡḡafän
älmizan däḡ-äfuss-net.

⁶ Eslēḡ i-emäslī dd-ifalän jer-härätän wi n-økkøz har innä: «Kølu n-älkäma-i,
älqim-net ašäl n-älxidmät n-äwadøm meḡ käraḡ kelutän n-tärruza mäšan, wär
tøfnøzäd härät däḡ-øzzäyt wälä däḡ-asmød wa n-läḡnäb.»

⁷ Irzä Ašäḡol azäzlo wa n-økkøz iḡfälän ølkøttab ḡas, øsleḡ i-härät wa s-økkøz
iddärän a-s innä: «Eyyäw!»

⁸ Ekyädäḡ, ønhäyäḡ ebäje dalen inay ere iwar isøm: «Tamättant», äsiläl äläxärät
d-a-wa t-ihän däḡ-äddinät iket-net. Ejräwän tärna fäll-täzune n-äkall ta n-økkøzät

i-ad-änxən imuzäxän-net s-täkoba d-laz d-turhənnawen ti läbasnen tamälsanen d-tiwäxsen.

⁹ Irzä Ašäxol azäzlo wa n-səmmos xas, ənhäyäx däx-išənnawän, daw-tasəskärt ta fäll-xarräsnät taɣsiwen ti n-tikutawen däx-ehän n-ämudd wa mäqqārän, iman n-äddinät wi äba däx-təssəba n-mäjräd n-Mässinäx d-ajəyh däx-s i-äddinät.

¹⁰ Ədkälän iman-en-hi imäslan-näsän s-afälla, ənnän: «Emäli-nänäx wa šaddijän, äddutten, ma s-täqqaläd, tarəd äššärexa wa n-jere-näx d-imuzäxän n-äkall? Ma s-täqqaläd təsəjəd däx-sän eɣa n-asänxal wa jän i-ašni-nänäx?»

¹¹ Ijräw hak iyyän däx-sän emäls mällän, ätwänn'-asän ad-sunfən äzzäman əndärrän əsbärän har dd-əmdəwän ayətma-sän d-imidiwän-näsän wi dār-oharän älxidmät länen s-ad-där-sän alähän əssəbab n-tamättant.

¹² Ənhäyäx darät-a-wen Ašäxol a-s irzä azäzlo wa n-sädis ixfälän əlkəttab xas, ijä-dd äkall äškädkäd-i-däx ässuksädən, käwal täfukt šund aläššo, šəggax ewär iket-net šund ašni,

¹³ jän-dd etran fäll-äkall aftəktək wa dd-täjjän aratan n-ašar dihad tän-iwwəšwäš aɟu äšsoohen.

¹⁴ Olämän-in išənnawän šund əlkəttab itidh əwadəm, əhonän iɟaxän d-iwtəlän.

¹⁵ Ənkärän imuzäxän n-äkall iket-näsän, jer-wi n-imänokalän, hakd wi n-käl-eket d-wi n-imänokalän n-əlxəskär d-wi n-imärrəzäxän d-käl-əššahät, wär-əzleyän wi n-eklan d-wi n-ilällan, əffärän iket-däx-näsän däx-iɣäyan d-itäqqän n-iɟaxän.

¹⁶ Saɣären, jannen i-ɟaxän d-isəwlan: «Aɟəwät-dd fälla-näx i-ad-wär hanäx-ihənnəy ämänokal wa äqqimän fäll-tasäqqaymut ta n-təmmənukəla, ənjärät-anäx iket-di d-fälla-näx isiɟəw aɟkär n-Ašäxol

¹⁷ ed ašäl wa mäqqārän d-itakkäs älxär, osä-dd. Mi däx-s-e-iɣləsän?»

7

Käl-Işrayil wi n-temeɟe d-əkkozät timərwen d-əkkoz n-efäd iwär ešwäl

¹ Darät-a-wen, ənhäyäx əkkoz änjəlosän s-hak iyyän däx-sän däx, ibdad däx-iyyəät däx-tisdas n-äkall ti n-əkkozät. Hak iyyän ännihäɟ däx-iyyəän däx-aɟutan wi n-əkkoz i-ad-wär-äsraräj wäl' iyyän däx-sän fäll-äkall wäla fäll-əjärew wäla fall-ihəškan.

² Ənhäyäx daɣ änjəlos iyyän har dd-ifäl emäynäj iɟtaf azäzlo n-Mässinäx-i iddärän. Ässewäl s-afälla i-əkkoz änjəlosän wi əjrarəwen turhajät n-ad-əbxəsän äkall d-əjärew wa səmmän, inn'-asän:

³ «Tazidert, wär jem säbxas däx-äkall wäla däx-ijərwan wäla däx-ihəškan har näj ešwäl fäll-timme n-eklan n-Mässinäx iket-däx-näsän.»

⁴ Əsleɣ älwäqq-wen i-a-wa dār-ogdähän äddinät wi iwär azäzlo n-Mässinäx: temeɟe d-əkkozät timərwen d-əkkoz n-efäd† n-əwadəm dd-əzjarnen tiwsaten n-Işrayil iket-däx-näsnät:

⁵ Märaw d-əssin n-efäd n-əwadəm,† əzjarän-dd tawset ta n-Yähuda;

märaw d-əssin n-efäd n-əwadəm, əzjarän-dd tawset ta n-Rubin;

märaw d-əssin n-efäd n-əwadəm, əzjarän-dd tawset ta n-Gad;

⁶ märaw d-əssin n-efäd n-əwadəm, əzjarän-dd tawset ta n-Azir;

märaw d-əssin n-efäd n-əwadəm, əzjarän-dd tawset ta n-Naftali;

märaw d-əssin n-efäd n-əwadəm, əzjarän-dd tawset ta n-Mänasa;

⁷ märaw d-əssin n-efäd n-əwadəm, əzjarän-dd tawset ta n-Simyon;

märaw d-əssin n-efäd n-əwadəm, əzjarän-dd tawset ta n-Lewi;

märaw d-əssin n-efäd n-əwadəm, əzjarän-dd tawset ta n-Isakar;

⁸ märaw d-əssin n-efäd n-əwadəm, əzjarän-dd tawset ta n-Zabilon;

märaw d-əssin n-efäd n-əwadəm, əzjarän-dd tawset ta n-Yusəf;

† 7:4 7:4 144.000. † 7:5 7:5 12.000.

māraw d-əssin n-efäd n-āwadəm, əzjarän-dd tawset ta n-Bānyamin.

Tänäfalilt n-iməššeddəjän wi hānen əlzānnät

⁹ Ənhäyāx dəx dərät-a-wen, tamətte n-əddinät-i-dāx təjjet s-wār t-illa ere əddooben asiðən-net. Tamətte-ənnin-dāx, han-tāt əddinät n-e d t-illām əddəwəl d-e d t-təllām tawset d-e d t-təllām tamətte d-e d t-illām awal. Əbdadän dat-tasəqqaymut ta n-Təmmənəya d-dat-Ašəxol, əssiimlälän, ətəfän iləktan n-tišday.

¹⁰ Əzzajän iməslan-nəsän s-afälla, jannen:

«Əlyəllas-nänəx, Məssinəx-i əqqiimän fäll-tasəqqaymut ta n-təmmənukəla d-Ašəxol a xur-t-illa.»

¹¹ Əbdadän ənjəlosän iket-nəsän wi əniməxləynen tasəqqaymut ta n-təmmənukəla d-imxarän d-härätän wi n-əkkəz əddärnen, ərkəxän dat-tasəqqaymut ta n-təmmənukəla, əssənsän timmawen-nəsän fäll-əkall, ad-xabbädän Məssinəx,

¹² jannen:

«Tidət-dāx a-s təmmal d-əlxurmät d-sārho d-təmayit d-semxar d-tärna d-əşşahät, i n-Məssinəx härkuk! Amin.»

¹³ Issəstän-ahi iyyän dəx-imxarän dərät-a-wen, inn'-ahi: «Ma əmoosän əddinät-wi-dəx əssiimlälnen? Ənde s-dd-hän?»

¹⁴ Ənney-as: «Məssi-x, a-wen, käyy a t-issanän.» Inn'-ahi əlwəqq-wen: «A-wa əddinät wi dd-toyyä təxəzzabit ta məqqārät, əsserädän isəlsa-nəsän, issəmläl-tän əşni wa n-Ašəxol.

¹⁵ A-wen-dəx a fäl əbdadän dat-tasəqqaymut ta n-təmmənukəla n-Məssinəx. Əhäd d-aşäl, xabbädän-t dəx-əhän n-əmudd-net wa məqqārän. Ere wa əqqiimän fäll-tasəqqaymut ta n-təmmənukəla dəx-əhän-net, a tən-ogažän.

¹⁶ Wār-ilkem ad-əlložän, wəla ad-əffudän, wəla ad-tän-təssirxa təfukt wəla a əkkusän a əmoos-dəx

¹⁷ fäl-as Ašəxol wa ihän ammas n-tasəqqaymut ta n-təmmənukəla, iman-net a tən-e-iðənän, ağəd-tän s-ersan wi n-aman əddärnen, irsəy-in Məssinəx e d t-illām əmiṭṭ dəx-tiṭṭawen-nəsän.»

8

Eməsli n-tisinsäyən ti n-əssayät

¹ Irzə Ašəxol azəzlo wa s-əssa xas, əssosäm a-wa ihän isənnawän iket-dəx-net har fälla-s tokäy təzune n-əssağät.

² Ənhäyāx dərät-a-wen əssa ənjəlosän wi əbdädnen dat-Məssinəx, ijrəw hak iyyän dəx-sän təsinsäyət tiyyät.

³ Osä-dd ənjəlos iyyän, ibdäd edes i-tasəskärt ta fäll-tajjənät tikutawen, itəfət əkoss wa hən iməkkārora iknän dəx-orəx. Ijrəw isəkkurora əjjootnen i-ad-tän-isədəw d-tittar n-tamətte ta n-iməššeddəjän n-Məssinəx, isərx a-wen-dəx iket-net fäll-tasəskärt ta n-tikutawen n-orəx t-təllät dat-tasəqqaymut ta n-təmmənukəla, əssewəd-in dəx fäll-a-wen tittar n-iməššeddəjän n-Məssinəx.

⁴ Əhohän iməkkurora, əlkəmnät-asän tittar n-iməššeddəjän n-Məssinəx.

⁵ İdkäl ənjəlos dərät-a-wen əkoss wa dəx-raqqän əlxənfärän, idkär-t dəx-efew wa iwärän tasəskärt ta n-tikutawen təzzar, ibsäl-t-dd fäll-əkall, jän ejjajän əlwəqq-wen-dəx d-iməslan d-essamän, əşkədkəd əkall.

Əşhədän ənjəlosän wi n-əkkəz tisinsäyən-nəsän

⁶ Əsdəwän ya ənjəlosän wi n-əssa ətəfənən tisinsäyən ti n-əssayät i-əşhəd-nəsnät.

⁷ Äshäq wa äzzarän täsinsäxt-net, oðän-dd ijidräsän äddewnen d-efew irtayän d-ašni fäll-äkall, intäs öttölet n-äkall d-öttölet n-ihöškan d-a-wa t-illän däx-teyöšše iket-net.

⁸ Äshäq änjälos wa s-össin täsinsäxt-net, ifäl-dd a olähän d-aðaḡ ähijäljälän išönnawän, oðä-dd däx-ejärew. Iqqäl öttölet n-ejärew wa sömmän ašni älwäqq-wen-däx.

⁹ Äba öttölet n-e d t-illäm ämudär ihan ejärew wa sömmän, ittäxtäḡ öttölet n-a-wa ila ejärew däx-turfen.

¹⁰ Äshäq qarät-a-wen änjälos wa s-käraḡ täsinsäxt-net, ifäl-dd atär mäqqärän ähijäljälän šund emämmäl išönnawän, oðä-dd fäll-öttölet n-ijerwan d-ersan.

¹¹ Atär-en, isöm-net: «Təsämme.» Oðä-dd ḡas, issəsmäm öttölet n-aman har tämmut təššəm n-äddinät iket-näsän wi tän-əswänen.

¹² Äshäq änjälos wa s-əkkoḡ täsinsäxt-net, tøjjäš tewete öttölet n-täfukt d-öttölet n-ewär d-öttölet n-etran, ijmäḡ-tän öttölet n-ännur-näsän har äbas itimləwləw öttölet n-ehäq d-öttölet n-ašäl.

Iməskay äddinät iyyäḡ

¹³ Ekyädäḡ daḡ, əsley i-ejäft illayän däx-ijəḡ däx-älhəwa, idkal eməsli-net, ijanna: «Iməskay, Xäxx-däḡ, iməskay imuzäḡän n-äkall älwäqq wa d-e-sähəḡän änjälosän wi n-käraḡ hin-äqqimmen tisinsäḡen-näsän!»

9

Äshäq änjälos wa s-səmmos täsinsäxt-net

¹ Äshäq änjälos wa s-səmmos täsinsäxt-net, ənhäyäḡ atär dd-ifalän išönnawän har dd-oðä fäll-äkall, ätwäkf'-e asäyar n-anu wa wärän ila ider ihän äläxärät.

² Or' atär-ənnin anu-en, izjār-t-dd a olähän d-tahəst-i-däḡ tässuksäḡät, issəkwäl äho wa dd-izjārän anu täfukt d-älhəwa.

³ Äho-ənnin-däḡ, təzjār-t-dd tašwalt təlsät ärori n-äkall, tašwalt-en, tøjraw ässäm olähän d-wa ihän izurdam.

⁴ Tøjraw tašwalt-ənnin-däḡ alämär n-ad-wär ḡes teyöšše wäla ihöškan wäla idommän, ätwänn'-as ḡas ad-äkk äššar-net dägg-adəm wi s-wär-iwer ešwäl wa n-Mässinäḡ timmawen-näsän.

⁵ Äddinät-en, wär tøjrew tašwalt turhajät n-tenäḡe-näsän, wär tøjrew a säl turhajät n-aḡəzzəbu-näsän har fälla-sän takəy täqqän n-səmmos orän. Təsämme n-tisnant n-älḡizabät-net toläh d-a-wa s-itifrəy äwadəm äkiwättät ezerdəm.

⁶ Täqqän-ten-däḡ n-səmmos orän, ad-takəy tammäḡän dägg-adəm i-tamättant mäšan, wär tät-järrewän, sadärhanän-tät mäšan, tifäqqut-asän.

⁷ Tašwalt-ənnin, toläh d-ibəjwan äsidäwnen i-tikawt n-amjār, iḡäfawän-näsän, iwar-tän a olähän d-koronatän, a-wen, tikənbuten n-oräḡ, olähän idmawän-näsän d-wi n-dägg-adəm,

⁸ lan amzadän olähnen d-tišəkkaḡ n-tiḡeḡen, lan daḡ isenän olähnen d-wi n-ehran.

⁹ Ijerjar-näsän, s-tənnəd, täzoli a tän-ilsan, eməsli n-afrewän-näsän, oläh d-turfen ti n-amjār tihubun ibəjwan əkkanen edägg n-amjār.

¹⁰ Lan tilänkəwen lanen teskärt šund ta n-izurdam, tilänkəwen-näsän en-däḡ a ih' ässäm wa s-tikwəttin dägg-adəm har äkəyən səmmos orän.

¹¹ Lan ämänokal wa ännihäḡän däḡ-anu wa wärän ila ider ihän äläxärät s-ənta a-s änjälos wa n-älaxärät, isöm-net däḡ-ḡäbranəyya: Abbädon; isöm-net däḡ-Tälyunanit: Abbolyon. Almäḡna n-isöm-net: Amahlak.

¹² Älmäššibät wa äzzarän okäy mäšan, əlkamän-as-dd əssin härwa.

Āshād ānjālos wa s-sāḍis tāsinsāxt-net

¹³ Āshād ānjālos wa s-sāḍis tāsinsāxt-net, əsley i-eməsli dd-ifalān tisəttuytay ti n-əkkozāt n-tasəskārt n-orāy ta n-tikutawen t-təllāt dat-Mässināy.

¹⁴ Inn' eməsli-en i-ānjālos wa s-sāḍis iṭṭāfān tāsinsāxt: «Arr-in ānjālosān wi n-əkkoz əkrādnen edes i-ejārew wa māqqrān s-isəm-net Ifrāyti.»

¹⁵ Āmerān-dd ānjālosān-win-dāy n-əkkoz əssaḡāt-wen-dāy n-ašāl-wen-dāy n-ewār-wen-dāy n-awātay-wen-dāy i-ad-ānyən əttələt n-dāgg-adəm ed a-wen-dāy a-s-ətwarān a ijā a-wa-dāy.

¹⁶ Ātwānn'-ahi a-wa dār-ogdāh əlḡeskār wa ināyān ibəjwan, oseḡ-t iwwād sānatāt timād n-ajjim n-āwadəm.

¹⁷ Ibəjwan-ənnin d-āddināt wi tān-nāynen, ənta da əmmək wa s-hi-dd-ānfalālān: imālsan-nāsān, i n-tāzoli šāggāḡāt šund efew, i dalatnen šund tekādāyt ta n-telällit lāt əlqim s-itawānna: Safir; ja tāroḡe ta itājj əlkābrit. Iḡāfawān n-ibəjwan, olāhān d-iḡāfawān n-ehran, izajjār-dd efew d-ihohan d-əlkābrit imawān-nāsān.

¹⁸ Ālmāššibatān-winnin-dāy n-kāraḡ dd-zajjārnən imawān n-ibəjwan, efew d-āho d-əlkābrit, əlhāsān əttələt n-dāgg-adəm

¹⁹ ed ibəjwan ənnin-dāy, āššar-nāsān, imawān-nāsān d-tilānkāwen-nāsān a iha fāl-a-s olāhnāt tilānkāwen-nāsān d-taššālen, lan iḡāfawān s-tiḡārrun dāgg-adəm.

²⁰ Unjāy a-wa dd-āqqimān dāy-dāgg-adəm wār-ānyən ālmāššibatān-ənnin-dāy s-ad-ibḡəw d-āššānāmān wi əknān s-ifassān-nāsān, unjāyān s-ad-əbḡəwān d-ālyibadāt n-alšinān d-āššānāmān wi əknān i-iman-nāsān s-orāy d-azrəf d-daroḡ d-tihun d-isāḡerān wāren əddobāt ahānay wāla māsāllāt wāla rājjoš.

²¹ Unjāyān dāy s-ad-əbḡəwān d-iji n-iman d-əkkəriku d-asəmmāḡəs n-iman d-tikra.

10*Tänäfalilt n-ānjālos wa iṭṭāfān əlkəttab wa n-ayātas n-āššāreḡa*

¹ Olasāy dāy ahānay n-ānjālos n-emāššehi a-s dd-ifāl išənnawān təls'-e tejārākt, iqqal-as azānnāzzal takənbut, olāh idəm-net d-tāfukt, olāhān idarān-net d-timānkayen n-efew,

² iṭṭaf dāy-āfuss-net əlkəttab əntəkkān āmerān. Ibdād s-aḡār-net wa n-aḡil fäll-ejārew wa səmmān, ibdād s-wa n-tāšalje fäll-ākall.

³ Indāw teḡārit tolāhāt d-eməsli n-ahār inijjəwān. Āsḡārāt ḡas, ākewānān-as imāslan n-ejjajān wi n-əssa.

⁴ Ēttārāy ad-əktəbāy a-wa ənnān ḡas, əsley i-eməsli dd-ifalān išənnawān a-s hi-innā: «Ēštār a-wa ənnān ejjajān wi n-əssa, wār t-təkṭebād.»

⁵ Idkāl ḡarāt-a-wen ānjālos-wənnin ənhāyāy āsixātārtār fäll-ejārew d-ākall āfuss-net wa n-aḡil s-ebre n-išənnawān,

⁶ ihād s-Mässināy-i iddārān dd-ixlākān išənnawān d-ākall d-ijərwan d-a-wa tān-ihān iket-net, innā: «Tāqqān, təmdā-dd.»

⁷ Afāl issəntā ānjālos wa s-əssa ewet n-tāsinsāxt-net, ad-dd-imḡəw əddāraj n-Mässināy wa s-a ija a-wa-dāy iffar, dihen, ad-itbət a-wa ənnān ānnābitān-i n-eklan-net.

⁸ Āssewāl-ahi dāy eməsli wa s-əsley ifal-dd išənnawān, inn'-ahi: «Ēḡləw, ārməs əlkəttab wa əntəkkān āmerān ihān āfuss n-ānjālos wa āsixātārtārān fäll-ākall d-ejārew.»

⁹ Ohāzāy-dd ānjālos i-ad-hi-ākf əlkəttab wa əntəkkān, inn'-ahi: «Ārməs əlkəttab, təkšəd-t, ad-ismam dāy-tāsa-nāk māšan dāy-əmm-nāk, ad-alāh d-torawāt tāzude.»

¹⁰ Ārmāsāy-dd əlkəttab dāy-āfuss n-ānjālos, əkšəḡ-t ḡas, ija dāy-əmm-in tāzude ta n-torawāt māšan, osa tāsa-nin ḡas, sāmum dāy-s.

11 Ätwänn'-ahi älwäqq-wen: «Səlməd härwa timəttawen d-tiwsaten d-awalän d-imänokalän a-wa hasän-itwär Mässinäx.»

11

Tijuhawen n-Mässinäx ti n-sänatät

¹ Darät-a-wen, tätwäkf'-ahi tezewt tolähät d-härät n-teläwäxt ta n-eket, ätwänn'-ahi: «Egləw, əkət ehän n-ämudd wa mäqqärän n-Mässinäx d-tasəskärt ta n-tikutawen, siðənäd-dd a-wa dər-ogdähän äddinät-wi dāx-s ɣabbädnen Mässinäx

² məšan, äyy äɣalla-net, wär t-keäd ed əjrawän fälla-s inəzzulam† tärna, ad-əjən əkkozät timərwen n-ewär d-əssin tikukulän aɣrəm wa šaddijän.

³ Ad-hin-šəmmişäləx tijuhawen-nin ti n-sänatät əlsänen isəlsa wi ilass ere ittafän iba, ad-əjən efäd n-ašäl d-sänatät timad d-sädisät timərwen siɣulän isälan wi hasän-dd-ässawäy Mässinäx.

⁴ Tijuhawen-en n-sänatät, əntänated a-s əzzäytunitän wi n-əssin d-tiftəl ti n-sänatät əbdädnen dat-Emäli n-əkall.

⁵ E-d ittär əwadəm ad-hasän-iɣšəd härät, ad-dd-izjär efew imawän-näsän ihläkän isənja-näsän, əmmək-wen-däx a-s mad-ämmät əwadəm a ämoos itattärän ad-hasän-iɣšəd härät.

⁶ Əjräwän turhajät n-ad-äɣfəlän isənnawän, əgdəlän i-ajənna ad-iwət a əkkän tajjän isälan wi dd-äwwäyän ɣur-Mässinäx. Əjräwän dāx turhajät n-ad-əjən aman ašni, zəzzubbun-dd fäll-əkall ännuɣ n-älməššibät iket-net, älwäqq d-äsdärhänän a-wen iket-net.

⁷ Afäl əssəmdän d-asəssiwäd n-isälan wi dd-äwwäyän, ad-fälla-sän idəw awäxs wa dd-madän-izjär anu wa wärän ila ider ihän əlaxärät, ärn'-en, äny'-en;

⁸ äqqaymənat-dd tifəkwen-näsän dāx-təfarre n-aɣrəm wa dāx-tazəmmaɣän iməssorha-net, dāx-edägg wa dāx-ätwäšläb Emäli-näsän fäll-tajəttewt. Aɣrəm-en, ätiwäjj'-as isəm n-ämadaɣ, itawänn'-as, Sodoma; itawänn'-as dāx: Mišra.

⁹ Ad-əkrəšan äddinät n-timəttawen iket-dāx-näsnät d-tiwsaten-näsnät d-awalän-näsnät, d-əddəwəlän-näsnät iket-näsän, kərad isilan d-təzune əkyadän dāx-sän, əgdälän-asän ad-änbəlän.

¹⁰ Ad-äddäwen imuzäɣän n-əkall hullan dāx-təssəba n-a-wa s-tän-äba, äd-əjən äzzəhotän, ənməkfen əlhäkän jer-iman-näsän, fäl-a-s ännäbitän-ənnin-dāx n-əssin, əssəknän imuzäɣän n-əkall aɣana hullan

¹¹ məšan, afäl okäyän kərad isilan d-təzune winnin-dāx, ad-dd-ifəl unfas n-tämudre n-Mässinäx ijješ ännäbitän-ənnin n-əssin, ənkärän-dd dāx-taməttant, tärməs tarəmmeyt äddinät wi tän-hannäyən iket-näsän.»

¹² Əslän ännäbitän wi n-əssin i-eməsli äšsohen hasän-innän dāx-isənnawän: «Awənät-dd diha.» Tədkäl-tän tejärakt, əkkän isənnawän, əkyadän dāx-sän isənjanäsän.

¹³ Äškädkäd äkall s-äššahät älwäqq-wen-dāx, tärza təzune n-aɣrəm ta s-märawät, ämmun əssa afdän n-əwadəm dāx-äškədkäd-wənnin-dāx; ärmäɣän äddinät wi iyyädnen, ad-samɣarän Mässinäx-i ihän isənnawän.

¹⁴ Okäy älməššibät wa s-əssin məšan, hewät! Os'-iwän fəw wa s-kərad.

Äshäd änjəlos təsinsäxt ta s-əssayät

¹⁵ Äshäd älwäqq-wen änjəlos wa s-əssa təsinsäxt-net, jän iməslan äšsoohätnen dāx-isənnawän jannänen:

«Ämära-dāx, təmmənukəla fäll-äddunya,

† 11:2 11:2 – ɣur-käl-Älyähud, ere wärän ämoos ägg-Älyähud s-aläšäl meɣ ere wärän ilkem i-äddin-näsän, iket-net, änäzzalim a ämoos. A-wen-dāx a fäl tiwsaten ti iyyädnen iket-näsnät, ti n-inəzzulam. — Ašäl-i-dāx, änäzzalim, äkafär (ere wärän issen s-Mässinäx).

ti n-Emäli-nänäx Mässinäx d-Älmasex-net
i-ad-immukəl härkuk.»

¹⁶ Ğnkārān imxarān wi n-sānatāt timərwen d-əkkoz fäll-tisäqqima-nāsān ti t-əllānen dat-Mässinäx, ođān data-s, ārkāxān data-s, āsđāsān timmawen-nāsān ākall, ad-t-xabbādān,

¹⁷ jannen:

«Emäli Mässinäx-i ilān tārna,
kāyy-i t-illān, telled-t, təlcamād,
nomal-kāy ed tössətbātād
təmmənukəla-nāk s-tārna-nāk.

¹⁸ Ibda, ādđukren-kāy əddəwəlān wi n-inəzzulam†

māšan, ašāl-i, ađkār wa-nāk,
a dd-madān-infiləl fälla-sān,
ašāl-nāk wa dāx-šarrāxād inəmmuttan, osā-dd.

Iwwāđ əlwāqq wa dāx-mad-təjəd əlhāk

i-eklan-nāk-i n-ännābitān

d-āddināt wi led n-iməšseddəjān-nāk iket-dāx-nāsān,
əssimxarān-kāy wi n-iməşsuha hakd wi n-tiläqqiwen,
əlwāqq wa n-ahālak n-imahlakān n-ākall, osā-dd.»

¹⁹ Əlwāqq-wen, əmerā-dd ehān n-āmudd n-Mässinäx wa məqqārān dāx-işənnawān, ətwānhāy dāx-s əssəndoqq wa iha əlkəttab n-ārkāwāl n-tassaxt wa n-jer-Mässinäx d-tamətte-net, jān əssamān đarāt-a-wen d-imāslan d-ejjājān; āškāđkāđ ākall, ənfārān-dd ijdrāšān šuharnen.

12

Tänäfalilt ta n-taməđt d-alyađ wi iknäs əmudār

¹ Đarāt-a-wen, təzjār-dd tākunt təssuksədāt işənnawān. Ğnhāyāx taməđt təxnasāt təfukt təbdad fäll-ewār, təsiwār mārāw etran d-əssin eyāf-net, mārāw etran d-əssin əddasnen šund takənbuť n-āmānokāl eyāf-net.

² Taməđt-ənnin, la ənniyāt, tārmas-tāt tiżzurt n-ajārāw n-eyāf, təsikālāl a-wa dāx-has-ja tisanť.

³ Tānfalāl-dd tākunt tiyyāt dađ dāx-işənnawān, ənhāyāx əmudār məqqorān šəggāxān han ifāqqān n-āxata ilan əssa iğāfawān d-mārāw iskawān, hak eyāf-net-dāx, təwar-t takənbuť n-təmmənukəla.

⁴ Ifrāđ-dd s-telānkāwt-net əttələť n-etran wi hānen işənnawān, ijār-tān-dd fäll-akāl. İbdād-dd đarāt-a-wen dat-taməđt i-ad-hin-ilməz ara-net afāl dd-iwā.

⁵ Təkrāš taməđt alyāđ s-ənta a madān-ixkəm s-tārna tolāhāt d-ta n-təzoli fäll-əddəwəlān iket-nāsān, iwā-dd alyāđ xas imməđkāl əlwāqq-wen-dāx, əmewāy s-Mässinäx d-tasāqqaymut ta n-təmmənukəla-net.

⁶ Taməđt ənta, təjewāđ s-tanāzruf-i-dāx has-itwār Mässinäx edāgg dāx-mad-has-itťaf tenāfakt har təj efāđ n-ašāl d-sānatāt timađ d-sāđisāt timərwen.

⁷ İnkār đarāt-a-wen amjār məqqoorān dāx-işənnawān. İmāl-t amjār əşsoohen jer-Mikaylu d-ānjālosān wi has-əlkamnen d-əmədār wa hān ifāqqān n-āxata d-ānjālosān wi has-əlkamnen.

⁸ Ətwārna āxata d-ānjālosān wi has-əlkamnen, əbas hasān-t-təlla tayimit dāx-işənnawān.

† 11:18 11:18 – Ƴur-kāl-Əlyāhud, ere wārān əmoos əgg-Əlyāhud s-alāšāl međ ere wārān ilkem i-āddin-nāsān, iket-net, ānəzzalim a əmoos. A-wen-dāx a fāl tiwsaten ti iyyāđnen iket-nāsāt, ti n-inəzzulam. — Ašāl-i-dāx, ānəzzalim, ākafār (ere wārān issen s-Mässinäx).

⁹ Ätwäjär-dd äxata wa mäqqārān, ätwästäx-dd, izjār-dd išənnawän. Ənta a-s aššäl wa n-ibda s-itawänna Iblis mex Äššäyṭan-i n-eməkkerrəs n-äddunya təmda, ätwäjär-dd fäll-äkall ənta d-änjälösän-net.

¹⁰ Əsleṭ darät-a-wen i-eməsli əşsoohen ijannen dəx-işənnawän:

«Ämära, əssaṭ wa n-əlyəllas, iwwäd-dd.

Mässinäx, əsnäfaläl-dd tärna-net d-Təmmənəya-net!

Əlxəkum, ijjäš ifassän n-Älmasex-net
fäl-a-s ere wa s-käla isaqlam ayətma-näx,
isaqlam-tän ehäd d-ašäl yur-Mässinäx,
ätwästäx-dd, äbas ih' išənnawän.

¹¹ Əkräšan fälla-s ayətma-näx tärna
dəx-təssəba n-ašni wa n-Ašəxol
d-mäjräd n-Mässinäx wa dəx-tajäyhen äddinät,
wär jen tärha n-härät dəx-tämudre-näsän,
əqbälän tamättant dəx-təssəba n-Ašəxol
d-dəx-təssəba n-mäjräd n-Mässinäx.

¹² A-wen-dəx a fäl išənnawän
d-imuzäxän-näsän, nufləyät!

Mäšan iməskay imuzäxän n-äkall d-əjärew wa səmmän
fäl-a-s Iblis, əzzubbät-in sär-wän,
ikn'-e adkär ujəš ed issan
a-s a-wa has-in-aqqimän dəx-älwäqq i jäzzulän.»

¹³ İlmäd ämudär wa hän ifäqqän n-äxata a-s ätwästäx-dd dəx-işənnawän, äträkkät-dd fäll-äkall xas, ästäxäynän tamädt ta toräwät alyad.

¹⁴ Mäšan təjraw tamädt afrewän əssin n-əjäft mäqqoorän, təggäd sär-sän här täwwäd edägg wa has-itwārän dəx-tanəzruft i-ad-dəx-s təjrəw tenäfäkt, tətwigəz dəx-aššäl har təj dihen kərəd iwətyan d-təzune.

¹⁵ İnhäy aššäl a-s täbok tamädt ad-t-təjmäd xas, ora emm-net, ijär-tät s-ajəju n-aman ogdähän d-əjärew i-ad-tät-əkšən.

¹⁶ Mäšan, ohäx äkall tinahäxen i-tamädt, ämerä-dd, ilmäz-in aman wi-s ijär äxata tamädt.

¹⁷ İkn' adkär n-tamädt ujəš n-äxata, iglä i-ad-iknəs a-wa dd-äqqimän dəx-aratän-net, a tän-ämoosän äddinät iket-näsän wi tamašalnen alämärän n-Mässinäx tajäyhen dəx-isälän n-Ṭisa.

¹⁸ Osä-dd äxata, ibdäd dəx-asälim n-əjärew wa səmmän.

13

Tänäfalilt ta n-əssin imudärän

¹ Oläsäx, ənhäyäx ämudär iyyän ilan märaw iskawän d-əssa ixäfawän a-s dd-izjär əjärew wa səmmän. Hak eṭäf, təwar-t takənbut n-təmmənukəla tiyyät, hak idəm-dəx, iktab fälla-s isəm əsikafärän.

² Ämudär wa ənhäyäx, oläh d-wašil; tihiw-net, šuharnät, emm-net, oläh d-i n-ahär. İkf'-e äxata tärna-net, d-təmmənukəla-net d-tädabit mäqqoorät.

³ Ämudär-ənnin, iyyän dəx-ixäfawän-net, ih'-e abuyəs dəx-edägg n-əsənsay wärän itəzzəy mäšan, izzäy. İqqäl-a-wen täkunt i-imuzäxän n-äkall iket-näsän, əlkämän i-ämudär.

⁴ Ad-xabbäd äddunya iket-net äxata ed ənta a ikfän ämudär tärna. Tärkäx tamətte iket-net dat-ämudär, ad-t-xabbäd, janna: «Mi ogdähän d-ämudär, mi ihälän amjār dār-s?»

⁵ Ijrāw āmudār turhajāt n-ad-isəffəlyāx, isəkkufār har āj əkkozāt timərwen n-ewār d-əssin.

⁶ Ad-ijanna āmudār hārātān lābasnen fäll-Mässināx, igaggār isəm-net, d-edəgg wa dāx-izzāx d-a-wa izzāxān isənnawān iket-net.

⁷ Ijrāw turhajāt n-ad-iknəs iməššeddəjān, ārn'-en; ijrāw tārna fäll-e d t-təllām tawset d-e d t-təllām tamətte d-e d t-illām awal d-e d t-illām əddəwəl.

⁸ Ad-ḡabbādān imuzāxān n-ākall iket-nāsān āmudār-ənnin, iḡabbād-t e d t-illām āwadəm s-wār-ikteb isəm-net ḡur-axālak n-āddunya dāx-əlkəttab n-tāmudre n-Ašāḡol wa ātwāḡrāsān.

⁹ Ere ilān timəzzujen s-isola, isājdet:

¹⁰ «Ere wa s-inna Mässināx ad-ijjəš takārmūt, ad-tāt-ijjəš, ere wa s-inna, ad-t-tākš tākoba, ad-t-tākš. A-wa əssaḡāt s-hak eməššeddəj-dāx, ibdədet fäll-iman-net dāx-immun, ikuyədet.»

¹¹ Ənhāyāx dāx āmudār iyyān dd-izjarān ākall, il' iskawān əssin olāhnen d-i n-ekrār māšan isawal šund āḡata.

¹² Itamašal tədabit ta itamašal āmudār wa āzzarān iket-net dāx-a-s əjjəyh āmudār wa āzzarān i-a-wen. Išahāššal ākall d-imuzāxān-net ad-āḡbədān āmudār wa āzzarān āboyāšān dāx-edəgg n-āsənsəḡ s-izzāy ābuyəs-net.

¹³ Āmudār wa s-əssin, ija tikunen əjjootnen māqqornen dat-āddināt, izizəbbut-dd wāla efew wa n-isənnawān fäll-ākall.

¹⁴ Išāšk kāl-ākall s-tikunen ti-s āddobāt ad-tānāt-āj dat-āmudār wa āzzarān āboyāšān s-izzāy abuyəs-net. Issārḡ'-en s-ad-əjən əššānām əssimḡarān āmudār wa āzzarān t-āsbyāšān s-tākoba māšan, izzāy.

¹⁵ Ijrāw āmudār wa s-əssin tədabit n-ad-āj iman dāx-əššānām wa olāhān d-āmudār wa āzzarān i-ad-itamājrad əššānām-ənnin, isasānḡa āddināt iket-nāsān wi t-wären əḡbed.

¹⁶ Əšhāššāl āmudār āddināt iket-nāsān: wi mādroynen hakd-wi əššāmmen, wi ārzāxnen hakd wi ləqqəwnen, wi n-ilāllan hakd wi n-eklan, ad-tān-iwār ešwāl fäll-ifassān-nāsān wi n-aḡil d-timmawen-nāsān.

¹⁷ Ābas t-illa ere āddoben ad-izānš wāla ad-ittuzžār afāl wār t-iwer ešwāl-wənnin-dāx, ešwāl-wənnin dāx ənta a-s isəm n-āmudār meḡ āmaḡin wa ānimāhālān d-isəm-en.

¹⁸ Edəgg-i, āmiḡatār āwadəm d-sārho d-tayətte i-ad-t-ijrāh. Ere s-lämmeḡ eḡāf-net iket-net, āddobāt ad-ijrəw əlmāḡna n-āmaḡin wa n-āmudār ed āmaḡin-en, iha edəgg n-isəm n-əgg-adəm. Āmaḡin-en-hi, ənta da: «Sāḡisāt timaḡ d-sāḡisāt timərwen d-sāḡis.» Ənta-den-dāx ešwāl n-əgg-adəm ḡur-Mässināx.

14

Ašāḡol d-əlyəllas wa ihākk imumənān

¹ Olāsāx dāx akāyad ḡarāt-a-wen, ənhāyāx Ašāḡol ibdad fäll-taḡayt ta n-Sayon. Təbdad edes-has teməḡe d-əkkozāt timərwen d-əkkoz n-efāḡ n-āwadəm wi s-iktāb isəm-net d-isəm n-Abba fäll-timmawen-nāsān.

² Əsleḡ i-emāsli dd-ifalān isənnawān; emāsli-en, olāh d-wa n-tināzzāmāren n-əjārew wa səmmān, olāh ḡas d-əjjaj ijajān. Emāsli wa s-əsleḡ, olāh ḡas d-i n-tihārdānen watnen.

³ Tāwway tamətte-ten-dāx təmmal tāynayāt dat-tasāqqaymut ta n-təmmənukəla d-hārātān wi n-əkkoz əddārnen d-dat-imḡarān. Təmmal-en, wār t-illa ere āddoben almud-net a sāl āddināt-win-dāx n-teməḡe d-əkkozāt timərwen d-əkkoz n-efāḡ dd-āsdārfāt Mässināx dāx-āddunya.

⁴ Äddinät-en-hi, wär-äsmädäsän iman-näsän s-tideden, wär-əzzeyän tideden. Elkamän i-Ašäxol e-s ikka-däx, äsdärfät-tän-dd jer-dägg-adəm i-ad-umasän wi ikräš Mässinäx d-Ašäxol s-tizarät.

⁵ Imawän n-äddinät-en, wär käla tän-dd-izjār bahu, wär t-illa älγib tän-iwarän.

Tänäfalilt n-änjālosän wi n-kärad

⁶ Oläsäx qarät-a-wen ahānay n-änjālos iyyän daγ illayän däx-ijəj n-älhāwa, ənta a ittafän Älənzil wa ixlälän, isalänžat käl-äddunya iket-net, e d t-illām əddəwəl d-e d t-təllām tawset d-e d t-illām awal d-e d t-təllām tamətte.

⁷ Änjālos-ənnin-hi, idkal emäsli-net, ijanna: «Uksadät Mässinäx, səmγāräm-t fäl-a-s ašäl wa n-tebädde, osä-dd; aməlat-t ənta-i dd-ixläkän išənnawän d-äkall d-əjärew wa səmmän d-ersan.»

⁸ Änjālos-ənnin, isräy-t-dd iyyän, ijannen: «Babilun ta mäqqärät, tođa, ya tođa. Ənta-i təssəwät asməd n-əlkāxbu-net wa okäyän ämaku i-əddəwəlän iket-däx-näsän, tođa ämära.»

⁹ Isräy-tän-dd änjālos wa s-kärad, idkäl emäsli-net, innä: «Afäl irkäx əwadəm dat-ämudär meγ dat-ättašwer-net, meγ iwär-t ešwäl-net idəm-net meγ äfuss-net,

¹⁰ ijmađ-t äššäk a-s ad-t-isəsəw Mässinäx əlxəmār n-ađkär-net wär-iqger härät wa mad-isānyəl däx-alkas-net wa n-ađkär. Äddinät-en, ad-əqquzzəben däx-əlkäbrit wa ähjäljälän dat-änjālosän wi šaddijnen d-dat-Ašäxol.

¹¹ Äho n-efew wa tän-itixəzzəben, härkuk γas intas. Wär mad-sunfən s-ehäđ wäla s-ašäl äddinät wi ärkäyən i-ämudär meγ ättäšwer-net, d-ere iwar ešwäl n-isəm-net iket-net.»

¹² A-wa ässaγät s-hak eməššeddəj-däx, ibdədet fäll-iman-net, ikuyədet däx-immun s-γisa, ämašäl alämārän n-Mässinäx.

¹³ Əsley qarät-a-wen däx-išənnawän i-emäsli innän: «Əktəb: γur-ašäl-i-däx, tənđəd i-wi äba äxdamän i-Emäli! Tidət a-wen, innä Unfas Šaddijän fäl-a-s ad-sunfən däx-älxidmät-näsän ed, əlkamän-asän imärkedän-näsän.»

Ađkär n-Mässinäx

¹⁴ Əkyadäx härwa a-s ənhäyäx tejäräkt mällät; tejäräkt-en, äqqiima fälla-s ere olähän d-əwadəm ijan takənbut n-təmmənukəla n-oräx, ittaf älgori imsädän däx-äfuss-net.

¹⁵ Izjār-dd änjālos iyyän daγ ehän n-ämudd wa mäqqärän, idkäl emäsli-net s-afälla, innä i-wa äqqimän fäll-tejäräkt: «Säxdəm älgori-näk, aləy, fäl-a-s iwwäđ-dd älwäqq n-a-wen ed äkall inγa šund əttäγam, äbas irha ar amili.»

¹⁶ Innä änjālos a-wen γas, ijār ähaləs wa äqqimän fäll-tejäräkt älgori-net fäll-äkall, oläy sār-s äkall iket-net šund ašəkrəš n-əttäγam inγan.

¹⁷ Oläs-dd daγ änjālos iyyän azəjor n-ehän n-ämudd wa mäqqärän ihän išənnawän, ənta daγ, ittaf älgori imsädän.

¹⁸ Izjār-dd daγ änjālos iyyän tasəskärt ta däx-naγγänät tikutawen, änjālos-en, ənta a-s wa n-efew; idkäl emäsli-net, innä i-änjālos wa ittafän älgori wa imsädän: «Säxdəm älgori-näk wa imsädän, aləy sār-s iləktan n-läxnäb n-äkall ed, aratän-net əγγän.»

¹⁹ Ijār änjālos älgori-net fäll-äkall, inkäđ sār-s läxnäb n-äkall iket-net, ijār-t däx-tebent-ta-däx izimməw i-ad-umas älmital n-ađkär wa mäqqärän ihän Mässinäx.

²⁰ Tämewäy tebent, təzjār aγrəm, izmä-dd däx-s läxnäb, əzjārän-tät-dd injitän n-ašni; injitän-ənnin, timγarän har əwwäđän iγāban n-ibəjwan, əlsän däx-äkall a iwwäđän kärädät timäđ n-kelumetar.

15

Älmäššibatän

¹ Oläsäy day ənhäyäy däx-išənnawän iji n-Mässinäy iyyän ijan təmyäre d-tihusay n-tikunen. Ənhäyäy əssa ənjälosän ətəfənen əssa älmäššibatän; älmäššibatän-en, əntäneḍ a-s wi n-ajilal ed əntäneḍ a dd-maden-isəmdəw aḍkär n-Mässinäy.

² Ənhäyäy ḍarät-a-wen ejärew wa səmmän, oläh-ahi d-täšoka, ähiijäljäl s-efew. Ənhäyäy day äddinät wi əkräšnen tärna fäll-ämudär d-ätəšwer-net d-ämaḍin n-isəm-net, əbdadän fäll-ejärew ənnin n-täšoka, ətəfəfän tihärdänen ti s-təmmälän Mässinäy.

³ Ənzarän əssaḡät-wen-däx təmmal ta n-Mosa wa n-akli n-Mässinäy d-təmmal ta n-Ašəḡol, jannen:

«Emäli Mässinäy-i ilän tärna iket-net,
wär t-illa a ojärän timašalen-näk təmyäre wäla tihusay,
käyy a-s ämänokal n-äddunya təmda;
Ibaran-näk, oḡadän, ämoosän tidət iket-däx-näsän.

⁴ Mi ihälän ad-änn wär käy-äksuḍ?

Änn, wär irh' asəmyar-näk?
Käyy a ḡur-dd-təmda təšəḍje.
Əddəwəlän iket-näsän ad-ärkäḡän data-k
ed iqqud-näk, itbat.»

⁵ Oläsäy akäyad, ənhäyäy ehän n-ämudd d-ehäket wa n-ärkäwäl n-tassaḡt a-s dd-ämera däx-išənnawän.

⁶ Əzjärän-t-dd əssa ənjälosän wi ətəfəfənen əssa älmäššibatän, əlsan älxärir šäddijän mällän, äsimäḡmäḡän, əjbasän s-timəntəkawen n-oräḡ.

⁷ Ikfa iyyän däx härätän wi n-əkkoḡ əddärnen ənjälosän ənnin n-əssa, əssa alkasän n-oräḡ əḍkärnen aḍkär n-Mässinäy-i s-härkuk iddar.

⁸ Ija a-wen ḡas, iḍkär ehän n-ämudd wa mäqqärän äho däx-təssəba n-älxurmät n-Mässinäy d-tärna-net, äbas äddoobät äwadəm wäl' iyyän uješ n-ehän n-ämudd wa mäqqärän har akəyən əssa älmäššibatän wi dd-äwwäyän ənjälosän wi n-əssa.

16

Əssa älmäššibatän əlkammen

¹ Ḍarät a-wen-däx, oläsäy i-mäsällät n-eməsli äššoohen dd-ifalän ehän n-ämudd wa mäqqärän. Innä i-ənjälosän wi n-əssa: «Äḡlät, säḡḡölät fäll-äkall əssa alkasän wi əḍkärnen aḍkär n-Mässinäy.»

² Iḡl' ənjälos wa äzzarän, issänḡäl alkas-net fäll-äkall. Ija a-wen ḡas, əzjärnät-dd tikussawen sämuumnən läbasnen äddinät wi iwär ešwäl n-ämudär, ḡabbädnen tele-net.

³ Issänḡäl ənjälos wa s-əssin alkas-net däx-ejärew wa səmmän. Ija a-wen ḡas, olähän aman n-ejärew d-ašni n-enəmmettən, ämmut a-wa-däx ihän ejärew wa səmmän iket-däx-net.

⁴ Iḡl' ənjälos wa s-käraḍ, issänḡäl alkas-net däx-ijərwan d-ersan wi n-aman, əqqälän aman-näsän ašni.

⁵ Əsleḡ älwäqq-wen i-ənjälos wa ännihädän fäll-aman a-s innä:

«Käyy a oḡadän,
käyy a t-illan, tölled-t,
käyy a šäddijän ed äššäreḡa wa täḡtäsäd, oḡad härkuk,

⁶ fäl-a-s däḡḡ-adəm, əssänḡälän ašni n-iməššeddəjän d-ännäbitän. Ämära, təkfed-tän ašni i-ad-t-əswən ed a-wen-däx a dār-änihäjjän.»

⁷ Oläsäx määllät n-emäslī dd-ifalän tasəskärt ta n-tikutawen häť ehän n-ämudd wa mäqqārän, innä: «Emäli Mässinäx-i ilän tärna iket-net, äššəreḡatän-näk, tidət, oḡadän iket-däx-näsän.»

⁸ Issänḡäl darät-a-wen änjälos wa s-əkkəz alkas-net fäll-täfukt, təjräw täfukt turhäjäť n-ad-səkkənənnəwət e d t-illäm ägg-adəm s-tukəse-net.

⁹ Ad-siknənnəwət tukəse-i-däx mäqqārät dd-ja täfukt dägg-adəm. Hakd a-wen-däx, gaggārän dägg-adəm Mässinäx-i iṭṭafän älmäššibatän-en, unjäyän s-ad-utabän i-ad-səmyārän Mässinäx.

¹⁰ Issänḡäl änjälos wa s-səmmos alkas-net fäll-tasäqqaymut n-təmmənukəla ta n-ämudär. Ija a-wen ḡas, jänät tihay fäll-lamu-net iket-net. Tärmäs tisanť-i-däx mäqqārät dägg-adəm har dd-əqqälän ḡas təddadän ilsawän-näsän,

¹¹ gaggārän Mässinäx-i ihän išənnawän däx-təssəba n-tisanť-näsän d-tikussawen ti sār-sän dd-oräw mäšan, hakd a-wen-däx, wär sār-sän dd-orew a-wen tätubť däx-erk imojjan-näsän.

¹² Issänḡäl ämära änjälos wa s-säḡdis alkas-net fäll-əjärew wa mäqqārän s-itawänna Ifräyti; äqqur-in ejärew-en; əjräwän imänokalän wi dd-fälñen emäynäj zäbo, okäyän.

¹³ Darät-a-wen, ənhäyäx kəraḡ unfasän ämmiḡäsñen olähñen d-ijäran dd-əzjarnen emm n-äḡata d-emm n-ämudär d-emm n-ännäbi wa n-änəsbahu.

¹⁴ A-wen, unfasän n-alšinän wi tajjänen älmät a olähän d-ijitän n-Mässinäx; əkkän imänokalän n-äkall iket-net i-ad-tän dd-sədəwən i-ašäl wa n-amjäř wa mäqqārän n-Mässinäx-i ilän tärna.

¹⁵ Innä Emäli: «Ənhəywät, äqqaläx-käwän-in šund emäkräḡ; tənḡəḡ i-ere wa oḡazän iman-net däx-uzəf, ad-irjəš wär tätwänhäy täkrakiḡť-net.»

¹⁶ Äsdäwän-dd unfasän ənnin n-kəraḡ imänokalän n-äkall s-edägg wa s-itawänna däx-ḡäbranəyya: «Ärmagidun.»

¹⁷ Issänḡäl älwäqq-wen änjälos wa s-əssa alkas-net däx-älhäwa, ija a-wen ḡas, izjār-dd emäslī äššoohen tasäqqaymut ta n-təmmənukəla häť ehän n-ämudd wa mäqqārän; innä emäslī-en: «A-wa ijän, ijä, isälan əmdän.»

¹⁸ Jän essamän d-imäslan, d-ejjajän, ijä äkall ašəkəḡkəḡ ässuksäḡän s-a dd-iwär ägg-adəm ärori n-äkall-däx, wär kälä ija-i dār-s olähän.

¹⁹ Ij' aḡrəm wa mäqqārän kəraḡät tirəzz, oḡän iḡärman n-e d t-illäm əddəwəl; wär hin-ittəwa Mässinäx aḡrəm wa mäqqārän s-itawänna Bābilun; äsoḡä-dd aḡkär-net fäll-imuzäḡän-net šund a-s asməd a əswan käl-äkall-en, ikkäs däx-sän ənniyät. Issəsw'-e ənta əlxəmär wa ihän alkas-net, a-wen a t-ämoosän, asməd n-aḡkär-net wa ojārän.

²⁰ Əlsän aman ikallän wi häñen iwtəlän, äbas t-illa a dd-äzzinjäzän;

²¹ oḡän-dd ijidräsän šuharnen fäll-dägg-adəm, ad-sikuforän däx-təssəba n-älmäššibat wa n-ijidräsän fäl-a-s älmäššibat-en, ija təsəmmə n-tikunen.

17

Isälan n-tamäḡť ta n-tälkäxbat d-ämudär

¹ Ija a-wen-däx ḡas, inn'-ahi iyyän däx-əssa änjälosän wi əṭṭafñen əssa alkasän: «Əyyäw, ad-käy-säknäx äddäyyät wa he-iḡəwän fäll-tälkäxbat ta mäqqārät. Tälkäxbat-i-hi, ənta a-s aḡrəm wa mäqqārän idäyän fäll-asälim n-əjärew wa səmmän.

² Tälkäxbat daḡ ta-däx, oħärän dār-s imänokalän n-äkall əlkäxbu-net, əswän daḡ imuzäḡän n-äkall iket-näsän däx-asməd n-əlkäxbu-net, ikkäs däx-sän a-wen ənniyät.»

³ Irmäs-ahi Unfas Šaddijän, izzəwät-ahi s-tenere tiyyät. Ənhäyäx dihen tamädt täqqimät fäll-ämudär šaggäxän fäll-əktabän ismawän gaggärnen Mässinäx, ila daɣ əssa iɣäfawän d-märaw iskawän.

⁴ Tamädt-ənnin ənta, təlsa isəlsa šaggaynen lanen älqim, təsisahäx ašäl s-uynawän n-oräx d-tikädäyen ti n-tilällaten länen älqim d-timäxwanen. Təttaf dəx-äfuss-net alkas n-oräx idkarän tilušawen d-a-wa xəramän dd-oräw a-wa təmešäl dəx-əlkäxbu-net.

⁵ Timme-net, iktab fälla-s isəm s-ättunkäl älmäxna-net. Ənta da a-wa fälla-s iktäbän:

«A-wa Babilun
ta mäqqärät n-ma-s n-tälkäxbaten
d-tilušawen n-äddunya.»

⁶ Ənhäyäx a-s tamädt-i-däx, ikkäs dəx-s ašni n-iməššeddəjän d-tijuhawen n-Ÿisa wa təswa ənniyät. Ənhäyäx tamädt ənnin ɣas, iqqän eɣäf-in.

⁷ Inn'-ahi ənjälos älwäqq-wen: «Ma iqqanän eɣäf-näk? Ad-hak-älläyey älmäxna n-əddäraj n-tamädt d-ämudär wa näy ilän əssa iɣäfawän d-märaw iskawän.

⁸ Ämudär wa hannäyäd, käla iddär mäšan, äbas iddar, ila s-ad-dd-izjär anu wa wärän ila ider ihän äläxärät, ijješ edägg wa n-eheɣ-net. Äddinät wi s-wär-əktesbän ismawän-näsän dəx-əlkəttab wa n-tämudre ɣur-aläšäl n-äddunya afäl ənhäyän ämudär-ənnin-däx, ad-tän-tärməs täkunt fäl-a-s ämudär-i-hi, käla iddär, ämmut mäšan, ilkam ad-dd-iddär daɣ.»

⁹ Edägg-wa-däx, änihäjja d-təla n-tayətə d-särho. Iɣäfawän n-ämudär wi n-əssa a-s əssayät tiɣayen ti fäll-täqqima tamädt,

¹⁰ əssa iɣäfawän-winnin-hi, əssa imänokalän; ämmun səmmos dəx-sän, iyyän dəx-sän ixkam härwa; wa s-əssa, wär dd-osa härwa mäšan, afäl dd-osa, wär-e äj ar ässaɣät əndärrän dəx-təmmənukəla.

¹¹ Ämudär wa s-käla t-illa, äba, ənta a-s ämänokal wa s-əttam; ənta-i hi, eheɣ-net ɣas a-s oɣad.

¹² Märaw iskawän wi tənähäyäd, əntäneɣ a-s märaw imänokalän wären əney härwa mäšan, hak iyyän dəx-sän dəx, ad-äj äzzäman n-təmmənukəla əndärrän ənta d-ämudär

¹³ fäl-a-s märaw imänokalän-i-hi, oharän ittus, ärhan ad-säxdəmän äššahät-näsän d-əlxəkum-näsän i-ämudär.

¹⁴ Ad-əbdədän iket-däx-näsän, əknəsän Ašəxol mäšan, ad-tän-ärn ed ənta a-s Emäli n-imälan d-Ämänokal n-imänokalän; ad-tän-ärn ənta d-wi dd-iɣra s-iman-net, äsnäfrän n-imayɣdalän.

¹⁵ Inn'-ahi ənjälos daɣ: «Aman wi tənähäyäd təbdad tälkäxbat edes-hasän, aman-en-däx a-s härät dəx-tumasen d-timəttawen tiyyäd d-əddəwəlän iyyäd d-awalän iyyäd.

¹⁶ Ämära, märaw iskawän wi tənähäyäd, ilkam ad-aɣənän aɣkär i-tälkäxbat əntäneɣ d-ämudär, ad-däx-s ahəxän a-wa la iket-net, əzzəfän-tät, äɣrəsän-as, əksən isan-net, särxən a-wa dd-ijläšän dəx-s

¹⁷ fäl-a-s ija Mässinäx dəx-ullhawän-näsän erhet n-ad-ämašälän ittus-net; ad-ännäfhämän fäl ad-särtəyän tädabit ta tän-təkfa təmmənukəla-näsän, äxdəmän särs erhet n-ämudär har itbət mäjräd n-Mässinäx iket-net.

¹⁸ Darät-a-wen daɣ, tamädt ta tənähäyäd, ənta a-s aɣrəm wa mäqqärän ännihädän dəx-imänokalän n-äkall iket-net.»

¹ Darät härätän-win-däx, ənhäyäx ənjälos iyyän a-s dd-əzzubbät işənnawän. Ənjälos-en, emäşşehi n-tikunen a ämoos, äsmäläwlaw s-ännur-net äkall iket-net.

² İdkäl emäsli-net s-afälla, innä:

«Toḍä, ya toḍä,

Babilun ta mäqqärät toḍä!

Äbas täqqal ämära-däx ar edägg əzzağän alşinän,

tähala n-inämmädäsän,

tähänzabbut n-igḍaḍ wi əmmədäsnen

d-imudärän wi ämmidäsnen äsjälähäyenen.

³ İddəwəlän iket-däx-näsän a əswänen däx-asməd n-əlkäxbu-net wa wärän ila eket. İmänokalän n-äkall iket-net ohärän dār-s əlkäxbu-net. Ättužzar n-äkall iket-däx-näsän, ärzäğän däx-ilalän-net wi s-wär t-illa a dār-olähän tihusay wäla nefran.»

⁴ Oläsäx day məsällät n-emäsli dd-ifalän işənnawän innän:

«Äddinät-in, əzjərät-dd ammas n-ayrəm-wa-däx

i-ad-wär dār-s toheräm ibäkkadän-net,

särtəyän-käwän dār-s älmäşşibatän wi fälla-s e-iḍunen,

⁵ fäl-a-s ibäkkadän-net, timtulun har əwwadän işənnawän. Mässinäx day, wär hin-ittəwa erk imojjan-net.

⁶ Äjät-as a-wa təja i-äddinät wi iyyädnen, äxşədät-as anädfus n-a-wa täxşäd; sənnədfəsät-as äşşahät n-alkas-net n-asməd wa təssəwä tamətte.

⁷ Säknät-tät älyizabät d-ayäna ogdähnen d-älxurmät d-tänoflayt ta təkfä iman-net ənta-i jännet däx-iman-net: «Näkk, tämänokalt a ämoosäx, wär heç mişi n-ad-iba ähaləs-in, wär-ilkem day ad-äqqaläx tänuḍäft.»

⁸ A-wen-däx a fäl älmäşşibatän wi has-ətwärnen, ad-fälla-s dd-əjən iyyän n-əjadäl däx-ıyyän n-aşäl, tiḍəw-dd fälla-s tamättant d-tähala d-laç, äks-et efew fäl-a-s Emäli-i tät-e-ısräyän, ila tärna.»

⁹ Älwäqq-wen, ad-əlhən imänokalän n-äkall wi dār-s ohärnen əlkäxbu-net d-tänoflayt-net, ad-səkkələlän fälla-s afäl ənhäyän äho n-efew wa tät-itattän ikk' işənnawän,

¹⁰ ad-əbdədän imämokalän-ənnin-däx ijəj fäl tuksəḍa n-ad-tän-irməs älmäşşibat wa oḍän fäll-ayrəm. İbdədän dihen, ad-jannen:

«Xäxx-däx, unhh xäxx-däx!

Ayrəm-nänäx Babilun,

Babilun wa mäqqärän äşsoohen,

a-wa şäxnet, äşşäreya-net,

wär dd-okey iyyän n-ässağät.»

¹¹ Ättužzar n-äkall, ad-əlhən əntäned-däx, ətṭəfän iba n-ayrəm wa n-Babilun ed äbas t-illa ere ižžənşän ilalän-näsän.

¹² Oräx-näsän d-azrəf d-tikädäyən ti n-tilällaten d-timäywanen d-älxärerän-näsän d-tabduxt ta şäggäğät täsmäxmäğät lät älqim, d-e d t-illäm ännuğ ihan isäğərän wi s-wär räqqis ajäraw-näsän d-e d t-illäm ännuğ n-tähore jat s-isenän n-elwan meç däx-ihəşkan n-aḍutän meç däx-daroğ meç däx-təzoli meç däx-älhor

¹³ d-əlyənfärän d-izədraz wi iyyädnen d-aḍutän d-teldəḍt d-matälxer d-asməd d-əzzäyt d-əjel n-älkäma d-iwan d-tihatten d-ibəjwan d-turfen ti n-amjār d-eklan d-wäla iman n-äddinät.

¹⁴ Ad-äj a-wen-däx iket-net, ad-itawänna däx-Babilun: «Xäxx, unhh, xäxx-däx! Härätän wi s-käla tän-təkned tärha iket-näsän äbä-tän fälla-m, ärrezäğ-näm d-tänoflayt iket-net, ad-t-iba fälla-m, wär-ilkem day ad-tän-tolasäd ajäraw.

¹⁵ Ättužzar daḡ wi ärzäḡnen s-mamāla wa s-kāla t-əjān dāḡ-aḡrəm, ad-has-əbdadān dāḡ-ijəj fāl tukseḡa n-ad-fālla-sān idəw älmäššibāt wa oḡān fäll-aḡrəm, ad-hallān, eṭṭafān iba.

¹⁶ Jannen:

⟨Xäxx-dāḡ,
unhh, xäxx-dāḡ,
aḡrəm-nānāḡ wa mäqqārān irza;
kāla ilsa imālsan n-älxārir əknanen töləmḡe
d-māšār ijan təšuxə ta täsmäḡmäḡāt
iknan təla n-älqim,
ija uḡnawān n-orāḡ d-tikädäyen ti n-tilällaten
d-timäḡwanen.⟩

¹⁷ ḡas ehäre oḡdähān d-wa-dāḡ iket-net, äsbāt-t-in fälla-m iyyān n-ässaḡāt. Äddināt daḡ iket-nāsān wi šašalnen turfen ti n-aman d-iməssukal wi tiwəyən dāḡ-turfen-nāsān, d-wi xaddämnen dāḡ-turfen-nāsān d-wi əddarnen s-a-wa dd-izajjārān ejärew iket-net, əbdadān iket-nāsān dāḡ-ijəj,

¹⁸ əkyadān dāḡ-äho n-aḡrəm wa dāḡ-irḡa efew, jannen: ⟨Wār kāla t-imäl aḡrəm oḡdähān d-wa-dāḡ təmḡäre.⟩

¹⁹ Ad-sawarān äkall iḡāfawān-nāsān, hallān, širšun, eṭṭafān iba, jannen:

⟨Xäxx,
unhh xäxx-dāḡ Babilun!
Aḡrəm wa mäqqārān,
ärrəzāḡ-net a dāḡ-razzāḡān
äddināt iket-nāsān wi länen turfen
ärjäšnen fäll-ejärew māšan,
a-wen-dāḡ iket-net,
äsbāt-in fälla-m iyyān n-ässaḡāt.⟩

²⁰ Ya käl-išənnawān, dāwātāt dāḡ-təssəba n-a-wa s-Babilun, toḡä, təhläk. Täddāwätet tamətte ta n-iməššeddəjān n-Mässināḡ d-inəmmušal d-ännäbitān fäl-a-s, izäl dāḡ-s Mässināḡ terwidəma ta kāwān-təssəkna.⟩

²¹ Irmäs älwäqq-wen änjālos äšsoohen tāhunt ta mäqqārāt tolähāt d-ta fäll-itəzzad älkāma, ijār-tāt-in dāḡ-ejärew, innä:

«Emmək-wa-dāḡ
a-s hin-e-itwəjār aḡrəm
wa n-Babilun mäqqārān s-äššahāt,
iba-t-in s-iiyāt,
wār-ilkem ad-ätiwānhäy.

²² Wār-ilkem ad-dāḡ-s ija emäslī
n-imāwatān n-tihärdānen d-imänzarān
d-imāwatān n-tiḡnab d-tisinsäḡen.
Wār-ilkem, ad-dd-ätiwäjrāw
dāḡ-ammās-nāk, amähhäraw wäl' iyyān,
wār-ilkem ad-ḡur-k ätiwäsła
emäslī n-ere itəzzadān älkāma.

²³ Wār-ilkem ad-dāḡ-s tāḡa tefätelt,
wāla ad-dāḡ-s ənḡawān imazlayān eḡāri.
Ättužzar-nāk, əntāneḡ a-s kāla
ojārān ärrəzāḡ dāḡ-äddunya,
təššəškäd timəttawen iket-nāsnāt
s-išāḡawān-nāk.⟩

²⁴ Babilun ənta, a dāḡ-inḡäl ašni n-ännäbitān

d-iməššeddəjän d-ašni n-äddinät iket-näsän
wi ätwäxrasnen fäll-ärori n-äkall.

19

Tärna ta ija Ašəxol d-azli wa ilkämän dəx-išənnawän

¹ Đarät-a-wen-dəx, əsley i-eməsli əşsoohen dəx-išənnawän olähän d-i n-tamətte təknať əjut, jannet:

«Aleluya!

Amələť Mässinəx,

əlxəllas d-semxar d-tärna,

i n-Mässinəx.

² Äššəreyatän-net, ädduuten, oxadän. Ässođa äššəreyatän-net fäll-taməđt ta n-tälkäxbat məqqärät samađasät äddinät; äzzäl-tät taməttant n-inaxdimän-net.»

³ Tənnä tamətte-ənnin-dəx: «Aleluya! Amələť Eməli fäl-a-s əho n-axrəm wa məqqärän irxän əhoaha s-išənnawän härkuk, wär-ilkem ad-əmmikät.»

⁴ Imda a-wen xas, ärkäxän imxarän wi n-sənatät timərwen d-əkkoz d-härätän wi n-əkkoz əddärnen dat-Mässinəx-i əqqiimän fäll-tasəqqaymut ta n-təmmənukəla, əxbädän-t, jannen:

«Amin!

Aleluya!»

⁵ Innä eməsli dd-ifalän tasəqqaymut ta n-təmmənukəla đarät-a-wen: «Amələť Mässinəx iket-nəwän kəwəneđ-i n-eklan-net; kəwəneđ-i n-imaksadän-net, wi məđroynen hakd wi əššəmnen.»

⁶ Əsley đarät-a-wen i-eməsli iyyän olähän d-i n-tamətte təknať əjut, eməsli-net, oläh d-i n-anji iknan təmxäre mex d-ejjajän əknanen əşşuhu. Ənta da a-wa ijänna eməsli-en:

«Aleluya!

Amələť Eməli

fäl-a-s Mässinəx-i n-Eməli-nänəx,

ila tärna iket-net,

issəťbät Təmmənəya-net.

⁷ Dəwätät-anəx, əjraznet-anəx iman-nänəx, nəsemxäret-t fäl-a-s, əməra-dəx, azli wa n-Ašəxol a dd-iwwəđän, hənne-s dəx təsidəw-as.

⁸ Təjraw əsəlso n-azli izmayän dəx-məşär n-əlxärir iknan tələmđe, əsiiməxməx, šəddiij; məşär-ənnin n-əlxärir, ənta a-s imärkedän wi əmeşälän iməššeddəjän n-Mässinəx.»

⁹ Inn'ahi ənjəlos əməra ad-əktəbəx: «Təndəđ i-äddinät wi dd-e-ətwəxrənen s-aməjaru wa he-ijən əşäl wa n-azli n-Ašəxol.» Oläs dəx, inn'ahi: «Məjräd-wa-dəx, Mässinəx iman-net a dd-ifal; wär t-ih' əššək a-wen.»

¹⁰ Ärkəxəx dat-ənjəlos dəx-ənniyät n-ad-t-əxbədəx məšan, inn'ahi: «Ahaa, wär jed a-di. Akli n-Mässinəx dər-k olähän a əmoosəx nəkk d-ayətma-k wi əxdälnen i-tidət ta dd-əsnəfaläl Yisa. Əxbəd Mässinəx, wär hi-təxbədəd.»

Tidət dəx ta dd-əsnəfaläl Yisa, ənta a dd-əssawəđän ənnəbitän.

Tärna n-Əlmasex

¹¹ Ənhəyəx đarät-a-wen išənnawän əmerän, izjər-tän-dd ebəje məllän. Inay-t əhaləs s-isəm-net: «Əməxdal d-emän n-tidət.» Wär-iššərrəx ar s-iqqud, wär-ikənnəs ar s-iqqud.

¹² Əhijäljäl-nät tiťtawen-net šund efew; eyäf-net, warnät tikənbuten ti n-təmmənukəla, iktab fälla-s isəm s-ənta xas a t-issanän.

¹³ İlsa abärnuš ilmaxän dəx-ašni, isəm-net: «Məjräd n-Mässinəx.»

¹⁴ Ælkamän-as ɔlɣəskärän wi n-išənnawän nayän ibəjwan mällolnen, ɔlsan timälsaten n-älxärir mällolnen, šaddijnen, əknanen tələmde.

¹⁵ Emm-net, təzjar-t-dd təkoba təmsädät s-ənta-en-däɣ a-s mad-iwət əddəwəlän, ärn'-en. Ad-fälla-sän ixkəm s-əššahät olähän d-wa n-təzoli; ad-däɣ-sän dd-ikkəs Mässinäɣ-i ilän tärna iket-net adkär-net wa mäqqärän s-əmmək wa s-izimməw əwadəm ara n-läɣnəb i-ad-däɣ-s dd-ikkəs aman-net.

¹⁶ Abärnuš-net d-taɣma-net, iktab fälla-sän:

«ÄMÄNOKAL N-IMÄNOKALÄN,
EMÄLI N-IMÄLAN».

Ælhəllak n-išənja

¹⁷ Ænhäyäɣ ɖarät-a-wen änjəlos ibdadän däɣ-täfukt, äsɣärät s-afälla i-igɖad iket-näsän wi taggädnen däɣ-älhəwa wa uəjən, inn'-asän: «Idawät-dd i-aməjaru wa mäqqärän n-Mässinäɣ.

¹⁸ Æyyäwät, äksät isan n-imänokalän d-isän n-imizärän n-ɔlɣəskär d-isän n-ɔlɣəskär d-isän n-ibəjwan d-wi n-äddinät wi tän-näynen, isan n-äddinät a ämoosän-däɣ, wi n-ilällan hakd wi n-eklan, isan n-wi mädroynen hakd wi əššämnen.»

¹⁹ Ænhäyäɣ älwäqq-wen ämudär wa äzzarän d-imänokalän n-äkall d-ɔlɣəskärän-näsän, äddewän-dd i-ad-əknəsän ähaləs wa inäyän ebäje d-ɔlɣəskär-net.

²⁰ Ittärmäs ämudär iman-net s-tizarät, ittärmäs-dd ɖara-s ännäbi wa n-bahu ijan a olähän d-ijitän n-Mässinäɣ dat-ämudär i-ad sär-sän išəšk äddinät wi iwär azəzlo wa n-ämudär äybädnen ättäšwer-net. Ätwäjär-in ämudär d-ännäbi wa n-bahu däɣ-tebänɣəwt n-əlkəbrit ähijäljälän.

²¹ Täñɣa təkoba ta dd-təzjarät emm n-ähaləs wa inäyän ebäje ɔlɣəskär-näsän iket-net, əyyəwänän igɖad ɖarät-a-wen däɣ-timäɣsa-näsän.

20

Efäɖ n-awätay wa n-Təmmənəya

¹ Ænhäyäɣ ɖarät-a-wen änjəlos iyyän dd-ifalän išənnawän ittaf däɣ-äfuss-net asäyar n-anu wa wärän ila ider ihän zohännäma d-esässär äzzayän.

² Irmäs-dd äɣata wa mäqqärän, a-wen aššäl wa n-ibda s-ənta a-s Iblis d-Äššäyṭan, ikräd-t i-ad-äj efäɖ n-awätay ikrad

³ təzzar, ijär-t-in däɣ-anu wa wärän ila ider ihän zohännäma, ättubbät-t-in fälla-s i-ad-äbas ilkam ad-äššiška äɣata əddəwəlän har akəy efäɖ n-awätay-ənnin-däɣ təzzar, ämar-dd i-härät n-äzzäman əndärrän.

⁴ ɖarät-a-wen, ənhäyäɣ tisäqqima n-təmmənukəla, əjrəwän äddinät wi fälla-snät äqqimnen turhajät n-ad-äytəsän äššərəɣa. Ænhäyäɣ daɣ iman n-äddinät wi s-hin-əttəfräsän iɣäfawän-näsän däɣ-təssəba n-immun wa jän s-tidət ta dd-äsnəfaläl ɣisa d-tənna ta n-Mässinäɣ. Wär-äɣbedän ämudär, wäla äššänäm-net, wär-iwer daɣ azəzlo-net timmawen-näsän wäla ifassän-näsän. Ænkärän-dd daɣ inəmmuttan, ohärän d-Älmaseɣ Təmmənəya har okäy efäɖ n-awätay.

⁵ Wär dd-ənkerän inəmmuttan wi iyyädnen har okäy efäɖ n-awätay-wənnin-däɣ. Wi s-dd-ənkerän iman-näsän jer-inəmmuttan, jän-dd s-a-wen-däɣ tanäkra ta s-itawänna ta täzzarät.

⁶ Təndəd i-äddinät wi hänen tanäkra-ten-däɣ täzzarät. Iššəšdäj-tän Mässinäɣ, ikräs-tän, ad-äbas fälla-sän la tamättant ta s-sänatät tärna; ad-umasän käl-tikutawen i-Mässinäɣ d-Älmaseɣ, ahərən d-Älmaseɣ Təmmənəya däɣ-efäɖ n-awätay-wen-däɣ.

Ælhəllak n-Iblis d-ajhanän-net

⁷ Afäl okäy efäɖ n-awätay-wen-däɣ, ad-dd-ämar Iblis, izjär-dd takärmüt-net;

⁸ dihen, ad-iglew i-ad-äkkärräs eoddewälän wi wärnen täkost n-äkall. Eddewälän-en-hi, isem-näsän: Žuž d-Mäyžuž. Ad-tän-dd-isədew iket-näsän i-amjār har ejən ejut-wa-däy jānät tiblalen n-äkall ti ənsanen däy-tarrayt n-ejārew wa səmmän,

⁹ əlsän ārori n-äkall iket-net, wätän-dd afāraj i-iməšseddejän n-Mässinäy d-aḡrəm wa ikna tārha. Han a-wen-däy a-s dd-ifäl efew išənnawän, ilhäs-tän, issārḡa ajhanän n-eoddewälän wi has-əlkämnen.

¹⁰ Älwäqq-wen, ittärmäs Iblis-i išaşken tamətte, ätwäjār-in däy-tebänḡawt n-əlkäbrit təhijäljälät ta ih' əmudār d-ännäbi wa n-bahu; ad-tirkətrəkitän dihen ehäḡ d-ašäl.

Ašäl wa n-tebädde

¹¹ Ənhäyāḡ ḡarät-a-wen tasäqqaymut n-təmmənukəla mäqqārät mällät d-ere wa fälla-s äqqiimän, äffoqqen-as išənnawän d-äkall, wār-olesän atwənhəy.

¹² Ənhäyāḡ daḡ inəmmuttan wi mädroynen hakd wi əššämnen əbdadän iket-däḡ-näsän dat-tasäqqaymut ta n-təmmənukəla, əmerän əlkəttabän, əmera daḡ əlkəttab iyyän s-edes, əlkəttab-en, ənta a-s əlkəttab wa n-tämudre. Ätwäšräḡän inəmmuttan s-iyyän-iyyän s-a-wa əmešälän iktabän däy-əlkəttabän.

¹³ Ibsä-dd ejārew wa səmmän äddinät wi ikša, täsoḡäl-dd tamättant d-älaxärät a-wa hin-əlmäzän däy-äddinät, ätwäšräḡän iket-näsän s-iyyän-iyyän s-a-wa əmešälän.

¹⁴ Təttärmäs-dd tamättant d-älaxärät, ätwäjārän-in däy-ebänḡ wa n-efew. Tamättant-ten-däy tiwəyät əwadəm s-edägg-wen-däy a-s tamättant ta s-sənatät.

¹⁵ Ere s-wār-ittəjrāw isəm-net däy-əlkəttab wa n-tämudre iket-net, ätwäjār-in däy-ebänḡ wa n-efew.

21

Išənnawän äynaynen, äkall äynayän

¹ Ənhäyāḡ ḡarät-a-wen išənnawän äynaynen d-äkall äynayän. Äb' išənnawän wi ärəwnen, äba daḡ äkall wa ärəwän, äb'-in daḡ ejārew wa səmmän.

² Ənhäyāḡ ḡarät-a-wen aḡrəm wa äynayän šäddijän n-Yärussälam dd-äzizäbbät Mässinäy, ifal-dd išənnawän. Aḡrəm wa ənhäyāḡ, äsisahäḡ ašäl šund tämaḡlayt dd-təzlayät s-əhaləs-net.

³ Əsleḡ älwäqq-wen i-eməsli äšsoohen dd-ifalän tasäqqaymut ta n-Təmmənəya, innä: «Edägg wa n-Mässinäy šäddijän a-wa; Mässinäy, izzäḡ-dd əmära tamətte, mä-l-dd taməzzuyt n-Mässinäy jer-tamətte-net.

⁴ Ad-hin-irsəy imettawän-näsän, iba tamättant, iba uḡəf n-iba; iba tahäla; iba tisanant fäl-a-s, ädduuttät a-s a-wa n-ibda ärəwän, ibbədäy, ijjəwäy.»

⁵ Innä älwäqq-wen wa äqqiimän fäll-tasäqqaymut ta n-təmmənukəla: «Ämära, härät iket-net, ad-iynay.» Inn'-ahi ḡarät-a-wen: «Əktəb a-wen ed məjräd-wa-däḡ, oḡad, ädduuttät.»

⁶ Oläs daḡ, inn'-ahi: «Isälän, əmdän! Näkk a-s Tizarät, näkk a-s Tilkamät,† näkk a-s Sānto, näkk a-s Sämdo; ere äffudän-däḡ, ad-t-säswäḡ bännan däḡ-aman n-erəs wi hakkänen tämudre ta n-tidət.

⁷ Ere irnän-däḡ, ad-has-äjäḡ älhäk wa n-ad-has-umasäḡ Mässinäy, umas rure-ḡ

⁸ mäšan, däḡ-isälän n-iməjjiwaḡ d-wi wären la älxal d-wi n-iməkkərukaḡ d-imäjjan n-iman d-inəmašrayän d-imäššäḡawän d-imäššanämän, əntäneḡ, edägg-näsän žohännäma, a-wen tebänḡawt ta n-əlkäbrit s-härkuk ähijäljäl; ənta-den-däḡ a-wa ämoosän: tamättant ta s-sənatät.»

Yärussälam ta täynayät

† 21:6 21:6 Däḡ-Tälyunanit, itawänna i-Tizarät: Älfa, itawänna i-Tilkamät: Omega.

⁹ Inn'-ahi iyyän dāḡ-ānjālosān wi n-əssa s-kāla eṭṭāfān əssa alkasān wi eḍkārnen əssa älmāššibatān wi əšräynen: «Ëyyāw, ad-kāy-sāknāḡ tāmazlayt ta n-hānne-s n-Ašāḡol.»

¹⁰ Irmās-ahi Unfas Šaddijān, izzəwāt-ahi ānjālos s-afālla n-aḍaḡ iknan aḍkul, issəkn'-ahi Yārussālam ta tāynayāt, šaddijāt dd-āzzābbāt Māssināḡ təfal-dd išənnawān,

¹¹ āsisāmāḡmāḡ-tāt ānnur n-Māssināḡ, ja asmāḡmāḡ wa tājj tamāḡwant dāḡ-ti n-tilāllaten, šund tekādāyt ta n-žasəb s-tāddobed ad-sār-s tənḡeyād iman-nāk šund tāšoka.

¹² Ēnhāyāḡ āḡalla-net ikna təššəjrət, ila mārawāt tishar d-sānatāt, hak emm-dāḡ, oḡaḡ-t ānjālos iyyän. Tishar-ənnin, əktabān fālla-snāt ismawān n-mārawāt tiwsaten d-sānatāt ti n-Išrayil.

¹³ Hak tamdujt-dāḡ, ənnadnāt sār-s kāraḍāt tishar: kāraḍāt s-emāynāj, kāraḍāt s-afālla, kāraḍāt s-ajus, kāraḍāt s-atāram.

¹⁴ Āḡalla-i-hi, āssas-net, iday s-mārawāt tihun d-sānatāt s-hak iyyāt-dāḡ, iktab fālla-s isəm n-iyyän dāḡ-inəmmušal wi n-māraw d-əssin n-Ašāḡol.

¹⁵ Iṭṭaf ānjālos wa hi-imməjrādān taskət n-orāḡ s-itəkkat aḡrəm d-tishar-net d-āḡalla-net.

¹⁶ Āḡrəm-ənnin, ārribāḡ, oḡdāhān išrutān-net iket-dāḡ-nāsān. Ikāt ānjālos aḡrəm s-tāborit-net, os'-e, išrutān-net ikkəžān, oḡdāhān, hak iyyän dāḡ-sān ikat əssin afdān n-kelumetār d-sānatāt timaḍ d-sānatāt timərwen, a-wen-dāḡ daḡ a dār-togdāh tebādde-net.

¹⁷ Ikāt daḡ āḡalla, os'-e tebādde-net, temeḍe n-aḡil d-əkkəzāt timərwen d-əkkəz s-taskət ta s-itəkkat.

¹⁸ Āḡalla, ikna s-tāhunt ta n-telāllit s-itawānna žasəb, aḡrəm iman-net iday s-orāḡ šaddijān, orāḡ-en daḡ, āddoobāt āwadəm ad-sār-s inhəy iman-net šund tāšoka fāl asmāḡmāḡ-i-dāḡ ija.

¹⁹ Tihun ti n-āssas n-āḡalla n-aḡrəm, ədlajnāt s-ānnuḡ n-tihun ti n-tilāllaten lānen ālqim iket-nāsnāt: tāhunt ta tāzzarāt, təkna dāḡ-tāhunt ta n-telāllit s-itawānna žasəb; ta s-sānatāt, təkna dāḡ-ta s-itawānna safir; ta s-kāraḍāt təkna dāḡ-ta s-itawānna zakkāt; ta s-əkkəzāt, təkna dāḡ-ta s-itawānna amārod;

²⁰ ta s-səmmosāt, təkna dāḡ-ta s-itawānna onikəs; ta s-sādisāt, təkna dāḡ-ta s-itawānna sarədwān; ta s-əssayāt, təkna dāḡ-ta s-itawānna kārzolit; ta s-əttamāt, təkna dāḡ-ta s-itawānna beril; ta s-təzzayāt, təkna dāḡ-ta s-itawānna tobaz; ta s-mārawāt, təkna dāḡ-ta s-itawānna, kārizobāraz; ta s-mārawāt d-iyyāt, təkna dāḡ-ta s-itawānna, tirkāwaz; ta s-mārawāt d-sānatāt, təkna dāḡ-ta s-itawānna, amatist.

²¹ Hak tashārt-dāḡ-tin-dāḡ n-mārawāt d-sānatāt, tamāḡwant; hak tashārt-dāḡ, təddas s-ānnuḡ n-tamāḡwant iyyän. Tišarriten n-aḡrəm-wa-dāḡ, əknanāt s-orāḡ s-āddoobāt āwadəm ad-sār-s inhəy iman-net šund tāšoka.

²² Aḡrəm-i-hi, wār dāḡ-s ənḡeyāḡ ehān n-āmudd wa māqqārān fāl-a-s Emāli Māssināḡ-i ilān tārna iket-net d-Ašāḡol a-s ehān n-āmudd-net.

²³ Wār-āmḡatār aḡrəm s-tāfukt wāla s-ewār i-ad-sār-sān inhəy āwadəm fāl-a-s, āsimālāwlāw-t ālxurmāt n-Māssināḡ. Ašāḡol iman-net a-s, tefātelt-net.

²⁴ Ānnur-net a-s ārjašān əddəwəlān, Māssināḡ a-s dd-tiwəyān sār-s imānokālān tirəzzaḡ-nāsān d-semḡar-nāsān.

²⁵ Tishar n-aḡrəm, ad-āmerānāt ašāl iket-net, wār-ilkem fāw ad-āḡfalnāt ed, wār-ilkem ad-fālla-s ija ehād.

²⁶ Ad-sār-s dd-awəyān əddəwəlān a-wa lān āḡusken d-tirəzzaḡ-nāsān d-semḡar-nāsān

²⁷ māšan, aḡrəm-i-dāḡ, wār t-dd-e-ijjəš enämmädäs wāla ere əšlanāt tiluṣawen wāla ānəsbahu; wār t-dd-e-ijjəš ḡas ar əddināt wi s-əktābān ismawān-nāsān dāḡ-əlkəttab wa n-tāmudre-i s-ənta a-s əlkəttab wa n-Ašāḡol.

22

¹ Ɖarāt-a-wen-dāḡ, issəkn'-ahi daḡ ānjəlos ejərew n-aman wi n-tāmudre, a-wen aman šaddiijnen, əsiməḡmāḡān šund tāšoka. Ejərew-wa-dāḡ, iffay-dd dāḡ-tasəqqaymut ta n-təmmənukəla n-Mässināḡ d-Ašāḡol.

² Injay s-edəgg n-aḡrəm wa dāḡ-tažəmḡān əddināt. Hak asəlim n-ejərew-en, idwal fälla-s ahəšk wa n-tāmudre itirəwān mərəw ihəndəggan dāḡ-awātay d-əssin, hak ewār-dāḡ, ija tirwe təynayāt. Ifərketān-net a isasəfarān i-əddunya, təzzəy.

³ Aḡrəm-wa-dāḡ, wār-ilkem ad-dāḡ-s əttijrəw ere əsibānnān Mässināḡ. Tasəqqaymut n-təmmənukəla n-Mässināḡ d-Ašāḡol a ihan aḡrəm-ənnin-dāḡ; aḡrəm-en-dāḡ daḡ, a dāḡ-t-e-ḡabbādān eklan-net,

⁴ ənhəyān idəm-net ed iktab isəm-net fəll-timmawen-nāsān.

⁵ Wār-ilkem ad-dāḡ-s ij' ehəḡ, wār-ilkem ad-əmiḡatār əwadəm s-efew n-tefətelt, wāla s-ənnur n-təfukt fəl-a-s, ad-fälla-sān isəssəməḡmāḡ Eməli Mässināḡ ənnur-net, əṭṭəfān Təmmənəya həkuk.

Təmmənəya n-Əlmaseḡ ta təylələt

⁶ Oləs daḡ ānjəlos, inn'-ahi: «Isəlan-wi-dāḡ, ədduutten, āniihəjjān d-tafləst. Eməli Mässināḡ-i isaməjradān ānnəbitān, ənta a dd-əšməšālān ānjəlos-net i-ad-əlləḡāt i-eklan-net a-wa s-išwar ija.»

⁷ Ʋisa, innā: «A əndərrān ḡas, oseḡ-kəwān. Təndəḡ i-ere wa əqqiimān əsijəd i-hərātān wi s-ənnān ānnəbitān, əktābān-tān dāḡ-əlkəttab-wa-dāḡ.»

⁸ Əməra-hi, nəkk Exya, hərātān-wi-dāḡ, əsleḡ-asān, ənhəyāḡ-tān. Ɖarāt a-s tān-ənhayāḡ, d-a-s hasān-əsleḡ, ərkəḡāḡ dat-ānjəlos wa hi-tān-issəknān i-ad-t-əḡbədāḡ

⁹ māšan, inn'-ahi: «Ahaa! Wār jed a-di, nəkk akli šund kəyy a əmoosəḡ, nəkk d-ayətma-k wi n-ānnəbitān d-ere omanān s-məjrad n-əlkəttab-i-dāḡ iket-net, Mässināḡ ḡas a-s kəy-iwar əlḡibadāt-net.»

¹⁰ Inn'-ahi Ɖarāt-a-wen: «Wār təfferəd iməjridān wi issəlməd Mässināḡ inəmмуšal-net, əktābān-tān dāḡ-əlkəttab-wa-dāḡ ed a-wa dāḡ-əssewəlān, išwar ija.

¹¹ Wa wārān itəjj a olaḡān, ānn'-as ad-isiwəḡ dāḡ-təlləbāst; wa n-enämmädäs, ihəlet s-data dāḡ-asəmmädəs n-iman-net, wa oḡādān, isiwəḡdet dāḡ-iqqud-net, wa šaddijān, isiwəḡdet dāḡ-təšədje-net.»

¹² Inn'-ahi Ʋisa: «A əndərrān ḡas, oseḡ-kəwān, əwwayāḡ i-hak əwadəm əlhək n-a-wa has-jān imojjan-net.

¹³ Nəkk a-s Tizarāt, nəkk a-s Tišrayāt,† heḡ eḡäf, heḡ əjilal, nəkk a-s Sənto, nəkk a-s Səmdo.»

¹⁴ Təndəḡ i-əddināt wi əššəšdəjnen isəlsa-nāsān, ikf'-en a-wen turhajāt n-ad-əkšən ara n-ahəšk wa n-tāmudre d-turhajāt n-ujəš s-imawān n-aḡrəm-wa-dāḡ

¹⁵ māšan, iməssəxərən d-inəmмуšal n-əlkəxbu d-iməjjan n-iman d-iməššanəmān† d-inəsbuha, xərəm-asān aḡrəm-en.

¹⁶ Nəkk a-wa Ʋisa; nəkk a hin-əšməšālān ānjəlos-in sār-wān i-ad-hawān-dd-isənnəfiləl hərātān-wi-dāḡ dāḡ-əlkənīsäten. Nəkk a-wa Ʋisa wa n-ahəya n-Dawəd s-ətwānna ilkam ad-ixkəm, nəkk a-s tatrit ta n-tifawt tisməḡmiḡāt.»

† 22:13 22:13 Dāḡ-Təlyunanit, itawānna i-Tizarāt: Əlfa, itawānna i-Tilkamāt: Omega. † 22:15 22:15 Iməššanəmān (eməššanəm): Əddināt wi ḡabbādnen əššanəmān.

¹⁷ A-wen-däx a fäl, Unfas Šaddijän hakd-däx tämazlayt əttafän iyyän n-emm, jannen: «Hyäw!» Ännet day wa isällän i-isälan-wi-däx: «Hyäw!» Ere äffudän-däx, aset-dd; ere irhän aman əddärnen-däx, ilkəwet, əswet däx-sän bännan.

Ajilal n-mäjräd

¹⁸ Näkk Exya, ällexey i-äddinät iket-näsän wi əslänen i-härätän wi s-innä Mässinäx i-inəmmušal-net, əktäbän-tän däx-əlkəttab-i-däx. Əkkasäx-käwän däx-taxdärt: isälan-wi-däx, ere fälla-sän əssewədən härät, ilmədet a-s ad-isiwəð Mässinäx fäll-a-wa has-ikittəw əlməşşibatän wi s-ätwəjjän isälan-näsän däx-əlkəttab-wa-däx.

¹⁹ Afäl day ikkäs əwadəm härät däx-iməjridän-wi-däx s-ätwänna i-inəmmušal ad-tän-əktəbän, əktäbän-tän däx-əlkəttab-wa-däx, ad-iqqəl Mässinäx s-əjadär wa has-ija däx-ahəşk wa n-tämudre d-axrəm wa šaddijän s-isiḡul əlkəttab-wa-däx isälan-net.

²⁰ Ere wa s-ənta a ḡur-t-təlla tidət n-härätän-wi-däx iket-näsän, ənta a innän: «A əndərrän ḡas, oseḡ-käwän.» Amin! Emäli Yisa, əqqəl-dd.

²¹ Issənsä fälla-wän Emäli Yisa ännuxmət iket-däx-näwän. Amin!